


Chyoiyúng
chyumlaiká:
dangshikaq asik; Zaiwa



New Testament in Zaiwa

Chyoiyúng chyumlaiká: dangshikaq asik; Zaiwa New Testament in Zaiwa

copyright © 2009 Wycliffe Bible Translators, Inc.

Language: Zaiwa

Translation by: Wycliffe Bible Translators, Inc.

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9781921445408

The New Testament

in Zaiwa

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files dated 29 Jan 2022
23f9fc55-a8a4-59ef-9513-707ec336b0ee

Contents

Mahte	1
Markuq	42
Lukaq	69
Yohan	114
Lagyo	148
Romaq	188
1 Korinhtuq	207
2 Korinhtuq	225
Galatiq	237
Ehpesu	244
Hpilipi	250
Kolose	255
1 Htesaloni	260
2 Htesaloni	264
1 Timohti	267
2 Timohti	272
Tituq	276
Hpilemon	278
Hebre	279
Yakuq	293
1 Petruq	298
2 Petruq	303
1 Yohan	306
2 Yohan	311
3 Yohan	312
Yude	313
Shing-rán	315

MAHTE é Gabú Danglù Laiká (The Gospel of Matthew)

*Yesuq É Byùxik Shap Kyô É Hkyô
Luk 3:23-38*

¹ Abraham é awut ashín, Dawiq é yhangzo yhangshu,* Yesuq Hkrisduq é byùxik labaù gi, a-ô mã é eq rajung za nghut lhê.

² Abraham gi, Isak lé hkû;

Isak gi, Yakup lé hkû;

Yakup gi, Yudaq eq yhanggu yhangmâng pé lé hku é nghut lhê;

³ Yudaq gi, Hparet eq Zera lé hkû, haù nhik é yhângnu gi, Tamar nghut ri.

Hparet gi, Hesrun lé hkû;

Hesrun gi, Ram lé hkû;

⁴ Ram gi, Aminada lé hkû;

Aminada gi, Nashon lé hkû;

Nashon gi, Salamun lé hkû;

⁵ Salamun gi, Buaq lé hkû;

Buaq é yhângnu gi, Rahap nghut ri.

Buaq gi, Obet lé hkû;

Obet é yhângnu gi, Ruhtaq nghut ri.

Obet gi, Yese lé hkû;

⁶ Yese gi, Hkohkâm Dawiq lé hkû;

Dawiq gi, Sholumon lé hkû; Sholumon é yhângnu gi, Uriaq yhangmyi dut wú sù nghut ri.

⁷ Sholumon gi, Rehoboam lé hkû;

Rehoboam gi, Abiyaq lé hkû;

Abiyaq gi, Asa lé hkû;

⁸ Asa gi, Yehoshaphat lé hkû;

Yehoshaphat gi, Yoram lé hkû;

Yoram gi, Uzi-aq lé hkû;

⁹ Uzi-aq gi, Yohtam lé hkû;

Yohtam gi, Ahaza lé hkû;

Ahaza gi, Hezekiaq lé hkû;

¹⁰ Hezekiaq gi, Manase lé hkû;

Manase gi, Amon lé hkû;

Amon gi, Yosiaq lé hkû;

¹¹ Yosiaq gi, Babelon má shúm dut huí é hkûn, Yehkoniaq eq yhanggu yhangmâng pé lé hku é nghut ri.

¹² Babelon má shúm dut huí é htâng má,

Yehkoniaq gi, Shalahtila lé hkû;

Shalahtila gi, Zerubabelaq lé hkû;

¹³ Zerubabelaq gi, Abiut lé hkû;

Abiut gi, Eliakim lé hkû;

Eliakim gi, Azor lé hkû;

¹⁴ Azor gi, Zaduk lé hkû;

Zaduk gi, Ahkim lé hkû;

Ahkim gi, Eliut lé hkû;

¹⁵ Eliut gi, Eliaza lé hkû;

Eliaza gi, Mahtan lé hkû;

Mahtan gi, Yakup lé hkû;

¹⁶ Yakup gi, Mariq é yhanglâng Yosep lé hku é nghut ri;

Mariq gi, Hkrisduq gà é Yesuq lé hku é sù nghut ri.

¹⁷ Haù mù, Abraham é pyat mai Dawiq é pyat jé shoq gi, byùxik raxe myi xik; Dawiq pyat mai Babelon má shúm dut huí é hkûn jé shoq gi, byùxik raxe myi xik; shúm dut huí é hkûn mai Hkrisduq† é pyat jé shoq gi, byùxik raxe myi xik nghut ri.

*Yesuq Hku Lé Lo É Hkyô
Luk 2:1-7*

¹⁸ Yesuq Hkrisduq hku lé lo é hkyô gi, a-ô mã é eq rajung za nghut ri: Yesuq é yhângnu Mariq gi, Yosep eq dúng tô é sù nghut ri; nghut kôhng, yhangnhik a zùm shi má, yhang gi, Chyoiyúng Woi-nyí mai zogúng dut bê nghut ri.

¹⁹ Yhâng é yhumsing hpó Yosep gi, dینگmán sù nghut luí, yhang lé byu pé hí má hoq a kâm lhoq hpu nau é yanmai, tsik za lhoq kâng pyám rá dá ri.

²⁰ Nghut kôhng, yhang haù su myit nyi é hkûn, yhupmoq má, haù Yhumsing é mau-mang lagyo gi, yhang lé, lé htoq shit luí, "Dawiq é yhangzo yhangshu Yosep é, haù náng é yhumsing myhí Mariq lé hâng yù rá hkyô lé, hkâ-myit chiq; haù mù gà le, yhang wun tô é zoshâng gùng gi, Chyoiyúng Woi-nyí dông lo é nghut lhê.

²¹ Yhang gi, yuqzo rayuq hkû rá nghut luí, nàng gi, zoshâng haù lé, Yesuq nghù mying myhing byi ra rá nghut lhê; hkâsu mù gà le, Yhang gi, Yhâng é byu pé lé, yhangmoq é yubak mara mai hkyi yù rá sù nghut lhê." ga taí ri.

²² Shí hkyô banshoq gi, Garai Gasâng eq, haù myiqhtoi dông taí é dang lé lhoq dik é nghut ri.

²³ Myiqhtoi dang haù gi, "Haù zomyi gyíng gi, zogúng dut luí, yuqzo rayuq hkû rá nghut lhê; Yhâng é mying lé gi, Emanuelaq ga kó rá nghut lhê."* gà ri. Hau é lichyúm gi, "Garai Gasang gi, nga-nhúng eq rahá nghut nyi lhê." gà é nghut lhê.

²⁴ Yosep gi, yhup bún lo é hkûn, haù Yhumsing é maumang lagyo taí é eq rajung za, Mariq lé, yhangmyi dông yhúm má shui yù bê nghut ri.

²⁵ Nghut kôhng, yhang gi, yuqzo haù hku é hkûn jé shoq, Mariq eq gungsho a zùm nghut ri. Yuqzo haù lé, yhang gi, Yesuq ga myhing byi ri.

2

Buihtoq Hkyam Mã É Hpaqchyí Bò Bang

¹ Herut hkohkâm up nyi é u lé, Yuda mau mã é Betlehem wà mã Yesuq lé hku é

* **1:1** Awut ashín eq yhangzo yhangshu gà é lé, Chyúmdang ra-am má, "yhangzo" ga le bo tô lhê. † **1:17** Grik dong Hkrisduq gà é gi, xù but hui Sù gà é lichyúm nghut mù, Hebre dong Mesaia gà é eq rajung za nghut lhê. * **1:23** Esai

nghut ri. Hau htâng, buihtoq hkyam mâ é hpaqchyí bò bang gi, Yerusalem wà mó má jé lé kômù,

² "Haù hku lé lô bê Yudaq byu pè é Hkohkâm gi, hkâm nghut lhê lú? Yhâng é kyí lé, buihtoq hkyam má ngamoq myàng luí, Yhang lé noq rà matú jé lé é nghut lhê." ga luí, myí akò nghut ri.

³ Herut hkohkâm gi, haù hkyô lé wó gyo jáng myít myô nyí ri; hau htoq agó, Yerusalem wà mó má é lunglhang bang le, myít myô bum akò nghut ri.

⁴ Haù mù luí, yhang gi, byu pè é hkyangiong agyi pé eq tará sará pé banshoq lé, jì tsing yù mù, haù Hkrisduq hkâmá hku lé lô rà nghut é hkyô lé myí ri.

⁵ Haù hkùn, yhangmoq gi, "Yuda mau Betlehem wà má nghut lhê. Hkásu mù gà le, shí hkyô eq séng luí, haù myiqhtoi ká tô é má,

⁶ Yudaq mau má é Betlehem wà ê, nàng gi, Yudaq mau má é wà pé má, je tiq sù a nghut;

hkásu mù gà le, ngá é Israelaq byu pé lé upzúng rà Zau gi, nàng chyáng mai htoq lô rà nghut lhê.[✧]

ga bo tò ri." ga tù tai akò.

⁷ Hau htâng, Herut gi, haù hpaqchyí bò bang lé haq jì yù mù, kyí lé htoq shit é ahkyíng lé, yhangmoq chyáng mai hkyak wó myí sê yù bê nghut ri.

⁸ Haù mù, yhang gi, "Nungmoq, zoshâng haù lé rago é ho wú keq. Ngò le, Yhang lé é wó noq rà matú, Yhang lé nungmoq é myàng eq yhang, ngo lé lo shit kyo keq." ga tai luí, haù bang lé Betlehem wà shut nhang kat bê nghut ri.

⁹ Yhangmoq gi, haù hkohkam é dang lé gyô yu é htâng má, htoq e ló bekò nghut ri. Haù buihtoq hkyam má yhangmoq myàng é kyí gi, haù zonú nyí é ahtoq ang ang má lô nô é jé shoq, yhangmoq é hí má e ló byí ri.

¹⁰ Yhangmoq gi, kyí haù lé myàng jáng, gyai yhang gabú bum akò nghut ri.

¹¹ Yhangmoq gi, haù yhùm má wang e ló kô é hkùn, zonú eq yhângnu Mariq lé myàng kômù, hkyihput htuq luí, haù zonú lé noqkuq akò; hau htâng, yhangmoq é sutdek pé lé le hpóng luí, hìng, namngón jung loban eq mura^{*} pé lé yù mù, Yhang lé chyunghuq byí akò nghut ri.

¹² Yhangmoq gi, Herut chyáng a dum taù lò rà matú, yhupmoq má, yhangmoq lé sidiq byí é hui kômù, hkyô gó hkat dng yhangmoq é mau shut taù lò bekò nghut ri.

Egutuaq Ming Shut Hpaq E É Hkyô

¹³ Yhangmoq lò byuq é htâng má, haù Yhumsing é maumang lagyo rayuq gi, Yosep lé yhupmoq má htoq shit mù, "Toq aq! Haù

zoshâng eq yhângnu lé, Egutuq ming shut shuí hpaqng é aq. Ngò, nang lé dum jì yu é ahkyíng jé shoq, haù má nyí nyí keq. Haí mù gà le, Herut gi, zoshâng haù lé sat rà matú, ho nyí bê nghut ri." ga tai ri.

¹⁴ Haù mù, yhang gi, toq luí, myín lé yhang, zoshang me lé shuí chùng mù, Egutuq ming shut e ló bê nghut ri.

¹⁵ Yhangmoq gi, Herut shi é jé shoq, haù má nyí nyí akò. Haù gi, "Ngá zo lé, ngò, Egutuq ming mai wut htoq yù bê nghut lhê."[✧] ga, haù Yhumsing eq myiqhtoi dng tai é dang lé lhoq dik é ru nghut lhê.

¹⁶ Herut gi, yhang lé, hpaqchyí bò bang eq mhaù pyám tô é lé sé jáng, nhikmo-yo bê nghut ri; haù mù, yhang gi, haù hpaqchyí bò bang chyáng mai wó sê yu é ahkyíng lé sôn wú mù, Betlehem wà eq hau é awù ayàm má é wà pé má nyí é, í zân mai a-ò má é yuqzo pé banshoq lé, sat pyám nhang ri.

¹⁷ Haù gi,

"Ramaq gà é jowò má, yón kuq é eq ngau garú é htê lé wó gyô ri;

Rahkelaq gi, yhang zô pé a nyi byuq lo kô é yanmai, ngau nyí é eq nhik a wó tng dut ri."[✧]

ga luí,

¹⁸ myiqhtoi Yeremiaq dng tai tô é dang lé lhoq dik é nghut ri.

Nazaret Wà Má Dum Taù Lo É Hkyô

¹⁹ Herut shi byuq é htâng, Egutuq ming má, haù Yhumsing é maumang lagyo gi, Yosep chyáng yhupmoq dng lé htoq shit mù,

²⁰ "Toq aq, haù zòshang me lé shuí chùng mù, Israelaq ming má taù lò aq; hkásu mù gà le, haù zoshâng lé sat naù bang shi byuq bekò nghut ri." ga tai ri.

²¹ Haù mù, Yosep gi, zòshang me lé shuí chùng mù, Israelaq ming shut taù lò bê nghut ri.

²² Nghut kòlhang, yhang gi, Yuda mau má, Arhkela-uq, yhângwa Herut é hkó má xoq up nyí é hkyô lé wó gyo jáng, haù má a wám lo lo nghut ri. Yhupmoq má sidiq byí é hui é eq rajung za, yhang gi, Galile mau shut e ló mù,

²³ Nazaret gà é wà má lô nyí nyí bê nghut ri. Haù mù, "Yhang lé, Nazaret wà byu ga rà nghut lhê." ga luí, haù myiqhtoi pé dng tai tô é dang lé lhoq dik é nghut ri.

3

Wui-myhup Sará Yohan Shui Hen É Hkyô Mrk 1:1-8; Luk 3:1-18; Yhn 1:19-28

¹ Haù yoq má, Wui-myhup Sará Yohan htoq lò mù, Yuda mau má é yoso má hko kyô é gi,

✧ 2:6 Mìhka 5:2 * 2:11 Mura gi, chì wó kut jung xù nghut lhê. ✧ 2:15 Hos 11:1 ✧ 2:17 Yer 31:15

² "Myit lhing keq; hkâsu mù gà le, mauhkung mingdân gi, chyâng lò bê* nghut ri." gà ri.

³ Haù yuq gi,
"Haù yoso má, byù rayuq garù tai é htê gi,
'Haù Yhumsing é matú, hkyô hen to keq;
Yhâng é matú, hkyô lhoq nyhang to keq.
gà ri."*
ga myiqhtoi Esai-aq tai tô é sù yuq nghut ri.

⁴ Yohan gi, gola-uq shomaù eq sai é mebu wut mù, yhâng é hpyidum má gi, shokuq hpyihit hit ri. Yhâng é zoshuq gi, dinggám eq yosó byo-í pé nghut ri.

⁵ Yerusalem wà mó mã é bang, Yuda mau banshoq mã é bang eq Yodan làng awui ayám lhunglháng mã é bang gi, yhâng chyáng htoq e bum akô.

⁶ Yhangmoq gi, yhumsing é mara lé yín yú kôluí, yhâng chyáng mai Yodan làng má wui-myhup hkâm yu bum akô nghut ri.

⁷ Nghut kôlhang, yhang gi, yhang wui-myhup hkâm byí é jang má, Hparishe pé eq Saduke pé myo myo lé lo nyí kô é lé myáng jáng, yhangmoq lé tai é gi, "Duq htân lhangmuí amyú pé ê, jé lô rà yubak dam mai wó hpang lut kó sháng gaq ga, nungmoq lé ó yuq tai pún é lhu?"

⁸ Myit lhing hkyô eq gingdân é ashi pé zui keq.

⁹ Ngamoq gi, Abraham é yhangzo yhangshù pé nghut lhê.' nghu luí, yhumsing é i-myit unghkaù má hkâlum to kó. Hkâsu mù gà le, ngò, nungmoq lé tai kyo kôlé, Garai Gasang gi, luqgok shí pé mai, Abraham é matú yhangzô pé wó hpan htoq kat lhê.

¹⁰ Ahkuí lháng, Garai Gasang gi, Yhâng é wazung lé haù siggám wang pé má tô to bê nghut ri; haù mù, ge é ashi a zui é agám hkangmó lé gi, htuoq lhêng pyám mù, myí má dú kat pyám rà nghut lhê.

¹¹ Ngò gi, nungmoq myit lhing kó sháng gaq nghu, wui eq za wui-myhup hkâm byí lhê. Nghut kôlhang, ngá htoq má wum-o a-tsam je bo é sù rayuq, ngá htâng má jé lé lô shirà nghut luí, ngò gi, Yhâng é hkyí-tsung chùng byí rà lháng a gingdân; Yhang gi, Chyoiyung Woi-nyí má le, myí má le, nungmoq lé wui-myhup hkâm byí rà nghut lhê.

¹² Yhang gi, loq má byò chung to mù, guq chyaráng má é guq bùm lé hik sán pyám luí, já é guq cham lé gi, guqchyí má tsing kat to mù, guqsóm lé kúm gi, hkâ-nhám le shi byuq a sê é myí eq nyhê hkyô pyám rà nghut lhê." gà ri.

Yesuq, Wui-myhup Hkâm Yu É Hkyô
Mrk 1:9-11; Luk 3:21-22

¹³ Haù hkûn, Yesuq gi, Yohan chyáng wui-myhup hkâm yù rà ga, Galile mau mai Yodan làng má jé lé lo ri.

¹⁴ Nghut kôlhang, Yohan gi, "Ngò sheq Náng chyáng wui-myhup hkâm yù rà sù ru nghut lhê nhing! Náng sheq ngá chyáng lé lo lhê lhu?" ga luí, lhom tai hkûm ri.

¹⁵ Haù hkûn, Yesuq gi, "Dingmán hkyô banshoq lé, nga-nhúng lhoq dik rà é yanmai, Ngo lé wui-myhup hkâm byi laq." ga tù tai ri. Haù mù, Yohan le, gyo byi bê nghut ri.

¹⁶ Yesuq gi, wui-myhup hkâm yù eq yhang, wui mai htoq lo ri. Haù hkûn, mauhkung bóng lô mù, Garai Gasang é Woi-nyí gi, hpúngkyui gunghykàng sù é dóng mai, Yhâng ahtoq má lé gyó nô tô é lé, Yhang myang kat ri.

¹⁷ Haù hkûn, "Shí yuq gi, Ngò chyitdap é Ngá zo nghut lhê; Yhâng é ahtoq má Ngò gabú myit ngón nyí lhê." ga mauhkung mai danghtê htoq lo ri.

4

Yesuq, Gunglaù Huí É Hkyô
Mrk 1:12-13; Luk 4:1-13

¹ Hau htâng má, Chyoiyung Woi-nyí gi, Yesuq lé, nat Tsadán eq gunglaù é hui nhâng rà matú, yoso shut shuí é ri.

² Yesuq gi, zoshuq gám é myí xê nyí myí xê myìn jé jáng, zòmut hui bê nghut ri.

³ Haù hkûn, gunglaù sù gi, Yhâng chyáng lé mù, "Náng, Garai Gasang é Yhangzo nghut le gi, luqgok shí pé lé muk dut nhâng aq." ga tai ri.

⁴ Haù jáng, Yesuq gi, "Byù gi, muk eq za asak duí rà a nghut; Garai Gasang é nhut mai htoq lo é mungdang hkangmó eq sheq asak duí rà nghut lhê.* ga luí, Chyúmdang má kâ tô ri." ga yhang lé tù tai ri.

⁵ Haù hkûn, nat Tsadán gi, Yesuq lé, chyoiyung myuq* má shuí é mù, noqkuq yhum je myhang é shúhtáng htoq má yap nhang to luí,

⁶ "Nàng, Garai Gasang é Yhangzo nghut le gi, byam gyó kat wú aq. Hkâsu mù gà le, 'Náng é matú, Garai Gasang gi, Yhâng é mau-mang lagyó pé lé tai to rà nghut mù,

luqgok má Náng é hkyí a ló htung shoq, yhangmoq é loq eq Nang lé lhom bún yú kó rà nghut lhê.*

ga luí, Chyúmdang má kâ tô ri." ga tai ri.

⁷ Nghut kôlhang, Yesuq gi, "Haù Yhumsing, nungmoq é Garai Gasang lé, wó chyam wú rà a nghut.* ga luí le, Chyúmdang má kâ tô ri." ga, yhang lé tù tai ri.

⁸ Nat Tsadán gi, Yesuq lé, gyai yhang myhang é bùm htoq má shuí doq lô mù,

* **3:2** Mauhkung mingdân gi, chyâng lò bê gà é lichyúm gi, Garai up rà ahkying chyâng lò bê gà é nghut lhê. * **3:3** Esai 40:3 * **4:4** Tará Pun 8:3 * **4:5** chyoiyung myuq gi, Yerusalem lé gà lhê. * **4:6** Hkya-on 91:11-12 * **4:7** Tará Pun 6:16

mingkan má joq é mingdán pé banshoq eq haú pé é hkikhkâm hkyô lé tún shit ri.

⁹ Hau htâng, yang gi, "Nàng hkyihput htuq mù, ngo lé noq é nghut jáng, shí pé banshoq, Nang lé ngò býi rà." ga, Yesuq lé tái ri.

¹⁰ Haú hkûn, Yesuq gi, "Tsadán nàng, ló byuq aq! Hkâsu mù gà le, 'Haú Yhumsîng nàng é Garai Gasang lé za, nàng noqkuq dojaú ra rà nghut lhê."[✧] ga luí, Chyúmdang má kê tô ri." ga, yang lé tái ri.

¹¹ Haú mù, nat Tsadán gi, ló byuq bê nghut luí, maumang lagyô pé gi, Yesuq lé, lé dojaú nyi akò nghut ri.

*Yesuq Mungdang Hko Hi Lô É Hkyô
Mrk 1:14-15; Luk 4:14-15*

¹² Yesuq gi, Wui-myhup Sará Yohan htóng gyô é hkyô lé wó gyo jáng, Galile mau shut dum taú lô bê nghut ri.

¹³ Yang gi, Nazaret wà mai htoq ló mù, Zebulun eq Nahtali mau mã é nhông yàm má joq é Kaperna-um wà má ló nyi nyi ri.

¹⁴ Haú gi, myiqhtoi Esai-aq laiká má,
¹⁵ "Zebulun mau eq Nahtali mau, wuimau mã é hkyô, Yodan làng yàm, tûngbaù pé nyi é Galile mau é,

¹⁶ mauchtu hkaú má nyi nyi é bang, maubó mó lé myàng bê nghut ri;
shí wup hkaú má nyi to bâng é matú, maubó lô bê nghut ri."[✧]

ga kê tô é dang lé lhoq dik rà matú nghut ri.

¹⁷ Haú hkûn mai, Yesuq gi, "Myit lhîng keq! Mauhkûng mingdán gi, chyàng lò bê nghut ri." ga, mungdang hko hi e ló bê nghut ri.

Yesuq É Chángzo Hí Dut Bang

¹⁸ Yesuq gi, Galile nhông yàm má hkyô só wún é hkûn, Petruq gà é Simun eq yhanggu Andre nhiktâng lé myang ri. Yhangnhik tâng gi, ngozo kóng zo su nhik nghut mù luí, nhông má gùn dú nyi akò nghut ri.

¹⁹ Haú mù, Yang gi, haú nhiktâng lé, "Ngá htâng cháng keq; Ngò, nungnhik lé, byù lé châng kóng su nhik dut nhâng rà nghut lhê." ga tái ri.

²⁰ Haú hkûn, yangnhik gi, radá dâm, gùn pé lé to pyâm to luí, Yang htâng cháng bekô nghut ri.

²¹ Yesuq gi, jowò haú mai xoq sô e ló le, Zebedi é yangzo, Yakuq eq yhanggu Yohan nhiktâng lé myang ri. Yhangnhik gi, yangnhik é yhangwa Zebedi eq rahá, lhai hkaú má gùn hpo nyi akò. Yangnhik lé, Yesuq wut kat jáng,

²² yangnhik gi, radá dâm, yangnhik é yhangwa eq lhai haú lé, tô pyâm to kôluí Yesuq htâng cháng bekô nghut ri.

*Nò Bang Lé, Yesuq Lhoq Gê Byí É Hkyô
Luk 6:17-19*

²³ Yesuq gi, Galile mau ramau gón má htoq é mù, tarajong pé má, mhoqshit luí, mauhkûng mingdán eq sêng é gabú danglù lé, hko kyo uchyang, byu pé chyáng mã é nòhpyo ajung jung hui bang eq noli nojàng amyù myù dap bang lé, lhoq gê býi wún ri.

²⁴ Yesuq eq sêng é hkyô ludang gi, Suriq ramau gón má byo myín ló mù, byu pé gi, awáng nòhpyo ajung jung hui é bang, hkê-nhò jamjaú nyi é bang, nat gang wang júng é bang, mhûngtuq tuq é bang, gûngjum shi é bang lé, shuí lé lô kôluí, Yang gi, haú bang lé lhoq gê býi ri.

²⁵ Galile mau, Dekapoli,[†] Yerusalem, Yuda mau eq, Yodan làng tú tap mã é byù moq mó gi, Yesuq htâng châng bum akò nghut ri.

5

Hkungsô Wó É Tará

Luk 6:20-23

¹ Yesuq gi, byù moq mó lé myàng jáng, bùm má doq ló luí, ló zung tô ri. Haú hkûn, Yhâng é chángzô pé gi, Yhâng chyáng lé lô kôjáng,

² Yang nhut hkum hpóng luí, yangmoq lé mhoqshit é gi:

³ "Woi-nyi má, asho awui dut é bang gi, hkungsô wó nyi ri; hkâsu mù gà le, mauhkûng mingdán gi, yangmoq é mingdán nghut nyi ri.

⁴ Myit iyon hui é bang gi, hkungsô wó nyi ri; hkâsu mù gà le, yangmoq gi, nhik lhoq tûng é hui kó rà nghut lhê.

⁵ I-myt nú-nhâm é bang gi, hkungsô wó nyi ri; hkâsu mù gà le, yangmoq gi, mingkan lé wó sîng kó rà nghut lhê.

⁶ Dingmán hkyô lé mut shit nyi é bang gi, hkungsô wó nyi ri; hkâsu mù gà le, yangmoq gi, nhik dik shoq myàng zo kó rà nghut lhê.

⁷ Shogyo nhikmyin myit bo é bang gi, hkungsô wó nyi ri; hkâsu mù gà le, yangmoq gi, shogyo nhikmyin yu é hui kó rà nghut lhê.

⁸ Myit sansêng é bang gi, hkungsô wó nyi ri; hkâsu mù gà le, yangmoq gi, Garai Gasang lé myàng kó rà nghut lhê.

⁹ Nguingón hkyô só xoq býi é bang gi, hkungsô wó nyi ri; hkâsu mù gà le, yangmoq gi, Garai Gasang é yangzô pé gà é hui kó rà nghut lhê.

¹⁰ Dingmán hkyô é yanmai zing-ri hui é bang gi, hkungsô wó nyi ri; hkâsu mù gà le, mauhkûng mingdán gi, yangmoq é nghut nyi ri.

¹¹ Ngá é yanmai, byu pé èq, nungmoq lé rhoi é, zing-ri é, a teng a mán é dồng agè ashop é dang amyù myù tái tso kô é hkûn, nungmoq hkungsô wó nyi ri.

✧ 4:10 Tará Pun 6:13 ✧ 4:16 Esai 9:1-2 † 4:25 Dekapoli gà é gi, Grik đông myuq raxé lé gà lhê.

12 Nguingón gabú nyí keq, hkâsu mù gâ le, nungmoq é matú kô é chyunghuq gi, mauhkúng mingdán má joq tô ri. Nungmoq é hí lhê é myiqhtoi pé lé le, yhangmoq gi, hau dông zing-rî lai lo wú bekô nghut ri.

Xo Eq Maubó

Mrk 9:50; Luk 14:34-35

13 Nungmoq gi, myidàm htoq mâ é xo nghut nyi lhê. Nghut kôlhang, xo gi, màn kân byuq jáng, hau lé hai éq dum wó lhoq ngam yú rá lhu? Shinggan shut dú pyám mù, byu pé éq náng pyeq pyám é mai lai lui, hai akyú le bò rá a nghut lo.

14 Nungmoq gi, mingkân é maubó nghut akô; bùm htoq mâ é myuq lé gi, wó nghop to rá a nghut.

15 Myibung lé tap mù, mûng éq nghop tô é ó a kut wú kô; hau su kut rá malai, yhúmhmaù má lúng tô é bang yuq hkangmó myoq wó myáng rá matú, tsungjang má kúm tsung to rá nghut lhê.

16 Hau eq rajung za, byu pé gi, nungmoq é ge é muzó pé lé byu-myàng lui, mauhkúng htoq mâ é nungmoq é Iwa lé hkya-on kó sháng gaq, nungmoq é maubó lé yhangmoq é hí má duq nhang to keq.

Tarâ Lhoq Dik É Hkyô

17 Ngò gi, myiqhtoi pé é dang eq jep é tarâ lé lhoq hpyoq pyám rá matú, jé lé é nghut nhò hkâ-ngâm kô; hau pé lé lhoq dik rá matú sheq jé lé é ru nghut lhê.

18 Ngò, nungmoq lé teng za tai kôlé, mauhkúng eq myigüng byuq byuq le háng, hau pé a ban lhoq dik dik gi, jep é tarâ má é tiq dik é dangjí eq myihkyet zo ralhúm háng byuq byuq rá a nghut.

19 Jep é tarâ shí pé má é tiq dik é dang rahkun lé lu lai lui, gôbang lé le, hau su kut rá matú mhoq byí é sù ó yuq nghut kôle, mauhkúng mingdán má tiq dik sù gâ é hui rá nghut lhê; nghut kôlhang, jep é tarâ shí pé lé châng kut lui, mhoq byi sù kúm gi, mauhkúng mingdán má, hkik sù gâ é hui rá nghut lhê.

20 Ngò, nungmoq lé tai kôlé, nungmoq dingmán é hkyô má, hau Hparishe pé eq tarâ sará pé dingmán é htoq je a gyaú le gi, mauhkúng mingdán má, nungmoq wó wàng kô rá a nghut.

Byù Hkâsat

21 'Byù hkâsat,* sat é sù gi, jéyáng é hui rá nghut lhê' ga, hí hpyang lhê é bang lé tai tô é dang, nungmoq wó gyô wú bê nghut lhê.

22 Nghut kôlhang, Ngò, nungmoq lé tai kôlé, gumang rayuq yuq lé nhikjum yô é sù gi, jéyáng é hui rá nghut lhê. Hau htoq agó, gumang hpó lé, 'Byù gang*' ga tai é sù gi, Yudaq byin tú wapdoq má jéyáng é hui rá

nghut lhê; 'Byù bam é' ga wut é sù gi, ngaraí myi eq gingdán nyi ri.

23 Hau mù, hkungga gyap má, náng hkungga nhông rá dâ é hkún, náng é gumang rayuq yuq, nang lé mara hun é hkyô rajung jung joq é lé, myit bún kat é nghut jáng,

24 náng é hkungga lé, hau hkungga gyap hí má tô pyám to mù, náng é gumang hpó hau yuq eq hí nguingón hkyô lô yú lui sheq, hkungga lé nhông byi aq.

25 Nang lé yui tsuq sù gi, nang lé tarâ rùng má dé e lo é hkún, hkyô má ru nghut nyi ashí u lé, yhang eq nguingón hkyô hí hân yú aq. Hau a nghut jáng, hau yuq gi, nang lé, tarâ agyi chyáng ê ap pyám mù, hau tarâ agyi gi, nang lé htóng hkyô pyám rá matú, htóng suwún hpô é loq má ap pyám rá nghut lhê.

26 Ngò, nang lé teng za tai lé, yuichyín hau a ban xap xap gi, htóng hau mai náng wó htoq lô rá a nghut.

Su-myi Sulàng Lú É Hkyô Eq Séng Lui Mhoqshit É Dang

27 'Su-myi sulàng hkâlú!*' gâ é dang lé, nungmoq wó gyo wú bê nghut lhê.

28 Nghut kôle, Ngò, nungmoq lé tai kôlé, myiwe rayuq lé shut nau é myit éq wú é sù gi, yhâng é myit hkaù má, myiwe hau yuq eq su-myi sulàng lú hkyô kut é sù nghut bê.

29 Hau mù, náng é loqyo myoq éq, nang lé mara kut shut nhang é nghut le gi, hau lé lap choq yú mù, dú pyám aq. Hkâsu mù gâ le, náng é ragùngdu gôn ngaraí ming gyó rá htoq má, náng é gungsho rajung jung za htên byuq é nghut le gi, náng é matú je ge ri.

30 Hau eq rajung za, náng é loqyo loq éq, nang lé mara kut shut nhang é nghut le gi, hau lé hpyit yú mù, dú pyám aq. Hkâsu mù gâ le, náng é ragùngdu gôn ngaraí ming gyó rá htoq má, náng é gungsho rajung jung za htên byuq é nghut le gi, náng é matú je ge ri.

Myi Làng Gâng É Hkyô Eq Séng Lui Mhoqshit É Hkyô

Mht 19:9; Mrk 10:11-12; Luk 16:18

31 'Yhumsing é yhangmyi lé kâng é sù gi, lhoq kang laiká byi rá dut lhê.*' gâ é dang joq lhê.

32 Nghut kôlhang, Ngò, nungmoq lé tai kôlé, myiwe dông mai làng shut é a nghut é za, yhumsing é yhangmyi lé kâng é sù gi, myiwe hau lé sulàng lú sù dut nhâng bê nghut ri; hau htoq agó, yhumsing yhanglàng eq gang bê myiwe lé háng yu é sù le, su-myi lú é sù dut bê nghut ri.

Danggidiq

33 Hau htoq agó, 'Danggidiq a zùng hkâmú; Yhumsing lé byí tô é danggidiq eq rajung za cháng aq.' ga lui, hí hpyang lhê é bang lé, tai

* 5:21 Htoq Lô 20:13 * 5:22 Byù gang gâ é lé, Grik dông "Raka" gâ lhê. * 5:27 Htoq Lô 20:14 * 5:31 Tarâ Pun 24:1

tô é dang lé nungmoq wó gyô wú bê nghut lhê.

³⁴ Nghut kôlhâng, Ngò, nungmoq lé tai kôlé, hai êq le hkâdakâm kó: mauhkúng lé lang lui le, hkâdakâm kó; hkâsu mù gà le, haù gi, Garaí Gasâng é zùng tanghkuq nghut lhê;

³⁵ myigùng lé lang lui le, hkâdakâm kó; hkâsu mù gà le, haù gi, Garaí é hkyi nang jang nghut lhê; Yerusalem lé lang lui le, hkâdakâm kó; hkâsu mù gà le, haù gi, Hkohkâm mó é myuq nghut lhê.

³⁶ Hau htoq agó, yhumsing é ulhùm êq le, hkâdakâm kó; hkâsu mù gà le, xâm rahkat lé lhâng hpyù shoq noq shoq, nàng wó kut é a nghut.

³⁷ Náng é dang lé, 'nghut lhê' lé gi, 'nghut lhê' nghù, 'a nghut é' lé gi, 'a nghut' nghù, tai aq; haù mai lai é gi, haù agè ashop su chyáng mã é nghut ri.

Lató Hpuq É Hkyô

Luk 6:29-30

³⁸ 'Myojí matú myojí xap, zui matú zui xap' gá é dang lé, nungmoq wó gyô wú bê nghut lhê.

³⁹ Nghut kôlhâng, Ngò, nungmoq lé tai kôlé, agè ashop kut é sù lé lató hkâhpuq. Náng é loqyo bowâm má pyuq byi sù lé, loqpaí hkyam le hkâm byi shi aq.

⁴⁰ Byù rayuq yuq, nang lé mara tsuq mù, náng é buzo lé yu pyám byi é nghut jáng, bumó lé le, hkyut byi shi aq.

⁴¹ Byù rayuq yuq, nang lé zik mù, radéng é nhâng jáng, yhang eq rahá í déng châng é byi aq.

⁴² Nang lé dung sù lé, byi aq; náng chyáng mai chyí naù sù lé le, nunghtáng hkâlhhik pyám.

Gyè Lé Chyitdap Rà É Hkyô

Luk 6:27-28, 32-36

⁴³ 'Náng é chyangnâm mã é bang lé gi, chyitdap mù, náng é gyè lé gi, a jú kut aq' gá é dang lé, nungmoq wó gyô wú bê nghut lhê.

⁴⁴ Nghut kôlhâng, Ngò, nungmoq lé tai kôlé, nungmoq gi, mauhkúng htoq mã é nungmoq é Íwa é yhangzô pé wó dut kó sháng gaq, nungmoq é gye pé lé chyitdap mù, nungmoq lé zing-ri bâng é matú kyùdung byi keq;

⁴⁵ hkâsu mù gà le, Yhang gi, agè ashop bâng é ahtoq má le, gè bâng é ahtoq má le, bui tsó byi nhâng mù, dǐngmán bâng é ahtoq má le, a dǐngmán bâng é ahtoq má le, mau wô byi nhâng Sù nghut ri.

⁴⁶ Nungmoq lé chyitdap é bang lé za chyitdap kô le gi, nungmoq é matú hai chyunghuq wó kó rá lhú? Kang guq bang lháng, haù su kut lhê a nghut kó lhú?

⁴⁷ Hau htoq agó, nungmoq é gumang wú lé za shi-kyám kô le gi, nungmoq kut é muzó gi, góbâng htoq mã hai wá laklai rá lhú? Tungbaù pé lháng haù su kut lhê a nghut kó lhú?

⁴⁸ Haù mù, mauhkúng htoq mã é nungmoq é Íwa gumjup é su, nungmoq le gumjup nyi keq.

6

Alu Byi É Hkyô

¹ Nungmoq dǐngmán é hkyô lé, byu pé myàng sháng gaq nghù, byu pé hí má a kut shit loshoq, sidiq nyi keq. Haù su kut é nghut jáng, mauhkúng htoq mã é nungmoq é Íwa chyáng mai, chyunghuq wó yù kó rá a nghut.

² Haù mù, haù gegùn labyoq kut bang gi, byu pé eq shigyau é huì sháng gaq ga, tarajong pé hká, hkyô pé hká kut é su, nàng gi, alu byi é hkùn, tut hté su hkâlhoq htoq. Ngò, nungmoq lé teng za tai kôlé, haù bang gi, yhangmoq é chyunghuq lé hkùm shoq wó yù bekô nghut lhê.

³ Ra chà to bang lé nàng alu byi é hkùn, náng é loqyo loq kut é hkyô lé, loqpaí loq lé lháng hkásé nhâng.

⁴ Haù hkùn, nàng alu byi é lé, ó a châng sé rá nghut lhê. Haù jáng sheq, ó a sé loshoq kut é hkyô lé myang é sù, náng é Íwa gi, nang lé chyunghuq shigyau rá nghut lhê.

Kyùdùng É Hkyô

Luk 11:2-4

⁵ Nungmoq kyùdùng le, gegùn labyoq kut bang su hkâkut kó; hkâsu mù gà le, yhangmoq gi, byu pé byu-myàng shoq ga, tarajong pé eq hkyô kang pé má yap mù, kyùdung rá ó nau akô. Ngò, nungmoq lé teng za tai kôlé, haù bang gi, yhangmoq é chyunghuq lé wó yù bekô nghut ri.

⁶ Nghut kôlhâng, nàng kyùdùng le, náng é gok hkaù mã wang ló mù, hkum myhí pyám lui, a byu-myang é náng é Íwa chyáng dung aq. Haù jáng, ó a byu-myang é lé myàng sù, náng é Íwa gi, nang lé jeju dum tau byi rá nghut lhê.

⁷ Haù mù, kyùdùng le, tungbaù pé su kut lui, dang puq hkâhtau kó; hkâsu mù gà le, yhangmoq gi, dang hǐng chín lui dung jáng sheq, gyo byi nhô ngam akô nghut ri.

⁸ Haù bang su hkâkut kó; hkâsu mù gà le, nungmoq é Íwa gi, nungmoq rá é hkyô lé, nungmoq a dung shi mai sê to Sù nghut lhê.

⁹ Haù mù, nungmoq kyùdùng le, 'Mauhkúng htoq tsáng myhâng mã é ng-amoq é Áwa é,

Náng é myǐng gi, chyoiyúng nyí sháng gaq,

¹⁰ Náng é mingdán jé lô sháng gaq,

Nàng ô nau é hkyô, mauhkûng htoq má dik é su, myigùng htoq má le dik sháng gaq ô.

¹¹ Ngamoq nyi wui rá é zoshuq lé, ngamoq lé hkû-nyí byi laq.

¹² Ngamoq lé shut é bâng é mara lé ngamoq hkyut pyám byí é su, ngamoq é mara lé le hkyut pyám byi laq.

¹³ Ngamoq lé, agúng alau hkyô má a wàng nhang é za,

agè ashop jang mai hkyi yù laq ô.

(Hkâsu mù gâ le, kô dik é up sîng hkyô, a-tsam eq hpungwup shingkaq gi, pyat dedu ahtum abyuq Náng chyáng ru joq nyi ri ô! Amen.)*

ngû dung keq.

¹⁴ Supê èq, nungmoq lé kut shut é mara lé, nungmoq hkyut pyám byí é nghut le gi, mauhkûng htoq má é nungmoq é Íwa le, nungmoq lé mara hkyut pyám byi rá nghut lhê.

¹⁵ Nghut kôlhang, haú bâng é mara lé, nungmoq a hkyut pyám byí é nghut le gi, nungmoq é Íwa le, nungmoq é mara lé hkyut pyám byi rá a nghut.

Zoshuq Gám É Hkyô

¹⁶ Nungmoq gi, zoshuq gám é hkûn, gegùn labyoq kut bang su myoqdong hkâlhoq nyhui kó; hkâsu mù gâ le, haú bang gi, yhangmoq zoshuq gám é hkyô lé, tûn shit rá matú myoqdong lhoq nyhui shit akô nghut ri. Ngò, nungmoq lé teng za tái kôlé, haú bang gi, yhangmoq é chyunghuq wó yù bekô nghut ri.

¹⁷ Nungmoq kúm gi, zoshuq gám é hkûn, nungmoq zoshuq gám é hkyô lé, byu pè hí má de de a dut é za, nungmoq a byu-myang é Íwa za myàng sháng gaq, myoq chí pyám lui, u xù but keq;

¹⁸ haú jáng sheq, ó a sé loshoq kut é hkyô lé myang é Sû, nungmoq é Íwa gi, nungmoq lé chyunghuq shigyaú rá nghut lhê.

Mauhkûng Htoq Mâ É Sutzê

Luk 12:33-34

¹⁹ Jàngkon, jogyik èq wó lhoq htên pyâm é eq hkaú su èq le wó wang hkaú yu pyám byí é myigùng htoq má, nungmoq é matú, sutzê lé hkâhkong to kô.

²⁰ Jàngkon, jogyik èq le a wó lhoq htên pyâm é eq, hkaú su èq le a wó wang hkaú yu pyám byí é mauhkûng htoq má sheq, nungmoq é matú sutzê hkong to keq.

²¹ Hkâsu mù gâ le, náng é sutzê joq jang má, náng é i-myt le jé nyi rá nghut lhê.

²² Myoqjí gi, gungdú é myibung nghut nyi ri. Náng é myoqjí ge é nghut le gi, náng é gungdú gôn má maubó bying mui to rá nghut lhê.

²³ Nghut kôlhang, náng é myoqjí a ge é nghut le gi, náng é gungdu gôn gi, mauchut tuq dut nyi rá nghut lhê. Náng chyáng bo é maubó gi, mauchut byuq é nghut jáng, mauchut haú gi, hkâ-í yhang htú rá lhâ!

²⁴ Ó yuq nghut kôle, yhumsing í yuq lé wó dojaú rá a nghut. Hkâsu mù gâ le, yhang gi, rayuq lé a jú kut mù, rayuq lé gi, chyitdap rá nghut lhê; haú a nghut jáng, rayuq lé lhumzui mù, rayuq lé gi, hpau a tap kut rá nghut lhê. Nungmoq gi, Garai Gasang lé le, ngunzè lé le, radá dâm wó dojaú kó rá a nghut.

Hkâ-myt Chiq Kó

Luk 12:22-31

²⁵ Haú mù lui, Ngò, nungmoq lé tái kôlé, nungmoq é asak matú haú zo haú shuq rá eq nungmoq é gungdú matú haú wut haú tsang rá lé, hkâ-myt chiq kó. Asak gi, zoshuq htoq má, gungdu gi, mebù htoq má, je ahkyak lhê a nghut kó lhú?

²⁶ Maulat má é nghoqzô pé lé wú wú keq; yhangmoq gi, kyô hkyô kyô shu a kut é htoq agó, chyí pé má le haú a tsing kat to kô é nghut le lhang, mauhkûng htoq má é nungmoq é Íwa gi, yhangmoq lé, byi tso byi huq nyi lhê. Nungmoq gi, nghoq haú pé htoq má je riyhang hpaudap nyi lhê a nghut kó lhú?

²⁷ Nungmoq má, ó yuq wá, myit chiq é èq, yhumsing é asak lé radung kô wó jat yù kó rá lhú?

²⁸ Haú nghut le nhing, haú mù, mebù matú myit chiq akô lhú? Myigùng má yuq tô é htutbó ban pé hkâsu kut kô lo é lé, myit wú keq. Haú pé gi, mù le a zui, hkying le a duì kó nghut ri.

²⁹ Nghut kôlhang, Ngò, nungmoq lé tái kyo kôlé, hkohkâm Sholomon hpung kô dik u lé wut é mebu lhang, ban haú rabó lé a hkyit nghut ri.

³⁰ Lumjing myit tiq é bang ê, hkû-nyí joq mù, napmá myihkyóm má dú kat pyám hui rá nghut é yosô mhan pé lé za lhang, Garai Gasang haú su kut hut é nghut le gi, nungmoq lé je riyhang hut rá a nghut kó lhú?

³¹ Haú mù, 'Haú zo rá lhi?' 'Haú shuq rá lhi?' 'Haú wut rá lhi?' ngû hkâ-myt chiq mying kô.

³² Tungbau pé kúm gi, haú pé banshoq lé châng hkat ho nyi akô; nghut kôlhang, mauhkûng htoq má é nungmoq é Íwa gi, haú pé lé nungmoq rá é hkyô, sé byí nyi lhê.

³³ Nghut kôlhang, Yhâng é mingdán eq dingmán hkyô lé hí hô keq, haú jáng, haú pé banshoq, nungmoq lé puq byi rá nghut lhê.

³⁴ Haú mù, napmá lhê é matú hkâ-myt chiq kó; hkâsu mù gâ le, napmá gi, yhang é yhang myit chiq rá nghut lhê. Hkû-nyí é

* 6:13 Chyûmlaiká ra-am má, shí tûm a bo é nghut lhê.

wuìhke hkyô gi, hkû-nyí é matú gé bê nghut ri.

7

*A Jéyáng Râ Hkyô**Luk 6:37-38, 41-42*

¹ Nungmoq jéyáng é a hui kó sháng gaq, ó lé le, hkâjéyáng kó.

² Hkâsu mù gà le, nungmoq jéyáng é su, nungmoq le, jéyáng é hui kó râ nghut é htoq agó, nungmoq lik byí é bung èq, nungmoq lé dum lik byí râ nghut lhê.

³ Yhumsing myoq hkaù má lúng tô é siktúm lé lhang a myít wú é nhing, haí mù luí, nunggu nungmâng é myoqwàng lé myang lhê lúh?

⁴ Yhumsing é myoq má siktúm lhùng to luí nhing, 'Náng myoq má lúng tô é myoqwàng lé, ngò choq pyám byí lé.' nğhù luí, náng é gumang hpó lé hkâsu wó tai râ lúh?

⁵ Gegùn labyoq kut sù ê, náng é myoq má lúng tô é siktúm lé hí choq pyám aq. Haù jáng sheq, nunggu nungmâng é myoq má wang tô é myoqwàng choq pyám byí râ matú, nàng san za myàng râ nghut lhê.

⁶ Hkuí pé lé, yunglhô é zê hkâbyi kó; waq pé hí má, nungmoq é palhé wuizo lé hkâdú byi kó. Haù su kut jáng, haù bang gi, zè haù pé lé náng pyeq pyám mù, nungmoq lé dum taù ngat lò râ nghut lhê.

*Dung Keq, Hô Keq, Hkum Má Kok Keq**Luk 11:9-13*

⁷ Dung keq, haù jáng, nungmoq lé byi râ nghut lhê; hô keq, haù jáng, nungmoq myàng kó râ nghut lhê; hkum má kok keq, haù jáng, nungmoq lé hpóng byi râ nghut lhê.

⁸ Hkâsu mù gà le, ó yuq nghut kôle, dung sù wó râ; hô sù myàng râ; hkum kok sù lé gi, hpóng byi râ nghut lhê.

⁹ Nungmoq má, ó yuq wá, yhumsing yhangzo muk dng le, luqgok byi kó râ lúh?

¹⁰ Ngozo dng le, lhangmui* byi kó râ lúh?

¹¹ Agè ashop é bang nungmoq lhang gi, nungmoq é zo wuì lé, ge é chyunghuq dat byi kô le nhing, mauhkung htoq tsáng myhâng má é nungmoq é Iwa gi, Yhang lé dng é bang lé, je riyhang ge é chyunghuq byi râ nghut lhê!

¹² Haù mù, hai hkyô má nghut kôlhang, nungmoq gi, yhumsing ô nau é dng supé lé kut nhâng nau é su, yhangmoq lé le kut byi keq. Hai mù gà le, haù gi, jep é tarâ eq myiqhtoi pé é dang lo jup tô é nghut ri.

*Chyap É Hkúmdong Eq Lam É Hkúmdong**Luk 13:24*

¹³ Chyap é hkúmdong mai wàng keq. Hkâsu mù gà le, lam é hkúmdong eq hkyô mó gi,

htên byoq hkyô shut shuí é é nghut mù luí, haù dng wàng bang gi, myô akô nghut ri.

¹⁴ Chyap é hkúmdong eq hkyô zo kúm gi, asak hkyô shut shuí é é nghut mù luí, haù lé myang ho é bang gi, shaù akô nghut ri.

*Agàm Eq Ashi**Luk 6:43-45*

¹⁵ Nungmoq chyáng jé lé lo é myiqhtoi pyoq pé lé, sidiq nyi keq; yhangmoq gi, sau-kuq wut mù, nungmoq chyáng jé lé kôlhang, myaq zo myaq shuq nau é wamhkuí pé nghut akô.

¹⁶ Yhangmoq é muzó jizó lé wú mù, nungmoq gi, yhangmoq lé wú sé kó râ nghut lhê. Zubyap mai tsibiyiq shi, zugám mai maihpáng-shi wó yu wú akô lúh?

¹⁷ Ge é agàm gi, ge é ashí zui mù, a ge é agàm gi, a ge é ashí za dat zui ri.

¹⁸ Ge é agàm gi, a ge é ashí a wó zui, a ge é agàm le, ge é ashí a wó zui nghut ri.

¹⁹ Ge é ashí a zui é shigám hkangmó lé gi, htuq pyám mù, myi má dú kat pyám râ nghut lhê.

²⁰ Haù mù, yhangmoq é muzó jizó lé wú mù, nungmoq gi, yhangmoq lé wú sé kó râ nghut lhê.

²¹ Ngo lé, 'Yhumsing ê, Yhumsing ê,' ga, wut é bang yuq hkangmó gi, mauhkung mingdán má myang wàng kó râ a nghut; haù mauhkung htoq má é Ngá Wa ô nau é dng kut sù za sheq, myang wàng râ nghut lhê.

²² Haù buinyi má, byù myo myo gi, 'Yhumsing ê, Yhumsing ê, Náng é mying mai, ngamoq gi, myiqhtoi le htoi bê; nat gang lé hkat htoq bê; laklai kumlhá ajung jung lé, kut bê a nghut lúh?' ga luí, Ngo lé myi kó râ nghut lhê.

²³ Haù hkún, Ngò gi, 'Nungmoq lé, Ngò hkâ-nhám le a sé; agè ashop hkyô kut é bang nungmoq, Ngá chyáng mai gâng ló byuq keq.' nğhù, yhangmoq lé san za tù tai kat râ nghut lhê.

*Hpaqchyí Bò Sù Eq Ngok Sù**Luk 6:47-49*

²⁴ Haù mù, Ngá é dang shí pé lé wó gyô yù luí, châng kut é sù gi, hpaqchyí bò mù, lunghtân htoq má, yhùm sai é sù eq wuì nyi ri.

²⁵ Mau wô, wuì je, laidun lò mù, yhùm haù lé lo htung kôlhang, yhùm haù gi, a htên byoq byuq râ nghut lhê; hkâsu mù gà le, yhùm haù gi, lunghtân htoq má tsuq tô é yanmai nghut ri.

²⁶ Nghut kôlhang, Ngá é dang lé, wó gyô yù mù, a cháng sù gi, semui-jàng má, yhùm sai é byù ngok eq wuì nyi râ nghut lhê.

²⁷ Mau wô, wuì je, laidun wò yup dut lò mù, yhùm haù lé lo htung jáng, yù whui a mù loshoq htên byoq byuq râ nghut lhê." gà ri.

* 7:10 Garai Gasang gi, lhangmui a zo râ matú, Yudaq byu pé lé hkunmó hkyô tô é nghut lhê.

28 Yesuq mungdang ban tai é hkûn, shiwa byu pé gi, Yhang mhoqshit é hkyô lé maúhong bum akô;

29 hkâsu mù gà le, Yhang gi, yhangmoq é tarâ sará pé eq a pung é za, ahkáng ayá wó sù rayuq su, mhoqshit é yanmai nghut ri.

8

*Manggâm Dap É Byù Rayuq
Mrk 1:40-45; Luk 5:12-16*

1 Yesuq gi, bùm htoq mai gyó lo é hkûn, byù moq mó gi, Yhâng htâng châng bum akô nghut ri.

2 Háu hkûn, manggâm dap é byù rayuq gi, Yhâng é hí má, lé mù, hkyihput htug luí, "Yhumsing ê, Nang dóng é nghut le gi, ngo lé Nang wó lhoq sân-yúng byi rá nghut lhê." ga tai ri.

3 Yesuq gi, loq lhâm kat mù, háu yuq lé é záng luí, "Ngò dóng lhê, sân-yúng aq hkoi." ga tai kat ri. Háu hkûn jáng, háu yuq é manggâm gi, ge byuq bê nghut ri.

4 Háu hkûn, Yesuq gi, "Nang, shí hkyô ó lé le hkâtai kyo. Nghut kôlháng, nang é gungdu lé, hkyangjong hpô chyáng ló tún shit mù, yhangmoq é matú saksé dut sháng gaq, Mosheq tai tô é eq rajung za, hkungga ló nhông byi aq." ga háu yuq lé tai kat ri.

*Gyezau Hpô É Lumjing Myit
Luk 7:1-10; Yhn 4:43-54*

5 Yesuq, Kaperna-um wa má wang e ló le, Romaq gyezau hpô rayuq gi, Yhâng chyáng lé jé mù,

6 "Yhumsing ê, ngá é dui-nhâng zoshâng gi, gungjum shí é htoq agó, yhùm má gyai no jamjaú leq tô ri." ga garúm lé dung ri.

7 Háu hkûn, Yesuq gi, yhang lé, "Ngò, lé lhoq gê byi rá." ga tai kat ri.

8 Gyezau hpô háu, Yhang lé dum tú tai é gi, "Yhumsing ê, Nang, ngá é laishîng-htâng má, lé nang rá lháng ngò má a gingdán. Nang, dang rahkun za tai kat laq; háu hkûn, ngá é dui-nhâng zoshâng ge ló rá nghut lhê.

9 Hkâsu mù gà le, ngò le ahkáng ayá wó é zau rayuq é a-ô má é zau nghut lhê; ngá é a-ô má lé gyezô pé nyi lhê; rayuq lé, 'É aq!' nghu le, yhang e ló lhê; góyuq lé, 'Lò aq!' nghu le, yhang lo lhê; ngá jùn lé lé, 'Shí kut aq!' nghu le, yhang kut lhê." gâ ri.

10 Yesuq gi, dang háu lé wó gyo jáng, maú byuq luí, Yhâng htâng châng bang lé, "Ngò, nungmoq lé teng za tai kôlé, Israelaq amyú má lháng, shí í lumjing é sù lé, Ngò, rayuq lé le a myàng wú é nghut lhê.

11 Ngò, nungmoq lé tai kôlé, buihtoq buiwàng hkyam má é byu pé myo gi, mauhkúng mingdán má, Abraham, Isak, Yakup pé eq rahá, zoshuq poi mó má myang zùng kó rá nghut lhê.

12 Nghut kôlháng, mingdán háu má wàng âng é bang kúm gi, shinggan mauchut hkaú shut dú pyâm é hui luí, háu jowò má ngaubyi ngaú nhap eq zui kyik kyik shoq hpuzô nyi bùm bekô rá nghut lhê." ga tai ri.

13 Háu htâng, Yesuq gi, gyezau lé, "Ló aq hkoi! Nang lumjing é eq rajung za, dut rá nghut lhê." ga tai ri. Háu-u má yhang, háu dui-nhâng zoshâng gi, ge byuq bê nghut ri.

*Byù Myo Myo Lé Lhoq Gê Byi É Hkyô
Mrk 1:29-34; Luk 4:38-41*

14 Yesuq gi, Petruq é yhùm má jé wang e é hkûn, Petruq é yhâng-aumó gyai yhang no leq tô é lé, é myang ri.

15 Yesuq gi, yhâng é loq má é záng kat é hkûn, Petruq yhâng-aumó gi, nõhpyo ge byuq mù, toq luí, Yhang lé wó gaí tso gai huq bê nghut ri.

16 Myinhhtâng mauchut lô jáng, nat gang wang júng nyi é bang myo myo lé, Yhâng chyáng shuí lé lo akô. Yhang gi, agé ashop é nat gâng pé lé dang èq hkat htoq pyám mù, nõhpyo huí é bang banshoq lé lhoq gê byi ri.

17 Háu gi, "Yhang gi, nga-nhùng é noli nojàng lé yu pyám byi mù, nga-nhùng é noli nojàng lé, wùn waq pyám byi bê nghut ri."* ga, myightoi Esai-aq tai tô é dang lhoq dik rá matú nghut ri.

*Yesuq Htâng Cháng Râ Bang
Luk 9:57-62*

18 Yesuq gi, Yhâng é lhinghkyuq má byù moq mó zup mung nyi é lé myàng jáng, Yhâng é chángzô pé lé, nhông hé hpôq shut gú dap é sháng gâ ri.

19 Háu hkûn, tarâ sará rayuq gi, lé lô mù, "Sarâ ê, ngò gi, Nang hká e le hká cháng rá nghut lhê." ga Yhang lé lé tai ri.

20 Háu jáng, Yesuq gi, "Wamhkuí pé gi, hkyùng wó akô; nghoq pé le, nghoqsut wó akô. Nghut kôlháng, háu Byu Yhangzo gi, u nghê jowò lháng a wó nghut ri." ga lhom tai kat ri.

21 Háu hkûn, chángzo rayuq gi, "Yhumsing ê, ngá wa lé ló yhùm pyám rá ahkáng hí byi shilaq." ga tai kat ri.

22 Nghut kôlháng, Yesuq gi, "Shí bê bang gi, shí bê bang yhangchang yhùm lhum kó sháng gaq, nang gi, Ngá htâng cháng aq." ga dum tai tai ri.

*Laidun Lhoq Zim É Hkyô
Mrk 4:35-41; Luk 8:22-25*

23 Háu htâng, Yesuq hkaú háu má wàng mù, Yhâng é chángzô pé le, Yhâng htâng châng wàng bekô nghut ri.

24 Háu hkûn, nhông má byodan-htik laidun mó lò mù, wuilhêng pé gi, lhai má bat ùm lò bê nghut ri. Nghut kôlháng, Yesuq gi, yphu myhi tô ri.

* 8:17 Esai 53:4

²⁵ Chángzô pé gi, Yhâng chyáng jé é mù, Yhang lé nhâu pun lui, "Yhumsing é, hkyi yù laq ô! Nga-nhúng myup ló nyi ri." ga tai akô.

²⁶ Yhang gi, "Lumjing myit shaù é bang ê! Hai mù, haù í gyuq bum akô lúh?" ga tai kat ri. Hau htâng, Yhang gi, toq lui, laidun eq wuillhêng pé lé tân kat jáng, banshoq zim byuq bê nghut ri.

²⁷ Byù haù bang gi, maùhong byuq kômù, "Shí yuq gi, hkasù é byù lhà? Lai eq wuillhêng pé lhâng gi, Yhâng é dang lé gyo byi ri myhi-nhung!" ga lui, rayuq eq rayuq myi lhùm bum akô nghut ri.

Nat Wang Júng Su Nhik Lé, Lhoq Gê Byí É Hkyô

Mrk 5:1-20; Luk 8:26-39

²⁸ Yesuq gi, Gadara byu pé é mau hpoq má jé dap ló jáng, nat gang wang júng é byù í yuq gi, lupdùng mai htoq lé lo kômù, Yhang lé lé hui akô. Haù nhik gi, haù hkyô mai ó lháng a wám lai loshoq wui é su nhik nghut akô.

²⁹ Yhangnhik gi, Yesuq lé, "Garai Yhangzo é, Náng, ngamoq eq haì sêng lhê lúh? Ahkying a jé shimá, ngamoq lé zing-ri rá matú jé lé lo é nghut lhê lúh?" ga tai garú akô.

³⁰ Haù mai a lùm wê é jowò má, waq rajùm mó gi, myi dù but zô nyi bum akô nghut ri.

³¹ Nat gâng pé gi, Yesuq lé, "Náng, ngamoq lé hkat htoq rá nghut jáng, hê waq pé chyáng wàng nhâng laq." ga dúng akô.

³² Yesuq gi, "Htoq ló keq!" ga tai kat ri. Haù mù, yhangmoq gi, htoq ló lui, waq pé chyáng wàng mù, waq haù jùm gi, gampyoq mai nhông hkaù shut din yán wang ló kôlui, wui hkaù má myup shi byuq beko nghut ri.

³³ Waq zúng bang gi, myuq hkaù shut hpang din wang ló kômù, dut lai lo é hkyô banshoq lé le, nat gang wang júng hui su nhik hkâsu dut é hkyô lé le, ló tai kyo akô nghut ri.

³⁴ Haù mù, rawa bang gi, Yesuq lé hui rá matú htoq lé lo bùm kômù, Yhang lé myàng jáng, yhangmoq é mau mai htoq ló byuq rá matú, chòm dúng tóngbán akô nghut ri.

9

Gungjum Shí Sù Lé Lhoq Gê Byí É Hkyô

Mrk 2:1-12; Luk 5:17-26

¹ Yesuq gi, lhai má wàng mù, yhumsing é wà shut jì dap ló bê nghut ri.

² Byù ra-am gi, gùngjum shí sù rayuq lé, taphkang mai Yhâng chyáng waq lé lo akô. Yesuq gi, yhangmoq é lumjing myit lé byu-myàng jáng, haù gùngjum shí sù lé, "Ngá zo é, nhik hkâ-ngê; náng é yubak mara lé hkyut pyám byi bê." ga tai ri.

³ Haù hkùn, tará sará pé ra-am gi, yhangmoq é i-myit hkaù má, "Byù shí yuq gi, Garai

Gasang lé rhoi dang tai nyi ri." ga myit nyi bum akô nghut ri.

⁴ Yesuq gi, yhangmoq myit nyi é hkyô lé sé mù, "Nungmoq é i-myit hkaù má, haù su agè ashop é dồng hai mù myit nyi akô lúh?

⁵ 'Náng é yubak mara lé hkyut pyám byi bê.' nguù tai rá eq 'Toq lui, hkyô so aq.' nguù tai rá má, hká hkun je tai lui lhê lúh?

⁶ Nghut kôlháng, haù Byu Yhangzo gi, mingkan htoq má, mara hkyut byi rá ahkáng wó Sù nghut é lé, nungmoq lé sé nhâng nau lhê." ga tai lui, haù gùngjum shí sù lé, "Toq aq, náng é taphkang yu chùng lui, yhùm tau ló aq hkoi." ga tai kat ri.

⁷ Haù mù, haù yuq gi, toq mù, yhùm shut ló byuq bê nghut ri.

⁸ Byù hpùng mó gi, haù hkyô lé myàng kôjáng, gyuq mau kômù, byu pé lé haù su é ahkáng ayá byi tô é Garai Gasang lé hkya-on kungton bum akô nghut ri.

Mahte lé shuí yu é hkyô

Mrk 2:13-17; Luk 5:27-32

⁹ Yesuq gi, haù jowò mai sô e ló é hkùn, kang guq zùm má zung tô é Mahte ga sù lé myàng mù, "Ngá htâng cháng aq." ga tai jáng, haù yuq gi, toq lui, Yhâng htâng cháng bê nghut ri.

¹⁰ Yesuq gi, Mahte é yhùm má myinzang zô nyi é hkùn, kang guq bang myo myo eq yubak dap bang myo myo lé jé kômù, Yhang eq Yhâng é chángzô pé eq rahá zo shuq bum akô.

¹¹ Haù lé, Hparishe pé myàng kôjáng, Yhâng é chángzô pé lé, "Nungmoq é sará gi, haì mù lui, kang guq bang eq yubak dap bang eq rahá zo shuq nyi lhê lúh?" ga myi akô.

¹² Yesuq gi, haù su ga kô é lé wó gyo jáng, "Wángzán bang gi, chỉ sará a ra kô; nòhpyo hui bang za sheq ru rá lhê.

¹³ 'Ngô ô nau é gi, hkungga nhông hkyô a nghut, shogyo nhikmyin hkyô sheq ru nghut lhê.'¹³ gâ é lichyùm lé mhoq yù keq. Hkâsu mù gâ le, Ngô gi, dingsmán bang lé wut yù rá matú jé lé é a nghut, yubak dap bang lé jì yù rá matú sheq jé lé é ru nghut lhê." ga tù tai kat ri.

Zoshuq Gám É Eq Sêng É Hkyô

Mrk 2:18-22; Luk 5:33-39

¹⁴ Hau htâng, Wui-myhup Sará Yohan é chángzô pé gi, Yesuq chyáng jé lé kômù, "Ngamoq eq Hparishe pé gi, zoshuq gám gám kut lhê; nghut kôle, Náng é chángzô pé gi, haì mù a gám kô é lúh?" ga lui, lé myi akô.

¹⁵ Haù mù, Yesuq tù tai é gi, "Bing pé gi, lusik eq rahá nghut nyi to ashí hkùn, hkâsu ge yón kó rá lúh? Lusik lé, yhangmoq chyáng mai shuí yu pyám é hkying jé rá nghut lhê; haù hkùn kúm gi, yhangmoq zoshuq gám kó rá nghut lhê.

¹⁶ Ó yuq le, mebu xau má pán sik èq a lhaq hpo wú kó; hkásu mù gà le, pán sik kun byuq jáng, mebu xau le je lhoq cheq pyám rà nghut lhê.

¹⁷ Tsibiyiq wing asik lé le, shokuq htùng axau má ó a kat wú kó. Kat é nghut jáng, tsibiyiq wing asik soq htân lui, htùng buq goq byuq mù, tsibiyiq wing le yui shun byuq, htùng le htên byuq, dut rà nghut lhê. Haù mù, tsibiyiq wing asik lé, shokuq htùng sik má kat jáng sheq, haù í jùng é a hten rà nghut lhê." gà ri.

Shi Bê Myiwe Zo Eq No É Myiwe Myhi
Mrk 5:21-43; Luk 8:40-56

¹⁸ Yesuq haù su ga tai nyi é hkùn, suwún rayuq jé lé lô mù, Yhâng é hí má hkyihput htuq lui, "Ngá zo byizo gi, ahkui za shi byuq bê. Nghut kôlhâng, Nang lé mù, yhâng é ahtoq má loq lé ke byi laq, haù jáng, yhang, asak dum dui lò rà nghut lhê." ga tai ri.

¹⁹ Yesuq gi, toq mù, Yhâng é chángzô pé eq rahá, haù yuq htâng châng e ló akô.

²⁰ Haù hkùn, raxe í zân yhang, suí yui nyi é myiwe myhi rayuq gi, Yhâng é nunghtáng má huí lé mù, Yhâng é bushi htâng má é záng kat ri.

²¹ Myiwe myhi haù gi, yhang gùng yhang, "Ngò, Yhâng é buhtâng má é wó záng jáng gi, ge byuq rà nghut lhê." ga, wó myit é yanmai nghut ri.

²² Yesuq gi, lhing wú kat lui, yhang lé myàng jáng, "Ngá zo ê, nhik hkâ-ngê, náng é lumjáng myit gi, nang lé lhoq gè byi bê nghut ri." ga tai ri. Haù hkùn jáng yhang, myiwe myhi haù gi, ge byuq bê nghut ri.

²³ Yesuq gi, suwún hpò é yhùm má jé wang ló é hkùn, sampyí mut bang eq garu garin dut nyi é bang lé, é myàng mù,

²⁴ yhangmoq lé, "Hui keq. Myiwe zo gi, shi byuq é a nghut, yhap myhi tô é sheq ru nghut lhê." ga tai jáng, yhangmoq gi, Yhang lé wuizui kut pyám byi akô.

²⁵ Yesuq gi, byù hpùng lé, shinggan shut htoq ló nhâng mù, Yhang wang é lui, myiwe zo haù lé loq èq zui kat jáng, myiwe zo haù gi, dum dui toq lo ri.

²⁶ Haù hkyo é danglù gi, ramau gón yhang jam ló byuq bê nghut ri.

Myojit Í Yuq Eq Nhut Jit Sù Rayuq Lé,
Lhoq Gê Byi É Hkyô

²⁷ Yesuq gi, haù jowò mai xoq e ló nyi le, Yhâng é htâng má, myojit í yuq gi, châng òn uchyang, "Dawiq é Yhangzo é, ngá-nhik lé shogyô yù laq ô!" ga wut tai akô.

²⁸ Yesuq gi, yhùmhaù má jé wang ló é hkùn, myojit su nhik châng wang lò kômù, haù nhik lé, "Ngò wó kut byi é lé, nungnhik lumjáng akô luq?" ga myi ri.

Haù hkùn, yhangnhik gi, "Lumjáng lhê ô, Yhumsing é." ga tù tai akô.

²⁹ Hau htâng, Yhang gi, haù nhik é myojit má é záng htung lui, "Nungnhik lumjáng é eq rajung za dut sháng gaq." ga tai ri.

³⁰ Haù mù, yhangnhik gi, myoq wó myàng bekò nghut ri. Yesuq gi, "Shí hkyô, ó lé le hkásé nhâng kó." ga, yhangnhik lé htân htân sidiq byi ri.

³¹ Nghut kôlhâng, yhangnhik gi, haù hkyô lé, haù mau ramau gón yhang tai pyo ló bekò nghut ri.

³² Haù nhik htoq ló nyi kô é hkùn, nat gang wang júng lui, dang a wó nyô sù rayuq lé, Yesuq chyáng shui lé lo akô.

³³ Nat gang lé hkat htoq pyâm é hkùn, nhutjit sù haù gi, dang wó nyô bê nghut ri. Byù hpùng mó gi, haù lé wú maù byuq kômù, "Shí su dut é hkyô lé, Israellaq amyú má radàm lháng a myang wú." ga tai bum akô.

³⁴ Nghut kôlhâng, Hparishe pé kúm gi, "Nat gâng pé é zâu é wum-o a-tsam èq za, nat gâng pé lé hkat htoq pyâm é nghut ri." ga tai bum akô nghut ri.

Mù Zui Byù Shaù Ri

³⁵ Yesuq gi, myuq pé eq wà pé banshoq má wàng lui, haù pé má é tarajong pé má mhoqshít é eq, mauhkùng mingdán hkyô eq sêng é gabú danglù lé hko kyo uchyang, nõhpyo ajung jung eq noli nojàng hui bang yuq hkangmó lé, lhoq gè byi wún ri.

³⁶ Yesuq gi, byù moq mó lé myàng jáng, wú shogyô nyi ri. Hkásu mù gà le, yhangmoq gi, sau zúng sù a nyi é sau pé su, awui ahke dut é eq byo myin bùm kô é yanmai nghut ri.

³⁷ Haù mù, Yhang gi, Yhâng é chángzô pé lé, "Kyôshù yù rà myo shoq joq kôlhâng, mù zui rà byù gi, shaù nyi ri.

³⁸ Haù mù, haù kyô Yhumsing lé, Yhâng é kyô yô má, kyô shu byù myo myo nhâng byi rà matú, dung keq." ga tai ri.

10

Raxe Í Yuq Lé Nhang Htoq Kat É Hkyô

Mrk 3:13-19; 6:7-13; 9:41; 13:9-13; Luk 6:12-16; 9:1-6; 12:2-9, 51-53; 14:26-27; 21:12-17

¹ Yesuq gi, Yhâng é chángzo raxe í yuq lé wut yù mù, agè ashop é nat pé lé wó hkat htoq rà eq, noli nojàng eq nõhpyo ajung jung lé wó lhoq gè rà ahko ahkáng yhangmoq lé byi ri.

² Haù lagyo raxe í yuq é mying gi, (Petruq ga sù) Simun eq yhanggu Andre; Zebedi é yhangzò nhiktang Yakuq eq yhanggu Yohan;

³ Hphilip eq Barhtolume; Htomaq eq kang guq sù Mahte; Alhpe é yhangzo Yakuq, Htade,

⁴ Zelutuq* dut é Simun eq, Yesuq lé ap pyám rà sù, Yudaq Iskarut pé nghut akò.

⁵ Yesuq gi, haú bang raxe í yuq lé dangsàng mù, nhang htoq kat ri. Yhang sang kat é dang gi, "Tùngbaù pè chyáng le hkâ-ê kò; Samariq wà rawà mà lé hkâwàng kó.

⁶ Haú byuq byuq é sau pè su nghut nyi é Israelaq byu pè chyáng sheq é keq.

⁷ Nungmoq gi, ê mù, 'Mauhkúng mingdán gi, chyáng lò bê nghut ri.' nghu é danglù lé hko kyo keq.

⁸ Nò bang lé lhoq gè byi, shí bê bang lé lhoq dui toq, manggám dap bang lé lhoq san lhoq yung byi, nat gâng pé lé hkat htoq pyám, kut keq. Láí láí wó é lé, láí láí byi keq.

⁹ Nungmoq é hpyihit má, hũng, ngùn eq gyi pè hkâkat chũng kó;

¹⁰ hkyowui é matú, etap, mebu htaí, hkyi-tsung eq dumbàng pé hkâyü chũng kó; hkâsu mù gâ le, mù zui sù gi, zoshuq wó gíng lhê.

¹¹ Hká wâ hká dum má jé wang ló le le, haú mà é gingdán é byù lé hô mù, haú mai htoq ló é hkùn jé shoq, haú yuq é yhùm má za nyi nyi keq.

¹² Haú yhùm má wang é hkùn, shichyên yù keq.

¹³ Haú yhùm gi, gingdán é nghut jáng, nungmoq shimân byi é hkyô, yhangmoq chyáng joq nyi shàng gaq; a gingdán é nghut jáng, nungmoq chyáng dum taù lò shàng gaq.

¹⁴ Nungmoq lé a lhom hap yu é eq nungmoq é dang lé a lhom gyo byi kò é nghut jáng, haú yhùm haú wâ mai htoq ló é hkùn, nungmoq é hkyiwa má dap é hpuilhaù lé ko hkyô pyám to keq.

¹⁵ Ngò, nungmoq lé teng za taí kôlé, tará jéyáng é buinyi má, haú wâ gi, Sodom eq Gomoraq myuq htoq má jé hpuzo rà nghut lhê.

¹⁶ Wamhkui hpúng má nhang hâng kat é sau pé lé su, Ngò, nungmoq lé nhang kat é nghut lhê. Haú mù, lhangmuì su hpaqchyí bò luí, hpúngkyui su nú-nhâm nyi keq.

¹⁷ Byu pé lé sidiq keq; hkâsu mù gâ le, yhangmoq gi, nungmoq lé, tará rùng pé má é ap pyám kò rà nghut é htoq agó, yhangmoq é tarajong pé má, nungmoq lé nhuq bat kò rà nghut lhê.

¹⁸ Nungmoq gi, Ngá é yanmai, mauzau wui eq hkohkam pé é hí má shuí jé é hui luí, yhangmoq é hí má le, tũngbaù pé é hí má le, saksé myang hkám kò rà nghut lhê.

¹⁹ Nghut kólhang, nungmoq lé ap pyám kò é hkùn, nungmoq hkâsu taí rà eq haí taí rà lé, hkâ-myit chiq kó. Haú hkùn taí rà dang, nungmoq wó kò rà nghut lhê.

²⁰ Hkâsu mù gâ le, haú gi, nungmoq é dang a nghut, nungmoq é Yhângwâ é Woi-nyí sheq, nungmoq dõng taí rà ru nghut lhê.

²¹ Nhiktàng gi, nhiktàng yhangchang, iwa gi, yhangzo lé, shí shoq ap pyám lhum kò rà nghut lhê; zo wui gi, mó wui lé gumlau toq mù, sat pyám nhâng kò rà nghut lhê.

²² Byù lhunglhang bang gi, Ngá é yanmai, nungmoq lé a nguì kut kò rà nghut lhê; nghut kólhang, jihitùm jé shoq wó hkam jân nyi é sù gi, hkyi yu é hui rà nghut lhê.

²³ Rawò má zing-ri é hui jáng, rawò shut hpang é keq. Ngò, nungmoq lé teng za taí kôlé, Israelaq byu pé é myuq pé má, nungmoq a ban wang ngap shimá, haú Byu Yhangzo jé rà nghut lhê.

²⁴ Jongzo gi, sará htoq, dui-nhâng zoshàng gi, yhumsing htoq, gyaù rà a nghut.

²⁵ Jongzo gi, yhâng é sará su, dui-nhâng zoshàng gi, yhâng é yhumsing su, wó dut jáng gé bê. Yhumsing hpó lé lhang Bezebulaq ga kò le gi, Yhâng é yhumbyù wui lé gi, jé riyhang nghù kò rà a nghut lhú?

²⁶ Haú mù, yhangmoq lé hkâgyuq kó. A byông htoq loshoq wó zaù nghop tò é haí le a joq rà nghut lhê; a sé loshoq wó haq tò é le, haí a joq rà nghut lhê.

²⁷ Ngò, nungmoq lé mauchut hkaù má taí é hkyô lé, myoq myàng maubó má taí kyo keq; Ngò, nungmoq lé dangsoq soq kyo é hkyô lé, yhumhkúng htoq mai taí pyô keq.

²⁸ Gungdu lé za wó sat pyám mù, woi-nyí lé a wó sat bang lé, hkâgyuq kó. Woi-nyí lé le, gungdu lé le, ngaraí ming má wó lhoq htên é Sù lé sheq, gyuq nyi keq.

²⁹ Johkyáng í du lé, gyi htìngchap rachap eq wó ùng pyám lhê a nghut kò lhú? Nghut kólhang, haú radu lhang, nungmoq é Íwá é myit eq a nghut jáng, myigùng má wó byit gyó rà a nghut.

³⁰ Nungmoq é ulhum má é xâm banshoq lé lhang, nghap to gù nghut lhê.

³¹ Haú mù, hkâgyuq kó; nungmoq gi, haú johkyáng myo myô htoq má lhang gù jé bo é bang nghut lhê.

³² Byu pé hí má, Ngo lé lhom yín yu é sù ó yuq lé nghut kôle, mauhkúng htoq mà é Ngá Wá é hí má, Ngò lhom yín yù rà nghut lhê.

³³ Byu pé é hí má, Ngo le he-ngik pyám é sù ó yuq lé nghut kôle, mauhkúng htoq mà é Ngá Wá é hí má, Ngò he-ngik pyám rà nghut lhê.

³⁴ Ngo lé, haú myidàm htoq má simsaq hkyô byi rà matú lé lo é sù su hkâ-ngâm kó. Ngò gi, simsaq hkyô byi rà matú lé lo é a nghut, shâm byi rà matú sheq lé lo é ru nghut lhê.†

* **10:4** Zelutuq gâ é lichyùm gi, yhumsing zui sai é hkyô má gyai yhang myit lòm shirong é sù lé ga lhê. Haú u lé, Israelaq byu pé gi, mingdán luthkyô wó rà matú shikut nyi é hpúng bang lé, Zelutuq gâ lhê. † **10:25** Bezebulaq gâ é gi, Tsadán é myíng raja nghut lhê. ‡ **10:34** Yesuq gi, simsaq hkyô byi sù nghut lhê. Nghut kólhang, Yhang é yanmai, byu pé mabyoq htoq rà nghut é hkyô lé sé mù, haú su ga taí é nghut lhê.

³⁵ Hkâsu mù gâ le, Yuqzo gi, yhângwa eq, byizo gi, yhângnu eq, dumó gi, yhângmhoi eq, byoq lhum kó rá nghut lhê.

³⁶ Yhumsing é yhumbyu wui gi, yhumsing é gyê taú dut rá nghut lhê.[✧] gâ tô é matú sheq, Ngô jé lé é ru nghut lhê.

³⁷ Ngô lé chiyit é htoq yhumsing é ìnu ìwa lé je chiyit é sù ó yuq nghut kôle, Ngá é chángzo kut rá gingdán sù a nghut; Ngô lé chiyit é htoq yhumsing é zo wui lé je chiyit é sù ó yuq nghut kôle, Ngá é chángzo kut rá gingdán sù a nghut;

³⁸ Yhumsing é tapzìng lé a waq é za, Ngá htâng châng é sù ó yuq nghut kôle, Ngá é chángzo kut rá gingdán sù a nghut.

³⁹ Yhumsing é asak lé ha bún é sù ó yuq nghut kôle, asak sum rá nghut lhê; Ngá é yanmai, yhumsing é asak sùm pyám é sù ó yuq nghut kôle, asak wó rá nghut lhê.

⁴⁰ Nungmoq lé hap yù sù gi, Ngô lé hap yu é sù nghut bê; Ngô lé hap yu sù gi, haú Ngô lé nhang kat Sù lé hap yu é sù nghut bê.

⁴¹ Myiqhtoi rayuq lé, myiqhtoi òng lhom hap yu é sù ó yuq nghut kôle, myiqhtoi rayuq é chyunghuq lé wó yù sù gi, haú Ngô lé nhang kat Sù lé hap yu é sù nghut lhê.

⁴² Shí, tiq bang mã é rayuq yuq lé, Ngá é chángzo nghut é yanmai, uchyam ragóm byi huq é sù gi, Ngô, nungmoq lé teng za tai kôlé, yhâng é chyunghuq lé hkyak myang hkam yù rá za nghut lhê." gâ ri.

11

Yesuq Eq Wui-myhup Sará Yohan Luk 7:18-35

¹ Yesuq gi, Yhâng é chángzo raxe í yuq lé dang ban pying é htâng mã, Galile mau mã é wà pé mã mhoqshit rá matú eq hko kyo rá matú, haú jowò mai htoq e ló bê nghut ri.

² Wui-myhup Sará Yohan gi, Hkrisduq kut nyi é hkyó lé, htóng hkaú mã wó gyo jáng,

³ "Nàng gi, haú jé lé lô rá Sù nghut lhê lú? Haú a nghut jáng, ngamoq gi, góyuq lé láng ra shirà lú?" ga, yhâng é chángzó pé lé myi nhang kat ri.

⁴ Yesuq tù tai é gi, "Nungmoq wó gyo wó myang é hkyó, Yohan lé lô tai kyo keg;

⁵ myoqjit bang, myoq wó myâng bekò; hkyi hten bang le, wó so bekò; manggâm dap bang le, lhoq gê byi é hui bekò; nojit bang le, wó gyo bekò; shí bê bang le, lhoq dui toq é hui bekò; myùng bâng é matú, gabú danglú hko kyò nyi bê nghut lhê.

⁶ Ngá é yanmai, Ngô lé lum shut é hkyô a bô sù gi, hkungsô wó nyi ri." ga tai ri.

⁷ Yohan é chángzó pé taú lô kô é u lé, Yohan eq séng luí, byù móq mó lé Yesuq tai é gi;

"Nungmoq gi, haí lé hpuq wú rá matú, haú yoso shut e akò lú? Lai eq hik nhún é jamgàm lé wú rá matú nghut akò lú?"

⁸ Haú a nghut jáng, haí lé wú rá matú e akò lú? Nú-nhâm é mebu wut sù lé wú rá matú e akò lú? A nghut. Nú-nhâm é mebu wut bang gi, hkohkâm-wâng pé mã sheq rú nyi lhê.

⁹ Haú nghut lé gi, haí lé wú rá matú é kô é lú? Myiqhtoi rayuq lé lú? Haú kúm nghut ri; Ngô, nungmoq lé tai kôlé, Yohan gi, myiqhtoi htoq lháng gyaú sù nghut lhê.

¹⁰ Haú yuq é hkyó lé, Chyúmdang mã kâ tô é gi,

"Wú aq, Náng é hkyó lajang láng rá matú, Ngá é lagyo lé, Náng é hí mã Ngô nhang kat rá nghut lhê."[✧]

gâ ri.

¹¹ Ngô, nungmoq lé teng za tai kôlé, myiwe wui mai hku kat é bang mã, Wui-myhup Sará Yohan htoq je kô é rayuq lháng a htoq wú shi; nghut kôlháng, Garai Gasâng é mauhkung mingdán mã je tiq dik sù gi, Yohan htoq je kô lhê.

¹² Wui-myhup Sará Yohan é buinyi mai ahkué je shoq, mauhkung mingdán gi, lú chyin wang nyi é hui mù, sarhé pé gi, haú lé wó yù bekò nghut ri.

¹³ Hkâsu mù gâ le, Yohan é ahkying jé shoq, haú myiqhtoi pé banshoq eq tará gi, haú hkyó eq séng luí, myiqhtoi htoí to gù nghut lhê.

¹⁴ Nungmoq hap yù nau é nghut jáng, Yohan gi, haú jé lé lô rá ga sù Eliyaq nghut lhê.[✧]

¹⁵ Gyô yù rá nohkyap dap sù gi, gyô yù sháng gaq.

¹⁶ Shí ipyat lhê é byu pé lé, Ngô, hai eq tai kô wú rá lú?

¹⁷ Yhangmoq gi,

"Nungmoq é matú, ngamoq sampyi mut byi kôlháng, nungmoq gi, a gó kó;

ngamoq, ngaú hkyangsâng kôlháng, nungmoq gi, a ngaú kó."

ga luí, gai pé mã zùng mù, góbang lé wut tai lhúm nyi é zosháng wui eq wui akò.

¹⁸ Hkâsu mù gâ le, Yohan gi, jé lé mù, a zo a shuq kut jáng le, yhangmoq gi, yhang lé, "Yhang gi, nat gang dap sù nghut ri." ga tai akò.

¹⁹ Haú Byu Yhangzo jé lé luí, zo mù shuq mù kut jáng le, "Shí yuq gi, zo myoq shuq myoq noq sù eq, kang guq bang eq yubak dap bâng é buinùm hpò nghut ri." ga dum tai akò. Nghut kôlháng, hpaqchyi byéng-yá gi, yhâng é muzó eq saksé tún shit nyi ri." gâ ri.

Myit A Lhìng É Wà Mó Pé Hkyô Luk 10:13-15

✧ 10:36 Mihka 7:6 ✧ 11:10 Mal 3:1 ✧ 11:14 Mal 4:5

²⁰ Hau htâng, Yesuq gi, laklai kumlhá pé je myo kut shit bê nghut kôlhang, myit a lhang é myuq pé lé tân é gi,

²¹ "Kurazin và mô ê! Nàng dingnyé wó ri! Bet-saida và mô ê! Nàng dingnyé wó ri! Nungmoq chyáng lé kut shit é laklai kumlhá pé lé, Turuq myuq eq Sidun myuq má kut shit é ru nghut le gi, yhangmoq, noq noq mai myit lhang mù, jimé tù wut lhê, myiwap kyaq gyùn lhê kut bekô rà nghut lhê.

²² Ngò, nungmoq lé tai kôlé, tarâ jéyáng é buinyi má, nungmoq gi, Turuq myuq eq Sidun myuq htoq má je hpuzo kô rà nghut lhê.

²³ Dum mù, Kaperna-um và nàng ê, nàng gi, mauhkúng jé shoq waq toq é hui rà lhú? A nghut, mosumhkung má sheq gyó rà nghut lhê. Náng chyáng kut shit é laklai kumlhá lé, haù Sodom và má kut shit é ru nghut le gi, myuq haù hkú-nyí jé shoq joq nyi rà nghut lhê.

²⁴ Ngò, nungmoq lé tai kôlé, tarâ jéyáng é buinyi má, Sodom và hpuzô é gi, náng htoq shau rà nghut lhê." gâ ri.

Ngú Nyí Bàng É Matú Bánno Jang

Luk 10:21-22

²⁵ Haù u lé, Yesuq tai é gi, "Mauhkúng eq myigung é Yhumsing, Áwa ê, Nàng gi, haù pé lé, hpaqchyí byéng-yá bô bang eq myit hpaqchyí sé bâng é hí má nghop to luí, zoshàng wui lé tún shit bê nghut é yanmai, Ngò, Nang lé hkya-on lhê ô.

²⁶ Nghut bê, Áwa ê, haù gi, Nàng ô nau é hkyô nghut ri.

²⁷ Ngá Wa gi, lhunglhang lé Ngá é loq má ap byi to bê. Haù Zo lé, Áwa mai lai luí ó le a sé; Áwa lé le, haù Zo eq haù Zo mai sé nhàng rà matú hkyin yu é bang mai lai luí ó a sé.

²⁸ Ngú é eq wòlai wun é lhunglhang bang é, Ngá chyáng lé keq; Ngò, nungmoq lé bánno nhàng rà nghut lhê.

²⁹ Ngò gi, myit nú-nhâm é eq myit lhoq nyhum é sù nghut é yanmai, Ngá é kandang lé waq keq; Ngá chyáng mai mhoq yú keq; haù hkún, nungmoq é asak woi-nyí bánno kô rà nghut lhê.

³⁰ Haù mù gà le, Ngá é kandang gi, waq lui é htoq agó, Ngá é wò le sôm lhê." gâ ri.

12

Bánno Buinyi É Yhumsing

Mrk 2:23-28; 3:1-6; Luk 6:1-5, 6-11

¹ Haù yoq lhê é Bánno buinyi ra-nyí má, Yesuq gi, Yhâng é chángzô pé eq rahá yò hkaù mai sô lai ló nyi ri. Yhâng é chángzô pé gi, zòmút é yanmai, kyôshi ratsuí langshap yù mù, zô akò nghut ri.

² Hparishe pé gi, haù lé myàng kôjáng, "Wú aq! Náng é chángzô pé gi, Bánno buinyi

má a ge kut jung lé kut nyi akò." ga tai kat akò.

³ Haù hkún, Yesuq tù tai é gi, "Dawiq lhang gi, yhâng htâng châng é bang eq rahá zòmút hui é hkún hkâsu kut é hkyô lé, nungmoq a nghap wú kô lhú?

⁴ Dawiq gi, Garai Gasâng é yhúmhmaù má wang é mù, hkyangjông pé mai lai luí, ó le a ge zô é, kyâng tô é muk lé, yhang eq yhâng htâng châng é bang yù zo kô é a nghut kô lhú?

⁵ Hau htoq agó, Bánno buinyi má, hkyangjông pé gi, noqkuq yhúmhmaù má Bánno buinyi é tarâ lé shut kôlhang mara a wó é lé, haù tarâ laiká má nungmoq a nghap wú kô lhú?

⁶ Ngò, nungmoq lé tai kôlé, haù noqkuq yhúm htoq je ko sù gi, shí má nghut nyi lhê.

⁷ "Ngò ô nau é gi, hkungga nhông hkyô a nghut, shogyo nhikmyin hkyô sheq ru nghut lhê^{*} gâ é lichyúm lé nungmoq sé kô é ru nghut le gi, mara a bô bang lé mara hùn kô rà a nghut.

⁸ Hkâsu mù gà le, haù Byu Yhangzo gi, haù Bánno buinyi é Yhumsing nghut lhê." gâ ri.

⁹ Hau htâng, Yhang gi, haù jowò mai é ló mù, yhangmoq é tarajông má wang e ló ri.

¹⁰ Loq rahkyam ajum shi byuq é byù rayuq le, haù má nyi tô ri. Yhangmoq gi, Yesuq lé, "Bánno buinyi má, nòhpyo lhoq gè byi le, tarâ wang lhê lhú?" ga myi é dông, Yhang lé mara hùn rà hkyô ho akò nghut ri.

¹¹ Haù hkún, Yesuq gi, "Nungmoq chyáng má é ó yuq wá, yhumsing é sau radu, Bánno buinyi má dong gyó tô le, a xe htoq yu é nyi kô rà lhú?

¹² Byù gi, saù htoq má hpaudap dik é nghut lhê! Haù mù, Bánno buinyi má ge é hkyô kut le, tarâ wang lhê." ga yhangmoq lé tù tai ri.

¹³ Hau htâng, Yhang gi, haù loq jum shí sù lé, "Náng é loq nyhang kat aq." ga tai kat jáng, haù yuq gi, loq nyhang kat jáng, loq haù gi, a no é loq su ge byuq bê nghut ri.

¹⁴ Hparishe pé kúm gi, htoq ló kômù, Yesuq lé hkâsu kut wó sat pyám rà hkyô lé, chôm hpyé lhum bum akò nghut ri.

Garai Hkyin Tô É Dui-nhâng Zoshàng

¹⁵ Yesuq gi, haù hkyô lé sé jáng, haù jowò mai htoq ló bê nghut ri. Byù myo myo le, Yhâng htâng châng bùm kômù, Yhang gi, nòhpyo hui bang banshoq lé lhoq gè byi luí,

¹⁶ Yhang ó yuq nghut é hkyô lé, a tai byông htoq rà matú, yhangmoq lé tai hkúm tô ri.

¹⁷ Haù gi, myiqhtoi Esai-aq é nhut dông mai tai tô é dang lé lhoq dik rà matú nghut ri. Dang haù pé gi,

¹⁸ "Shí yuq gi, Ngò chyit, Ngò myit ngui luí, hkyin tô é Ngá é dui-nhâng zoshàng nghut lhê;

* 12:7 Hos 6:6

Ngò gi, Ngá é Woi-nyí, Yhang lé kat byi rá nghut mù,

Yhang gi, tarâ dingmán é hkyô lé byù myù banshoq pé má tai kyo rá nghut lhê.

¹⁹ Yhang gi, haí a hpuq tù é htoq agó, a garu rá nghut lhê; Yhâng é htê lé, hkyô mó pé má wó gyo rá a nghut.

²⁰ Yhang gi, tarâ dingmán é hkyô lhoq ung é hkûn jé shoq,

nâng chap pyám bê jam gàm lé le, lhoq hkyui rá a nghut, myihkau za htoq nyí bê myi lé le, lhoq sat pyám rá a nghut.

²¹ Byù myù chângjup gi, Yhâng é mying má myit myoqbyù kó rá nghut lhê."^{*}

gâ ri.

Yesuq Eq Bezebulaq

Mrk 3:20-30; Luk 11:14-23; 12:10; 6:43-

45

²² Hau htâng, agè ashop é nat gang wang júng lui, myoqjit nhutjit é byù rayuq lé, Yesuq chyáng shuí lé lô kôjáng, Yesuq gi, haú yuq lé lhom lhoq gè byí ri; haú mù, haú yuq gi, dang le wó nyó, myoq le wó myàng dut bê nghut ri.

²³ Byù hpùng mó gi, haú lé wú maú byuq kômù, "Shí yuq, Dawiq é Yhangzo za gi, nghut lhê laq?" ga tai bum akó.

²⁴ Nghut kôlhang, Hparishe pé gi, haú lé wó gyo kôjáng, "Shí yuq gi, nat gâng pé é zau Bezebulaq* é wum-o a-tsam èq za nat gâng pé lé wó hkat htoq é nghut ri." ga tai bum akó nghut ri.

²⁵ Yhangmoq myit nyi é hkyô lé Yesuq sé mù, yhangmoq lé tai é gi, "Hká mingdán nghut kôle, ahkaú má byoq gâng lhùm nyi kô é nghut jáng, htên byoq byuq rá za nghut lhê; haú eq rajung za, myuq ralhum nghut nghut, yhumhtu ralhum nghut nghut, yhangchang byoq lhùm nyi kô é nghut jáng, haú gi, wó gíng nyi rá a nghut.

²⁶ Tsadán gi, Tsadán lé hkat htoq pyám é nghut jáng, yhumsing gùng yhumsing lhoq hpyoq nyí gù bê nghut ri. Haú su nghut jáng, yhâng é mingdán gi, hkâsu kut wó gíng to rá lhú?

²⁷ Haú mù lui, Ngò gi, Bezebulaq é wum-o a-tsam èq za nat gâng pé lé hkat htoq é nghut jáng, nungmoq é byu pé gi, ó yuq é wum-o a-tsam èq hkat htoq pyám kô é nghut lhê lhú? Haú su nghut jáng, haú bang gi, nungmoq lé tarâ jéyáng bang dut kó rá nghut lhê.

²⁸ Nghut kôlhang, Ngò gi, Garai Gasâng é Woi-nyí èq nat gâng pé lé hkat htoq pyám é nghut jáng, Garai Gasâng é mingdán gi, nungmoq chyáng jé bê nghut ri.

²⁹ Ó yuq nghut kôle, wum-o bô sú lé hí tuí zing pyám é a nghut le gi, yhâng é yhùm má lú wàng mù, yhâng é sutzè lé hkâsu wó lú

yu rá lhú? Haú yuq lé hí tuí zing pyám jáng sheq, yhâng é sutzè lé wó lú yú rá nghut lhê.

³⁰ Ngá hkyam shut a dap sú gi, Ngo lé gye kut sú nghut lhê; Ngò eq rahá a shùm tsing sú gi, lhoq pyo pyám é sú nghut nyi ri.

³¹ Haú mù, Ngò, nungmoq lé tai kôlé, byu pé é yubak mara hkangmó eq Garai Gasang lé rhoi dang tai pyám é lhunglhang gi, mara hkyut byí é wó hui rá nghut lhê. Nghut kôlhang, haú Chyoiyung Woi-nyí lé rhoi dang tai pyám é gi, mara hkyut byí é hui rá a nghut.

³² Haú Byu Yhangzo lé dang đông shut é sú gi, mara hkyut byí é wó hui rá nghut lhê; nghut kôlhang, haú Chyoiyung Woi-nyí lé dang tai shut é sú gi, shí ipyat má le, htang pyat má le, mara hkyut byí é hui rá a nghut.

³³ Ashi lé wú lui, agàm lé sé rá nghut é yanmai, agàm lé lhoq gè jáng, ashi le gè rá nghut lhê; agàm lé a lhoq gè jáng, ashi le gè rá a nghut;

³⁴ Duq htân lhangmui amyú lé, nungmoq gi, agè ashop é bang nghut to kôlui nhing, dang gè hkâsu wó tai kó rá lhú? Hkâsu mù gâ le, i-myit unghkaú má bying mui tô é lé za, nhut mai tai htoq lo é nghut lhê.

³⁵ Ge é sú gi, yhumsing é i-myit unghkaú má é sutzò mai ge é zè pé lé lhoq htoq shit lhê. Agè ashop é sú gi, yhumsing é i-myit unghkaú má é agè ashop é sutzò mai, agè ashop é zè pé lé lhoq htoq shit lhê.

³⁶ Ngò, nungmoq lé tai kôlé, byù gi, yhumsing tai kat é akyù a bo é dang pé é matú, tarâ jéyáng é buinyi má tai sân kyo ra kó rá nghut lhê.

³⁷ Hkâsu mù gâ le, yhumsing mara lut rá le, ó le ó tai é dang pé mai; mara byí é hui rá le, ó le ó tai é dang pé mai, nghut rá nghut lhê." gâ ri.

Limik Kumlhá Lé Dung Kô É Hkyô

Mrk 8:11-12; Luk 11:29-32; 11:24-26

³⁸ Hau htâng má, Hparishe pé eq tarâ sará pé ra-am gi, "Sarâ ê, ngamoq gi, Nang, limik kumlhá kut shit rá lé myàng nau ri." ga Yhang lé dúng akó.

³⁹ Haú mù, Yhang tù tai é gi, "Agè ashop é eq lhum a zui é ipyat shí gi, limik kumlhá dung nyi ri myhi-nhung! Myiqhtoi Yonaq é kumlhá mai lai lui, gotú hai le tún shit rá a nghut.

⁴⁰ Hkâsu mù gâ le, Yonaq gi, ngo mó é wamdau hkaú má sum nyí sum myín lúng é su, haú Byu Yhangzo le, myigùng kang má sum nyí sum myín lúng rá nghut lhê.

⁴¹ Ninewe wà byù wui gi, Yonaq mung-dang hko kyô é hkûn myit lhing kô é nghut mù, tarâ jéyáng é buinyi má, ipyat shí má é bang eq rahá toq lò lui, ipyat shí má é bang

* 12:21 Esai 42:1-4

* 12:24 Bezebulaq gâ é gi, Tsadán é mying rajaú nghut lhê.

lé mara hùn kó rã nghut lhê; haù Yonaq htoq kó sù gi, ahkuí shí má jé nyi to bê.

⁴² Maupyi mã é hkohkâm myhí gi, maumyi ló htàng é mai lé lô mù, Sholumon é hpaqchyí dang lé, lé gyô yù bê nghut mù, haù tarã jéyáng é buinihí má, ipyat shí mã é bang eq rahã toq lô lui, ipyat shí mã é bang lé mara hùn rã nghut lhê; haù Sholumon htoq kó sù gi, ahkuí shí má jé nyi to bê.

⁴³ Haù agè ashop é nat gi, byù rayuq chyáng mai htoq lô mù, kyuq huí é jowò pé má sò yông e lô lui, no rã jowò hkat ho wù le, a myang hô nghut ri.

⁴⁴ Haù hkùn, yhang gi, "Ngò nyi lai lo é yhùm má dum taù lò wù rã." ga tai ri. Yhang dum taù jé lò wù le, yhùm haù lé, ó le a sing yu hpyuq é htoq agò, san za rago dut to lánq é lé lô myang ri.

⁴⁵ Haù jáng, yhang gi, dum taù è mù, yhang htoq je wuú é nat nyhit nat lé shui lò lui, haù má lo wang nyi to bekô. Haù mù, haù yuq é nyi yap sãmlai gi, hí lhê htoq má je wuú lò bê nghut ri; agè ashop é ipyat shí le, haù eq rajung za dut rã nghut lhê." gã ri.

*Yesuq É Yhângnu Eq Yhanggú Pé
Mrk 3:31-35; Luk 8:19-21*

⁴⁶ Yesuq, shiwa byu pé lé dang rú nyo nyi ashí hkùn, yhângnu eq yhanggu pé gi, Yhang lé nyò nau kômù, shinggan mã lé yap tô akò nghut ri.

⁴⁷ Haù mù, Yesuq lé, "Náng nu eq nunggu pé gi, Nang lé nyò nau mù, shinggan mã lánq yap bum akò." ga tai kyô akò.

⁴⁸ Haù hkùn, Yhang gi, "Ô pé gi, Ngá nu eq Ngá gu pé nghut akò lhú?" ga tú tai kat ri.

⁴⁹ Haù htàng, Yhang gi, Yhâng é chángzô pé lé loq tun lui, "Wú keq, shí bang gi, Ngá nu eq Ngá é gumang wuú nghut bê.

⁵⁰ Hkásu mù gã le, mauhkung htoq mã é Ngá Wa ô nau é hkyô châng é sù ó yuq nghut kôle, Ngá gu Ngá mang, Ngá gu Ngá nhá, Ngá nu chyat nghut bê." ga xoq tai ri.

13

*Kyôshi Sân É Dangtú
Mrk 4:1-20; Luk 8:4-15*

¹ Haù nyi mã yhang, Yesuq gi, yhùmhaù mai htoq lô mù, wuú nhông yàm mã è zung tô ri.

² Byù hpung mó gi, Yhâng é lhinghkyuq má zup zing lé bum kô é yanmai, Yhang gi, lhai hkaù mã doq zung tô ri. Shiwa byu pé kúm gi, gin-gau htoq mã yap tô bum akò.

³ Haù htàng, Yhang gi, haù bang lé, dangtú pé dông myo san rã ga htoq e lô ri.

⁴ Yhang, kyôshi sân kat é hkùn, ra-am gi, hkyô mã gyô ang mù, nghoq pé èq lé hte zò pyám ri.

⁵ Ra-am gi, myi-tse a htu é luqgok yò pé mã gyô ang mù, myi-tse a htu é yanmai, lui za yuq htoq lô kôle,

⁶ amyit a wó chin hing é nghut mù, bui htoq lô jáng, lhap kyuq pyám bê nghut ri.

⁷ Dum ra-am gi, zugyóm hkaù mã gyô ang lui, zubyap haù pé kó lò mù, wup pyám ri.

⁸ Ra-am dum nghut jáng, myihpún bo é jang mã gyô ang lui, ashi zuí lo é gi, sân kat é htoq rashò tú, hkyuq xê tú, sum xê tú, myò jat lo é nghut ri.

⁹ Gyô yù rã nohkyap dap sù gi, gyô yù sháng gaq." ga le tai ri.

¹⁰ Haù hkùn, chángzô pé gi, Yhâng chyáng lé mù, "Náng gi, hai mù, shí bang lé, dangtú dông tai lhê lhú?" ga myí akò.

¹¹ Haù jáng, Yhang tú tai é gi, "Mauhkung mingdán eq sêng é sê gyo wuú é hkyô pé lé sê gyo rã ahko ahkáng, nungmoq lé byi to bê, nghut kôlhang, yhangmoq lé gi, a byi shí é nghut lhê.

¹² Wó to sù lé gi, yhang agùn agó wó rã matú, jat byi shirã nghut lhê. A wó su chyáng mai kúm gi, yhang wó tô é lé háng yu pyám byi shirã nghut lhê.

¹³ Yhangmoq gi, wú to kôlhang, a myàng kó; gyô nyi kôlhang, a wó gyo, a sê gyo kó nghut é yanmai, yhangmoq lé Ngò dangtú dông tai rã é nghut lhê.

¹⁴ Haù gi, "Nungmoq gi, wó gyô tô nyi kôlhang, sê gyo kó rã a nghut; myang tô nyi kôlhang, wú sé kó rã a nghut.

¹⁵ Hkásu mù gã le, byù shí bang gi, myit nhikshi jit byuq bê; yhangmoq é nohkyap gi, a wó gyo kó, myoqií le chum byuq bekô nghut ri.

Haù su a nghut le gi, yhangmoq, myoq myàng no gyo mù,

i-myt bun bóng lui, lhing lò kômù, Ngò, yhangmoq lé yã gè byi berã nghut lhê.¹⁶

gã é, Esai-aq é myiqhtoi dang lé lhoq dik é nghut ri.

¹⁶ Nghut kôlhang, nungmoq é myoq gi, wó myàng mù, nungmoq é nohkyap gi, wó gyô é yanmai, nungmoq gi, hkungso wó nyi ri.

¹⁷ Hkásu mù gã le, Ngò, nungmoq lé teng za tai kôlé, nungmoq wó myàng, wó gyô é pé lé, myiqhtoi pé eq dingmán bang myo myo gi, myàng naù gyo nau kôlhang, a wó myàng, a wó gyo kó nghut ri.

¹⁸ Ahkuí, kyôshi san sù eq sêng é dangtú é lichyúm lé rago gyô wú keq;

¹⁹ Hkyô mã gyô áng é kyôshi gi, mauhkung mingdán eq sêng é danglú lé wó gyo kôlhang, a sê gyô é yanmai, haù agè ashop sù lé lô mù, yhâng é i-myt hkaù mã san kat tô é kyôshi lé, lé yu pyám byi é hui sù lé gã nau é nghut lhê.

²⁰ Luqgok yò pé má gyó âng é kyôshi gi, mungdang lé wó gyo jáng, radá dâm gabú myit éq hap yù kôlhang,

²¹ amyit a wó chin é yanmai, razup zo za yuq mù, mungdang é yanmai, wuîhkê é eq zing-rí é hui kôjáng, hân hân htak ló byuq é sù lé gá nau é nghut lhê.

²² Zugyóm má gyó âng é kyôshi gi, haù mungdang lé wó gyó yù kôlhang, shí ipyat lhê é myit wui myit hke hkyô pé eq hkyô shuí ngoq jung ngùn hîng zèhkoq éq hup pyám é yanmai, ashi a wó zuí é sù lé gá nau é nghut lhê.

²³ Nghut kôlhang, myihpún bo é jang má gyó âng é kyôshi kúm gi, mungdang lé wó gyo mù, sê gyó yu é sù lé gá nau é nghut lhê. Haù yuq ashi zuí é gi, san kat é htoq rashô tú, hkyuq xê tú, sum xê tú, myô jat lo é nghut ri.

Myoqgàm Dangtú

²⁴ Yesuq, yhangmoq lé dangtú dông xoq taí kyô é gi, "Mauhkúng mingdán gi, ge é kyôshi lé, yò má san kat sù rayuq eq du ri.

²⁵ Byu pé yhup myíhí tò bum é u lé, yhâng é gyè gi, lé jé mù, guq gàm gyoro má, myoqshi lé sân to hkó luí, taù ló byuq bê nghut ri.

²⁶ Guq gàm yuq lò mù, guq nhâm htoq lo é hkún, myoqgàm le bo yuq htoq lo ri.

²⁷ Yhumsîng hpô é dui-nhâng zoshâng wui gi, yhâng chyáng lé jé mù, 'Yhumsîng è, ge é kyôshi lé za yò má sân tô é a nghut lú? Myoqgàm pé gi, hkâmai htoq lo é lú?' ga myi kôjáng,

²⁸ haù yhumsîng hpô gi, 'Gumlau gye èq kut é nghut ri.' ga tú taí ri.

Haù jáng, dui-nhâng zoshâng wui gi, 'Ng-amog, myoq haù pé lé é nut pyám rá lé, nàng ô nau ri lú?' ga myí akô.

²⁹ Haù hkún, yhang gi, 'Hká nut pyám kó; hkâsu mù gá le, nungmoq, myoq haù pé lé nut é hkún, guq gàm pé lé le bo záng nut pyám kó rá nghut lhê.

³⁰ Kyôshu yoq jé shoq rahá yuq to kó sháng gaq; haù hkún, myoqgàm pé lé hí hkyin tsîng yù mù, nyhê hkyô pyám rá matú hkyom dîng to luí, guq lé kúm gi, shù yù mù, ngá é chyí má tsing kat to rá matú, kyô shu bang lé ngò taí rá nghut lhê.' ga tú taí ri." gá ri.

Angshi Cham Eq Múnchi Dangtú

Mrk 4:30-34; Luk 13:18-21

³¹ Hau htâng, Yesuq gi, yhangmoq lé gotú dangtú ralhúm dum xoq taí é gi; "Mauhkúng mingdán gi, byù rayuq éq, yhâng hkyâm má hô tô é angshi cham eq wui ri.

³² Angshi cham haù gi, kyômyui jí banshoq htoq má je tiq é nghut kôle, yuq kò lò jáng, hkyâm má hô é mhan-haq hpoqmoq gàm banshoq htoq má je kô é agàm dut lò mù, akoq pé má, maulat ngoq zô pé lé wó zung nô bum lhê." gá ri.

³³ Yhang, gotú dangtú dum xoq taí é gi, "Mauhkúng mingdán gi, myiwe rayuq eq sungso mùn sum búng má yu nyhó luí, haù pé banshoq lé wó lhoq dau nhang é múnchi eq wui ri." gá ri.

³⁴ Yesuq gi, byù moq mó lé, haù pé banshoq dangtú dông mai chyat taí ri; yhang-moq lé, dangtú a bo é haì lháng a taí wú nghut ri.

³⁵ Haù gi,

"Ngá nhut lé hpóng mù, dangtú dông mai taí rá;

mingkan lé sâng-hi hpan é mai zaù tô é hkyô pé lé taí sân kyo rá nghut lhê."³⁶

ga, myiqhtoi dông taí tô é dang lo dik é nghut ri.

Myoqgàm Dangtú Lé Tai Sân Kyô É Hkyô

³⁶ Hau htâng má, Yesuq gi, byù moq mó mai htoq lò mù, yhúmhmaù má wang ló ri. Haù hkún, Yhâng é chángzô pé gi, Yhâng chyáng lé lò kómù, "Yò má é myoqgàm dangtú eq sêng é hkyô lé taí sân kyo laq." ga taí akô.

³⁷ Haù jáng, Yhang tú taí é gi, "Ge é kyôshi san sù gi, haù Byu Yhangzo nghut ri.

³⁸ Yò gi, mingkan nghut ri; ge é kyôshi gi, mauhkúng mingdán é yhangzô pé nghut akô. Myoqgàm pé kúm gi, haù Tsadán é yhangzô pé nghut akô;

³⁹ haù lé châng hkak sân é gumlau gyè gi, nat Tsadán nghut ri. Kyôshu yoq gi, mingkan htúm é ahkying nghut ri; kyô shu bang gi, maumang lagyô pé nghut akô.

⁴⁰ Haù myoqgàm pé lé, nut yù mù, myi má nyhê pyám é su, haù mingkan htúm é ahkying má dut rá nghut lhê.

⁴¹ Haù Byu Yhangzo gi, Yhâng é maumang lagyô pé lé nhâng rá nghut lhê; haù mù, haù bang gi, hkyô lhoq ngoq nhang é bang banshoq eq agè ashop hkyô kut é bang lunglhang lé, Yhâng é mingdán mai hkyin she htoq yù mù,

⁴² gyúng nyi é myibung hkyúng hkaù má dú kat pyám kó rá nghut lhê; hau má, ngaubyi ngaù nhap eq zui kyik kyik shoq hpuzô nyi kó rá nghut lhê.

⁴³ Haù hkún, dingmán bang gi, yhangmoq Yhângwá é mingdán má bui su duqbó nyi kó rá nghut lhê. Nohkyap dap sù gi, gyó yù sháng gaq.

Haq Tô É Sutzè Dangtú

⁴⁴ Mauhkúng mingdán gi, yò má haq tô é sutzè eq wui ri. Sutzè haù lé myang é sù gi, haù lé saí haq to mù, gabú myit éq taù lò luí, yhang wó é banshoq lé ùng pyám mù, yò haù lé wui yu ri.

⁴⁵ Dum, mauhkúng mingdán gi, réng é palhé lé châng ho wún é hpugá hpó eq wui ri.

⁴⁶ Yhang gi, gyai hpaù é palhé lé myàng jáng, yhang wó é banshoq lé ló ùng pyám mù, haù lé wui yu ri.

Gùn Lé Dangtú Yu É Hkyô

⁴⁷ Mauhkúng mingdán gi, nhông má, ngozo ajà jà lé wó dù nghop yu é gùn eq le wui ri.

⁴⁸ Gùn haù má ngozo byíng jáng, ngo kóng bang gi, wui yàm má she htoq yù mù, zung to lui, ge é pé lé gi, ngo-pyap má guq kat yù lui, a ge é pé lé gi, dù pyám akò.

⁴⁹ Haù eq rajung za, mingkan htùm é ahkýing má le, maumang lagyô pé gi, gyó lé ló mù, agé ashop é bang lé, dingmán bâng chýáng mai gam htoq yù lui,

⁵⁰ ngaubyi ngaù nhap eq zui kyik kyik shoq hpuzò nyi rà nghut é, gyúng nyi é myibung hkyúng hkaù má dù kat pyám kó rà nghut lhê.

⁵¹ Shí hkyô banshoq lé nungmoq sé gyo bekò lhu?" gâ ri.

Haù hkùn, yhangmoq gi, "Sê gyo bê." ga tù taí akò nghut ri.

⁵² Hau htàng, Yesuq gi, yhangmoq lé, "Mauhkúng mingdán eq séng lui mhoq yù bé é tará sará ó nghut kòle, yhang mhoq é hkyô gi, yhumsing é sut-púnglhung hkaù mai zè sik zè xau lé yu htoq é yhumsing hpó rayuq eq wui ri." ga dum taí ri.

Myiqhtoi, Myoqdong A Wó Dut É Jang
Mrk 6:1-6; Luk 4:16-30

⁵³ Yesuq gi, dangtú haù pé lé ban taí jáng, haù jowò mai htoq é ló bê nghut ri.

⁵⁴ Yhang gi, Yhâng é yhummau má jé ló jáng, byu pé lé, yhangmoq é tarajong má mhoqshit ri; haù hkùn, yhangmoq gi, gyô maù byuq kólui. "Byù shí yuq gi, hpaqchyí byéng-yá shí eq hpungwup a-tsam mó shí pé lé, hkâmai wó yu é nghut lhê làh?"

⁵⁵ Yhang gi, laksima hpô é yhangzo a nghut lhu? Yhângnú é mying gi, Mariq gâ lhê a nghut lhu? Yhanggú pé gi, Yakuq, Yosep, Simun eq Yudaq gâ é bang a nghut kó lhu?

⁵⁶ Yhâng nhammó pé le, nga-nhung eq rahá nghut nyi lhê a nghut kó lhu? Haù su nghut le nhing, haù pé banshoq lé, Yhang hkâmai wó yu é nghut lhê làh?" ga myí bùm kômù,

⁵⁷ Yesuq lé myit a ngón dut bùm bekò nghut ri.

Yesuq kúm gi, yhangmoq lé, "Myiqhtoi rayuq gi, yhumsing é yhummau eq yhumsing é yhum má za, myoqdong a lhaq wó wú é nghut lhê." ga tù taí kat ri.

⁵⁸ Yhangmoq lumjng myit a bò kô é yanmai, Yesuq gi, haù má, laklai kumlhá myo myo a kut shit lo nghut ri.

14

Wui-myhup Sará Yohan Shi Byuq É Hkyô
Mrk 6:14-29; Luk 9:7-9

¹ Haù hkùn, mauzau Herut gi, Yesuq eq séng é ludang lé wó gyo jáng,

² yhâng a-ô má é bang lé, "Shí yuq gi, Wui-myhup Sará Yohan nghut ri-nhung; Yhang gi, shí é mai dum duì toq lo é nghut mù, hpungwup a-tsam haù pé lé wó kut é nghut ri." ga taí ri.

³ Herut haù su gâ é gi, yhanggu Hpilip é yhangmyi Herudiaq é yanmai, Yohan lé chyup tuí yù mù, htóng hkyô pyám é yanmai nghut ri.

⁴ Hkâsu mù gâ le, Yohan gi, yhang lé, "Nàng, myiwe haù lé hâng yu é gi, tará a wang é nghut lhê." ga taí byi nyi é yanmai nghut ri.

⁵ Herut gi, Yohan lé sat pyám naù kólhang, mingbyù wui lé gyuq é yanmai, a wám sat nghut ri; haù mù gâ le, yhangmoq gi, Yohan lé myightoi tsuq nyi kô é yanmai nghut ri.

⁶ Nghut kólhang, Herut é hkú ladu hkyúm buinyi má, Herudiaq é yhangzo byizo gi, yhangmoq é hí má gó shit é lé, Herut gi, gyai yhang wú myit ngui mù,

⁷ byizo haù lé, yhang haù dung le haù byi rà ga dakam é danggidig byi ri.

⁸ Byizo haù gi, yhângnu hpaqchyí byi é lé gyô yù mù, "Shí, bó má, Wui-myhup Sará Yohan é ulhum lé, kat byi laq." ga, Herut lé dúng ri.

⁹ Mauzau hpó gi, myit a ngón dut byuq kólhang, yhang dakam tò é danggidig é yanmai le, bíng pé é myoqdong lé tē nau é yanmai le, yhang dúng é lé, byi rà matú,

¹⁰ htóng hkaù má lúng tò é Yohan é ulhum lé hpyit rà hkunmò hkyô kat bê nghut ri.

¹¹ Yohan é ulhum lé bó má kat lui, myiwe zo haù lé byi jáng, myiwe zo haù gi, haù lé yhângnú chyáng yu ló byi ri.

¹² Haù mù, Yohan é chángzô pé gi, yhâng é mâng lé lé yù lui, myhup pyám bekò nghut ri. Hau htàng, yhangmoq gi, Yesuq lé ló taí kyô akò nghut ri.

Byù Ngo Hkýing Lé Byi Tsô É Hkyô
Mrk 6:30-44; Luk 9:10-17; Yhn 6:1-14

¹³ Yesuq gi, haù hkyô lé wó gyo jáng, haù mai lhai ji mù, tsím tsâm é jowò shut Yhang baù é ló ri. Haù lé, byu pé wó gyô bùm kójàng, wà mó pé mai htoq lé ló kômù, hkyí hkyô Yhâng htàng châng é ló akò nghut ri.

¹⁴ Yesuq gi, lhai mai gyô dap ló é hkùn, byù moq mó nyi to lánng é lé myàng jáng, yhangmoq lé wú shogyo lui, nò bang lé lhoq gē byi ri.

¹⁵ Myinhâng jé ló jáng, haù chángzô pé gi, Yhâng chyáng lé kômù, "Shí má gi, tsím tsâm é jowò nghut é htoq agó, bùi le gym lo bê nghut mù, shiwa byu pé gi, wà pé shut ló lui, yhangmoq é matú zòjung ló wó wui kó sháng

gaq, yhangmoq lé nhang kat aq hkoi." ga tai akò.

¹⁶ Haù hkùn, Yesuq gi, "Yhangmoq ló a ra. Nungmoq, yhangmoq lé rajung jung byi tso keq." ga tù tai kat ri.

¹⁷ Haù su ga jáng, yhangmoq gi, "Muk ngo long eq ngozo í du za ru wó lhê." ga dum tù tai akò.

¹⁸ Haù jáng, Yesuq gi, "Yu lò keq." ga tù tai mù,

¹⁹ shiwa byu pé lé, wàhu yò má zùng nhang ri. Hau htàng, Yhang gi, haù muk ngo long eq ngozo í du lé yù mù, mauhkúng shut tu wú to luí, jeju ban hkya-on jáng, muk lé hpê gàm mù, chángzò pé lé byí ri. Haù chángzò pé gi, shiwa byu pé lé gàm byí akò nghut ri.

²⁰ Yhangmoq banshoq bang zò gyí bùm kò é htàng má, haù chángzò pé gi, zò myhit tò é pé lé, raxe í mung bying shoq wó guq tsing yu ashí kò nghut ri.

²¹ Haù má zò é bang gi, myiwe wuì eq zoshàng wuì lé a nghap lhóm é za, yuqgè baù ngo hkying kò bo ri.

Yesuq, Wuì Htoq Má Sô É Hkyô
Mrk 6:45-56; Yhn 6:15-21

²² Yesuq gi, haù shiwa byu pé lé byo ló nhang nyí é hkùn jáng, chángzò pé lé lhai má wang ji nhàng mù, tù tap shut dap ló láng nhàng ri.

²³ Shiwa byu pé lé nhang pyâm é htàng má, Yhang gi, kyúdung rà ga, Yhang baù bùm shut doq é ló ri. Myinhàng chutshúm zó jé shoq, Yhang baù haù má nyi nyi ri.

²⁴ Haù u lé, lhai gi, gin-gau mai tsómra wé é jowò má jé é hkùn, lai tau mut é yanmai, wuìheng eq gyai yhang lo bat nhùn é hui zò ri.

²⁵ Htang napsùn maubó zó sum hkying eq hkyuq hkying gyoro má, Yesuq gi, nhông htoq má so mù, yhangmoq chyáng lé lo ri.

²⁶ Haù mù, chángzò pé gi, Yesuq nhông htoq má sô nyi é lé myàng kôjáng, gyuq dân kômù, "Sobyô ô!" ga gyuq nán é eq tai garú akò nghut ri.

²⁷ Haù jáng yhang, Yesuq gi, yhangmoq lé, "Hkâgyuq kó! Ngò ru nghut lhê; myit wum lhoq king keq." ga nyo kat ri.

²⁸ Haù hkùn, Petruq gi, "Yhumsing é, Nàng yhang ru nghut le gi, ngo lé, wuì htoq mai só lé lô nhàng laq." ga tai kat ri.

²⁹ Haù jáng, Yesuq gi, "Lé lô aq." ga tù tai kat ri.

Haù mù, Petruq gi, lhai mai gyó mù, wuì htoq mai Yesuq chyáng sô é ló ri.

³⁰ Nghut kôlhang, yhang gi, laidun htan é lé myang kat jáng, wú gyuq luí, wuì má nop ló nyí mù, "Yhumsing é, ngo lé hkyi yù laq." ga wut garú kat ri.

³¹ Yesuq gi, radá dâm yhang é loq lhâm kat luí, Petruq lé láng zing to mù, "Lumjing myit shau sù é, nàng hai mù úng-âng lhê thú?" ga tai ri.

³² Yhangnhik, lhai má wàng kôjáng, laidun le zim byuq bê nghut ri.

³³ Hau htàng, haù lhai má lúng tô é bang gi, Yhang lé pai gop mù, "Nàng gi, gè gè yhang, Garai Gasâng é Yhangzo nghut bê." ga tai akò nghut ri.

³⁴ Yhangmoq gi, gù dap ló kômù, Gene-sarat mau má jé wang ló bekò nghut ri.

³⁵ Haù mau má é bang gi, Yesuq lé wú sé kôjáng, awui ayàm má é bang banshoq lé kyô kat akò. Haù mù, byu pé gi, nòhpyo hui bang lhunglhang lé, shuí lé lô kômù,

³⁶ nòhpyo hui bang lé, Yhâng é bushi htàng má za lhang záng nhàng rà matú dúng tôngbán akò; Yhang lé záng é lhunglhang bang gi, lhoq gè byí é hui bekò nghut ri.

15

Sansêng É Hkyô Eq A Sansêng É Hkyô
Mrk 7:1-23

¹ Hau htàng má, Hparishe pé eq tará sará pé ra-am gi, Yerusalem wà mó mai Yesuq chyáng jé lé lô kômù,

² "Nàng é chángzò pé gi, hai mù luí, íchyí iwa pé é htungli lé a cháng kut akò thú? Yhangmoq gi, loq hí a chí é zang zò akò nghut ri." ga, lé tai akò.

³ Haù jáng, Yesuq tù tai é gi, "Nungmoq gi, hai mù, nungmoq é htunglí é yanmai, Garai Gasâng é hkunmó lé a cháng kò é thú?"

⁴ Hkâsu mù gâ le, Garai Gasang gi, 'Nung-moq é ínu iwa lé, hkungga keq.'[✧] ga le, 'Ínu iwa lé, nhing é sù ó yuq nghut kôle, sat pyâm é hui rà lhê.'[✧] ga le, tai tò é nghut lhê.

⁵ Nghut kôlhang, nungmoq tai é gi, 'byu rayuq yuq, yhumsing é yhângnu yhângwa lé byí âng é zè lé, Garai Gasang lé byi rà chyunghuq nghut lhê ga tai é nghut jáng,

⁶ haù yuq gi, yhângwa lé hkungga nó a ra.' gâ akò nghut ri. Haù đông mai, nungmoq gi, nungmoq é htunglí é yanmai, Garai Gasâng é mungdang lé he-ngik pyâm akò nghut ri.

⁷ Gegún labyoq kut bang é! Nungmoq eq séng luí, myiqhtoi Esai-aq htoí tò é dang gi, têng ri.

⁸ Myiqhtoi dang haù gi, 'Byù shí bang gi, nhut htoq mai za Ngo lé hkunggâ akò;

yhangmoq é myit nhikhlum gi, Ngò eq wê gâng nyi akò.

⁹ Yhangmoq, Ngo lé noquq nyi kò é gi, akôm má za nghut nyi ri;

hkâsu mù gâ le, yhangmoq é mhoqshit hkyô pé gi, byù đông mai mhoqshit é hkyô pé za nghut nyi ri.'[✧] gâ é nghut lhê." gâ ri.

¹⁰ Hau htàng, Yesuq gi, shiwa byu pé lé, Yhâng chyáng wut yù luí, "Gyô yù mù, sé lo keq.

¹¹ Nhut má wang lo é hái jung le, byù lé a sanséng dut nhang é a nghut, nhut mai htoq lo é pé sheq, byù lé a sanséng dut nhang é ru nghut lhê." ga tái ri.

¹² Háu hkûn, háu chángzô pé gi, Yhâng chyáng lé lô kôluí, "Hparishe pé gi, shí hkyô lé wó gyo mù, nhik-yô nyi bùm kô é lé, Nàng sé lhê lúhú?" ga myi kôjáng,

¹³ Yhang gi, "Mauhkûng htoq tsáng myhâng má é Ngá Wa a hô tó é agám hkangmó gi, apûn eq roq nut pyám é hui rá nghut lhê.

¹⁴ Yhangmoq é yanmai, myit hkâ-myo kô; yhangmoq gi, myoqjit bang nghut kôle, myoqjit é bang lé hkyô-u she é bang nghut akô. Myoqjit yhangchang hkyô-u she lhùm é nghut le gi, í yuq é yhang dongkong má byit gyó kô rá za nghut lhê." ga tù tái ri.

¹⁵ Háu hkûn, Petruq gi, "Ngamoq lé, dangtú hau é lichyúm tái sân kyo laq." ga tái jáng,

¹⁶ Yesuq gi, "Nungmoq, ahkuí le háu-í yhang go nyi ashi kô luq?

¹⁷ Nhut má wang lo é hái jung le, wamdau hkaú má jé wang ló mù, gungdu mai dum htoq ló é nghut lhê.

¹⁸ Nghut kôlháng, nhut mai htoq lo é gi, myit nhikhlum mai htoq lo é nghut mù, byù lé a sanséng dut nhang ri.

¹⁹ Hkâsu mù gâ le, myit nhikhlum mai htoq lo é gi, agê ashop é dông myit é hkyô pé, byù sat é hkyô, su-myi sulàng lú hkyô, ashop é dông gungsho zùm yap é hkyô, hkaú é hkyô, a tengmán é saksé hkâm é hkyô, lumù gansang é hkyô pé nghut ri.

²⁰ Háu pé gi, byù lé a sanséng dut nhang é hkyô pé nghut ri; loq a chí e za zo shuq é gi, byù lé a sanséng a dut nhang é nghut lhê." ga tái ri.

Hkanan Myiwe Myhí Rayuq É Lumjín Myit

Mrk 7:24-30

²¹ Hau htàng, Yesuq gi, háu mai Turuq eq Sidun mau shut htoq e ló bê nghut ri.

²² Háu hkûn, háu mau má nyi é Hkanan myiwe myhí rayuq gi, Yhâng chyáng lé jé mù, "Dawiq é Yhangzô, Yhumsing ê, ngo lé shogyô yù laq ô! Ngá byizo gi, nat gang wang júng mù, gyai yhang nô gyín nyi ri." ga tái garú ri.

²³ Nghut kôlháng, Yesuq gi, dang rahkun le a tù tái nghut ri. Háu mù, Yhâng é chángzô pé gi, Yhâng chyáng lé jé kômù, "Myiwe myhí háu lé ló nhang pyám aq; hái mù gâ le, yhang gi, nga-nhúng é htàng má châng garú nyi ri." ga tái akô.

²⁴ Yesuq gi, "Byuq byuq é sau pé su nghut nyi é Israelaq byu pé chyáng sheq, Ngo lé nhang kat é ru nghut lhê." ga tái ri.

²⁵ Háu hkûn, myiwe myhí háu gi, Yhâng é hí má lé mù hkyihput htuq luí, "Yhumsing ê, ngo lé garúm yù laq ô!" ga tái ri.

²⁶ Yesuq gi, "Zô wui chyáng má é zoshuq lé yù mù, hkuí pé lé byi tsô é jung a nghut." ga tù tái jáng,

²⁷ myiwe myhí háu gi, "Yhumsing ê, háu kúm nghut ri; nghut kôlháng, hkuí pé lháng, yhumsing hpô é zohpoq mai gyô é zang cham zang htàng lé, zô akô mhaí." ga dum tái ri.

²⁸ Háu mù, Yesuq gi, "Myiwe zo é, náng é lumjín myit gi, kô nyi ri! Nàng dúng é hkyô lé gyo byi bê nghut lhê." ga tù tái ri. Háu hkûn jáng, myiwe myhí hau é byizo le ge byuq bê nghut ri.

Byù Myi Hkyíng Lé Byi Tsô É Hkyô Mrk 8:1-10

²⁹ Yesuq gi, háu mai htoq ló luí, Galile nhông yám má é jé mù, bùm shut doq ló luí, ló zung nyi ri.

³⁰ Háu hkûn, byù moq mó gi, hkyí hten bang, myoqjit bang, gung-yùn bang, nhut jit bang eq nô bang gotú myo myo lé shuí lé lô kômù, Yhâng é hkyí wang má lé nyhi to kô é nghut luí, Yhang gi, háu bang lé lhoq gê byi ri.

³¹ Háu shiwa byu pé gi, nhut jit bang dang wó nyò kô é lé le, gung-yùn bang ge byuq é le le, hkyí hten bang hkyô wó sô é lé le, myoqjit bang myoq wó myang é lé le, myàng kôjáng, wú máu kômù, Israelaq é Garai Gasang lé hkya-ôn bum akô nghut ri.

³² Yesuq gi, Yhâng é chángzô pé lé wut yù mù, "Ngô, shí bang lé wú shogyô ri; yhangmoq gi, Ngô eq rahá nghut nyi é sum nyi bò bê, hái le a myàng zo kô nghut ri. Yhangmoq, hkyolat má mut yut ló yut kó abe, yhangmoq zòmút to gû lé, Ngô a nhang kat naù." ga tái ri.

³³ Háu hkûn, Yhâng é chángzô pé gi, "Isú é yoso má nhúng, byù shí myhó bang lé luq shoq byi tso rá zoshuq gi, hkará é wó rá lúhú?" ga myí akô.

³⁴ Yhang gi, "Nungmoq, muk hkâ-myhó long wó akô lúhú?" ga tau myi jáng, yhangmoq gi, "Muk nyhit long eq ngo-nú zo ratsuí wó lhê." ga tù tái akô.

³⁵ Háu mù, Yhang gi, byù hpúng lé, myigùng htoq má zùng nhang ri.

³⁶ Hau htàng, Yhang gi, háu muk nyhit long eq ngozo lé yù mù, jeju ban hkya-on jáng, myhik hpé luí, háu chángzô pé lé byi jáng, yhangmoq gi, byù hpúng lé gám byí akô nghut ri.

³⁷ Yhangmoq lhunglháng bang zô gyí bùm kô é htàng má, háu chángzô pé gi, amyit ahtàng lé nyhit mung bying shoq wó guq tsing yu ashi kô nghut ri.

³⁸ Haú hkún zô é bang má, myiwe wui eq zoshâng wui lé a nghap lhôm é za, yuqgê wui baú myi hkyîng yuq bo ri.

³⁹ Yesuq gi, byù hpâng lé ló nhang pyâm é htâng má, lhai má wang ji mù, Magadan mau shut dap é ló bê nghut ri.

16

Kumhá Dung Kô É Hkyô

Mrk 8:11-13; Luk 12:54-56

¹ Hparishe pé eq Saduke pé gi, Yesuq chyáng lé jé kômù, Yhang lé chyam wú é dông, mauhkúng mã é kumhá kut shit rá matú, dúng akô.

² Haú mù, Yhang gi, yhangmoq lé, "Nungmoq gi, myinhâng jé jáng, 'Mau hpong rá nghut lhê, hkâsu mù ga lé, mauhkúng ne ri.' ga le,

³ napkyó lé nghut jáng, 'Hkú-nyí laidun lò rá nghut lhê, hkâsu mù ga lé, mauhkúng nè mù, noq ri.' ga le, lhaq tai akô. Nungmoq gi, mauhkúng é isâm lé wú mù sê gam hkoq yú kô é nghut kôlhâng, shí ipyat lhê é kumhá lé ga, a sê gam hkoq yú kô nghut ri.

⁴ Agê ashop é eq lhum a zuí é ipyat shí gi, limik kumhá lé ho nyi akô; nghut kôlhâng, Yonaq é kumhá mai lai lui, gotú hai lé tún shit rá a nghut." ga tai ri. Hau htâng, Yesuq gi, yhangmoq chyáng mai htoq ló bê nghut ri.

Hparishe Pé Eq Saduke Pé É Múnchi

Mrk 8:14-21

⁵ Yhangmoq, nhông hé hpoq shut gú dap ló kô é hkún, haú chángzô pé gi, muk yu chûng rá lé tô-myhi pyâm akô.

⁶ Haú hkún, Yesuq gi, "Hparishe pé eq Saduke pé é múnchi lé, sidiq lui, koi pyâm nyi keq." ga, yhangmoq lé tai kat ri.

⁷ Yhangmoq gi, "Nga-nhúng, muk a yu chung é yanmai, haú su ga tai é nghut ri." ga lui, tai lhum bum akô nghut ri.

⁸ Yhangmoq haú su tai lhùm nyi kô é lé Yesuq sê jáng, yhangmoq lé, "Lumjîng myit shaú é bang ê, muk a bo é hkyô lé, hai mù tai lhùm nyi akô lúhú?

⁹ Ahkuí jé shoq, nungmoq gi, a sê gyo shi kô lúhú? Muk ngo lông eq byù ngo hkyîng lé byi tsô é htâng, nungmoq hkâ-myhó mung wó dum guq tsîng yù kô é lé le,

¹⁰ muk nyhit lông eq byu myi hkyîng lé byi tsô é htâng, nungmoq hkâ-myhó mung wó dum guq tsîng yù kô é lé le, nungmoq a myit bum kô lúhú?

¹¹ Ngò gi, muk eq séng lui tai é a nghut é lé, nungmoq, hkâsu mù a sê gyo kô é lúhú? Hparishe pé eq Saduke pé é múnchi lé koi pyâm keq nguú tai é ru nghut lhê." ga tai ri.

¹² Haú hkún sheq, Yhang tai é gi, muk má chung é múnchi lé koi pyâm rá matú tai é

a nghut e za, Hparishe pé eq Saduke pé é mhoqshit hkyô lé koi pyâm rá matú tai é ru nghut é lé, yhangmoq sê gyô akô nghut ri.

Yesuq Lé, Petruq Yin Yu É Hkyô

Mrk 8:27-30; Luk 9:18-21

¹³ Yesuq gi, Kesare-Hpilipi wà mó nâm mã é mau má jé é hkún, Yhâng é chángzô pé lé, "Haú Byu Yhangzo gi, ó yuq nghut lhê ga, byu pé tai akô lúhú?" ga myí ri.

¹⁴ Haú hkún, yhangmoq gi, "Ra-am gi, Wui-myhup Sará Yohan ga, gôbang gi, Eliyaq ga, dum ra-am gi, Yeremiaq, a nghut jáng, gotú myiqhtoi rayuq yuq nghut ri ga, tai akô." ga tú tai kôjáng,

¹⁵ Yhang gi, "Haú jáng, nungmoq gi, Ngo lé ó yuq nghut lhê nguú akô lúhú?" ga, yhangmoq lé xoq myí ri.

¹⁶ Haú hkún, Simun Petruq gi, "Nàng gi, rú dui nyi é Garai Gasâng é Yhangzo, Hkrisduq nghut ri." ga tú tai ri.

¹⁷ Haú mù, Yesuq tú tai é gi, "Yonaq é yhangzo Simun ê, nàng gi, hkungsó wó nyi ri; hkâsu mù ga lé, nang lé haú hkyô tún shit é gi, byù mai a nghut, mauhkúng htoq má nyi é Ngá é Iwa mai tún shit é ru nghut lhê.

¹⁸ Ngò, nang lé tai lé, nàng gi, Petruq* nghut lui, luqgok shí má, Ngò, Ngá é noqkuq hpúng lé xuq to rá nghut mù, haú moming hkúmdong pé gi, hpúng haú lé wó ùng rá a nghut.

¹⁹ Mauhkúng mingdán é zoqshi pé lé, Ngò, nang lé ap byi rá nghut lhê; myigùng htoq má, nàng túi to má túi to lé, mauhkúng htoq má le, túi to rá nghut lhê; myigùng htoq má, nàng lhoq lhut má lhoq lhut lé, mauhkúng htoq má le, lhoq lhut byi rá nghut lhê." gâ ri.

²⁰ Hau htâng, Yhang Hkrisduq nghut é hkyô lé, ó lé le a tai kyo rá matú, Yhâng é chángzô pé lé tai hkúm kat ri.

Yesuq Gi, Yhang Shí Rà Lé Hí Te Tai É Hkyô

Mrk 8:31-9:1; Luk 9:22-27

²¹ Yesuq gi, Yhang Yerusalem wà mó má ló mù, suwún wui, hkyangjong agyi pé eq tarâ sará pé é loq má, zing-ri é myo myo hui zo lui, sat pyâm é hui ra rá nghut kôle, sum nyi nguú rá buinyi má, lhoq toq yu é hui rá nghut é hkyô lé, haú hkún mai, Yhâng é chángzô pé lé tai kyo hi lò bê nghut ri.

²² Haú mù, Petruq gi, Yhang lé rahkyam shut shui htoq yù mù, "Yhungsîng ê, haú hkyô Nàng chyáng hkâ-nhám le a dut sháng gaq." ga Yhang lé tân ri.

²³ Yesuq gi, lîng wú kat mù, Petruq lé, "Tsadán nàng, Ngá chyáng mai hpâng aq! Nàng gi, Garai Gasang eq séng é hkyô lé a myit e za, byù eq séng é hkyô lé za myit é sù nghut mù, Ngá é matú myit leqbat jowò nghut ri." ga tai ri.

* 16:18 Grik dông Petruq gâ é gi, luqgok lé gâ é nghut lhê.

²⁴ Hau htâng, Yhang gi, Yhâng é chángzô pé lé, "Ngá htâng cháng naù sù ó yuq nghut kôle, yhumsing gùng yhumsing he-ngik pyám mù, yhumsing é tapzing lé waq chúng lui, cháng ra rá nghut lhê.

²⁵ Hkâsu mù gâ le, yhumsing é asak lé hkyi yù naù sù ó yuq nghut kôle, asak sum rá nghut lhê; nghut kôlhang, Ngá é yanmai, yhumsing é asak sùm pyám é sù kúm gi, asak wó yù rá nghut lhê.

²⁶ Byù gi, mingkan gón lé wó sing to kôlhang, yhumsing é asak woi-nyí sùm byuq é nghut le gi, yhang é matú, hai akyù bò rá lúh? Byù gi, yhumsing é asak woi-nyí lé, hai èq wó htai yù rá lúh?

²⁷ Haù Byu Yhangzo gi, Yhâng Wâ é hpungwup shingkang bo é èq, Yhâng Wâ é maumang lagyô pé eq rahá jé lé lô rá nghut lhê; haù hkún, Yhang gi, yuq hkangmó lé, yhumsing kut lai bê eq rajung za akyù byi rá nghut lhê.

²⁸ Ngò, nungmoq lé teng za tái kôlé, ahkuí shí má yap to bang ra-am gi, haù Byu Yhangzo, Yhâng é mingdán eq jé lé lo é lé, a myang é za shí kô rá a nghut." ga tái ri.

17

Yesuq, Isâm Htai Lo É Hkyô
Mrk 9:2-13; Luk 9:28-36

¹ Hkyuq nyí lai htâng má, Yesuq gi, Petruq lé le, Yakuq eq yhanggu Yohan nhiktâng lé le, shuí chúng mù, yhangmoq baù myhang é bùm ralhum má doq lô akò.

² Haù má, yhangmoq é myoq hí tê má, Yesuq é ihpyô isâm htai byuq mù, Yhâng é myoqdong gi, bùi su duqbó tó é eq, Yhâng é mebu gi, maubó su hpyu zan tô ri.

³ Haù hkún jáng, Mosheq eq Eliyaq gi, yhangmoq é hí má htoq shit mù, Yesuq eq dáng nyo lhum nyi akò.

⁴ Haù mù, Petruq gi, Yesuq lé, "Yhumsing é, shí jowò má nga-nhúng nyi le ge ri. Nàng ô nau é nghut le gi, Náng é matú ralhum, Mosheq é matú ralhum, Eliyaq é matú ralhum kut, ngò zúm sùm lhum sai bá." ga tái ri.

⁵ Petruq dang ru tái nyi ashí le, duqbó é mhut gi, yhangmoq lé htup zing lô mù, mhut hkaù mai htoq lo é htê gi, "Shí yuq gi, Ngò chytđap é Ngá Zo nghut lhê; Yhang má Ngò myit dik nyi lhê. Yhâng é dang gyo keq." gâ ri.

⁶ Haù su gâ é htê lé, chángzô pé wó gyo kôjáng, yhangmoq gi, gyuq nán mù, myigùng má gop bùm bekò nghut ri.

⁷ Nghut kôlhang, Yesuq gi, yhangmoq chyáng jé lé lô mù, yhangmoq lé loq èq záng kat lui, "Toq keq, hkâgyuq kó." ga tái ri.

⁸ Yhangmoq tu wú kat kô le, Yesuq mai lai lui, ó lé le a myàng lo kó nghut ri.

⁹ Bùm mai taù gyó lô kô é hkún, Yesuq gi, "Ahkuí nungmoq myang é hkyô lé, haù Byu Yhangzo shí é mai lhoq dui toq yu é a hui hui gi, ó lé le hkâtai kyo kó." ga, yhangmoq lé tái hkúm tô ri.

¹⁰ Haù jáng, chángzô pé gi, "Eliyaq hí lé ra rá nghut lhê ga, tará sará pé hai mù tái kô é lúh?" ga, Yesuq lé myí akò.

¹¹ Haù hkún, Yesuq gi, "Eliyaq hí lé lui, lhunglhang lé hen lajâng to rá gâ é gi, têng lhê.

¹² Nghut kôlhang, Ngò, nungmoq lé tái kôlé, Eliyaq gi, jé lé bê nghut lhê; nghut kôle, yhangmoq gi, yhang lé a lhom wú sé kômù, yhangmoq ô nau é dông banshoq kut bekò nghut ri. Haù eq rajung za, haù Byu Yhangzo le, yhangmoq é loq má hpuzo rá nghut lhê." ga tái ri.

¹³ Haù hkún sheq, Yhang tái nyi é gi, Wui-myhup Sará Yohan eq sêng é hkyô nghut é lé, haù chángzô pé sê gyô akò nghut ri.

Nat Wang Júng Sù Lé Lhoq Gê Byi É Hkyô
Mrk 9:14-32; Luk 9:37-45

¹⁴ Yhangmoq, byù moq mó pé chyáng dum taù jé lô kô é hkún, byù rayuq gi, Yesuq chyáng lé jé mù, hkyihput htuaq lui,

¹⁵ "Yhumsing é, ngá é yuqzo lé shogyô yù laq; yhang gi, mhúngtuq tuq lui, gyai yhang jamjaù nyi ri. Myihkyóm má le, wui má le, anum num lêng wàng wàng dut nyi ri.

¹⁶ Yhang lé, Náng é chángzô pé chyáng shuí é kôlhang, yhangmoq a wó lhoq gê byi kó nghut ri." ga tái ri.

¹⁷ Haù mù, Yesuq gi, "Lumjáng myit a bo é eq agê ashop é amyù pé ê, Ngò gi, hkâ-myháng jé shoq nungmoq eq rahá nyi mù, wó jân nyi rá lúh? Yuqgè zo haù lé, Ngá chyáng shuí lé lô keq." ga tái tái kat ri.

¹⁸ Yesuq gi, nat gang lé tân kat jáng, nat gang haù gi, yuqgè zo haù yuq chyáng mai htoq lô byuq bê nghut mù, haù hkún jáng, yuqgè zo haù gi, ge byuq bê nghut ri.

¹⁹ Hau htâng, chángzô pé gi, ó a nyi é u má, Yesuq chyáng lé lô kômù, "Ngamoq gi, hai mù, nat haù lé a wó hkat htoq é lúh?" ga, lé myi kôjáng,

²⁰ Yhang gi, "Nungmoq é lumjáng myit shaù é yanmai nghut ri. Ngò, nungmoq lé teng za tái kôlé, nungmoq é lumjáng myit angshí cham í za hkâlhang bò kô é nghut le gi, bùm shí lé, 'Hé shut htot lô aq.' ga tái le, htot rá nghut lhê. Nungmoq a wó kut é hai lhang joq rá a nghut.

²¹ Shí jung gi, kyúdung é eq zoshuq gám é dông za a nghut jáng, a htoq lô é nghut lhê. *" ga dum tái ri.

²² Yhangmoq, Galile mau má rahá zup nyi kô é hkún, Yesuq gi, yhangmoq lé, "Haù Byu

* 17:21 Chyúmbun shí gi, chyúmding myo myo má a bo é nghut lhê.

Yhangzo gi, byu pé é loq má ap pyâm é hui zo rá nghut lhê.

²³ Háu bang gi, Yhang lé sat pyám kó rá nghut lhê; nghut kôlhang, Yhang gi, shi é htâng sum nyi ngúu rá nyí má lhoq dui toq é hui rá nghut lhê." ga taí ri. Háu mù, háu chángzô pé gi, gyai yhang gyô yón nyí bekó nghut ri.

Noqkuq Yhùm Hkãsê Kat É Hkyô

²⁴ Yesuq eq Yhâng é chángzô pé gi, Kaperna-um wà má jê kô é hkùn, noqkuq yhùm hkãsê hkyuí bang gi, Petruq chyáng lé jé kômù, "Nungmoq é sará gi, noqkuq yhùm hkãsê a kat lúhú?" ga myí akó.

²⁵ Petruq gi, "Kat lhê." ga tú tai ri.

Hau htâng, Petruq yhùmkaú má wang ló le, Yesuq hí lhom tai é gi, "Simun ê, mingkan hkohkam pé gi, kang eq hkãsê pé lé, ô pé chyáng mai guq yu akó lúhú? Yhumsing byu pé chyáng mai lúhú? Háu a nghut jáng, góbâng chyáng mai lúhú? Nang, hkásu wó myit lhê lúhú?" gâ ri.

²⁶ Háu mù, Petruq gi, "Góbâng chyáng mai nghut ri." ga tú tai jáng, Yesuq gi, "Háu su nghut le gi, yhumsing byu pé gi, lut akó nghut ri.

²⁷ Nghut kôlhang, yhangmoq é i-myit a ngón a dut kó sháng gaq, nhông má é mù, ngo-nhe ê hkyó aq. Sâng-hi wó nhê yu é ngozô é nhut lé lãng há kat jáng, ngùn htíngchap rachap lé myàng rá nghut lhê. Háu lé yù mù, Ngá é matú eq náng é matú, yhangmoq lé ló byi aq." ga tai ri.

18

Kô Dik Sù Gi, Ó Yuq Nghut Lhê Lúhú?

Mrk 9:33-37, 42-48; Luk 9:46-48; 17:1-2

¹ Háu hkùn, háu chángzô pé gi, Yesuq chyáng lé jé kômù, "Mauhkúng mingdán má, kô dik sù gi, ó yuq nghut lhê lúhú?" ga myí akó.

² Yesuq gi, zoshâng zo rayuq lé wut yù mù, yhangmoq é gung gúng má shap to lúí,

³ tai é gi, "Ngò, nungmoq lé teng za tai kôlé, nungmoq gi, myit htai lhik luí, zoshâng zo wui su dut kô é za a nghut jáng, mauhkúng mingdán má hkâ-nhám le wó wáng kó rá a nghut.

⁴ Háu mù, zoshâng zo shí yuq su, yhum-sing é i-myit wó lhoq nyhum é sù ó yuq nghut kôlé, mauhkúng mingdán má, kô dik sù nghut ri.

⁵ Shí sù é zoshâng lé, Ngá é mying mai hap yu é sù ó yuq nghut kôlé, Ngo lé hap yu é sù nghut bê.

⁶ Nghut kôlhang, Ngo lé lumjíng é zoshâng wui má é rayuq yuq lé, mara kut shut nhang é sù gi, yhâng é lingzíng má luqlúí long mó tuí hut byi luí, nik é wuimau má, dú hkyô

pyâm é hui é nghut le gi, yhâng é matú je gè rá nghut lhê.

⁷ Háu mingkan gi, byu pé lé mara kut shut nhâng jang joq é yanmai, dingnyé wó ri. Háu mara kut shut nhâng hkyô gi, htoq lugù bê; nghut kôlhang, háu lé lhoq htoq sù gi, dingnyé wó ri.

⁸ Náng é loq èq, a nghut jáng, náng é hkyi èq, nang lé mara kut shut nhang é nghut le gi, háu lé hpyit dú pyám aq. Ahtum abyuq é myi má, hkyi hkúm loq hkúm gù dú hkyô pyâm é hui rá htoq má, hkyi loq a hkúm é za, asak wó yu é nghut le gi, náng é matú je ge ri.

⁹ Náng é myoqjí èq, nang lé mara kut shut nhang é nghut le gi, háu lé lap choq yù mù, dú pyám aq; myoqjí í jí dap gù ngaraí myi má dú hkyô pyâm é hui rá htoq má, myoq rají eq za, asak wó yu é nghut le gi, náng é matú je ge ri.

Byuq Byuq É Sau Luk 15:3-7

¹⁰ Shí sù é zoshâng zo wui má é rayuq lé lhang a wú tiq rá matú, sidiq nyi keq. Hkásu mù gâ le, Ngò, nungmoq lé tai kôlé, mauhkúng má é yhangmoq é maumang lagyó pé gi, mauhkúng htoq má é Ngá Wá é myoqdong lé, hkâ-nhám le myang nyi akó.

¹¹ (Hkásu mù gâ le, háu Byu Yhangzo gi, byuq byuq bê bang lé hkyi yù rá matú, jé lé é nghut lhê).*

¹² Byù rayuq gi, sau rashô du wó é ngúu sháng, sau háu gù má é radu byuq byuq é nghut jáng, háu gáu xe gáu du lé, bùm pé má nyhi pyâm to luí, byuq byuq é sau lé a châng ho é nyi rá lúhú? Háu lé, nungmoq hkásu wó myit ngam akó lúhú?

¹³ Ngò, nungmoq lé teng za tai kôlé, yhang gi, háu byuq byuq é sau háu lé myang ho é hkùn, a lám byuq é sau gáu xe gáu dù é matú gabú é htoq má, háu dù matú je riyhang gabú ri.

¹⁴ Háu eq rajung za, mauhkúng htoq má é nungmoq é Íwa gi, shí tiq bang má é rayuq htên byoq byuq rá lé lhang, ô nau é a nghut.

Mara Kut Shut É Gumang Hpó Lé Hkásu Kut Râ Hkyô

¹⁵ Náng é gumang hpó, nang lé mara kut shut é nghut jáng, yhâng chyáng é mù, nungnhik baú za nghut é hkùn, yhâng é mara lé tún shit aq. Yhang, náng é dang lé gyô é nghut jáng, nang gi, gumang rayuq dum wó bê nghut ri.

¹⁶ Nghut kôlhang, yhang, náng é dang lé a gyô é nghut jáng, 'Mara hun é hkyô hkangmó lé, saksé í yuq sum yuq lóm jáng, wó lhoq teng sháng gaq.'* gâ tô é eq rajung za, nang, gotú byù ra-í yuq lé shuí chũng aq.

* 18:11 Bun zo shí gi, chyúmding myo myo má a bo é nghut lhê. ✧ 18:16 Tarâ Pun 19:15

¹⁷ Yhang gi, haú bãng é dang lé le a lhom yu é nghut jáng, haú hkyô lé, noqkuq hpúng má shít kyo aq; hpúng é dang lé le a gyô é nghut jáng, yhang lé, a lumjng é byù rayuq dng le, kang guq sù rayuq dng le sôn pyám aq.

¹⁸ Ngò, nungmoq lé teng za tái kôlé, myigùng htoq má, nungmoq tuí to má tuí to lé, mauhkúng htoq má le, tuí to rá nghut lhé; myigùng htoq má, nungmoq lhoq lhut má lhoq lhut lé, mauhkúng htoq má le, lhoq lhut byi rá nghut lhé.

¹⁹ Ngò, nungmoq lé dum tái kôlé, myigùng htoq má, nungmoq má é í yuq myit hui lui, hái lé dung kôhlang, mauhkúng htoq má é Ngá Wa gi, haú nhik lé gyo byi rá nghut lhé.

²⁰ Hkâsu mù gâ le, Ngá mying lé lang lui, í yuq sum yuq zup zing é jang hkâmá nghut kôhlang, haú bãng é gyoro má Ngò nyi lhé." gâ ri.

Shogyo Nhhikmyin A Sê É Jùn Hpô É Dan-gú

²¹ Haú hkún, Petruq gi, Yesuq chyáng hui é mù, "Yhumsing ê, ngá é gumang, ngo lé mara kut shut é nghut le, yhang lé hkâ-myhó dâm mara hkyut byi ra rá lhú? Nyhit dâm jé shoq hkyut byi ra rá lhí?" ga myí ri.

²² Haú jáng, Yesuq tú tái é gi, "Ngò, nang lé tái lé, nyhit dâm za a nghut, nyhit xe nyhit tú dâm hkyut byi rá lhé.

²³ Mauhkúng mingdán gi, yhumsing é dui-nhâng zoshâng wui é jihpán lé jep nau é khokhâm rayuq eq du ri.

²⁴ Yhang gi, jihpán lé jep hi lô é u lé, yhang chyáng ngùn wan myo myo chyín dap to sù lé shuí lé lo akò.

²⁵ Haú yhumsing hpó gi, haú yuq chyín a wó xap é yanmai, chyín wó yù rá matú, yhang lé le, yhangmyi lé le, yhangzo banshoq eq yhang wó é zèhkoq banshoq lé le, ùng pyám rá hkunmó hkyô kat ri.

²⁶ Haú mù, dui-nhâng zoshâng haú yuq gi, yhang é hí má hkyihput htuq lui, "Ngo lé myit hing byi shi laq; banshoq lé, ngò xap rá." ga dng tngbán ri.

²⁷ Haú dui-nhâng zôshang é yhumsing hpó gi, haú yuq lé wú shogyo lui, chyín banshoq lhut pyám byi mù, nhang kat ri.

²⁸ Nghut kôhlang, dui-nhâng zoshâng haú gi, htoq lô mù, yhang lé, denari[†] rashó chyín dap tô é dui-nhâng zoshâng luzúm rayuq lé myàng jáng, haú yuq é lingzing má gyaq myhik zing to mù, 'Ngo lé dap tô é chyín hân xap aq!' ga tái ri.

²⁹ Haú hkún, yhang é luzúm dui-nhâng zoshâng haú gi, yhang é hí má hkyihput htuq lui, 'Ngo lé myit hing byi shi laq; ngò xap rá.' ga dng tngbán ri.

³⁰ Nghut kôhlang, yhang gi, a gyo byi e za, yhang é chyín dum wó xap é hkún jé shoq, haú yuq lé htóng hkyô pyám nhâng ri.

³¹ Gotù dui-nhâng zoshâng wui gi, haú hkyô lé myàng kôjáng, i-myt wú nô kôluí, yhangmoq é yhumsing hpó lé, haú hkyô banshoq lô tái kyô akò.

³² Haú mù, haú yhumsing hpó gi, dui-nhâng zoshâng haú lé wut hâng yù mù, 'Agè ashop é dui-nhâng zoshâng ê, nang, ngo lé dng tngbán é yanmai, nang, ngo lé dap é chyín banshoq lé, ngò lhut pyám byi bê nghut lhé mhai.

³³ Haú su é nhng, ngò, nang lé shogyô yu é su, nang é luzúm dui-nhâng zoshâng lé, nang ge shogyô yu lhé a nghut lhú?" ga tái lui,

³⁴ yhang gi, nhikjum yo mù, yhang é chyín ban xap é hkún jé shoq, jamjau hui zo rá matú, yhang lé, htóng suwún pé chyáng ap byi pyám bê nghut ri.

³⁵ Nungmoq é gumang wui lé, nungmoq é myit mai mara a wó hkyut byi kô é nghut jáng, mauhkúng htoq tsáng myhâng má é Ngá Wa le, nungmoq lé haú dng kut rá nghut lhé." gâ ri.

19

Myi Làng Gâng É Hkyô
Mrk 10:1-12

¹ Yesuq gi, mhqoshít é dang haú pé lé ban tái jáng, Galile mau mai htoq lô mù, Yodan làng tú tap má é Yuda mau má é jé ri.

² Byù moq mó gi, Yhâng htàng châng kô é nghut mù, Yhang gi, haú bang má é nòhpyo hui bang lé, haú má lhoq gé byi ri.

³ Haú hkún, Hparishe pé ra-am gi, Yhâng chyáng lé jé kômù, Yhang lé chyam wú é dng, "Byù rayuq gi, hái hkyô mai nghut nghut, yhang lé é yhangmyi lé lhoq kang pyám le, tarâ wang lhé lhú?" ga myí akò.

⁴ Haú jáng, Yhang tú tái é gi, "A-nham sâng-hi lé, Hpân Sù, 'byu hpan é hkún, yuqgè eq myiwe lé hpan é nghut lhé.'"

⁵ 'Hau é yanmai, yuqgè gi, yhumsing é ìnu iwâ chyáng mai htoq lui, yhangmyi eq rahá rading ralhun za kut nyi mù, yhangnhik gi, gungsho ralhun za dut byuq kó rá nghut lhé.'[✧] ga kâ tô é lé, nungmoq a nghap wú kó lhú?

⁶ Haú mù lui, yhangnhik gi, í yuq a nghut lô e za, rayuq za dut bê nghut ri. Haú mù lui, Garai Gasang lhoq tsúm tô é lé, byù gi, a lhoq kang sháng gaq." gâ ri.

⁷ Haú hkún, yhangmoq gi, "Haú lé nhng, yuqgè rayuq gi, lhoq kang laiká za ká byi mù, yhangmyi lé wó nhang pyám lhé ga, hái mù, Mosheq, hkunmó hkyô tô lhé lhú?" ga, Yhang lé dum tái myí akò.

[†] 18:28 Denari rachap gi, ra-nyi lhé é byù rayuq é zuihpau eq wui ri.

[✧] 19:4 Apùn 1:27

[✧] 19:5 Apùn 2:24

⁸ Haú mù, Yesuq gi, "A-nham sâng-hi mai gi, haú đông a nghut. Nghut kôlhang, nungmoq é myit nhikhlum htân kô é yanmai, nungmoq é yhangmyi pé lé lhoq kang rá ahkâng, Mosheq byi tô é ru nghut lhê.

⁹ Ngò, nungmoq lé tai kôlê, sulâng lú é za a nghut jáng, yhumsing é yhangmyi lé kâng pyám mù, myiwe gotú dum hâng yu é sù ó yuq nghut kôlê, su-myi lú é sù dut bê." ga, yhangmoq lé dum tũ tai ri.

¹⁰ Haú hkún, haú chángzô pé gi, "Myi làng hkyô má haú đông ru nghut le gi, a yu le hâng je ge nyô ri." ga tai akô.

¹¹ Haú mù, Yesuq gi, "Yuq hkangmó gi, dang haú lé wó hap yu é a nghut, wó hkâm rá jeju wó é bang za sheq, wó hap yu é nghut lhê.

¹² Byù ra-am gi, inù unghkaú mai yhang, yuqgê a jé gũ hku lé lo é bang nghut akô; ra-am gi, góbang èq kut é yanmai, yuqgê a jé dut byuq akô; ra-am nghut jáng, mauhkúng mingdán é matú, yuqgê a jé rá đông kut yu pyám akô nghut ri. Shí hkyô lé wó hap yu sũ gi, hap yu sháng gaq." ga dum tai ri.

Zoshâng Wui Eq Yesuq

Mrk 10:13-16; Luk 18:15-17

¹³ Haú htâng, Yesuq mai zoshâng wui htoq má loq ke mù, shimân byi sháng gaq ga, zoshâng wui lé Yhâng chyáng shui lé lo akô. Haú chángzô pé kúm gi, haú shui lé lô bang lé lhom tân hkúm akô nghut ri.

¹⁴ Nghut kôlhang, Yesuq gi, "Haú zoshâng wui lé, Ngá chyáng lé nhâng keq; yhangmoq lé hkâhkúm zing to kô; hkâsu mù gâ le, mauhkúng mingdán gi, haú sũ é bâng é mingdán ru nghut lhê." ga tai kat ri.

¹⁵ Yhang gi, zoshâng wui htoq má loq ke shimân byi mù, haú jowò mai htoq lô bê nghut ri.

Sút Wó É Zorâm Rayuq É Hkyô

Mrk 10:17-31; Luk 18:18-30

¹⁶ Byù rayuq gi, Yesuq chyáng lé jé mù, "Sarâ é, ahtum abyuq é asak wó yu rá matú, ge é muzó hai kut ra rá lú?" ga myi ri.

¹⁷ Haú jáng, Yesuq gi, "Ge é hkyô eq séng lú, hai mù Ngo lé myi lhê lú?" Ge é Sũ gi, rayuq za nyi lhê. Nang, asak dui é má wàng nau é nghut le gi, jep é tarâ pé lé cháng aq." ga tũ tai ri.

¹⁸ Haú yuq gi, "Hká gũ lé lú?" ga dum myi jáng, Yesuq gi, "Byù hkâsat, su-myi hkâlú, hkâhkau, a teng a mán é saksé hkâhkâm,

¹⁹ nángnu nángwa lé hkungga aq,¹⁰ ga le, 'náng gũng lé nang chytap a su, náng é chyangnâm má é bang lé le chyitdap aq.¹⁰ ga le bo tô ri." ga tai kat ri.

²⁰ Haú hkún, zorâm hpó haú gi, "Haú pé banshoq lé, ngò cháng bê nghut lhê; hai kut rá ashí lú?" ga dum tũ myi ri.

²¹ Yesuq gi, "Nang, gumjup sũ dut nau le gi, lô mù, nang wó é sutzè pé lé ùng pyám lú, myùng bang lé byi pyám aq; haú jáng, nang, mauhkúng htoq má sutzè wó rá nghut lhê; haú mù, Ngá htâng lé cháng aq." ga tũ tai ri.

²² Zorâm hpó haú gi, sutzè gyai wó sũ nghut é yanmai, dang haú lé wó gyo jáng, gyai yhang myit a ngón é èq lô byuq bê nghut ri.

²³ Haú htâng, Yesuq gi, Yhâng é chángzô pé lé, "Ngò, nungmoq lé teng za tai kôlê, sutzè wó bang gi, mauhkúng mingdán wó wàng rá gyai yhang wui ri.

²⁴ Haú htoq agó, Ngò, nungmoq lé tai kôlê, sutzè wó sũ rayuq, Garai Gasâng é mingdán má wó wàng rá htoq, gola-uq radu âpno mai wó wang lai rá gi, je lui rá nghut lhê." ga tai ri.

²⁵ Haú chángzô pé gi, haú su gâ é lé wó gyo kôjáng, haú ru nghut le gi, ó yuq za hkyi yu é hui rá nghut lhê lú?" ga Yhang lé myi akô nghut ri.

²⁶ Haú hkún, Yesuq gi, yhangmoq lé wú kat mù, "Haú hkyô lé byù mai gi, wó kut rá a nghut; nghut kôlhang, Garai Gasang gi, lunglhang lé wó kut é Sũ nghut lhê." ga tai ri.

²⁷ Haú hkún, Petruq gi, Yhang lé, "Ngamoq gi, wó é gũ lunglhang lé tô pyám to lú, Nang htâng cháng bê nghut lhê. Ngamoq, hai wá wó rá nghut lhê lú?" ga myi kat ri.

²⁸ Haú mù, Yesuq tũ tai é gi, "Ngò, nungmoq lé teng za tai kôlê, lunglhang lé asik dum sai dut nhang é má, haú Byu Yhangzo gi, Yhâng é hpungwup bo é hkohkâm-tanghkuq má zùng tô é hkún, Ngá htâng cháng é bang nungmoq le, hkohkâm-tanghkuq raxe í lhum htoq má zùng to kômú, Israelaq amyú raxe í hũ lé jéyáng kó rá nghut lhê.

²⁹ Ngá é yanmai, yhumsing é yhùm, nhiktâng wui, inu iwa, zo dù wui eq yò pé rajung jung lé tô pyám tô é sũ ó yuq nghut kôlê, rashô tũ akyú myo jat shoq wó rá nghut é htoq agó, ahtum abyuq é asak le, wó yu rá nghut lhê.

³⁰ Nghut kôlhang, hí nghut nyi é bang myo myo gi, htâng gyó byuq kó rá nghut mù, htâng gyó nyi bang yuq gi, hí bekô rá nghut lhê.

20

Tsibiyiq Hkyâm Mũ Zui Bang Lé Dangtú Yu É Hkyô

¹ Hkâsu mù gâ le, mauhkúng mingdán gi, yhumsing é tsibiyiq hkyâm má mũ zui nhâng rá langchyáng é lúng rá ga, napsún noq le htoq é ló é hkyâm yhumsing eq du ri.

² Yhang gi, ra-nyí é matú denari rachap byi rá đông, haú bang eq myit huí yù mù,

yanghamoq lé, yhang é tsibiyiq hkyâm má nhang hâng kat ri.

³ Napkyó gau hkyíng* kô má, yang gi, htoq e ló le, hai mù le a kut é za, gai má yap tó é bang ra-am lé é myang ri.

⁴ Haù mù, yang gi, haù bang lé, 'Nung-moq lé, ngá é hkyâm má mù é zui keq; byi âng é ahpau, ngò, nungmoq lé byi râ nghut lhê.' ga tái jâng, yangmoq gi, e ló bekò nghut ri.

⁵ Hau htâng, yang gi, raxe í hkyíng má le, myinhâng sum hkyíng kô má le, dum htoq é mù, haù eq rajung za langchyâng pé ê lung kat ri.

⁶ Myinhâng ngo hkyíng kô má, yang dum htoq e ló wú le, góbang ra-am le yap tó bum é lé, ê myâng mù, haù bang lé, 'Nung-moq gi, haù le a kut é za, ra-nyí buí haù mù shí má yap tó bum akò lú?' ga myi jâng,

⁷ haù bang gi, 'Ngamoq lé, ó yuq eq le a lùng kô é yanmai nghut lhê.' ga tú tái akò.

Haù hkùn, yang gi, 'Nungmoq le, ngá é hkyâm má mù é zui keq.' ga tái ri.

⁸ Myinhâng jé jâng, tsibiyiq hkyâm yhumsing gi, yhang é mù shuí u sù lé, 'Haù langchyâng pé lé jì yù mù, je htâng má lung yu é bang mai hí lú, sàng-hì lung yu é bang jé shoq, mù zui hpau byi aq.' ga tái ri.

⁹ Myinhâng ngo hkyíng má mù wàng bang le, denari rachap chap wó yu bum akò.

¹⁰ Haù mù, jé hí má mù wàng bang gi, yangmoq je myo wó nhò ngam akò. Nghut kôlhâng, yangmoq le, rayuq denari rachap chap za wó akò nghut ri.

¹¹ Xhangmoq gi, haù myhó za wó yu bùm kô é yanmai, haù hkyâm yhumsing lé,

¹² 'Shí bang gi, je htâng má mù lé wàng mù, nayí rahkum za mù zui kôlhâng, nàng gi, ra-nyí buigyùm chap bui htân yò má mù zui é bang ngamoq eq rajung za byi ri.' ga mara hùn dang tái akò.

¹³ Nghut kôlhâng, haù hkyâm yhumsing gi, haù bang má é rayuq lé, 'Buinùm hpó ê, ngò, nang lé a tará é đông kut é a nghut. Denari rachap byi râ nghut, nàng eq ngò myit huí to bê a nghut lú?' ga tái ri.

¹⁴ Nàng wó âng é lé yu chùng mù, ló aq. Je htâng má mù lé wang é sù lé le, nang lé byí é myhó, ngò byí nau ri.

¹⁵ Ngá é ngùn lé, ngò kut nau é su a ge kut lú? Ngò, ge é kut le, nàng manôn ri lú?' ga tái ri.

¹⁶ Haù mù lú, htâng gyó nyí bang gi, hí bekò râ nghut mù, hí nghut nyí bang gi, htâng gyó byuq kó râ nghut lhê." gâ ri.

Yesuq Gi, Xhang Shí Râ Hkyô Lé Dum Tái Ri

Mrk 10:32-34; Luk 18:31-34

* 20:3 Chyúmdang ra-am má, sum hkyíng ga chung tó é gi, Yudaq byu pé é ahkying nghut lhê. Yudaq byu pé é ahkying gi, napkyó hkyuq hkyíng mai nghap hí lhê. † 20:22 Góm gá é gi, Yesuq, jamjau hui râ hkyô eq shí râ hkyô lé, tái nau é nghut lhê.

¹⁷ Ahkuí, Yesuq gi, Yerusalem wà mó shut doq ló nyi é u lé, haù chángzo raxe í yuq lé, gotú kut wut yù mù,

¹⁸ "Nga-nhúng gi, Yerusalem wà mó shut doq ló nyi lhê; haù Byu Xhangzo gi, hkyangjong agyi pé eq tará sará pé é loq má ap byí pyâm é hui râ nghut lhê; haù bang gi, Xhang lé, shí râ mara byi kó râ nghut é htoq agó,

¹⁹ jóng pyâm é, nhuq bat é eq tapzìng má jén sat pyâm é hui râ matú, haù tũngbaù pé é loq má ap pyâm kó râ nghut lhê. Nghut kôlhâng, Xhang gi, sum nyí nghù râ buinyi má, lhoq dui toq é dum hui râ nghut lhê." ga tái ri.

Zô Nhik Matú Ìnu Èq Dung Byi É Hkyô Mrk 10:35-45

²⁰ Hau htâng má, Zebedi é yangzô nhik-tang é yhângnu gi, yangzô nhik eq rahá jé lé ló kômù, rajung dung râ matú, Yesuq é hí má hkyihput htuq nyi ri.

²¹ Haù mù, Yesuq gi, "Nàng, haù ô nau ri lú?" ga yang lé myi jâng, yang gi, "Nàng é mingdán má, shí nga zô nhiktâng lé, Nàng é loqyò hkyam má rayuq, loqpaí hkyam má rayuq kut, zùng râ ahkáng byi laq." ga tái ri.

²² Haù hkùn, Yesuq gi, "Nungnhik haù dũng nyi é lé, nungnhik a sé kó nghut ri. Ngò shuq râ góm† lé, nungnhik wó shuq kó râ lú?" ga myi jâng, yangnhik tâng gi, "Wó shuq lhê." ga tú tái akò nghut ri.

²³ Haù mù, Yesuq gi, yangnhik lé, "Ngò shuq râ góm lé, nungnhik shuq ra kó râ za nghut lhê. Nghut kôlhâng, Ngá é loqyò, loqpaí hkyam má zùng râ ahkáng lé gi, Ngò byí jung a nghut. Jowò haù pé gi, Ngá Wa hen to byi bâng é matú za ru nghut lhê." ga tái ri.

²⁴ Gotú chángzo raxé yuq gi, haù hkyô lé wó gyo kôjâng, haù nhiktâng lé nhik-yò akò nghut ri.

²⁵ Haù mù, Yesuq gi, yangmoq banshoq bang lé wut tsing yù lú, "Tũngbaù pé lé uphkang é ga bang gi, tũngbaù pé lé up zò nyi kô é hkyô lé le, haù eq rajung za, yangmoq é ming up suwún wuú le, yhumsing é ahkáng ayá lé chùng mù, up zò nyi kô é hkyô lé le, nungmoq sê lhê.

²⁶ Nungmoq chyáng gi, haù su a dut kó sháng gaq; haù Byu Xhangzo lháng gi, dojaú é lé hkam yù râ matú jé lé é a nghut é za, dojaú râ matú eq byu myo myó é matú, shíhtaí gunglik hkungga đông, Yhâng é asak lé byi pyâm râ matú sheq, jé lé é ru nghut é su,

²⁷ nungmoq má, byù mó dut nau sù ó yuq nghut kôle, nungmoq é dui-nhâng zoshâng dut ra râ nghut lhê.

28 Hau htoq agó, nungmoq má ushuq dut nau sù ó yuq nghut kôle, nungmoq é jùn dut ra rà nghut lhê." ga tai ri.

Myoqjit Í Yuq Myoq Dum Myang É Hkyô Mrk 10:46-52; Luk 18:35-43

29 Yesuq eq Yhâng é chángzô pé gi, Yerihko myuq mai htoq ló nyi kô é hkûn, byù moq mó gi, yhangmoq é htâng má châng é ló bum akó.

30 Haù hkyô yàm má zung tô é myoqjit í yuq gi, Yesuq lai ló nyi é hkyô lé wó gyo kôjáng, "Dawiq é Yhangzo, Yhumsing ê, ngá-nhik lé shogyô yù laq ô!" ga, wut garù kat akó nghut ri.

31 Byù moq mó gi, yhangnhik zím byuq rà matú tân hkúm kôlhang, yhangnhik gi, "Dawiq é Yhangzo, Yhumsing ê, ngá-nhik lé shogyô yù laq ô!" ga, je riyhang htê mó eq wut garù kat akó nghut ri.

32 Haù mù, Yesuq gi, yap kat mù, "Ngò, nungnhik lé hai kut byi rà ô nau akó lú?" ga, yhangnhik lé wut myi kat ri.

33 Haù hkûn, yhangnhik gi, "Yhumsing ê, ngá-nhik myoq myâng nau ri." ga tũ tai akó.

34 Yesuq gi, yhangnhik lé wú shogyo luí, yhangnhik é myoqji má é záng byi ri. Haù hkûn jáng, yhangnhik gi, myoq wó myâng kômù, Yhâng htâng cháng bekó nghut ri.

21

Yesuq, Yerusalem Wà Mó Má Wang E Ló É Hkyô

Mrk 11:1-11; Luk 19:28-38; Yhn 12:12-19

1 Yesuq eq Yhâng é chángzô pé gi, Yerusalem wà mó eq chyâng lo nyi kô é hkûn, Tsanlun Bùm má é Bethpage wà má jé ló kôjáng, Yesuq gi, chángzo í yuq lé,

2 "Nungnhik, hí má é wà má é keq; wà hau má, logúng zing radulé, logúng zo eq rahá tuí to lánq é lé, é myâng kó rà nghut lhê; hau lé hpyi yù mù, Ngá chyáng she lò keq.

3 Byù rayuq yuq, nungnhik lé rajung jung gá lò jáng, 'Shí í du lé, hau Yhumsing chùng rà ri.' gá nghù tũ tai keq; hau jáng, yhang, radá dâm nhâng byi rà nghut lhê." ga Yesuq tai luí, nhang kat ri.

4 Haù gi, myiqhtoi dang lhoq dik rà matú dut lo é nghut ri.

5 Myiqhtoi dang hau gi, "Zi-un byizo* lé, shí su nhù keq; 'Wú aq, náng é hkohkâm gi,

nú-nhâm é myit eq logúng htoq má ji mù, nghut bê, logúng zo htoq má ji mù, náng chyáng lé lò bê nghut ri.'"[†]

gá ri.

6 Haù chángzô nhik gi, e ló mù, Yesuq tai kat é eq rajung za é kut bekó nghut ri.

7 Yhangnhik gi, logúng me lé she lò mù, yhangnhik é buhng pé lé, hau logúng mê é htoq má ke byi kôjáng, Yesuq gi, doq ji ri.

8 Byù moq mó má é myo myo gi, yhangmoq é buhng lé, hkyô má hkyut hkang byi akó; ra-am gi, mhanding pé lé zân hkyô yù mù, hkyô má hkang byi akó nghut ri.

9 Yhâng é hí má htâng má châng sô nyi bum é bang gi,

"Dawiq é Yhangzo gi, hosana[†] nghut nyi sháng gaq ô!"

"Haù Yhumsing é mying mai jé lé lô Sù gi, hkungsó wó nyi sháng gaq ô!"[‡]

"Htoq tsáng myhâng má, hosana nghut nyi sháng gaq ô!"

ga luí, tai garù bum akó nghut ri.

10 Yesuq, Yerusalem wà mó má wang ló é hkûn, rawá gón é bang gi, gabyông lo bùm kômù, "Shí yuq gi, ó wá nghut lhê là?" ga luí, myi lhum bum akó.

11 Haù hkûn, byù moq mó gi, "Shí yuq gi, Galile mau, Nazaret wà byù Yesuq gá é myiqhtoi nghut lhê." ga tai akó nghut ri.

Yesuq, Noqkuq Yhùm Lé Lhoq Sansêng Pyám É Hkyô

Mrk 11:15-19; Luk 19:45-48; Yhn 2:13-22

12 Yesuq gi, noqkuq yhùm má wang é mù, hau má é zè ung zè wui kut nyi é bang banshoq lé, hkat htoq pyám luí, ngùn htai zo bâng é siboí pé eq hpúngkyui ung zo bâng é tanghkuq pé lé, tu mhua pyám byi ri.

13 Haù hkûn, Yhang gi, "Ngá yhùm gi, kyúdung yhùm ga rà nghut lhê."[†] ga ká to kôlhang, nungmoq gi, jowò shí lé 'damaq hkyúng'[†] kut nyi akó." ga, yhangmoq lé tai ri.

14 Yesuq, noqkuq yhùm má nyi tô é hkûn, myoqjit bang eq hkyi hten bang Yhâng chyáng lé lò kômù, Yhang gi, hau bang lé lhom lhoq gê byi ri.

15 Nghut kôlhang, hkyangjong agyi pé eq tará sará pé gi, Yhang kut é mauhpo muzó pé lé le, "Dawiq é Yhangzo gi, hosana nghut sháng gaq." ga, noqkuq yhùm má zoshâng wui garù nyi bùm kô é lé le, myâng kôjáng, wú nhik-yô bum akó nghut ri.

16 Haù mù, yhangmoq gi, "Zoshâng shí bang hai tai nyi kô é lé, Nang wó gyô lhê lú?" ga, Yesuq lé myi kôjáng, Yhang gi, "Wó gyô ri. Nungmoq gi,

"Zoshâng wui eq nyheqnú pê é nhut mai hkya-on kungtôn rà matú, nang lajâng to bê nghut ri."[‡]

ga ká tô é lé, Chyúmdang má a nghap wú kó lú?" ga yhangmoq lé tai ri.

* 21:5 Zi-un byizo gá é lichyúm gi, Yerusalem byu pé gá é nghut lhê. † 21:5 Zhk 9:9 ‡ 21:9 Hebre dang má, hosana gá é gi, "ahkú hkyi yù laq" gá é nghut lhê. Nghut kôlhang, bun zo 9 má gi, hkya-on dang đông chung é nghut lhê. † 21:9 Hkya-on 118:26 † 21:13 Esai 56:7 † 21:13 Yer 7:11 † 21:16 Hkya-on 8:2

¹⁷ Hau htâng má, Yhang gi, haú bang lé nyhi to lui, wà hkaú mai htoq ló mù, Behtani wà má é jé lui, haú myîn, haú má bíng yu ri.

Maihpáng Gâm Nyhuí Kyuq Shi Byuq É Hkyô

Mrk 11:12-14, 20-24

¹⁸ Yhang gi, htang napkyó noq le, Yerusalem wà mó shut dum taú ló é hkún, hkyô má zòmút lui bē nghut ri.

¹⁹ Haú mù, Yhang gi, hkyô yàm má yuq tó é maihpáng gâm lé myang kat mù, chyàng é wú le, ahaq mai lai lui, hai lé le a myàng nghut ri. Haú mù, Yhang gi, shigâm haú lé, "Nàng má, hkâ-nhâm le ashì a zui shàng gaq." ga taí kat ri. Haú hkún jáng, agàm haú gi, nyhuí kyuq shì ló byuq bē nghut ri.

²⁰ Haú chángzô pé gi, haú lé myàng kôjáng, maú byuq kômù, "Maihpáng gâm shì gi, hai mù haú-í hân nyhuí kyuq shì ló lhê lhà?" ga myí akò.

²¹ Yesuq gi, "Ngò, nungmoq lé teng za taí kôlé, nungmoq, úng-àng é myit a bo é za, lumjǐng kô é nghut le gi, maihpáng gâm má Ngò kut é muzó lé, nungmoq wó kut kó rá nghut é htoq agó, bùm shì lé, 'Htot mù, wuimau má ló gyó wàng aq.' ga taí jáng, taí é eq rajung za dut rá nghut lhê.

²² Nungmoq, lumjǐng myit èq dung kô é nghut jáng, hai dǔng le le wó yú kó rá nghut lhê." ga tú taí ri.

Yesuq É Ahkáng Ayá Lé Myí Chyam É Hkyô

Mrk 11:27-33; Luk 20:1-8

²³ Yesuq gi, noqkuq yhùm wàng hkaú má wang é mù, mhoqshít nyi é hkún, hkyangjong agyí pé eq mingbyu é suwún wuí gi, Yhàng chyáng lé jé kômù, "Hai ahko ahkàng èq, Nàng, shì pé lé kut nyi lhê lúh? Ahko ahkáng shì, Nang lé ó yuq byí é lúh?" ga myí akò.

²⁴ Haú hkún, Yesuq gi, "Ngò le, nungmoq lé rajung myí wú kôlé, nungmoq wó tú taí kó é nghut jáng, hai ahko ahkàng èq, Ngò, shì pé kut é hkyô lé taí kyo rá nghut lhê.

²⁵ Yohan byí é baptyisma gi, ó yuq é ahko ahkáng mai nghut lhê lúh? Mauhkúng mai lúh? A nghut jáng, byu chyáng mai lúh?" ga taú myí kat ri.

Haú hkún, yhangmoq, chôm hpyè lhum kô é gi, "'Mauhkúng mai nghut lhê.' nghú, nga-nhúng taí jáng le, 'Haú nghut le nhúng, hai mù, yhang lé a lumjǐng kô é lúh?' ga rá nghut;

²⁶ 'Byu chyáng mai nghut lhê.' nghú jáng le, yhangmoq lhunglhàng bang gi, Yohan lé, myightoi rayuq ga lumjǐng bùm kô é nghut lhê yanmai, haú bang lé, nga-nhúng gyuq rá lhê nghut." gá akò.

²⁷ Haú mù, yhangmoq gi, Yesuq lé, "Ng-amoq a sé." ga tú taí akò.

Haú hkún, Yesuq gi, "Haú jáng, Ngò le, hai ahko ahkàng èq shì pé kut é hkyô lé, nungmoq lé a taí kyo." ga, yhangmoq lé taí ri.

Yuqzô Nhiktàng Lé Dangtú Yu É Hkyô

²⁸ Yesuq xoq taí é gi, "Nungmoq hkásu wó myit akò lúh? Byú rayuq gi, yuqzô í yuq wó ri. Yhang gi, ko sù yuq chyáng é mù, 'Ngá zo è, nàng, hkú-nyí tsibiyiq hkyâm má mù é zui aq.' ga taí jáng,

²⁹ yuqzô haú gi, 'Ngò a kâm è.' ga tú taí ri; nghut kólhang, htàng má, yhang gi, myit dum lhǐng mù, é bē nghut ri.

³⁰ Hau htàng, yhàngwa gi, yhang zo tiq sù yuq chyáng é mù, rajung za ga é dum taí jáng, yuqzô haú gi, 'È rà, áwa!' ga yín yú kólhang, a é kut ri.

³¹ Haú nhiktàng má é hká yuq sheq, yhàngwa ô nau é hkyô lé kut sù nghut ri lúh?" gá ri.

Haú hkún, yhangmoq gi, "Ko sù nghut ri." ga tú taí akò.

Haú mù, Yesuq gi, yhangmoq lé, "Ngò, nungmoq lé teng za taí kôlé, kang guq bang eq shiwa myhí pé gi, Garai Gasàng é mingdán má, nungmoq a wàng shimá, wang ló nyi bùm kó rá nghut lhê.

³² Hkásu mù gá le, Yohan gi, nungmoq chyáng lé jé mù, dingmán hkyô lé tǔn shít kólhang, nungmoq gi, yhang lé a jǐng kut akò nghut ri; nghut kólhang, haú kang guq bang eq shiwa myhí pé gi, yhàng dang lé jǐng akò nghut ri. Nungmoq gi, haú hkyô lé myang é nghut kólhang, myit a lhǐng kô é htoq agó, yhang lé a lumjǐng shì kó nghut ri.

Tsibiyiq Hkyâm Saí Bang Lé Dangtú Yu É Hkyô

Mrk 12:1-12; Luk 20:9-19

³³ Gotú dangtú lé gyó wú shì keq; hkyâm yhumsǐng rayuq gi, tsibiyiq hkyâm ralhum saí to mù, lhǐnghkyuq kyâm to lui, tsibiyiq wing pyik htoq rá donghkong dù to mù, machya ralhum saí tó ri. Hau htàng, yhang gi, hkyâm haú lé, hkyâm saí zo bàng chyáng ngho byí to mù, gó ming shut é ló byuq bē nghut ri.

³⁴ Kyóshu yoq jé jáng, yhang gi, yhang eq sêng é tsibiyiq shì é yú rá matú, yhàng é dui-nhàng zoshàng wuì lé, haú hkyâm saí zo bàng chyáng nhang kat ri.

³⁵ Haú hkyâm saí zo bang gi, dui-nhàng zoshàng wuì lé, lhom chypu yú kômù, rayuq lé gi, lhom nhuq bat, rayuq lé gi, lhom sat pyám, kut akò nghut ri.

³⁶ Hau htàng má, yhang gi, hí dam lhê htoq je myo shoq gotú dui-nhàng zoshàng wuì lé dum nhang kat le le, haú hkyâm saí zo bang gi, hí lhê bang lé su lhom dum kut akò nghut ri.

³⁷ Ló htáng má, yang gi, 'Ngá zo lé gi, yangmoq lhom hkungga kó rà nghut lhê.' ga, yang zo lé, háu bâng chyáng nhang kat ri.

³⁸ Nghut kôlhang, háu hkyâm saí zo bang gi, yang zo lé myàng kôjáng, 'Shí yuq gi, sili wunlí sing yù rà sù nghut lhê; lé keq, yang lé sat pyám mù, yhâng é sili wunlí lé yu pyám byi sháng.' ga, rayuq eq rayuq tái lhum bum akô nghut ri.

³⁹ Háu mù, yangmoq gi, yang lé, chyup yù luí, hkyâm shinggan shut dú htoq kômù, sat pyám bekô nghut ri.

⁴⁰ Háu mù luí, tsibiyiq hkyâm yhumsing lé jé é hkùn lé, háu hkyâm saí zo bang lé hkásu kut nhô ngam akô lúhú?" ga Yesuq myí ri.

⁴¹ Háu hkùn, háu hkyangjong agyi pé eq suwún wui gi, "Háu agê ashop bang lé gi, agê ashop é đông sat pyám rà nghut lhê. Háu tsibiyiq hkyâm lé gi, kyô shu yoq má, yhâng é gambùm lé byi rà bang lé, htot ngho byi pyám rà nghut lhê." ga, tú tái akô nghut ri.

⁴² Háu jáng, Yesuq dum tái é gi, "Chyúmdang má, 'Yhùm saí bâng eq hkyin htoq pyám é luqgok gi, htungchyún má é ahkyak dik é luqgok dut bê.

Shí hkyô gi, háu Yhumsing kut é nghut luí, nga-nhông é myoq hí má mauhpo dut bê nghut ri."⁴³

ga bo tô é lé, nungmoq a nghap wú kó lúhú?

⁴³ Háu mù, Ngò, nungmoq lé tái kôlé, Garai Gasâng é mingdán lé, nungmoq chyáng mai yù mù, hau é ashí wó zui rà byuhú lé byi pyám rà nghut lhê.

⁴⁴ Luqgok háu má gyó záng é sù gi, gyuí gyop byuq rà nghut lhê. Luqgok hau eq gyó nhê záng é sù le, nhê pyeq pyám é hui rà nghut lhê." gâ ri.

⁴⁵ Hkyangjong agyi pé eq Hparishe pé gi, háu Yesuq tái é dangtú pé lé wó gyo kôjáng, yangmoq lé tái nyi é hkyô lé, sê gyô akô nghut ri.

⁴⁶ Háu mù, yangmoq gi, Yhang lé chyup yù rà hkyô ho nyi akô; nghut kôlhang, byu pé gi, Yhang lé, myiqhtoi rayuq ga myit lum to kô é yanmai, yangmoq gi, háu bang lé gyuq akô nghut ri.

22

*Myiháng Poi Dangtú Pé
Luk 14:15-24*

¹ Yesuq, dangtú pé đông yangmoq lé dum tái é gi,

² "Mauhkûng mingdán gi, yhumsing yangzô é matú myiháng poi hen lajáng to byi é hkohkâm rayuq eq du ri.

³ Hkohkâm hpó háu gi, yang ji tô é bang, háu poi má lé lô rà matú, yhâng é dui-nhâng

zoshâng wui lé é tsing tái nhang ri; nghut kôlhang, háu bang gi, a lé kut akô nghut ri.

⁴ Háu htâng má, yang gi, gotú dui-nhâng zoshâng wui lé, 'Ngò hái le hen to bê; ngá é no eq xu-myum é gau-nyháu pé lé sat mù, jung hkangmó ri ri nghut to bê. Myiháng poi má lé lò keq hkoi nghú, háu ji tô é bang lé é tái keq.' ga pying luí, nhang kat ri.

⁵ Nghut kôlhang, háu ji to hui é bang gi, dang háu lé hái su a gyô ngàm kômù, rayuq gi, yohtung shut, rayuq gi, hpugá dinggá hkyô shut é byuq bekô nghut ri.

⁶ Ra-am dum nghut jáng, yhâng é dui-nhâng zoshâng wui lé lhom chyup yù kômù, nhuq bat luí, sat pyám byi akô nghut ri.

⁷ Háu mù, hkohkâm gi, nhikjum yo luí, yhâng é gyezô pé lé, háu byu sat bang lé sat pyám nhâng mù, yangmoq é myuq lé nyhê hkyô pyám nhang ri.

⁸ Háu htâng má, yang gi, yhâng é dui-nhâng zoshâng wui lé, 'Myiháng poi gi, ri ri nghut to bê; nghut kôlhang, háu ji to hui é bang gi, lé rà a gingdán kó nghut ri.

⁹ Háu mù, hkyô kang pé má é luí, myang é yuq hkangmó lé, poi má lé rà matú é ji keq.' ga tái ri.

¹⁰ Háu jáng, dui-nhâng zoshâng háu bang gi, hkyô kang pé má htoq é luí, myang é byù gè byù gang lunglhang lé ji tsing yù kô é nghut mù, myiháng poi gi, bíng pé zung bying bùm bê nghut ri.

¹¹ Nghut kôlhang, bíng háu bang lé, hkohkâm hpó, lé wang wú é hkùn, myiháng poi wàng hking a wut tô é byù rayuq lé, yang byu-myang ri.

¹² Háu mù, yang gi, háu yuq lé, 'Buinùm hpó é, nàng gi, myiháng poi wàng hking le a wut é nhing, shí má hkásu kut wang lo é lúhú?' ga myi jáng, háu yuq gi, hái le a dat tú tái lo nghut ri.

¹³ Háu hkùn, hkohkâm hpó gi, yhâng é dui-nhâng zoshâng wui lé, 'Yhâng é hkyi loq má tui luí, háu ngaubiyi ngàu nhap eq zui kyik kyik shoq hpuzô nyi rà nghut é shinggan mauchut hkaú má, dú htoq pyám keq.' gâ ri.

¹⁴ Hkásu mù gâ le, byù myo myo gi, ji yu é hui kôlhang, hkyin yù hui é bang gi, shaú ri." gâ ri.

*Kehtaq Lé Kang Kat Byi É Hkyô
Mrk 12:13-17; Luk 20:20-26*

¹⁵ Háu htâng má, Hparishe pé gi, htoq lò kômù, Yhâng é dang pé má mara chyup rà hpaqchyí dá akô nghut ri.

¹⁶ Yhangmoq gi, Herut é byu pé eq rahá, yangmoq é chángzô pé lé, Yesuq chyáng nhang kat akô. Háu bang gi, Yesuq chyáng lé jé kômù, "Sarâ é, Nàng gi, tengmán sù nghut é eq, Garai Gasâng é hkyô lé, tengmán é đông mhoqshít é sù nghut é lé le, Nàng gi, ó hái ga rá lé le hái su a ngàm sù nghut é yanmai,

✦ 21:42 Hkya-on 118:22-23

ó yuq é myoqdong lé le a tê byi sù nghut é hkyô lé le, ngamoq sé lhê.

¹⁷ Haù mù, hkôséng Kehtaḡ lé kang kat byi lé gi, ge lhê lú? A gè lú? Nàng, hkâsu wó myit é hkyô taí kyô wú aq." ga taí akô nghut ri.

¹⁸ Yesuḡ kúm gi, yhangmoq é agè ashop hkyô lé sé byi mù, "Gegùn labyoq kut bang é, nungmoq gi, haí mù, Ngo lé lé chyam wú akô lú?"

¹⁹ Kang kat râ ñgùn htingchap rachap, Ngo lé byi wú keḡ." ga taí kat ri. Haù hkùn, yhangmoq gi, denari rachap yù byi akô.

²⁰ Haù mù, Yhang gi, yhangmoq lé, "Shí má, ó yuq é alhò eq masat laiká dap tò ri lú?" ga myi jáng,

²¹ yhangmoq gi, "Kehtaḡ é nghut ri." ga tú taí akô. Haù mù, Yhang gi, yhangmoq lé, "Kehtaḡ é lé gi, Kehtaḡ lé byi keḡ; Garai Gasâng é lé gi, Garai Gasang lé byi keḡ." ga taí kat ri.

²² Haù su gá é lé, wó gyo kôjáng, haù bang gi, maù byuḡ kómù, Yhâng chyáng mai htoḡ ló byuḡ bekò nghut ri.

Saduke Pé, Yesuḡ Lé Myi Chyam É Hkyô
Mrk 12:18-27; Luk 20:27-40

²³ Haù nyí má yhang, haù dum dui toḡ hkyô a joḡ gá é Saduke pé gi, Yesuḡ chyáng lé jé kómù, dangmyi lé myi akô.

²⁴ Yhangmoq myi kô é gi, "Sarà é, 'Myiwe wó é byù rayuḡ gi, zo dù a dap é za shi byuḡ é nghut jáng, yhanggu gi, yhangmâng é awut ashín xoḡ byi rá matù, yhâng rhat lé chui gon ra rá nghut lhê.' ga, nga-nhúng lé, Mosheḡ taí tò é nghut lhê.

²⁵ Hí hpyang lé, ngamoḡ chyáng, gumang nhiktâng wui nyhit yuḡ nyi akô. Lagám yuḡ gi, myiwe yù luí, zo dù a dap é za yhangmyi lé shi lhuí pyâm to bê nghut ri.

²⁶ Haù eq rajung zo, Lanong, Lalaḡ mai Lahká jé shoḡ, chuimó haù lé gon luí, ó le zo dù a dap é za shi ló byuḡ bùm bekò nghut ri.

²⁷ Ló htáng má, myiwe myhí haù le châng shi ló byuḡ bê nghut ri.

²⁸ Haù mù luí, haù dum dui toḡ é buinyi má, myiwe myhí haù gi, haù nhiktâng wui nyhit yuḡ má é hká yuḡ é yhangmyi nghut rá lú? Hkâsu mù gá le, yhang gi, haù nhiktâng wui banshoḡ bâng é yhangmyi dut wú bê sù nghut ri." gá akô.

²⁹ Haù hkùn, Yesuḡ gi, yhangmoq lé, "Nungmoq gi, Chyúmdang eq Garai Gasâng é wum-o a-tsam lé a sé kô é yanmai, hkyô nghoḡ akô nghut ri.

³⁰ Haù dum dui toḡ é buinyi má gi, myi byi myi yù hkyô joḡ lo rá a nghut; yhangmoq gi, mauhkúng htoḡ má é maumang lagyô pé su dut byuḡ kó rá nghut lhê.

³¹ Shí é mai dum dui toḡ bang eq séng luí,

³² Garai Gasang gi, 'Ngò gi, Abraham é Garai Gasang, Isak é Garai Gasang, Yakup é Garai Gasang nghut lhê.'³² ga, nungmoq lé taí tò é lé, nungmoq a nghap wú kó lú? Yhang gi, shi to bâng é Garai Gasang a nghut; dui nyi bâng é Garai Gasang sheḡ ru nghut lhê." ga taí ri.

³³ Byù moḡ mó gi, dang haù wó gyo kôjáng, Yhang mhoḡshit é hkyô lé maù byuḡ bum akô nghut ri.

Ahkyak Dik É Jep É Tará

Mrk 12:28-34; Luk 10:25-28

³⁴ Saduke pé lé, Yesuḡ lhoḡ zím pyâm é hkyô lé, Hparishe pé wó gyo kôjáng, yhangmoq gi, Yesuḡ chyáng zup zing lé bum akô.

³⁵ Yhangmoq má bo é tará sará rayuḡ gi, Yesuḡ lé chyam wú é dōng,

³⁶ "Sarà é, jep é tará má, hká lhum gi, je ahkyak dik lhê lú?" ga myi ri.

³⁷ Haù mù, Yesuḡ gi, "Haù Yhumsing náng é Garai Gasang lé, náng é asak woi-nyí lhum gón, náng myit é hkyô banshoḡ èḡ, chyitdap rá lhê."³⁶ gá é nghut lhê.

³⁸ Tará haù gi, je hí lhum eq je ahkyak dik é lhum nghut lhê.

³⁹ Hau htang lhum le haù eq du é nghut mù, 'Náng gūng lé nàng chyitdap é su, náng é chyangnâm má é bang lé le chyitdap aq.'³⁷ gá é nghut lhê.

⁴⁰ Tará haù í lhum gi, jep é tará banshoḡ eq myiḡtoi laiká banshoḡ é dangchyūng nghut lhê." ga, yhang lé taí kat ri.

Hkrisduḡ Gi, Ó Yuḡ É Yhangzo?

Mrk 12:35-37; Luk 20:41-44

⁴¹ Hparishe pé zup zing to kô é hkùn, Yesuḡ gi, yhangmoq lé,

⁴² "Nungmoq gi, Hkrisduḡ eq séng luí hkâsu myit ngam akô lú? Yhang gi, ó yuḡ é yhangzo nghut lhê lú?" ga myi jáng, yhangmoq gi, "Dawiq é yhangzo nghut ri." ga tú taí akô.

⁴³ Haù mù, Yhang gi, yhangmoq lé, "Haù hkùn, Dawiq gi, Woi-nyí dōng mai, Yhang lé, 'Yhumsing' ga, haí mù wut lhê lú? Hkâsu mù gá le, Dawiq taí é gi,

⁴⁴ 'Haù Yhumsing Garai gi, ngá é Yhumsing lé, "Ngò, náng é gumlau gye pé lé, náng é hkyiwa ô má tò pyâm é hkying jé shoḡ,

Ngá é loḡyo hkyam shut zung nyi shi aq." ga taí ri."³⁸

gá ri.

⁴⁵ Haù mù, Dawiq yhang lháng, Hkrisduḡ lé, 'Yhumsing' gá é nghut le gi, yhangzo za hkâsu ge nghut rá lú?" ga taí ri.

⁴⁶ Haù mù, ó yuḡ le, dang rahkun lháng a wó tú taí lo kô é nghut mù luí, haù nyí mai, ó

yuq lhang Yhang lé dangmyi a wám myi lo kó nghut ri.

23

Tarâ Sará Pé Eq Hparishe Pé Lé Sidiq Râ Hkyô

Mrk 12:38-40; Luk 11:37-52; 20:45-47

¹ Hau htâng, Yesuq gi, byù moq mó eq Yhâng é chángzô pé lé tai é má,

² "Tarâ sará pé eq Hparishe pé gi, Mosheq é tanghkuq má zung akô.

³ Haù mù, yhangmoq mhoqshit é hkyô chângiup lé, nungmoq châng kut ra kó rà nghut lhê. Nghut kôlhang, yhangmoq kut é dông gi, hkâkut kô; hkâsu mù gà le, yhangmoq gi, yhangmoq tai é dông a kut kó nghut ri.

⁴ Yhangmoq gi, byu pé é goqsân má wôlai ke byi kôlhang, yhangmoq yhang gi, wò haù pé lé bo waq rà matú, loqnyhui lhang a kâm lhoq tuí kó nghut ri.

⁵ Yhangmoq kut é hkyô lhunglhang gi, byu pé myàng rà matú za kut shit é nghut akô; haù chyumbun bo é showui-htùng pé lé lhoq kô yù kômù, buhíng pé má é banbyaù pé lé lhoq hing yu akô nghut ri;

⁶ yhangmoq gi, poi pé má é réng é jowò pé eq tarajong pé má é ahkyak dik é zùng jang pé má, myang zùng rà lé ô nau nyi akô;

⁷ yhangmoq gi, gai pé má lhom shi-kyâm yù kó rà eq, byu pé mai, yhangmoq lé, 'Rabai'* ga lhom wut kó rà lé ô nau nyi bum akô.

⁸ Nungmoq kúm gi, 'Rabai' ga wut rà lé hkâ-ô nau kó; hkâsu mù gà le, nungmoq gi, sará rayuq za wò lhê nghut é htoq agó, nungmoq banshoq bang gi, gumang chyat ru nghut lhê.

⁹ Haù mù, myidàm htoq má, ó yuq lé le, 'áwa' hkâ-nghú kó; hkâsu mù gà le, mauhkúng htoq má é Íwa rayuq za, nungmoq é Íwa nghut lhê.

¹⁰ Hau htoq agó, 'sarâ' ga wut rà lé, hkâ-ô nau kó; hkâsu mù gà le, Hkrisduq za, nungmoq é Sarâ nghut lhê.

¹¹ Nungmoq má é je gyaù sù gi, nungmoq é dui-nhâng zoshâng dut rà nghut lhê.

¹² Hkâsu mù gà le, yhumsing gùng lé waq toq sù ó yuq nghut kôle, lhoq nyhum pyâm é hui rà nghut lhê, yhumsing gùng lé lhoq nyhùm sù kúm gi, waq toq é hui rà nghut lhê.

¹³ Gegùn labyoq nghut é, tarâ sará pé eq Hparishe pé é, nungmoq gi, dingnyé wó ri. Hkâsu mù gà le, nungmoq gi, byu pé hí má, mauhkúng mingdán hkyô lé xaù tó akô; nungmoq yhang le a wàng kó, wàng nau nyi bang lé le a wàng nhâng kó nghut ri.

¹⁴ (Gegùn labyoq nghut é, tarâ sará pé eq Hparishe pé é, nungmoq gi, dingnyé wó ri.

Hkâsu mù gà le, nungmoq gi, chuimó pé é yhùm-yò pé lé hpyoq zo hpyoq shuq é eq kyú hing hing dúng shit mhaù é bang nghut akô; haù mù, dam byi é je myo hui zo kó rà nghut lhê.)*

¹⁵ Gegùn labyoq nghut é, tarâ sará pé eq Hparishe pé é, nungmoq gi, dingnyé wó ri. Hkâsu mù gà le, nungmoq gi, byù rayuq lé nungmoq é noqkuq htùng má wò lhoq lhik yù rà matú, myi hkyô, wui hkyô, châng jón wún kômù, wò lhoq lhik yu é sù lé gi, nungmoq su ngaraí byù í tú shuí dut akô nghut ri.

¹⁶ Hkyô-u she é myoqjit pé é, nungmoq gi, dingnyé wó ri. Nungmoq gi, 'Noqkuq yhùm lé lang lui dakam é sù gi, haí a ra; noqkuq yhùm má é hing lé lang mù dakam é sù kúm gi, cháng ra bê.' ga lhaq tai akô.

¹⁷ Myoqjit é byù nà pé é! Haù hing eq hing lé lhoq yúnglhô é noqkuq yhùm gi, hká lhum je ahkyak lhê lú?

¹⁸ Hau htoq agó, nungmoq gi, 'Haù hkungga gyap lé lang lui dakam é sù gi, haí a ra, nghut kôlhang, haù hkungga zè lé lang mù dakam é sù gi, cháng ra bê.' ga le, lhaq tai akô nghut ri.

¹⁹ Myoqjit pé é! Haù hkungga zè eq hkungga zè lé lhoq yúnglhô é hkungga gyap gi, hká lhum je ahkyak lhê lú?

²⁰ Haù mù, haù hkungga gyap lé lang lui dakam é sù gi, haù hkungga gyap eq hau é ahtoq má ke tó é zè banshoq lé lang lui dakam é sù dut bê nghut ri.

²¹ Noqkuq yhùm lé lang lui dakam é sù gi, haù noqkuq yhùm eq haù má nyi é Sù lé lang lui dakam é sù dut bê nghut ri.

²² Hau htoq agó, mauhkúng lé lang lui dakam é sù gi, Garai Gasâng é tanghkuq eq haù má zung é Sù lé lang lui dakam é sù dut bê nghut ri.

²³ Gegùn labyoq nghut é, tarâ sará pé eq Hparishe pé é, nungmoq gi, dingnyé wó ri. Hkâsu mù gà le, nungmoq gi, xunmân nghut é gau-tsáng shingtón, bantsái, hpakkyi pé má é xê gambùm ragambùm lé gi, byi nyi kômù, je ahkyak é tarâ nghut é, tarâ rap-râ hkyô, shogyo nhikmyin hkyô eq lhumzui hkyô pé lé gi, lhai pyâm tó akô nghut ri. Hí lhum lé kut é su, htang lhum lé le kut rà lhê.

²⁴ Hkyô-u she é myoqjit pé é! Nungmoq, pyup lé gi, jân pyâm kômù, gola-ung lé gi, myui pyâm akô nghut ri.

²⁵ Gegùn labyoq nghut é, tarâ sará pé eq Hparishe pé é, nungmoq gi, dingnyé wó ri. Hkâsu mù gà le, nungmoq gi, zo hkoq shuq góm pé lé ahtoq shut za chí yúng mù, ahte má gi, lú zo lú shuq é eq yhumsing maiwàng zat é myit byíng zan tó ri.

* 23:7 Aramaik dang dông *rabai* gà é gi, sarâ gà é lichyúm nghut lhê. † 23:14 Chyúmding ra-am má gi, bun zo 14 shí a bo é nghut lhê.

²⁶ Hparishe myoqjit pé ê! Zo hkoq shuq góm é ahte lé hí chí yúng pyám keq, haù jáng, ahtoq le sân-yúng rà nghut lhê.

²⁷ Gegùn labyoq nghut é, tará sará pé eq Hparishe pé ê, nungmoq gi, dingnyé wó ri. Hkâsu mù gà le, nungmoq gi, but hpyu tô é lup pé eq du akò; haù pé gi, ahtoq má wú yúng kólhang, ahkaù má gi, màng bup showui pé eq achaaq achyut é chângiup byíng tô é nghut ri.

²⁸ Haù eq rajung za, nungmoq gi, byu pé hí má, ahtoq pyám dingmán é su kut shit kólhang, ahkaù má gi, gegùn labyoq kut é eq agé ashop é hkyô pé byíng zan tò ri.

²⁹ Gegùn labyoq nghut é, tará sará pé eq Hparishe pé ê, nungmoq gi, dingnyé wó ri. Hkâsu mù gà le, nungmoq gi, myiqhtoi pé é lup lé luptsuq tsuq kômù, dingmán bâng é lup pé lé mhón byi kólui,

³⁰ 'Nngamoq gi, ngamoq é íchíy íwa pé é ipyat má nyi àng é ru nghut le gi, haù myiqhtoi pé é sui lhoq shun é bang má, ngamoq bò lóm rà a nghut.' ga lhaq tai akò.

³¹ Haù su mù, nungmoq gi, haù myiqhtoi pé lé sat pyám bâng é awut ashín pé nghut é hkyô lé, nungmoq gùng nungmoq saksé hkam yu nyi akò nghut ri.

³² Haù mù, nungmoq é íchíy íwa pé hí tò é muzó lé, banshoq châng kut pán keq!

³³ Lhangmui pé é, duq htân lhangmui amyú pé ê! Ngarai mîng é dam byi hkyô mai, hkâsu wó hpang lut kó rà lhú?

³⁴ Hau é yanmai, myiqhtoi pé, hpaqchyi bò bang eq chyúm sará pé lé, Ngò, nungmoq chyáng nhang kat rà nghut lhê. Haù bang má é ra-am lé gi, nungmoq lhom sat pyám mù, tapzìng má jén pyám kó rà nghut lhê; ra-am lé gi, nungmoq é tarajong pé má, nhuq bat kômù, ra-myuq htâng ra-myuq châng hkat zing-rí wún kó rà nghut lhê.

³⁵ Hau é yanmai, haù dingmán sù Abelaq é sui mai hí lui, noqkuq yhùm eq hkungga gyp gyoq má nungmoq sat pyám é, Berehkiq é yhangzo Zahkariq é sui jé shoq, myidàm htoq má shun pyám é dingmán bang banshoq é sui gi, nungmoq é ahtoq má jé lò rà nghut lhê.

³⁶ Ngò, nungmoq lé teng za tai kólé, shí hkyô banshoq gi, ipyat shi é ahtoq má jé rà nghut lhê.

³⁷ Yerusalem é, Yerusalem é, myiqhtoi pé lé sat pyám pyám kut mù, náng chyáng nhang kat é bang lé luggok èq dú sat sat kut é myuq nàng é, woqzìng gi, yhangzò pé lé, yhâng é dùng hkaù má tsìng lhùng yu é su, nungzò pé lé, Ngò, hkâ-myhó dâm shui tsìng yu nàu kólhang, nàng a dóng nghut ri.

³⁸ Wú keq, nungmoq é yhùm gi, nungmoq é matú chamchuyiui dut pyám to berá nghut lhê.

³⁹ Hkâsu mù gà le, Ngò, nungmoq lé tai kólé, 'Yhumsing é myíng mai jé lé lo é Sù gi, hkungsò wó nyi sháng gaq.'[☆] ga, nungmoq a tai tai gi, Ngo lé wó myâng kó rà a nghut lo." gá ri.

24

Ló Htàng Buinyi Má Dut Lò Râ Hkyô Mrk 13:1-31; Luk 21:5-33

¹ Yesuq gi, noqkuq yhùm mai htoq e lo é u lé, Yhâng é chángzò pé gi, Yhâng é nàm má huì lé lò kômù, haù noqkuq yhum é loqmú pé lé tûn shit akò.

² Haù hkùn, Yesuq gi, yhangmoq lé, "Haù pé banshoq lé, nungmoq myang lhê a nghut kó lhú? Ngò, nungmoq lé teng za tai kólé, luggok haù pé gi, rachâm htoq racham lhang a kè lhum loshoq, hpyoq hpyi pyám é huì rà nghut lhê." ga tai ri.

³ Yesuq gi, Tsanlun Bùm má zung tò é hkùn, haù chángzò pé gi, yhangmoq baù Yhâng chyáng lé jé kômù, "Haù hkyô pé gi, hkâ-nhám dut lò rà lhú? Nàng gyó lé rà hkùn eq ló htàng buinyi má, hkasù é kumlhá htoq lò rà nghut lhê lhú? Ngamoq lé tai kyô wú laq." ga, Yhang lé myí akò.

⁴ Haù hkùn, Yesuq, yhangmoq lé tû tai é gi, "Nungmoq lé, ó yuq èq le a wó shui nghoq sháng gaq, sidiq nyi keq.

⁵ Hkâsu mù gà le, 'Ngò gi, haù Hkrisduq nghut lhê.' ga, Ngá myíng lé làng é byù myo myo pò htoq lò mù, byù myo myo lé hkyô shui nghoq kó rà nghut lhê.

⁶ Nungmoq gi, majan dut nyi é hkyô eq majan eq sêng é danglám pé lé, wó gyo kó rà nghut lhê; nghut kólhang, hkâgyuq dàn kó. Haù hkyô pé gi, dut lò rà za nghut lhê; nghut kólhang, lò htàng é buinyi gi, a nghut shi.

⁷ Byù ra-myuq eq ra-myuq, mingdán ralhùm eq ralhùm majan zân lhum lò kó rà nghut lhê. Jowò myo myo má, mutmó gyó é pé eq layàng nún é pé dut lò rà nghut lhê.

⁸ Haù pé gi, wuìhke jamjau hkyo é apùn awang za ru nghut ashí.[☆]

⁹ Haù hkùn, nungmoq gi, zing-rí é eq sat pyám é huì zo rà matú, ap pyám é huì kó rà nghut lhê. Byù myù lhunglhang bang gi, Ngá é yanmai, nungmoq lé a ngui kut kó rà nghut lhê.

¹⁰ Haù u lé, byù myo myo gi, lumjìng myit lé tò pyám kômù, rayuq eq rayuq a ngui lhum dut é htoq agó, rayuq eq rayuq ap pyám lhum kó rà nghut lhê.

¹¹ Hau htoq agó, myiqhtoi pyoq pé myo myo pò htoq lò kômù, byù myo myo lé hkyô shui nghoq kó rà nghut lhê.

¹² Agé ashop é hkyô myó jat lo é yanmai, byù myo myó é chyitdap myit gi, kân lò byuq rà nghut lhê;

13 nghut kôlhang, jìhtùm jé shoq wó hkam jân nyi é sù gi, hkyi yu é hui rá nghut lhê.

14 Byù myù banshoq má saksé dut rá matú, haù mingdán eq séng é gabú danglù lé, mingkan gón má hko kyo rá nghut lhê. Hau htâng má sheq, ló htum buinyi jé rá nghut lhê.

15 Haù mù luí, myiqhtoi Danielaq dông mai taí tò é eq rajung za, 'haù lhoq hten lhoq hpyoq é achaq achyut hkyô¹⁰ gi, chyoiyúng jowò má shap tò é lé, nungmoq myàng kó rá nghut lhê. (Chyúmlaika nghap sù gi, sê gyo sháng gaq).

16 Haù hkùn, Yuda mau má nyi é bang gi, bùm pé shut hpang doq ló kó sháng gaq.

17 Yhumhkúng htoq má nyi tò é sù gi, yhúmhaù má é zè haí lé le, a ló gyó wang yù lo sháng gaq.

18 Yò má nyi tò é sù gi, yhâng é buhíng lé a ló taú yu nyi lo sháng gaq.

19 Haù buinyi pé má, zogúng dut é myiwe eq náu huq ashí nghut é ìnu wui gi, gyai yhang wuìhke jamjau kó rá nghut lhê.

20 Haù nungmoq hpâng rá buinyi gi, gyoqmyò,* a nghut jáng, Bánno buinyi má a ang rá matú, kyúđung nyi keq.

21 Hkâsu mù gâ le, mingkan lé joq é hkùn mai ahkuí jé shoq, hkâ-nhám le a dut wó shí é wuìhke jamjau mó gi, haù buinyi pé má dut lò rá nghut lhê; haù sù é hkyô gi, htàngnùng má hkâ-nhám le dum dut lò rá nghut.

22 Buinyi haù pé lé lhoq shaù pyám é za a nghut le gi, ó yuq lé asak wó lut rá a nghut; nghut kôlhang, Garai Gasang eq hkyin yù hui bâng é matú gi, buinyi haù pé lé, lhoq shaù pyám byi rá nghut lhê.

23 Haù ahkyíng má, byù rayuq yuq mai, nungmoq lé, 'Wú keq, shí má Hkrisduq nyi ri.' ga, haù a nghut jáng, 'Wú keq, Yhang hê má nyi ri.' ga taí jáng, nungmoq hkâjíng kó.

24 Hkâsu mù gâ le, Hkrisduq pyoq pé eq myiqhtoi pyoq pé pò htoq lô mù, wó dut é nghut jáng, hkyin yù hui bang lé lhang, wó lhoq nghoq shoq ga, kumlhá mó pé eq laklaí kumlhá pé lé kut shit kó rá nghut lhê.

25 Gyo keq, shí hkyô a dut shimá, Ngò, nungmoq lé taí kyô nyi gu nghut lhê.

26 Haù mù, rayuq yuq eq, nungmoq lé, 'Yhang gi, yoso má nyi ri.' gâ jáng le, hkâ-é kó; 'Yhang gi, shí gok hkaù má lúng tô ri.' ga jáng le, hkâjíng kó.

27 Hkâsu mù gâ le, bùi htoq hkyam má lhap hpyat é gi, bùi wang hkyam má lhang jé shoq duqbó é su, haù Byu Yhangzo jé lé é hkùn le, dut rá nghut lhê.

28 Màng leq é jang má, langdâ pé, lé zíng bùm rá nghut lhê.

29 Buinyi haù pé má é wuìhke jamjau lai eq yhang,

'Bùi gi, noq byuq mù, lhamó gi, a tsò dut byuq rá nghut lhê;

kyí pé gi, mauhkúng mai byit gyó lo bùm mù, mauhkúng má é wum-o a-tsam pé gi, lhoq nhùn é hui bùm kó rá nghut lhê.¹⁰

30 Haù hkùn, haù Byu Yhangzô é kumlhá gi, mauhkúng má htoq shit lò rá nghut mù, myidàm htoq má é byù myù lhunglhang gi, yón ngau bùm kó rá nghut lhê. Haù Byu Yhangzo gi, mauhkúng mai, mhut jì mù, hpungwup a-tsam mó eq le, hpungwup shíngkang eq le, gyó lé lo é lé, yhangmoq byu-myàng kó rá nghut lhê.

31 Hau htâng má, Yhang gi, Yhâng é mau-mang lagyó pé lé, tut htê mó eq nhang kat luí, yhangmoq gi, maumyí chài, myi chyám eq mauhkúng rahkyam mai, gó hkyam htum shoq má é, Yhang hkyin yu tò é bang lé shuí tsíng yù kó rá nghut lhê.

32 Maihpung gâm lé wú mù, mhoq yú keq; agàm mai a-nyuq nyùn lò mù, ahaq htut lò jáng, bùi nyé nám chyàng lò bê lé, nungmoq sé lhê.

33 Haù eq rajung za, shí hkyô banshoq[†] lé, nungmoq myàng kôjáng, Yhang gi, chyáng bê nghut mù, hkúmdong má lhang nghut nyi bê hkyô lé, nungmoq sé lo keq.

34 Ngò, nungmoq lé teng za taí kólé, shí pyat má é byu pé a ban shi byuq shimá, haù hkyô pé[‡] banshoq dut byuq rá nghut lhê.

35 Mauhkúng eq myigùng gi, a joq lo dut byuq rá nghut lhê; nghut kôlhang, Ngá é dang gi, ru joq nyi rá nghut lhê.

Haù Buinyi Eq Ahkyíng Lé, Ó Le A Sé
Mrk 13:32-37; Luk 17:26-30, 34-36;
12:35-48

36 Buinyi eq ahkyíng haù lé gi, ó yuq le a sé; mauhkúng htoq má é maumang lagyó pé lhang a sé; haù Zo le a sé; haù Íwa za ru sé lhê.

37 Noaq é tsín pyat má dut é su, haù Byu Yhangzo lé lo é hkùn le, dut rá nghut lhê.

38 Hkâsu mù gâ le, dowuí a dítng shí é buinyi pé má, byu pé gi, Noaq, wui-sanghpo mó hkaù má wang é hkùn jé shoq, zo zo shuq shuq, myi byi myi yú, kut nyi bum akò nghut ri;

39 yhangmoq gi, dowuí dítng lô mù, yhang-moq banshoq lé ùm sat pyám é hkùn jé shoq, haí dut lò rá lé, a sé kó dut bùm é su, haù Byu Yhangzo lé lo é hkùn le, dut rá nghut lhê.

40 Haù hkùn, yò má rahá nyi tò é byù í yuq má é rayuq gi, shuí yu é hui mù, rayuq gi, myit gyó to rá nghut lhê.

☆ 24:15 Dan 9:27; 11:31; 12:11 * 24:20 Israelaq mau má gi, gyoqmyò lé hkyô htoq le gyai wuìhke é ahkyíng nghut lhê. ☆ 24:29 Esai 13:10; 34:4 † 24:33 *Shí hkyô banshoq* gâ é gi, Yesuq jé lé rá hí má dut rá hkyô pé lé taí é nghut lhê. ‡ 24:34 *Haù hkyô pé gâ* é gi, Yerusalem noqkuq yhám htên byoq rá lé taí é nghut lhê.

⁴¹ Luqlúí chòm láng nyi é myiwe í yuq má é rayuq gi, shuí yu é hui mù, rayuq gi, myit gyó pyám to rá nghut lhé.

⁴² Haú su mù, haú nungmoq é Yhumsing gi, hká nyi jé lé lò rá lé, nungmoq a sé kô é yanmai, sidiq machya nyi keq.

⁴³ Myín hká u má hkau sú jé lé lò rá lé, yhumsing sé é ru nghut le gi, yhâng é yhúm má a wó hput wâng nhâng loshoq, yhang machya nyi rá nghut é lé, nungmoq sé gyó nyi keq.

⁴⁴ Haú mù, nungmoq le rì rì nghut nyi keq; hkásu mù gà le, haú Byu Yhangzo gi, a bún nung má jé lé lò rá nghut lhé.

⁴⁵ Yhumsing hpô é dui-nhâng zoshâng wui lé, uphkâng rá eq ahkying jé jáng zoshuq gám byi rá matú, yhumsing hpô eq mù nhang tó é, lhumzui lui, hpaqchyí bo é dui-nhâng zoshâng gi, ó yuq nghut rá lú?

⁴⁶ Yhumsing hpô dum tau lo é hkún, haú su kut nyi láng é dui-nhâng zoshâng gi, hkungsô wó nyi ri.

⁴⁷ Ngò, nungmoq lé teng za tái kôlé, yhumsing hpô haú gi, yhâng é sutzè ban-shoq, dui-nhâng zoshâng haú yuq lé ap to rá nghut lhé.

⁴⁸ Nghut kôlhâng, laq má mù, dui-nhâng zoshâng haú yuq gi, agé ashop sú nghut lui, 'Ngá é yhumsing hpô jé lò rá gyai myáng ashí.' ga, yhâng é i-myt unghkau má myit yù mù,

⁴⁹ gotú dui-nhâng zoshâng luzúm wui lé nhuq bat é htoq agó, í shuq wut bang eq ráhá zo zo shuq shuq kut nyi é nghut le gi,

⁵⁰ dui-nhâng zoshâng hau é yhumsing hpô gi, yhang a myitngam tó é buinyi eq yhang a sé tó é ahkying má jé lò mù,

⁵¹ yhang lé jap pyám lui, gegùn labyoq kut bang hkám zô é, ngaubiyi ngau nhap eq zui kyik kyik shoq hpuzô nyi rá jowó má hkyô pyám rá nghut lhé.

25

Zomyi Raxé Yuq Lé Dangtú Yu É Hkyô

¹ Haú hkún, mauhkung mingdán gi, myi-bung yu chûng mù, lusik lé te yù rá ga, htoq e ló é zomyi raxé yuq eq púng rá nghut lhé.

² Haú bang má, ngo yuq gi, nhik a gyíng kó; ngo yuq gi, nhik gyíng akó nghut ri.

³ Haú nhik a gyíng é bang gi, myibung yu chûng kôlhâng, xú a yu chûng kó nghut ri.

⁴ Nghut kôlhâng, haú nhik gyíng é bang kúm gi, yhangmoq é myibung lé le, xú bo é bông lé le yu chung akó nghut ri.

⁵ Lusik jé lé lò rá myáng nyi é yanmai, yhangmoq banshoq bang gi, yhup mui lò kômù, yhup myhí byuq bekô nghut ri.

⁶ Myín gunggám jé jáng, 'Lusik jé bê ô! Yhang lé te yù rá matú, htoq lé lò keq hkoi ô!' ga, garú é hté htoq lo ri.

⁷ Haú hkún, zomyi haú bang banshoq gi, toq lò mù, yhangmoq é myibung lé hen lajáng akó nghut ri.

⁸ Haú nhik a gyíng bang gi, 'Ngamoq lé, xú ratsuí byi kó laq; hkásu mù gà le, ngamoq é myibung shi lò nyi ri.' ga, haú nhik gyíng bâng chyáng dúng akó.

⁹ Haú hkún, haú nhik gyíng bang gi, 'Nungmoq eq ngamoq é matú ga jáng, luq rá a nghut. Haú mù, nungmoq é matú, xú ung bâng chyáng é wui yù keq.' ga tú tái kat akó.

¹⁰ Yhangmoq, xú wui é ló kô é hkún, lusik gi, jé lé lò mù, haú rì rì hen tó é zomyi wui gi, yhang eq ráh myiháng pói má wang ló bekô. Hkum le myhí byuq bê nghut ri.

¹¹ Hau htâng má, hau htâng gyó tó é zomyi wui gi, tau jé lò kômù, 'Yhumsing é! Yhumsing é! Ngamoq lé, hkum hpóng byi laq ô!' ga tái akó.

¹² Nghut kôlhâng, haú lusik gi, 'Ngò, nungmoq lé teng za tái kôlé, nungmoq lé ngò a sé.' ga tú tái kat ri.

¹³ Haú mù lui, haú Byu Yhangzo jé lé rá buinyi eq ahkying lé, nungmoq a sé kô é yanmai, sidiq machya nyi keq.

Dui-nhâng Zoshâng Sum Yuq Lé, Dangtú Yu É Hkyô

Luk 19:11-27

¹⁴ Mauhkung mingdán gi, byu rayuq byin we htoq rá hen nyi é nghut mù, yhâng é dui-nhâng zoshâng wui lé wut yù lui, yhâng é sutzè lé ap byi tó sú eq pung ashí nghut ri.

¹⁵ Yhang gi, yhangmoq é a-tsam má châng lui, rayuq lé gi, ngùn ngo joi, rayuq lé gi, í joi, htâng rayuq lé gi, rajoi kut byi tó mù, byin we shut htoq ló byuq bê nghut ri.

¹⁶ Ngùn ngo joi wó yù sù gi, haú hkún jáng htoq ló mù, hpugá gá lui, ngùn ngo joi wó myat yù bê nghut ri.

¹⁷ Haú eq rajung za, ngùn í joi wó yù sù le, í joi wó myat yù bê nghut ri.

¹⁸ Nghut kôlhâng, rajoi za wó yù sù gi, htoq e ló mù, myigùng má du lui, yhâng yhumsing hpô é ngùn lé haq myhup tó ri.

¹⁹ Hau htâng tsómra myáng jáng, dui-nhâng zoshâng haú bâng é yhumsing hpô gi, dum tau jé lò mù, yhangmoq é ngùn chyaráng lé, lo jep ri.

²⁰ Ngùn ngo joi wó yù sù gi, amyat ngo joi lé le yu lé lò mù, 'Yhumsing é, nàng, ngo lé, ngùn ngo joi ap tó é nghut lhé. Wú aq, amyat ngo joi wó ho jat yù bê.' ga tái ri.

²¹ Haú hkún, haú yhumsing hpô gi, 'Ará! Nghut bê. Nàng gi, kyet é eq lumgíng é dui-nhâng zoshâng nghut ri! Tiq é mù má lhang wó lum é sù nghut é yanmai, ngò, nang lé, kô é mù lé le ap byi rá nghut lhé. Nàng yhumsing hpô é gabú hkyô má bo wang lòm aq hkoi!' ga tú tái ri.

²² Haú eq rajung za, í joi wó yù sù le, lé lò mù, 'Yhumsing é, nàng, ngo lé ngùn í joi ap tó

é nghut lhê. Wú aq, amyat í joi wó ho jat yú bê.' ga, lé tái ri.

²³ Háu hkûn, háu yhumsing hpó gi, 'Arâ! Nghut bê. Nàng gi, kyet é eq lumging é dui-nhâng zoshâng nghut ri! Tiq é mù má lhâng wó lum é sù nghut é yanmai, ngò, nang lé, kô é mù lé le ap byi rá nghut lhê. Nàng yhumsing hpô é gabú hkyô má bo wang lóm aq hkoi!' ga tú tái ri.

²⁴ Háu htâng, rajoi wó yú sù le, lé lô mù, 'Yhumsing ê, nàng gi, byù wui nghut mù, yhumsing a hô tô é jang má é shù yù nau é htoq agó, yhumsing, kyôshi a sân hkyô tô é jang má é tsing yù nau sù nghut é lé, ngò sé lhê.

²⁵ Háu mù, ngò gi, gyuq luí, htoq é mù, náng é ngùn lé, myigùng má é haq myhup tô é nghut lhê. Wú aq, shí gi, nàng é ngùn nghut lhê.' ga tái ri.

²⁶ Háu mù, yhumsing hpó gi, yang lé, 'Agè ashop é eq lagón é dui-nhâng zoshâng ê! Ngò gi, yhumsing a hô tô é jang má é shù yù nau é eq, yhumsing, kyôshi a sân hkyô tô é jang má é tsing yù nau sù nghut é lé, nàng sé to gù nghut le nhing,

²⁷ ngá é ngùn lé, ngò dum tau jé lô jáng, aráng eq amyat wó yú shoq, ngùn hpùn kat jang má, hai mù a kat tô é thú?

²⁸ Háu mù, háu ngùn rajoi lé, náng chyáng mai yú luí, raxê joi wó to sù lé, byi pyám nhâng rá nghut lhê.

²⁹ Hkâsu mù gâ le, wó sù ó yuq lé nghut kôle, yang agùn agó wó rá matú, jat byi rá nghut lhê. A wó su chyáng mai kúm gi, yang wó tô é lé lhâng yu pyám byi shirâ nghut lhê.

³⁰ Háu mù, háu akyú a bo é dui-nhâng zoshâng lé gi, ngaubyi ngaù nhap eq zui kyik kyik shoq hpuzô nyi rá jowò nghut é, shinggan mauchut hkaú má dú htoq pyám keq.' gâ ri.

Sau Eq Bainám

³¹ Háu Byu Yhangzo gi, Yhâng é hpungwup shinggang mai, maumang lagyo lhunglhâng bang eq rahá jé lé lo é hkûn, Yhâng é hpungwup shinggang bo é hkohkâm-tanghkuq htoq má zùng rá nghut lhê.

³² Háu hkûn, byù myú chângiup gi, Yhâng é hí má zing lé lo bùm kó rá nghut mù, Yhang gi, sau zúng sú mai, sau eq bainám lé gotú tú kut gam hkoq é su, byu pé lé gam hkoq pyám rá nghut lhê.

³³ Yhang gi, sau pé lé, loqyo hkyam shut, bainám pé lé, loqpaí hkyam shut kut, nyhi to rá nghut lhê.

³⁴ Háu htâng má, háu Hkohkâm gi, Yhâng é loqyo hkyam shut má é bang lé, 'Ngá Wâ chyáng má é shimân jeju hkam yu é hui bang é, lé keq; mingkan lé hpan é hkûn mai,

nungmoq é matú ga hen lajâng tô é mù mingdán má wang lô keq.

³⁵ Hkâsu mù gâ le, Ngò zòmut é u lé, nungmoq, Ngo lé byi tso kô é nghut lhê; Ngò wushit é u lé, nungmoq, Ngo lé byi huq kô é nghut lhê; Ngò bíng kut wún é u lé, nungmoq, Ngo lé lhom hkulum yù kô é nghut lhê;

³⁶ Ngò gùngchín dut é u lé, nungmoq, Ngo lé byi hut kô é nghut lhê; Ngò nòhpyo huí é u lé, nungmoq, Ngo lé wú gon kô é nghut lhê; Ngò htóng lúng é u lé, nungmoq, Ngo lé lé kum kô é nghut lhê.' ga tái rá nghut lhê.

³⁷ Háu hkûn, háu dingmán bang gi, Yhang lé, 'Yhumsing ê, Nàng zòmut huí é lé, ngamoq, hkâ-nhám myàng luí, byi tsò wú é thú? Nàng wushit é lé, ngamoq, hkâ-nhám myàng luí, byi huq wú é thú?

³⁸ Nàng bíng kut wún é lé, ngamoq, hkâ-nhám myàng luí, lhom hkulum wú é thú? Nàng gùngchín dut é hkûn, ngamoq, hkâ-nhám byi hut wú é thú?

³⁹ Nàng nòhpyo huí é lé le, htóng lúng é lé le, ngamoq, hkâ-nhám myàng luí, lé gon lé kùm wú é thú?' ga myi kó rá nghut lhê.

⁴⁰ Háu hkûn, háu hkohkâm gi, 'Ngò, nungmoq lé teng za tái kôle, shí, Ngá gumang wui má é je tiq sù lé, nungmoq kut byi é hkyô hai le, Ngo lé kut byi é nghut bê.' ga tú tái rá nghut lhê.

⁴¹ Háu htâng má, Yhang gi, Yhâng é loqpaí hkyam shut má é bang lé, 'Dingnyé wó é bang é, Ngá chyáng mai gâng lô mù, nat Tsadán eq yhâng é maumâng pé é matú hen tô é, ahtum abyuq é myi má wang lô keq.

⁴² Hkâsu mù gâ le, Ngò zòmut é u lé, nungmoq, Ngo lé a byi tso kó; Ngò wushit é u lé, nungmoq, Ngo lé a byi huq kó;

⁴³ Ngò bíng kut wún é u lé, nungmoq, Ngo lé a lhom hkulum yù kó; Ngò gùngchín dut é u lé, nungmoq, Ngo lé, mebu a byi hut kó; Ngò nòhpyo huí é eq htóng lúng é u lé, nungmoq, Ngo lé a gon kó nghut ri.' ga tái rá nghut lhê.

⁴⁴ Háu hkûn, yangmoq gi, 'Yhumsing ê, nàng zòmut wushit é, bíng kut wún é, gùngchín dut é, nòhpyo huí é eq htóng lúng é lé, ngamoq, hkâ-nhám myàng luí, a wú gon kut wú é thú?' ga tái myi kó rá nghut lhê.

⁴⁵ Háu hkûn, Yhang gi, 'Ngò, nungmoq lé teng za tái kôle, shí bang má é je tiq sù lé, nungmoq, a kut byi é hkyô hai le, Ngo lé a kut byi é nghut bê.' ga, yangmoq lé tú tái rá nghut lhê.

⁴⁶ Háu mù luí, háu bang gi, ahtum abyuq mara dam byi é má wang lô kó rá nghut lhê; háu dingmán bang kúm gi, ahtum abyuq é asak má wang lô kó rá nghut lhê." ga Yesuq tái ri.

26

Yesuq Lé, Sat Râ Da Kô É Hkyô

Mrk 14:1-2; Luk 22:1-2; Yhn 11:45-53

¹ Yesuq gi, hau hkyô pé lé ban tai é htang má, Yhang é chángzô pé lé,

² "Nungmoq sê tô é eq rajung za, í nyí lai é htang má, Lhoqlhai Poi jé rá ngut mù, hau Byu Yhangzo gi, tapzing má jén sat é hui rá matú, ap pyâm é hui rá ngut lhê." ga tai ri.

³ Hau ú lé, hkyangjong agyi pé eq suwún wui gi, Kayahpaq gâ é hkyangjong mó rayuq é yhumwàng má zup zing to kômù,

⁴ Yesuq lé haq chyup yú rá eq sat pyâm rá hkyô lé, hpyê lhùm bum akò ngut ri.

⁵ Ngut kôlhang, yhangmoq gi, "Byu pé gabyông lò kó abe, poi gyoro má gi, a kut shi shàng." ga, tai lhùm akò ngut ri.

Yesuq, Xú Hut Gyun Hui É Hkyô

Mrk 14:3-9; Yhn 12:1-8

⁶ Yesuq gi, Behtani wá má nyi é manggâm dap wú sú Simûn é yhùm má nyi tô é hkûn,

⁷ myiwe myhi rayuq gi, gyai hpau é namngón xú bo é luq hpyû bông yu lé lô mù, Yesuq zo shuq nyi é hkûn, namngón xú hau lé, Yhang é ulhum má hut gyun byi ri.

⁸ Hau hkyô lé, hau chángzô pé myàng kôjáng, wú nhik-yo kômù, "Hai mù lui, hau lé aha agò kut pyâm lhê lhu?"

⁹ Xú hau lé, ahpau myo myô èq ûng pyâm mù, myùng bang lé byi le ge lhê mhai!" ga tai kat akò.

¹⁰ Yesuq gi, hau hkyô lé sé lui, "Hai mù, myiwe zo hau lé, i-myt lhoq myô nyi akò lhu? Yhang gi, Ngá é ahtoq má ge é hkyô kut bê ngut ri.

¹¹ Hau myùng bang gi, nungmoq eq rahá hkâ-nhám le nyi rá ngut lhê; ngut kôlhang, Ngò gi, nungmoq eq rahá ayang nyi nyi rá sú a ngut.

¹² Yhang, Ngá gûng má namngón xú hut gyûn é gi, Ngá gûng lé yhum rá matú, hen lajang é hkyô ngut ri.

¹³ Ngò, nungmoq lé teng za tai kôlé, hau gabú danglù lé, mingkan gón hko kyô é jowò hkangmó má, yhang lé myit bún é dông, yhang kut é hkyô shí lé, tai kyo bekò rá ngut lhê." ga tai kyo ri.

Yesuq Lé, Yudaq Èq Ung Zô Pyâm É Hkyô

Mrk 14:10-11; Luk 22:3-6

¹⁴ Hau htâng, hau chángzo raxe í yuq má bo é Yudaq Iskarut ga sú gi, hkyangjong agyi pé chyáng è mù,

¹⁵ "Ngò, Yesuq lé nungmoq é loq má ap byi é ngut jáng, nungmoq, ngo lé hai byi kó rá lhu?" ga myi ri. Hau mù, yhangmoq gi, yhang lé ngùn denggá sum xê chap nghap byi akò.

¹⁶ Hau hkûn mai, Yudaq gi, Yesuq lé ap pyâm rá hkyô ho nyi bê ngut ri.

Yhumsing É Myinzang

Mrk 14:12-26; Luk 22:7-23; Yhn 13:21-30

¹⁷ Múnci a kat é Muk Zo Poi sâng-hi nyí má, hau chángzô pé gi, Yesuq chyáng lé lô kômù, "Nàng zo rá Lhoqlhai Poi zoshuq lé, ngamoq hkâmá món to rá lhu?" ga myi akò.

¹⁸ Hau mù, Yhang gi, "Myuq hkaú shut wang lô mù, byù rayuq chyáng bê; Ngá é chángzô pé eq rahá, Ngò, náng é yhùm má Lhoqlhai Poi kut rá ngut lhê." gâ Sará tai ri ngù, è tai keq." ga pying kat ri.

¹⁹ Hau mù, hau chángzô pé gi, Yesuq pying kat é eq rajung za é tai kômù, Lhoqlhai Poi lé món to bekò ngut ri.

²⁰ Myinhâng jé lô jáng, Yesuq gi, hau chángzo raxe í yuq eq rahá, zohpoq má zung tô ri.

²¹ Yhangmoq zô nyi bùm kô é ú lé, Yesuq gi, "Ngò, nungmoq lé teng za tai kôlé, nungmoq má é rayuq sú gi, Ngo lé ap pyâm rá ngut lhê." ga tai ri.

²² Hau hkûn, yhangmoq gi, gyai gyô yón kômù, rayuq htâng rayuq, "Yhumsing è, ngò a ngut hkaí?" ga, Yhang lé chòm myi akò.

²³ Hau hkûn, Yesuq gi, "Ngò eq rahá, hkoq shí má loq lap bê sú gi, Ngo lé ap pyâm rá sú ngut lhê.

²⁴ Hau Byu Yhangzo gi, Yhang eq séng lui kâ tô é eq rajung za, shí rá za ngut lhê. Ngut kôlhang, hau Byu Yhangzo lé ap pyâm é sú gi, dingnyé wó ri; hau yuq gi, a hku lé le lhang, je ge ri." ga dum tai kat ri.

²⁵ Hau htâng, Yhang lé ap pyâm rá sú, Yudaq gi, "Rabai è, ngò a ngut hkaí?" ga myi jáng, Yesuq gi, "Nàng ngut ri." ga tú tai kat ri.

²⁶ Yhangmoq zô nyi kô é ú lé, Yesuq gi, muk lé yù mù, jeju hkya-on lui, muk lé myhik hpé mù, "Shí gi, Ngá é gungsho ngut lhê; yù mù zo keq." ga tai uchyang, Yhang é chángzô pé lé gàm byi ri.

²⁷ Hau htâng, Yhang gi, góm lé le, yù mù, jeju hkya-on lui, yhangmoq lé byi mù, tai é gi, "Nungmoq banshoq bang, shuq keq.

²⁸ Shí gi, yubak mara hkyut pyâm byi rá, byù myo myô é matú htoq pyâm é, dangshikaq eq séng é Ngá sui ngut lhê.

²⁹ Ngò, nungmoq lé tai kôlé, ahkuí mai gi, Ngò, Ngá Wá é mingdán má, nungmoq eq rahá tsibiyiq wing asik lé shuq é buinyi a jé jé, tsibiyiq wing lé dum shuq rá a ngut lo." ga tai ri.

³⁰ Yhangmoq gi, hkya-on mahkôn ralhùm ban hkôn jáng, Tsanlun Bùm shut htoq e lô bekò ngut ri.

Petruq He-ngik Rá Lé, Te Tai É Hkyô

Mrk 14:27-31; Luk 22:31-34; Yhn 13:36-

38

³¹ Hau htâng má, Yesuq gi, yhangmoq lé, "Nungmoq lhunglhang bang gi, hkú-myín

yang jáng, Ngá é yanmai, myit lingbat kó rá ngut lhê; hkâsu mù gà le,
'Haù sau zúng sù lé, Ngò bat sat pyám mù,
sau hpúng mà é sau pé gi, lhoq pyo
pyám é hui kó rá ngut lhê."³²
ga kâ tó ri.

³² Ngut kôlhang, Ngò gi, lhoq dui toq é hui
htâng má, Galile mau shut, nungmoq é hí
má e ló láng rá ngut lhê." ga ri.

³³ Haù hkûn, Petruq gi, "Náng é yanmai,
góbang banshoq myit lingbat kôlhang, ngò gi,
hkâ-nhám le myit lingbat rá a ngut." ga tũ
taí ri.

³⁴ Yesuq gi, "Ngò, nang lé teng za taí lé,
hkû-myín yang jáng, woq a tũn shimá, náng,
Ngo lé sum dâm he-ngik pyám rá ngut lhê."
ga tũ taí ri.

³⁵ Ngut kôlhang, Petruq gi, "Ngò, Náng eq
rahá shí rá dut kôlhang, Nang lé ngò he-ngik
pyám rá a ngut." ga sai taí ri. Haù chángzò
pé góbang banshoq le, haù su ga châng taí
bum akó ngut ri.

*Get-samane Gà É Jowò Má Kyúdung É
Hkyô*

Mrk 14:32-42; Luk 22:39-46

³⁶ Haù htâng má, Yesuq gi, Yhâng é
chángzò pé eq rahá Get-samane gà é jowò
má é kômù, yangmoq lé, "Ngò, hé má é mù,
kyúdung nyi é u lé, nungmoq shí má zùng
láng keq." ga taí ri.

³⁷ Yesuq gi, Petruq eq Zebedi yangzò
nhik lé shuí chùng ri. Yang gi, myit gyai
a ngón é eq myit wui nhik hkyik dut lò bê
ngut ri.

³⁸ Haù htâng, Yang gi, yangmoq lé, "Ngò
gi, shí rá í yang myit yón nyi ri; nungmoq
gi, Ngò su machyá luí, shí má láng nyi keq."
ga taí ri.

³⁹ Yesuq gi, haù mai ratsuí zo sô é mù,
myigùng má ngóm gop to luí, "Áwa ê, wó
dut é ngut le gi, góm* shí lé, Ngá chyáng
mai lhai pyám byi laq. Ngut kôlhang, Ngò ô
nau é dông a ngut, Náng ô nau é dông sheq
ngut sháng gaq." ga kyúdung ri.

⁴⁰ Haù htâng, Yang gi, Yhâng é chángzò
pé chyáng dum taù lo le, yangmoq yhup
myí to kó é lé lo myàng ri. Haù mù, Yang
gi, Petruq lé, "Nungmoq gi, hkyíng hkum
rahkum za lháng, Ngò eq rahá a wó machya
nyi kó lúh?

⁴¹ Gunglau é a hui sháng gaq, machyá luí,
kyúdung nyi keq. Haù woi-nyi gi, kãm nyi
kôlhang, gungsho gi, wum nyhôm nyi ri." ga
taí ri.

⁴² Yang gi, radám dum é mù, "Áwa ê, góm
shí lé, Ngò a shuq é a wó lai rá ngut jáng gi,
Náng ô nau é dông ngut sháng gaq hkoi." ga
kyú dum dúng ri.

⁴³ Yang dum taù lo le, yangmoq gi,
myoqkuq lai kó é yanmai, yhup myí to láng
kó é lé, lo dum myàng ri.

⁴⁴ Haù mù, Yang gi, yangmoq lé tò pyám
to mù, sum dâm ngù rá dâm dum é luí, hí lé
dùng é dang lé roq é dum dúng ri.

⁴⁵ Haù mù, Yang gi, haù chángzò pé
chyáng dum taù jé lô mù, yangmoq lé,
"Nungmoq gi, ahkuí jé shoq yhup ngón nyi
ashí kó lúh? Wú keq! Haù ahkyíng gi, jé bê
ngut luí, haù Byu Yangzò gi, yubak dap
bàng é loq má ap pyám é hui rá ngut bê.

⁴⁶ Toq keq! Ló losháng hkoi! Ngo lé ap
pyám rá sù gi, jé lé bê ngut ri." ga taí ri.

Yesuq, Chyup Yü Hui É Hkyô

Mrk 14:43-50; Luk 22:47-53; Yhn 18:3-12

⁴⁷ Yesuq, dâng nyo nyi ashí u lé, haù
chángzò raxe í yuq má bo é Yudaq gi, jé lé
lo ri; haù hkyangjong agyi pé eq mingbyu
é suwún wui chyáng mai nhang kat é bang
ngut é, shâm eq dumbáng pé chung tò é byù
moq mó le, yang eq rahá ngut akó.

⁴⁸ Yesuq lé ap pyám rá sù gi, haù bang lé,
"Ngò, bopuq puq é sù gi, haù yuq ngut bê;
Yang lé chyup yú keq." ga kumlhá byí tò ri.

⁴⁹ Yudaq gi, Yesuq chyáng hkyê za ê mù,
"Rabai é, wángzán nyi lhê lúh?" ga taí luí,
Yang lé bopuq puq byí ri.

⁵⁰ Haù hkûn, Yesuq gi, "Buinùm hpó é,
nàng kut rá muzó lé kut aq hkoi." ga tũ taí
kat ri.

Haù htâng, yangmoq gi, hí shut hui é luí,
Yesuq lé chôm zuí zìng mù, chyup yú bekó
ngut ri.

⁵¹ Haù mù, Yesuq eq rahá nyi bang má é
rayuq gi, shâm she htoq yú mù, hkyangjong
mó é dui-nhâng zòshang é nohkyap lé pyoq
hkyô kat byi bê ngut ri.

⁵² Haù jáng, Yesuq gi, haù yuq lé, "Náng é
shâm lé, xâng pyám aq; hkâsu mù gà le, shâm
shê sù gi, ó yuq ngut kôle, sham eq shí rá
ngut lhê.

⁵³ Ngò gi, Ngá Wa lé dung jáng, Yang gi,
radá dâm, maumang lagyo dap pé raxe í dap
htoq myo shoq nhang kat byí rá ngut é lé,
nungmoq a sé kó lúh?

⁵⁴ Ngut kôlhang, haù su ngut é ngut
jáng, shí hkyô dut lò rá ngut lhê ga
Chyúmdang pé má bò tò é hkyô gi, hkâsu wó
dik lò rá lúh?" ga taí kat ri.

⁵⁵ Haù htâng, Yang gi, byù moq lé, "Nung-
moq gi, damyaq rayuq lé chyup é su, Ngo lé
chyup rá matú, shâm eq dumbáng pé chùng
mù, lé lo akó lúh? Ngò gi, nyí wuí, noqkuq
yhúm má zùng mù, mhòqshít nyí kôlhang,
nungmoq, Ngo lé a chyup yú kó é ngut lhê.

⁵⁶ Ngut kôlhang, shí su dut é hkyô pé
banshoq gi, haù myightoi pé kâ tò é hkyô pé
lo dik rá matú dut é ngut ri." ga taí ri. Haù

* 26:39 Góm gà é gi, Yesuq, jamjau hui rá hkyô eq shí rá hkyô lé, taí nau é ngut lhê.

hkûn, haù chángzô pé banshoq gi, Yesuq lé tô pyâm to kôluí, hpang byo byuq bekô nghut ri.

Yudaq Byìn Tú Wapdoq Má Jep Huí É Hkyô

Mrk 14:53-65; Luk 22:54-55, 63-71; Yhn 18:13-14, 19-24

⁵⁷ Yesuq lé chyup yu é bang gi, haù tarâ sará pé eq suwún wuí zup zîng nyi é jang, hkyangjong má Kayahpaq é yhùm má, Yhang lé shuí e akô.

⁵⁸ Petruq gi, hkyangjong mó é yhumwàng hkaù má châng jé wàng shoq, we we mai Yesuq htâng châng tô ri. Yhang gi, hkâsu dut lò rà lé myàng naù luí, wàng hkaù má wang é mù, zung bang eq rahá zung tô ri.

⁵⁹ Haù hkyangjong agyi pé eq Yudaq byìn tú wapdoq má é góbang gi, Yesuq lé sat pyâm nhâng rà matú, a têng é saksé ho nyi akô.

⁶⁰ A têng é saksé myo myo htoq lô kôlhang, wó sat rà í é saksé a myàng kô nghut ri.

Ló htàng má, byù í yuq gi, lé lô kômù,
⁶¹ "Shí yuq gi, 'Ngò gi, haù Garai Gasâng é noqkuq yhùm lé lhoq hten pyâm mù, sum nyi gyoro má dum wó sai lhê,' ga tai sù nghut ri." ga tai akô.

⁶² Haù hkûn, haù hkyangjong mó gi, toq yap mù, "Nàng, hai le a tú tai luq? Shí bang, Nang lé mara hun nyi é saksé gi, hkâ dong nghut lhê lú?" ga, Yesuq lé myí ri.

⁶³ Nghut kôlhang, Yesuq gi, jit le a ga nyi tô ri.

Haù mù, hkyangjong mó gi, Yhang lé, "Haù rú dui nyi é Garai Gasâng é myìng lé lang luí, ngò, Nang lé myí wú lé: Nàng gi, Garai Gasâng é Yhangzô, Hkrisduq nghut lhê luq, ngamoq lé tai kyô wú aq." ga tai jáng,

⁶⁴ Yesuq gi, "Nàng tai é eq rajung za nghut lhê. Ngò, nungmoq banshoq lé tai kôlé, nungmoq gi, ahkuí mai htàng hpyang má, haù Byu Yhangzô gi, a-tsam bo dik Su é loqyo hkyam má zung tô é lé le, mhuthtui ji mù, mauhkung mai lé lo é lé le, nungmoq myàng kô rà nghut lhê." ga tai ri.

⁶⁵ Haù hkûn, hkyangjong mó gi, yhang é bu lé lãng cheq pyâm mù, "Yhang gi, Garai Gasang lé rhoi dang tai bê nghut ri! Nga-nhung, hai saksé rà ashí lú? Yhang, Garai Gasang lé rhoi dang tai é lé, nungmoq, ahkuí wó gyo bekô nghut lhê.

⁶⁶ Nungmoq hkâsu wó myit akô lú?" ga myi jáng, yhangmoq gi, "Yhang gi, shí gíng sù nghut lhê." ga tú tai akô nghut ri.

⁶⁷ Hau htàng má, yhangmoq gi, Yesuq é myoqdong má sôkan byé gyun luí, loqtsup èq htui byí akô nghut ri. Góbang gi, Yhang lé bo-pyuq pyuq byi luí,

⁶⁸ "Hkrisduq Nàng, Nàng lé bat sù ó yuq nghut é lé, myiqhtoi htoi wú aq." ga tai akô.

Yesuq Lé, Petruq He-ngik Pyâm É Hkyô
Mrk 14:66-72; Luk 22:56-62; Yhn 18:15-18, 25-27

⁶⁹ Petruq gi, wàng hkaù má nyi tô é u lé, dui-nhâng zoshâng myhí rayuq gi, yhang chyáng lé jé mù, "Nàng le, haù Galile byù Yesuq eq rahá nyi sù nghut ri." ga tai ri.

⁷⁰ Nghut kôlhang, Petruq gi, haù bang banshoq é hí má yhang, "Nàng hai tai nyi é lé, ngò a sé." ga he kat ri.

⁷¹ Hau htàng, yhang gi, wàng hkúmdong shut htoq e lò le, haù jowò má, dui-nhâng zoshâng myhí góyuq le, yhang lé myàng mù, "Shí yuq gi, Nazaret wà byù Yesuq eq rahá nyi sù nghut ri." ga, haù má é bang lé tai kat ri.

⁷² Haù hkûn, yhang gi, "Byù haù yuq lé, ngò a sé!" ga dakam é dong he pyâm ri.

⁷³ Hau htàng razup zo má, haù jowò má yap to bang gi, Petruq chyáng hui é kômù, "Nàng le, haù bang má bò sù yhang nghut ri; nãng é danghté lé sé gyô ri." ga tai akô.

⁷⁴ Haù hkûn, yhang gi, yhanggung yhang nhing luí, "Haù yuq lé, ngò a sé." ga dakam dang tai ri.

Haù-u yhang, woq tún bê nghut ri.

⁷⁵ Haù mù, Petruq gi, "Woq a tún shi má, nãng, Ngo lé sum dãm he pyáng rà nghut lhê." ga, Yesuq, yhang lé tai é dang lé, myit bûn kat mù, shinggan shut htoq é luí, gyai yhang é ngau ri.

27

Yudaq Juishi É Hkyô

Mrk 15:1; Luk 23:1-2; Yhn 18:28-32

¹ Napsûn noq le, hkyangjong agyi pé banshoq bang eq mingbyu é suwún wuí gi, Yesuq lé sat pyâm nhâng rà matú chôm myit hpyit yú bekô nghut ri.

² Haù mù, yhangmoq gi, Yhang lé tuí yù luí, shuí htoq é kômù, mauzau Pilat chyáng é ap byí akô nghut ri.

³ Yesuq lé ap pyâm é sù Yudaq gi, Yesuq lé jéyàng doqdan é hkyô lé myang sé jáng, nungngham wó mù, haù ngùn sum xê chap lé, hkyangjong agyi pé eq suwún wui chyáng lò dum tau byí ri.

⁴ Haù mù, yhang gi, "Mara a bò Su é sui lé, ngò ap pyâm bê nghut é yanmai, ngò mara wó bê." ga tai jáng, yhangmoq gi, "Haù hkyô, ngamoq eq hái sêng lhê lú? Haù gi, nãng eq sheq ru sêng lhê." ga lhom tai kat akô nghut ri.

⁵ Haù mù, Yudaq gi, ngùn haù lé, noqkuq yhùmhkaù má dù pyâm to luí, htoq lò mù, yhang gung yhang é juishi byuq bê nghut ri.

⁶ Haù hkyangjong agyi pé gi, ngùn chap haù pé kui yù luí, "Shí gi, sui hpau ngùn nghut lhê yanmai, alu sidek má a ge kat." ga tai akô.

⁷ Haù mù, yhangmoq gi, tûngbaù pê é lupdùng kut rà matú, au sai zo su é maumyí lé, ngùn hau èq wui hpyit yú rà đông, chòm myit hpyit to bekò nghut ri.

⁸ Hau é yanmai, ahkuí jé shoq, haù jowò lé, sui myigùng ga myhngtò akò nghut ri.

⁹ Haù gi, "Haù Israelaq byu pé mai, Yhang lé gù hpyit tò é ngùn sum xê chap lé, yhangmoq yù mù, haù Yhumssing Garai, ngo lé pying tò é eq rajung za,

¹⁰ haù au sai zo su é maumyí lé, yhangmoq wui yù bekò nghut ri." ga myiqhtoi Yeremiaq taí tò é dang lo dik é nghut ri.

Yesuq Lé, Pilat Myí Jep Wú É Hkyò

Mrk 15:2-15; Luk 23:3-5, 13-26; Yhn 18:33-19:16

¹¹ Haù u lé, Yesuq gi, mauzau hpò é hí má yap tò é nghut mù, haù mauzau hpó gi, Yhang lé, "Nàng gi, Yudaq byu pé é hkohkâm nghut lhê lú?" ga myí jáng, Yesuq gi, "Nàng taí é eq rajung za nghut lhê." ga tù taí ri.

¹² Haù hkyangjong agyi pé eq suwún wui gi, Yhang lé, mara hùn kôjáng, Yhang gi, haì le a tù taí nghut ri.

¹³ Haù hkùn, Pilat gi, Yhang lé, "Yhangmoq, Nang lé mara hùn saksé haù-í hkâm nyí kô é lé, Nàng a wó gyo lú?" ga sai myí ri.

¹⁴ Nghut kôlhang, Yesuq gi, dang rahkun lháng a tù taí é yanmai, haù mauzau hpó gi, gyai maù byuq bê nghut ri.

¹⁵ Haù Lhoqlhai Poí u lé, mingbyù wui ô nau é má cháng lú, haù mauzau hpó gi, htóng byù rayuq yuq lé nháng byí é htùng joq ri.

¹⁶ Haù u lé, a gè mying htoq é htóng byù, Barabaq ga sú rayuq nyi ri.

¹⁷ Haù mù, byù moq mó zup zing lò kô é hkùn, Pilat gi, yhangmoq lé, "Nungmoq é matú, hká yuq lé lhut byi nháng nau akò lú? Barabaq luq? Haù a nghut jáng, Hkrisduq gâ é Yesuq lé luq?" ga myí ri.

¹⁸ Yhang haù su ga myí é gi, yhangmoq, Yesuq lé manôn kôlú, yhang chyáng lé ap byi kô é hkyò lé sê é yanmai nghut ri.

¹⁹ Pilat gi, tará jéyáng tingnyáng htoq má zung tò ashí hkùn, yhangmyí gi, "Haù mara a bò Sú lé, haì le hkákut; hkásu mù gâ le, hkù-nyí za lháng, yhpumoq má, haù yuq é yanmai, ngò tsómra hpuzò pyám bê nghut lhê." ga, yhang chyáng dang pying kat ri.

²⁰ Nghut kôlhang, haù hkyangjong agyi pé eq suwún wui gi, Barabaq lé ðung htoq yù rà eq Yesuq lé sat pyám nháng rà matú, shiwa byu pé lé wum byi bekò nghut ri.

²¹ Haù mauzau hpó gi, "Shí í yuq má é hká yuq lé, nháng byi nháng nau akò lú?" ga myí jáng, yhangmoq gi, "Barabaq!" ga tù taí akò nghut ri.

²² Haù mù, Pilat gi, "Haù jáng gi, Hkrisduq gâ é Yesuq lé, ngò hkásu kut rà lú?" ga dum

myí kat jáng, yhangmoq banshoq bang gi, "Yhang lé tapzing má jén sat pyám aq!" ga dum tù taí akò nghut ri.

²³ Nghut kôlhang, yhang gi, "Haì mù lúí lú? Yhang gi, hai mara kut shut bê lú?" ga dum myí jáng, yhangmoq gi, hê mò éq, "Yhang lé tapzing má jén sat pyám aq!" ga je riyhang garù lo bum akò nghut ri.

²⁴ Pilat gi, hká đông le a dat kut lô é eq byu pé gabyông lò kó rà nghut é hkyò lé myàng lúí, uchyam yù mù, shiwa byu pé hí má loq chi lúí, taí é gi, "Shí yuq é sui gi, ngò eq haì a séng; nungmoq eq za ru séng lhê." gâ ri.

²⁵ Haù shiwa byù lhunglhang bang gi, "Yhâng é sui gi, ngamoq eq ngamoq é yhangzo yhangshù pé htoq má joq nyí sháng gaq." ga, dum tù taí kat akò nghut ri.

²⁶ Haù hkùn, Pilat gi, Barabaq lé nháng byi bê nghut ri. Yesuq lé kùm gi, nhuq bat nháng mù, tapzing má jén sat pyám rà matú ap byi kat bê nghut ri.

Yesuq Lé, Gyezò Pé Rhoi É Hkyò

Mrk 15:16-21; Yhn 19:2-3

²⁷ Hau htâng, mauzau hpò é gyezò pé gi, Yesuq lé, mauzau hpò é yhumwàng mó hkaù má shui wang lò kômù, Yhâng é lhinghkyuq má, gyedap gón lé jì tsing tò akò.

²⁸ Yhangmoq gi, Yesuq é mebu hkyut pyám byi kôlú, zam zam ne é buhng hut byi kômù,

²⁹ zujanmaù ralhum sai yù kôlú, Yhâng é ulhum má tsung byi akò nghut ri. Yhangmoq gi, jâm-yang rahkat lé, Yhâng é loqyo loq má kat byi kômù, Yhâng é hí má hkyihput htuoq kôlú, "Yudaq byu pé é hkohkâm hpò è! Chung hing xê hing nyi sháng gaq ô!" ga, jihpoi dang taí akò.

³⁰ Yhangmoq gi, Yhang lé sôkan byé gyun lúí, Yhâng é loq mai jâm-yang lú yù mù, Yhâng é ulhum má dum bat bat kut akò nghut ri.

³¹ Yhangmoq gi, Yhang lé rhoi jihkyoi ban kut yù kôjáng, Yhang wut tò é buhng lé hkyut yù kômù, Yhâng é mebu lé dum hut byi lúí, tapzing má jén sat pyám rà matú, Yhang lé shui htoq é ló bekò nghut ri.

Yesuq Lé Jén Pyám É Hkyò

Mrk 15:22-32; Luk 23:27-43; Yhn 19:17-27

³² Yhangmoq htoq e ló nyi le, Kuruni myuq byù nghut é Simun ga sú lé myàng kômù, yhang lé, zik lú tapzing waq nhang akò nghut ri.

³³ Yhangmoq gi, Golgahta gâ é jowò má jé é ló bekò nghut ri. Golgahta gâ é lichyùm gi, ugyap joq é jowò lé gâ é nghut lhê.

³⁴ Haù má jé jáng, yhangmoq gi, Yesuq lé, hkò jung eq nyhò tò é tsibiyiq wíng lé byi huq akò; nghut kôlhang, Yhang gi, haù lé chyam wú mù, a shuq byi kut pyám ri.

35 Yhangmoq gi, Yesuq lé tapzîng má jén tap tô é htâng, Yhâng é mebu lé lhâng, hkyîng shosé shé é dông gam yu pyâm byî akô.

36 Hau htâng, yhangmoq gi, hau jowò má zung to mù, Yhang lé zúng nyi akô nghut ri.

37 Yhâng é u htoq má, "SHÍ YUQ GI, YUDAQ BYU PÊ É HKOHKÂM, YESUQ NGHUT LHF." ga, Yhang lé mara hun é laiká ká tap tô akô.

38 Hau hkûn, Yhang eq rahá, damyaq í yuq lé le, Yhâng é loqpaî hkyam shut rayuq, loqyo hkyam shut rayuq kut, tapzîng htoq má jén tap tô akô nghut ri.

39 Hkyô sô lai lô é bang gi, nyhap é dông u-ngut ngut mù, tai kô é gi,

40 "Noqkuq yhûm lé hpyoq pyám lui, sum nyi gyoro má dum wó sai lhê ga Sú ê! Nang, Garai Gasâng é Yhangzo nghut le gi, Nang gûng nang hkyi yù lui, tapzîng mai gyó lo wú aq mhai!" ga akô nghut ri.

41 Hau eq rajung za, hkyangjong agyi pé, tarâ sará pé eq suwún wui le, Yhang lé rhoi jihkyoi kut mù, tai kô é gi,

42 "Shi yuq gi, góbang lé hkyi yù sù nghut kôlhâng, Yhânggûng yhang gi, a wó hkyi yù nghut ri myhi-nhung! Yhang gi, Israelaq byu pé é hkohkâm nghut lhê là! Ngamoq wó lumjîng rá matú, Yhang, tapzîng mai gyó lo wú sháng gaq.

43 Yhang gi, Garai Gasang lé lumhkaú sù nghut lhê mù, Garai ô nau é sù nghut le gi, ahkuí Yhang lé hkyi yù sháng gaq; hkâsu mù gâ le, Yhang gi, 'Ngò, Garai Gasâng é Yhangzo nghut lhê.' ga tai ri." ga bum akô nghut ri.

44 Hau eq rajung za, Yhang eq rahá tapzîng má jén to huí é damyaq í yuq le, Yhang lé rhoi dang tai akô nghut ri.

Yesuq Soqkâng Byit É Hkyô

Mrk 15:33-41; Luk 23:44-49; Yhn 19:28-

30

45 Nyi-káng raxe í hkyíng mai myinhâng sum hkyíng jé shoq, ramau gón mauchut tuq dut byuq bé nghut ri.

46 Myinhâng sum hkyíng kô má, Yesuq gi, "Eloi, Eloi, lama sabakhtani?" ga, htê mó eq garú kat ri. Hau é lichyúm gi, "Ngá Garai ê, Ngá Garai ê, Nang, hai mù, Ngo lé tô pyâm tô lhê lú?" gâ é nghut ri.*

47 Hau nám má yap tô é bang ra-am gi, hau lé wó gyo kôjáng, "Yhang gi, myiqhtoi Eliyaq lé wut nyi ri." ga tai akô.

48 Hau hkûn jáng, yhangmoq má é rayuq gi, din é ló mù, wuimá lé é yu ri. Yhang gi, hau lé tsibiyiq wing chyín má jum yù lui, jâm-yang má tuí tap mù, Yesuq shuq rá matú yhun byi ri.

49 Góbang gi, "Yhang lé, Eliyaq, lé hkyi yu lhê laq, nga-nhung chóm láng wú sháng." ga tai akô nghut ri.

50 Hau hkûn, Yesuq gi, htê mó eq dum garú kat lui, Yhâng é soqkâng byit bé nghut ri.

51 Hau u lé, hau noqkuq yhûm má é pán-gyang gi, ahtoq mai a-ô í hkyam byáng goq byuq bé nghut ri. Myigûng le nún lô mù, luqgok pé le goq byuq bé nghut ri.

52 Lup pé gi, bóng lô mù, shi byuq bé é chyoiyúng bang myo myo gi, lhoq dui é hui akô.

53 Hau bang gi, Yesuq dum dui toq é htâng, lup mai htoq lô kômù, chyoiyúng myuq* má wang é lui, byù myo myô hí má htoq shit akô nghut ri.

54 Shô up gyezau hpó eq, yhang eq rahá Yesuq lé zúng nyi é bang gi, layàng nún é eq dut lo é hkyô banshoq lé myàng kôjáng, gyuq dân kômù, "Yhang gi, gè gè yhang, Garai Gasâng é Yhangzo nghut ri-nhung!" ga tai akô nghut ri.

55 Myiwe wui myo myo le, we we mai wú nyi bum akô. Hau bang gi, Yesuq rá é má garúm rá matú, Galile mau mai Yhang htâng châng lé é bang nghut akô.

56 Hau bang má, Magadalaq wà má é Mariq, Yakuq eq Yose nhiktâng é yhângnu Mariq eq Zebedi é yhangzô nhiktang é yhângnú pé le bo akô nghut ri.

Yesuq Lé, Myhup Pyâm É Hkyô

Mrk 15:42-47; Luk 23:50-56; Yhn 19:38-

42

57 Myinhâng jé lô jáng, Yesuq é chángzo dut bé nghut é, sùt wó sù, Aramahti myuq byù Yosep ga sù lé lo ri.

58 Yhang gi, Pilat chyáng é mù, Yesuq é gungsóm lé é dung jáng, Pilat gi, yhang lé byi rá matú hkunmó hkyô kat bé nghut ri.

59 Yosep gi, gungsóm lé yù mù, pán yúng eq htup yup lui,

60 luqgok lé kyûng tô é, yhâng é lup sik hkaú má é kat tô ri. Hau htâng, yhang gi, luphkum má, luqlóng eq lhêng chí pyâm to lui, lô byuq bé nghut ri.

61 Magadalaq wà má é Mariq eq goyuq Mariq gi, lup hí má zung tô akô nghut ri.

Lup Zúng É Hkyô

62 Hau Hên Lajang Buinyi lai é htâng nyi lé, hkyangjong agyi pé eq Hparishe pé gi, Pilat chyáng é mù,

63 "Yhumsîng ê, Yhang, asak dui nyi ashí hkûn, 'Sum nyi ngûr rá buinyi má, Ngo dum dui toq lô rá.' ga, hau byù mhaú tai é dang lé, ngamoq bûn nyi lhê.

64 Hau mù, hau sum nyi ngûr rá buinyi jé shoq, lup lé rago za zúng nhang to aq. Hau a nghut jáng, Yhâng é chángzô pé, mâng lé lé hkaú yu lô mù, Yhang shi é mai dum dui toq lô bé ga, byu pé lé tai kó rá nghut lhê. Shí, lô

* 27:46 Hkya-on 22:1

* 27:53 Chyoiyúng myuq gâ é gi, Yerusalem wà mó lé gâ é nghut lhê.

htâng dàm mhaù é hkyô gi, sâng-hi dàm htoq je wui râ nghut lhê." ga, lé tai akô nghut ri.

⁶⁵ Haù hkûn, Pilat gi, "Nungmoq sê é đông, lup lé hai a dut loshoq, gyezô pé lé zúng nhang to keq." ga tû tai kat ri.

⁶⁶ Haù mù, yhangmoq gi, é luí, lup lé gau shoq ga, luqgok má dizik htung mù, lup zúng byu nyhi to bekô nghut ri.

28

Dum Dui Toq Lo É Hkyô

Mrk 16:1-8; Luk 24:1-12; Yhn 20:1-10

¹ Bánno buinyi lai jáng, rabat é sâng-hi nyi maubô zó má, Magadalaq wà mà é Mariq eq goyuq Mariq gi, lup má é wú râ ga, e ló akô.

² Haù hkûn, layàng mó nún lo ri; hkâsu mù gà le, Yhumsing Garaí é maumang lagyo rayuq gi, mauhkung mai gyó lé lô mù, lup má é luí, haù luqlong lé tu lheng mù, hau ahtoq má zung tô ri.

³ Yhâng é isâm gi, lhap su duqbô mù, Yhâng é mebu gi, gyo su hpyu zan tô ri.

⁴ Zúng nyi é bang gi, yhang lé lùm wú gyuq kômù, pyik pyik nân luí, shí gùng su dut bùm bekô nghut ri.

⁵ Haù maumang lagyo gi, myiwe haù nhik lé, "Hkâgyuq kó! Haù tapzing má jén sat huí é Yesuq lé, nungnhik ho nyi kô é lé, ngò sê lhê.

⁶ Yhang gi, shí má a nyi lo; Yhang tai tô é eq rajung za, lhoq dui toq é hui bê nghut ri. Yhang lé lhez é jowô lé, lé wú keq.

⁷ Haù mù, hân taù ló luí, Yhâng é chángzô pé lé, Yhang, shí é mai lhoq dui toq é hui bê nghut ri; nungmoq é hí má, Galile mau shut ló láng berâ. Nungmoq, Yhang lé, haù má ló myâng kó râ nghut lhê.' nghú ló tai kyo keq. Nungnhik lé, ngò tai é lé matsing chùng keq." ga tai kat ri.

⁸ Haù mù luí, myiwe myhí haù nhik gi, gyuq kôlhang, gyai gabú é myit eq lup mai hân taù ló mù, Yhâng é chángzô pé lé ló tai kyo râ matú, din ló bê nghut ri.

⁹ Haù hkûn, Yesuq gi, radá dâm yhangnhik lé lhom tê mù, "Wángzán nyi kó sháng gaq." ga tai ri. Haù mù, yhangnhik gi, huí é luí, Yhâng é hkyí má po zing to mù, Yhang lé noqkuq akô.

¹⁰ Haù hkûn, Yesuq gi, yhangnhik lé, "Hkâgyuq kó. Ngá é gumang wui lé, Galile mau shut e ló keq nghú ló tai kyo keq; haù má, yhangmoq, Ngo lé myàng kó râ nghut lhê." ga tai kat ri.

Zúng Nyi É Gyezô Pé Tai É Danglù

¹¹ Myiwe haù nhik hkyô má ru nghut nyi ashí le, lup zúng é gyezô pé ra-am gi, myuq hkaù má wang ló mù, dut lai lo é hkyô banshoq lé, haù hkyangjong agyi pé lé ló tai kyo akô nghut ri.

¹² Haù hkyangjong agyi pé gi, suwún wui eq huí lhum luí, hpyé lhum é htâng má, haù gyezô pé lé, ngùn myo myo tsup byi mù,

¹³ "Myín lé, ngamoq yhup myhí tô é hkûn, Yhâng é chángzô pé lé lô mù, mâng lé, lé hkaù yu ló bekô nghut ri.' nghú tai keq.

¹⁴ Shí hkyô lé, haù mauzau hpô wó gyô é nghut jáng, yhang myit ngón shoq, ngamoq tai râ nghut lhê; haù hkûn, nungmoq gi, hai manghkáng a htoq râ nghut lhê." ga tai kat ri.

¹⁵ Haù mù, gyezô pé gi, ngùn haù pé lé yù luí, yhangmoq lé tai kat é eq rajung za kut bekô nghut ri. Haù su mù, haù hkyô gi, Yudaq byu pé má tai pyo myhín ló bê nghut mù, ahkuí jé shoq tai nyi bum akô nghut ri.

Chángzô Pé Kut Râ Sasana Muzô

Mrk 16:14-18; Luk 24:36-49; Yhn 20:19-23; Lagyo 1:6-8

¹⁶ Hau htâng má, haù chángzo raxe rayuq gi, yhangmoq lé, Yesuq é nhang tô é Galile mau mà é bùm shut e ló bekô nghut ri.

¹⁷ Yhangmoq gi, Yesuq lé myàng kôjáng, noqkuq akô; nghut kôlhang, ra-am gi, a dê jing kô nghut ri.

¹⁸ Hau htâng, Yesuq gi, yhangmoq chyáng lé lô mù, "Mauhkung eq myigùng htoq mà é ahkáng ayá banshoq, Ngo lé byi to bê nghut lhê.

¹⁹ Haù mù, nungmoq gi, htoq é luí, byu myú chângiup lé, Ngá é chángzô pé dut nhâng mù, haù Íwa, Yhangzo, Choyiyung Woi-nyí é mying lang luí, wui-myhup hkâm byi mù,

²⁰ nungmoq lé, Ngò hkunmó hkyô tô é lhunglhang lé châng kut râ matú, yhangmoq lé mhoqshit keq. Ngò gi, mingkan pyat htùm é hkûn jé shoq lhang, nungmoq eq rahá ru nghut nyi râ nghut lhê." ga pying tô ri.

MARKUQ é Gabú Danglù Laiká (The Gospel of Mark)

*Yesuq É Matú Hkyô Htong Byí É Hkyô
Mht 3:1-12; Luk 3:1-18; Yhn 1:19-28*

¹ Haù Garai Gasâng é Yhangzo, Yesuq Hkrisduq eq sêng é gabú danglù hi é hkyô gi,

² haù myiqhtoi Esai-aq laiká má: "Náng é hkyô lajang líng rà matú, Ngá é lagyo lé, Náng é hí má Ngò nhang kat rà nghut lhê."[✧]

ga luí le,

³ "Haù yoso má, byù rayuq garú tai é htê gi, 'Haù Yhumsing é matú, hkyô hen to keq; Yhâng é matú hkyô lhoq nyhang to keq."[✧]

ga luí le, kâ tô é eq rajung za nghut lhê.

⁴ Haù mù, Wui-myhup Sará Yohan gi, yoso hkaù má jé lé luí, wui-myhup hkâm byí nyí é eq, yubak mara hkyut pyám byí é hui rá matú myit lhing mù, wui-myhup hkâm yù rá hkyô lé, hko kyô nyi ri.

⁵ Haù hkùn, Yuda mau jowò hkanmó má é bang eq Yerusalem và mó má é banshoq bang gi, yhâng chyáng htoq e bum akò. Yhangmoq gi, yhumsing é mara lé yín yú kôluí, yhâng chyáng mai Yodan làng má wui-myhup hkâm yu bum akò nghut ri.

⁶ Yohan gi, gola-uq shomaù èq sai é mebu wut mù, yhâng é hpyidum má gi shokuq hpyihit hit ri; yhang gi, dinggám eq yosó byo-í pé lé zo sù nghut ri.

⁷ Yhang tai kyô é dang gi, "Ngá htoq má wum-o a-tsam je bo é sù rayuq, ngá htàng má jé lé rá nghut lhê; ngò gi, yhâng é hkyi-tsung tui lé hpyí rá lháng a gingdán é nghut lhê.

⁸ Ngò gi, nungmoq lé, wui èq za wui-myhup wó hkâm byi lhê; nghut kôlháng, Yhang gi, Chyoiyúng Woi-nyí má nungmoq lé wui-myhup hkâm byi rá nghut lhê." gá ri.

*Yesuq, Wui-myhup Hkâm Yu É Hkyô Eq
Gunglaù Huí É Hkyô*

Mht 3:13-17; 4:1-11; Luk 3:21-22; 4:1-13

⁹ Haù yoq má, Yesuq gi, Galile mau Nazaret và mai lé jé mù, Yohan chyáng Yodan làng má wui-myhup hkâm yu ri.

¹⁰ Yesuq gi, wui mai htoq lo é u lé, mauhkúng bóng lo é lé le, Woi-nyí gi, hpúngkyui gunghkyáng sù é dông mai, Yhang ahtoq má gyó lé lo é lé le, Yhang myang kat ri.

¹¹ Haù hkùn, "Nàng gi, Ngò chyitdap é Ngá zo nghut lhê; Nàng é ahtoq má Ngò

gabú myit ngón nyi lhê." ga mauhkúng mai danghtë htoq lo ri.

¹² Haù hkùn jáng, Woi-nyí gi, Yhang lé yoso shut wang e ló nhang ri.

¹³ Haù mù, Yhang gi, yoso má myi xê nyí nyi luí, Tsadán èq gunglaù é huí ri; tân jung yosó zè pé le, Yhang eq rahá nghut nyi ri; maumang lagyo pé gi, Yhang lé, lé dojaù nyi akò nghut ri.

Sâng-hi Lhê É Chángzô Pé

Mht 4:12-22; Luk 4:14-15; 5:1-11

¹⁴ Yohan htóng gyó é htàng má, Yesuq gi, Galile mau má ló jé mù,

¹⁵ "Ahkyíng gi, jé bê; Garai Gasâng é mingdán gi, chyáng lò bê nghut ri; myit lhing mù, haù gabú danglù lé lumjíng keq hkoí." ga luí, Garai Gasâng é gabú danglù lé hko kyo wún ri.

¹⁶ Yesuq gi, Galile nhông yàm mai sô laí ló le, Simun eq yhanggu Andre nhiktàng, nhông má gùn dù nyí kô é lé, myang ri; haù nhik gi, ngozo kóng zo su nhik nghut akò.

¹⁷ Haù mù, Yesuq gi, haù nhiktàng lé, "Ngá htàng cháng keq; Ngò, nungnhik lé, byù lé cháng kóng su nhik dut nhâng rá nghut lhê." ga tai ri.

¹⁸ Haù hkùn, yhangnhik gi, radá dâm, gùn pé lé tô pyám to luí, Yhang htàng cháng bekò nghut ri.

¹⁹ Yesuq gi, radun zo dum sô e ló é hkùn, Zebedi é yhangzo, Yakuq eq yhanggu Yohan nhiktàng, lhai hkaù má gùn hpo nyi kô é lé, myang ri.

²⁰ Haù hkùn, Yhang gi, radá dâm, yhangnhik tàng lé wut kat jáng, yhangnhik tàng gi, yhangnhik é yhangwa Zebedi eq langchyáng pé lé, lhai hkaù má nyhi pyám to kôluí, Yhang htàng cháng bekò nghut ri.

Nat Lé, Yesuq Hkat Htoq Pyám É Hkyô

Luk 4:31-37

²¹ Yhangmoq gi, Kaperna-um và má e akò; Bánno buinyi nyí jé jáng, Yesuq gi, tarajong má wang é mù, mhoqshit hi ló bê nghut ri.

²² Shiwa byu pé kúm gi, Yhang mhoqshit é hkyô lé mauhong bum akò; hkásu mù gá le, Yhang gi, tará sará pé eq a pung é za, ahkáng ayá wó sù rayuq sù, yhangmoq lé mhoqshit é yanmai nghut ri.

²³ Haù u lé, agè ashop é nat wang júng é byù rayuq tarajong má bo lom nyi luí, wut garú kat é gi,

²⁴ "Nazaret và byù Yesuq ê, ngamoq gi, Nàng eq haí sêng lhê lhu? Ngamoq lé lhoq hten rá matú, Nàng jé lé é nghut lhê lhu? Nàng gi, Garai Gasâng é Chyoiyúng Sù nghut é lé, ngò sê lhê." gá ri.

²⁵ Haú hkûn, Yesuq gi, "Hkâjop, yhang chyáng mai htoq ló aq." ga yhang lé tân kat ri.

²⁶ Haú hkûn, agè ashop é nat haú gi, byù haú yuq lé wum kat langhtân nhâng luí, htê mó eq garu uchyang htoq ló byuq bê nghut ri.

²⁷ Shiwa byù banshoq bang gi, gyai yhang maú byuq kômù, rayuq eq rayuq, "Shí yuq é dang gi, hkasú é dang wá nghut lhê lú? Ahko ahkáng bo é dông mhoqshit é hkyô asik nghut ri-nhung! Yhang gi, agè ashop é nat pé lé hkunmó hkyô jáng, haú bang lhang gyo byí akò nghut ri." ga luí, taí lhùm bum akò nghut ri.

²⁸ Yesuq eq sêng é ludang gi, Galile mau jam shoq, yang é dông byo myin ló bê nghut ri.

Byù Myo Myo Lé, Yesuq Lhoq Gê Byí É Hkyô

Mht 8:14-17; Luk 4:38-41

²⁹ Yhangmoq gi, tarajong mai htoq luí, haú hkûn jáng, Yakuq eq Yohan nhik le mù, Simun eq Andre nhiktâng é yhùm má wang e ló bekò nghut ri.

³⁰ Simún é yhang-aumó gi, gyai yhang nò leq tô é nghut mù luí, yhangmoq gi, Yesuq lé haú yuq no é hkyô lhom taí kyô akò nghut ri.

³¹ Haú mù luí, Yesuq gi, yhang chyáng huí é mù, yhang é loq má zui luí tu tsung ri; haú hkûn jáng, nò ge byuq luí, yhang gi, yhangmoq lé gaí tso gaí huq bê nghut ri.

³² Haú nyí buiwang é htâng má, byu pé gi, no é bang eq nat gang wang júng nyí é bang banshoq lé, Yesuq chyáng shuí lé lo bum akò nghut ri.

³³ Rawa bang, hkúmdong nàm má lé zup zing tò akò.

³⁴ Haú mù, Yesuq gi, awáng nòhpyo ajung jung huí é bang myo myo lé lhoq gê byí ri; nat gang myo myo lé le, hkat htoq pyâm ri; nghut kôlháng, Yhang ó nghut é lé nat gang haú bang sé kô é yanmai, nat gang haú bang lé dang a taí nhâng nghut ri.

³⁵ Yesuq gi, htang napkyó mau lhang a bó shimá, toq mù, gaú é jowò ralhùm má htoq é luí, kyú é dúng ri.

³⁶ Simun eq yhang é luzúm wuí kúm gi, Yhang lé châng hô kômù,

³⁷ Yhang lé myang hô kôjáng, "Yuq hkangmó gi, Nang lé châng hkat ho nyí akò." ga luí, taí kyô akò nghut ri.

³⁸ Haú hkûn, Yesuq gi, yhangmoq lé, "Awui ayàm mã é wá pé má le, ngò, mung-dang wó hkò rá matú é sháng, hau é matú ngò lé é ru nghut lhê." ga tú taí ri.

³⁹ Haú mù luí, Yhang gi, Galile mau ramau gón, tarajong pé má mungdang hkat hko wún é htoq agó, nat gâng pé lé le hkat htoq pyâm byí wún ri.

Manggâm Dap Sú Lé, Yesuq Lhoq Gê Byí É Hkyô

Mht 8:1-4; Luk 5:12-16

⁴⁰ Manggâm dap é byù rayuq gi, Yesuq chyáng lé mù, hkyihput htuq luí, "Nàng dóng é nghut le gi, ngò lé Nàng wó lhoq sân-yúng byí rá nghut lhê." ga dung wut ri.

⁴¹ Haú hkûn, Yesuq gi, yhang lé wú shogyo luí, loq lham kat mù, haú yuq lé é zàng luí, "Ngò dóng lhê, sân-yúng aq hkoi." ga taí ri.

⁴² Haú hkûn jáng, manggâm ana byuq byuq luí, yhang gi, gè bê nghut ri.

⁴³⁻⁴⁴ Yesuq gi, "Nàng, shí hkyô ó lé le hkâtaí kyo. Nghut kôlháng, náng é gungdu lé, hkyangjong hpò chyáng ló tún shit mù, náng sân-yúng bê hkyô lé yhangmoq é matú saksé dut sháng gaq, Mosheq tará tô tô é eq rajung za, hkungga ló nhông byí aq." ga, yhang lé gyai yhang sidiq byí mù, radá dâm nhang kat bê nghut ri.

⁴⁵ Nghut kôlháng, haú yuq gi, htoq ló mù, haú hkyô lé je taí pyo myhín ló bê nghut ri. Hau é yanmai, Yesuq gi, wá hkaú má de de a ge wang ló lo mù, shinggan mã é chamchuyuiyui dut é jowò má za nyí nyí ri. Nghut kôlháng, byu pé gi, jowò hkangmó mai Yhang chyáng ru zing lé nyí bum ashí kó nghut ri.

2

Gùngjum Shí Sú Lé, Yesuq Lhoq Gê Byí É Hkyô

Mht 9:1-8; Luk 5:17-26

¹ Buinyí hkâ-myháng a myáng má, Yesuq gi, Kaperna-um wá má dum wang lò jáng, Yhang yhùm dum taú jé lô bê gá é hkyô lé, byu pé wó gyô bum akò nghut ri.

² Haú mù, byù myo myo zing lé lô kôluí, yhùmhkaú má jowò a joq lô é htoq agó, hkumtot má lhang a joq lo nghut ri; Yesuq gi, yhangmoq lé mungdang hko kyô nyí ri.

³ Haú hkûn, byù myí yuq gi, gùngjum shí sú rayuq lé chôm dang waq luí, Yhang chyáng lé lo akò.

⁴ Yhangmoq gi, byù lùm myó chyín chypap to mù, byù haú yuq lé Yesuq chyáng a wó shuí jé é kô é yanmai, Yesuq é u htoq mã é yhumhkung lé dong htông yù luí, gùngjum shí sú lé taphkang eq roq hkyô kat akò nghut ri.

⁵ Yesuq gi, yhangmoq é lumjúng myit lé byu-myáng jáng, gùngjum shí sú lé, "Ngá zo é, náng é yubak mara lé hkyut pyám byí bê." ga taí ri.

⁶ Haú hkûn, tará sará pé ra-am gi, haú má zung to kôluí, yhangmoq é i-myit unghkaú má,

⁷ "Byù shí yuq gi, haí mù luí haú su gá lhê laq? Yhang gi, Garai Gasang lé rhoí dang taí nyí ri; Garai Gasang mai lai luí, ó yuq wá

mara wó hkyut byi râ lúhú?" ga luí, myit són wuí nyi bum akò nghut ri.

⁸ Yesuq gi, yhangmoq é unghkaú má myit wú nyí kô é hkyô lé, radá dâm Yhang é myit mai sé mù, "Nungmoq é i-myit hkaú má, hái mù hái su nghú myit són wuí nyi bum akò lúhú?"

⁹ Háu gùngium shí sù lé, 'Náng é yubak mara lé hkyut pyám byi bè.' nghú tai é dang eq, 'Toq aq, náng é taphkang lé yù mù, hkyô so aq.' nghú tai râ má, hká hkun je tai lui lhé lúhú?"

¹⁰ Nghut kôlháng, háu Byu Yhangzo* gi, mینگkan htoq má, mara hkyut byi râ ahkáng wó Sù nghut é lé, nungmoq lé sé nháng nau lhé." ga, yhangmoq lé tai kat ri.

¹¹ Háu htàng, Yhang gi, háu gùngium shí sù lé, "Ngò, nang lé tai bá, toq aq, náng é taphkang lé yu chùng lui, yhùm tau ló aq hkoi." ga tai ri.

¹² Háu yuq gi, toq mù, yhàng é taphkang lé yu chùng lui, yhangmoq banshoq bang wú tsuq tò é myoq hí mai sò htoq ló byuq bè nghut ri. Háu é yanmai, yuq hkangmó gi, mauhong bùm kômù, "Isù é hkyô gi, hká-nhám lhang á myàng wú shí." ga, Garai Gasang lé hkya-on kungton bum akò nghut ri.

*Lewiq (Mahte) Lé Wut Yu É Hkyô
Mht 9:9-13; Luk 5:27-32*

¹³ Yesuq gi, nhông yàm má radám dum htoq e ri. Háu hkùn, byù moq mó gi, Yhàng chyáng jé lé lo bùm kômù, Yhang gi, háu bang lé lhom mhoqshit nyi ri.

¹⁴ Yhang gi, sô yônglò nyi é hkùn, kang guq zúm má zung tò é, Alphe yhangzo Lewiq lé myang kat lui, "Ngá htàng cháng aq." ga tai ri. Háu hkùn, Lewiq gi, toq lui, Yhang htàng cháng bè nghut ri.

¹⁵ Yesuq gi, Lewiq é yhùm má myinzang é zô nyi é hkùn, kang guq bang myo myo eq yubak dap bang le, Yhang eq Yhàng é chángzô pé eq rahá zo shuq bum akò. Hkásu mù gá le, Yhang htàng cháng é bang gi, ajùm ayò nghut é yanmai nghut ri.

¹⁶ Tará sará nghut é Hparishe pé ra-am gi, yubak dap bang eq kang guq zo bang le mù rahá, Yesuq zang zô nyi é lé myàng kôjáng, Yhàng é chángzô pé lé, "Yhang gi, hái mù lui, kang guq bang eq yubak dap bang eq rahá zo shuq nyi lhé lúhú?" ga myí bum akò nghut ri.

¹⁷ Háu su ga myi kô é lé Yesuq wó gyo jáng, Yhang gi, yhangmoq lé, "Wángzán bang gi, chí sará a ra kó, nõhpyo hui bang za sheq ru râ lhé. Háu eq rajung za, Ngò gi, dingmán bang lé wut yù râ matú jé lé é a nghut, yubak dap bang lé jì yù râ matú sheq jé lé é ru nghut lhé." ga tai kat ri.

*Zoshuq Gám É Eq Sêng É Hkyô
Mht 9:14-17; Luk 5:33-39*

¹⁸ Yohan é chángzô pé eq Hparishe pé gi, zoshuq gám nyi akò nghut ri. Háu mù, ra-am gi, Yesuq chyáng jé lé kômù, "Wui-myhup Sará Yohan é chángzô pé eq Hparishe pé é chángzô pé gi, zoshuq gám akò; nghut kôlháng, náng é chángzô pé gi, hái mù a gám kô é lúhú?" ga lui, myí akò nghut ri.

¹⁹ Háu hkùn, Yesuq tù tai é gi, "Bíng pé gi, lusik eq rahá nghut nyi tò ashí hkùn, zoshuq hkásu wó gám râ lúhú? Yhangmoq gi, lusik eq rahá nghut nyi é u lé, zoshuq gám kó râ a nghut.

²⁰ Nghut kôlháng, lusik lé yhangmoq chyáng mai shuí yu pyám é hkying jé râ nghut lhé; háu buinyi pé má kúm gi, yhangmoq, zoshuq gám kó râ nghut lhé.

²¹ Ó yuq le, mebu xau má pán sik eq a lhaq hpo wú kó; háu su kut é nghut jáng, pán sik gi, kun byuq mù, mebu xau le je lhoq cheq pyám râ nghut lhé.

²² Háu eq rajung za, tsibiyiq wing asik lé le, shokuq htùng axau má ó a kat wú kó. Kat é nghut jáng, tsibiyiq wing asik gi, htùng lé lhoq buq goq nháng lui, tsibiyiq wing eq shokuq htùng htên byuq râ nghut lhé. Háu mù, tsibiyiq wing asik gi, shokuq htùng sik má za ge kat é nghut lhé.

*Bánno Buinyi É Yhumsing
Mht 12:1-14; Luk 6:1-11*

²³ Bánno buinyi ra-nyí má, Yesuq gi, Yhàng é chángzô pé eq rahá yò hkaú mai sò lai ló é hkùn, Yhàng é chángzô pé gi, kyòshi ratsuí langshap yu akò nghut ri.

²⁴ Háu mù, Hparishe pé gi, Yesuq lé, "Wú aq, Bánno buinyi má a ge kut jung lé, hái mù, náng é chángzô pé kut nyi akò lúhú?" ga tai akò.

²⁵ Háu hkùn, Yesuq gi, yhangmoq lé, "Dawiq lhang gi, yhàng htàng cháng é bang eq rahá zòmut hui lui, zoshuq râ tò é hkùn, hkásu kut é hkyô lé, nungmoq hká-nhám le a nghap wú kó lúhú?"

²⁶ Abiahta, hkyangjong mó kut nyi é u lé, Dawiq gi, Garai Gasang é yhùmhkaú má wang é mù, hkyangjông pé mai lai lui, ó le a ge zô é, kyáng tò é muk lé yù zo mù, yhang htàng cháng é bang lé le ratsuí tsui byi tso é nghut lhé." ga tù tai ri.

²⁷ Háu htàng, Yhang gi, yhangmoq lé, "Bánno buinyi gi, byù é matú kut tò é nghut lhé; byù gi, Bánno buinyi é matú a nghut.

²⁸ Háu mù, háu Byu Yhangzo gi, háu Bánno buinyi é Yhumsing lhang nghut lhé." ga xoq tai ri.

* 2:10 Byu Yhangzo gá é gi, Yesuq Yhànggùng yhang lé le tai é nghut lhé, Mesaia lé le tai é nghut lhé.

3

1 Yesuq gi, tarajong má radàm dum wang e le, loq raloq ajum shi byuq é byù rayuq nyi to láng ri.

2 Haù hkùn, haù má nyi tó é bang ra-am gi, Bánno buinyi má, Yesuq mai haù yuq lé lhoq gè byi rà lùu ga, mara hùn rà matú gyám wú nyi akò nghut ri.

3 Yesuq gi, haù loq jum shi sù lé, "Banshoq bâng é hí má, toq yap shit aq." ga tai kat ri.

4 Hau htâng, Yhang gi, haù má nyi tó é bang lé, "Bánno buinyi má, ge é muzó kut rà, a ge é muzó kut rà, byù asak hkyi rà eq byù sat rà hkyô pé má, hká lhum kut le sheq tará wang lhé lùu?" ga myi kat jáng, yhangmoq kúm gi, jit le a ga kó nghut ri.

5 Haù mù, Yhang gi, nhik-yô nau é myit eq haù bang lé lhing wú mù, yhangmoq myit htan é hkyô lé, wú yón luí, haù loq jum shi sù lé, "Náng é loq nyhang kat aq." ga tai kat jáng, haù yuq gi, loq nyhang kat luí, yhang é loq gi, shoq za ge byuq bē nghut ri.

6 Hau htâng má, Hparishe pé gi, htoq ló kômù, Yesuq lé hkásu kut wó sat pyám rà hkyô lé, Herut é byu pé eq chòm hpyê lhum bum akò nghut ri.

Byù Ajùm Ayò, Yesuq Htâng Cháng Kò É Hkyô

7 Yesuq gi, Yhâng é chángzò pé eq rahá, nhông shut dum e ló le, Galilè mau mà é byù ajùm ayò gi, Yhang htâng châng e ló bum akò nghut ri.

8 Hau htoq agó, Yuda mau mà é bang, Yerusalem và mó mà é bang, Idumia mau mà é bang, Yodan làng hé hpoq mà é bang, Turuq myuq eq Sidun myuq awui ayàm jé shoq mà é bang, ajùm ayò gi, Yhang kut nyi é hkyô banshoq lé wó gyo kójáng, Yhâng chyáng jé lé bum akò nghut ri.

9-10 Yesuq gi, byù myo myo lé lhoq gè byi é yanmai, nõhpyo hui to bang gi, Yhang lé wó záng shoq ga, chyin chyap wang ló bum akò. Byù lùm myo luí, Yesuq gi, Yhang lé a nhê pyet pyám sháng gaq ga, Yhâng é chángzò pé lé lhai ralhüm hen to nhang ri.

11 Agé ashop é nat pé gi, Yhang lé myàng hkangmó, Yhâng é hí má lêng ngop to luí, "Nàng gi, Garai Gasâng é Yhangzo nghut ri." ga luí, tai garú akò.

12 Nghut kôlhàng, Yesuq gi, Yhang ó yuq nghut é hkyô lé a tai byông htoq rà matú, tân hkúm kat ri.

Lagyo Kut Râ Byù Raxe Í Yuq Hkyin Yu É Hkyô

Mht 10:1-4; Luk 6:12-16

13 Yesuq gi, bùm shut doq ló mù, Yhang ó nau é bang lé ji kat luí, haù bang gi, Yhâng chyáng jé lé lo bum akò nghut ri.

14 Haù hkùn, Yesuq gi, byù raxe í yuq lé hkyin yù luí, lagyo ayá byi ri; haù bang gi, Yhang eq rahá nyi rà matú le, mungdang hkò rà matú Yhang nhang htoq kat rà eq,

15 nat gâng pé lé hkat htoq rà ahko ahkáng wó rà matú le, nghut akò nghut ri.

16 Haù raxe í yuq gi, Simun (Yesuq mai Petruq ga mying myhing byi sù);

17 Zebedi é yhangzò nhiktâng Yakuq eq yhanggu Yohan (Yhâng nhiktâng lé Yesuq mai Buanerga ga mying myhing byi ri; hau é lichyúm gi, maugum zò nhik gá é nghut lhé.);

18 Andre, Hphilip, Barhtolume, Mahte, Htomaq, Alhpe é yhangzo Yakuq, Htade, Zelutuq* dut é Simun eq,

19 Yhang lé ap pyám rà sù, Yudaq Iskarut pé nghut akò.

Yesuq Eq Bezebulaq

Mht 12:22-32; Luk 11:14-23; 12:10

20 Hau htâng, Yesuq gi, yhùm má wang ló le, byù ajùm ayò dum zing lé lô kômù, Yhang eq Yhang é chángzò pé gi, zang zo hkying lhang a wó kó nghut ri.

21 Yhâng é yhumbyù wui gi, haù hkyô lé wó gyo kójáng, "Yhang, myit a gying lo nghut ri." ga luí, Yhang lé hung shui yù rà matú, e akò nghut ri.

22 Yerusalem và mó mai gyó lé lo é tará sará pé gi, "Shí yuq gi, Bezebulaq gá é nat gâng pé é zau lúng sù nghut ri-nhung! Yhang gi, nat zàù é wum-o a-tsam eq za, nat gâng pé lé hkat htoq pyám é nghut ri." ga tai bum akò nghut ri.

23 Haù mù luí, Yesuq, yhangmoq lé wut yù mù, dangtú dong tai é gi, "Tsadán gi, Tsadán lé hkásu kut wó hkat htoq rà lùu?"

24 Mingdán ralhüm gi, ahkaù má byoq gâng lhum nyi kó é nghut jáng, mingdán haù wó gíng nyi rà a nghut.

25 Yhumthu ralhüm má le, ikun byù yhangchang byoq gâng lhum nyi é nghut le gi, yhumhtu haù wó gíng nyi rà a nghut.

26 Haù eq rajung za, Tsadán le, yhanggùng yhang lhoq hpyoq luí, gam hkoq nyi é nghut le gi, yhang wó nyi nyi rà a nghut, htùm byuq rà za nghut lhé.

27 Ó yuq nghut kôle, wum-o bò sù lé hí tui zing pyám é a nghut le gi, yhâng é yhùm má lú wàng mù, yhâng é sutzè lé wó lú yù rà a nghut: Haù yuq lé hí tui zing pyám jáng sheq, yhâng é sutzè lé wó lú yù rà nghut lhé.

28 Ngò, nungmoq lé teng za tai kôlé, byu pé kut shut é mara banshoq eq rhoi dang tai pyám é pé lé gi, mara wó hkyut pyám byi lhé.

29 Nghut kôlhàng, haù Chyoiyung Woi-nyi lé rhoi dang tai pyám é sù gi, hká-nhám le, mara hkyut byi é wó hui rà a nghut; haù yuq

* 3:18 Zelutuq gá é lichyúm gi, yhumsing zui sai é hkyô má gyai yhang myit lòm shirong é sù lé gá lhé. Haù u lé, Israelaq byu pé gi, mingdán luthkyô wó rà matú shikut nyi é hpung bang lé, Zelutuq gá lhé.

gi, ahtum abyuq yubak wó sù nghut nyi ri." gâ ri.

³⁰ Yhang haù su ga taí é gi, yhangmoq mai, "Yhang gi, agè ashop é nat wó sù nghut ri." ga kó é yanmai nghut ri.

*Yesuq É Yhângnu Eq Yhanggu Pé
Mht 12:46-50; Luk 8:19-21*

³¹ Hau htâng, Yesuq é yhângnu eq yhanggu pé gi, jé lé mù, yhùm hkun má yap to kôluí, Yesuq htoq lò rá matú, byù rayuq lé wang taí nhang akó nghut ri.

³² Byù ajùm ayò gi, Yhâng é lhìnghkyuq má zung tò akó; haù bang gi, Yhang lé, "Wú aq, náng nu eq nunggu pé gi, nang lé hui naù luí, shìnggan má láng bum akó." ga taí kyò akó nghut ri.

³³ Haù hkùn, Yhang gi, "Ô pé gi, Ngá nu eq Ngá nu pé nghut akó lú?" ga myi kat ri.

³⁴ Hau htâng, Yhang gi, Yhâng é lhìnghkyuq má zung hkyuq tò é bang lé wú mù, taí é gi, "Shí bang gi, Ngá nu eq Ngá é gumang wui nghut bê!"

³⁵ Garai Gasang ô nau é hkyò châng é sù ó yuq nghut kòle, Ngá gu, Ngá mang, Ngá nhá, Ngá nu chyat nghut bê." gâ ri.

4

*Kyòshi Sân É Dangtú
Mht 13:1-23; Luk 8:4-15*

¹ Yesuq gi, nhòng yàm má radàm dum mhoqshít hí lò bê nghut ri. Haù hkùn, Yhâng é lhìnghkyuq má byù moq mó lùm yán zìng lé lò bum kó é yanmai, Yhang gi, nhòng hkaù má é lhai má wang zung tò ri; haù u lé, byù moq mó gi, nhòng yàm gin-gau htoq má nyi míng bum akó nghut ri.

² Yhang gi, haù bang lé, dangtú pé đông myo myo mhoqshít byí nyi ri; Yhang mhoqshít é má,

³ "Gyo wú keq! Kyò hkyò sù rayuq gi, kyòshi san rá gâ htoq e lò ri.

⁴ Yhang, kyòshi sân kat é hkùn, ra-am gi, hkyò má gyó ang mù, nghoq pé èq lé hte zò pyám ri.

⁵ Ra-am gi, myi-tse a htu é luqgok yò pé má gyó ang mù, myi-tse a htu é yanmai, lui za yuq htoq lò kòle,

⁶ amyit a wó chín hing é nghut mù, bui htoq lò jáng, lhap kyuq pyám bê nghut ri.

⁷ Dum ra-am gi, zugyóm hkaù má gyó ang lui, zubyap haù pé kó lò mù, wup pyám é yanmai, ashi a wó zui nghut ri.

⁸ Nghut kòlhang, ra-am gi, myihpún bo é jang má gyó âng é yanmai, yuq kó lò mù, ashi sum xê tú, hkyuq xê tú, rashô tú lhang, zui myò lo é nghut ri." gâ ri.

⁹ Hau htâng, Yesuq dum taí é gi, "Gyo yù rá nohkyap dap sù gi, gyò yù sháng gaq." gâ ri.

¹⁰ Yhang baù za nghut nyi é hkùn, haù lagyo raxe í yuq eq Yhang nàm má nyi tò é bang gi, dangtú haù eq sèng é hkyò lé, lé myí akó.

¹¹ Haù hkùn, Yhang, yhangmoq lé taí kyò é gi, "Garai Gasâng é mingdán eq sèng é sè gyo wui é hkyò lé sé gyo rá ahko ahkáng, nungmoq lé byí to lugú nghut bê. Nghut kòlhang, góbâng é matú gi, jung hkangmó lé dangtú đông chyat taí é nghut lhê.

¹² Haù mù lui,

"Yhangmoq gi, myang nyi kòlhang, a wú sé kó, gyò nyi kòlhang, a sé gyo kó;

sé wú sè gyo kó é ru nghut le gi, lhìng taù lò mù, mara hkyò pyám byí é hui kó rá nghut lhê!"*

gâ ri." ga tò ri.

¹³ Hau htâng, Yhang, yhangmoq lé dum xoq taí é gi, "Nungmoq, dangtú shí lé a sé gyo kó é nghut le gi, gotú dangtú pé lé hkásu kut ung sé gyo kó rá lú?"

¹⁴ Yò mù zui sù san kat é kyòshi gi, mungdang nghut lhê.

¹⁵ Byù ra-am gi, hkyò má gyó âng é kyòshi eq wui akó; yhangmoq gi, mungdang lé wó gyò yu é hkùn yhang, Tsadán gi, lé mù, yhangmoq chyáng mã é mungdang lé lé yù pyám byí ri.

¹⁶ Ra-am gi, luqgok yò pé má gyó âng é kyòshi eq wui akó; yhangmoq gi, mungdang lé wó gyo jáng, radá dàm gabú myit èq hap yù akó.

¹⁷ Nghut kòlhang, yhangmoq gi, amyit a wó chín é yanmai, razup zo za yuq kòmu, mungdang é yanmai, wuìhke é eq zìng-rí é pé hui kòjáng, hân hân htak lò byuq kó rá nghut lhê.

¹⁸ Dum ra-am nghut jáng, zugyóm hkaù má gyó âng é kyòshi eq wui akó; yhangmoq gi, mungdang lé wó gyò yù kòlhang,

¹⁹ shí ipyat lhê é myit wui myit hke hkyò, hkyò shuí nghoq jung ngùn hìng zèhkoq eq gotú zè pé lé ô nau é hkyò pé, yhangmoq chyáng wang lò jáng, haù mungdang lé hup pyám é yanmai, ashi a wó zui dut kó rá nghut lhê.

²⁰ Ra-am kúm gi, myihpún bo é jang má gyó âng é kyòshi eq wui akó; yhangmoq gi, haù mungdang lé gyò yù mù, lhóm yù lui, sân kat é htoq sum xê tú, hkyuq xê tú, rashô tú lhang myo shoq ashi zui lò kó rá nghut lhê." gâ ri.

Myibung Htùn É Hkyò

Luk 8:16-18

²¹ Yesuq, yhangmoq lé xoq taí é gi, "Nungmoq gi, myibung lé yù mù, tsungjang má a tsung e za, mùng èq nghop tò é, a nghut jáng, yhupchong ô má tsung tò é, ó yuq wá kut wú akó lú?"

* 4:12 Esai 6:9-10

²² Hkâsu mù gâ le, haq tô é zè hái jung le htoq ze lò râ eq, zaù tô é pé hái jung le byông htoq lò râ nghut lhê.

²³ Gyô yù râ nohkyap dap sù ó yuq nghut kôle, gyô yù sháng gaq." gâ ri.

²⁴ Hau htoq agó, Yhang dum taí é gi, "Nungmoq gi, wó gyô yu é hkyô lé rago myit wú keg; nungmoq lik byí é bung eq, nungmoq lé dum lik byí râ nghut lhê; hau htoq lhâng myo shoq wó kó râ nghut lhê.

²⁵ Hkâsu mù gâ le, wó to sù lé gi, jat byi shirâ, a wó su chyáng mai kúm gi, yhang wó tô é lé lhâng yu pyám byi shirâ nghut lhê." gâ ri.

Kyôshi Yuq Kô Lo É Dangtú

²⁶ Hau htâng, Yhang dum xoq taí é gi, "Garai Gasâng é mingdán gi, byù rayuq mai, myigùng má sân kat é kyôshi eq wú ri.

²⁷ Byù haù yuq gi, myín lé yhup tô é nghut nghut, nyí lé toq lo é nghut nghut, kyôshi gi, zui htoq lò mù, yuq kô lo nyi ri; nghut kôlhâng, yhang gi, hkâsu kut yuq lo nyi é hkyô lé a sé nghut ri.

²⁸ Myigùng gi, yhang baù yhang, kyôshi lé, sàng-hi má abum bum nhâng, hau htâng má a-nhâm htoq nhâng mù luí, ashi zui shoq kut é nghut lhê.

²⁹ Kyôshi myhíng jáng, kyô shu yoq jé bê nghut é yanmai, yhang gi, zaiyik eq yâm yù râ nghut lhê." gâ ri.

Angshi Cham Lé Dangtú Yu É Hkyô

Mht 13:31-32; Luk 13:18-19

³⁰ Yesuq dum xoq taí é gi, "Garai Gasâng é mingdán lé, hái eq lhoq whuí wú râ lúh? Hai jung dangtú yù mù, shít wú râ lúh?

³¹ Garai Gasâng é mingdán gi, angshi cham eq wú ri. Angshi cham haù gi, myigùng má hô é kyômyi jí pé má je tiq é nghut lhê.

³² Nghut kôlhâng, ho mù, yuq kô lò jáng, xun hkyâm má hô é mhan-haq hpoqnoq gâm banshoq htoq má je kô é agám dut lò mù, akoq kô lò luí, hau é buishúm hkaù má, maulat nghoq zô pé lé wó zung nô nyi é nghut lhê." gâ ri.

³³ Haù sù é dangtú myo myo đông mai, Yesuq gi, yhangmoq wó sé gyô é myhó, mungdang hko kyô nyi ri.

³⁴ Yhang gi, yhangmoq lé, dangtú a bo é hái lhâng a taí wú nghut ri; nghut kôlhâng, Yhang eq chángzô pé baù nghut nyi é hkùn kúm gi, jung hkangmó é lichyúm lé taí sân kyô ri.

Laidun Mó Lé, Yesuq Lhoq Zim Pyám É Hkyô

Mht 8:23-27; Luk 8:22-25

³⁵ Haù nyí, myinhâng lé, Yesuq gi, Yhâng é chángzô pé lé, "Nga-nhúng nhông hé hpoq shut dap é lò sháng." ga taí ri.

³⁶ Haù hkùn, chángzô pé gi, byù moq mó lé nyhi pyám to luí, Yhang zung tô é hái mai yhang, Yhang lé shuí gú dap lò bekô; gotú hai pé le, yhangmoq eq rahá bo gú dap lò akô nghut ri.

³⁷ Haù u lé, laidun mó jé lò mù, wuìlhêng hta toq lò luí, hai má lo bat hâng é yanmai, wui byíng lò bê nghut ri.

³⁸ Haù hkùn, Yesuq gi, hai htâng má uhkuq hkuq mù yhup myhi tô ri; haù chángzô pé gi, Yhang lé nhaù pun luí "Sarâ é, nga-nhúng myup shi lò râ dut é lé, nàng a chiq byi lúh?" ga taí akô nghut ri.

³⁹ Yesuq gi, toq mù, laidun lé tan luí, wuìlhêng lé, "Zim aq." ga taí kat jáng, haù laidun num lò byuq luí, banshoq zim byuq bê nghut ri.

⁴⁰ Hau htâng, Yhang gi, Yhâng é chángzô pé lé, "Hái mù, haù-í gyuq bum akô lúh? Nungmoq gi, lumjáng myit a bò shi kó lúh?" ga taí ri.

⁴¹ Yhangmoq gi, gyai yhang gyuq dan bùm kômù, "Shí yuq gi, hkasù é byù nghut lhê làh? Lai eq wuìlhêng pé lhâng gi, Yhâng é dang lé gyo byí ri-nhung!" ga luí, rayuq eq rayuq myí lhum bum akô nghut ri.

5

Nat Gang Hkat Htoq Pyám É Hkyô *Mht 8:28-34; Luk 8:26-39*

¹ Yhangmoq gi, nhông hé hpoq mã é Gerase byu pé é mau má jé dap é lò akô.

² Yesuq hai mai htoq lò é hkùn, agè ashop é nat wang júng é byù rayuq gi, lupdùng mai htoq lé lò mù, Yhang lé lhóm huí ri.

³ Haù yuq gi, lupdùng má za nyi é sù nghut ri; yhang lé, ó yuq eq le, shamtoq-tuì eq lhâng a wó tuí zing wú kó nghut ri.

⁴ Hkâsu mù gâ le, adàm dàm, yhâng é loq eq hkyí má shamtoq-tuì eq tuí tô wú kôlhâng, yhang gi, loq mã é shamtoq-tuì pé lé llang hpyit pyám pyám kut mù, hkyí mã é shamtoq kyum lé lhoq hkyop pyám pyám kut ri. Yhang lé, ó yuq eq le a wó hkuq yù kó nghut ri.

⁵ Yhang gi, nyí myín aga lupdùng eq bùm pé má puk garu uchyang, yhumssing gùng lé luqgok eq dùn cheq wún ri.

⁶ Yhang gi, Yesuq lé, we mai myang kat jáng, din é lò mù, Yhâng é hí má hkyihput htuq ngop luí,

⁷ htê mó eq, "Myhang htâng é Garaí Yhangzo Yesuq é! Nàng gi, ngò eq hái sèng lhê lúh? Nàng gi, ngo lé a zing-ri râ matú, Garaí Gasâng hí má danggidiq byi laq." ga taí garú ri.

⁸ Hai mù gâ le, Yesuq gi, yhang lé, "Agè ashop é nat nàng é, byù shí yuq chyáng mai htoq lò aq." ga taí kat é yanmai nghut ri.

⁹ Hau htâng, Yesuq gi, "Náng myíng hái gà lhê?" ga, yhang lé myi jáng, yhang gi, "Ng-amog gi, myo myo nghut é yanmai, Legio gà lhê." ga tù tái ri.

¹⁰ Hau htâng, yhang gi, haú jowò mai yhangmoq lé a kón pyám rà matú, Yesuq lé dum dung dung kut nyi ri.

¹¹ Haú u lé, waq rajùm mó gi, bùm yàm má dù but zô nyi bum akò nghut ri.

¹² Haú mù luí, nat gâng pé gi, "Ngamog lé, waq pé chyáng nhang kat luí, yhangmoq chyáng wàng nhâng laq." ga luí, Yesuq lé dung akò.

¹³ Haú hkún, Yesuq gi, yhangmoq lé ahkáng byí kat jáng, haú agè ashop é nat pé gi, haú yuq chyáng mai htoq ló kôluí, waq pé chyáng wang ló byuq bekò nghut ri. Haú mù, haú í hkyíng kô bo é waq hpúng gi, gampyoq mai nhông hkaú shut rut din yán wang ló kôluí, myup shi byuq bekò nghut ri.

¹⁴ Waq zúng bang gi, hpang din wang ló kômù, myuq hkaú má é bang eq awui ayám má é bang lé, haú hkyô ló shít kyo kô é yanmai, byù haú bang gi, dut lai lò bê hkyô lé, é htoq wú akò nghut ri.

¹⁵ Yhangmoq gi, Yesuq chyáng jé lé kô é hkún, nat gang myo myo wang júng wú é sù, mebu wat luí, byù gé rayuq su zung to láng é lé myàng kômù, gyuq dan bùm bekò nghut ri.

¹⁶ Haú hkyô lé myang é bang gi, nat gâng pé wang júng sù eq waq pé chyáng hkásu dut é hkyô, góbang lé tái kyo akò nghut ri.

¹⁷ Hau htâng, byu pé gi, Yesuq lé yhang-mog é mau mai htoq ló byuq rà matú, chòm dúng tóngbán akò nghut ri.

¹⁸ Yesuq lhai hkaú má wang ló é u lé, haú nat gâng pé wang júng lai lò bê sù gi, Yesuq htâng cháng rà matú, Yesuq lé dung tóngbán ri.

¹⁹ Nghut kôlháng, Yesuq gi, yhang lé ahkáng a byi e za, "Nàng, yhùm shut sheq ló mù, haú Yhumsíng, nang lé hkâ-í kut byi bê hkyô eq hkásu kut shogyo nhikmyin yu é hkyô lé, náng é yhubyù buinùm ji-myi wui lé ló tái kyo aq." ga tái kat ri.

²⁰ Haú mù, byù haú yuq gi, ló luí, yhang lé Yesuq hkâ-í kut byi bê hkyô lé, Dekapoli* mau bang lé ló tái kyô ri. Haú hkún, wó gyô é bang banshoq gi, mauhong bum akò nghut ri.

Shi Byuq Bê Myiwe Zo Eq No É Myiwe Myhi Rayuq É Hkyô
Mht 9:18-26; Luk 8:40-56

²¹ Yesuq gi, lhai ji mù, nhông he hpoq shut dum dap jé ló mù, Yhang, nhông yàm má nyi tô é u lé, byù ajùm ayò gi, Yhâng é lnhngkyuq má lé zing bum akò nghut ri;

²² haú hkún, Ya-iruq gà é, tarajong má up bang má é rayuq gi, haú má lé luí, Yesuq lé myang kat jáng, Yhâng é hkyí wang má paí gop to mù,

²³ "Ngá zo byizo gi, kâng byit ló nyi ri; yhang ge lò mù asak dum dui shí sháng gaq, náng lé mù, yhâng é ahtoq má loq lé ke byi laq." ga, wum kat dúng tóngbán nyi ri.

²⁴ Haú mù, Yesuq gi, haú yuq htâng châng e ló ri; byù ajùm ayò le, Yhâng é awui ayám má châng chyín chyap wún bum akò.

²⁵ Haú hkún, raxe í zàn suí yui nyi é myiwe myhi rayuq le haú hpúng má bo tó ri.

²⁶ Yhang gi, chi sará myo myô pé chyáng yhang wó é ngunzè banshoq lhoq pán mù, nó hkâm luí yá wú kôlháng, ge é hkyô a joq é htoq agó, je lhang wuihke lò ri.

²⁷ Yhang gi, Yesuq é hkyô lé wó gyo jáng, byù hpúng mai Yesuq é nunghtáng má hui lé mù, Yhâng é bu má é záng kat ri.

²⁸ Haí mù luí gà le, yhang gi, "Ngò, Yhang é bu má za lhang é wó záng é nghut le gi, ge byuq rà nghut lhê." ga wó myit é yanmai, haú su kut é nghut ri.

²⁹ Haú hkún jáng, yhâng chyáng suí yui é kân byuq luí, yhang gi, hpuzò nyi é mai wó lut bê hkyô lé, yhânggùng má sê gyô kat bê nghut ri.

³⁰ Yesuq gi, Yhâng é gùng mai hpungwup a-tsam htoq ló é lé, radá dâm cháng sê kat luí, byù moq mó shut lhing wú mù, "Ngá é bu má ó yuq záng bê lú?" ga myi kat ri.

³¹ Haú hkún, Yhâng é chángzô pé gi, "Náng é lnhngkyuq má byù ajùm ayò chyín chyap nyi é lé, myang to luí nhíng, 'Ngo lé, ó yuq záng bê lú?' nghú myi lhê lú?" ga tù tái kat akò.

³² Nghut kôlháng, Yesuq gi, Yhang lé lé záng sù lé myàng rà matú, ho lhing wú nyi ashí nghut ri.

³³ Haú hkún, myiwe myhi haú gi, yhâng chyáng hkásu dut lai lò bê hkyô lé sê é yanmai, Yesuq é hí má lé mù, gyuq nán é eq Yhang é hkyí wang má ngóm gop to luí, yhâng chyáng dut lai lò bê hkyô banshoq lé tái kyô ri.

³⁴ Haú mù, Yesuq gi, myiwe myhi haú lé, "Byizo é, náng é lumjng myit gi, náng lé lhoq gé byi bê nghut ri; náng é nòhpyo ge byuq bê nghut ri; ngón za ló aq hko!" ga tái ri.

³⁵ Yesuq gi, dang ru tái nyi ashí hkún, tarajong má up sù Ya-iruq é yhùm mai byù ra-am jé lé mù, "Nang é byizo gi, shi byuq bê; haí mù luí, haú sará lé lhoq hkyik nyi lhê lú?" ga luí, lé tái kat akò.

³⁶ Yesuq gi, haú bang tái é dang lé gyô lhai pyám mù, "Hkâgyuq, za lumjng aq." ga, haú tarajong má up sù tái kat ri.

* 5:20 Dekapoli gà é gi, Grik dngng myuq raxé lé gà lhê.

³⁷ Hau htâng, Yhang gi, Petruq, Yakuq eq Yakuq é yhanggu Yohan pé mai lai lui, ó yuq lé le, Yhang htâng a cháng nhâng nghut ri.

³⁸ Yhangmoq, hau tarajong má up sù é yhùm má jé lé kô é hkùn, Yesuq gi, byu pé garu garin ga yón ngau gabyông nyi bum é lé, myàng ri.

³⁹ Yhang gi, yhùmhaũ shut wang ló mù, hau bang lé, "Hái mù, yón ngau gabyông nyi bum akò lúh? Hau zoshâng gi, shi byuq é a nghut, yhup myhî tô é sheq ru nghut lhê." ga tai ri.

⁴⁰ Nghut kôlhâng, yhangmoq gi, Yhang lé wuzui kut pyám byí akò.

Yhang kúm gi, hau bang banshoq lé hkat htoq pyám mù, zoshâng é yhângnu yhângwa nhik eq Yhâng é chángzô pé lé za shui lui, zoshâng lé lheq tô é gok má wang e akò nghut ri.

⁴¹ Yesuq gi, myiwe zo hau é loq má zui to mù, "Talihta ku-mi" (hau é lichyùm gi, "Myiwe zo ê, ngò, nang lé tai bá, toq aq." ga é nghut lhê.) ga tai ri.

⁴² Myiwe zo hau gi, hau hkùn jáng, toq lui, sô wún ri (yhang gi, asak raxe í zân bò bê sù nghut ri.). Yhangmoq gi, hau sù dut é hkyô lé gyai yhang mau byuq bùm bekò nghut ri.

⁴³ Yhang gi, hau hkyô ó lé le a sé nhâng rá matú, yhangmoq lé tai hkúm kat lui, myiwe zo hau lé, zô jung byi tso rá matú le, yhangmoq lé tai ri.

6

Yhumsing Wà Má Myoqdong A Wó É Hkyô

Mht 13:53-58; Luk 4:16-30

¹ Yesuq gi, hau jowò mai htoq e ló mù, Yhâng é yhum mau shut taũ ló ri; Yhâng é chángzô pé le, Yhang eq rahá bo châng ló akò nghut ri.

² Bánno buinyi jé jáng, Yhang gi, tarajong má mhoqshit hi ló ri; wó gyô é bang myo myo gi, gyô mau byuq kôlui, "Byù shí yuq gi, hau pé lé hkámá mhoq yu é lhà? Yhang wó yu é hpaqchyí byéng-yá gi, hkású é wá nghut mù lui, laklai kumlhá lé lháng kut lhê laq?"

³ Shí yuq gi, Mariq é yhangzo, laksíma hpó nghut lhê, a nghut lúh? Yhang gi, Yakuq, Yose, Yudaq, Simun pé é yhangmang nghut lhê, a nghut lúh? Yhâng nhammó pé le, nga-nhúng eq rahá nghut nyi lhê, a nghut kó lúh?" ga lui, Yhang lé myit a ngón dut bùm bekò nghut ri.

⁴ Yesuq, yhangmoq lé tai é gi, "Myiqhtoi rayuq gi, yhumsing é yhum mau, yhâng é buinùm ji-myi wui eq yhumsing é yhùm má za, myoqdong a lhaq wó wú é nghut lhê." ga ri.

⁵ Yhang gi, nò byù ra-am lé loq ke byi mù, lhoq gé byí é mai lai lui, gotú laklai kumlhá hai le, hau má a wó kut shit nghut ri.

⁶ Hau mù, Yesuq gi, yhangmoq lumjing myit a bò kô é hkyô lé, mau nyi ri. Hau htâng, Yhang gi, Nazaret wà mai htoq ló mù, rawá htâng rawá má châng mhoqshit wún ri.

Lagyo Raxe Í Yuq Lé Nhang Htoq Kat É Hkyô

Mht 10:5-15; Luk 9:1-6

⁷ Yesuq gi, hau lagyo raxe í yuq lé wut yù mù, agè ashop é nat pé lé ùng rá a-tsam byi lui, í yuq yuq kut nhang htoq kat ri.

⁸ Yhang, yhangmoq lé châng pying kat é dang gi, "Hkyowui é matú má, dumbáng mai lai lui, zoshuq le, etap le, ngùn le, gotú hai le, hkâyú chùng kó;

⁹ hkyi-tsung kúm gi, tsung chùng keq; nghut kôlhâng, bu í dung hkáwt chùng kó.

¹⁰ Hká má nghut kôlhâng, rayhùm yhùm má nungmoq wang bíng kô é nghut le gi, hau wá mai dum htoq ló é buinyi jé shoq, hau yhùm má za nyi nyi keq.

¹¹ Jowò rawò wò má é bang, nungmoq lé a lhom hap yù, a lhom gyo byi kô é nghut jáng, nungmoq lé yhangmoq a lhom hap yu é saksé dut sháng gaq, nungmoq é hkyiwa má dap é hpuilhau lé kô hkyô pyám to mù, hau jowò mai htoq ló keq." ga ri.

¹² Hau mù, yhangmoq gi, htoq e ló lui, myit lhing rá é hkyô, byu pé lé hkò kyô akò.

¹³ Hau htoq agó, yhangmoq gi, nat gâng pé myo myo lé hkat htoq pyám byi mù, no é bang myo myo lé le xù but byi lui, lhoq ge byí akò nghut ri.

Yohan, Ulhum Hpyit Hui é Hkyô

Mht 4:1-12; Luk 9:7-9

¹⁴ Yesuq é mying hù lo é yanmai, Herut hkohkâm gi, Yesuq é hkyô lé wó gyo bê nghut ri. Byù ra-am gi, "Shí yuq gi, hau shí byuq bê Wui-myhup Sará Yohan dum dui toq lo é nghut lhê abe, hau é yanmai, yhang gi, hpungwup a-tsam hau pé lé wó kut é nghut ri." ga lui, tai bum akò nghut ri.

¹⁵ Ra-am gi, "Yhang gi, Eliyaq nghut ri." ga tai akò nghut ri.

Dum, ra-am tai kô é gi, "Yhang gi, hí hpyang lhê é myiqhtoi pé su, myiqhtoi rayuq nghut ri." ga ri.

¹⁶ Herut kúm gi, hau lé wó gyo jáng, "Ngò, ulhum hpyit pyám byí é Yohan gi, shí é mai dum dui toq bu-nhung!" ga tai ri.

¹⁷ Herut gi, yhanggu Hphilip é yhangmyi Herudiaq lé hâng yu pyám é hkyô é yanmai, Yohan lé chyup tui yù nhâng mù, htóng hkyô pyám nhang wú é sù nghut lhê.

¹⁸ Hkásu mù gà le, Yohan gi, Herut lé, "Nàng, nunggu é yhangmyi lé hâng yu é gi, tará a wang é nghut lhê." ga lui, tai byí nyi é yanmai nghut ri.

¹⁹ Hau mù, Herudiaq gi, Yohan lé gyai a jú dut byuq lui, sat pyám nau kôlhâng, a wó sat dut nyi ri.

²⁰ Hái mù gâ le, Herut gi, Yohan, dingmán chyoyiúng é sủ nghut é lé sé mù luí, yhang lé gyoq hkungga mù, yhang lé búng nyi é yanmai nghut ri. Yhang gi, Yohan é dang pé lé wó gyo jáng, gyô nhùng nhâng byuq kôhang, yhang tai é dang pé lé ru gyô nau nyi ashí nghut ri.

²¹ Nghut kôhang, Herut gi, yhang é hkú ladu hkyúm buinyi má, byù mó pé, gyezau pé, Galile mau suwún wui pé lé, jì yù mù zoshuq poi mó kut é yanmai, haú nyí gi, Herudiaq é matú, buinyi gè dut bê nghut ri.

²² Herudiaq é yhangzo byizo gi, wang lé lô mù, gó shít é hkún, Herut eq yhang é bing pé gi, myit ngón bum akô nghut ri.

Haú mù, hkohkâm gi, myiwe zo haú lé, "Nàng ô nau é hái nghut kôle, dung aq, ngò nàng lé byi rá nghut lhê." ga, dakam é dang-gidiq byi ri.

²³ Hau htoq agó, yhang gi, myiwe zo haú lé, "Nàng dung é hái nghut kôle, ngò byi rá; ngá é mingdán rawui gũ láng, byi rá nghut lhê." ga, dakam é danggidiq byi ri.

²⁴ Haú hkún, myiwe zo haú gi, htoq lô mù, yhang nu lé, "Hái dung le gè rá laq?" ga myi jáng, yhangnu gi, "Wui-myhup Sará Yohan é ulhum dung aq." ga tù tai kat ri.

²⁵ Myiwe zo haú gi, radá dâm hân hân wang lô mù, hkohkâm lé, "Ahkuí yhang, Wui-myhup Sará Yohan é ulhum lé, bó má kat mù byi laq." ga, dung tóngbân ri.

²⁶ Haú su ga jáng, hkohkâm gi, myit gyai yhang a ngón dut byuq kôhang, yhang dakam tô é danggidiq é yanmai le, bing pé é myoqdông lé tê nau é yanmai le, myiwe zo haú tai é dang lé a kâm he pyám lo nghut ri.

²⁷ Haú mù, hkohkâm gi, zúng é gyezo rayuq lé, Yohan é ulhum é hpyit lô rá matú, radá dâm hkunmó hkyô mù nhang kat ri. Haú mù, haú yuq gi, htóng hkaú má é luí, Yohan é ulhum lé, é hpyit mù,

²⁸ bó má kat luí, myiwe zo haú lé lo byi ri; myiwe zo haú gi, ulhum haú lé, yhangnú chyáng yu lô byi ri.

²⁹ Yohan é chángzô pé gi, haú hkyô lé wó gyo kôjáng, yhang é màng lé lé yù luí, lup má lô myhup pyám bekô nghut ri.

Byù Ngo Hkying Lé Byi Tsô É Hkyô

Mht 14:13-21; Luk 9:10-17; Yhn 6:1-14

³⁰ Lagyo pé gi, Yesuq chyáng dum jé zing lò kômù, yhangmoq kut lai lo é hkyô pé eq mhoqshit bê hkyô pé banshoq, Yhang lé tai kyo akô nghut ri.

³¹ Hau htàng, byù myo myo gi, yhangmoq chyáng htoq htoq wàng wàng kut nyí kô é yanmai, yhangmoq gi, zang zo ahkying lháng a wó kó nghut ri. Haú mù, Yesuq gi, chángzô pé lé, "Nga-nhùng, tsím tsám é jowò ralhùm má é mù, é nô yù sháng." ga tai ri.

³² Haú mù, yhangmoq gi, yhangmoq baú hai racham má jì mù, tsím tsám é jowò shut e lo akô nghut ri.

³³ Nghut kôhang, yhangmoq e lo é lé châng myang é bang myo myo gi, yhangmoq lé wú sé kôluí, wà hkangmó mai hkyi hkyô châng đin é kômù, yhangmoq é hí má jé to láng akô nghut ri.

³⁴ Yesuq gi, hai mai gyó dap lo é hkún, byù moq mó nyi to láng lé myàng jáng, yhangmoq gi, zung sủ a nyi é sau pé su dut kô é yanmai, yhangmoq lé wú shogyo luí, myo myo mhoqshit byi hi lo bê nghut ri.

³⁵ Bui gyum lò yâm jé jáng, Yhang é chángzô pé gi, lé lô kômù, Yhang lé, "Shí má gi, tsím tsám é jowò nghut é htoq agó, bui le gym lo bê;

³⁶ yhangmoq gi, awui ayám má é yhùm pé eq wà pé má, zoshuq lô ho wui zo kó sháng gaq, yhangmoq lé lo nhâng aq hkoi." ga tai akô nghut ri.

³⁷ Haú hkún, Yhang gi, "Nungmoq, yhangmoq lé rajung jung byi tso keq." ga tù tai jáng, yhangmoq gi, "Shí myhò é bang zo rá matú, ngamoq gi, é luí, denari* í sho eq muk é wui byi ra rá luq?" ga dum taú myí akô nghut ri.

³⁸ Nghut kôhang, Yhang gi, "Nungmoq chyáng muk hkâ-myhó wó akô? Ê wú wú keq." ga myí ri. Haú mù, yhangmoq gi, myang hô jáng, "Muk ngo long eq ngozo í du wó lhê." ga, dum tù tai akô nghut ri.

³⁹ Hau htàng, Yesuq gi, banshoq bang lé ahpúng hpúng kut wàhu yò má zùng nhâng rá matú, Yhang é chángzô pé lé tai kat ri.

⁴⁰ Haú mù, shiwa byu pé gi, rashô shô kut le, ngo xê xê kut le, ahpúng hpúng zung tò bùm bekô nghut ri.

⁴¹ Yesuq gi, haú muk ngo long eq ngozo í du lé yù mù, mauhkung shut tu wú to luí, jeju ban hkya-on jáng, muk lé hpê gam ri. Hau htàng, Yhang gi, byu pé hí má châng hkat to byi rá matú, Yhang é chángzô pé lé byi ri. Ngozo í du lé le, Yhang yù mù, banshoq bang lé gam byi ri.

⁴² Yhangmoq banshoq bang gi, zô gyí bùm bekô nghut ri.

⁴³ Hau htàng, haú chángzô pé gi, zô myhit tô é muk eq ngozo lé, raxe í mung bying shoq wó guq tsing yu ashí kó nghut ri.

⁴⁴ Haú hkún, zô é bang gi, yuqgè wui baú lháng, byù du ngo hkying nghut ri.

Yesuq, Wui Htoq Má Sô É Hkyô

Mht 14:22-33; Yhn 6:15-21

⁴⁵ Yesuq gi, haú shiwa byu pé lé byo lò nhang nyi é hkún jáng, Yhang é chángzô pé lé hai má wang jì nhâng mù, tũ tap má é Bet-saida wà mó shut dap lo láng nhang ri.

* 6:37 Denari rchap gi, byù rayuq é ra-nyí lhê é zuihpau eq wui ri.

⁴⁶ Yhangmoq lé shi-kyâm kat é htâng, Yhang gi, kyûdung râ ga, Yhang baú bùm shut doq é lô bê nghut ri.

⁴⁷ Buigyum htâng, lhai gi, nhông gùng má jé tô é u lé, Yesuq gi, Yhang baú za myi htoq má nyi tô ashí nghut ri.

⁴⁸ Lai tau mut é yanmai, haú chángzô pé gi, lhai lhu wuihké nyi kô é lé, Yesuq myang ri. Napsûn maubó zô sum hkyíng eq hkyuq hkyíng gyoro má, Yesuq gi, nhông htoq má so mù, yhangmoq shut é lô lui, yhangmoq é nàm mai lai lô rá dâ ri.

⁴⁹ Nghut kôlhang, yhangmoq gi, Yhang, nhông htoq má sô nyi é lé myang kôjáng, sobyô su ngàm kômù, kyek garú bum akô nghut ri.

⁵⁰ Hkâsu mù gâ le, yhangmoq banshoq bang gi, Yhang lé myàng kôlui, gyuq dân kô é yanmai nghut ri.

Nghut kôlhang, Yhang, radá dâm yhangmoq lé dâng nyo kat é gi, "Hkâgyuq kô. Ngò ru nghut lhê; zim za nyi keq." gâ ri.

⁵¹ Hau htâng, Yhang gi, lhai htoq má yhangmoq eq rahá ê doq ji jáng, lai gi, zim byuq bê nghut ri; haú mù, yhangmoq gi, gyai yhang mauhong byuq bùm bekô nghut ri.

⁵² Hkâsu mù gâ lé, yhangmoq gi, muk gam é laklai kumlhá eq séng lui a sê gyo kô é htoq agó, myitbun a bóng kô é yanmai nghut ri.

⁵³ Yhangmoq gi, gú dap lô kômù, Genesarat mau má jé wang lò jáng, lhai lé hau má lô shap tô akô nghut ri.

⁵⁴ Yhangmoq lhai mai gyó é hkûn jáng, byu pé gi, Yesuq lé lhom wú sê akô nghut ri.

⁵⁵ Haú mù, yhangmoq gi, hau mau ramau gón má din jón mù, nô bang lé taphkang mai waq lui, Yesuq nyi ri gâ é jowô hkangmó má, shui lé lo bum akô nghut ri.

⁵⁶ Yesuq jé é wà hkangmó, myuq hkangmó, awui ayàm má é wà hkangmó pé má, yhangmoq gi, nô byù lé gai pé má lé lhez to kôlui, Yhâng é bushi htâng má za lhâng, hau bang lé byi záng nhâng rà matú, Yhang lé dúng tóngbán akô. Yhang lé záng é lhunglhâng bang gi, lhoq gê byi é hui akô nghut ri.

7

A Sanséng Dut Nhang É Hkyô Pé Mht 15:1-20

¹ Haú Hparishe pé eq tarâ sará pé ra-am gi, Yerusalem wà mó mai jé lé lô kômù, Yesuq é nàm má lé zup zîng bum akô.

² Haú hkûn, Yhâng é chángzô pé ra-am gi, htúngli đông a chí pyâm é, a sanséng é loq eq zo shuq nyi kô é lé, yhangmoq myang akô nghut ri.

³ (Hparishe pé eq Yudaq byù banshoq bang gi, yhangmoq é íchyi íwà pé é htúngli lé châng é bang nghut lhê mù lui, loq hí a chí é gi, hai le a zô wú kô nghut ri.

⁴ Yhangmoq gi, gai pé mai tau lò jáng le, htoq hí a chí pyâm é, zojung a zo kô nghut é htoq agó, góm pé, hkoq pé, gyi chòkon pé lé chí é htúngli gotú pé lé le, châng akô nghut ri.)

⁵ Haú mù, Hparishe pé eq tarâ sará pé gi, Yesuq lé, "Náng é chángzô pé gi, hai mù lui, íchyi íwà pé é htúngli lé a châng e za, a sanséng é loq eq zo shuq nyi akô lú?" ga myi akô.

⁶ Haú hkûn, Yesuq gi, yhangmoq lé, "Gegùn labyoq kut bang é, nungmoq eq séng lui myiqhtoi Esai-aq htoi tô é dang má, "Byù shí bang gi, nhut htoq mai za Ngo lé hkunggâ akô; yhangmoq é myit nhikhlum gi, Ngò eq wê gâng nyi akô.

⁷ Yhangmoq gi, akôm má za, Ngo lé noqkuq nyi akô; hkâsu mù gâ le, yhangmoq é mhoqshit hkyô pé gi, byù đông mai mhoqshit é hkyô pé za nghut nyi ri.^{*}

ga kâ tô é gi, têng ri.
⁸ Nungmoq gi, Garai Gasang tô tô é hkunmó lé tô pyâm lui, byu é htúngli lé za, myhik zing tô akô nghut ri." ga lui tú tai ri.

⁹ Hau htâng, Yhang xoq tai é gi, "Nungmoq gi, yhumsing é htúngli lé za cháng rà matú, Garai Gasâng é hkunmó lé he-ngik pyâm é má, hpaqchyí gyai bo akô nghut ri.

¹⁰ Hkâsu mù gâ le, Mosheq gi, "Nungmoq é ínu íwa lé, hkungga keq."^{*} ga le, "Ínu íwa lé, nhing é sù ó yuq nghut kôle, sat pyâm é hui rà lhê."^{*} ga le, kâ tô é nghut lhê.

¹¹ Nghut kôlhang, nungmoq tai é gi, byù rayuq yuq, yhumsing é yhângnu yhângwa lé byi âng é zè lé, Korban za (Garai Gasang lé byi rà chyunghuq) nghut lhê gâ nhang akô.

¹² Haú mù, hau yuq lé, yhângnu yhângwâ é matú, hai a kut byi nhâng lô é đông dut bê nghut ri.

¹³ Haú đông mai, nungmoq gi, nungmoq chung gyó lo é htúngli é yanmai, Garai Gasâng é mungdang lé he-ngik pyâm akô; hau sù é hkyô myo myo lé le, nungmoq kut akô nghut ri." gâ ri.

¹⁴ Yesuq gi, shiwa byu pé lé Yhâng chyáng dum wut yù mù, tai é gi, "Nungmoq banshoq bang, ngò tai é lé gyó yù mù, sé lo keq;

¹⁵ Shinggan mai wang lo é hai jung le, byù lé a sanséng dut nhang é a nghut, nghut kôlhang, byu é unghkau mai htoq lô é zè kúm gi, byù lé a sanséng dut nhang lhê." gâ ri.

¹⁶ (Gyo rà nohkyap dap é sù gi, gyô yù sháng gaq.)" ga tai ri.^{*}

¹⁷ Yhang gi, byù moq mó mai htoq lô mù, yhúmhkau má jé wang lô é hkûn, Yhâng é

* 7:7 Esai 29:13 * 7:10 Htoq Lô 20:12 * 7:10 Htoq Lô 21:17 * 7:16 Bun zo shí gi, Chyúmlaiká ra-am má bo lhê, ra-am má a bò.

chángzô pé gi, dangtú haù eq séng luí, Yhang lé lhom myí akò nghut ri.

¹⁸ Haù mù, Yhang gi, yhangmoq lé, "Nung-moq gi, haù-í yhang go akò luq? Shinggan mai wang lo é hái jung le, byù lé a sanséng nhâng wó dut rà a nghut é hkyô lé, a sé kó lhu?"

¹⁹ Hkâsu mù gà lé, haù gi, byu é myit nhiklhum hkaù má wang ló é a nghut e za, wamdau hkaù má sheq wang ló é nghut mù, shinggan shut dum lhoq htoq pyâm é nghut lhê." ga tai ri. (Yhang isu ga tai é gi, zoshuq lunglhang sanséng lhê gà nau é đông nghut ri.)

²⁰ Hau htoq agó, Yhang xoq tai é gi, "Byù mai htoq ló é hái jung le, byù lé a sanséng nhâng wó dut é nghut lhê.

²¹ Hkâsu mù gà lé, ahkaù mai htoq lo é gi, byu pé é myit mai htoq ló é nghut mù, agè ashop é đông myit é hkyô pé, ashop é đông gungsho zùm yap é hkyô, hkaù é hkyô, byu sat é hkyô, su-myi sulàng lú hkyô,

²² myoqnoq é hkyô, agè ashop é hkyô, mhaù zô é hkyô, achag achyut zùm yap lhum é hkyô, manon é hkyô, lumù gansang é hkyô, gumrong é hkyô eq ngha é hkyô pé htoq lò é nghut lhê;

²³ Agè ashop é hkyô shí pé banshoq gi, byu é unghkaù mai htoq lo é nghut mù, byù lé a sanséng dut nhang ri." gà ri.

Tùngbaù Myiwe Myhi Rayuq É Lumjing Myit

Mht 15:21-28

²⁴ Yesuq gi, haù jowò mai htoq ló mù, Turuq eq Sidun maukyo shut e ló luí, yhùm ralhuh má wang é ri; Yhang nyi é hkyô lé, ó yuq lé lé a sé nhâng nau kôlhang, a wó zaù to nghut ri.

²⁵ Haù mù, agè ashop é nat wang júng tô é myiwe zo rayuq é yhangnu gi, Yhang nyi tô é hkyô lé wó gyô é hkùn jáng, Yhâng chyáng jé lé mù, Yhâng é hkyô wang má lé paí gop to luí,

²⁶ yhang zô chyáng mai nat gang lé hkat htoq pyâm byi rà matú, Yhang lé dúng tôngbàn ri. Myiwe haù gi, Suru-Hpiniki mau má é Grik byuhú nghut ri.

²⁷ Yesuq gi, "Zo wui† hí zô gyi kó sháng gaq; haì mù gà le, zô wui chyáng má é zoshuq lé yù mù, hkuí pé‡ lé byi tsô é jung a nghut." ga yhang lé tai kyô ri.

²⁸ Haù hkùn, yhang gi, "Yhumsing ê! Haù kum nghut ri; nghut kôlhang, siboi ô má é hkuí lhang, zô wui é zô myhit shuq htang lé, ge zo lhê a nghut lhu?" ga dum tú tai ri.

²⁹ Haù mù, Yesuq gi, yhang lé, "Nang tú tai é dang hau é yanmai, ló lo aq hkoi; haù nat gang gi, nung zô chyáng mai htoq ló byuq bê nghut ri." ga tai kat ri.

³⁰ Myiwe myhi haù gi, yhùm má dum taù jé lo é hkùn, yhang zo chong htoq má leq to lánq é lé le, nat gang htoq byuq bê nghut é lé le, lo myang ri.

Nojit É Eq Dang A Hkyang É Sù Lé Lhoq Gê Byi É Hkyô

³¹ Yesuq gi, Turuq mau mai dum htoq ló mù, Sidun mai sô lai ló luí, Dekapoli mau hkaù đông lai byit mù, Galile nhông shut gyô jé ló ri.

³² Haù hkùn, byù ra-am gi, nojit é eq dang a hkyang é byù rayuq lé, Yhâng chyáng shuí lé lô kômù, haù yuq é ahtoq má loq ke byi rà matú, Yhang lé dúng tôngbàn akò nghut ri.

³³ Yesuq gi, haù yuq lé baù za byù hpung mai shuí htoq yù mù, yhâng é nohkyung má loqnyhui htaù háng byi luí, sôkan byé tik yù mù, haù yuq é shô má htaù byi ri.

³⁴ Hau htang, Yhang gi, mauhkung shut tu wú mù, soq mó shê luí, "Ehpahta!" (Lichyúm gi, "Bóng aq hkoi!") ga luí, haù yuq lé tai kat ri.

³⁵ Haù hkùn, haù yuq é nohkyap le bóng byuq luí, shô le nyhôm byuq mù, balang hkyâng hkyâng dang wó nyô bê nghut ri.

³⁶ Yesuq gi, haù hkyô ó lé le a tai kyo rà matú, yhangmoq lé hkùm kôlhang, yhang-moq gi, je hkùm le, je tai pyo akò nghut ri.

³⁷ Byu pé gi, gyaì yhang mauhong byuq bùm kôluí, "Yhang gi, haì lé le, ge é đông chyat kut ri; nojit sù lé, wó gyo shoq, dang a hkyâng sù lé, wó nyô shoq, kut byi bê nghut ri." ga luí, tai bum akò nghut ri.

8

Byù Myi Hkying Lé Byi Tsô É Hkyô
Mht 15:32-39

¹ Haù yoq má, gotú byù moq mó gi, lé zing bum akò; haù bang zoshuq langhpyut to kô é yanmai, Yesuq gi, Yhâng é chángzô pé lé wut yù mù,

² "Ngò, shí bang lé wú shogyo ri; yhang-moq gi, Ngò eq rahá nghut nyi é sum nyi bô bê, haì le a myàng zo kó nghut ri.

³ Yhangmoq chyáng má é ra-am gi, mau we mai lé é bang nghut é yanmai, yhang-moq lé, zòmut gũ yhùm shut nhang kat é nghut le gi, hkyolat má mutyut yut é ló hui kó rá nghut lhê." ga tai ri.

⁴ Haù hkùn, Yhâng é chángzô pé gi, Yhang lé, "Isu é yoso má nhing, shí myhò bang lé luq shoq byi tso rà zoshuq gi, hkâmá é yù rà lhu?" ga tai akò.

⁵ Yesuq gi, "Nungmoq, muk hkâ-myhó long wó akò lhu?" ga taù myi jáng, yhang-moq gi, "Nyhit long." ga, dum tú tai akò nghut ri.

† 7:27 Zo wui gà é gi, Yudaq byu pé lé gà é nghut lhê.

‡ 7:27 Hkuí pé gà é gi, tùngbaù pé lé gà é nghut lhê.

⁶ Haù mù, Yhang gi, byù hpûng lé myigùng htoq má zùng nhang to luí, muk haù nyhit long lé yù mù, jeju ban hkya-on jáng, myhik hpé luí, haù bang lé gàm byi rà matú, Yhâng é chángzô pé lé byi kat ri; haù mù, yhangmoq gi, haù bang lé gàm byi akò nghut ri.

⁷ Yhangmoq gi, ngo-nú zo ratsui le wó akò nghut ri; haù mù, Yhang gi, ngozo haù pé é matú jeju hkya-on luí, chángzô pé lé dum gàm byi nhang ri.

⁸ Yuq hkgangmó zô gyi bùm kô é htâng má, haù chángzô pé gi, amyit ahtâng lé nyhit mung bying shoq wó guq tsing yu ashí kò nghut ri.

⁹ Zô é bang gi, byù myi hkying kò nghut ri; Yesuq gi, haù bang lé, nhang kat luí.

¹⁰ Yhâng é chángzô pé eq rahá, lhaí má wang ji mù, Dalamanuhta mau má é je akò nghut ri.

¹¹ Hparishe pé gi, lé mù, Yesuq eq dang htíng htíng lhùm akò; hau htoq agó, yhangmoq gi, mauhkung má é kumlhá lé dúng é dông, Yhang lé chyam wú akò nghut ri.

¹² Yesuq gi, myit nò-kying kying luí, yhangmoq lé tai é gi, "Haí mù luí, shí ipyat lhê é byu pé gi, limik kumlhá dúng akò lú? Ngò teng za tái kôlé, shí ipyat má é bang lé, hai kumlhá le tân shit rà a nghut." gâ ri.

¹³ Hau htâng, Yhang gi, yhangmoq lé pyâm to mù, lhaí má dum taù wang ló luí, tú tap shut gû dap e ló bê nghut ri.

*Hparishe Pé Eq Herut É Múnchi
Mht 16:5-12*

¹⁴ Haù chángzô pé gi, muk yu chùng rà lé tô-myhí pyâm kôluí, lhaí hkaù má muk ralong za ru wó akò nghut ri.

¹⁵ Yesuq gi, yhangmoq lé, "Nungmoq gi, Hparishe pé eq Herut é múnchi* lé, sidiq luí, koi pyâm nyi keq." ga tái ri.

¹⁶ Haù hkûn, yhangmoq gi, "Nga-nhùng chyang muk a bo é yanmaí, haù su ga tái é nghut ri." ga luí, rayuq eq rayuq tái lhùm bum akò nghut ri.

¹⁷ Haù su ga tái lhùm nyi kô é lé Yesuq sé jáng, yhangmoq lé, "Nungmoq gi, muk a bo é hkyô lé, haí mù tái lhùm nyi akò lú? Ahkuí jé shoq, nungmoq gi, a byu-myàng, a sê gyo shi kó lú? Nungmoq é myit nhikhlum gi, ru htan nyi ashí kó lú?"

¹⁸ Myoq dap to kôluí nhing, a myàng kó lú? Nohkyap dap to kôluí nhing, a wó gyo kó lú?"

¹⁹ Ngò, muk ngo long lé myhik hpé mù, byù ngo hkying lé byi tsô é hkûn, zô myhit shuq htâng lé, nungmoq hkâ-myhó mung wó guq tsing yu é lé, bun ashí kó lú?" ga myi jáng, yhangmoq gi, "Raxe í mung." ga tú tái akò.

²⁰ Dum, Yesuq gi, "Ngò, muk nyhit long lé myhik hpé mù, byù myi hkying lé byi tsô é hkûn, zô myhit tô é ajap azo lé, nungmoq hkâ-myhó mung wó guq tsing yu kô é lú?" ga myi jáng, yhangmoq gi, "Nyhit mung." ga dum tú tái akò.

²¹ Haù hkûn, Yesuq gi, "Haù nghut le nhing, ahkuí le, a sê gyo shi kó lú?" ga, yhangmoq lé myi ri.

Myoqjit Sù Rayuq Lé Lhoq Gê Byi É Hkyô

²² Yhangmoq gi, Bet-saida wà mó má jé lò kô é hkûn, byù ra-am gi, myoqjit é byù rayuq lé, Yesuq chyang shuí lé lô mù, haù yuq lé záng byi rà matú, dúng tóngbán akò.

²³ Yesuq gi, myoqjit sù haù yuq é loq lé zui mù, wà shinggan shut shuí htoq ló luí, yhâng é myoq má sòkan byé tik byi mù, loq ke byi luí, "Nàng, rajung jung lé myang ri lú?" ga myi kat ri.

²⁴ Haù jáng, yhang gi, tu wú kat luí, "Byu pé gi, sikgâm su dut luí, hkyô sô wún é lé, ngò myang ri." ga tái ri.

²⁵ Hau htâng, Yesuq gi, haù yuq é myoq má Yhâng é loq dum ke byi ri; haù hkûn, haù yuq é myoq gi, bóng lô mù, ge byuq luí, haí lé le san za myàng bê nghut ri.

²⁶ Yesuq gi, haù yuq lé, "Wà hkaù má hkâwang ló lo." ga tái luí, yhâng é yhùm shut ló nhang kat bê nghut ri.

*Hkrisduq Ga, Petruq Yin Yu É Hkyô
Mht 16:13-20; Luk 9:18-21*

²⁷ Yesuq eq Yhâng é chángzô pé gi, Kesare-Hpilipi wà mó awui ayàm má é wà pé shut e ló é hkûn, hkyô má, Yesuq gi, chángzô pé lé, "Byu pé gi, ngo lé ó yuq nghut lhê ga, tái akò lú?" ga myi ri.

²⁸ Haù hkûn, yhangmoq gi, "Ra-am gi, Wui-myhup Sará Yohan ga, góbang gi, Eliyaq ga, dum ra-am gi, myiqhtoi rayuq yuq nghut ri ga tái akò." ga, Yhang lé tú tái akò.

²⁹ Yesuq gi, "Nungmoq gi, ngo lé ó yuq nghut lhê nghu akò lú?" ga, yhangmoq lé xoq myi jáng, Petruq gi, "Nàng gi, Hkrisduq[†] nghut ri." ga tú tái ri.

³⁰ Yesuq gi, haù hkyô ó lé le a tái kyo rà matú, yhangmoq lé tái hkúm ri.

Byu Yhangzo Gi, Sat Pyâm É Hui Luí, Dum Dui Toq Râ Hkyô

Mht 16:21-28; Luk 9:22-27

³¹ Hau htâng, Yhang gi, yhangmoq lé mhoshit é má, "Haù Byu Yhangzo gi, zing-ri é myo myo hui zo luí, suwún wui, hkyangjong agyi pé, tarâ sará pé eq he-ngik pyâm é hui mù, sat pyâm é hui ra rà nghut lhê; nghut kôlhang, sum nyi nghú rà buinyi má, dum dui toq rà nghut lhê." gâ ri.

* 8:15 Shí má tái é múnchi gi, Hparishe pé eq Herut é mhoshit hkyô lé, lhoq pyo é lé gâ lhê. † 8:29 Grik dong Hkrisduq gâ é gi, xù but hui Sù gâ é lichyùm nghut mù, Hebre dong "Mesaia" gâ é eq rajung za nghut lhê.

³² Yesuq gi, haú hkyô lé san za dut shoq tái nyi é yanmai, Petruq gi, Yhang lé rahkyam shut shuí htoq yú mù, Yhang lé tân ri.

³³ Nghut kôlhang, Yesuq gi, Yhâng é chángzô pé lé lhing wú kat mù, Petruq lé, "Tsadan nàng, Ngá chyáng mai hpàng aq! Nàng gi, Garai Gasang eq sêng é hkyô lé a myit e za, byù eq sêng é hkyô lé za myit é sú nghut ri." ga tân kat ri.

³⁴ Hau htàng, Yhang gi, byù moq mó eq Yhâng é chángzô pé lé wut yù mù, tái é gi, "Ngá htàng cháng naú sù ó yuq nghut kôle, yhumsing gùng yhumsing he-ngik pyám mù, yhumsing é tapzìng lé waq chùng luí, cháng ra rá nghut lhê.

³⁵ Hkâsu mù gà le, yhumsing é asak lé hkyi yù naú sù ó yuq nghut kôle, asak sum rá nghut lhê; nghut kôlhang, Ngá é yanmai le, haú gabú danglù é yanmai le, yhumsing é asak sùm pyám é sú kúm gi, asak hkyi yu é hui rá nghut lhê.

³⁶ Byù gi, mینگan gón lé wó sing to kôlhang, yhumsing é asak woi-nyí sùm byuq é nghut le gi, yhâng é matú, hai akyù bò rá lúhú?

³⁷ Byù gi, yhumsing é asak woi-nyí lé, hai éq wó htaí yù rá lúhú?

³⁸ Yubak mara myô é eq su-myi sulàng shut é ipyat shí má, Ngò eq Ngá é dang lé hoq pyám é sú ó yuq lé le, haú Byu Yhangzo gi, Yhâng Wá é hpungwup shing kang bo é éq, haú chyoyúng maumang lagyô pé eq rahá jé lé é hkún, hoq pyám rá nghut lhê."⁹ gà ri.

9

¹ Hau htàng, Yesuq gi, yhangmoq lé, "Ngò, nungmoq lé teng za tái kôlé, shí má yap tô é bang ra-am gi, Garai Gasang é mingdán, hpungwup a-tsám éq jé lé lo é lé, a myang é za shi kô rá a nghut." ga tái ri.

*Yesuq É Ihpýô Isâm Htaí Lo É Hkyô
Mht 17:1-13; Luk 9:28-36*

² Hkyuq nyí lai htàng má, Yesuq gi, Petruq lé le, Yakuq eq Yohan lé le, shuí chùng mù, yhangmoq baú myhang é bùm ralhùm má doq ló akò; haú hkún, yhangmoq é myoq hí tpe má, Yesuq é ihpyô isâm htaí lo ri.

³ Hau htoq agó, Yhâng é mebu gi, wik wik duq hpyu zan lo ri; myidám htoq má, ó yuq le haú-i hpyú shoq a wó xaú hpyu wú é nghut lhê.

⁴ Eliyaq eq Mosheq gi, yhangmoq é hí má htoq shut mù, Yesuq eq dăng nyo lhum nyi akò.

⁵ Haú mù, Petruq gi, Yesuq lé, "Rabai é, shí jowò má nga-nhùng nyi le ge ri; haú mù, Náng é matú ralhùm, Mosheq é matú ralhùm, Eliyaq é matú ralhùm kut, ngamoq lé, zúm sùm lhum saí nhàng laq." ga tái ri.

⁶ Hkâsu mù gà le, yhangmoq gi, gyai yhang gyuq dan bùm kô é yanmai, Petruq gi, haí tái rá le a sé mù, haú su gà é nghut ri.

⁷ Hau htàng, mhut htoq lô luí, yhangmoq lé htuq zìng lô mù, mhut hkaú mai htoq lo é hté gi, "Shí yuq gi, Ngò chyitdap é Ngá zo nghut lhê; Yhâng é dang gyo keq." gà ri.

⁸ Haú hkún jáng, chángzô pé gi, lhingkyuq má wú kat le, Yesuq za yhangmoq eq rahá nghut nyi é mai lai luí, ó lé le, a myàng lo kó nghut ri.

⁹ Yhangmoq, bùm mai taú gyó lô kô é hkún, Yesuq gi, haú Byu Yhangzo shi é mai a dum dui toq toq gi, yhangmoq myang é hkyô lé, ó lé le a tái kyo rá matú tái hkún tô ri.

¹⁰ Chángzô pé gi, dang haú lé myit má kat to kôluí, "Shi é mai dum dui toq rá." gà é lichyúm lé, rayuq eq rayuq myí lhum bum akò nghut ri.

¹¹ Hau htàng, yhangmoq gi, "Eliyaq hí lé ra rá nghut lhê ga, tará sará pé haí mù tái kô é lúhú?" ga, Yesuq lé myí akò.

¹² Haú hkún, Yesuq gi, "Eliyaq hí jé lé é gi, teng bê nghut luí, lhunglhang lé dum lajàng tô é nghut ri. Nghut kôlhang, haú Byu Yhangzo gi, myo myo hpuzo luí, he-ngik pyám é hui ra nghut lhê ga le, Chyúmdang má ká to ashí, a nghut kó lúhú?

¹³ Ngò, nungmoq lé tái kôlé, Eliyaq gi, jé lé bê nghut mù, yhang eq sêng luí Chyúmdang má ká tô é eq rajung za, hóng chyang shuí lé lo, ô nau é dông banshoq kut bekò nghut ri." ga tái ri.

*Nat Dap É Yuqgè Zo Rayuq Lé Lhoq Gé
Byí É Hkyô*

Mht 17:14-20, 22-23; Luk 9:37-45

¹⁴ Yhangmoq gi, chángzô pé chyáng dum taú jé lô kô é hkún, haú bang é lhingkyuq má byù moq mó zìng lé é lé le, tará sará pé, haú bang eq dang htíng htíng lhum nyi kô é lé le, myang akò.

¹⁵ Haú má nyi tô é lhunglhang bang gi, Yesuq lé myang kat é eq, maú byuq kôluí, din é mù, é shi-kyám akò nghut ri.

¹⁶ Haú hkún, Yesuq gi, yhangmoq lé, "Nungmoq gi, yhangmoq eq hai lé dang htíng htíng lhum nyi akò lúhú?" ga myí ri.

¹⁷ Byù hpúng hkaú má é rayuq tú tái kat é gi, "Sará é! Nhut jit nhang é nat wang júng tô é ngá é yuqzô lé, Náng chyáng shuí lé lo lhê.

¹⁸ Nat haú gi, yhâng chyáng wàng hkgangmó, yhang lé myi htoq má lhoq leqbat nhang ri; haú mù, yhang gi, nhut mai guttsú htoq lhê, zui kyik kyik lhê, langhtan lo lhê, dut ri; hau é yanmai, nat haú lé hkat htoq pyám byi rá matú, Náng é chángzô pé lé dúng wú kôlhang, yhangmoq a wó dut kó nghut ri." gà ri.

¹⁹ Haú hkûn, Yesuq gi, "Lumjîng myit a bo é amyú pé ê, Ngò gi, hkâ-myháng jé shoq nungmoq eq rahá nyi mù, wó jân nyi rá lú? Yuqgè zo haú lé, Ngá chyáng shuí lé lô keq." ga tai kat ri.

²⁰ Haú mù, yhangmoq gi, yuqgè zo haú lé shuí lé lô akò; nat haú gi, Yesuq lé myang kat é eq yhang, yuqgè zo haú lé langhtân nhang ri; yuqgè zo haú gi, myigùng má lèng leq lui goleng leng mù, nhut mai tsù-myup htoq nyi ri.

²¹ Haú hkûn, Yesuq gi, yhângwa lé, "Yhang, isu dut é hkâ-myháng myáng bê lú?" ga myi jáng, yhâng wa gi, "Zoshâng hkûn mai nghut bê.

²² Nat haú gi, yhang lé lhoq sat pyám naú mù, myi má le, wui má le, anum num lèng wàng nhang wú bê nghut lhê; nghut kôlhang, Nàng, rajung jung wó kut byí é nghut le gi, ngá hpe lé shogyo yù laq, garúm yù laq." ga tú tai ri.

²³ Yesuq gi, "Nàng, wó kut byí é nghut le gi, nghú, haú mù tai lhê lú? Lumjîng myit bò su é matú gi, haí le wó dut lhê." ga, yhang lé tai ri.

²⁴ Haú zôshang é yhângwa gi, radá dâm, "Ngò lumjîng lhê; nghut kôlhang, ngá é lumjîng myit gi, shaú ashî nghut é yanmai garúm yù laq." ga tai garú ri.

²⁵ Yesuq gi, byù hpúng din zîng lé lô kô é lé, myàng jáng, haú agè ashop é nat lé, "Nojit, nhutjit nhang é nat é! Ngò, nang lé hkunmò hkyô lhê, yhâng chyáng mai htoq lô aq; hkâ-nhâm le, yhâng chyáng hkâdum wàng lo." ga tân kat ri.

²⁶ Haú hkûn, nat haú gi, garu mù, zoshâng haú lé wum kat langhtân nhang lui, htoq lô byuq bê. Zoshâng haú gi, shî mâng gùng su dut byuq é yanmai, byù myo myo gi, "Yhang shí bê nghut ri." ga tai akò.

²⁷ Nghut kôlhang, Yesuq gi, zôshang é loq má zui lui, tu toq kat ri; haú mù, zoshâng gi, yap to bê nghut ri.

²⁸ Yesuq, yhúmhaú má wang ló é htâng, Yhâng é chángzô pé gi, "Ngamoq gi, haí mù, nat haú lé a wó hkat htoq é lú?" ga, tsik za Yhang lé myi akò.

²⁹ Yesuq gi, "Haú jung nat lé gi, kyûdùng é dông za a nghut jáng, wó hkat htoq rá a nghut." ga, yhangmoq lé tú tai ri.

³⁰ Yhangmoq gi, haú jowò mai htoq lô mù, Galile mau mai lai lô akò; nghut kôlhang, Yesuq gi, ó lé le a sé nhâng naú nghut ri.

³¹ Haí mù gà le, Yhang gi, "Haú Byu Yhangzo gi, byu pé é loq má ap pyám é hui rá nghut lhê; haú bang gi, Yhang lé sat pyám kó rá nghut lhê; nghut kôlhang, Yhang gi, shi é htâng sum nyi nghú rá nyi má, dum dui toq rá nghut lhê." ga, Yhâng é chángzô pé lé mhoqshít byí nyi é yanmai nghut ri.

³² Yhâng é chángzô pé gi, dang haú lé a sé gyo kôlhang, Yhâng chyáng a wám myi kó nghut ri.

Kô Dik Sù Gi, Ó Yuq Nghut Lhê Lú?

Mht 18:1-5; Luk 9:46-48

³³ Yhangmoq gi, Kaperna-um wà má jé é akò nghut ri. Yesuq gi, yhúmhaú má nyi tô é hkûn, chángzô pé lé, "Hkyô má, nungmoq, hai hkyô lé dang chyin chyín lhum kô é lú?" ga myi ri.

³⁴ Nghut kôlhang, yhangmoq gi, zim za nyi tô akò; hkâsu mù gà le, ko dik sù gi, ó yuq nghut lhê nghú é hkyô lé, hkyolat má, yhangmoq dang chyin chyín lhum kô é yanmai nghut ri.

³⁵ Yesuq gi, zùng mù, haú chángzo raxe í yuq lé, wut yù lui, "Kô dik naú sù ó yuq nghut kôle, tiq dik sù eq banshoq bâng é dui-nhâng zoshâng dut ra rá nghut lhê." ga tai ri.

³⁶ Hau htâng, Yhang gi, zoshâng rayuq lé shuí yù mù, yhangmoq é gung gùng má shap to lui, dum bún yù mù, yhangmoq lé tai é gi, ³⁷ "Shí sù é zoshâng lé, Ngá é mying mai hap yu é sù ó yuq nghut kôle, Ngo lé hap yu é sù nghut bê; Ngo lé hap yu é sù ó yuq nghut kôle, Ngo lé za hap yu é a nghut, Ngo lé nhang kat é Sù lé hap yu é le nghut lhê." gà ri.

Nga-nhúng Lé Gyè A Kut É Sù Gi, Nga-nhúng É Hkyam Shut Nghut Lhê Gà É Hkyô
Luk 9:49-50

³⁸ Haú hkûn, Yohan gi, "Sarà é! Náng é mying lang lui, nat gâng pé lé hkat pyám byí wún é byù rayuq lé, ngamoq myang ri. Yhang gi, nga-nhúng chyáng a lòm sù nghut é yanmai, yhang lé ngamoq hkúm pyám é nghut lhê." ga tai ri.

³⁹ Yesuq kúm gi, "Yhang lé hkâhkúm kó; Ngá mying lé lang lui, laklai kumlhá kut é sù gi, razup za má, Ngò eq séng lui, a ge é hkyô pé lé tai rá a nghut;

⁴⁰ Hkâsu mù gà le, nga-nhúng lé gyè a kut é sù gi, nga-nhúng é hkyam shut nghut lhê.

⁴¹ Ngò, nungmoq lé teng za tai kôle, nungmoq gi, Hkrisduq eq séng é bang nghut lhê gà é yanmai, ngá é mying lé lang lui, nungmoq lé, uchyam ragóm byi huq é sù ó yuq nghut kôle, zuihpau lé hkyak myang hkam yù rá za nghut lhê.

Mara Shut Nhang É Hkyô

Mht 18:6-9; Luk 17:1-2

⁴² Ngo lé lumjîng é zoshâng wui má é rayuq lé, mara kut shut nhang é sù gi, yhâng é lingzing má luqlui long mó tuí hut byi lui, wuimau má é dú hkyô pyám é hui é nghut lé gi, yhang é matú je gè rá nghut lhê.

⁴³ Náng é loq eq, nang lé mara kut shut nhang é nghut le gi, haú lé hpuyit dú pyám aq; loq í loq dap lui, hkâ-nhâm le, myiduq a dat shum é ngaraí ming wàng rá htoq má, loq

raloq eq za ahtum abyuq é asak wó râ shut wang le gi, náng é matú je ge ri.

⁴⁴ (Haù ngaraí ming gi, 'yhangmoq lé hké nyi é luq le a shí, myiduq le a shùm' é jowò nghut lhê.)*

⁴⁵ Náng é hkyi èq, nang lé mara kut shut nhang é nghut le gi, haù lé hpyit dú pyám aq; hkyi í hkyi dap luí, hkâ-nhâm le, myiduq a dat shum é ngaraí ming má dú hkyô pyám é hui râ htoq má, hkyi rahkyi za dap luí, ahtum abyuq é asak wó râ shut wang le gi, náng é matú je ge ri.

⁴⁶ (Haù ngaraí ming gi, 'yhangmoq lé hké nyi é luq le a shí, myiduq le a shùm' é jowò nghut lhê.)

⁴⁷ Náng é myoqjí èq, nang lé mara kut shut nhang é nghut le gi, haù lé lap choq pyám aq; myoqjí í jí dap gú, ngaraí ming má dú hkyô pyám é hui râ htoq má, myoq rají eq za, Garai Gasâng é mingdán má wang le gi, náng é matú je ge ri.

⁴⁸ (Haù ngaraí ming gi, 'yhangmoq lé hké nyi é luq le a shí, myiduq le a shùm' é jowò nghut lhê.)*

⁴⁹ Hkâsu mù gâ le, hkungga sho lé xo kat luí lhoq sansêng é su, myi gi, yuq hkangmó lé lhoq sansêng râ nghut lhê.*

⁵⁰ Xo gi, ge lhê. Nghut kôlhang, xomân kân byuq jáng gi, hkâsu kut dum wó lhoq ngam yú râ thú? Nungmoq gi, xo su ngam nyi mù, rayuq eq rayuq nguínón nyi keq." ga taí ri.

10

Myi, Làng Gâng É Hkyô

Mht 19:1-12; Luk 16:18

¹ Hau htâng má, Yesuq gi, Kaperna-um mai htoq ló mù, Yuda mau mã é maukyo má é jé luí, Yodan làng tú tap má dap ló bê nghut ri; byú myo myo gi, Yhâng chyáng dum zing lé lô kólú, Yesuq gi, Yhang lhaq kut nyi é eq rajung za, haù bang lé mhoqshít byí ri.

² Hparishe pé ra-am gi, lé jé kómù, "Byú rayuq, yhumsing é yhangmyi lé lhoq káng pyám le, tará wang lhê thú?" ga myí é dong, Yhang lé chyam wú akó.

³ Yesuq gi, "Mosheq gi, nungmoq lé, hkâsu ga hkunmó hkyô tô é thú?" ga taú myí ri.

⁴ Haù hkùn, yhangmoq gi, "Yugè rayuq gi, lhoq kang laiká ká mù, yhangmyi lé wó nhang pyám lhê ga, Mosheq, ahkáng byí tô ri." ga tú taí akó.

⁵ Yesuq dum tú taí é gi, "Nungmoq é myit nhikhum htân kô é yanmai, Mosheq gi, tará haù lé ká tô é nghut lhê.

⁶ Nghut kôlhang, mau htoq xâng hkun lé, Garai Gasang gi, 'yugè eq myiwe lé hpan é nghut lhê'.*

⁷ 'Hau é yanmai, yugè gi, yhumsing ínu íwâ chyáng mai htoq luí, yhangmyi eq rahá rading ralhum za kut nyi mù,

⁸ yhangnhik gi, gungsho ralhum za dut byuq kó râ nghut lhê.* Haù mù luí, yhangnhik gi, í yuq a nghut lo é za, rayuq za dut bê nghut ri.

⁹ Haù mù luí, Garai Gasang lhoq tsúm tô é lé, byú gi, a lhoq kang sháng gaq." gâ ri.

¹⁰ Yhumhkaù má, yhangmoq nyi tô é hkùn lé, chángzô pé gi, haù hkyô eq séng luí, Yhang lé dum sai myí akó.

¹¹ Haù hkùn, Yhang gi, "Yhumsing é yhangmyi lé káng pyám mù, myiwe gotú dum hâng yu é sú ó yuq nghut kôle, su-myi lú é sú dut bê nghut mù, yhangmyi lé shut é sú nghut bê.

¹² Myiwe rayuq le, yhumsing é yhanglâng lé káng pyám mù, yugè góyuq eq dum hâng é nghut le gi, sulàng lú é hkyô lé kut bê nghut ri." ga tú taí ri.

Zoshâng Wui Eq Yesuq É Hkyô

Mht 19:13-15; Luk 18:15-17

¹³ Byu pé gi, zoshâng wui lé Yesuq záng byi sháng gaq ga, Yesuq chyáng shuí lé lo akó; nghut kôlhang, chángzô pé gi, yhangmoq lé lhom tân hkùm akó nghut ri.

¹⁴ Haù lé Yesuq myàng jáng, Yhang gi, wú nhik-yo naù luí, "Haù zoshâng wui lé, Ngá chyáng lé nhâng keq; yhangmoq lé hkâhkùm zing tò kó; hkâsu mù gâ le, Garai Gasâng é mingdán gi, haù su é bâng é mingdán ru nghut lhê.

¹⁵ Ngò, nungmoq lé teng za taí kôlé, ó yuq nghut kôle, Garai Gasâng é mingdán lé, zoshâng su kut a lhom hap yu é nghut le gi, mingdán haù má wó wâng râ a nghut." ga yhangmoq lé taí ri.

¹⁶ Hau htâng, Yesuq gi, zoshâng wui lé bún yú mù, yhangmoq ahtoq má loq ke luí, shimân byí ri.

Sùt Wó É Zorâm Rayuq É Hkyô

Mht 19:16-30; Luk 18:18-30

¹⁷ Yesuq gi, hkyô dum so xoq e ló é hkùn, byú rayuq gi, din lé lô mù, Yhâng é hí má hkyihput htuq luí, "Ge é Sará é, ahtum abyuq é asak wó yú râ matú, ngò haí kut ra râ thú?" ga myí ri.

¹⁸ Haù mù, Yesuq gi, "Haí mù, Ngo lé ge é Sará nghu lhê thú? Garai Gasang mai lai luí, ge é ó yuq le a nyi.

¹⁹ Jep e tará má, 'Byú hkâsat, su-myi sulàng hkâlú, hkâhkau, a teng a mán é saksé hkâhkám, hkâmô zo, nángnu nángwa lé hkungga aq!*' ga bo tô é lé, nàng sê lhê." ga tú taí ri.

* 9:44 Bun zo 44, 46, gi, Chyúmlaiká myo myo má a bo é nghut lhê. * 9:48 Esai 66:24 * 9:49 Nhung 2:13 * 10:6 Apùn 1:27 * 10:8 Apùn 2:24 * 10:19 Htoq Ló 20:12-16

²⁰ Haú hkûn, haú yuq gi, "Sarâ ê, haú pé banshoq lé, ngò, zoshâng hkûn mai cháng bê nghut lhê." ga tai ri.

²¹ Yesuq gi, haú yuq lé wú tsuq to mù, yhang lé chiytdap lui, tai é gi, "Nàng kut rà rajung rà tô ashî; lô mù, nàng wò miwó lé ùng pyâm lui, myùng bang lé byi pyâm aq; haú jáng, nàng, mauhkung htoq má sutzè wó rà nghut lhê; haú mù, Ngá htâng lé cháng aq." gâ ri.

²² Haú yuq gi, dang haú lé wó gyo jáng, sutzè gyai wó sù nghut é yanmai, myoqdong shum byuq mù, gyai yhang myit a ngón é eq lô byuq bê nghut ri.

²³ Yesuq gi, lnhngkyuq byu wú mù, Yhâng é chángzô pé lé, "Sutzè wó bang gi, Garai Gasâng é mingdán má wàng rà matú, haú-i yhang wui ri-nhung!" ga tai ri.

²⁴ Chángzô pé gi, Yhang tai é dang é yanmai, mauhong bum akò nghut ri. Nghut kôhang, Yesuq dum xoq tai é gi, "Zo wui ê, Garai Gasâng é mingdán má wàng rà matú, haú-i yhang wui ri-nhung!" ga tai ri.

²⁵ Sutzè wó sù rayuq, Garai Gasâng é mingdán má wó wàng rà htoq, gola-uq radu âpno mai wó wang lai rà gi, je lui rà nghut lhê." gâ tai ri.

²⁶ Haú hkûn, chángzô pé gi, je riyhang maú byuq kômù, rayuq eq rayuq, "Haú su ru nghut le gi, ó yuq za hkyi yu é hui rà nghut lhê thú?" ga, tai lhum bum akò nghut ri.

²⁷ Haú hkûn, Yesuq gi, yhangmoq lé wú kat mù, "Haú hkyô lé, byù mai gi, wó kut rà a nghut; nghut kôhang, Garai Gasang gi, wó dut lhê; hkâsu mù gâ le, Garai Gasang gi, lhunglhang lé wó kut é Sù nghut lhê." ga tai ri.

²⁸ Haú hkûn, Petruq gi, Yhang lé, "Ngamoq gi, wó é gû lhunglhang lé tô pyâm to lui, Náng htâng cháng bê nghut lhê." ga tai ri.

²⁹ Haú mù, Yesuq tù tai é gi, "Ngò, nungmoq lé teng za tai kôlé, Ngá é yanmai le, gabú danglu é yanmai le, yhumsing é yhùm, gumang gu-nhá, ìnu ìwa, zo dù wui eq yò pé lé tô pyâm tô é sù ó yuq nghut kôle,

³⁰ shí pyat lhê é yhùm pé, gumang gu-nhá wui, ìnu pé, zo dù wui eq yò pé lé, rashô tù wó hkam yù lui, zing-ri é hkyô pé lé le hui kó rà nghut é htoq agó, htang pyat má le, ahtum abyuq é asak wó yù rà nghut lhê.

³¹ Nghut kôhang, hí nghut nyi é bang myo myo gi, htâng gyó byuq kó rà nghut mù, htâng gyó nyi bang yuq gi, hí bekò rà nghut lhê." gâ ri.

Yesuq, Yhang Shî Râ Hkyô Lé Dum Tai Ê Hkyô

Mht 20:17-19; Luk 18:31-34

³² Yhangmoq gi, Yerusalem wà mó shut doq lô nyi kô é u lé, Yesuq gi, yhangmoq é

hí má sô tô ri; haú hkûn, htâng má sô é bang gi, gyuq nyi bùm kô é u lé, haú chángzô pé gi, maú byuq bum akò nghut ri; Yesuq gi, haú chángzo raxe í yuq lé gotù kut dum wut yù mù, Yhâng chyáng dut lò rà hkyô, yhangmoq lé tai kyô é gi,

³³ "Wú keq, nga-nhung gi, Yerusalem wà mó shut doq lô nyi lhê; haú Byu Yhangzo gi, hkyangjong agyi pé eq tarâ sarâ pé é loq má ap byi pyâm é hui rà nghut lhê; haú bang gi, Yhang lé, shî rà mara byi lui, tungbau pé é loq má ap byi pyâm kó rà nghut lhê.

³⁴ Haú bang gi, Yhang lé, wuizui kut pyâm é, sôkan byé gyün é, nhuq bat é kut yù mù, sat pyâm kó rà nghut lhê. Hau htâng sum nyi má, Yhang dum dui toq lò rà nghut lhê." gâ ri.

Yakuq eq Yohan nhik dung é hkyô
Mht 20:20-28

³⁵ Hau htâng má, Zebedi é yhangzo Yakuq eq Yohan nhik gi, Yesuq chyáng lé kômù, "Sarâ é, ngá-nhik dung é gû banshoq, Nàng kut byi rà lé, ngá-nhik ô nau ri." ga tai akò.

³⁶ Haú hkûn, Yhang gi, "Ngò, nungnhik lé haí kut byi rà ô nau akò thú?" ga myi ri.

³⁷ Yhangnhik gi, "Náng é hpungwup shingkan hkau má, ngá-nhik tâng lé, Náng é loqyò hkyam má rayuq, loqpaí hkyam má rayuq kut, zùng nhâng laq." ga tù tai akò.

³⁸ Nghut kôhang, Yesuq gi, "Nungnhik haí dung nyi é lé, nungnhik a sé kó nghut ri. Ngò shuq rà góm* lé, nungnhik wó shuq kó rà thú? Ngò hkam yù rà bapisma lé, nungnhik wó hkam yù kó rà thú?" ga yhangnhik lé tù tai ri.

³⁹ Haú hkûn, yhangnhik gi, "Nga-nhik wó dut lhê." ga tù tai kôjáng, Yesuq gi, "Ngò shuq rà góm lé, nungnhik shuq kó rà nghut lhê; ngò hkam yù rà bapisma lé le, nungnhik hkam yù kó rà nghut lhê.

⁴⁰ Nghut kôhang, Ngá é loqyò, loqpaí hkyam má zùng rà ahkáng lé gi, Ngò byi jung a nghut. Jowò haú pé gi, hen to byi é hui bâng matú za nghut lhê." ga yhangnhik lé tai ri.

⁴¹ Haú su gâ é hkyô lé, haú gotù chángzo raxê yuq wó gyo kôjáng, yhangmoq gi, Yakuq eq Yohan nhik lé nhik-yô akò nghut ri.

⁴² Yesuq gi, yhangmoq banshoq bang lé wut tsing yù lui, "Tungbau pé lé uphkan é ga bang gi, tungbau pé lé up zô nyi kô é hkyô lé le, haú eq rajung za, yhangmoq é ming up suwún wui le, yhumsing é ahkáng ayá lé chúng mù, up zô nyi kô é hkyô lé le, nungmoq sê lhê.

⁴³ Nghut kôhang, nungmoq chyáng gi, haú su a dut kó sháng gaq, nungmoq má, byù mó

* 10:38 Góm eq bapisma gâ é gi, jamjau hui rà eq shî rà lé, tai nau é nghut lhê.

dut naù sù ó yuq nghut kôle, nungmoq é dui-nhâng zoshâng dut ra râ nghut lhê.

⁴⁴ Hau htoq agó, nungmoq má ushuq dut naù sù ó yuq nghut kôle, banshoq bâng é jùn dut ra râ nghut lhê.

⁴⁵ Hkâsu mù gâ le, haù Byu Yhangzo lhang gi, dojaù é lé hkam yù râ matú jé lé é a nghut e za, dojaù râ matú eq byù myo myô é matú, shîhtai gunglik hkungga dông, Yhâng é asak lé byi pyám râ matú sheq, jé lé é ru nghut lhê." ga, yhangmoq lé tai ri.

Myoqjit Sù Barateme, Myoq Dum Myang É Hkyô

Mht 20:29-34; Luk 18:35-43

⁴⁶ Hau htâng, yhangmoq gi, Yerihko wá má jé lô akó nghut ri. Yesuq eq Yhâng é chángzô pé gi, byù moq mó eq rahá, wá mai htoq lô nyí kô é hkûn, Barateme (Teme é yhangzo) gâ é myoqjit sù rayuq gi, hkyô yám má dung zô zung tô ri.

⁴⁷ Yhang gi, Nazaret wá byù Yesuq lai lô é lé wó gyo jang, "Dawiq é Yhangzo Yesuq é, ngo lé shogyo yù laq ô!" ga garú kat ri.

⁴⁸ Haù mù, byù myo myo gi, zim za nyi râ matú yhang lé tân hkûm akó; nghut kôlhang, yhang gi, "Dawiq é Yhangzo é, ngo lé shogyo yù laq ô!" ga, je riyhang garú kat ri.

⁴⁹ Haù mù luí, Yesuq gi, yap nô kat mù, "Yhang lé jì kat keq." ga tai jang, yhangmoq gi, "Myit ngón aq hkoi; Yhang, nang lé jì nyi ri; toq aq." ga myoqjit sù haù lé tai akó.

⁵⁰ Haù hkûn, haù yuq gi, yhâng é buhîng lé hkyut pyám mù, byam chyù luí, Yesuq chyáng lé jé ri.

⁵¹ Yesuq gi, yhang lé, "Ngò, nang lé haì kut byi râ ô nau ri lú?" ga myi jang, yhang gi, "Sarà é, ngò myoq myàng nau ri." ga tù tai ri.

⁵² Yesuq gi, "Ló aq hkoi, nang é lumjîng myit gi, nang lé lhoq gê byi bê nghut ri." ga tai kat é hkûn jang, yhang gi, myoq wó myàng mù, Yesuq é lô é hkyô shut châng é lô bê nghut ri.

11

Yesuq, Yerusalem Wà Mó Má Wang Lô É Hkyô

Mht 21:1-11; Luk 19:28-40; Yhn 12:12-19

¹ Yesuq eq Yhâng é chángzô pé gi, Yerusalem wá mó eq chyâng lo nyi kô é hkûn, Tsanlun Bùm má é Bethpage wá eq Behtani wá má jé lô kôjáng, Yesuq gi, Yhâng é chángzo í yuq lé,

² "Nungnhik, hí má é wá má é keq; wá haù má wang é hkûn jang, ó le a jì wú shí é logúng zo tuí to lánng é lé, é myàng kó râ nghut lhê; haù lé hpyi yù mù, Ngá chyáng she lô keq.

³ Byù rayuq yuq mai, 'Haì mù, haù su kut nyi akó lú?' ga nungnhik lé lhom myi jang, 'Shí du lé, haù Yhumsîng râ ri ga, razup má dum taù dé byi râ nghut lhê.' nghú tù tai keq." ga pyîng luí, nhang kat ri.

⁴ Haù nhik gi, e lô mù, hkyô mó yâm má é hkumdong nám má tuí tô é logúng zo radu lé, é myàng kôluí, haù lé tuí hpyi nyi akó.

⁵ Haù hkûn, haù má yap tô é bang ra-am gi, "Haì mù, logúng tuí hpyi nyi akó lú?" ga myi akó.

⁶ Haù jang, yhangnhik gi, Yesuq pying kat é eq rajung za tai kyo kôjáng, yhangmoq gi, she lô râ ahkang byi kat akó nghut ri.

⁷ Yhangnhik, logúng zo haù lé Yesuq chyáng she jé lo é hkûn, logúng hau é gùng htoq má, yhangmoq é buhîng pé buí jang, hau é ahtoq má, Yesuq doq jì ri.

⁸ Byù myo myo gi, yhangmoq é buhîng pé lé, hkyô má hkyut hkang byi akó; ra-am gi, yò pé má zân yu é mhandîng lé hkang byi akó nghut ri.

⁹ Hí má so bang eq htâng má châng é bang gi,

"Hosana!"*

Haù Yhumsîng é myîng mai jé lé lô Sù gi, hkungsó wó nyí sháng gaq ô!

¹⁰ Jé lé lô râ nghut é, nga-nhîng é îwa Dawiq é mingdán gi, hkungsó wó nyí sháng gaq ô!

Htoq tsáng myhâng má hosana nghut sháng gaq ô!"*

ga luí, tai garú bum akó nghut ri.

¹¹ Yesuq gi, Yerusalem wá mó má jé mù, noqkuq yhùm má wang é luí, lhîngkyuq má é jung hkangmó lé wú ri; nghut kôlhang, buí gym lô bê nghut é yanmai, Yhâng é chángzo raxe í yuq eq rahá, Behtani wá shut htoq é lô bekó nghut ri.

Maihpáng Gâm Ashi A Zui Râ Matú Tai É Hkyô

Mht 21:18-19

¹² Hau htang nyi, yhangmoq, Behtani wá mai htoq lô kô é hkûn, Yesuq gi, zo mut bê nghut ri.

¹³ Yhang gi, ahaq wúm é maihpáng gâm ragàm lé, we we mai byu-myang kat jang, agàm haù má ashì zui lhê laq ga é jé wú le, ahaq mai lai luí, haì le a myàng nghut ri. Haì mù gâ le, maihpáng-shi zui yâm a nghut é yanmai nghut ri.

¹⁴ Haù mù, Yesuq gi, shigâm haù lé, "Ahkuí mai gi, nang chyáng má é ashì, ó yuq le a myàng zo lo kó sháng gaq." ga tai ri. Yhâng é chángzô pé gi, haù su ga tai é dang lé wó gyô yu akó nghut ri.

* **11:9** Hebre dang má, *hosana* gâ é gi, "ahkuí hkyi yù laq" gâ é nghut lhê. Nghut kôlhang, bun zo 9, 10 má gi, hkyá-on dang dông chung é nghut lhê. ✱ **11:10** Hkyá-on 118:25-26

Yesuq, Noqkuq Yhûm Lé Lhoq Sansêng Pyâm É Hkyô

Mht 21:12-17; Luk 19:45-48; Yhn 2:13-22

¹⁵ Yhangmoq, Yerusalem wà mó má jé é hkûn, Yesuq gi, noqkuq yhûm má wang é mù, hau má é zè ung zè wùi kut nyi é bang lé, hkak htoq pyâm lui, ngùn htai zo bâng é siboí pé eq hpângkyui ung zo bâng é tanghkuq pé lé tu mhúq pyâm byi ri.

¹⁶ Hau htoq agó, Yhang gi, ó yuq lé nghut kôle, ung zè lé noqkuq yhûm mai a waq lai nhâng kut pyâm ri.

¹⁷ Yesuq, yhangmoq lé mhoqshit é gi, "Ngá yhûm gi, byu myû lhunglhang bâng é matú, kyúdung yhûm ga rá nghut lhê."^{*}

ga kâ tô é a nghut kó lúh? Nghut kôlhang, nungmoq gi, 'damaq hkyûng' kut pyâm bekó nghut ri." gâ ri.^{*}

¹⁸ Hkyangjong agyi pé eq tarâ sará pé gi, hau lé wó gyo kômú, Yhang lé hkâsu kut wó sat pyâm rá hkyô ho nyi akó; nghut kôlhang, shiwa byu pé gi, Yhang mhoqshit é hkyô má, myit zing zuq bùm kô é yanmai, yhangmoq gi, Yhang lé gyuq bum akó nghut ri.

¹⁹ Myinhêng jé jáng, Yesuq eq Yhâng é chángzò pé gi, wà hkaú mai htoq ló bekó nghut ri.

Maih páng Gâm Nyhuí Shi Byuq É Hkyô

Mht 21:20-22

²⁰ Htang napkyó, yhangmoq sô lai ló le, maihpáng gâm gi, amyit mai yhang nyhuí kyuq shi byuq é lé myang akó.

²¹ Petruq gi, myit bûn kat lui, "Rabai é, wú aq! Nang nhing pyâm é maihpáng gâm gi, nyhuí shi byuq bê nghut ri." ga lui, Yesuq lé tai ri.

²² Hau hkûn, Yesuq gi, "Garai Gasang lé lumjing keq.

²³ Ngò, nungmoq lé teng za tai kôlé, ó yuq nghut kôle, i-myit má ùng-àng é hkyô a bo é za, yhumsing tai é hkyô gi, dut lò rá nghut lhê ga lumjing kô é nghut le gi, bùm shi lé, 'Htot mù, wuimau má ló gyó wâng aq.' ga tai le lhang, hau hkyô dut byi rá nghut lhê.

²⁴ Hau mù lui, Ngò, nungmoq lé tai kôlé, nungmoq hai dung le le wó yú rá nghut lhê ngù lumjing kô é nghut le gi, wó yú kó rá za nghut lhê.

²⁵ Mauhkung htoq má é nungmoq é Íwa gi, nungmoq é mara lé hkyut pyâm byi sháng gaq, nungmoq gi, kyúdung yap tô é hkûn lé, rayuq yuq, nungmoq lé shut é mara bo é nghut jáng, mara hkyut pyâm byi keq;

²⁶ (Nghut kôlhang, nungmoq mai mara a hkyut pyâm byi é nghut le gi, mauhkung htoq má é nungmoq é Íwa le, nungmoq é mara lé hkyut pyâm byi rá a nghut.)" ga tù tai ri.[†]

Yesuq É Ahko Ahkáng Lé Myí Chyam É Hkyô

Mht 21:23-27; Luk 20:1-8

²⁷ Yhangmoq, Yerusalem wà mó má dum jé mù, Yesuq gi, noqkuq yhûm wàng hkaú má sô yông wùn é u lé, hkyangjong agyi pé, tarâ sará pé eq suwún wui gi, Yhâng chyáng lé jé kômú,

²⁸ "Hai ahko ahkáng èq, Nang, shí pé lé kut nyi lhê lúh? Hau su kut rá ahko ahkáng, Nang lé ó yuq byi é lúh?" ga myí akó.

²⁹ Hau jáng, Yesuq gi, "Ngò le, nungmoq lé rajung myí wú kôlé, tù tai wú keq; hau hkûn, hai ahko ahkáng èq, Ngò, shí pé kut é hkyô lé tai kyo rá nghut lhê.

³⁰ Yohan byi é bapisma gi, mauhkung mai lúh? A nghut jáng, byu chyáng mai lúh? Tai wú keq!" ga tau myí kat ri.

³¹ Hau hkûn, yhangmoq chòm hpyé lhum kô é gi, "Mauhkung mai nghut lhê' ngù nga-nhung tai jáng le, 'Hau nghut le nhing, hai mù, yhang lé a lumjing kô é lúh?' ga rá nghut;

³² 'Byu chyáng mai nghut lhê.' ngù jáng le..." gâ ri. (Yohan gi, myiqhtoi rayuq gè gè nghut lhê ga, lunglhang bang lumjing bùm kô é yanmai, yhangmoq gi, hau byu pé lé gyuq bum akó nghut ri.)

³³ Hau mù, yhangmoq gi, Yesuq lé, "Ng-amoq a sé." ga tù tai akó.

Hau hkûn, Yesuq gi, "Hau jáng, Ngò le, hai ahko ahkáng èq shí pé kut é hkyô lé, nungmoq lé a tai kyo." ga, yhangmoq lé tai ri.

12

Tsibiyiq Hkyâm Sai Bang Lé Dangtú Yu É Hkyô

Mht 21:33-46; Luk 20:9-19

¹ Hau htang, Yesuq, dangtú đông yhangmoq lé tai é gi, "Byu rayuq gi, tsibiyiq hkyâm rahkyam sai to mù, lnhingkyuq kyâm to lui, tsibiyiq wing pyik htoq rá donghkong dù to mù, machya ralhú sai tò ri. Hau htang, yhang gi, hkyâm hau lé, hkyâm sai zo bâng chyáng ngho byi to mù, gó ming shut é ló byuq bê nghut ri.

² Kyôshu yoq jé jáng, yhang gi, yhang yù àng é tsibiyiq shi é yú rá matú, dui-nhang zoshang rayuq lé, hkyâm sai zo bâng chyáng nhang kat ri.

³ Nghut kôlhang, hau bang gi, hau yuq lé lhom chyup bat lui, loq kôm tau nhang kat akó.

⁴ Hau mù, yhang gi, gotú dui-nhang zoshang rayuq lé, yhangmoq chyáng dum nhang kat ri; yhangmoq gi, hau yuq lé le, ulhum má lhom bat cheq byi kôluí, hoq lhoq hpú kat akó nghut ri.

* 11:17 Esai 56:7

* 11:17 Yer 7:11

† 11:26 Bun zo shí gi, Chyúmlaiká ra-am má za bo lhê.

⁵ Hau htâng, rayuq lé dum nhang kat jáng, haú yuq lé gi, lhom sat pyám akô; Yhang gi, góbang myo myo lé le, yhangmoq chyáng nhang kat ashí nghut ri; yhangmoq kúm gi, ra-am lé lhom bat, ra-am lé lhom sat pyám, kut akô nghut ri.

⁶ Ló htâng má, yhang gi, yhang chyitdap é zo lé nhang kat rá za ru nghut alô; haú mù, yhang gi, 'Ngá zo lé gi, yhangmoq lhom hkungga kó rá nghut lhê.' ga, yhangzo lé nhang kat ri.

⁷ Nghut kôlháng, haú bang gi, 'Shí yuq gi, silí wunlí sang yú rá sú nghut lhê; lé keq, yhang lé sat pyám sháng, haú jáng sheq, silí wunlí pé lé nga-nhúng wó yú rá nghut lhê.' ga rayuq eq rayuq tai lhum bum akô.

⁸ Haú mù, yhang lé chyup yú luí, sat pyám mù, hkyám shinggan shut dú htoq pyám akô nghut ri.

⁹ Haú jáng, tsibiyiq hkyám yhumsing gi, yhangmoq lé hkásu kut rá lhu? Yhang gi, é mù, haú hkyám saí zo bang lé sat pyám luí, hkyám haú lé, góbang lé htot ngho byí pyám rá nghut lhê.

¹⁰ Chyúmdang má, 'Yhúm saí bâng eq hkyin htoq pyám é luqgok gi, htungchyún má é ahkyak dik é luqgok dut bê.

¹¹ Shí hkyô gi, haú Yhumsing kut é nghut luí, nga-nhúng é myoq hí má mauhpo dut bê nghut ri.' ga bô tô é lé, nungmoq a nghap wú kó lhu?"¹⁰

¹² Hau htâng, yhangmoq gi, dangtú haú, yhangmoq lé lhoq ang luí tai é hkyô lé, sé kô é yanmai, Yhang lé chyup yú rá matú hkyô ho nyi akô. Nghut kôlháng, yhangmoq gi, byú moq mó lé gyuq kô é yanmai, Yhang lé nyhi pyám to luí, htoq ló byuq bekô nghut ri.

Kehtaq Lé Kang Kat Byí É Hkyô
Mht 22:15-22; Luk 20:20-26*

¹³ Hau htâng má, yhangmoq gi, Yesuq é dang má mara hô luí Yhang lé chyup yú rá matú, Hparishe pé ra-am eq Herut é byu pé ra-am lé, Yesuq chyáng nhang kat akô.

¹⁴ Haú bang gi, Yhâng chyáng lé jé kômù, "Sarà ê, Nang gi, tengmán sú nghut é lé, ngamoq sé lhê. Nang gi, ó hai ga rá lé le hai su a ngàm sú nghut é yanmai, ó yuq é myoqdong lé le a tê byí é za, Garai Gasâng é hkyô lé, tengmán é đông mhoqshit é sú nghut ri. Haú mù, Kehtaq lé kang kat byí le gi, ge lhê lhu?"

¹⁵ Ngamoq kat ra rá lhu? A kat ra rá lhu?" ga Yhang lé tai akô.

Yesuq kúm gi, yhangmoq, gegùn labyoq kut nyí kô é lé sé mù, "Nungmoq gi, hai mù, Ngo lé lé chyam wú akô lhu? Denari ngùn

rachap yu lé keq, ngò wú wú bá." ga tai kat ri.

¹⁶ Haú hkùn, yhangmoq yu jé lô jáng, Yhang gi, "Shí má, ó yuq é alhô eq masat laiká dap tô ri lhu?" ga myî ri.

Yhangmoq gi, "Kehtaq é nghut ri." ga tú tai akô.

¹⁷ Haú mù, Yesuq gi, yhangmoq lé, "Kehtaq é lé gi, Kehtaq lé byi keq; Garai Gasâng é lé gi, Garai Gasang lé byi keq." ga tai jáng, yhangmoq gi, maú byuq bùm bekô nghut ri.

*Saduke Pé, Yesuq Lé Myí Chyam É Hkyô
Mht 22:23-33; Luk 20:27-40*

¹⁸ Haú dum dui toq hkyô a joq gâ é Saduke pé gi, Yesuq chyáng lé jé kômù, dangmyi lé myí akô.

¹⁹ Yhangmoq myi kô é gi, "Sarà ê, myiwe wó é byú rayuq gi, zo dù a dap é za shi byuq é nghut jáng, yhanggu gi, yhangmang é awut ashín xoq byi rá matú, yhâng rhat lé chui gon ra rá nghut lhê ga, nga-nhúng lé, Mosheq kâ to byi ri.

²⁰ Hí hpyang lé, gumang nhiktâng wui nyhit yuq nyi akô. Lagám yuq gi, myiwe yú luí, zo dù a dap é za shi ló byuq bê nghut ri.

²¹ Lanong yuq gi, yhangmang mó é chui lé gon mù, zo dù a dap é za shi ló byuq bê. Lalaq yuq le, haú eq rajung za dut byuq bê nghut ri.

²² Haú nhiktâng wui nyhit yuq gi, zo dù a dap é chyat shi ló byuq bùm bekô nghut ri. Htâng má, myiwe myí haú le châng shi ló byuq bê nghut ri.

²³ Haú mù luí, haú dum dui toq é buinyi má, myiwe myí haú gi, hká yuq é yhangmyi nghut rá lhu? Hkásu mù gâ le, yhang gi, haú nyhit yuq é yhangmyi dut wú bê sú nghut ri." gâ akô.

²⁴ Yesuq gi, yhangmoq lé, "Nungmoq hkyô nghoq é gi, Chyúmdang eq Garai Gasâng é wum-o a-tsam lé, a sé kô é yanmai nghut lhê, a nghut kó lhu?"

²⁵ Haú shi byuq bê bang dum dui toq é hkùn gi, myi byi myi yú hkyô joq lo rá a nghut; yhangmoq gi, mauhkung htoq má é maumang lagyô pé su dut byuq kó rá nghut lhê.

²⁶ Shi é mai dum lhoq dui toq é hkyô eq séng luí, Mosheq kâ tô é laiká má lháng, haú nyé duq nyi é mhanpúng mai, Garai Gasang gi, yhang lé, 'Ngò gi, Abraham é Garai Gasang, Isak é Garai Gasang, Yakup é Garai Gasang nghut lhê.'¹⁰ ga kâ tô é lé, nungmoq a nghap wú kó lhu?"

²⁷ Garai Gasang gi, shi bê bâng é Garai Gasang a nghut, dui nyi bâng é Garai Gasang sheq ru nghut lhê. Nungmoq gi, shut dik bekô nghut ri." ga tai ri.

* 12:11 Hkya-on 118:22-23

* 12:12 Kehtaq gâ é gi, "hkoséng" gâ é nghut lhê.

* 12:26 Htoq Ló 3:6

Ahkyak Dik É Jep É Tarâ
Mht 22:34-40; Luk 10:25-28

²⁸ Tarâ sarâ rayuq gi, lé lô mù, yhangmoq tai hting lhum nyi kô é lé, lé wó gyô ri. Yhang gi, hau bang lé, Yesuq rago tú tai nyi é lé myàng jáng, Yesuq lé, "Jep é tarâ banshoq má, hkâ lhum gi, ahkyak dik lhê lúhú?" ga myi ri.

²⁹ Hau jáng, Yesuq gi, "Ahkyak dik é jep é tarâ gi, 'Israelaq byu pé ê, gyo wú keq! Nganhung é Yhumsing Garai Gasang za, Garai Gasang nghut lhê.

³⁰ Hau Yhumsing náng é Garai Gasang lé, náng é myit nhikhlum banshoq, náng é asak woi-nyí lhum gón, náng myit é hkyô banshoq, náng é wum-o banshoq èq, chyitdap rá lhê. [✧] gâ é nghut lhê.

³¹ Hau htang lhum gi, 'Náng gung lé náng chyitdap é su, náng é chyangnâm má é bang lé lé chyitdap aq. [✧] gâ é nghut lhê. Shí í lhúm htoq kô é tarâ gotú a joq lo." ga yhangmoq lé tú tai ri.

³² Hau hkún, tarâ sarâ hau yuq gi, "Gyo nau bê, Sarâ ê! Garai Gasang rayuq za nghut lhê, gotú a nyi lo ga náng tai é gi, têng ri.

³³ Garai Gasang lé, náng é myit nhikhlum banshoq èq le, náng é sê gyo é nyan banshoq èq le, náng é wum-o banshoq èq le, chyitdap rá lhê gâ é eq, náng gung lé náng chyitdap é su, náng é chyangnâm má é bang lé lé chyitdap rá lhê gâ é gi, myi nyhé hkungga eq gotú hkungga pé banshoq htoq má, je ahkyak lhê." ga tai ri.

³⁴ Yesuq gi, yhang hpaqchyí bo é đông tú tai nyi é lé myàng jáng, "Náng gi, Garai Gasang é mingdán eq a we lo nghut ri." ga yhang lé tai kat ri. Hau hkún mai gi, ó yuq le, Yhang lé dangmyi a wám myi lo kó nghut ri.

Hkrisduq Gi, Ó Yuq É Yhangzo?
Mht 22:41-46; Luk 20:41-44

³⁵ Yesuq, noqkuq yhúm má mhoqshit nyi é hkún lé tai é dang gi, "Hâi mù, hau tarâ sarâ pé gi, Hkrisduq lé, Dawiq é yhangzo za nghut lhê gâ akô lúhú?

³⁶ Dawiq gi, Chyoiyung Woi-nyí èq tai nhang é má,

'Hau Yhumsing Garai gi, ngá é Yhumsing lé, "Ngò, náng é gumlau gye pé lé, náng é hkyiwa ô má tô pyâm é hkying jé shoq, Ngá é loqyo hkyam shut zung nyi shi aq." ga tai ri. [✧]

gâ ri.
³⁷ Hau mù, Dawiq yhang lhang, Hkrisduq lé, Yhumsing gâ é nghut le gi, yhangzo za hkâsu ge nghut rá lúhú?" gâ ri.

Byù hpung mó gi, Yhâng é dang lé, gabú myit èq gyô nyi bum akô nghut ri.

³⁸ Yesuq gi, mhoqshit uchyang tai é má, "Tarâ sarâ pé lé sidiq nyi keq. Yhangmoq gi, réng é buhing wut chung mù, sô yông wún lui, gai pé má lhom shi-kyâm yù rá lé le,

³⁹ tarajong pé má é ahkyak dik é zung jang pé eq poi pé má é réng é zung jowò pé má myang zung rá lé le, ô nau nyi bum akô.

⁴⁰ Yhangmoq gi, chuimó pé é yhúm-yò pé lé hpyoq zo hpyoq shuq kôluí, kyú hing hing dung shit mhaú é bang nghut akô. Hau su é bang gi, dam byí é je riyhang hui zo kó rá nghut lhê." gâ ri.

Chuimó Myhi Kat É Alu Ngùn
Luk 21:1-4

⁴¹ Yesuq gi, alu sidek nám má zung to mù, noqkuq yhúm má é alu sidek hau má, byù moq mó ngùn kat nyi é lé wú nyi ri. Sút wó bang myo myo gi, ngùn ga-myhó myhó kat bum akô.

⁴² Hau hkún, myung é chuimó myhi rayuq gi, lé mù, gyi htinchap ngùn zo í chap lé kat ri.

⁴³ Yesuq gi, Yhâng é chángzô pé lé wut yù mù, "Ngò, nungmoq lé teng za tai kôlé, shí myung é chuimó myhi gi, góbang banshoq htoq má je myo kat bê nghut ri.

⁴⁴ Hau góbang banshoq gi, yhumsing agùn agó wó é má é lé, lé kat akô; yhang kúm gi, myung sú nghut kôle, yhâng é asak lé bau rá ngùn banshoq lé, kat bê nghut ri." ga tai ri.

13

Ló Htàng Buinyi Má Dut Lò Râ Hkyô
Mht 24:1-21, 29-35; Luk 21:5-33

¹ Yesuq, noqkuq yhúm mai htoq ló é hkún, Yhâng é chángzo rayuq gi, "Sarâ ê, wú aq; hkâ-i ko é luqgok pé! Hkâ-i hkik é yhúm pé!" ga Yhang lé tai kat ri.

² Hau hkún, Yesuq gi, "Nàng, yhúm mó shí pé lé myàng lhê a nghut lúhú? Luqgok shí pé gi, rachâm htoq racham lhang a kê lhum lo shoq, hpyoq hpyi pyâm é hui rá nghut lhê." gâ tú tai ri.

³ Yesuq gi, Tsanlun Bùm má, noqkuq yhúm shut hù mù zung tô é hkún, Petruq, Yakuq, Yohan eq Andre pé gi, Yhâng chyáng lé jé kómù,

⁴ "Hau hkyô pé gi, hkâ-nhám dut lò rá lúhú? Hau dut lò rá hkún, hkasú é kumlhá htoq lô rá nghut lhê lúhú? Ngamoq lé tai kyô wú laq." ga Yhang lé bau myi akô nghut ri.

⁵ Hau mù, Yesuq gi, yhangmoq lé, "Nungmoq lé, ó yuq èq le a wó shuí nghoq sháng gaq, sidiq nyi keq.

⁶ Hkâsu mù gâ le, 'Ngò gi, hau yuq* nghut lhê.' ga, Ngá mying lé llang é byù myo myo pô htoq lô mù, byù myo myo lé shuí nghoq kó rá nghut lhê.

✧ 12:30 Tarâ Pun 6:4-5 ✧ 12:31 Nhung 19:18 ✧ 12:36 Hkyá-on 110:1 * 13:6 Hau yuq gâ é gi, Hkrisduq lé gâ é nghut lhê.

⁷ Nungmoq gi, majan dut nyi é hkyô eq majan eq sêng é danglám pé lé, wó gyo kôjáng, hkâgyuq dân kó. Háu hkyô pé gi, dut lò rá za nghut lhê; nghut kôlhang, lô htâng é buinyi gi, a nghut shi.

⁸ Byù ra-myù eq ra-myù, mingdán ralhú eq ralhú majan zân lhùm lò kó rá nghut lhê. Jowò myo myo má, layàng nún é, mutmó gyó é pé dut lò rá nghut lhê. Háu pé gi, wuìhke jamjau hkyo é apùn awang za ru nghut ashi.

⁹ Nungmoq gùng nungmoq sidiq nyi keq. Hkâsu mù gà le, yhangmoq gi, nungmoq lé, tarâ rùng pé má é ap pyám kó rá nghut é htoq agó, tarajong pé má nungmoq lé nhuq bat kó rá nghut lhê. Hau htoq agó, nungmoq gi, Ngá mying é yanmai, mauzau wuì eq hkohkam pé é hí má, saksé đông yap ra kó rá nghut lhê.

¹⁰ Háu gabú danglù gi, amyù banshoq lé hí hko kyo ra rá nghut lhê.

¹¹ Nungmoq gi, chypu yu é hui lui, jep hui é hkún, hai tái rá lé, hkâ-myit chiq kó. Ahkyíng jé jáng, nang lé myit htoq lô nhang é dong za tái aq; hkâsu mù gà le, dang háu pé gi, nungmoq tái é a nghut, háu Chyoiyúng Woi-nyí eq tái nhang é ru nghut lhê.

¹² Nhiktàng gi, nhiktàng yhangchang, íwa gi, yhangzo lé, shí shoq ap pyám lhum kó rá nghut lhê; zo wuì gi, mó wuì lé gumlau toq mù, sat pyám nhâng kó rá nghut lhê.

¹³ Byù lunglhang bang gi, Ngá é yanmai, nungmoq lé a nguì kut kó rá nghut lhê; nghut kôlhang, jihùm jé shoq wó hkam jân nyi é sù gi, hkyi yu é hui rá nghut lhê.

¹⁴ Háu lhoq hten lhoq hpyoq é achag achyut hkyô¹⁰ gi, yhang a nyi àng é jowò má yap tô é lé, nungmoq myàng kôjáng (laiká nghap é sù gi, sê gyo shàng gaq), Yuda mau má nyi é bang gi, bùm pé shut hpan doq lò kó shàng gaq.

¹⁵ Yhumhkung htoq má nyi tô é sù gi, yhúmhaù má é zè hai lé le, a lò gyó wang yù lo shàng gaq.

¹⁶ Yò má nyi tô é sù gi, yhâng é buhng lé a lò tau yu nyi lo shàng gaq.

¹⁷ Háu buinyi pé má, zògùng dut é myiwe wuì eq náu huq ashí nghut é ínu wuì gi, hkâ-í yhang wuìhke bekó nghut ri myhi-nhung.

¹⁸ Háu hkyô gi, gyoqmyò má a dut shàng gaq, kyúđùng nyi keq.

¹⁹ Hkâsu mù gà le, Garai Gasang, mingkan lé hpan tô é hkún mai ahkuì jé shoq, hkâ-nhám le a dut wú shí é wuìhke jamjau mó gi, háu buinyi pé má dut lò rá nghut lhê; háu sù é hkyô gi, htàngnùng má hkâ-nhám le dum dut lò rá a nghut.

²⁰ Buinyi háu pé lé, háu Yhumsing Garai mai a lhoq shaù é nghut le gi, ó yuq le asak wó lut rá a nghut. Nghut kôlhang, Yhang

hkyin yù bê nghut é, hkyin yù hui bâng é matú gi, buinyi háu pé lé, Yhang lhoq shaù pyám byi bê nghut ri.

²¹ Háu ahkyíng má, byù rayuq yuq mai, nungmoq lé, 'Wú keq, shí má Hkrisduq nyi ri.' ga le, 'Wú keq, Yhang hê má nyi ri.' ga le, tái jáng, nungmoq hkâjáng kó.

²² Hkâsu mù gà le, Hkrisduq apyoq pé eq myiqhtoi pyoq pé pô htoq lô mù, wó dut é nghut jáng, hkyin yù hui bang lé lhang, wó lhoq nghoq shoq ga, kumlhá pé eq laklai kumlhá pé lé kut shit kó rá nghut lhê.

²³ Háu mù, nungmoq sidiq nyi keq; ahkyíng a jé shi mai, ngò, nungmoq lé, jung hkangmó tái kyô nyi gù nghut lhê.

²⁴ Buinyi háu pé má, wuìhke jamjau háu pé lai é htâng,

'Bui gi, noq byuq mù, lhamó gi, a tsò dut byuq rá nghut lhê;

²⁵ kyí pé gi, mauhkung mai byit gyó lo bùm mù, mauhkung má é wum-o a-tsam pé gi, lhoq nhùn é hui bùm kó rá nghut lhê.¹⁰

²⁶ Háu hkún, háu Byu Yhangzo gi, mhut ji mù, hpungwup a-tsam mó eq le, hpungwup shingkan eq le, gyó lé lo é lé, byu pé byu-myàng kó rá nghut lhê.

²⁷ Hau htàng má, Yhang gi, Yhâng é mau-mang lagyô pé lé nhang kat mù, maumyí chyùn hkangmó eq myigùng htum shoq, mauhkung htàng shoq mai, Yhang hkyin yu tô é bang lé shui tsing yù nhâng rá nghut lhê.

²⁸ Maihpang gam lé wú mù, mhoq yù keq; agám mai a-nyuq nyùn lô mù, ahaq htut lò jáng, bui nyé nám chyâng lò bê lé, nungmoq sê lhê.

²⁹ Háu eq rajung za, shí hkyô pé dut nyi é lé, nungmoq myàng kôjáng, Yhang gi, chyáng bê nghut mù, hkúmdong má lhang nghut nyi bê hkyô lé, nungmoq sé lo keq.

³⁰ Ngò, nungmoq lé teng za tái kôlé, shí pyat má é byu pé a ban shí byuq shimá, háu hkyô pé banshoq dut byuq rá nghut lhê.

³¹ Mauhkung eq myigùng gi, a joq lo dut byuq rá nghut lhê; nghut kôlhang, Ngá é dang gi, ru joq nyi rá nghut lhê.

*Háu Buinyi Eq Ahkyíng Lé, Ó Le A Sé
Mht 24:36-44*

³² Buinyi eq ahkyíng háu lé gi, ó yuq le a sé; mauhkung htoq má é maumang lagyô pé lhang a sé; háu Zo le a sé; háu Íwa za ru sê lhê.

³³ Háu mù, nungmoq gi, ahkyíng háu hkâ-nhám jé rá lé, a sé kô é yanmai, sidiq nyi keq! Machya nyi keq!

³⁴ Háu gi, byù rayuq, yhâng é dui-nhang zoshàng wuì lé, ó le ó eq sêng é mù lé gam byi to mù, hkum zúng sù lé le, machya nyi rá

matú pying to lui, yhang yhùm lé, haù dui-nhâng zoshâng wui chyáng ap pyám to mù, byìn we shut htoq ló byuq é sù eq pung ri.

³⁵ Haù mù, haù Yhumsing hpó gi, myinhtâng laq, myín gunggám laq, woqtún hkun laq, maubó zó laq, hkâ-nhám jé lô rá lé nungmoq a sê kô é yanmai, sidiq machya nyi keq.

³⁶ Haù a nghut jáng, Yhang, dàn loq tung tau jé lo é hkûn, nungmoq yhup myhi tô é lé, lo myang pyám rá nghut lhê.

³⁷ Ngò, nungmoq lé, 'sidiq machya nyi keq,' nghú taí é eq rajung za, yuq hkangmó lé le, taí é nghut lhê." ga taí ri.

14

Yesuq, Xù But Byi Huí É Hkyô

Mht 26:1-16; Luk 22:1-6; Yhn 11:45-53;

12:1-8

¹ Ahkuí, haù Lhoqlhai Poí eq múnchi a kat é Muk Zo Poí jé rá í nyi za ru ra aló hkûn, hkyangjong agyi pé eq tará sará pé gi, Yesuq lé hkâsu kut wó haq chyup yù mù, sat pyám rá matú, hkyô ho nyi akò nghut ri.

² Nghut kôlhang, yhangmoq gi, "Byu pé gabyông lô kó abe, poí gyoro má gi, a kut shi shâng," ga taí akò.

³ Yesuq gi, Behtani wà má nyi é manggám dap wú sù Simûn é yhùm, siboí má nghe zung tô é hkûn, myiwe myhi rayuq gi, nardu amyit mai za sai yu é, gyai hpaù é namngón xù bo é alabasta (luq hpyù) bông yu lé lô mù, bông haù lé lãng hkyui lui, namngón xù haù lé Yesuq é ulhum má hut gyun byi ri.

⁴ Haù má nyi tô é bang ra-am gi, wú nhikyô é myit eq, rayuq eq rayuq taí lhum kô é gi, "Haí mù, namngón xù lé aha agó kut pyám lhê laq?"

⁵ Haù namngón xù lé, denari* sùm sho éq ung lui, myùng bang lé byi le ge lhê mhai!" gá akò. Yhangmoq gi, myiwe myhi hau lé le, gyai chôm tân akò.

⁶ Nghut kôlhang, Yesuq gi, yhangmoq lé, "Myiwe zo haù lé, hkâtân nyi kó; haí mù, yhang lé í-myt lhoq myo nhang nyi akò lú? Yhang gi, Ngá é ahtoq má ge é hkyô kut bê nghut ri.

⁷ Haù myùng bang gi, nungmoq eq rahá hkâ-nhám le nyi rá nghut lhê mù, nungmoq garúm nau é hkûn, yhangmoq lé wó garúm lhê. Nghut kôlhang, ngò gi, shí má nungmoq eq rahá ayang nyi nyi rá sù a nghut.

⁸ Yhang gi, yhang wó dut é í kut bê nghut ri. Yhang, Ngá gûng má, namngón xù hut gyùn é gi, Ngá gûng lé yhum rá matú, hí hen lajãng tô é ru nghut lhê.

⁹ Ngò, nungmoq lé teng za taí kôlé, haù gabú danglù lé mingkan gón hko kyô é jowó hkangmó má, yhang lé myit bûn é đông,

yhang kut é hkyô shí lé, taí kyo bekô rá nghut lhê." ga taí kyo ri.

¹⁰ Hau htâng, haù chángzo raxe í yuq má bo é Yudaq Iskarut gi, Yesuq lé ap pyám rá ga, hkyangjong agyi pé chyáng e ri.

¹¹ Haù bang gi, haù hkyô lé lhom wó gyo kôjáng, gyô gabú lui, yhang lé ngùn byi rá ga, danggidiq byi akò. Haù mù, yhang gi, Yesuq lé ap pyám rá hkyô ho nyi bê nghut ri.

Yhumsing É Myinzang

Mht 26:17-30; Luk 22:7-23; Yhn 13:21-30

¹² Haù htungli joq é eq rajung za, Lhoqlhai Poí hkungga sauzo jaú byi é, múnchi a kat é Muk Zo Poí sâng-hi nyi má, Yesuq é chángzô pé gi, Yesuq lé, "Nàng zo rá Lhoqlhai Poí lé, ngamoq hkâmá é món to rá lú?" ga myi akò.

¹³ Haù mù, Yhang gi, chángzo í yuq lé, "Nungnhik, myuq hkaù shut wang ló keq, wui yambú waq é byu rayuq lhom hui rá nghut lhê; haù hkûn, nungnhik gi, yhang htâng cháng keq.

¹⁴ Haù yuq, wang ló é yhùm má é yhumsing lé, "Ngò, Ngá é chángzô pé eq rahá, Lhoqlhai Poí lé zo rá bing wap hkâmá nghut lhê lú ga, Sará myi nhang kat ri." nghú taí keq.

¹⁵ Haù hkûn, hen to gú nghut é, ahtoq má é wap mó lé lhom tún shit rá nghut lhê. Wap haù má, nga-nhùng é matú ê hen to keq." ga taí lui, nhang kat ri.

¹⁶ Chángzo haù nhik gi, htoq e ló mù, myuq hkaù má wang e ló le, Yesuq taí kat é eq roq za é myáng kômù lui, Lhoqlhai Poí lé, món to bekô nghut ri.

¹⁷ Myinhântang jé lô jáng, Yesuq gi, haù chángzo raxe í yuq eq rahá, haù má lé jé bekô nghut ri.

¹⁸ Yhangmoq gi, siboí má nghe mù, zô nyi bùm kô é u lé, Yesuq gi, "Ngò, nungmoq lé teng za taí kôlé, Ngò eq rahá zô nyi é bang nungmoq má é rayuq sù gi, Ngo lé ap pyám rá nghut lhê." ga taí ri.

¹⁹ Haù hkûn, yhangmoq gi, gyô yón kômù, rayuq htâng rayuq, "Ngò, a nghut hkaí?" ga Yhang lé myi akò.

²⁰ Haù hkûn, Yhang gi, "Haù yuq gi, haù raxe í yuq má é rayuq nghut lhê. Ngò eq rahá, hkoq shí má muk jùmzo sù nghut lhê.

²¹ Haù Byu Yhangzo gi, Yhang eq séng lui kâ tô é eq rajung za, shí rá za nghut lhê. Nghut kôlhang, haù Byu Yhangzo lé ap pyám é sù gi, dingnyé wó ri; haù yuq gi, a hku lé le lhang, je ge ri.

²² Yhangmoq zo nyi kô é u lé, Yesuq gi, muk lé yù mù, jeju hkya-on lui, muk lé myihik hpé mù, "Shí gi, Ngá é gungsho nghut lhê; yù mù zo keq." ga taí uchyang. Yhâng é chángzô pé lé gám byi ri.

* 14:5 Denari rachap gi, byù rayuq é ra-nyí lhê é zuihpau eq wui ri.

²³ Hau htâng, Yhang gi, góm lé le, yù mù, jejy hkyá-on luí, yhangmoq lé byí ri; yhangmoq banshoq bang gi, haú lé yù shuq akò nghut ri.

²⁴ Yesuq gi, yhangmoq lé, "Shí gi, byù myo myò é matú htoq pyám é, dangshikaq eq séng é Ngá sui nghut lhê.

²⁵ Ngò, nungmoq lé teng za tái kólé, Ngò, Garai Gasâng é mingdán má, tsibiyiq wing asik lé shuq é buinyi a jé jé, tsibiyiq wing lé dum shuq râ a nghut lo." ga tái ri.

²⁶ Yhangmoq gi, hkyá-on mahkôn ralhüm ban hkôn jáng, Tsanlun Büm shut htoq e ló bekò nghut ri.

Petruq He-ngik Râ Hkyô Lé, Te Tái É Hkyô

Mht 26:31-35; Luk 22:31-34; Yhn 13:36-38

²⁷ Yesuq gi, yhangmoq lé, "Nungmoq lhunglhang bang gi, myit lingbat kó râ nghut lhê; hkâsu mù gâ le, 'Haú sau zúng sù lé, Ngò bat sat pyám mù, sau pé gi, lhoq pyo pyám é hui kó râ nghut lhê.'²⁸

²⁸ Nghut kólhang, Ngò gi, lhoq dui toq é huí htâng má, Galile mau shut, nungmoq é hí má e ló láng râ nghut lhê." ga tái ri.

²⁹ Haú hkûn, Petruq gi, "Góbang banshoq myit lingbat kólhang, ngò gi, myit lingbat râ a nghut." ga tái kat ri.

³⁰ Haú mù, Yesuq gi, "Ngò, nàng lé teng za tái lé, hkû-nyí, hkû-myín yhang jáng, woq í dâm a tún shimá, nàng, Ngo lé sum dâm he-ngik pyám râ nghut lhê." ga tái ri.

³¹ Nghut kólhang, Petruq gi, "Ngò, Nàng eq rahá shí râ dut kólhang, Nàng lé ngò he-ngik pyám râ a nghut." ga zuq zuq tái ri. Góbang banshoq le, haú su ga châng tái bum akò nghut ri.

Get-samane Gâ é Jowò Má Kyûdùng É Hkyô

Mht 26:36-46; Luk 22:39-46

³² Yhangmoq gi, Get-samane gâ é jowò má jé ló kômù, Yesuq gi, Yhâng é chángzò pé lé, "Ngò, kyú é dúng nyi é u lé, shí má zúng láng keq." ga tái ri.

³³ Yesuq gi, Yhang eq rahá Petruq, Yakuq, Yohan pé lé, shuí chùng ri. Haú hkûn, Yhang gi, myit gyai a ngón é eq myit wuìhke é hui mù,

³⁴ yhangmoq lé, "Ngò gi, shí râ í yhang myit yón nyi ri; nungmoq gi, machyâ luí, shí má láng nyí keq." ga tái ri.

³⁵ Yesuq gi, haú mai ratsuí zo sô ê mù, myigùng má gop byên to luí, ahkyíng haú lé ge lhoq lhai pyám byí le gi, Yhâng chyáng mai lhoq lhai pyám byí râ matú,

³⁶ "Aba,[†] Áwa ê, Nàng gi, haí le wó dut é Sù nghut lhê. Góm[‡] shí lé, Ngá chyáng mai yu pyám byi laq. Nghut kólhang, Ngò ô nau é dúng a nghut, Nàng ô nau é dúng sheq nghut sháng gaq." ga kyûdùng ri.

³⁷ Hau htâng, Yhang gi, Yhâng é chángzò pé chyáng dum taú lo le, yhangmoq yhup myhí to kó é lé lo myang ri. Haú mù, Yhang gi, Petruq lé, "Simun, nàng yhup ngón nyi lhê lú? Razup za lhang a wó machya nyi lú?"

³⁸ Gunglaú é a hui sháng gaq, machyâ luí, kyûdùng nyi keq. Haú woi-nyí gi, kám nyi kólhang, gungsho gi, wum nyhóm nyi ri." ga tái ri.

³⁹ Yesuq gi, radàm dum ê mù, hí lé dúng é dang lé za, è dung ri.

⁴⁰ Yhang dum taú lo le, yhangmoq gi, myoqkuq lai kó é yanmai, yhup myhí to láng kó é lé, lo dum myang ri. Yhangmoq gi, Yhang lé haí tái râ a sé dut byuq akò nghut ri.

⁴¹ Yesuq gi, sum dâm nghú râ lhing má, yhangmoq chyáng dum taú jé ló mù, yhangmoq lé, "Nungmoq gi, ahkú jé shoq yhup ngón nyi ashí kó lú? Gé bê! Haú ahkyíng gi, jé bê nghut luí, haú Byu Yhangzo gi, yubak dap bâng é loq má ap pyám é hui râ nghut bê.

⁴² Toq keq! Ló losháng hkoi! Ngo lé ap pyám râ sù gi, jé lé lô bê nghut ri." ga tái ri.

Yesuq, Chyup Yú Hui É Hkyô

Mht 26:47-56; Luk 22:47-53; Yhn 18:3-12

⁴³ Yesuq, dúng nyo nyi ashí u lé, haú chángzo raxe í yuq má bo é Yudaq gi, haú hkyangjong agyi pé, tará sará pé eq suwún wui chyáng mai nhang kat é bang nghut é, shâm eq dumbáng pé chung tô é byù moq mó eq rahá jé lé lo ri.

⁴⁴ Yesuq lé ap pyám râ sù gi, yhangmoq lé, "Ngò bopuq puq é sù gi, haú yuq nghut bê; Yhang lé chyup yú mù, zúng shuí ló keq." ga kumlhá byí to bê nghut ri.

⁴⁵ Yudaq gi, Yesuq chyáng hkyê za ê mù, "Rabai ê." ga tái luí, Yhang lé bopuq puq byí ri.

⁴⁶ Haú hkûn, yhangmoq gi, Yesuq lé chóm zuí zing mù, chyup yú bekò nghut ri.

⁴⁷ Haú mù, nàm má yap tô é byù rayuq gi, yhâng é shâm lé she htoq yú mù, hkyangjong mó é dui-nhâng zóshang é nohkyap lé pyoq hkyô kat byi bê nghut ri.

⁴⁸ Yesuq gi, yhangmoq lé, "Nungmoq gi, damyaq rayuq lé chyup é su, Ngo lé chyup râ matú, shâm eq dumbáng pé chùng mù, lé lo akò lú?"

⁴⁹ Ngò gi, nyí wuí, nungmoq eq rahá nyi luí, noqkuq yhüm má mhoqshit byí nyi kólhang, nungmoq, Ngo lé a chyup yú kó é

[†] 14:27 Zhk 13:7 [‡] 14:36 *Aba* gâ é gi, Aramaik dang dúng "Áwa" gâ é lichyüm nghut lhê. [‡] 14:36 *Góm* gâ é gi, Yesuq, jamjau hui râ hkyô eq shí râ hkyô lé, tái nau é nghut lhê.

nghut lhê. Nghut kôhang, Chyúmdang pé gi, dik ra rá nggut lhê." ga tai ri.

⁵⁰ Haú hkûn, haú chángzô pé gi, Yesuq lé tô pyâm to kôluí, hpang byo byuq bekô nggut ri.

⁵¹ Buhîng za wut é zorâm rayuq gi, Yesuq htâng cháng wún ri. Yhangmoq gi, haú yuq lé, wó kyaq zui kô é hkûn.

⁵² yhang gi, buhîng lé hkyut hkyô pyâm to mù, gùngchîn hpang lô byuq bê nggut ri.

Yudaq Byìn Tú Wapdoq Má Jéyang Huí É Hkyô

Mht 26:57-68; Luk 22:54-55, 63-71; Yhn 18:13-14, 19-24

⁵³ Yhangmoq gi, Yesuq lé, hkyangjong mó chyáng shuí e akô; haú hkyangjong agyi pé lhunglhang bang, suwún wuí eq tará sará pé lé, lé zup zing bum akô.

⁵⁴ Petruq gi, hkyangjong mó é yhumwàng hkaú má châng jé wàng shoq, we we mai Yesuq htâng châng tô ri. Yhang gi, haú má, zúng bang eq rahá, myihkyóm yâm má gyoq gang zung tô ri.

⁵⁵ Haú hkyangjong agyi pé eq Yudaq byìn tú wapdoq gón gi, Yesuq lé sat rá saksé hô kôhang, hai le a myàng kó nggut ri.

⁵⁶ Byù myo myo gi, a têng é saksé hkám kôhang, yhangmoq é dang gi, a tsúng lhum kó nggut ri.

⁵⁷ Hau htâng, ra-am gi, toq yap mù, a têng é saksé hkám kô é gi,

⁵⁸ "Yhang gi, 'Byu loq èq saí é noqkuq yhùm shí lé, Ngò hpyoq hpyi pyám mù, sum nyí gyoro má, byu loq èq a saí é, gotú ralhùm dum sai rá nggut lhê.' ga tai é lé, ngamoq wó gyô ri." ga akô.

⁵⁹ Nghut kôhang, yhangmoq é saksé gi, a tsúng lhum kó nggut ri.

⁶⁰ Hau htâng má, hkyangjong mó gi, yhangmoq é hí má toq yap mù, "Nàng, hai le a tú tai luq? Shí bang, Nang lé mara hun nyí é saksé gi, hká dông nggut lhê lú?" ga lú, Yesuq lé myí ri.

⁶¹ Nghut kôhang, Yesuq gi, jit le a ga nyi tô ri.

Hau mù, hkyangjong mó gi, Yesuq lé, "Nàng gi, hkungô wó Su é yhangzo, Hkrisduq nggut lhê lú?" ga dum myí ri.

⁶² Haú hkûn, Yesuq gi, "Nghut lhê; haú ngò Byu Yhangzo gi, a-tsam bo dik Su é loqyo hkyam^s má zung tô é lé le, mhuthtui ji mù, mauhkung mai lé lo^{*} lé le, nungmoq myàng kô rá nggut lhê." ga tai ri.

⁶³ Haú hkûn, hkyangjong mó gi, yhang é bu lé llang cheq pyám mù, "Nga-nhúng, hai saksé rá ashí lú?"

⁶⁴ Yhang, Garai Gasang lé rhoí dang tai é lé nungmoq wó gyo bê nggut lhê. Nungmoq

hkâsu wó myit akô lú?" ga myí ri; yhangmoq banshoq bang gi, shí gíng sù nggut ri ga, chôm myit huí akô.

⁶⁵ Haú mù, ra-am gi, Yhang lé sókan byé gyun é eq, myoq má nghop pyám byi lúí, loqtsup èq htui byí lhê kut mù, "Nang lé ó yuq htui é, myiqhtoi htoí wú aq." ga tai akô. Haú zúng bang gi, Yhang lé shuí yù mù, nhuq bat akô nggut ri.

Yesuq Lé, Petruq He-ngik Pyâm É Hkyô
Mht 26:69-75; Luk 22:56-62; Yhn 18:1-18, 25-27

⁶⁶ Petruq gi, wàng hkaú má nyi tô é u lé, haú hkyangjong mó é dui-nhâng zoshâng myí rayuq jé lé lo ri.

⁶⁷ Haú yuq gi, Petruq gyoq gang nyi é lé myàng jáng, yhang lé rago wú mù, "Nàng le, Nazaret wá byù Yesuq eq rahá nyi sù nggut ri." ga tai ri.

⁶⁸ Nghut kôhang, yhang gi, "Nàng tai é hkyô lé, ngò, sé le a sé, gyo le a sé gyo." ga he pyám lúí, wàng hkúmdong shut htoq e ló bê nggut ri.[†]

⁶⁹ Dui-nhâng zoshâng myí haú gi, Petruq lé, haú má dum myàng jáng, awui ayám má yap tô é bang lé, "Shí yuq lé, haú hpung má lom é sù rayuq nggut ri." ga dum tai ri.

⁷⁰ Petruq gi, radàm dum he pyám ri; hau htâng razup zo má, haú nàm má yap tô é bang gi, Petruq lé, "Nàng gi, Galile byù rayuq nggut é yanmai, haú hpung má é byù rayuq hkyak nggut lhê." ga tai akô.

⁷¹ Haú hkûn, yhang gi, yhanggùng yhang nhing lúí, "Haú nungmoq tai é byù lé, ngò a sé." ga dakam ri.

⁷² Haú u yhang, woq radàm dum tun kat bê nggut ri. Haú mù, Petruq gi, "Woq í dâm a tún shimá, nàng, Ngo lé sum dâm he-ngik pyám rá nggut lhê." ga, Yesuq, yhang lé tai é dang lé, myit bún kat mù, wum kat ngau ri.

15

Pilat Hí Má Yesuq Jé Nyi É Hkyô
Mht 27:1-2, 11-26; Luk 23:1-5, 13-25; Yhn 18:28-19:16

¹ Haú napkyó noq za má, hkyangjong agyi pé gi, suwún wuí, tará sará pé, Yudaq byìn tú wapdoq gón bang eq rahá kut, chôm bóng yú kômù, Yesuq lé tuí yú lúí, shuí htoq é kômù, mauzau Pilat chyáng é ap byí akô nggut ri.

² Pilat gi, Yesuq lé, "Nàng gi, Yudaq byu pé é hkohkâm nggut lhê lú?" ga myí jáng, Yesuq gi, "Nàng tai é eq rajung za nggut lhê." ga, tú tai ri.

³ Haú hkyangjong agyi pé gi, Yhang lé mara gyai myo shoq chôm hun akô.

^s 14:62 Loqyô hkyam gâ é gi, ahko ahkáng wó é jowô lé gâ é nggut lhê. * 14:62 Mhuthui ji mù, mauhkung mai lé lo é gâ é gi, Danielaq 7:14 má bò lhê. † 14:68 Chyúmdang ra-am má Haú hkûn jáng, woq tún bê nggut ri gâ é le bo ri.

⁴ Haù mù, Pilat gi, Yesuq lé, "Wú aq, yhangmoq, nàng lé mara haù myhó hun nyi le, nàng, haì le a tũ taí lú?" ga myí ri.

⁵ Nghut kôlhang, Yesuq gi, haì le a tũ taí kut jáng, Pilat gi, maù byuq bê nghut ri.

⁶ Haù Lhoqlhai Poí u lé, mingbyú wui dúng é htóng byú rayuq yuq lé, mauzau mai lhaq lhoq htoq byi byi kut é htung joq ri.

⁷ Haù hkũn, Barabaq gá é byú rayuq gi, gumlau gabyông é hkũn, byú sat é gumlau bang eq rahá, htóng gyó tó ri.

⁸ Byú hpúng mó gi, doq lé lô mù, mauzau Pilat lé, yhang lhaq kut é eq rajung za, yhangmoq lé kut byi rá matú, dúng akó.

⁹ Haù mù, yhang gi, "Yudaq byu pé é hkohkâm lé nhang htoq kat byi rá lé, nungmoq ô nau akó lú?" ga myí ri.

¹⁰ Pilat, haù su ga myí é gi, haù hkyangjong agyi pé, Yesuq lé manôn kôluí, yhang chyáng lé ap byi kô é hkyô lé sê é yanmai nghut ri.

¹¹ Nghut kôlhang, haù hkyangjong agyi pé gi, Barabaq lé sheq nhâng byi rá matú, Pilat chyáng dúng kó sháng gaq ga, haù byú moq mó lé i-myiit lhoq toq byi akó.

¹² Pilat gi, "Haù jáng, nungmoq mai Yudaq byu pé é hkohkâm ga sũ yuq lé, ngò hkâsu kut rá lú?" ga yhangmoq lé myí ri.

¹³ Haù hkũn, yhangmoq gi, "Yhang lé tapzng má jén sat pyám aq." ga chòm garu akó.

¹⁴ Haù jáng, Pilat gi, "Haì mù luí lú? Yhang haì kut shut bê lú?" ga dum myí jáng, yhangmoq gi, htê mó eq, "Yhang lé tapzng má jén sat pyám aq." ga je riyhang garú lo bum akó nghut ri.

¹⁵ Pilat gi, haù byú moq mó lé nhik dik nhâng nau é yanmai, Barabaq lé gi, nhang kat byi mù, Yesuq lé gi, nhuq bat nhâng mù, tapzng má jén sat pyám rá matú, ap byí kat bê nghut ri.

Gyezô Pé Gi, Yesuq Lé Rhoi É Hkyô

Mht 27:27-30; Yhn 19:2-3

¹⁶ Gyezô pé gi, Yesuq lé, Pretori yhumwàng (mauzau hpô é yhumwàng) mó hkaù má shuí wang ló kômù, gyedap gón lé ji tsing yu akó.

¹⁷ Hau htàng, yhangmoq gi, Yesuq lé buhng nè radung hut byi mù, zujanmaù saí yu kôluí, Yhâng é ulhum má tsung byí akó.

¹⁸ Hau htàng, yhangmoq gi, "Yudaq byu pé é hkohkâm hpô é! Chyung hng xê hng nyi sháng gaq ô!" ga wut garú akó.

¹⁹ Hau htoq agó, yhangmoq gi, Yhâng é ulhum má dumbáng eq adam dâm bat kômù, sôkan byé gyun luí, Yhâng hí má hkyihput htuq mù, paí mhaù akó nghut ri.

²⁰ Yhangmoq gi, Yhang lé rhoi jikhyoí ban kut yú kôjáng, Yhang wut tô é buhng nè lé

hkyut yú kômù, Yhâng é mebu lé dum hut byi luí, tapzng má jén sat pyám rá matú, Yhang lé shuí htoq e ló bekó nghut ri.

Yesuq Lé Jén Pyám É Hkyô

Mht 27:31-44; Luk 23:27-43; Yhn 19:17-27

²¹ Alesander eq Ruhpu nhiktang é yhângwa, Kuruni myuq byú nghut é Simun ga sũ gi, yosô wà mai lò mù, haù jowò mai laí lò ri. Haù hkũn, gyezô pé gi, yhang lé, tapzng waq nhang akó nghut ri.

²² Yhangmoq gi, Yesuq lé, Golgahta gá é jowò má shuí e akó (Golgahta gá é gi, ugyap joq é jowò lé gá é nghut ri).

²³ Hau htàng, yhangmoq gi, Yhang lé, mura* eq nyhò tó é tsibiyiq wing huq akó; nghut kôlhang, Yhang gi, a lhom shuq byi nghut ri.

²⁴ Hau htàng má, yhangmoq gi, Yhang lé tapzng má jén tap to kôluí, Yhâng é mebu pé lé, hkyín shosé shê mù, âng é dông gam yu pyám byí akó nghut ri.

²⁵ Yhangmoq, Yesuq lé tapzng má jén tap pyám é hkũn gi, napkyó gau hkying nghut bê nghut ri.

²⁶ Hau htoq agó, Yhang lé mara hun é dông kâ tap to kô é gi, "YUDAQ BYU PÊ É HKOHKÂM" gá ri.

²⁷ Yhangmoq gi, damyaq í yuq lé le, Yhâng é loqyo hkyam shut rayuq, loqpaí hkyam shut rayuq kut, tapzng htoq má jén tap tó akó nghut ri.

²⁸ (Haù gi, "Yhang gi, yubak dap bang chyáng nghap lhôm é hui bê nghut ri."*† gá é Chyúmdang lé lhoq dik é nghut ri.)†

²⁹ Hkyô sô laí ló é bang gi, nyhap é dông u-ngut nut mù, taí kô é gi, "Noqkuq yhùm lé hpyoq pyám luí, sum nyí gyoro má dum wó saí lhé ga Sũ é!

³⁰ Náng gùng nàng hkyi yú luí, tapzng mai gyó lò wú aq mhaì!" ga akó nghut ri.

³¹ Haù eq rajung za, hkyangjong agyi pé eq tará sará pé le, yhangmoq hkaù má, "Shí yuq gi, góbang lé hkyi yú sũ nghut kôlhang, Yhânggung yhang gi, a wó hkyi yú nghut ri myhi-nhung!

³² Nga-nhung wó myàng mù, lumjng rá matú, shí, Israelaq byu pé é hkohkâm, Hkris-duq gi, tapzng mai gyó lò wú sháng gaq." ga, Yhang lé rhoi dang taí akó. Yhang eq rahá tapzng má jén tap to huí é su nhik le, Yhang lé rhoi dang taí akó nghut ri.

Yesuq, Shi É Hkyô

Mht 27:45-56; Luk 23:44-49; Yhn 19:28-30

* 15:23 Mura gi, chí wó kut jung xũ nghut lhé.

† 15:28 Esai 53:12

† 15:28 Bun zo shí gi, chyúmding axau ra-am pé

má za bo é nghut lhé. * 15:34 Hkya-on 22:1

³³ Nyí-káng raxe í hkyíng mai myinhântang sum hkyíng jé shoq, ramau gón mauchut tuq dut byuq bê nghut ri.

³⁴ Myinhântang sum hkyíng jé é hkùn, Yesuq gi, "Eloi, Eloi, lama sabakhtani."* ga, htê mó eq garû kat ri. Haú é lichyúm gi, "Ngá Garai ê, Ngá Garai ê, Nàng, haí mù, Ngo lé tô pyâm tô lhê lúhú?" gá é nghut ri.

³⁵ Haú nâm má yap tô é bang ra-am gi, haú lé wó gyo kôjáng, "Gyô wú keq. Yhang gi, myiqhtoi Eliyaq lé wut nyi ri." ga, taí akò.

³⁶ Haú hkùn, byù rayuq gi, din e ló mù, wuimàú lé tsibiyiq wing chyín má jum yù luí, jàm-yang má tuí tap mù, Yesuq shuq sháng ga yhun byi luí, "Eliyaq gi, lé lô mù, Yhang lé lé lhoq hkyô yù abe, nga-nhúng chôm láng wú sháng." ga taí ri.

³⁷ Yesuq gi, htê mó eq garû kat luí, kâng byit byuq bê nghut ri.

³⁸ Noqkuq yhùm má é pán-gyang gi, ahtoq mai a-ô í hkyam byáng dut byuq bê nghut ri.

³⁹ Yesuq é hí má yap tô é shò up gyezau hpó gi, Yesuq é garu htê lé wó gyo mù, Yhang hkásu kut shí é lé myàng jáng, "Shí yuq gi, gè gè yhang. Garai Gasâng é Yhangzo nghut ri-nhung!" ga taí ri.

⁴⁰ Myiwe wui ra-am gi, we we mai wú nyi bum akò. Haú bang má, Magadalaq wà má é Mariq, Yakuq tiq sù yuq eq Yose nhiktang é yhangnu Mariq eq Salome pé le bo akò nghut ri.

⁴¹ Haú bang sum yuq gi, Galile mau má, Yesuq htàng cháng mù, Yhàng rà é hkyô pé lé cháng kut byí é bang nghut akò. Yesuq eq rahá, Yerusalem wà mó má doq lé lo é myiwe wui, góbang myo myo le haú má nyi tô bum akò nghut ri.

Yesuq Lé, Myhup Pyâm É Hkyô

Mht 27:57-61; Luk 23:50-56; Yhn 19:38-42

⁴² Haú nyí gi, Hên Lajang Buinyi (Bánno buinyi é hí nyí) nghut ri. Haú mù, myinhântang jé lô jáng,

⁴³ Yudaq uphkàng hpúng má bo é, aróng wó é, Garai Gasâng é mingdán lé láng nyi é sù, Aramahti wà byù Yosep gi, myit wum lhoq kng yù mù, Pilat chyáng wàng luí, Yesuq é gungsôm lé é dúng ri.

⁴⁴ Pilat gi, Yesuq shí bê gá é hkyô lé wó gyo jáng, maú byuq ri; haú mù, yhang gi, shò up gyezau lé wut yù mù, Yesuq shí teng bê lúhú ga myí ri.

⁴⁵ Shí teng bê hkyô lé, shò up gyezau chyáng mai wó sè yù jáng, Pilat gi, Yesuq é gungsôm lé yù rà ahkáng, Yosep lé byi kat ri.

⁴⁶ Haú mù, Yosep gi, pán yúng lé wui yù luí, gungsôm lé yu hkyô mù, htup yup luí, luqgok lé kyúng tô é lup hkaú má é kat tô ri. Hau htàng, yhang gi, luphkum má, luqlóng eq lhêng chí pyâm tô ri.

⁴⁷ Magadalaq wà má é Mariq eq Yose é yhangnu Mariq gi, Yesuq lé, hkâmá lheq tô é lé, é myang akò nghut ri.

16

Dum Dui Toq Lo É Hkyô

Mht 28:1-8; Luk 24:1-12; Yhn 20:1-10

¹ Bánno buinyi lai jáng, Magadalaq wà má é Mariq, Yakuq é yhangnu Mariq eq Salome pé gi, Yesuq é gùng má, é but byi rà matú namngón jung é wui akò.

² Bánno buinyi htang napkyó bui htoq lo é hkùn yhang, yhangmoq gi, lup shut e ló akò.

³ Yhangmoq gi, "Luphkum má é luqgok lé, ó yuq chyún lhêng pyám byi rà lúhú?" ga, rayuq eq rayuq taí lhum akò.

⁴ Nghut kôlhang, yhangmoq tu wú kat kô é hkùn, luqlong haú gi, lhoq lhêng tô láng é lé, myàng akò nghut ri; luqlong haú gi, gyaí kô é nghut lhê.

⁵ Yhangmoq gi, lup hkaú má wang é kô é hkùn, hpyu é buhng wut é zorâm rayuq, loqyo hkyam má zung tô é lé, myàng kôjáng, gyuq dan bum akò.

⁶ Haú hkùn, haú yuq gi, "Hkáguyuq dàn kó! Nungmoq gi, haú tapzìng má jén sat huí é, Nazaret wà byù Yesuq lé ho akò, a nghut lúhú? Yhang dui toq ló bê! Yhang gi, shí má a nyi lo. Yhang lé, lheq tô é jowò lé wú wú keq.

⁷ Ahkuí, nungmoq gi, ló mù, 'Yesuq gi, nungmoq hí má, Galile mau shut so láng rà nghut lhê. Nungmoq lé, Yhang taí tô é eq rájung za, nungmoq gi, Yhang lé haú má ló myàng kó rà nghut lhê.' nghú, Yhàng é chángzò pé eq Petruq lé ló taí kyo keq." ga lhom taí kat ri.

⁸ Haú mù, myiwe myí haú bang gi, byòdàn gyuq nán é eq, lup mai hfang htoq ló akò; yhangmoq gi, lúm gyuq byuq kô é yanmai, ó yuq lé lé, haí le a taí kó nghut ri. (Bun zo 9 mai 20 jé shoq gi, chyúmding axau ra-am pé má a bo é nghut lhê.)

Yesuq Htoq Shit É Hkyô

Mht 28:9-10, 16-20; Luk 24:13-53; Yhn 20:11-12; Laga 1:6-11

⁹ Yesuq gi, Bánno buinyi htang napsùn lé, Yhang dui toq é htàng, Yhang mai nat gang nyhit du hkat htoq pyám byi bê sù, Magadalaq wà má é Mariq lé hí htoq shit ri.

¹⁰ Mariq haú gi, ló mù, haú Yesuq eq nyi lai lò bê bang, yón ngau nyi kô é hkùn, haú hkyô lé ló taí kyô ri.

¹¹ Yhangmoq gi, Yesuq dum dui bê gá é hkyô lé le, Yhang lé, Mariq myàng é gá é hkyô lé le, wó gyo kôlháng, a jing kó nghut ri.

¹² Hau htàng má, Yesuq gi, yosò wà shut htoq e ló nyi é chángzo í yuq lé, gotú gungghyàng dong htoq shit ri.

¹³ Haú nhik gi, taú lò mù, gotú chángzô pé lé haú hkyô lò shit kyo akô; nghut kôlhang, yhangmoq gi, haú lé le a jing byi kó nghut ri.

¹⁴ Hau htâng má, Yesuq gi, haú chángzo raxe rayuq baú za zang zô nyi kô é hkún, yhangmoq chyáng lé htoq shit ri. Yhangmoq chyáng lumjing myit a bò kô é yanmai le, Yhang dui toq é htâng má, Yhang lé myang é bang taí kyo kô é dang lé, a jing é za myit htan to kô é yanmai le, Yhang gi, yhangmoq lé tân ri.

¹⁵ Hau htoq agó, Yesuq gi, yhangmoq lé, "Mingkan jam shoq htoq ê mù, waxâng zo wui lhunglhang lé, haú gabú danglù hko kyo keq.

¹⁶ Lumjing mù, wui-myhup hkâm yu é sù ó yuq nghut kôle, hkyi yu é hui rá nghut lhê. Nghut kôlhang, a lumjing é sù ó yuq nghut kôle, mara byi é hui rá nghut lhê.

¹⁷ Lumjing é bang wó kut shit rá kumlhá pé gi, Ngá é mying lé lang lui, nat gâng pé lé wó hkat htoq kó rá eq laklai é mying pé lé dat nyò kó rá nghut lhê;

¹⁸ yhangmoq gi, lhangmui pé lé le, wó kui zui kó rá nghut lhê; muí shi jung duq lé, shuq kôlhang, haí dut kó rá a nghut. Nò bâng é htoq má, yhangmoq é loq ke byi jáng, nó bang ge byuq kó rá nghut lhê." ga taí ri.

¹⁹ Haú Yhumsing Yesuq gi, yhangmoq lé dang ban taí é htâng má, mauhkung shut shui toq yu é hui lui, Garai Gasâng é loqyo hkyam má zung to bê nghut ri.

²⁰ Hau htâng, haú chángzô pé gi, htoq ê mù, jowò hkangmó má mungdang ê hko kyô akô nghut ri; haú Yhumsing gi, yhangmoq eq rahá nghut nyi mù lui, Yhâng é mungdang têng é hkyô lé tân shit rá matú, yhangmoq lé, kumlhá pé wó kut é a-tsam byi é nghut ri. Amen.

LUKAQ é Gabú Danglù Laiká (The Gospel of Luke)

¹ Aróng wó dik é sù Htohpilug é, ngamoq chyáng dut lai lò bè hkyô pé lé, sâng-hi mai yhumsing myoq èq yhang, myang é bang eq, mungdang wùn waq é bang mai shap kyô gyó lò mù luí,

² byù myo myo gi, shikut luí kâ to beko nghut ri.

³⁻⁴ Ngò le hau pé banshoq lé awang mai ahyo hpyot jihkúm nuqguq ho myí yù luí, nang wó sè yu to bè hkyô pé gi, je lhoq gíng é dut sháng gaq nghù, náng é matú banshoq tok za kâ kat byi rá lé, ngò wó myit ri.

Wui-myhup Sará Yohan Hku Lé Lô Râ Gà É Hkyô

⁵ Yuda mau má Herut khokhâm up é u lé, Abiyaq hkyangjong hpúng má Zahkariq ga sù hkyangjong rayuq nyi ri. Yhang myí gi, Arun amyú má é, Elizabet ga sù nghut ri.

⁶ Háu nhik gi, Yhumsing Garaí é jep é tarâ eq htúngtarâ banshoq lé, rago za cháng mù, Garaí Gasâng é hí má dingmán é su nhik nghut akô.

⁷ Nghut kôlháng, Elizabet gi, baùdung dung sù nghut é yanmai, yháng nhâm gi, zo dù a dap kó. Yhangnhik gi, asak ipyat le ko beko nghut ri.

⁸ Ahkuí, Zahkariq gi, dum lhing hkyuq lo é hkyangjong mù lé, yháng é hpúng eq rahá, Garaí Gasâng é hí má lé zui le,

⁹ hau Yhumsing é noqkuq yhùm ahkaú má namngón hkungga é wang nyhé rá matú, hká yuq nghut rá lé hkyangjong pé é htúngli eq rajung za byù hkyín shosé she wú é hkùn, yháng chyáng àng ri.

¹⁰ Háu mù yhang namngón hkungga lé nyhé é u lé, shiwa byù banshoq gi, yumpán má, kyúdúng nyi akô.

¹¹ Háu hkùn, Yhumsing Garaí é maumang lagyo gi, namngón jung nyhé é hkungga gyap é loqyo hkyam má, Zahkariq lé, lé yap shit ri.

¹² Zahkariq gi, maumang lagyo hau lé myàng jáng, dan gyuq nyi ri.

¹³ Nghut kôlháng, maumang lagyo gi, "Zahkariq é, hkágyuq, náng é kyúdung dang lé Garaí Gasang gyo byi bé. Háu mù luí, náng é yhumsing myí Elizabet gi, náng é matú yuqzo rayuq bau byi berâ nghut lhê; nang gi, yhang lé Yohan nghù myhíng byi ra rá nghut lhê.

¹⁴ Yhang gi, náng é matú gabú hpo eq nguóngón é hkyô dut berâ nghut lhê. Yhang lé baú lo é yanmai, byù myo myo le gabú lo bùm berâ nghut lhê.

¹⁵ Hkásu mù gà le, yhang gi, hau Yhumsing Garaí é hí má ahko ahkáng wó mù luí, byù mó dut rá sù nghut lhê. Yhang gi, tsibiyiq wing eq ihpe lé ge shuq rá sù a nghut; yhang nú é unghkaú mai yhang, Chyoiyúng Woi-nyí èq byíng nyi rá sù nghut lhê.

¹⁶ Yhang gi, Israelaq yhangzo yhangshù pé myo myo lé, Yhumsing yhangmoq é Garaí Gasâng chyáng lhing lò nhâng rá sù nghut lhê.

¹⁷ Íwâ pé é myit nhiklhùm lé gi, zô wui shut, nyo é a gyo bang lé gi, dingmán bâng é hpaqchyí hkyô shut lhing lò nhâng luí, hau Yhumsing lé rá matú hen tô é byù myú dut nhâng rá matú, Yohan gi, Eliyaq é woi-nyí wum-o wó é eq, Yhumsing é hí má é ló rá nghut lhê." ga luí, yhang lé tai ri.

¹⁸ Háu hkùn, Zahkariq gi, "Hau hkyô lé ngò hkásu kut wó sè rá thú? Ngò le mang byuq bé, ngá é yhumsing myí le asak ipyat ko bé." ga luí, maumang lagyo lé tú tai ri.

¹⁹ Maumang lagyo hau gi, "Ngò gi, Garaí Gasang eq rahá nyi é sù Gabrielaq nghut lhê. Nang lé gabú danglù shí tai kyo aq ga luí, Yhang, ngo lé nhang kat é nghut lhê.

²⁰ Ahkying lé jáng, ngá dang gi, gè gè dùt lò rá nghut lhê. Dang shí pé lé nang a lumjing é yanmai, mù hau dut lo é buinyi jé shoq, nang gi, nhut jit byuq rá nghut lhê." ga luí, yhang lé tú tai ri.

²¹ Háu u, shiwa byu pé gi, Zahkariq no-qquq yhùm ahkaú má hau-í myàng shoq lúng byuq é hkyô lé láng maú nyi akô.

²² Zahkariq dum htoq lo le, dang a wó nyo byuq mù shiwa byu pé lé loq lik za lik shit nyi ri. Háu mù luí, yhangmoq gi, noqkuq yhùm ahkaú má yhang myoqwup shing-rán rajung jung myàng ang bé lé, wú sè yu akó nghut ri.

²³ Ahkuí, Zahkariq gi, hkyangjong jong àng é buinyi ngap jáng, yhùm shut dum tau lò byuq bé.

²⁴ Hau htâng má, yháng é yhumsing myí Elizabet gi, zogúng dut lò mù luí, hká le a htoq e za lhamó ngo hkyap yhùm ahkaú má lúng byuq ri.

²⁵ Háu hkùn, yhang gi, "Byu pé hí má ngò hui zô é hoq hpu hkyô lé, Garaí Gasang gi, myàng byi luí, shí su dut nhang é đông mai hui sêng pyám byi é buinyi má, Yhang ge é hkyô lé, ngo lé tún shit bé nghut ri." ga tai ri.

Yesuq Hku Lé Lô Berâ Gà É Hkyô

²⁶ Ahkuí, Elizabet zogúng dut é lhamó hkyuq hkyap jé jáng, Garaí Gasang gi, maumang lagyo Gabrielaq lé Galile mau, Nazaret wá má nyi é, zomyi gyíng rayuq chyáng nhang kat ri.

²⁷ Zomyi hau é myíng gi, Mariq gà ri; yhang gi, Dawiq amyú má é Yosep ga su èq dúng tô é zomyi nghut ri.

²⁸ Maumang haù gi, Mariq chyáng jé jáng, "Mariq é, nguingón nyí sháng gaq; Náng, hkungsô wó nyi ri; Haù Yhumsing Garai gi, náng eq rahá nyi nyi ri ò!" ga taí ri.

²⁹ Mariq gi, dang haù lé gyo sing nán mù, shí su gá é dang gi, hai jung gá naù é nghut lhê lhú ga luí, myit maù nyi ri.

³⁰ Haù hkùn, haù maumang lagyo gi, "Mariq é, hkâgyuq, náng gi, Garai Gasâng é hí má myoqdong wó bê nghut ri.

³¹ Wú aq, náng zogûng dut lò mù luí, yuqzo rayuq bau rà nghut lhê. Yhâng é mying lé gi, "Yesuq" nghú luí, náng myhing byi ra rà nghut lhê.

³² Yhang gi, hpung bô sù dut rà nghut mù, Myhang htáng htúm Su é Yhangzo gá é hui rà nghut lhê. Yhumsing Garai Gasang gi, yhang lé, yhâng é ichiyí iwa Dawiq é hkohkâm tanghkuq lé, byi rà nghut mù luí,

³³ Yhang gi, Yakup yhùm * lé hkâ-nhám le ru-up nyi rà nghut lhê. Yhâng é mingdán le htum nghu é joq rà a nghut." ga luí, yhang lé taí ri.

³⁴ Haù hkùn, Mariq gi, "Ngò gi, zomyi gyíng ru nghut ashí, haù gi, hkâsu wó dut rà lhú?" ga luí, maumang lagyo lé tú taí ri.

³⁵ Haù maumang lagyo gi, "Chyoiyúng Woi-nyí náng é ahtoq má jé lé mù, Myhang htáng htúm Su é wum-o a-tsam gi, náng lé shum gum to byi luí, haù baù lò rà Chyoiyúng sù le gi, Garai Gasâng é Yhangzo ga kó rà nghut lhê.

³⁶ Hau htoq agó, wú aq, náng é amyú suisho baùdung myhi Elizabet lháng, mang bê le yuggè zo wun to bê. Ahkuí, zogûng dut é lhamó hkyuq hkyap wàng bê nghut ri.

³⁷ Hkâsu mù gá le, Garai Gasang a wó kut é hai le a joq." ga luí, yhang lé tú taí ri.

³⁸ Haù hkùn, Mariq gi, "Yhumsing é jùnmyhi ngò nghut nyi lhê; náng é dang eq rajung za ngá chyáng dut lò sháng gaq." ga tú taí ri. Hau htáng, maumang lagyo gi, yhâng chyáng mai ló byuq bê.

Elizabet Lé Mariq Ê Hui É Hkyó

³⁹ Hau htàng hkâ-í a myáng má, Mariq gi, Yuda mau bum mau má é wà rawà shut hân hân e ló luí,

⁴⁰ Zahkariq é yhùm má wàng mù, Elizabet eq hui nyo lhùm ri.

⁴¹ Mariq é danghtë lé Elizabet wó gyo jáng, yhâng é unghkau má é zoshâng gi, byam chyú lo ri.

⁴² Elizabet le, Chyoiyúng Woi-nyí byíng to mù luí, Mariq lé hté mó eq taí é gi, "Myiwe banshoq má, náng gi, hkungsô wó dik sù nghut ri. Náng é unghkau má é zoshâng le hkungsô wó nyi ri ò!

⁴³ Ngá Yhumsing é yhângnu ngá chyáng jé lé é jeju gi, hai é yanmai nghut bê lhú?

⁴⁴ Wú aq, náng danghtë lé wó gyo kat jáng, ngá unghkau má é zoshâng gi, gabú luí byam chyú nyi ri.

⁴⁵ Haù Yhumsing taí é dang gi, gè gè dik lò rà nghut lhê ga luí, lumjing é myiwe gi, hkungsô wó nyi ri." gá ri.

Mariq Ê Hkya-on Dang

⁴⁶ Haù hkùn, Mariq gi, "Ngá é i-myt mai haù Yhumsing lé hkya-on nyi lhê,

⁴⁷ ngá é woi-nyí le, Garai Gasang ngá é hkyi yù Sù má gabú nyi lhê.

⁴⁸ Ngò Yhâng é jùnmyhi myit nyhum nyi é lé, Yhang myàng byi bê nghut ri.

Wú aq, ahkuí mai ipyat dedu má, ngo lé gi, hkungsô wó nyi sù, gá nyi bekò rà nghut lhê.

⁴⁹ Hkâsu mù gá le, Wum-o Bo Dik é Garai Gasang gi, ngo lé mauho mù mó kut byi bê nghut ri,

Yhâng é mying gi, chyoiyúng nyi ri ò.

⁵⁰ Yhang lé gyuq hoq nyi bâng é ahtoq má, Yhang shogyo nhikmyín é hkyô gi, pyat bán hkangmó jé shoq hkâ-nhám le joq nyi rà nghut lhê.

⁵¹ Yhâng é wum-o bo é loq eq mauho mù mó pé lé tân shit bê.

Yhumsing myit é hkyô má nghutbùn nyi é bang lé, Yhang lhoq pyo pyám bê.

⁵² Zaugun suwún wuí lé gi, zau zúng tanghkuq mai lhoq hkyô pyám mù, i-myt yhùm bang lé gi, lhoq myhâng bê nghut ri.

⁵³ Zòmut hui bang lé gi, ge é zoshuq gyi shoq byi tso mù,

utzè wó bang lé gi, akóm nhang kat bê nghut ri.

⁵⁴⁻⁵⁵ Nga-nhùng é ichiyí iwá pé lé taí tô é dang eq rajung za, Abraham eq yhangzo yhangshu pé lé,

hkâ-nhám le shogyo nhikmyín nyi rà gá e lé myit bìn nyi é yanmai,

Yhâng é dui-nhâng zoshâng Israelaq byu pé lé hku baù nyi ri."

ga luí, taí ri.

⁵⁶ Mariq gi, Elizabet chyáng lhamó sum hkyap kó nyi mù luí, yhùm shut dum taù lò byuq bê.

Wui-myhup Sará Yohan Baù É Hkyó

⁵⁷ Hau htàng, Elizabet gi, zoshâng bau rà buinyi jé mù, yuggè zo bau bê.

⁵⁸ Yhang lé haù-í kô é jeju Yhumsing tún shit é hkyô lé, yhâng é yhumkyo buinùm wui eq mung moq gumang wui wó gyo kojáng, yhang eq rahá gabú nyi akò.

⁵⁹ Ahkuí shit nyi jé jáng, yhangmoq gi, zoshâng haù lé ahpyo-kuq hpyit byi rà matú lé kôluí, yhâng wá é mying eq rajung za, Zahkariq ga myhing byi rà đã akò.

* 1:33 Yakup yhùm nghu e gi, Israelaq amyú lé gá lhê.

⁶⁰ Nghut kôlhang, yhâng nu gi, "A nghut, Yohan nghù sheq myhíng rã nghut lhê." ga tũ tai ri.

⁶¹ Yhangmoq gi, "Náng é amyù suisho má le, haù su gâ é myíng rayuq le a bo wú shí." ga luí, yhang lé tai akò.

⁶² Haù hkùn, zoshâng haù lé hkâsu nghù myhíng nau lhê laq ga, yhâng wa lé loq lik lik shít mù myí akò.

⁶³ Zahkariq gi, kâ jung longpá dũng yù mù, "Yhâng é myíng gi, Yohan nghut lhê." ga kâ shít ri. Haù mù, lhunglhâng bang gi, maù byuq bum akò.

⁶⁴ Haù hkùn jáng, Zahkariq gi, nhut hkum bóng lô mù, dang wó nyò lui, Garai Gasang lé hkya-ôn nyi ri.

⁶⁵ Haù su dut é hkyô lé, wó gyô é awui ayâm lhíngkyuq má é lhunglhâng bang gi, gyuq maù byuq bùm kômù, Yuda mau bum mau ramau gón tai pyo lô bum akò.

⁶⁶ Wó gyô é lhunglhâng bang gi, haù hkyô lé yhumsing é i-myit unghkaù má kat to mù, "Zoshâng shí gi, hkâsu dut lò rã sù nghut lhê lhu?" ga myit wú nyi akò. Haù mù gâ le, haù Yhumsing é loq gi, yhang eq rahá nghut nyi é yanmai nghut ri.

Zahkariq É Myiqhtoi Dang

⁶⁷ Haù hkùn, zòshâng é yhângwa Zahkariq gi, Chyoiyúng Woi-nyí byíng lô mù, myiqhtoi dang dong tai é gi,

⁶⁸ "Haù Yhumsing, Israelaq é Garai Gasang lé hkya-on sháng ô!

Haù mù gâ le, Yhang gi, Yhâng é amyù lé, lé kùm wú mù lui, lé hkyi yù bê nghut ri.

⁶⁹ Garai Gasang gi, Yhâng é dui-nhâng zoshâng, Dawiq é amyù mai nga-nhúng é matú

wum-o bo é hkyi yu é hkyu[†] lé, yuq htoq lò nhâng bê.

⁷⁰ Shí hkyô gi, a-nham pyat mai yhâng é chyoiyúng myiqhtoi pé é nhut mai tai tô é eq rajung za nghut ri.

⁷¹ Haù hkyu[†] gi, nga-nhúng lé nga-nhúng é gye pé chyáng mai le, a ngui a nau bang banshoq é loq mai le, hkyi yù rã nghut lhê.

⁷² Iwa Garai gi, nga-nhúng é ichyí iwa pé lé shogyo nhikmyin hkyô lé tũn shít rã matú, Yhang byí tô é chyoiyúng dangshikaq lé a tô-myí nghut ri.

⁷³ Haù gi, nga-nhúng é chyiké Abraham lé byi tô é danggidiq nghut lhê.

⁷⁴⁻⁷⁵ Nga-nhúng lé gye pé loq má hkyi yù rã eq, nga-nhúng asak dui tô é buinyi banshoq má,

Yhâng é hí má a gyuq a kyum é za, chyoiyúng é eq dingmán é hkyô mai,

Yhang lé wó dojaù nyí nhâng rã matú, Yhang jé lé é nghut lhê.

⁷⁶ Ngá zo é, nàng gi, Yhumsing é hí má, e lô mù lui, Yhâng é hkyô lé hen lajang byi rã sù nghut é yanmai, nang lé Myhang htáng htũm Su é myiqhtoi ga kó rã nghut lhê.

⁷⁷ Nàng gi, Garai Gasâng é byu pé lé, yhangmoq é yubak mara hkyut pyám byí é dong,

hkyi yu é hui rã hkyô lé tai kyo rã sù nghut lhê.

⁷⁸ Haù mù gâ le, Garai Gasâng é shogyo nhikmyin é yanmai, napsũn bui[‡] gi, mauhkũng mai nga-nhúng chyáng htoq lé lò rã nghut lhê.

⁷⁹ Yhang gi, mauchut hkaù[§] eq shí wup hkaù má lũng to bang lé builoq su duqbo byi rã eq,

nga-nhúng lé nguínón simsaq é hkyô shut shuí e lô rã sù nghut lhê." ga ri.

⁸⁰ Zoshâng haù gi, kô lò mù, woi-nyí wum-o bo lò lui, Israelaq byu pé chyáng htoq shít lo é buinyi jé shoq, yoso pé má nyi nyi ri.

2

Betlehem Wà Mó Má Yesuq Hku Lo É Hkyô

Mht 1:18-25

¹ Buinyi haù pé má, Romaq hkoséng ming banshoq má é byù lhunglhâng bang gi, myíng jìhpán kat rã matú, hkoséng Kehtaq Augustuq chyáng mai mungdang htoq ri.

² Jìhpán haù lé sâng-hi dàm guq hí é gi, Kuireni ga sù Suriq mau má mauzau kut nyi é hkũn nghut ri.

³ Haù hkùn, byù du jup gi, myíng jìhpán kat rã matú, ó le ô é wà shut lô bum akò.

⁴ Haù mù, Yosep le Dawiq é awut ashín nghut é yanmai, Galile mau Nazaret wà mai, Yuda mau má é Betlehem gâ é Dawiq é wà shut,

⁵ yhang dũng tô é myiwe Mariq eq rahá myíng kat lhóm rã matú jé doq lò akò; Mariq kùm gi, gungloq lai to bê nghut ri.

⁶ Haù Betlehem má nyi tô ashí le, Mariq gi, zo hkũ rã buinyi jé mù, zomún yuqzo lé bau bê.

⁷ Yhang gi, zoshâng haù lé panchoq èq htup mù no tso langhkang má lhez tô ri; haù mù gâ le, bíng yhũm má yhangmoq nyi rã jowò a joq lo é yanmai nghut ri.

Sau Zúng Bang Yesuq Chyáng Jé Lé É Hkyô

⁸ Ahku[†], haù ginwáng má é sau zúng zo bang gi, sau zúng jang má yhangmoq é sau hpúng lé, myin lé zúng nyi akò.

⁹ Haù hkùn, Yhumsing é maumang lagyo gi, yhangmoq é hí má lé htoq yap shít to

[†] 1:69 Hkyi yu é hkyu[†] gi, Yhumsing Yesuq lé tai é nghut ri. Mauchut hkaù gâ é gi, Garai lé a sé mù woi-nyí má shí tô é bang lé gâ lhê.

[‡] 1:78 Napsũn bui gâ é gi, Yesuq lé tai é nghut lhê. [§] 1:79

mù, Yhumsing é hpungwup shingkang gi, awui ayàm má duqbang lò luí, yhangmoq gyai gyuq bum akò.

¹⁰ Maumang lagyo gi, "Hkâgyuq kó, byù lhunglhang bâng é matú, gyai yhang gabú é danglú, ngò nungmoq chyáng wun lé lo lhê.

¹¹ Hkú-nyí lhê buinyi má, Hkrisduq* nghu é Yhumsing nghut é hkyi yù Sù gi, Dawiq é wà má nungmoq é matú hku to bê.

¹² Nungmoq é matú kumlhá gi, zoshâng nyheqnú rayuq panchoq eq htup mù, no tso langhkang má lhez to láng ra nghut lhê." ga luí, yhangmoq lé tai ri.

¹³ Háu hkún jáng yhang, mauhkung bang rajùm rayò htoq lò mù, maumang lagyo háu eq rahá Garai Gasang lé hkyá-ôn é dang gi,

¹⁴ "Htoq tsáng myhâng má, Garai Gasang gi, hpungwup shingkang bo nyí sháng gaq ô!

Myigùng htoq má le, Yhang ô nau é byu pé má, nguigón é gi, hkâ-nhám le joq nyí sháng gaq ô!"

gâ akò.

¹⁵ Maumang lagyo pé, yhangmoq chyáng mai, mauhkung shut dum lò byuq jáng, sau zúng bang gi, "Sà! Betlehem wà mó má jé shoq yhang, nga-nhung é mù, ahkuí za Yhumsing nga-nhung lé lé shit kyò lai lò bê hkyò lé é gôn wú sháng." ga luí, rayuq eq rayuq tai lhum akò.

¹⁶ Háu htàng, yhangmoq gi, hân hân é luí, Mariq eq Yosep lé le, no tso langhkang má lhez tò é zoshâng nyheqnú lé le, é myàng akò.

¹⁷ Zoshâng háu lé, yhangmoq myàng kôjáng, zoshâng háu eq séng luí yhangmoq lé, lé tai kyò é dang lé, tai pyò kat bekò.

¹⁸ Wó gyò é bang banshoq gi, háu sau zúng bang tai kyò é dang lé, mau byuq bum akò.

¹⁹ Mariq kúm gi, dut lo é hkyò pé eq wó gyò é dang banshoq lé unghkau má matsing yù mù luí, nik nik myit wú nyi ri.

²⁰ Sau zúng bang gi, yhangmoq lé mau-mang lagyo tai kyò kat é dang eq rajung za, wó gyò yù, wó myang yu é hkyò pé banshoq é yanmai, Garai Gasang lé hkyá-on kungtôn uchyang dum tau lò bekò nghut ri.

Yesuq Lé, Noqkuq Yhùm Má Shuí E É Hkyò

²¹ Zoshâng háu, shit nyí jé mù ahyo-kuq hpyit byi rá buinyi má, yhang unghkau má a lúng shi mai maumang lagyo myhng tó é myng eq rajung za, yhang lé, "Yesuq" ga luí, myhng byí akò.

²² Mosheq é tará eq rajung za, yhangmoq é lhoq san lhoq sêng é buinyi bying jáng, Yhumsing é tará má, "Zomún yuqzo

hkangmó gi, háu Yhumsing é hí má chyoiyúng sú wó nghú rá matú, Yhumsing chyáng é ap byi rá lhê."* gâ é eq,

²³ "Hpúngkyui razúm, háu a nghut jáng, nghoqmyhú zo í du, "gâ hkungga byi rá lhê ga kâ tò é eq rajung za,

²⁴ Mariq eq Yosep gi, zoshâng háu lé shui mù Yerusalem wà mó shut é akò.

²⁵ Háu hkún, Simeon gâ é mangzo rayuq, Yerusalem wà mó má nyi ri. Háu yuq gi, dingmán é eq tará cháng sú nghut mù, Israellaq lé nhik lhoq tít rá ahkying lé láng nyí sú nghut ri; háu Chyoiyúng Woi-nyí le, yhâng é ahtoq má nyi nyi ri.

²⁶ Yhang gi, háu Yhumsing Hkrisduq lé a myang é za, shí rá a nghut, ga Chyoiyúng Woi-nyí eq tún shit tò é hui sú nghut lhê.

²⁷ Yhang gi, Chyoiyúng Woi-nyí eq shui mù, noqkuq yhúmkaú má é jé nyi tò é hkún lé, Mariq eq Yosep gi, zoshâng Yesuq lé htung tará eq rajung za kut byi rá matú, noqkuq yhúmkaú má shuí wang lò kôjáng,

²⁸ Simeon gi, zoshâng lé loq eq lhom bún yù mù, Garai Gasang lé hkyá-ôn é dang gi,

²⁹ "Yhumsing é, náng é danggidiq gi, dik bê nghut ri; hkú-nyí náng é jùn ngò gi, nguigón é eq wó shi lò berá nghut lhê.

³⁰ Háu mù gâ le, byù lhunglhang bâng é matú, náng lajang tò é hkyi yù hkyò lé, ngá myoq eq yhang wó myàng bê.

³¹ Háu gi, byù myú chângiup wó myàng rá matú, náng lajang to byí é nghut mù,

³² tûngbaù pé lé, tengmán hkyò má bui su duqbó mù hpông shit rá matú le, náng é amyú Israellaq é hpungwup shingkang matú le nghut nyi ri."

gâ ri.

³³ Yhângnu eq yhângwá nhik gi, zoshâng Yesuq é hkyò lé Simeon tai é yanmai, mau byuq akò.

³⁴ Simeon gi, yhangmoq lé shimân byi mù, Yhâng nu Mariq lé, "Wú aq, zoshâng shí gi, Israellaq ming má é byù myo myò é matú lingbat jowò eq myo myò é matú kò lò myhng lò rá hkyò le, byù myo myo tai he pyám rá kumlhá matú le, hkyin tò é hui sú nghut ri.

³⁵ Háu mù, byù myo myò é unghkau má, myit mi-miyit lé lhoq htoq shit rá nghut lhê. Náng é myit nhikhum má, sâm chún eq htau kyâng kat é su gâ é lé, náng hui zo rá nghut lhê." ga tai ri.

³⁶ Ashe amyú má é Hpanuelaq é yhangzo, Annaq gâ é myightoi myhi rayuq nyi ri; yhang gi, ipyat gyai ko bê. Yhang gi, zomyi pyat mai, yhanglàng eq nyhit zân za nyi luí, shit xe myi zân jé shoq chuimó mó nyi to sú nghut ri.

* 2:11 Grik dong *Hkrisduq* gâ é gi, xú but hui Sù gâ é lichyúm nghut mù, Hebre dong "Mesaia" gâ é eq rajung za nghut lhê. ✧ 2:22 Htoq Ló 13:2,12 ✧ 2:23 Nhung 12:8

³⁷ Myiwe haù gi, noqkuq yhùm mai a htoq é za, nyí myín a ga noqkuq dojaú nyí mù, zoshuq gám luí kyúduung nyí ri.

³⁸ Simeon dang ban tai jáng, Annaq gi, hui lé lô mù, Garai Gasâng jeju lé hkyá-on luí, Yerusalem wà mó lé Garai Gasang hkyi yù rà gâ é lé, myit lum to bang lhunglhang lé, zoshâng hau é hkyô tai kyô ri.

³⁹ Yosep eq Mariq gi, kut rà pé lé haù Yhumsing é tarâ joq é dông ban kut jáng, Galile mau má é yhangmoq wà Nazaret shut dum taù lô bekô.

⁴⁰ Zoshâng haù gi, kô lò mù, wum-o bò lo é eq, hpaqchyí byéng-yá le byíng nyí ri. Garai Gasâng jeju le, Yhâng é ahtoq má joq nyí ri.

Noqkuq Yhúmhaù Má Zoshâng Yesuq Jé Nyí É Hkyô

⁴¹ Yhângnu yhângwâ nhik gi, Lhoqlhai Poi jé hkangmó, zàn wui Yerusalem wà mó má é é kut akô.

⁴² Yesuq raxe í zân jé jáng, poi haù, é bo lóm ra htungli joq é eq rajung za, yhangme wui yhangphe wui doq lô akô.

⁴³ Haù poi buinyí lai luí, dum taù lo é hkûn, zoshâng Yesuq gi, Yerusalem wà mó má nyí gyó tô ri; nghut kôlhang, yhângnu yhângwâ nhik gi, a sé kô.

⁴⁴ Yesuq lé raha lô é luzúm wui chyáng bò rà su ngàm kômù luí, Yosep eq Mariq gi, ranyí buigyùm chap sô lô bé htâng má, mung moq wui eq, sê lhùm é buinúm ji-myi wui chyáng Yhang lé châng ho akô.

⁴⁵ Yhangnhik gi, Yesuq lé a myàng kôjáng, Yhang lé châng hô uchyang, Yerusalem wà mó má dum taù jé e lô bekô.

⁴⁶ Ahkuí, sum nyí nghù rà nyí sheq, noqkuq yhúmhaù má, tarâ sará pé é gung gung má zùng to mù, yhangmoq é dang lé gyo yù luí, dum taù myi myi kut nyí é lé, yhangnhik é myàng akô.

⁴⁷ Yhâng é dang wó gyô é bang banshoq gi, Yhâng é u-nuq nyau é hkyô lé le, Yhang tú tai é dang lé le, mau nyí akô.

⁴⁸ Yhang lé myàng jáng, yhangnhik mau byuq kômù luí, yhângnu gi, "Ngá zo è, hai mù luí ngá-nhik lé isu kut lhê lú? Wú aq, náng wa eq ngá-nhik gi, myit myo myit chiq é èq, náng lé jaq châng ho pyám bê." ga luí, Yhang lé tai ri.

⁴⁹ Yhang gi, "Hai mù luí, ngo lé châng ho akô lú? mauhkungmâ é ngá Wâ é yhùm má ngo nyí rà lhê le gi, nungnhik a sé kô lú?" ga luí, yhangnhik lé tú tai ri.

⁵⁰ Nghut kôlhang, yhangnhik gi, Yesuq tai é dang lichyúm lé, a sê gyo kô.

⁵¹ Yesuq kúm gi, yhangnhik eq raha Nazaret wà shut taù jé gyo lô luí, yhangnhik

nyo é dang lé gyo mù nyí tô ri. Yhângnu Mariq gi, dut lai lò bê hkyô pé banshoq lé, yhâng é myit nhiklhum má matsing tô ri.

⁵² Yesuq gi, hpaqchyí byéng-yá kung zet lo é eq, gungkyang kô myhang lò mù, Garai Gasâng é hí má le, byu hí má le, myoqdong wó lo nyí ri.

3

Wui-myhup Sará Yohan Mhoqshit É Hkyô

Mht 3:1-12; Mrk 1:1-8; Yhn 1:19-28

¹ Ronaq hkoséng Kehtaq Tiberuq gi, hkó zung é raxe ngo zân nghut é hkûn, Yuda mau má Pontu Pilat gi, mauzau ayá má; Galile mau má, Herut gi, mauzau ayá má; Ituri eq Trakuni mau má, Herut yhanggu Hphilip gi, mauzau ayá má; Abili mau má, Lusanu gi, mauzau ayá má;

² Anna eq Kayahpaq gi, hkyangjong mó mù má, kut nyí akô. Haù hkûn, Garai Gasâng é mungdang gi, yoso má nyí tô é, Zakhariq é yhangzo Yohan chyáng jé lé ri.

³ Haù mù, yhang gi, Yodan làng yàm jowò hkangmó má, sô jón wún luí, yubak mara hkyut pyám byí é hui rà matú myit lhing mù, wui-myhup hkâm* yù rà hkyô lé, hko kyô nyí ri.

⁴ Haù gi, myiqhtoi Esai-aq laiká má, "Haù yoso má, byù rayuq garú tai é hté gi, 'Haù Yhumsing é matú, hkyô hen to keq, Yhâng é matú hkyô lhoq nyhang to keq;

⁵ wuìhking langhkop hkangmó lé lhoq pyíng ra rà nghut lhê;

bùm eq wingkáng hkangmó lé hpyit pyám ra rà nghut lhê;

agoí aguq é hkyô hkat hkangmó lé lhoq nyhâng ra rà nghut lhê;

ahkung ahkop dut é hkyô hkat hkangmó lé lhoq rhá ra rà nghut lhê.

⁶ Haù hkûn, byù banshoq gi, Garai Gasâng é hkyi yù hkyô lé myàng rà nghut lhê."[†]

ga luí, kâ tô é eq rajung za nghut ri.

⁷ Shiwa byù rajum rayò gi, Yohan é loq má wui-myhup hkâm yù rà ga luí htoq lé lô kôjáng, Yohan tai é gi, "Duq htan é lhangmui amyú pé[†] è, jé lô rà yubak dam mai wó hpang lut kó sháng gaq ga, nungmoq lé ó yuq tai pún é lú?

⁸ Myit lhing hkyô eq gingdán é ashi zui keq. 'Nga-nhung gi, Abraham é yhangzo yhangshù pé nghut lhê.[‡] nghù luí, yhumsing é i-myit unghkaù má hkâtai kó. Hkâsu mù gâ le, ngo, nungmoq lé tai kyo kôlé,

* 3:3 *Wui-myhup hkâm* gá é gi, baptisma lé gá é nghut lhê.

† 3:7 *Lhangmui amyú pé gá* é gi, Lukaq 3:7-10 má bo é Hparishe eq Saduke pé lé tai é nghut ri. ‡ 3:8 *Nga-nhung gi, Abraham é yhangzo yhangshù pé nghut lhê* gá é gi, Abraham é yhangzo yhangshu nghut é yanmai, Garai Gasang jéyáng é lé a hui rà ga, myit yu é hkyô nghut ri.

Garai Gasang gi, luqgok shí pé mai, Abraham é matú yhangzô pé wó hpan htoq kat lhê.

⁹ Ahkuí lháng, Garai Gasang gi, Yhâng é wazung lé haú siggâm wang pé má tô to bê nghut ri; haú mù, ge é ashí a zui é agâm hkangmó lé gi, htuq lhêng pyám mù, myí má dú kat pyám rà nghut lhê." gâ ri.[§]

¹⁰ Haú hkún, shiwa byu pé gi, "Haú nghut le gi, ngamoq hkâsu kut le gè rà lhú?" ga luí, yhang lé myí akò.

¹¹ Yhang gi, "Bú í dung wó sù gi, bu a wó sù lé, gâm byi sháng gaq; zo shuq wó sù le, a wó sù lé, gâm byi sháng gaq." ga luí, yhangmoq lé tú tai kat ri.

¹² Kang guq bang le, wui-myhup hkâm yú rà ga lé lô mù, "Sarâ é, ngamoq gi, hkâsu kut le ge rà lhú?" ga luí, yhang lé myí akò.

¹³ Yhang gi, "Nungmoq hkyui yú rà masat tô é htoq lai shoq hkâyú kó." ga luí, yhangmoq lé tai ri.

¹⁴ Gyezô pé ra-am le, "Ngamoq gi, hkâsu kut le gè rà lhú?" ga luí, yhang lé lé myí akò.

Yohan gi, "Ó lé le hkâkyuq zo ko; a tara é dông mara le hkâhûn kó; nungmoq wó e ahpau éq gé bún nyi keq." ga luí, yhangmoq lé tai ri.

¹⁵ Shiwa byu pé kúm gi, Hkrisduq lé myit láng nyi tô é bang nghut é yanmai, Yohan lé haú yuq nghut lhê laq ga yhumsing é i-myit unghkau má myit wú nyi bum akò.

¹⁶ Haú hkún, banshoq bang lé Yohan tai é gi, "Ngò gi, nungmoq lé, wui éq za wui-myhup hkâm byi lhê; nghut kôlhang, ngá htoq má wum-o a-tsam je bo é sù rayuq jé lé lô rà nghut lhê. Ngò gi, yhâng é hkyi-tsung tui lé hpyí rà lháng a gingdán; Yhang gi, Chyoiyúng Woi-nyí má le, myí má le, nungmoq lé wui-myhup hkâm byi rà nghut lhê.

¹⁷ Yhang gi, loq má byò chung to mù, guq chyâràng má é guq bùm lé hik sán pyám luí, já é guq cham lé gi, guqchyí má tsing kat to mù, guqsôm lé kúm gi, hkâ-nhám le shi byuq a sê é myí éq nyhé hkyó pyám rà nghut lhê." gâ ri.*

¹⁸ Haú mù, Yohan gi, byù haú bang lé gotú dang myo myo éq lhoq pun lhoq kyíng mù, gabú danglù lé hko kyò nyi ri.

¹⁹ Nghut kôlháng, hkâ-myháng a myáng má mauzau Herut gi, yhanggú é yhangmyi Herudiaq lé lú yu é hkyò eq, yhang kut shut é gotú a ge é mù banshoq é yanmai, Yohan gi, yhang lé tân mhoqshit bê nghut ri.

²⁰ Mara haú pé htoq agó, Herut dum kut jat yu é mara gi, Yohan lé htóng má lhúng kat é nghut ri.

Yesuq, Wui-myhup Hkâm Yu É Hkyô
Mht 3:13-17; Mrk 1:9-11

²¹ Yohan lé htóng má a lhúng kat shimá, byù myo myo gi, wui-myhup hkâm yu nyi kó é hkún, Yesuq le Yohan chyáng wui-myhup hkâm yù mù, kyúdüng nyi le, mauhkúng bóng lô mù,

²² haú Chyoiyúng Woi-nyí gi, hpúngkyui gungghyàng sù é dông mai Yhâng ahtoq má lé gyó nô ri. Haú hkún, "Nàng gi, Ngò chyitdap é Ngá zo nghut lhê; Náng é ahtoq má Ngò gabú myit ngón nyi lhê." ga mauhkúng mai danghtë htoq lo ri.

Yesuq É Byù Xik Shap Kyô É Hkyô
Mht 1:1-17

²³ Yesuq gi, Yhang mù zui hi é hkún, asak sum xê zàn kô nghut bê; Yhang lé byù hkyam dông gôn wú jáng, Yhang gi, Yosep é yhangzo nghut ri; Yosep gi, Heli é yhangzo, Heli gi, Mahtat é yhangzo,

²⁴ Mahtat gi, Lewiq é yhangzo, Lewiq gi, Melahki é yhangzo, Melahki gi, Yannai é yhangzo, Yannai gi, Yosep é yhangzo,

²⁵ Yosep gi, Matahtiaq é yhangzo, Matahtiaq gi, Amo é yhangzo, Amo gi, Nahum é yhangzo, Nahum gi, Esali é yhangzo, Esali gi, Nagai é yhangzo,

²⁶ Nagai gi, Maat é yhangzo, Maat gi, Matahtiaq é yhangzo, Matahtiaq gi, Semai é yhangzo, Semai gi, Yosek é yhangzo, Yosek gi, Yodaq é yhangzo,

²⁷ Yodaq gi, Yohan é yhangzo, Yoanan gi, Resa é yhangzo, Resa gi, Zerubabelaq é yhangzo, Zerubabelaq gi, Shalahtila é yhangzo, Shalahtila gi, Neri é yhangzo,

²⁸ Neri gi, Melahki é yhangzo, Melahki gi, Adi é yhangzo, Adi gi, Kusam é yhangzo, Kusam gi, Elamadam é yhangzo, Elamadam gi, Era é yhangzo,

²⁹ Era gi, Yoshuq é yhangzo, Yoshuq gi, Elieze é yhangzo, Elieze gi, Yorim é yhangzo, Yorim gi, Mahtat é yhangzo, Mahtat gi, Lewiq é yhangzo,

³⁰ Lewiq gi, Simeon é yhangzo, Simeon gi, Yudaq é yhangzo, Yudaq gi, Yosep é yhangzo, Yosep gi, Yonam é yhangzo, Yonam gi, Eliakim é yhangzo,

³¹ Eliakim gi, Mela é yhangzo, Mela gi, Menaq é yhangzo, Menaq gi, Matahta é yhangzo, Matahta gi, Nahtan é yhangzo, Nahtan gi, Dawiq é yhangzo,

³² Dawiq gi, Yese é yhangzo, Yese gi, Obet é yhangzo, Obet gi, Bua é yhangzo, Bua gi, Salamun é yhangzo, Salamun gi, Nashon é yhangzo,

³³ Nashon gi, Aminada é yhangzo, Aminada gi, Arni é yhangzo, Arni gi, Hesrun

§ 3:9 Bun zo shí lhúm é lichyúm gi, myit a lhing bang lé, Garai Gasang jéyáng é buinyi jé rà nghut lhê ga nau é nghut ri.

* 3:17 Haú eq rajung za, Hkrisduq gi, a ge é byu pé eq ge é byu pé lé gam hkoq pyám rà nghut lhê.

é yhangzo, Hesrun gi, Hparet é yhangzo, Hparet gi, Yudaq é yhangzo,

³⁴ Yudaq gi, Yakup é yhangzo, Yakup gi, Isak é yhangzo, Isak gi, Abraham é yhangzo, Abraham gi, Htara é yhangzo, Htara gi, Nahura é yhangzo,

³⁵ Nahura gi, Seruk é yhangzo, Seruk gi, Re-u é yhangzo, Re-u gi, Hpelek é yhangzo, Hpelek gi, Ebera é yhangzo, Ebera gi, Shela é yhangzo,

³⁶ Shela gi, Kainan é yhangzo, Kainan gi, Arhpaza é yhangzo, Arhpaza gi, Shem é yhangzo, Shem gi, Noaq é yhangzo, Noaq gi, Lamek é yhangzo,

³⁷ Lamek gi, Mehtusela é yhangzo, Mehtusela gi, Enuq é yhangzo, Enuq gi, Yaret é yhangzo, Yaret gi, Mahelela é yhangzo, Mahelela gi, Kainan é yhangzo,

³⁸ Kainan gi, Enu é yhangzo, Enu gi, Shet é yhangzo, Shet gi, Adam é yhangzo, Adam gi, Garai Gasâng é yhangzo nghut ri.

4

Yesuq Lé Tsadán Gunglau É Hkyô

Mht 4:1-11; Mrk 1:12-13

¹ Yesuq gi, Chyoiyúng Woi-nyí èq byíng mù, Yodan làng mai dum taù lo é hkùn, Chyoiyúng Woi-nyí gi, Yhang lé yoso shut shuí e ri.

² Haù má, Yesuq gi, buinyí myi xé nyí jé shoq, nat Tsadán èq gunglau é huí ri. Buinyí haù gyoro má, Yesuq gi, haí le a zô é yanmai, zòmút hui bê nghut ri.

³ Haù mù luí, nat Tsadán gi, "Nàng, Garai Gasâng é Yhangzo nghut le gi, luqqok shí lé muk dut nhâng aq." ga luí, Yhang lé taí ri.

⁴ Haù hkùn, Yesuq gi, "'Byù gi, muk èq za asak dù ri rá a nghut.' ga luí, Chyúmdang má kâ tô ri."^o ga yhang lé tú taí ri.

⁵ Hau htâng, nat Tsadán gi, Yesuq lé, gyai yhang myhang é bùm htoq má shuí doq ló mù, mingkan má joq é mingdán pé banshoq lé razup má za tûn shit luí,

⁶ "Shí ahkáng ayá banshoq eq haù mingdán é hkikhkâm hkyô banshoq, ngò nang lé wó byí lhê; hkâsu mù gà le, haù pé banshoq gi, ngo lé ap byí to bê nghut mù, ngò byí nau é sù ó yuq lé nghut kôhang, byi rá nghut lhê.

⁷ Haù mù, Nàng, ngo lé noq é nghut jáng, shí pé banshoq Nàng é dut rá nghut lhê." ga, Yesuq lé taí ri.

⁸ Haù hkùn, Yesuq gi, "'Haù Yhumsîng náng é Garai Gasâng lé za, náng noqkuq dojaú ra rá nghut lhê."^o ga luí, Chyúmdang má kâ tô ri." ga luí, yhang lé tú taí ri.

⁹ Nat Tsadán gi, Yesuq lé Yerusalem wà mó má shuí é mù, noqkuq yhum je myhang é

shùhtâng htoq má yap nhang to luí, "Nàng, Garai Gasâng é Yhangzo nghut le gi, shí mai byam gyó kat wú aq.

¹⁰ Hkâsu mù gà le,

'Nang lé upzúng byí nyi rá matú, Garai Gasang gi, Yhâng é maumang lagyó pé lé taí to rá nghut mù,

¹¹ luqqok má náng é hkyí a ló htung shoq, yhangmoq é loq èq Nang lé lhom bún yù kô rá nghut lhê."^o

ga luí, Chyúmdang má kâ tô ri." ga taí ri.

¹² Nghut kôhang, Yesuq gi, "'Haù Yhumsîng, nungmoq é Garai Gasang lé, wó chyam wú rá a nghut."^o ga luí, Chyúmdang má bo tô ri." ga, yhang lé tú taí ri.

¹³ Nat Tsadán gi, gunglau é hkyô pé banshoq ban kut jáng, ahko ahkáng làng wú uchyang yhâng chyáng mai byam gâng nyi byuq ri.

Yesuq Lé Nazaret Wà Bang He-ngik Pyâm

É Hkyô

Mht 4:12-17; 13:53-58; Mrk 1:14-15; 6:1-

6

¹⁴ Yesuq kúm gi, Chyoiyúng Woi-nyí wum-o byíng é èq Galile mau shut dum taù lo ri. Haù mau jowò hkangmó má, Yhâng é hkyô lé taí pyo ló bùm bekò.

¹⁵ Yhangmoq é tarajong pé má, Yesuq mhoqshit byi mù, lunglhâng bang gi, Yhang lé taí hkya-ôn nyi bum akò.

¹⁶ Hau htâng má, Yhang nyi kô lo é Nazaret wà má dum taù jé ló bê; Yhang gi, hkâ-nhâm le kut nyi é eq rajung za, Bánno buinyí* lé tarajong má wang é mù, laiká nghap rá ga toq yap é hkùn,

¹⁷ Yhang lé myiqhtoi Esai-aq chyúmding byi kôjáng, Yhang chyúmding haù lé hpông kat le,

¹⁸ "Yhumsîng é Woi-nyí gi, ngá é ahtok má nyi nyi ri;

hkâsu mù gà le, asho awuí é bang lé gabú danglù hkò kyo rá matú, Yhang ngo lé hkyin yù bê.

Htóng lúng bang lé lhoq htoq rá hkyô eq, myoqjit bang lé myoq dum myàng nhâng rá hkyô hkò kyo rá matú le,

zik zo huí é bang lé nhang kat nhâng rá eq,

¹⁹ Yhumsîng, Yhâng é byu pé lé hkyi yù rá ahkyíng zanwut lé hkò kyo rá matú le, Yhang, ngo lé nhang kat bê nghut ri."^o

ga luí, kâ tô é jowò lé myang záng mù nghap ri.

²⁰ Hau htâng, Yesuq gi, chyúmding haù lé ding mù, shuí-u sù lé tau byí pyâm luí, dum zung tô ri; tarajong mã é byu lunglhâng bang gi, Yesuq lé chòm wú tô é hkùn,

* 4:4 Tarà Pun 8:3 * 4:8 Tarà Pun 6:13 * 4:11 Hkya-on 91:11-12 * 4:12 Tarà Pun 6:16 * 4:16 Bánno buinyí gá é gi, Yudaq byu pé nòmu é buinyí lé gà lhê. Ahkui lhê é dǒng ga jáng, Bánno buinyí gi, bat htoq hkyuq nyí lé àng ri. * 4:19 Esai 61:1-2

21 Yesuq gi, "Nungmoq é nohkyap má, ahkuí wó gyô é Chyúmdang shí gi, hkû-nyí yhang lo dik bê." ga luí, yhangmoq lé tai hi kat ri.

22 Lhunglhang bang gi, Yhang ge é hkyô lé saksé hkám byi kômú, Yhâng é nhut mai htoq é jeju bo é dang lé le, mau kôluí, "Shí yuq gi, Yosep é yhangzo a nghut lúhú?" ga tai bum akô.

23 Haú mù luí, Yesuq gi, "Nungmoq gè gè yhang, 'Chi sará é, yhumsing gùng lé lhoq ge yù aq.'† gá é sanghkyang èq le, 'Nàng, Kaperna-um wà má kut shit wú é hkyô ngamoq wó gyô bê, haú eq rajung za, nàng, náng é yhum mau má le, kut shit wú aq.' ga luí le, ngo lé tai kó rá nghut lhê." ga tai ri.

24 Yhang dum xoq tai é gi, "Ngò, nungmoq lé teng za tai kôlé, myiqhtoi ó yuq le yhum-sing é yhum mau má myoqdong wó wú é a nghut.

25 Ngò, nungmoq lé teng za tai kôlé, Eliyaq é pyat lé, Israelaq ming má chuimó myo myo nyi bum akô.

26 Nghut kôlhang, haú ming má sùm zan eq lhamó hkyuq hkyap yhang, mau a wò dut byuq mù, mutmó gyô tô é hkûn, Garai Gasang gi, yhangmoq má é rayuq chyáng le, Eliyaq lé a nhang kat é za, Sidun mau Zarephtha wà má é, chuimó myhí rayuq chyáng sheq nhang kat byí é nghut lhê.

27 Myiqhtoi Elisha é pyat má le, Israelaq ming má, manggâm dap é byù myo myo nyi kôlhang, yhangmoq chyáng má é rayuq le wó sân-yúng yù kô é a nghut; Suriq byù Naman ga so túngbaù hpó za sheq wó sân-yúng é nghut lhê." ga tai ri.

28 Tarajong hkaú má é lhunglhang bang gi, haú hkyô lé wó gyô kôjáng, gyai yhang nhikyo nau bùm kômú,

29 toq yap luí, Yhang lé wà mai hkat htoq mù, yhangmoq é wà xuq tô é bùm gùng htoq má é gampyoq má, é chyùn hpyit hkyô pyám rá ga shuí é ló akô.

30 Nghut kôlhang, Yesuq kúm gi, byù hpûng haú mai so hkoq htoq ló byuq bê nghut ri.

Agè Ashop É Nat Lé Yesuq Hkat Htoq É Hkyô

Mrk 1:21-28

31 Hau htàng, Yesuq gi, Galile mau má é Kaperna-um wà má jé é mù, Bánno buinyi má byu pé lé mhoqshit hi ló bê nghut ri.

32 Yhangmoq gi, Yhang mhoqshit é hkyô lé mauhong nyi akô; hkâsu mù gá le, Yhang gi, ahko ahkáng bo é dang đông tai nyi é yanmai nghut ri.

33 Yesuq, tarajong hkaú má mhoqshit byi nyi é hkûn, nat gang wang júng é byù rayuq hté mó o mó èq tai é gi,

34 "Ê, Nazaret wà byù Yesuq é, ngamoq gi, Nàng eq haí sèng lhê lúhú? Ngamoq lé lhoq hten rá matú, Nàng jé lé é nghut lhê lúhú? Nàng gi, Garai Gasáng é Chyoiyúng Sù nghut é lé, ngò sê lhê." gá ri.

35 Haú hkûn, Yesuq gi, "Hkâjop, yhang chyáng mai htoq ló aq." ga yhang lé tân kat jáng, nat gi, haú yuq le yhangmoq é gung gùng má lhoq lhez to mù, a nò nhang é za, yhang chyáng mai htoq ló byuq ri.

36 Haú mù luí, shiwa byù banshoq bang gi, gyai yhang mau byuq kômú, rayuq eq rayuq, "Shí yuq é dang gi, hkasú é dang wá nghut lhê lúhú? Yhang gi, ahkáng ayá èq le, wum-o bo é èq le, agè ashop é nat pé lé hkunmó hkyô jáng, haú bang htoq ló byuq akô." ga tai lhum bum akô.

37 Haú hkûn, haú mau má é awui ayàm jowò hkangmó má jam shoq, Yhâng é hkyô lé tai pyo hù ló bùm bekò nghut ri.

Yesuq Nòhpyo Lhoq Gê Byí É Hkyô

Mht 8:14-17; Mrk 1:29-34

38 Yesuq gi, haú tarajong mai toq ló mù, Simun é yhùm má wang ló ri. Simun é yhang-aumó gi, ali gyai nyé no nyi é nghut mù luí, lhoq gê byí rá matú, Yesuq lé garúm dung byí akô.

39 Yesuq gi, Simun é yhang-aumó nàm má yap to mù, nòhpyo haú lé tân kat jáng, Simun é yhang-aumó gi, ge ló byuq bê; haú hkûn jáng, yhang gi, toq mù, yhangmoq lé gai tso gai huq bê nghut ri.

40 Bui wang ló jáng, nòhpyo hui bang eq awáng nòhpyo ajung jung dap é bang lhunglhang lé, Yesuq chyáng shuí lé ló kômú, yhangmoq rayuq htàng rayuq é ahtaq má Yesuq gi, loq ke byi luí, lhoq gê byí ri.

41 Nat gâng pé gi, Yesuq lé, "Nàng gi, Garai Gasáng é Yhangzo nghut ri." ga luí, wut tai mù byù myo myô chyáng mai htoq ló byuq akô; Yesuq gi, Hkrisduq nghut é hkyô lé, yhangmoq sé kô é yanmai, yhangmoq lé dang a wó tai loshoq, Yesuq tân pyám ri.

42 Maubó ló jáng, Yesuq gi, htoq ló mù, gáu é jowò yoso hkaú má é nyi tô ri; shiwa byu pé kúm gi, Yhang lé hkat hô kômú, myang hô kôjáng, yhangmoq chyáng mai a ló byuq rá matú châng hkûm wú akô.

43 Nghut kôlhang, Yesuq gi, "Garai Gasáng é mingdán é gabú danglú lé, gó wá pé má le ngò hko kyo rá rá ashí, haú é matú, Garai Gasang gi, ngo lé nhang kat bê nghut lhê." ga luí, yhangmoq lé tai ri.

44 Haú mù, Yesuq gi, Yuda mau má é tarajong pé má, hko kyô wún nyi ri.

5

Sâng-hi Ji Yù Hui É Chángzô Pé

Mht 4:18-22; Mrk 1:16-20

† 4:23 Chi sará é, yhumsing gùng lé lhoq ge yù aq gá é sanghkyang gi, "Mesaia nghut le gi, mauho mù wó tân shit rá nghut lhê." gá é nghut lhê.

¹ Radàm má lé, Yesuq gi, Genesarat nhông yàm má yap tô le, Garai Gasàng é mungdang gyo râ ga, shiwa byu pé, Yhâng chyáng chyin chyap wang lé lô kô é hkùn,

² nhông gin-gau yàm má lhai razùm joq tô é lé, Yhang myang kat ri. Nngôn dú bang kúm gi, lhai mai htoq mù, yhangmoq é gùn pé lé chi nyi akô.

³ Yesuq gi, Simûn é lhai má wàng mù gin-gau mai rachyit lhoq kang nhâng luí, haú lhai htoq má zung to mù, shiwa byu pé lé mhogshit tai kyô nyi ri.

⁴ Dang ban tai jáng, Yesuq gi, Simun lé, "Wui nik é shut hui luí, ngozo wó kông yù râ matú, nungmoq é gùn pé lé dú hkyô kat keq." ga tai ri.

⁵ Simun gi, "Yhumsing ê, ngamoq amàn ramyin mau shikut wú kôlhang, hai le a wó; nghut kôlhang, náng dang é yanmai, ngò gùn dú hkyô kat râ nghut lhê." ga tù tai ri.

⁶ Gùn pé lé hkyô kat kôjáng, yhangmoq gi, ngozo gyai myo shoq lé wó kông yù kômù, gùn lhang jeq lô râ su dut é yanmai,

⁷ lhai gó lhum má é luzùm wui lé, lé garùm yù râ matú loq lik lik kat kôjáng, haú bang lé lô mù, haú lhai í lhum aluq myup lô shoq ngozo lé kat pying bekô.

⁸ Simun Petruq gi, haú lé myàng jáng, Yesuq é hkyi wang má hkyihput htuq mù, "Yhumsing ê, ngá chyáng mai lô byuq aq, hai mù gá le, ngò gi, yubak ðap é byù nghut nyi lhê." ga tai ri.

⁹ Hai mù luí gá le, Simun le, yhang eq nyi tô é lhunglhang bang le, haú su ngozo wó yu é yanmai, maú nyi bùm kômù nghut ri.

¹⁰ Simûn é luzùm nhik, Zebedi é yhangzo Yakuq eq Yohan le, haú su chòm maú byuq akô.

Hau htàng, Yesuq gi, "Hkâgyuq, ahkuí mai nàng gi, byù lé châng kóng sù dut râ nghut lhê." ga luí, Simun lé tai ri.

¹¹ Yhangmoq gi, wuiyàm má jé jáng, lhai pé eq yhangmoq é zè banshoq lé tô pyàm to luí, Yesuq htàng châng bekô nghut ri.

Manggâm Dap Bang Lé Yesuq Lhoq Gê Byí É Hkyô

Mht 8:1-4; Mrk 1:40-45

¹² Radàm lé, Yesuq gi, wá rawá má nyi tô lé, ragúndú é manggâm dap é byù rayuq lé lo ri; haú yuq gi, Yesuq lé myàng jáng, hkyihput htuq luí, "Yhumsing ê, Náng dóng é nghut le gi, ngo lé Náng wó lhoq sân-yúng byi râ nghut lhê." ga ðung wut ri.

¹³ Yesuq gi, loq lhâm kat mù, haú yuq lé é záng luí. "Ngò dóng lhê, sân-yúng aq hkoi." ga tai ri; haú hkùn jáng, haú yuq é manggâm gi, ge byuq bê nghut ri.

¹⁴ Yesuq gi, "Nàng, shí hkyô ó lé le hkâtai kyo. Nghut kôlhang, náng é gungdu lé,

hkyangjong hpô chyáng lô tún shit mù, náng sân-yúng bê hkyô lé yhangmoq é matú saksé dut sháng gaq, Mosheq tarâ tô tô é eq rajung za, hkungga lô nhông byi aq." ga, yhang lé tai hkùm kat ri.

¹⁵ Nghut kôlhang, Yesuq é hkyô gi, je riy-hang tai pyo hù jam lô mù luí, shiwa byù rajùm rayò gi, Yhâng é dang gyo râ matú le, yhangmoq é nòhpyo lhoq gê byí nhâng rá matú le, lé zup mung tô akô.

¹⁶ Yesuq kúm gi, Yhang baú tsik za yoso shut htoq é mù, kyù é dung dung kut ri.

Gùngjum Shí Sù Lé, Yesuq Lhoq Gê Byí É Hkyô

Mht 9:1-8; Mrk 2:1-12

¹⁷ Ra-nyí lé, Yesuq mhogshit nyi é hkùn, Hparishe pé eq tarâ sará pé le, Yesuq nâm má zung tô akô; haú bang gi, Galile mau wá hkyap hkangmò má é bang eq Yuda mau, Yerusalem wá mó má é bang nghut akô. Yhumsing Garaí é wum-o a-tsam le nòhpyo lhoq gê rá matú Yesuq eq rahá nghut nyi ri.

¹⁸ Haú hkùn, byù ra-am gi, gùngjum shí sù rayuq lé taphkang mai waq lé lô kômù, haú yuq lé, yhúmhaú má nyi tô é Yesuq é hí má, wó lhez byi shoq ga hkyô ho nyi akô.

¹⁹ Byù lúm myô chyin chyap to mù, haú nò sù lé hká ðong le a wó shú wàng kôluí, haú yhumhkung htoq shut waq doq lô mù, haú yuq lé taphkang eq roq, shiwa hpong gung gung, Yesuq é hí ang ang má hkyô hang kat akô.

²⁰ Yesuq gi, yhangmoq é lumjáng myit lé byu myàng jáng, "Byù nàng ê! Náng é yubak mara lé hkyut pyàm byi bê." ga tai ri.

²¹ Haú hkùn, Hparishe pé eq tarâ sará pé gi, "Shí su ga luí, Garaí Gasang lé rhoi dang tai é sù gi, ó yuq wá nghut lhê lú? Garaí Gasang za a nghut jáng, yubak mara wó hkyut pyàm byi sù gi, ó yuq wá nghut lhê lú?" ga luí, myit sòn wui nyi bum akô.

²² Yesuq gi, yhangmoq myit sòn wui nyi é hkyô lé sé mù, "Nungmoq é i-myit hkaú má, hai mù shí pé lé myit sòn wui nyi akô lú?"

²³ "Náng é yubak mara lé hkyut pyàm byi bê." nghú tai râ eq, "Toq luí, hkyô so aq." nghú tai râ má, hká hkun je tai lui lhê lú?"

²⁴ Nghut kôlhang, haú Byu Yhangzo* gi, mingkan htoq má, mara hkyut byi râ ahkáng wó Sù nghut é lé, nungmoq lé sé nhâng nau lhê." ga mù, haú gùngjum shí sù lé, "Ngò, náng lé tai bá, toq aq, náng é taphkang yu chung luí, yhum tauí loq aq hkoi." ga tai ri.

²⁵ Haú hkùn jáng, yhang gi, yhangmoq é hí má toq yap mù, yhang é taphkang waq chung luí, yhang é yhum shut Garaí Gasang lé hkyu-on kungtón uchyang lô byuq bê.

²⁶ Byù banshoq bang gi, gyai maú byuq kômù luí, Garaí Gasang lé hkyu-on kungton

* 5:24 Byu Yhangzo gá é gi, Yesuq Yhànggung yhang lé le tai e nghut lhê, Mesaia lé le tai é nghut lhê.

akò nghut ri. Yhangmoq gyai gyuq maú dik é eq le, "Hkû-nyí, nga-nhúng, mauhpo amú pé lé myàng bê." ga taí nyi akò.

Yesuq Gi, Lewiq É Yhùm Má Yubak Dap Bang Eq Rahá Zo Shuq É Hkyô
Mht 9:9-13; Mrk 2:13-17

²⁷ Hau htâng má, Yesuq só e ló le, Lewiq gá é kang guq sú rayuq yhâng é kang guq zúm má zung tó é lé é myàng mù, haú yuq lé, "Ngá htâng cháng aq." ga taí ri.

²⁸ Lewiq gi, haú má é zè banshoq lé tó pyám to mù, toq luí, Yhâng htâng cháng bê nghut ri.

²⁹ Hau htâng, Lewiq gi, yhâng é yhùm má Yesuq é matú zoshuq poi mó kut byí ri; poi haú má kang guq bang myo myo eq byù góbang le, yhangmoq eq rahá za zó zung nyi bum akò.

³⁰ Haú mù luí, Hparishe pé eq yhangmoq hpúng má é tará sará pé kúm gi, "Nungmoq gi, haú mù luí kang guq bang eq yubak dap bang eq rahá zo shuq nyi akò lú?" ga, Yhâng é chángzô pé lé mara hún dang taí akò.

³¹ Yesuq gi, yhangmoq lé, "Wángzán bang chí sará a ra kó, nòhpyo hui bang za sheq ru rá lhê.

³² Ngò gi, dingmán bang lé wut yù rá matú jé lé é a nghut, yubak dap bang myit lhing rá matú sheq jé lé é ru nghut lhê." ga tú taí ri.

Zoshuq Gám Hkyô Eq Séng Luí, Yesuq Tai É Hkyô

Mht 9:14-17; Mrk 2:18-22

³³ Dum, yhangmoq gi, "Yohan é chángzô pé gi, zoshuq gám mù kyúdung dung kut akò; Hparishe pé é chángzô pé le, haú su kut akò; nghut kôlháng, náng é chángzô pé gi, haí mù zó nyi shuq nyi akò lú?" ga Yesuq lé taí akò.

³⁴ Yesuq, yhangmoq lé tú taí é gi, "Bing pé gi, lusik eq rahá nghut nyi to ashí hkûn, yhangmoq lé zo shuq wó gám nhâng rá lú?"

³⁵ Nghut kôlháng, lusik[†] lé yhangmoq chyáng mai shuí yu pyám é hkyíng jé rá nghut lhê; haú buinyi pé má kúm gi, yhangmoq, zoshuq gám kó rá nghut lhê." gá ri.

³⁶ Dangtú đồng mai le, Yesuq, yhangmoq lé taí é gi, "Mebu sik má é lãng cheq yù mù, mebu xau má hpo é gi, ó a kut wú kó; haú su kut é nghut jãng, mebu sik lé le lãng cheq pyám é dut mù, pãn jap sik le mebu xau eq du lhum rá a nghut.

³⁷ Tsibiyiq wing asik lé le, shokuq htùng axau má ó a kat wú kó. Kat é nghut jãng, tsibiyiq wing asik gi, htùng lé lhoq buq goq nhãng mù, tsibiyiq wing le yui shun byuq, htùng le htên byuq, dut rá nghut lhê.

³⁸ Haú su a dut shoq gi, tsibiyiq wing asik lé, shokuq htùng asik má kat ra rá nghut lhê.

³⁹ Tsibiyiq wing axau shuq nyí bê sú gi, asik lé a shuq naú nghut rá; hkâsu mù gá le, 'Axau sheq je nhâm ri.' ga taí rá." gá ri.

6

Bánno Buinyi Má, Yesuq É Chángzô Pé Kyôshi Shap Zô É Hkyô
Mht 12:1-8; Mrk 2:23-28

¹ Bánno buinyi ra-nyí má, Yesuq gi, Yhâng é chángzô pé eq yò hkaú mai só lai ló é hkûn, Yhâng é chángzô pé gi, kyôshi ratsuí langshap yù mù, loq eq nè hpuq zó akò.

² Haú mù luí, Hparishe pé ra-am gi, "Bánno buinyi má a ge kut jung lé, nungmoq gi, haí mù luí haú su kut akò lú?" ga taí akò.

³ Yesuq gi, yhangmoq lé, "Dawiq lháng gi, yhâng htâng châng é bang eq rahá zòmut hui é hkûn, hkâsu kut é hkyô lé, nungmoq a nghap wú kó lú?"

⁴ Dawiq gi, Garai Gasâng é yhùm* hkaú má wang é mù, hkyangjông pé mai lai luí, ó le a ge zó é, kyâng tó é muk lé yù zo mù, yhâng htâng châng é bang lé le, byi tsó é a nghut kó lú?" ga tú taí ri.

⁵ Hau htâng, Yhang gi, "Haú Byu Yhangzo gi, haú Bánno buinyi é Yhumsing nghut lhê." ga yhangmoq lé taí ri.

Loq Jum Shi Sú Lé Yesuq Lhoq Gê Byí É Hkyô

Mht 12:9-14; Mrk 3:1-6

⁶ Gotú Bánno buinyi má le, Yesuq gi, tara-jong má wàng mù mhoqshit nyí é hkûn, loqyo loq ajum shí byuq é byù rayuq haú má nyi tó ri.

⁷ Haú hkûn, tará sará pé eq Hparishe pé gi, Bánno buinyi má nòhpyo lhoq gê byí rá lú ga luí, Yhang lé mara wó hún shoq ga gyám wú nyi akò.

⁸ Yesuq kúm gi, yhangmoq é i-myit lé sé sú nghut luí, loq jum shí sú lé, "Toq mù, banshoq bãng é hí má, yap shit aq." ga taí kat ri. Haú yuq le, toq mù yap tó ri.

⁹ Haú hkûn, Yesuq gi, "Ngò nungmoq lé myí wú kôlé, Bánno buinyi má, ge é muzó kut rá, a ge é muzó kut rá, byù asak hkyí rá eq lhoq hten rá pé má hká lhum kut le sheq tará wang lhê lú?" ga luí, yhangmoq lé taí ri.

¹⁰ Hau htâng má, yhangmoq banshoq lé lhing wú mù, haú loq jum shí sú lé "Náng é loq nyhang kat aq." ga taí kat é hkûn lé, yhang le loq nyhang kat luí, yhâng é loq gi, shoq za ge byuq bê nghut ri.

¹¹ Nghut kôlháng, yhangmoq gi, myoq chum nhô chik yhang nhik-yo naú kômù luí, "Yesuq lé hkâsu wá kut pyám rá lú?" ga luí, rayuq eq rayuq taí lhum nyi akò.

[†] 5:35 Lusik gá é gi, Yesuq lé taí nau é nghut lhê. * 6:4 Garai Gasâng é yhùm nghu é gi, Yerusalem wá mó má joq é saksé zúm lé gá é nghut lhê.

Raxe Í Yuq Lé Lagyo Ga Myhîng Yu É Hkyô

Mht 10:1-4; Mrk 3:13-19

¹² Haù yoq ra-nyí má, Yesuq gi, kyúdung rá ga bùm shut htoq e ló luí, ra-myin mau Garai Gasang lé kyúdung nyi ri.

¹³ Maubó jáng Yhâng é chángzô pé lé wut yù mù, yhangmoq chyáng má é raxe í yuq lé hkyin yù luí, lagyo pé ga myhîng to byí ri.

¹⁴ Haù bang gi, Yesuq eq Petruq ga myîng myhîng byí é Simun eq, yhanggu Andre, Yakuq eq Yohan, Hpilip eq Barhtolume,

¹⁵ Mahte eq Htomaq, Alhpe é yhangzo Yakuq eq Zelutuq[†] dut é Simun,

¹⁶ Yakuq é yhangzo Yudaq eq, Yesuq lé ap pyám rá sú Yudaq Iskarut pé nghut akô.

Hkungsô Wó É Hkyô Eq Dingnyé Wó É Hkyô

Mht 4:23-25; 5:1-12

¹⁷ Yesuq gi, yhangmoq eq rahá gyó ló mù, janggyú má yap tô é hkùn; Yhâng é chángzo moq mó le mù, Yuda mau banshoq má é bang, Yerusalem wá mó má é bang, wuìshuq lung-aù ayám má é Turuq myuq eq Sidun myuq má é bang, rajùm rayò gi,

¹⁸ Yhâng é dang gyô yù rá eq yhangmoq é nôhpyo lhoq gè nhâng rá matú, rahá za zup míng tô akô. Agè ashop é nat eq zing-ri huí é bang le ge byuq akô.

¹⁹ Yhâng é gùng mai htoq é wum-ô éq byù banshoq lé lhoq gè byí nyi é yanmai shíwa byu pé le Yhang lé wó záng shoq ga, ho nyi akô.

²⁰ Haù hkùn, Yesuq gi, Yhâng é chángzô pé lé wú kat luí taí é gi,

"Myùng bang nungmoq gi, hkungsô wó nyi ri, hkâsu mù gâ le, Garai Gasâng é mingdán[‡] gi, nungmoq é mingdán nghut nyi ri.

²¹ Ahkuí, zòmút wuìshit huí nyi é bang nungmoq gi, hkungsô wó nyi ri, hkâsu mù gâ le, nungmoq nhik dik shoq myàng zo kó rá nghut lhê.

Ahkuí, ngau nyi bang nungmoq gi, hkungsô wó nyi ri, hkâsu mù gâ le, nungmoq myang wui kó rá nghut lhê.

²² Haù Byu Yhangzô é yanmai nungmoq lé su eq a nguí é, lhoq hpyoq lhoq kâng é, hoq hpu nhang é,

agè ashop nghut é dong jihpoi gamhkui huí é hkùn, nungmoq gi, hkungsô wó nyi ri.

²³ Haù hkùn lé, gabú byam chyú nyi keq, hkâsu mù gâ le, wú keq, nungmoq é matú kô é chyunghuq gi, mauhkung mingdán má joq tó ri. Ngò, nungmoq lé taí lhê, hkâsu mù gâ

le, yhangmoq é íchyí íwa pé le myiqhtoi pé[§] lé haù su kut wú bekô."

²⁴ Nghut kôlhang, sùt wó bang nungmoq gi, dingnyé wó rá, hkâsu mù gâ le, nungmoq gi, yhumsing gùng má nhik shí nhik dik é hkyô lé huí yù bekô.

²⁵ Ahkuí, gyi gyi dau dau myàng zo myàng shuq nyi é bang nungmoq gi, dingnyé wó rá, hkâsu mù gâ le, nungmoq zòmút wuìshit é huí kó rá nghut lhê.

Ahkuí, wui nyi é bang nungmoq gi, dingnyé wó rá, hkâsu mù gâ le, iyon yôn é eq ngaubyi ngau-nhap htoq é huí kó rá nghut lhê.

²⁶ Byù banshoq bang, nungmoq lé ge é byù ga kôjáng, nungmoq gi, dingnyé wó rá,

hkâsu mù gâ le, yhangmoq é íchyí íwa pé le, myiqhtoi pyoq pé* lé, haù su ga taí wú bekô.

Gye Pé Lé Chyitdap Râ Hkyô

Mht 5:38-48; 7:12

²⁷ Hau htoq agó, ngá dang gyô nyi bang nungmoq lé ngò taí kôlé, nungmoq é gye pé lé chyitdap nyi keq; nungmoq lé a nau a wôm é bang lé ge é hkyô kut keq;

²⁸ nungmoq lé nhîng é bang lé, shimân byi keq; nungmoq lé rhoi é bang lé kyúdung byi keq.

²⁹ Nang lé bo-pyuq rahkyam shut pyuq byi sù lé, rahkyam dum hkâm byi shi aq; náng bumó hkyut yu é sù lé, buzo le dum hkyut byi shi aq;

³⁰ nang lé rajung jung dùng é sù lé le, byí pyám aq; náng zè yu pyám byí é su chyáng mai le, hkâdùng yù lo.

³¹ Nungmoq ô nau é dông supé lé kut nhâng nau é su, yhangmoq lé le kut byi keq.

³² Nungmoq lé chyitdap é bang lé za chyitdap kô le gi, nungmoq é matú hai akyú bò kó rá lúh? Yubak dap bang le, yhumsing lé chyitdap é bang lé gi, chyitdap nyi akô.

³³ Nungmoq lé ge é dông kut nyi é bang lé za, ge é dông kut nyi kô le gi, nungmoq é matú hai akyú bò kó rá lúh? Yubak dap bang le haù su kut nyi akô.

³⁴ Supé lé zè chyí byí le, dum wó tau byi rá su dut é bang lé za, chyí byí le gi, nungmoq é matú hai akyú bò kó rá lúh? Yubak dap bang lháng chyí byí é myhó dum wó yù shoq, yubak dap é bang lé chyí byí akô.

³⁵ Nghut kôlhang, nungmoq gi, nungmoq é gye pé lé chyitdap mù, ge é dông kut byí nyi keq. Dum wó taù yù rá lé myoq a byu é za, chyí ngho byi keq; haù su kut jáng, nungmoq wó é chyunghuq kó rá eq, Myhang htáng

[†] 6:15 Zelutuq gâ é lichyúm gi, yhumsing zui sai é hkyô má gyai yhang myit lòm shirong é sù lé ga lhê. Haù u lé, Israelaq byu pé gi, mingdán luthkyó wó rá matú shikut nyi é hpúng bang lé, Zelutuq gâ lhê. [‡] 6:20 Garai Gasâng é mingdán gâ é gi, Garai Gasang up é lé gâ lhê. [§] 6:23 Myiqhtoi pé le zing-ri huí é yanmai, yhangmoq chyunghuq wó nyi akô. Haù eq rajung za, jamjau huí é bang nga-nhúng le chyunghuq wó rá nghut lhê. *

^{*} 6:26 Myiqhtoi pyoq pé gi, Garai Gasang jéyáng é huí rá.

htúm Su é yhangzô pé dut rá nghut lhê; hkâsu mù gâ le, Yhang gi, jeju a dat bun bang eq agê ashop é bang lé ge é kut nyi ri.

³⁶ Nungmoq é Iwa Garai Gasang shogyo nhikmyin sê é su, nungmoq le shogyo nhikmyin nyi keq.

A Jéyang Râ Hkyô

Mht 7:1-5

³⁷ A jéyang é za nyi keq; haù jáng, nungmoq le jéyang é a hui kó rá nghut lhê. A doqđân é za nyi keq; haù jáng, nungmoq le doqđân é a hui kó rá nghut lhê. Mara hkyut byi keq; haù jáng, nungmoq le mara hkyut byi é hui kó rá nghut lhê.

³⁸ Byi keq, haù jáng, nungmoq le dum byi é hui kó rá nghut lhê. Mán é búng mai byíng mui shún shoq nhún chyíng, dún chyíng kat mù, nungmoq é tanghkoí hkaù má lik kat byi é hui kó rá. Hkâsu mù gâ le, nungmoq lik byi é bung eq, nungmoq le dum lik byi rá nghut lhê." gâ ri.

³⁹ Hau htoq agó, Yhang dangtú ralhú dong yhangmoq lé dum tai é gi, "Myoqjit sú gi, myoqjit sú lé hkyô wó tún shit lhê lú? Yhangnhik í yuq é donghkong má byit gyó kó rá nghut lhê, a nghut kó lú?"

⁴⁰ Jongzo gi, sará htoq gyaù rá a nghut; nghut kôlháng, gúm shoq mhoq yù bê sú ó nghut kôlháng, yhumsing é sará su dut rá nghut lhê.

⁴¹ Yhumsing myoq hkaù má lúng tô é siktúm† lé lhang a myit wú é nhing, haù mù luí, nunggu nungmang é myoqwàng‡ lé myang lhê lú?

⁴² Yhumsing é myoq má lúng tô é siktúm lé lhang a myàng sú nhing, 'Gumang hpó é, náng myoq má lúng tô é myoqwàng lé, ngò choq pyám byi lé.' nghú luí, náng é gumang hpó lé hkâsu wó tai rá lú? Gegùn labyoq kut sú é, náng é myoq má lúng tô é siktúm lé hí choq pyám aq. Haù jáng sheq, nunggu nungmang é myoq má wang tô é myoqwàng lé choq pyám byi rá matú, náng san za myàng rá nghut lhê.

Agàm Eq Ashi

Mht 7:17-20; 12:34-35

⁴³ A ge é ashí zuí é, ge é shigám hkâmá le a joq. Ge é ashí zuí é, a ge é shigám le a joq.

⁴⁴ Haù mù luí, shigám hkangmó lé, zuí é ashí lé wú mù wó sê hkyin yu lhê. Dangké, zubyap mai maihpáng-shi ó le a myang hpyoq yù wú, zugyóm mai le tsibiyiq shi a wó hpyoq yu wú.

⁴⁵ Ge é sú gi, yhumsing é i-myit unghkaù má é sùtdó mai ge é zè pé lé lhoq htoq shit lhê. Agê ashop é sú gi, yhumsing é i-myit unghkaù má é agê ashop é sùtdó mai, agê ashop é zè pé lé lhoq htoq shit lhê. Haù mù gâ le, yhang é i-myit unghkaù má byíng mui tò

é lé za, yhang é nhut mai tai htoq lo é nghut lhê.

Luqhtân Htoq Má Yhùm Saí Sú Eq Myi Chín Dum Má Yhùm Saí Su É Hkyô

Mht 7:24-27

⁴⁶ Ngò tai é eq rajung za lhang a wó châng kut kô é nhing, haù mù luí, nungmoq Ngo lé 'Yhumsing é, Yhumsing é.' nghu nyi akó lú?

⁴⁷ Ngá chyáng lé mù, ngá dang gyô yù luí, châng kut é sú ó nghut kôle, hkasú é sú eq wuí é lé ngò nungmoq lé shit kyo kôle.

⁴⁸ Haù yuq gi, wahpang yhùm saí le, nik nik du luí a dui é lunghtân htoq má apún awang hi é sú eq wuí lhê. Wuí jê lò luí wuibaù pé eq yhùm haù lé lo gùn kôlháng, ging ging ting ting saí to bê nghut luí, haù lé a wó gun nhún.

⁴⁹ Ngá dang gyô yù mù, a cháng sú gi, apún awang a saí é za myi chín dum má wahpang yhùm saí sú eq wuí nyi ri. Wuibaù pé eq yhùm haù lé lo gun kat é eq, haù hkún jáng, léng gyop byuq ri. Yhùm haù byoq hten byuq é gi, yù whuí a bò loshoq dut byuq rá nghut lhê." gâ ri.

7

Romaq Gyezau Rayuq É Lumjíng Myit

Mht 8:5-13; Yhn 4:43-54

¹ Yesuq gi, shiwa byu pé lé ban mhoqshit é htàng má, Kaperna-um wà shut wang ló ri.

² Haù hkún, Romaq gyezau rayuq é chyitdap dui-nhâng zoshâng gi, shí-nò no nyi ri.

³ Haù u lé, gyezau hpó gi, Yesuq é hkyó lé wó gyo jáng, yhang é dui-nhâng zoshâng lé lhoq gè byi rá matú, Yesuq lé é ji lò keq ga, Yudaq suwún wuí lé nhang kat ri.

⁴ Haù bang gi, Yesuq chyáng jé é kô é hkún, "Yhang gi, náng shí hkyô kut byi rá matú gingdán é sú, yhang nghut nyi ri;

⁵ hkâsu mù gâ le, yhang gi, nga-nhùng amyú lé chyitdap é eq, ngamoq matú tarajong le kut byi sú nghut ri." ga luí, Yhang lé zuq zuq dúng wut nyi akó.

⁶ Haù mù luí, Yesuq gi, yhangmoq eq raha za e ló ri.

Haù yhùm eq hká hé a wê é má jé jáng, Romaq gyezau hpó, yhang é luzúm wuí lé tai nhang kat é gi, "Yhumsing Yesuq é, náng gúng lé hkálhoq hkyik lo. Nàng, ngá é laishínhtàng má, lé nang rá lhang ngò má a gingdán.

⁷ Haù mù, ngò, náng chyáng jé lé rá matú gingdán é sú a nghut; Nàng, dang rahkun za tai kat laq, haù hkún, ngá é dui-nhâng zoshâng ge ló rá nghut lhê.

⁸ Hkâsu mù gâ le, ngò le ahkáng ayá wó é zau rayuq é a-ò má é zau nghut lhê; ngá é a-ò má le gyezô pé nyi lhê, rayuq lé 'Ê aq!' nghu le, yhang e ló lhê; góyuq lé, 'Lò aq!' nghu le,

† 6:41 Siktúm nghu e gi, yubak mara kô é lé tai lhê. ‡ 6:41 Myoqwàng nghu e gi, yubak mara atiq azo lé tai é nghut lhê.

yangh lò lhê; ngá jùn lé le, 'Shí kut aq!' nghu lé, yangh kut lhê." gâ ri.

⁹ Yesuq gi, dang haù lé wó gyo jáng, haù yuq é hkyô lé maù byuq luí, Yanghtâng châng é shiwa byu pé lé lhing wú mù, "Ngò, nungmoq lé tai kôlé, Israelaq amyù má lhang, shí í lumjúng é sù lé, Ngò a myang wú." ga tai ri.

¹⁰ Nhang kat é bang yhùm má dum taù jé jáng, no nyi é dui-nhâng zoshâng gi, ge to lánng é lé ló myang akó.

Shí Sù Lé Dum Lhoq Tui É Hkyô

¹¹ Hau htâng hkâ-myhâng a myáng má, Yesuq gi, Yhâng é chángzô pé eq, shiwa byù moq mó le mù rahá za Na-in gâ é wà shut e ló akó.

¹² Haù wà wàng hkum má jé lo é hkùn lé, chuimó myhí é yuqzo te gi, shí mù, yhâng é mâng lé waq htoq lé lo akó. Wà byù myo myo le, chuimó myhí haù eq rahá châng lé lo akó.

¹³ Yhumsing gi, haù chuimó myhí lé myàng jáng, yangh lé wú shogyo luí, "Hkâ-ngaù." ga tai ri.

¹⁴ Yesuq gi, gung shut huí é mù, loq èq é záng kat ri. Haù hkùn, waq tô é bang le jáng yap to byí akó. Yangh gi, "Zorâm é, ngò, nang lé tai lhê, toq aq." ga tai ri.

¹⁵ Haù hkùn, shí bê sù gi, toq zúng mù dang tai lo ri. Yesuq gi, zorâm haù lé yhângnú chyáng dum ap byí ri.

¹⁶ Byù lhunglhang bang gyuq maù bùm kôluí, Garai Gasang lé hkya-ôn é dang gi. "Myiqhtoi mó, nga-nhung chyáng lé pô htoq bê nghut ri. Garai Gasang gi, Yhâng é amyú lé garúm rà ga lé kùm wú nyi ri." ga tai nyi akó.

¹⁷ Haù Yesuq é hkyô eq sêng é ludang lé, Yuda mau eq haù mau awui ayàm jowò hkangmó má tai pyo myhín ló bum akó.

Yesuq Eq Wui-myhup Sará Yohan É Hkyô Mht 11:1-19

¹⁸ Haù hkùn, wui-myhup sará Yohan é chángzô pé gi, haù hkyô banshoq yangh lé lo tai kyô akó.

¹⁹ Haù mù luí, Yohan gi, yhâng é chángzo í yuq lé ji yù mù, haù Yhumsing chyáng nhang kat luí, "Nàng gi, haù jé lé ló rà Sù nghut lhê lúhú? Haù a nghut jáng, ngamoq, góyuq lé lánng ra shirá lúhú?" ga, myí nhang kat ri.

²⁰ Haù nhik gi, Yesuq chyáng jé jáng, "Nàng gi, haù jé lé ló rà sù nghut lhê lúhú? Haù a nghut jáng, ngamoq góyuq lé myoqbyu lánng nyí ra shirá lúhú?" ga luí, Wui-myhup Sará Yohan gi, ngá-nhik lé nàng chyáng myí nhang kat ri." ga tai akó.

²¹ Haù u yangh, Yesuq gi, nó zo hpyo zo, nolì nojàng huí é bang eq agè ashop é nat

dap jun dap é byù myo myo lé, lhoq gê byí ri. Myoqjit bang myo myo lé le, myoq dum myàng nhang ri.

²² Haù hkùn, Yesuq gi, yanghnhik lé, "Myàng mi-myàng, wó gyo má wó gyo, Yohan lé ló tai kyo keq; myoqjit bang, myoq wó myàng bekô; hkyí hten bang le, wó so bekô; manggâm dap bang le, lhoq gê byí é hui bekô; nojit bang le, wó gyo bekô; shí bê bang le, lhoq dui toq é hui bekô; myùngbàng é matù, gabù danglù hko kyô nyi bê nghut lhê.

²³ Ngá é yanmai, Ngo lé lum shut é hkyô a bò sù gi, hkungsô wó nyi ri." ga tai ri.

²⁴ Yohan é chángzô nhik ló byuq é htâng má, Yesuq gi, Yohan eq séng luí, byù moq mó lé tai é gi, "Nungmoq gi, haù lé hpuq wú rà matù, haù yoso shut e akó lúhú? Lai èq hik nhùm é jamgâm lé wú rà matù nghut akó lúhú?

²⁵ Haù a nghut jáng, haù lé wú rà matù e akó lúhú? Nú-nhâm é mebu wut sù lé wú rà matù e akó lúhú? A nghut! Wú keq, gyai hpaù é mebu wut luí agùn agó wó bang gi, hkohkâm-wàng pé má sheq ru nyi lhê.

²⁶ Haù nghut le gi, haù lé wú rà matù é kô é lúhú? Myiqhtoi rayuq lé lúhú? Haù kùm nghut ri. Ngò, nungmoq lé tai kôlé, Yohan gi, myiqhtoi htoq lhang gyaù sù nghut lhê.

²⁷ Haù yuq é hkyô lé, Chyúmdang má kâ tô é gi,

'Wú aq, Nàng é hkyô lajang lánng rà matù, Ngá é lagyo lé, Nàng é hí má Ngò nhang kat rà nghut lhê.'*

gâ ri.

²⁸ Ngò, nungmoq lé tai kôlé, myiwe wui mai hku kat é bang má, Yohan htoq je kô é rayuq lhang a nyi, nghut kôlhang, Garai Gasang é mingdán má je tiq dik sù gi, Yohan htoq je kô lhê." gâ ri.

²⁹ Mingbyù lhunglhang bang eq kang guq bang gi, dang haù pé lé wó gyo kôjáng, Yohan byí é bapisma lé hkâm yù kô é nghut mù luí, Garai Gasang é dingmán é hkyô lé sé gyô yu akó.

³⁰ Hparishe pé eq tará sará pé kùm gi, Yohan byí é bapisma a hkâm yù kômù luí, Garai Gasang hen lajang é hkyô lé yhumsing gung é matù he-ngik pyâm akó.

³¹ Yesuq dum tai é gi, "Haù mù luí, byù myú shí lé, Ngò, hai èq tai kê wú rà lúhú? Yhangmoq hai eq wui akó lúhú?

³² Yhangmoq gi,

'Nungmoq é matù, ngamoq sampyí mut byi kôlhang, nungmoq gi, a gó kó, ngamoq ngaù hkyangsang kôlhang, nungmoq gi, a ngaù kó.'

ga luí, gai pé má zúng uchyang rayuq eq rayuq wut tai lhum nyi é zoshâng wui eq wui akó.

³³ Hkâsu mù gâ le, Wui-myhup Sará Yohan jé lé luí, muk a zo, tsibiyiq a shuq é nyi le le, 'Yhang gi, nat gang dap sù nghut ri.' ga luí, nungmoq taí akò.

³⁴ Haú Byu Yhangzo jé lé luí, zo mù shuq mù kut jáng le, 'Shí yuq gi, zo myoq shuq myoq noq sù eq, kang guq bang eq yubak dap bâng é buinùm hpó nghut ri.' ga dum taí akò.

³⁵ Nghut kôlhang, hpaqchyí byéng-yá é yhangzô pé gi, hpaqchyí byéng-yá tengmán é hkyô lé saksé hkám byi nyi akò.* ga ri.

Yubak Dap É Myiwe Rayuq, Yesuq Lé Xú But Byí É Hkyô

³⁶ Hparishe rayuq gi, Yesuq lé yhang chyáng zang zo rá matú ji kat ri. Haú mù, Yesuq gi, haú Hparishe é yhùm má wàng luí zo rá matú zung tô ri.

³⁷ Haú hkún, wú keq, haú wâ mã é yubak dap é myiwe rayuq gi, Yesuq haú Hparishe é yhùm má zô zung tô é lé sé jáng, gyai hpau dap é namngón xú bo é luq hpyú bông yu lé luí.

³⁸ Yesuq é nunghtáng hkyí wàng má ngau yap to mù, Yhâng é hkyí má ngaubyí eq záng lhoq teq byi jáng, úxam eq but sut pyám byi ri. Dum nghut jáng, nhut eq puq luí mura lé but byí ri.

³⁹ Yesuq lé ji é Hparishe wá gi, haú lé myàng jáng, 'Shí yuq myiqttoi nghut le gi, Yhang lé záng htúng é sù, ó yuq nghut é eq hkâsú é yubak dap é myiwe nghut é lé, Yhang sé rá nghut lhé.' ga luí, yhâng é unghkaú má myit nyi ri.

⁴⁰ Yesuq gi, "Simun é, Ngò, nang lé taí rá rajung joq ri." ga taí ri.

Simun le, "Sará é, taí aq." ga taí kat ri.

⁴¹ Haú hkún, Yesuq gi, "Ngùn chyí zo sù rayuq chyáng, chyín dap é byú í yuq nyi ri. Rayuq gi, denari† ngo shò chap, rayuq gi, ngo xê chap dap ri.

⁴² Haú nhik gi, chyín xap rá ngùn a wó kôluí, chyín yhumsing gi, yhangnhik lé xap a ra lò gâ pyám ri. Haú mù luí, haú nhik mã é hká yuq gi, yhang lé je chyitdap rá lhú?" ga myí ri.

⁴³ Simun gi, "Je myo lhoq lhut hui sù, nghut rá su ngam ri." ga tú taí ri.

Yesuq gi, "Nàng myit e đông jô ri." ga taí ri.

⁴⁴ Haú hkún, Yesuq, myiwe zo haú lé lhing wú luí, Simun lé, "Nàng myiwe zo shí lé myang lhé lhú? Ngò, nang é yhùm má wang le, hkyí chí rá uchyam, nang a byi, yhang kúm gi, ngaubyí eq ngá hkyí lé tik byi luí, yhâng é xam eq sut pyám byi bê.

⁴⁵ Nàng gi, ngó lé nhut eq a puq nghut ri; yhang kúm gi, ngó yhùmhkaú má wang é mai ngá hkyí má a no loshoq puq nyi rá.

⁴⁶ Nàng gi, ngá ulhum má xú a but byí wú, yhang kúm gi, ngá é hkyí má nàm ngón é mura but byi bê nghut ri.

⁴⁷ Haú su mù, ngò, nang lé taí lé, haú myiwe gi, je chyitdap luí, yhang wó é yubak myo myo lé hkyut pyám byí é hui bê. Shau za mara hkyut pyám byí é hui sù gi, shau za chyitdap sù nghut ri." ga taí ri.

⁴⁸ Yesuq gi, myiwe haú lé le, "Ngò, nang é yubak mara hkyut pyám byi bê." ga taí ri.

⁴⁹ Rahá zung tô é bang gi, "Yubak mara lháng wó hkyut pyám byi sù, shí yuq gi, ó wá nghut lhé lhú?" ga luí, myit nyi bum akò.

⁵⁰ Yesuq gi, "Nàng é lumjáng myit eq nang lé hkyi yù bê, ngón za lò aq hkoi." ga luí, myiwe haú lé taí kat ri.

8

Yesuq Htâng Châng É Myiwe Wui

¹ Hau htâng hkâ-myháng a myáng má, Yesuq gi, Garai Gasâng é mingdán hkyô eq séng é gabú danglù lé taí kyo uchyang, Yhâng é lagyo raxe í yuq eq rahá za, rawa htâng rawà je é ló ri.

² Hau htoq agó, nat gang dap é mai le, nõhpyo mai le Yesuq eq lhoq ge yu é myiwe wui, nat nyhit nat lhoq htoq pyám byi hui é, Magadalaq wá mã é Mariq le,

³ Herut é ikun zum sù Kuza é yhumsing myhí Yoanaq le, Susannaq le, gotú myiwe wui myo myo le, Yesuq eq rahá nghut akò. Haú bang gi, yhumsing wó du é í Yesuq eq lagyo pé lé byi zo byi huq nyi akò.

Kyôshi Sân É Hkyô

Mht 13:1-23; Mrk 4:1-20

⁴ Wá hkanq wá mó mã é bang gi, Yesuq chyóq zup zing lé lo bùm kômù shiwa byú moq mó zup mingtô é hkún, Yesuq dangtú đông taí kyô é gi,

⁵ "Kyô hkyô sù rayuq gi, kyôshi san rá ga htoq é ló ri. Yhang, kyôshi sân kat é hkún, ra-am gi, hkyô má gyó ang mù, byu eq záng nang pyeq pyám lhé, maulat nghoq pé eq hte zo pyám lhé dut ri.

⁶ Ra-am gi, luqgok yò má gyó ang mù, yuq htoq lo é hkún, myigùng a teq é yanmai nyhuí shi byuq akò.

⁷ Ra-am gi, zugyóm hkaú má gyó ang luí, zubyap eq rahá yuq htoq lô mù, wup pyám é hui bê nghut ri.

⁸ Nghut kôlhang, ra-am gi, myìhpún bo é jang má gyó ang mù, yuq kô lò jáng, rashò tú myô jat lo ri." ga taí ri.

Yhang haú su ga taí nyi é hkún, "Gyô yù rá nohkyap dap sù gi, gyô yù shàng gaq!" ga le, hté mó eq taí kat ri.

* 7:35 Nghut kôlhang, Garai Gasâng é hpaqchyí byéng-yá lé lhom hap yu é banshoq bang gi, Garai Gasâng é hpaqchyí byéng-yá haú, tengmán ri ga saksé hkám nyi akò. † 7:41 Denari rchap gi, ra-nyí lhé é byú rayuq é zuihpau eq wui ri.

⁹ Haú hkùn, Yhâng é chángzô pé gi, dangtú shí hai lichyúm nghut lhê lúu ga, Yhang lé myí akò.

¹⁰ Yhang gi, "Garai Gasâng é mingdán eq sêng é sê gyo wuí é hkyô pé lé sê gyo rá ahko ahkáng, nungmoq lé býi to bê. Nghut kôlháng, góbáng matú gi,

'Wú to kôlháng, a myàng kó sháng, gyo nyi kôlháng, a sê gyo kó sháng.^{10*} nghú, ngò dangtú dông tai lhê.

¹¹ Ahkui lhê é dangtú shí é lichyúm gi, ísu nghut ri: kyôshi gi, Garai Gasâng é mungdang nghut nyi lhê.

¹² Hkyô má gyô âng é kyôshi gi, hai eq wuí lhê lúu gâ le, haú mungdang lé byu pé wó gyô é htàng má, lumjîng é má le, hkyi yu é má le, a jé kó sháng gaq ga luí, yhangmoq é i-myit hkaú mai nat Tsadán eq mungdang haú lé, lé yu pyám é hui bang eq wuí lhê.

¹³ Luqgok yô pé má gyô âng é kyôshi gi, hai eq wuí lhê lúu gâ le, haú mungdang lé wó gyo jáng, gabú myit eq hap yù kôlháng, amyit a wó chín mù, rayoq rabun za lumjîng luí, gunglaú huí é nyi má, dum htak ló byuq é bang eq wuí lhê.

¹⁴ Zuyóm má gyô âng é kyôshi gi, hai eq wuí lhê lúu gâ le, haú mungdang lé gyô yù luí, yhumsing é asak dui é ló é hkyô má, shí ipyat lhê é myit wui myit hke hkyô, ngùn zé sutgan eq mingkan ngón hkyô má myup byuq luí, mo é ashí a zui é bang eq wuí lhê.

¹⁵ Hpún bo é myigùng má gyô é kyôshi kúm gi, hai eq wuí lhê lúu gâ le, haú mungdang lé lhumzui luí ge é i-myit eq ban gyô yù mù, ging tíng shoq zui zing luí, wó jân é i-myit eq ashí zui é bang eq wuí lhê.

Myibung Htún É Hkyô

Mrk 4:21-25

¹⁶ Myibung lé tap mù, aú eq nghop tô é le, yhupchong ô má tô tô é le, ó a kut wú kó. Nghut kôlháng, wang lé lô bang myoq wó myàng rá matú kúm gi, tsungjang má tsung to chyat kut akò.

¹⁷ Hkâsu mù gâ le, a htoqzê loshoq haq tô é zè hai le a joq, a sê a byông htoq loshoq wó zau tô é zè le hai a joq nghut ri.

¹⁸ Haú mù luí, nungmoq hkâsu wó gyô yu é hkyô lé sidiq nyi keq, hai mù gâ le, wó to sù lé gi, jat byi shirâ, a wó su chyáng mai kúm gi, yhang wó to bún é má é lé lháng, yu pyám byi shirâ nghut lhê." ga tai ri.

Yesuq É Yhângnu Eq Yhanggu Pé

Mht 12:46-50; Mrk 3:31-35

¹⁹ Haú hkùn, Yesuq é yhângnu eq yhanggu pé gi, Yhâng chyáng lé lô kô le, shiwa byu pé lúm chyân chyap to kômù, Yhâng chyáng a wó wang é kó nghut ri.

²⁰ Haú hkùn, Yhang lé, "Náng nu eq nunggu pé gi, nang lé hui naú luí, shinggan má láng yap bum akò." ga tai kyo akò.

²¹ Yesuq gi, yhangmoq lé, "Garai Gasâng é mungdang lé gyô yù luí, châng é bang gi, Ngá nu eq Ngá gi pé nghut akò." ga luí, yhangmoq lé tù tai kat ri.

Laidun Mó Lé Yesuq Lhoq Zím É Hkyô

Mht 8:23-27; Mrk 4:35-41

²² Ra-nyí lé, Yesuq gi, Yhâng é chángzô pé lé, "Nga-nhúng nhông he hpoq shut dap e ló sháng." ga tai luí, lhai má wàng mù gú dap e ló akò.

²³ Yhangmoq gú dap e ló é hkùn lé, Yesuq gi, yhup myhi tô ri. Haú u lé, nhông haú má laidun mó lò luí, lhai má wui bying lô mù, yhangmoq myup shí rá su dut lò nyi bekò nghut ri.

²⁴ Haú mù, yhangmoq gi, Yesuq chyáng huí é luí, Yhang lé nhaú pun mù, "Yhumsing é, Yhumsing é, nga-nhúng myup ló nyi ri." ga tai akò.

Haú hkùn, Yhang toq luí, laidun eq wuilhêng pé lé tân kat jáng, haú pé gi, zim za dut lò byuq bê.

²⁵ Haú mù, Yesuq gi, "Nungmoq é lumjîng myit gi, hkâmá nghut akò lúu?" ga luí, yhangmoq lé myí ri.

Yhangmoq kúm gi, gyuq maú byuq bùm kôluí, "Shí yuq gi, hkasú é byù nghut lhê là? Yhang hkunmó hkyô jáng, lai eq wuilhêng pé lháng gyo byi ri-nhung!" ga luí, rayuq eq rayuq myí lhum bum akò nghut ri.

Nat Lé Hkat Htoq Byí É Hkyô

Mht 8:28-34; Mrk 5:1-20

²⁶ Hau htàng, yhangmoq gi, Galile mau tú tap má é Gerase byu pé é mau má jé dap e ló bekò.

²⁷ Yesuq kong shut doq ló le, haú wâ má é nat gang dap é sù rayuq gi, Yhang lé hui ri. Haú yuq gi, yhúm má le a nyi é za, mebu a dap é, lupdùng má myáng myáng nyi nyi sù nghut ri.

²⁸ Haú yuq gi, Yesuq lé myàng jáng, wut garu luí, yhâng é hkyi wang má paí gop to mù, "Myhang htàng é Garai Yhangzo Yesuq é, Nang gi, ngò eq hai sêng lhê lúu? Ngo lé a zing-ri rá matú, ngò nang lé dúng nyi lhê." ga luí, htê mó eq tai garú nyi ri.

²⁹ Hkâsu mù gâ le, Yesuq gi, agè ashop é nat lé haú yuq gùng mai htoq ló rá matú, tân pyám é yanmai nghut ri. Byù hai yuq lé nat gâng eq adàm dàm wang júng hkangmó, loq eq hkyi má toqjáng tuí eq tuí shung, kyum xâng tô é eq, zúng tô é nghut kôlháng, lêng hpyit pyám pyám kut é htoq ago, nat gâng eq yhang lé yoso hkaú shut lánghap yù yù kut nyi ri.

* 8:10 Esai 6:9 * 8:30 Legio gâ é lichyúm gi, gyezo 4000 eq 6000 gyoro bo é gyedap lé tai ri.

³⁰ Yesuq gi, yhang lé, "Náng myîng hai gâ lhê?" ga myî kat é hkûn, yhang gi, "Legio* gâ lhê." ga tû tai ri. Hai mù gâ le, yhâng chyáng nat gang myo myo wang lúng tô é yanmai nghut ri.

³¹ Nat jùm gi, yhangmoq lé nik dik htûm é Lasang-dong shut a kôn kat râ matú, Yesuq lé chòm dúng nyi bum akô.

³² Haú u lé, waq rajùm mó gi, bùm yàm má dû but zô nyi bum akô nghut ri. Haú mù, yhangmoq gi, waq pè chyáng wàng nhâng laq ga, Yesuq lé ahkáng dum dúng kut kojáng, Yesuq gi, yhangmoq lé ahkáng byi kat ri.

³³ Haú mù luí, nat gang jùm gi, byù haú yuq chyáng mai htoq lô kôluí, waq pè chyáng wàng byuq bekô nghut ri. Haú hkûn, waq haú jùm gi, gampyoq mai nhông hkaú shut rut din yán wang lô kôluí, myup shi byuq bekô nghut ri.

³⁴ Waq zúng bang gi, haú su dut é lé myàng jáng, hpang din lô kômù, myuq hkaú má é bang eq awui ayàm má é bang lé lô tai kyô akô nghut ri.

³⁵ Haú mù, wó gyô é bang gi, haú hkyô lé wú râ matú htoq lé lo akô. Yhangmoq gi, Yesuq chyáng jé lé kô é hkûn, nat gang htoq byuq hui sù, Yesuq é hkyi wang má mebu wut to luí, byù gè rayuq su zùng to láng é lé myàng kômù, gyuq dan bùm bekô nghut ri.

³⁶ Nat dap sù lé hkâsu kut luí lhoq ge yu é hkyô lé myang é bang gi, góbang lé tai kyô akô nghut ri.

³⁷ Haú hkûn, Gerase byu pè é mau má é lhunglhâng bang gi, gyuq dan dik kôluí, Yesuq lé yhangmoq é mau mai htoq lô byuq râ matú, chòm dúng tóngbán akô. Haú mù luí, Yesuq gi, taú lô byuq râ matú lhai má wàng bê nghut ri.

³⁸ Nat htoq byuq hui é sù gi, Yesuq htâng cháng râ matú, Yesuq lé dúng tóngbán ri.

³⁹ Nghut kôlhâng, Yesuq gi, "Nàng, yhùm shut sheq lô mù, Garai Gasang, nang lé hkâ-í kut byi bê hkyô lé, lô tai kyo aq." ga luí, yhang lé lô nhâng bê nghut ri. Haú hkûn, yhang htoq lô mù, Yesuq yhang lé hkâ-í kut byi bê hkyô lé, haú wà rawà bang lé lô tai kyô ri.

Ya-iruaq É Yhangzo Byizô É Hkyô Eq, Yesuq É Bu Lé Lé Záng É Myiwe Rayuq É Hkyô Mht 9:18-26; Mrk 5:21-43

⁴⁰ Ahkuí, Galile byu pé gi, Yesuq dum taú lò rá lé láng nyi kô é nghut mù, Yhang dum taú gû dap lo é hkûn gabú myit eq lhom te yu akô.

⁴¹ Haú hkûn, Ya-iruaq gâ é tarajong má up sù rayuq gi, jé lé lô mù, Yesuq é hkyi wang

má hkyihput htoq luí, yhâng yhùm má lé rá matú ji nyi ri.

⁴² Hkâsu mù gâ le, raxe í zân bò bê é, yhangzo byizo te gi, shi lô nyi é yanmai nghut ri.

Haú mù, Yesuq cháng é ló le, shiwa byu pé gi, Yhang lé záng htung lo bum akô.

⁴³ Haú u lé, raxe í zân sui yuí luí ngunzê lhunglhâng ban pyám shoq chi sará pè chyáng yâ wú kôlhâng, hká yuq le a wó yâ gè byi é[†] myiwe myhi rayuq le haú hkaú má bo tô ri.

⁴⁴ Myiwe haú gi, Yesuq é nunghtáng má hui lé mù, Yhâng é bushi htàng má é záng kat eq, sú yui é ana gi, ge byuq bê nghut ri.

⁴⁵ Haú hkûn, Yesuq gi, "Ngo lé, ó yuq záng bê lhú?" ga luí myi jáng, lhunglhâng bang gi, a sé ga he nyi bùm kô é hkûn lé, Petruq gi, "Yhumsing é, shiwa byu pé gi, náng é lhinghkyuq mai náng chyáng chyin chyap wang lo bùm kô é yanmai, nang lé záng bekô râ nghut lhê?" ga tai ri.

⁴⁶ Yesuq gi, "Byù rayuq ngo lé lé záng mù, ngá chyáng má é hpungwup a-tsam htoq lô é lé, ngó châng sé kat ri." ga tai ri.

⁴⁷ Haú jáng, myiwe myhi haú gi, yhang a wó haq záu to lô é hkyô lé sé jáng, req req nán lé lô mù, Yesuq é hkyi wang má ngóm gop kat luí, hai mù Yhang lé záng é hkyô eq, hká dông ge lô byuq é hkyô pé lé, shiwa byù banshoq bâng é hí má Yesuq lé tai kyô nyi ri.

⁴⁸ Yesuq gi, "Ngá zo é, náng é lumjing myit gi, nang lé lhoq gè byi bê nghut ri, ngón zo lá aq hko!" ga luí, myiwe haú lé tai kat ri.

⁴⁹ Yesuq gi, dang ru tai nyi ashí hkûn, tarajong má up sù Ya-iruaq é yhùm mai byù rayuq jé lé lô luí, "Nung zo gi, shi byuq bê, haú sará lé hkâlhoq hkyik nyi lo." ga luí, Ya-iruaq lé tai kyô ri.

⁵⁰ Yesuq gi, dang haú lé wó gyo jáng, "Hkâgyuq, za lumjing aq, haú jáng, yhang ge byuq râ nghut lhê." ga luí, Ya-iruaq lé tai ri.

⁵¹ Yesuq gi, Ya-iruaq é yhùm má jé é hkûn lé, Petruq, Yohan, Yakuq, eq haú myiwe zô é yhangnu eq yhangwa mai lai luí, yhùm haú má, ó lé le a wàng nhâng kut ri.

⁵² Haú u lé, lhunglhâng bang zoshâng hau é yanmai, ngaubyi ngau-nhap eq yón nyi akô. Yesuq kúm gi, "Hkâ-ngaú kó, yhang shi byuq é a nghut, yhap myhi tô é sheq ru nghut lhê." ga luí, yhangmoq lé tai ri.

⁵³ Zoshâng gi, shi byuq bê lé yhangmoq sé kôluí, yhangmoq gi, Yesuq lé wuizui kut pyám byi akô.

⁵⁴ Yhang kúm gi, myiwe zo hau é loq má zuí to mù, "Zoshâng é, toq aq." ga tai kat ri.

⁵⁵ Haú mù luí, yhang woi-nyí dum taú wàng mù, haú hkûn jáng toq yap ri. Haú

[†] 8:43 Ngunzê lhungthâng ban pyám shoq chi sará pè chyáng yâ wú kôlhâng, hká yuq le a wó yâ gè byi gâ é, Chyúmdang ra-am má gi, bo lhê; ra-am má gi, a bò.

jango, Yesuq gi, zoshang haú lé zôjung byi keq, ga yhangmoq lé tai kat ri.

⁵⁶ Haú myiwe zô é yhangnu eq yhangwa nhik gi, gyai maú byuq akô. Nghut kôhang, Yesuq gi, haú dut é hkyô ó lé le a tai kyo ra matú, yhangnhik lé tai hkúm tô ri.

9

Lagyô Raxe Í Yuq Lé Nhang Htoq Kat É Hkyô

Mht 10:5-15; Mrk 6:7-13

¹ Yesuq gi, haú lagyo raxe í yuq lé wut yú mù, nat gang banshoq lé wó hkat htoq pyám ra matú eq, noli nojàng wó lhoq gè ra matú, yhangmoq lé wum-o-a-tsam eq ahko ahkáng byi ri.

² Hau htàng má, Garai Gasâng é mingdán hkyô hko kyo ra eq, nôhpyo lhoq gè byi ra matú nhang htoq kat ri.

³ Yesuq gi, yhangmoq lé, "Hkyowui é matú, dumbáng, etap, zoshuq, ngùn eq, bu htaí lhang hkâwún hkáchung kó.

⁴ Nungmoq hká yhùm má wàng kôhang, haú wá mai dum htoq lô é buinyi jé shoq, haú yhùm má za nyi nyi keq.

⁵ Nungmoq lé a lhom hap yu é bang lé gi, yhangmoq lé wá mai htoq lô é hkùn, nungmoq lé a lhom hap yu é saksé dut sháng gaq, nungmoq é hkyiwa má dap é hpuilhaú lé yhangmoq é myoq hí má kô hkyô pyám to keq." ga tai kat ri.

⁶ Haú mù, yhangmoq gi, htoq e ló luí, wá hkyang wá mó má haú gabú danglù hko kyo uchyang, hká jé hkâmá nôhpyo lhoq gè byi wún akô.

Herut Maú Úng-àng É Hkyô

Mht 14:1-12; Mrk 6:14-29

⁷ Haú su dut é hkyô banshoq lé, mauzau Herut wó gyô yú luí myit wui nyi ri. Hkâsu mù gà le, ra-am gi, Yohan shi é mai dum dui toq lô bê ga,

⁸ ra-am gi, Eliyaq dum pô htoq lo ri ga, haú mai, ra-am gi, hí hpyang lhé é myiqhtoi rayuq yuq dum dui toq lô bê ga luí, tai bùm kô é yanmai nghut ri.

⁹ Herut gi, "Yohan é ulhum lé, ngò hpyit pyám nhâng bê, nghut kôhang, shí í wá tai byông bùm kô é gi, ó wá nghut lhé lú?" ga luí, Yesuq lé myàng shoq ga ho nyi ri.

Byù Ngo Hkying Lé Yesuq Zoshuq Byi Tsô É Hkyô

Mht 14:13-21; Mrk 6:30-44; Yhn 6:1-14

¹⁰ Lagyo pé dum taú lo é hkùn, yhangmoq kut lai lo é hkyô pé, Yesuq lé tai kyô akô. Haú hkùn, Yesuq gi, yhangmoq lé shuí chung mù, Bet-saida gà é wá mó shut tsik za e ló byuq ri.

¹¹ Shiwa byu pé gi, haú hkyô lé châng sé kômù, Yhâng htàng châng e ló akô. Yesuq le yhangmoq lé lhom hap yú mù, Garai Gasâng

é mingdán hkyô lé tai kyo luí, nôhpyo gè naú bang lé, lhoq gè byi ri.

¹² Buiyùm zó má, lagyo raxe í yuq gi, Yhâng chyáng huí é mù, "Haú shiwa byu pé lé, awui ayám má é yhùm pé eq wá pé má ló mù, zoshuq hô zo luí ló yhup kó sháng gaq, ló nhâng aq. Hkâsu mù gà le, ahkuí nga-nhúng gi, yoso má nghut nyi ri." ga luí, Yhang lé tai akô.

¹³ Haú hkùn, Yesuq gi, "Nungmoq, yhangmoq lé rajung jung byi tso keq." ga tú tai ri.

Yhangmoq gi, "Shí myhò bang lé tso ra zoshuq a é wui le gi, ngamoq chyáng muk-yo muk ngo long eq ngozo í du mai lai luí, haí le a wó nghut ri." ga tai akô. (Hkâsu mù gà le, yuqgè wui baú lhang ngo hkying kô nghut ri.)

¹⁴ Nghut kôhang, Yesuq gi, "Shí bang lé rahpung má ngo xé xé kô kut luí, zùng nhang to keq." ga luí, Yhâng e chángzô pé lé tai ri.

¹⁵ Yhangmoq lé Yesuq tai é eq rajung za, banshoq bang lé zùng nhang to bekô.

¹⁶ Haú hkùn, Yesuq gi, haú muk ngo long eq ngozo í du lé yú mù, mauhkung shut tu wú to luí, jeju ban hkyá-on jáng, haú lé ajap jap hpé luí, shiwa byu pé lé, châng to byi ra matú, Yhâng é chángzô pé lé byi kat ri.

¹⁷ Haú hkùn, yhangmoq banshoq bang zô gyí bùm kô é htàng má, haú chángzô pé gi, zô myhit tô é pé lé, raxe í mung bying shoq wó guq tsing yu ashí kô nghut ri.

Yesuq Gi, Hkrisduq Nghut Lhé Ga Petruq Tai É Hkyô

Mht 16:13-28; Mrk 8:27-9:1

¹⁸ Radám lé, Yesuq gi, Yhang baú kyúdùng nyi é hkùn, chángzô pé le, Yhang eq rahá nghut akô. Hau htàng, Yhang gi, yhangmoq lé, "Shiwa byu pé gi, ngo lé ó yuq nghut lhé ga, tai akô lú?" ga myi ri.

¹⁹ "Ra-am gi, Wui-myhup Sará Yohan ga; góbang gi, Eliyaq ga; dum ra-am gi, hí hpyang lhé é myiqhtoi rayuq yuq dum dui toq lo é nghut ri ga, tai akô." ga luí, yhangmoq tú tai akô.

²⁰ Dum, Yhang gi, yhangmoq lé, "Nghut kôhang, nungmoq gi, ngo lé ó yuq nghut lhé nghu akô lú?" ga myi ri.

Haú hkùn, Petruq gi, "Nàng gi, Garai Gasang nhâng byi é Hkrisduq nghut ri." ga tú tai ri.

²¹ Shí hkyô ó lé le a tai kyo sháng gaq ga, Yesuq, yhangmoq lé tai hkúm pyám ri.

²² Haú mù, Yhang gi, "Haú Byu Yhangzo gi, zing-ri é myo myo hui zo luí, suwún wui, hkyangjong agyi pé, tará sará pé eq he-ngik pyám é hui mù, sat pyám é hui ra ra nghut lhé, hau htàng sum nyi nghú ra buinyi má, lhoq toq yu é hui ra nghut lhé." ga tai ri.

²³ Hau htàng, banshoq bang lé Yhang dum xoq tai é gi, "Ngá htàng cháng naú sù ó yuq

nghut kôle, yhumsing gùng yhumsing he-
ngip kým mù, nyí wuì yhumsing é tapzing
lé waq chùng* luí, cháng ra rá nghut lhé.

²⁴ Hkâsu mù gà le, yhumsing é asak lé
hkyi yù nau sù ó yuq nghut kôle, asak sum
rá nghut lhé; nghut kôhang, Ngá é yanmai,
yhumsing é asak sum pyâm é sù kúm gi, asak
hkyi yu é hui rá nghut lhé.

²⁵ Byù gi, mینگan gón lé wó sing to
kôhang, yhumsing é asak woi-nyí sùm byuq
é nghut le gi, yhang é matú, hái akyù bò rá
lhu?

²⁶ Ngò eq Ngá é dang lé, lhom hap yù rá
lé hoq é sù ó yuq lé le, hau Byu Yhangzo
gi, yhumsing é hpungwup shing kang eq,
Yhâng Wá é hpungwup shing kang, hau chy-
oiyung maumang lagyô pê é hpungwup
shing kang eq jé lé é hkún, hoq pyâm rá nghut
lhé.

²⁷ Ngò, nungmoq lé teng za tai kôlé, shi
má yap tô é bang ra-am gi, Garai Gasâng é
mingdán lé a myang é za shí kó rá a nghut."
gá ri.

*Mosheq Eq Eliyaq Yesuq Lé Hui Nyo É
Hkyô*

Mht 17:1-8; Mrk 9:2-8

²⁸ Dang hau tai é htàng, shit nyí kô nghut
jáng, Yhang gi, kyúdung rá ga Petruq, Yohan,
Yakuq pé lé shuí chùng mù, bùm shut doq ló
ri.

²⁹ Kyú dúng nyi le, Yesuq é myoqdong gi,
ihpyô isâm htai lò mù, Yhâng é mebu gi, lhap
su duq bang lo ri.

³⁰ Hau hkún, wù keq, Mosheq eq Eliyaq
gi, hpungwup shing kang eq htoq lé lô luí,
Yesuq eq dăng nyo lhum nyi akô.

³¹ Yhangmoq gi, Garai Gasang myit tô é
hkyô Yerusalem wá mó má Yesuq shí hkâm
é dông mai dik lò rá nghut é hkyô lé tai lhum
nyi akô.

³² Petruq eq yhâng luzúm nhik gi, yhup
mui nyi akô; nghut kôhang, yhangmoq bìn
lo é hkún lé, Yesuq é hpungwup shing kang
lé le, Yhang eq rahá yap to su nhik lé le,
myang kat akô.

³³ Hau nhik Yesuq chyáng mai gâng ló nyi
é hkún, Petruq gi, Yesuq lé, "Yhumsing é,
shí jowò má nga-nhúng nyi le ge ri, hau
mù, Nang é matú ralhù, Mosheq é matú
ralhù, Eliyaq é matú ralhù kut, ngamoq
lé, zúm sùm lhum saí nhâng laq." ga tai kat
kôhang, yhang hai tai nyi é lé, yhang a sé.

³⁴ Petruq dang tai nyi ashí hkún lé, mhut
jé mù, yhangmoq lé htup zing lo nyi ri. Mhut
hau htup lo nyi é yanmai, yhangmoq gi,
gyuq byuq akô.

³⁵ Hau mhut hkaù mai htoq lo é htê gi, "Shí
yuq gi, Ngá zo nghut lhé; Ngò hkyin yu é Sù
le nghut lhé; Yhâng é dang gyo keq." gá ri.

³⁶ Dang htê hau zim jáng, Yesuq yhang bau
nyi tô é lé, yhangmoq myang akô. Yhang-
moq myang é hkyô lé, buinyi hau bun hau
yoq má, ó lé le a tai kyô é zim za nyi byuq
akô.

*Nat Gang Dap É Yuqgè Zo Rayuq Lé Lhoq
Gê Byí É Hkyô*

Mht 17:14-18; Mrk 9:14-27

³⁷ Hau htàng nyi, yhangmoq bùm hau mai
gyô ló kô le, byù moq mó gi, Yesuq lé lhom
te yu akô.

³⁸ Hau hkún, byù hpúng hau má é byù
rayuq wut garú htoq ló é gi,

³⁹ "Sará é, wù aq, ngá é zo te yuqzo gi, nat
wang júng mù dân so dân loq garú lo lhé,
gutsú gi, agut gut dut shoq langtân nhang
lo lhé kut mù, nat gi, yhang lé gyai myáng
shoq zing-ri yù yù kut nyi ri.

⁴⁰ Nat hau lé hkat pyâm byi kó laq ngú
luí, Nang é chángzô pé lé ngò dúng wú
kôhang, yhangmoq a wó hkat pyâm byi kó.
Hau mù, ngá zo lé lhoq gê byi rá matú, ngò
gi, nang lé gyai myit lum é eq dúng kat lhé."
gá ri.

⁴¹ Hau mù luí, Yesuq gi, "Lumjing myit a
bo é eq agè ashop é amyú pé é, Ngò gi, hkâ-
myháng jé shoq nungmoq eq rahá nyi mù,
wó jân nyi rá lhu? Nung zo lé, shí shut shuí
lé lô aq." ga tú tai ri.

⁴² Zoshâng hau, lé lo nyi le lháng, nat
gang gi, yhang lé lhoq hêng to mù langtân
nhang ashí. Yesuq kúm gi, hau agè ashop é
nat lé tân kat luí, zoshâng hau lé lhoq gê byi
mù, yhâng wa lé dum ap byí ri.

⁴³ Nyi mi-nyí gi, Garai Gasâng é kô dik
é hpungwup a-tsam lé mau hong nyi bum
akô.

Lhunglhâng bang gi, Yesuq kut é muzó
hau lé mau nyi bùm kô le, Yesuq gi,

⁴⁴ "Hau Byu Yhangzo gi, byu pê é loq má
ap pyâm é hui zo rá nghut lhé. Dang shí
hkun lé nungmoq é no má rago gyô wun to
keq." ga luí, chángzô pé lé tai ri.

⁴⁵ Yhangmoq kúm gi, dang hau lé a sê
gyo kó, hkâsu mù ga le, hau gi, yhangmoq
é matú a sê gyo shâng gaq ga luí, nghop tô
ashí yanmai nghut ri. Dang hau é lichyúm
lé, Yesuq chyáng yhangmoq a wám myi kó
nghut ri.

Ó Yuq Gi, Kô Dik Sù Nghut Rá Lhu?

Mht 18:1-5; Mrk 9:33-40

⁴⁶ Hau htàng, lagyô pé gi, hká yuq sheq, kô
dik sù nghut lhé lhu ga, rayuq eq rayuq tai
mying myô lhum nyi akô.

⁴⁷ Yesuq kúm gi, yhangmoq é unghkaù má
myit nyi é hkyô lé sé byi luí, zoshâng rayuq
lé shuí yù mù, Yhâng nam má shap to luí,

⁴⁸ "Shí zoshâng lé Ngá é mying mai hap
sù ó yuq nghut kôle, Ngo lé hap yu é sù

* 9:23 Tapzing lé waq chùng nguh é gi, Yesuq é yanmai jamjau hui é lé tai é nghut lhé.

nghut bê; Ngo lé hap yù sù ó yuq nghut kôle, haù Ngo lé nhang kat é Sù lé hap yu é le nghut lhê. Haù mù luí, nungmoq banshoq má, je tiq sù gi, je ko sù nghut lhê." ga luí, yhangmoq lé tai ri.

⁴⁹ Haù hkûn, Yohan gi, "Yhumsing ê, Náng é mying láng luí, nat gâng pé lé hkát pyám byí wún é byù rayuq lé, ngamoq myang ri. Yhang gi, ngamoq chyáng a lóm sù nghut é yanmai, yhang lé ngamoq hkûm pyám é nghut lhê." ga tai ri.

⁵⁰ Yesuq kúm gi, "Yhang lé hkâhkúm kó, nungmoq é gyê hkyam shut a nyí sù gi, nungmoq é hkyam shut nyí sù nghut lhê." ga luí, yhang lé tai ri.

Samariq Wà Bang Yesuq Lé A Lhom Hap Yu É Hkyô

⁵¹ Ahkuí, Yesuq gi, Yhang lé mauhkung shut shuí toq yù rá buinyí chyâng lò bê nghut mù, Yerusalem wà mó shut é rá lé myit hpyit to luí, Yhâng é hí má lagyo nhang kat ri.

⁵² Lagyo haù bang gi, Yhâng matú rá é hkyô lajang láng rá ga, Samariq wà rawà má wang lò akô.

⁵³ Nghut kôlhang, Yesuq gi, Yerusalem wà mó shut lai é ló é sù nghut é yanmai, haù wà bang gi, Yhang lé a lhom hap yù kó.

⁵⁴ Haù hkûn, lagyo Yakuq eq Yohan nhik gi, haù lé myàng jáng, "Yhumsing ê, yhangmoq lé lhoq htên pyám rá matú, ngá-nhik mauhkung mai myí wut hkyô le, a gè lúh?" ga luí, Yesuq lé myí akô.

⁵⁵ Yhang kúm gi, lhing wú luí yhangnhik lé, tân pyám ri,

⁵⁶ haù mù luí, yhangmoq gi, gó wà shut é ló byuq akô.

Yesuq É Htâng, Hkâsu Kut Cháng Râ Hkyô Mht 8:19-22

⁵⁷ Yhangmoq haù hkyô má é ló kô le, byù rayuq gi, "Nâng hká é le hká ngò cháng rá." ga luí, Yesuq lé tai ri.

⁵⁸ Yesuq gi, haù yuq lé, "Wamhkuí pé gi, hkyung wó akô, nghoq pé le, nghoqsut wó akô. Nghut kôlhang, haù Byu Yhangzo gi, ulhum to jang lhâng a wó é nghut ri." ga tai pyám ri.

⁵⁹ Dum rayuq lé, "Ngá htâng cháng aq." ga tai jáng, haù yuq gi, "Yhumsing ê, ngá wa lé, ló yhùm pyám rá ahkáng hí byí shi laq." ga tai ri.

⁶⁰ Yesuq gi, yhang lé, "Shí bê bang† gi, shí bê bang yhangchang yhùm lhum kó sháng gag; nghut kôlhang, náng gi, Garai Gasâng é mingdán hkyô lé, é hko kyo aq." ga tai ri.

⁶¹ Byù rayuq dum, Yhang lé, "Yhumsing ê, ngò le náng htâng cháng rá, nghut kôlhang,

ngá yhumbyù lé hí hkyang ló shit to rá ahkáng byí shi laq." ga tai ri.

⁶² Yesuq gi, "Yò hpuq li zui mù htâng shut lhing wú sù ó yuq nghut kôlhang, Garai Gasâng é mingdán eq a gingdán." ga luí, yhang lé tai ri.

10

Yesuq, Chángzô Pé Nyhit Xê Yuq Lé, Nhang Htoq Kat É Hkyô

¹ Hau htâng má, Yhumsing gi, gotú chángzô pé nyhit xê yuq* lé hkyin yù mù, Yhang e ló rá wà eq jowò hkangmó shut í yuq razúm zúm kut luí, Yhâng é hí má é nhang kat ri.

² Yesuq gi, yhangmoq lé, "Kyo† shù yù rá myo shoq joq kôlhang, mù zui rá byù gi, shaù nyí ri. Haù mù, haù kyô Yhumsing lé, Yhâng é kyô yò má, kyô shu byù‡ myo myo nhâng byí rá matú, dung keq.

³ Nungmoq e ló keq! Wamhkuí hpúng má nhang hâng kat é sau zô pé lé su, Ngò, nungmoq lé nhang kat é nghut lhê.

⁴ Ngùn htung eq, etap, hkyí-tsung pé hkâyú chùng kó, hkyô má ó lé le hkâshichyên kùn nyí kó.

⁵ Nungmoq gi, hká yhùm má wàng e ló kô le, 'Shí yhùm nguingón nyí sháng gag.' nghú luí, hí tai keq.

⁶ Haù yhùm má nguingón hkyô eq gingdán sù nyí é nghut le gi, nguingón hkyô haù gi, haù yuq é ahtoq má joq to rá nghut lhê. Haù a nghut jáng, nguingón hkyô haù gi, nungmoq chyáng dum taù lo byuq rá nghut lhê.

⁷ Haù yhùm má nyí to mù, yhangmoq haí byí le haí zo haí shuq keq; hkâsu mù gâ le, mù zui sù gi, zuihpau wó yù gíng lhê; haù mù, nungmoq rayhum htâng rayhùm hkâhtot nyí wún kó.

⁸ Nungmoq hká wà má wang ló kôlhang, yhangmoq lhom hap yù kô é nghut le gi, nungmoq é hí má yhangmoq htung to byí é zoshuq lé, zo keq, shuq keq.

⁹ Haù má é nò bang lé lhoq gê byí mù, 'Garai Gasâng é mingdán gi, nungmoq eq chyáng lò bê nghut ri.' nghú luí, yhangmoq lé tai kyo keq.

¹⁰ Nghut kôlhang, nungmoq hká wà má wang ló kô le, yhangmoq a lhom hap yu é nghut le gi, haù wà má é hkyô mó má htoq é mù,

¹¹ 'Ngamoq é hkyí má dap tô é nungmoq wà má é hpuilhaù lhâng, nungmoq lé hkyang pú tsó nyí rá matú ngamoq ko hkyô pyám to byí bê. Nghut kôlhang, Garai Gasâng

† 9:60 *Shí bê bang* gâ é gi, woi-nyí má shi to bang lé gâ lhê.

‡ 10:2 *Kyô* nghú é gi, Yesuq lé lumjáng nau kôlhang tai kyo rá bang a nyí luí láng tô é bang nghut ri. † 10:2 *Kyô shu byù* nghu é gi, Yesuq é hkyô gabú danglù lé tai kyo bang nghut ri.

* 10:1 *Chyúmdang ra-am* má gi, chángzo nyhit xê í yuq ga le

é mingdán gi, chyâng lò bê hkyô lé, sé to keq.'
nghũ luí tai keq.

¹² Ngô, nungmoq lé tai kôlé, hau buinyi[§]
lé, hau wá gi, Sodom wà htoq má je hpuzo
rà nghut lhê.

¹³ Kurazin wà mó ê! Nàng dingnyé wó
ri! Bet-saida wà mó ê! Nàng dingnyé wó ri!
Nungmoq chyáng lé kut shit é laklai kumlhá
pé lé, Turuq myuq eq Sidun myuq má kut
shit é ru nghut le gi, yhangmoq, noq noq
mai myit lhing mù, jimê tù wut lhê, myiwap
kyaq gyũn lhê kut zung ngũng to bekô rà
nghut lhê.

¹⁴ Hau mù, tarâ jéyáng é nyí jé jáng, nungn-
hik gi, Turuq myuq eq Sidun myuq htoq má
je hpuzo* kó rà nghut lhê.

¹⁵ Dum mù, Kaperna-um wà nàng ê, nàng
gi, mauhkúng jé shoq waq toq é hui rà lhú? A
nghut, mosumhkung má sheq gyó rà nghut
lhê." ga tai ri.

¹⁶ Hau htàng má, chángzô pé lé dum xoq
tai é gi, "Nungmoq é dang gyo sù gi, ngá é
dang gyo sù le nghut bê; nungmoq lé he-
ngik é sù gi, ngo lé le he-ngik é sù nghut bê;
ngo lé he-ngik é sù gi, ngo lé nhang kat sù lé
le, he-ngik é sù nghut bê." gâ ri.

Nyhit Xê Yuq Dum Taué Jé Lo É Hkyô

¹⁷ Hau htàng, hau chángzo nyhit xê yuq gi,
gabú myit èq dum taué lò mù, "Yhumsing ê,
náng é mying lé lang jáng, nat gâng pé lháng
ngamoq é dang lé gyô bum akó." ga tai akó.

¹⁸ Hau su ga tai kôjáng, Yesuq tù tai é gi,
"Tsadán gi, mauhkúng htoq mai lhap hpyat
é su byit gyó lo é lé ngò myang kat bê.

¹⁹ Wú keq! Ngô gi, nungmoq lé, lhangmúi
eq gogok pé lé wó nang rà eq gumlau gyê
pê é wum-o a-tsam banshoq lé wó ùng rà
ahko ahkáng lé byi bê nghut mù luí, hai èq
le nungmoq lé wó lhoq hten rà a nghut lo.

²⁰ Nghut kôlhang, nat pé nungmoq é dang
gyô é lé za hkágabú nyí kó, mauhkúng htoq
má é asak jihpán laiká buk má nungmoq é
mying bo to bê lé sheq gabú nyí keq." ga tai
ri.

²¹ Hau u lé, Yesuq gi, Choyiyung Woi-nyí
má gabú é myit bying lô mù, "Mauhkúng eq
myigung é Yhumsing, Áwa ê, Nàng gi, hau
pé lé, hpaqchyí byéng-yá bò bang eq myit
hpaqchyí sé bâng é hí mai haq nghop to luí,
zoshâng wui lé tũn shit bê nghut é yanmai,
Ngô, Nang lé hkya-ôn lhê ô. Nghut bê, Áwa ê,
hau gi, Nàng ô nau é hkyô nghut ri.

²² Ngá Wa gi, lhunglhang lé Ngá é loq má
ap byi to bê. Garai Gasang Yhangzo ó nghut
é gi, Áwa Garai Gasang mai lai luí ó le a sé;
Áwa ó nghut é lé le, hau Zo eq hau Zo mai sé

nhâng rà matú hkyin yu é bang mai lai luí, ó
a sé." ga tai ri.

²³ Hau htàng má, Yhâng é chángzô pé shut
lhing wú luí, yhangmoq lé baú za haq tai
kat é gi, "Nungmoq byu-myàng é hkyô pé lé,
myang é myoq pé gi, hkungsó wó nyi ri.

²⁴ Hkásu mù gâ le, Ngô, nungmoq lé tai
kôlé, nungmoq wó myàng, wó gyô é pé lé,
myiqhtoí pé eq hkohkam pé myo myo gi,
myàng nau gyo nau kôlhang, a wó myàng, a
wó gyo kó nghut ri." ga tai ri.

Gè É Samariq Byù

²⁵ Hau hkũn, wú keq, tarâ sará rayuq gi,
toq luí, Yesuq lé, "Sarâ ê, ahtum abyuq é
asak lé wó yú shoq, ngò hkásu kut rà rà lhê
lhú?" ga luí, Yhang lé myí chyam wú ri.

²⁶ Yesuq gi, "Mosheq é tarâ má hkásu ga kâ
tô ri lhú? Nàng hau lé hkásu nghap yu nyi lhê
lhú?" ga luí, yhang lé myí ri.

²⁷ Hau yuq gi, "Hau Yhumsing náng é
Garai Gasang lé, náng é myit nhikhlum ban-
shoq, náng é asak woi-nyí lhum gón, náng é
wum-o banshoq, náng myit é hkyô banshoq
èq, chyitdap rà lhê;†^o 'náng gung lé nàng
chyitdap é su, náng é chyangnâm má é bang
lé le chyitdap aq.†^o" ga tù tai ri.

²⁸ Yesuq gi, "Nàng tù tai é dang jô ri; hau
su yhang kut aq, hau jáng nàng gi, asak ùi
rà nghut lhê." ga yhang lé tai ri.

²⁹ Nghut kôlhang, hau yuq gi, yhâng
gungdu dingmán é lé, tũn shit nau luí, "Ngá
é chyangnâm má é sù gi, ó yuq nghut lhê
lhú?" ga luí, Yesuq lé myí ri.

³⁰ Yesuq tù tai é gi, "Byù rayuq gi,
Yerusalem wà mó mai Yerihko wà shut gyó
ló le, damyaq eq htũng hui ri. Damyaq hau
bang gi, yhâng é mebu pé lé hkyut shang
pyám byi kôluí, rayúm gyut shoq bat nha
mù, aluq shoí shí jáng sheq tô pyám to kôluí
ló byuq bekó.

³¹ Hau u lé, hkyangjong rayuq gi, hau
hkyô mai lai ãng lô le, hau damyaq hui sù lé
myàng jáng, koi lai lô byuq ri.

³² Hai eq rajung za, Lewiq rayuq le, hau
mai lai lô é hkũn, hau yuq lé myàng jáng, koi
lai lô byuq ri.

³³ Nghut kôlhang, Samariq byù rayuq le,
hau mai lai lô é hkũn, hau yuq leq tô é lé
myàng jáng, wú shogyo luí yhâng chyáng hui
é mù,

³⁴ yhâng é dàm má, xú eq tsibiyiq wing
shoq gyun luí, rago za htup byi mù, yhâng é
logung má, hau yuq lé bún ke luí, bing-yhũm
ralhum má jé shoq shuí lò mù, gón lajang byí
ri.

³⁵ Htang nyí lé, yhang gi, hau bing-yhũm
yhumsing lé ngũn Denari i chap shé byi mù,
tai é gi, 'Shí yuq lé wú lajang byi laq, yhâng

§ 10:12 Hau buinyi gâ é gi, Garai Gasang tarâ jéyáng é buinyi lé gâ lhê. * 10:14 Nungnhik je hpuzô é hkyô gi, mauhpo
kumlhá myo myo myang é nghut kôlhang, myit a lhing kô é yanmai nghut ri. † 10:27 Tarâ Pun 6:5 † 10:27 Nhung
19:18

gùng má nàng myo chung záng é banshoq lé ngò dum taù lò jáng, lo xap rà.' gâ ri." gâ ri.

³⁶ Hau htàng, tarâ sarâ lé, "Nàng gi, byù haù bang sum yuq má damyaq huì sù é chyàngnàm mâ é dồng nghut sù gi, hkâ yuq nghut rà su ngam ri lhu?" ga luí, Yesuq myí ri.

³⁷ Haù tarâ sarâ gi, "Haù yuq lé shogyo sù nghut ri." ga taí ri.

Yesuq gi, "Nàng le haù dồng lò kut aq." ga luí, yhang lé taí kat ri.

Mariq Eq Mahtaq Nhik Chyáng Yesuq Ê Jé É Hkyô

³⁸ Ahkuí, Yesuq eq Yhâng é chángzô pé hkyô xoq sô é lò kô le, wà rawá má jé wanglô é hkùn, Mahtaq gâ é myiwe rayuq gi, Yesuq lé yhâng yhùm má lhom te yu ri.

³⁹ Mahtaq gi, Mariq gâ é yhanggu myiwe zo rayuq wó ri. Mariq haù gi, Yhumsing Yesuq é hkyí wang má zung to mù, Yhang mhoqshit é dang lé gyô nyi ri.

⁴⁰ Mahtaq kúm gi, saí tso saí huq é amú myo luí, gyin bún nyi ri. Haù mù luí, yhang huì é mù, "Yhumsing ê, ngá gu gi, saí tso saí huq é amú má, ngo lé baù za rap kut tô é lé, nàng a bo myàng byi lhu? Ngo lé, lé garúm shàng gaq, yhang lé taí byi laq." ga luí, Yesuq lé taí ri.

⁴¹ Haù hkùn, Yhumsing gi, "Mahtaq, Mahtaq, nàng gi, muzólé za ma nyi mù, myit myo myit chiq é huì nyi ri.

⁴² Nghut kôhlang, je ahkyak é hkyô gi, rahkat za nghut lhê. Mariq kúm gi, haù je ge é hkyô lé hkyin yù bê nghut ri. Haù lé yhâng chyáng mai wó yu pyám byi rà a nghut." ga luí, yhang lé tũ taí ri.

11

Yesuq Mhoqshit É Kyùdung Dang Mht 6:9-13; 7:7-11

¹ Ra-nyí lé, Yesuq gi, jowò rawò má kyùdung nyi ri. Yhang kyù ban dung jáng, Yhâng é chángzo rayuq gi, "Yhumsing ê, Yohan gi, yhâng é chángzô pé lé kyùdung rà hkyô mhoq byí é su, ngamoq lé le mhoq byi laq." ga Yhang lé taí ri.

² Haù hkùn, Yhang gi, "Nungmoq kyùdung le,

'Mauhkúng htoq tsáng myhâng mâ é ngamoq é Áwa ê,

Náng é mying gi, chyoiyúng nyí shàng gaq.

Náng é mingdán jé lò shàng gaq.

³ Ngamoq nyí wuí rà é zoshuq lé, ngamoq lé nyí wuí byi laq.

⁴ Ngamoq lé shut é byù banshoq bâng é mara lé, ngamoq hkyut pyám byí é yanmai, ngamoq é mara lé le hkyut pyám byi laq.

Ngamoq lé, agúng aláú hkyô má hkâwàng nhâng.'

ngũ keq." ga luí, yhangmoq lé mhoqshit ri.

⁵ Yesuq yhangmoq lé dum taí é gi, "Dangké, nungmoq chyáng mâ é rayuq sù gi, buinùm wó é ngũ shàng, yhang gi, gunggàm yoq má haù yuq chyáng é luí, 'Buinùm hpó ê, ngo lé muk sùm long byam chyí byí kat laq,

⁶ haù mù gâ le, ngá buinùm rayuq byin we mai ngá chyáng jé nyi tô ri. Ngò gi, yhang lé byi tso rà haì le a joq byam dut tô ri.' ga taí é hkùn,

⁷ yhùmhaù shut má é sù gi, 'Ngo lé, hkâlê lhoq hkyik lo, hkum le myhi pyám bê, ngá zoshàng wui le ngò eq rahá yhupjiang má yhup to bekô. Ngò, nàng lé haì le a wó toq yù byi lo.' ga tu kat ri.

⁸ Ngò, nungmoq lé taí kôlé, buinùm nghut é yanmai za gi, muk a kâm toq byi lo kôhlang, zuq zuq dúng nyi é yanmai, haù yuq lé, yhang ra chà é banshoq toq yù byi rà nghut lhê.

⁹ Haù mù, ngò, nungmoq lé dum taí kôlé, dung keq, haù jáng, nungmoq lé byi rà nghut lhê; hõ keq, haù jáng, nungmoq myàng kó rà nghut lhê; hkum má kok keq, haù jáng, nungmoq lé hpóng byi rà nghut lhê.

¹⁰ Hkâsù mù gâ le, ó yuq nghut kôle, dung sù wó rà; hõ sù myàng rà; hkum kok sù lé gi, hpóng byi rà nghut lhê.

¹¹ Nungmoq iwá pé má, ó yuq wá, yhum-sing yhangzo muk dúng le, luqqok byi kó rà lhu? Ngozo dúng le, lhangmui byi kó rà lhu?

¹² Woq-ú dúng le, gogok byi kó rà lhu?

¹³ Agè ashop é bang nungmoq lhang gi, nungmoq é zo wui lé, ge é chyunghuq dat byi kô le nhing, mauhkúng htoq tsáng myhâng mâ é nungmoq é İwa gi, Yhang lé dúng é bang lé, je riyhang haù Chyoiyúng Woi-nyí byi rà nghut lhê." ga taí ri.

Mara Hùn É Dang Lé Yesuq Tũ Taí É Hkyô Mht 12:22-30, 43-45; Mrk 3:20-27

¹⁴ Radàm lé, Yesuq gi, byù rayuq lé dang a wó nyò shoq kut tô é nat gang lé, haù yuq chyáng mai hkat htoq pyám ri. Nat haù htoq lò byuq é htàng má, dang a wó nyò sù gi, dang wó nyo nyi é yanmai, byù moq mó gi, chòm maù byuq bum akó.

¹⁵ Nghut kôhlang, yhangmoq chyáng mâ é ra-am gi, "Yhang gi, nat gâng pé é zau Bezebulaq é wum-o a-tsam êq za, nat gâng pé lé wó hkat pyám é nghut ri." ga taí bum akó nghut ri.

¹⁶ Ra-am le, Yhang lé, mauhkúng mâ é kumlhá tũn shit wú laq ga dúng chyam wú akó.*

¹⁷ Yesuq kúm yhangmoq myit nyi é hkyô lé sé mù taí é gi, "Ikun byoq é mingdán

* **11:16** Byu pé gi, Yesuq lé Garai Gasang nhang kat é hkyô lé saksé myàng nàu luí, mauhpo kumlhá dúng nyi akó.

hká lhum nghut kôle, hten byuq râ za nghut lhê; hau eq rajung za, ikun byù yhangchang rayuq eq rayuq byoq lhûm é yhûm htu gi, byoq gâng lhum râ za nghut lhê.

¹⁸ Nat pé le yhangmoq yhangchang byoq gâng lhûm nyi kô é nghut le gi, Tsadán é mingdán gi, hkâsu kut wó gâng to râ lhú? Ngò isu nghu tai é gi, nungmoq ngo lé Bezebulaq é wum-o a-tsâm eq za, nat gâng pé lé hkat pyâm ri ga kô é yanmai nghut lhê.

¹⁹ Ngò gi, Bezebulaq é wum-o eq za, nat gâng pé lé hkat htoq é nghut jáng, nungmoq é chângzô pé gi, ó yuq é wum-o a-tsâm eq za, nat gâng pé lé hkat pyâm kô é nghut lhê lhú? Hau mù luí, yhangmoq gi, nungmoq lé jéyáng é bang dut bekô râ nghut lhê.

²⁰ Nghut kôlhang, Ngò gi, Garai Gasâng é wum-o eq nat gâng pé lé hkat htoq pyâm é nghut jáng, Garai Gasâng é mingdán† gi, nungmoq chyáng jé bê nghut ri.

²¹ Wum-o bo é sù rayuq gi, yhâng é yhûm lé, shâm, lhâm chúng lui zúng tô é nghut jáng, yhâng é sutzé pé gi, rago za wó joq to râ nghut lhê.

²² Nghut kôlhang, yhâng htoq wum je bo é sù lé luí, hau yuq lé, lé zân ung pyâm é nghut le gi, yhang lum tô é shâm, lhâm lé, hkyom yu pyâm byi luí, yhâng é sutzé pé lé, gam yu pyâm byi râ nghut lhê.‡

²³ Ngá hkyam shut a dap sù gi, Ngo lé gyè kut sù nghut lhê. Ngò eq rahá a shuí tsing sù gi, lhoq pyo pyâm é sù nghut nyi ri.

²⁴ Hau agè ashop é nat gi, byù rayuq chyáng mai htoq lô mù, kyuq huí é jowò pé má só yông e lô luí, no râ jowò hkat ho wú le, a myang hô nghut ri. Hau hkûn, yhang gi, 'Ngò nyi lai lo é yhûm má dum tau lô wú rá.' ga tai ri.

²⁵ Yhang dum tau jé lô wú le, yhûm hau gi, shum pyâm mù san za rago dut to láng é lé lô myang ri.

²⁶ Hau jáng, yhang gi, dum tau é mù, yhâng htoq je wuí é nat nyhit nat lé shuí lô luí, hau má lo wàng nyi to bekô. Hau mù, hau yuq é nyi yap sâmlai gi, hí lhê htoq má je wuí lô bê nghut ri." ga tai ri.

²⁷ Hau su ga, Yesuq tai nyi é hkûn, hau shiwa hpong mâ é, myiwe zo rayuq hté mó o mó eq Yhang lé tai é gi, "Nang lé wun é ùng wam eq nàng shuq é nauwang gi, hkungsô wó nyi ri ô!" gâ ri.

²⁸ Yesuq gi, "Garai Gasâng é mungdang gyô yù luí châng kut é bang gi, je riyhang hkungsô wó kó rá nghut lhê." ga tai ri.

† 11:20 Garai Gasâng é mingdán gâ é gi, byù htoq má le, nat htoq má le, Garai Gasâng yhang uphkanq é lé gâ é nghut lhê.

‡ 11:22 Hau eq rajung za, Yesuq gi, Tsadán lé zân ùng bê nghut é yanmai, agè ashop é nat pé le byu pé chyáng mai, wó hkat pyâm bê nghut ri. § 11:30 Kumhá gi, Yonaq, ngozô wamdau má sum nyi lúng é su, Yesuq le, shi bê mai sum nyi

ngû râ nyi má, dum dui toq lô râ hkyô lé tai nau é nghut ri. * 11:34 Myibung gâ é gi, tengmâ é mungdang lé wó sê yu é a-tsâm lé, tai é nghut ri. † 11:38 Yudaq htung tará má gi, zang a zo shi má loq chi râ lhê.

Mauhpo Kumhá Lé Dung Kô É Hkyô

Mht 12:38-42; Mrk 8:12

²⁹ Shiwa byu pé jat myô zup zing lo é hkûn lé, Yesuq tai é gi, "Shí ipyat lhê é byu pé gi, agè ashop é bang nghut akô. Yhangmoq gi, limik kumlhá dúng nyi bùm kôlhang, Yonaq é kumlhá mai lai luí, gotù hai le tún shit râ a nghut.

³⁰ Yonaq gi, Ninewe wà byù pé hí má kumlhá§ dut é su, hau Byu Yhangzo gi, shí pyat lhê é byu pé hí má, kumlhá dut râ nghut lhê.

³¹ Maupyí mâ é hkohkâm myhí gi, maumyí lô htàng é mai lé lô mù, Sholumon é hpaqchyí dang lé, lé gyô yù bê nghut mù, hau tará jéyáng é buinyi má, shí ipyat má é byu pé eq rahá toq lô luí, yhangmoq lé mara hûn râ nghut lhê. Wú keq, Sholumon htoq ko sù gi, ahkuí shí má jé nyi to bê.

³² Ninewe wà byu pé gi, Yonaq, mungdang hko kyô é hkûn myit lhing kô é nghut mù, tará jéyáng é buinyi má, shí ipyat eq rahá toq lô luí, yhangmoq lé mara hûn kó râ nghut lhê. Wú keq, Yonaq htoq ko sù gi, ahkuí shí má jé nyi to bê.

Myibung Su Duqbó Râ Hkyô

Mht 5:15; 6:22-23

³³ Myibung lé tuq mù go pyâm é jowò má tô tô é le, mùng eq nghop tô é le, ó a kut wú kó. Nghut kôlhang, wang lé lô bang myoq wó myâng râ matú kúm gi, tsungjang má tsung to to chyat kut akô.

³⁴ Náng é myoq gi, náng gungdù é myibung* nghut nyi ri. Náng é myoqjí ge é nghut le gi, náng é gungdu gón má maubó bying mui to râ nghut lhê. Nghut kôlhang, náng myoq a ge é nghut le gi, náng é gungdu gón gi, mauchut tuq dut nyi râ nghut lhê.

³⁵ Hau mù, náng chyáng bo é maubó gi, mauchut byuq é, a chut byuq é lé wú nyi aq. Nang lumjing é hkyô eq nang myit é hkyô gi, mauchut tuq a dut shang gaq, sidiq nyi aq.

³⁶ Náng é ragungdu gón má duqbó é nghut le gi, rawò má le mauchut é jowò a joq é za, myibung nang lé duqbó byi nyi é su, náng gungdu gón má duqbó nyi râ nghut lhê." ga tai ri.

Hparishe Pé Eq Tará Sará Pé Lé, Yesuq Mara Hun É Hkyô

Mht 23:1-36; Mrk 12:38-40; Luk 20:45-47

³⁷ Yesuq hau su ga ban tai é htàng má, Hparishe rayuq gi, yhang eq zang rahá zo râ matú, Yesuq lé ji ri. Hau mù, Yesuq gi, hau

yhùm má wang ê mù zang zo rà ga siboî nàm má zung tô ri.

³⁸ Nghut kôlhang, Hparishe wá gi, zang zo rà hí má Yesuq loq a chí é lé, myàng luí maú nyi ri.[†]

³⁹ Haú mù luí, Yhumsíng Yesuq yhang lé tai é gi, "Nungmoq Hparishe pé gi, góm eq zanghkoq lé ahtoq shut za chí yúng nyí kômù, nungmoq é unghkaú má gi, lú zo lú shuq é eq agé ashop é hkyô pé byíng zan tô ri.

⁴⁰ Byù bâm pé ê, ahte[‡] lé le, ahtoq[§] lé le, saí sù gi, Garai Gasang rayuq za nghut é lé, a sé kô lú?[‡]

⁴¹ Nghut kôlhang, ahte má bo é zè pé lé, ra chá é bang lé byí pyám keq; haú hkùn, nungmoq é matú banshoq gi, sân-yúng lô rà nghut lhê.

⁴² Hparishe pé ê, nungmoq gi, dingnyé wó ri, hkâsu mù gâ le, nungmoq gi, gau-tsáng, shíngtón pé eq zangxun mhan-haq ajù jù mà é, xê gambùm ragambùm lé gi, Garai Gasang lé byi nyí kômù, tarâ dingmán é hkyô eq Garai Gasang chyitdap é hkyô lé gi, lhai pyám tô akô. Xê gambùm ragambùm byí é lé le cháng luí, tarâ dingmán é hkyô eq Garai Gasang lé chyitdap é hkyô lé le, kut nyí rà lhê.

⁴³ Hparishe pé ê, nungmoq gi, dingnyé wó ri, hkâsu mù gâ le, tarajong pé mà é ahkyak dik é zúng jang pé lé le, gai pé má hkunggâ é eq shichyên é dang lé le, nungmoq ô nau nyi bum akô.

⁴⁴ Nungmoq gi, dingnyé wó ri, hkâsu mù gâ le, nungmoq gi, ahkô a dong lo mù, byu pé a sé luí, ahtoq mai sô lai é lupdùng eq du akô." ga tai ri.

⁴⁵ Haú hkùn, tarâ sará rayuq gi, "Sará ê, nàng haú su gâ é gi, ngamoq lé le rhoi lhom nyi é nghut bê." ga Yhang lé tú tai ri.

⁴⁶ Haú su ga jáng, Yesuq gi, "Nungmoq tarâ sará pé le, dingnyé wó ri. Hkâsu mù gâ le, nungmoq gi, byu pé lé, wùn waq rà wuí é noqkuq htúng tarâ wôlai lé wùn nhâng luí, yhumsíng yhang gi, wò haú lé loqnyhuí eq lhang, a bo záng wú kó nghut ri.

⁴⁷ Nungmoq gi, dingnyé wó ri, hkâsu mù gâ le, nungmoq gi, nungmoq é ichyí iwâ pé sat pyám é myiqhtoí pé é lup lé luptsuq tsuq akô.

⁴⁸ Haú mù luí, nungmoq gi, nungmoq é ichyí iwa pé é muzó lé, myit bo huí é bang nghut nyi akô. Hkâsu mù gâ le, yhangmoq gi, myiqhtoí pé lé sat pyám mù, nungmoq gi, lup haú pé lé luptsuq tsuq akô.

⁴⁹ Haú mù luí, Garai Gasang, Yhâng é hpaqchyí byéng-yá mai tai é gi, 'Myiqhtoí pé eq lagyó pé lé, ngo yhangmoq chyáng nhang kat rà nghut lhê; haú bang mà é ra-am lé gi,

yhangmoq lhom sat pyám mù, ra-am lé gi, zing-ri kó rà nghut lhê.' gâ ri.

⁵⁰ Haú su mù luí, mau htoq xâng hkùn lhê é, Abelaq é sui mai, hkungga gyap eq noqkuq yhùm gyoro má sat pyám huí é Zakhariq é sui jé shoq, shun pyám é myiqhtoí pé é sui banshoq bâng é manglat gi, shí pyat mà é byu pé lé hùn rà nghut lhê.

⁵¹ Ngò, nungmoq lé tai kôlé, manglat haú pé lé gi, shí pyat mà é byu pé lé, gè gè yhang hùn rà nghut lhê.

⁵² Tarâ sará pé ê, nungmoq gi, dingnyé wó ri, hkâsu mù gâ le, nungmoq gi, byu pé Garai Gasang lé sé ra zoqshi lé yu pyám byi kômù, yhumsíng yhang le a sé, sé nau bang lé le, hkùm zing tô akô nghut ri." ga tai ri.

⁵³⁻⁵⁴ Yesuq haú mai htoq lô é hkùn, tarâ sará pé eq Hparishe pé gi, Yhang lé gye kut mù, Yhâng é dang má mara wó myàng shoq ga, wuí é dangmyi myo myo myí luí, gyám wú nyi akô nghut ri.

12

Gegùn Labyoq Kut É Bang Lé Sidiq Râ Hkyô

Mht 10:28-33; 12:32; 10:19-20

¹ Haú u, byù hkyíng mun zup zíng lò mù, rayuq eq rayuq lhang záng nàng lhum shoq dut nyi é hkùn, Yesuq, Yhâng é chángzô pé lé tai hí é gi, "Gegùn labyoq kut é Hparishe pé é múnchi lé koi sidiq pyám keq.

² A byông htoq loshoq wó záu nghop tô é, hai le a joq rà nghut lhê; a sé loshoq wó haq tô é le, hai a joq rà nghut lhê.

³ Haú mù luí, nungmoq, mauchut hkaú má haq tai é dang banshoq lé, myoq myàng maubó má wó gyô bùm kó rà nghut lhê. Gok hkaú má, dangsoq soq é lé le, yhumhkung htoq mai tai pyo bùm bekô rà nghut lhê.

⁴ Ngá buinùm wuí é, Ngò, nungmoq lé tai kôlé, gungdu lé za wó sat pyám mù, woi-nyí lé hai le a wó kut é bang lé, hkâgyuq kó.

⁵ Nghut kôlhang, nungmoq ó lé za gyuq rà é lé gi, Ngò, nungmoq lé tai kyo kôlé, gungdu lé sat pyám é htàng má, woi-nyí lé ngaraí ming shut wó hkyô kat pyám é a-tsam wó sú lé kúm gi, gyuq keq. Nghut bê, Ngò, nungmoq lé tai kôlé, haú yuq lé za, gyuq nyi keq.

⁶ Johkyáng ngo du lé, gyi htingchap í chap eq wó úng pyám lhê a nghut kó lú? Haú johkyáng radu lé lhang, Garai Gasang gi, tô-myhí pyám é a nghut.

⁷ Garai Gasang gi, nungmoq é ulhum má é xâm banshoq lé lhang, nghap to gù nghut lhê. Haú mù, hkâgyuq kó; nungmoq gi, haú johkyáng myo myô htoq má lhang gù je bo é bang nghut lhê.

⁸ Ngò, nungmoq lé tai kôlé, byu pé hí má Ngo lé lhom yín yu é sù ó yuq nghut kôle,

[‡] 11:40 Ahte gâ é gi, i-myit unghkaú lé tai ri.

[§] 11:40 Ahtoq gâ é gi, gungdu lé tai ri.

Garai Gasâng é maumang lagyô pê é hí má, haú Byu Yhangzo gi, haú yuq lé lhom yín yú rá ngut lhê.

⁹ Ngut kôlhâng, byu pê é hí má Ngo lé he-ngik pyâm é sù lé chyaú gi, Garai Gasâng é maumang lagyô pê é hí má, he-ngik pyâm rá ngut lhê.

¹⁰ Haú Byu Yhangzo lé dang dông shut é sù gi, mara hkyut byí é wó hui ra ngut lhê; ngut kôlhâng, haú Chyoiyúng Woi-nyí lé rhoi dang tá pyâm é sù gi, mara hkyut byí é hui rá a ngut.

¹¹ Byu pé nungmoq lé jéyáng rá matú tara-jong pé má le, agyi suwún wuí eq ahkáng ayá wó bâng é hí má le, shuí é ló kô é hkún, hkâsu kut rá lé le, hkâsu ngúhú tú tá rá lé le, hkâmyit chiq kó.

¹² Hkâsu mù gà le, haú u lé yhang, Chyoiyúng Woi-nyí gi, nungmoq hkâsu tá rá hkyô lé mhoqshit byí rá ngut lhê." ga tá ri.

Hpaqchyí A Bo É Sahtê Hpó Lé Dangtú Yu É Hkyô

¹³ Haú hkún, shiwa hpúng hkaú mai, byu rayuq gi, "Sará è, ngá-nhik táng wó é muizé pé lé chóm gam lhum rá matú, ngá mang lé bo tá byi laq." ga luí, Yesuq lé tá ri.

¹⁴ Yesuq gi, "Byù nàng è, nungnhik tang ahtoq má tará agyi kut luí, ikun zè gám byi rá gi, ngo lé ó hkyin tò é lúhú?" ga luí, yhang lé tú tá ri.

¹⁵ Yesuq yhangmoq lé tá é gi, "Myoqnoq é hkyô banshoq mai, nungmoq é i-myit lé hkúm zing luí, koi sidiq nyi keq. Hkâsu mù gà le, byu é asak gi, agùn agó é sutzè má bo é a ngut." gà ri.

¹⁶ Dangtú ralhóm dông mai le, yhangmoq lé Yesuq tá é gi, "Sahtê rayuq gi, yhâng é yò pé má guqzo muilhum gáf já ri.

¹⁷ Haú mù luí, yhâng é unghkaú má myit é gi, 'Ngò hkâsu kut wú rá lúhú? Ngá é guqzo muilhum pé lé kat to rá jowò a wó lo dut to bê.' gà ri.

¹⁸ Dum ngut jáng, yhang gi, 'Ngò ísu kut wú rá abe, ngá é chyí xau pé lé hpyoq pyám luí, je kô é chyí pé lé saí rá ngut lhê. Chyí haú pé má ngá é guqzo muilhum pé eq sutzè banshoq lé, tsing kat to luí,

¹⁹ ngá é i-myit lé ísu ngúhú tá rá, "I-myit é, zanwut myáng myáng é matú, zè gè myo myo ngò tsing to bê. I-myit nàng zim za kut nyi aq hkoi. Zo mù, shuq mù, ngón ngón nyi aq." ga' gà ri.

²⁰ Ngut kôlhâng, Garai Gasang gi, 'Byù gò è, náng é asak lé, hkú-myín yhang, wup yu pyám byí é ngut jáng, nàng tsing hkong tò é zè pé gi, ó yuq é matú dut rá lúhú?' ga luí, yhang lé tá ri.

²¹ Haú eq rajung za, yhumsing é matú sutzè hkong to mù luí, Garai Gasâng é hí má

myung nyi sù gi, haú yuq su ngut rá ngut lhê." gà ri.

Myit A Chiq É Za Garai Lé Lumjng Rá Hkyô

Mht 6:25-34, 19-21

²² Yesuq, Yhâng é chángzò pé lé dum tá é gi, "Haú mù luí, Ngò, nungmoq lé tá kôlé, nungmoq é asak matú hái zo hái shuq rá eq nungmoq é gungdú matú hái wut hái tsang rá lé, hkâ-myit chiq kó.

²³ Asak gi, zoshuq htoq má, gungdu gi, mebú htoq má, je ahkyak lhê.

²⁴ Nghonoq pê é hkyô lé myit wú keq; yhangmoq gi, kyô hkyô kyô shu a kut kó; guqchyí eq sutdek lé a wó kó, ngut kôlhâng, Garai Gasang gi, yhangmoq lé, byi tso byi huq nyi lhê. Nungmoq gi, nghoq haú pé htoq má je riyhang hpaudap nyi lhê a ngut kó lúhú?

²⁵ Nungmoq má, ó yuq wá, myit chiq é èq, yhumsing é asak lé radúng kô wó jat yù kó rá lúhú?

²⁶ Haú su mù luí, tiq dik é hkyô lé lhâng, nungmoq a wó kut kô é nhing, hái mù luí gotú hkyô pé lé, myit myô nyi akò lúhú?

²⁷ Htutbó ban* pé hkâsu kut kô lo é lé, myit wú keq. Haú pé gi, mù le a zui, hkying le a duí kó ngut ri. Ngut kôlhâng, Ngò, nungmoq lé tá kyo kôlé, Hkôhkâm Sholumon hpúng kô dik u lé wut é mebu lhâng, ban haú rabó lé a hkyit ngut ri.

²⁸ Lumjng myit tiq é bang è, hkú-nyí joq mù, napmá myihkyóm má dú kat pyám hui rá ngut é yosó mhan pé lé za lhâng, Garai Gasang haú su kut hut é ngut le gi, nungmoq lé, je riyhang hut rá a ngut kó lúhú?

²⁹ Nungmoq gi, hái zo hái shuq rá lé hkâho nyi kó; haú eq séng luí lé hkâ-myit chiq nyí kó.

³⁰ Hkâsu mù gà le, Garai Gasang lé a sé bang gi, haú hkyô banshoq lé châng hkat ho nyi akò; ngut kôlhâng, nungmoq é Íwa Garai Gasang gi, haú pé lé nungmoq rá é hkyô, sé byí nyi lhê.

³¹ Nungmoq kúm gi, Yhâng é mingdán lé ho nyi keq, haú jáng, haú pé, nungmoq lé puq byi rá ngut lhê.

³² Sau hpúng zò pé é, hkâgyuq ko, hkâsu mù gà le, nungmoq é Íwa Garai Gasang gi, Yhâng é mingdán nungmoq lé byí nau nyi ri.

³³ Nungmoq wó é zè pé lé ùng pyám luí, myùng bang lé byi keq, yhumsing é matú a dat xau a dat wôm é ngunhtúng sai luí, hkau sù lé a jé, manot èq le a wó zò é sutzè lé mauhkúng htoq má hkong to keq.

³⁴ Hkâsu mù gà le, náng é sutzè joq jang má, náng é i-myit le je nyí rá ngut lhê.

* 12:27 Htutbó ban gi, yùng dik é yosó ban ngut lhê.

Yesuq Dum Jé Lé Lô Râ Hkyíng Lé Machya Nyi Râ Hkyô

Mht 24:45-51

³⁵ Nungmoq gi, hpyihit hit luí, (mù zui rá matú rí rí kut to keq); nungmoq é myibung lé tuq to mù,

³⁶ myiháng pói mai dum taú lò luí, hkúm lo kok é, yhumsíng hpó lé radá dâm hkum lhom wó hpông hâng yù shoq, láng tó é dui-nhâng zoshâng wui su kut nyi keq.

³⁷ Haú yhumsíng jé lo le, machya nyi láng é dui-nhâng zoshâng wui gi, hkungsô wó nyi rá. Hkásu mù gà le, ngò, nungmoq lé teng za taí kôlé, haú yhumsíng hpó gi, yhangmoq lé yuq zung to nhâng luí, yhang gi, dui-nhâng zoshâng su hpyihit hit mù, sai tso sai huq rá ngut lhê.

³⁸ Gunggám yoq lé ngut kôlháng, woq tún hkún lé ngut kôlháng, haú su kut machya nyi é lé, yhumsíng hpó lo myang é ngut le gi, dui-nhâng zoshâng haú bang hkungsô wó nyi rí.

³⁹ Yhumsíng hpó rayuq, hká u má hkau sù lé lô rá lé, sê tó é ru ngut le gi, yhang machya nyi luí, yhâng yhúm lé a wó hput htong nhâng rá ngut é lé, bûn sê nyi keq.

⁴⁰ Haú mù, nungmoq le rí rí ngut nyi keq; hkásu mù gà le, haú Byu Yhangzo gi, a bûn nùng má jé lé lô rá ngut lhê." ga rí.

⁴¹ Haú hkún, Petruq gi, "Yhumsíng ê, dang-tú shí gi, ngamoq lé za, taí é ngut lhê lú? Haú a ngut jáng, lhunglhâng bang lé taí é dông ngut lhê lú?" ga myi rí.

⁴² Haú jáng, Yesuq gi, "Lumgíng é eq hpaqchyí bo é sùt zum sù gi, hká yuq ngut lhê lú? Haú yuq gi, yhâng yhumsíng é dui-nhâng zoshâng wui lé ahkyíng jé jáng zoshuq gám byi rá matú, yhumsíng hpó éq hkyin to sù dut rá ngut lhê.

⁴³ Yhumsíng hpó dum taú lo é hkún, haú su kut nyi láng é dui-nhâng zoshâng gi, hkungsô wó nyi rí.

⁴⁴ Ngò, nungmoq lé teng za taí kôlé, yhumsíng hpó haú gi, yhâng é sutzè ban-shoq, dui-nhâng zoshâng haú lé ap to rá ngut lhê.

⁴⁵ Ngut kôlháng, dui-nhâng zoshâng haú gi, yhâng é i-myit unghkau má, 'Ngá é yhumsíng hpó jé lô rá gyai myáng ashí.' ga myit pyám mù, dui-nhâng zoshâng luzúm wui myiwe, yuggè lé nhuq bat é eq, zo yé shuq yé í shuq wut nyi é ngut jáng,

⁴⁶ dui-nhâng zoshâng hau é yhumsíng hpó gi, yhang a myitbyu tó é buinyi eq yhang a sé tó é ahkyíng má jé lô mù, yhang lé jap pyám luí a lumjáng bang eq rahá nyhi pyám rá ngut lhê.

⁴⁷ Yhumsíng hpó é i-myit lé sê to kôlháng, yhang ô nau é dông a cháng, rí rí le a hen tó

é dui-nhâng zoshâng gi, yhâng yhumsíng éq nhuq bat é lé, myo myo hui zo rá ngut lhê.

⁴⁸ Ngut kôlháng, a sé mù kut shut sù kúm gi, shau za bat é hui rá ngut lhê. Haú eq rajung za, Garai Gasang gi, myo shoq wó yù su chyáng mai, myo shoq dúng yù rá ngut lhê. Myo myo ap byí tó é hui su chyáng mai, je myo shoq dum dúng yù rá ngut lhê.

Nguingón Nhâng Râ A Ngut, Lhoq Kang Nhâng Râ Ru Ngut Lhé

Mht 10:34-36

⁴⁹ Ngò jé lé é gi, myigùng htoq má, myi nyé nhâng rá matú ngut lhê. Myi haú dap to láng é ngut le gi, ngò ô nau é hkyô jup byíng bê.

⁵⁰ Ngut kôlháng, ngò hkam yù rá é baptisma† rajung joq ashí, haú a hkam yù yù gi, ngò gyai yhang hkâm zo wui nyi rí.

⁵¹ Ngò jé lé é gi, myidám htoq má simsaq hkyô byi rá matú ngut nhò ngam akò lú? Haú dông a ngut, Ngò, nungmoq lé taí kôlé, byu pé lé lhoq pyô lhoq kang rá matú sheq ru ngut lhê.

⁵² Haú su mù, ahkuí mai rayhúm za má é byù ngo yuq gi, rayuq eq rayuq yhangmoq yhangchang byoq gâng lhum mù, sum yuq rahú, i yuq rahú, i yuq rahú, sum yuq rahú dut lo bùm bekò rá ngut lhê.

⁵³ Yhângwa gi, yhâng é yuqzo eq, yuqzo gi, yhângwa eq, yhângnu gi, yhâng é byizo eq, byizo gi, yhângnu eq, yhangmhoi gi, yhâng dumó eq, yhâng dumó gi, yhangmhoi eq kut, ngá é yanmai, rayuq eq rayuq byoq gâng lhum bùm bekò rá ngut lhê." ga taí rí.

Dut Lò Râ Hkyo É Kumlhá Lé Sê Gam Hkoq Râ Lhé

Mht 16:2-3; 5:25-26

⁵⁴ Hau htàng shiwa byu pé lé, Yhang taí é gi, "Nungmoq gi, buiwàng hkyam shut mhut htup é lé myáng jáng, 'Maú wo lò berá.' ga radá dâm lhaq taí taí mu akò, haú eq rajung za le, dut lò lò mu rí.

⁵⁵ Dum ngut jáng, maupyí shut má é lai lo le, 'Buí htân berá.' ga lhaq taí taí mu akò, haú eq rajung za le dut lò lò mu rí.

⁵⁶ Gegún labyoq kut bang é, nungmoq gi, myigùng eq mauhkung é kumlhá lé, sê gam hkoq yù nyi akò. Haú su ngut kò le nhíng, haí mù luí, shí ipyat má é kumlhá lé gi, a sé gam hkoq dut tó akò lú?

⁵⁷ Haú eq rajung za, haí mù haú dingmán é hkyô lé yhumsíng yhang yhang a wó do-qdân yù kó é lú?

⁵⁸ Dangké, nang lé yui tsuq sù eq rahá, tará agyi wá chyáng e ló le, hkyô má yhang eq ngon shoq byin hpyé hui yù aq. Haú a ngut jáng, yui yhumsíng gi, nang lé tará agyi chyáng é dé pyám luí, tará agyi gi, htóng hkyô su chyáng, nang lé ap pyám luí, yhang

† 12:50 Shí má é baptisma gi, Yesuq, ajung jung hpuzo mù shí hkâm é hkyô lé taí é ngut lhê.

gi, nang lé htóng má lhung pyám rā nghut lhê.

⁵⁹ Ngò, nang lé tái lé, yuichyîn haù a ban xap xap gi, htóng haù mai nàng wó htoq lò rā a nghut." ga tái ri.

13

Myit A Lhông Jáng Shi Hten Byuq Rā

¹ Haù hkùn, haù má nyi é byù ra-am gi, mauzau Pilat èq Galile byù ra-am lé sat mù yhangmoq é sui eq yhangmoq nóng jaù é hkungga lé nyhò pyám é hkyò, Yesuq lé lé tái kyo akò.

² Yesuq gi, "Galile byù haù bang haù su kut hui zo kò é yanmai, yhangmoq gi, gotú Galile byu pé banshoq htoq má, yubak je myò akò nghù, nungmoq myit ngam akò lhu?"

³ Haù su a nghut! Ngò, nungmoq lé tái kòlé, nungmoq le, myit a lhông kò é nghut le gi, banshoq bang haù eq rajung za shi hten byuq kó rā nghut lhê.

⁴ Haù htoq agó, Siloam wà má é machya gyop gyó luí, nhê sat hui é byù raxe shit yuq gi, Yerusalem wà mó má é byù banshoq bang htoq má mara je kò akò nghù, nungmoq myit ngam nyi akò lhu?

⁵ Haù su a nghut! Ngò, nungmoq lé tái kòlé, nungmoq le, myit a lhông kò é nghut le gi, banshoq bang haù eq rajung za shi hten byuq kó rā nghut lhê." ga tái ri.

⁶ Yesuq dangtú dông dum tái é gi, "Byù rayuq gi, yhâng é tsibiyiq hkyâm má, maihpáng gâm ragâm hô tô ri. Yhang agâm haù má, ashi é ho wú le, zui tô é a myàng nghut ri.

⁷ Haù hkùn, yhang gi, 'Wú aq, ngò sum zân tup maihpáng gâm haù má ashi é ho wú le, a myàng nghut ri; haù lé htuq pyám aq. Haù mù, maumyí aha agó kut yuq nhang tô lhê lhu?' ga luí, tsibiyiq hkyâm zúng sù lé tái ri.

⁸ Hkyâm zúng sù gi, 'Yhumsing è, hkúzân za gi, yuq tô wú shi sháng gaq, shigâm hau é lhinghkyuq má ngò du lhing to mù, myihpún kat luí bóm byi wú shirá.

⁹ Htang zân má ashi zui é nghut le gi, yuq to sháng gaq, ashi a zui é nghut le kúm gi, htuq pyám rā nghut lhê.' ga luí, hkyâm yhumsing lé tái ri." gâ ri.

Bánno Buinyi Má Gùng Loq Hten Sù Lé, Lhoq Gê Byi É Hkyò

¹⁰ Bánno buinyi lé, Yesuq gi, tarajong ralhum má, mhoqshit nyi ri.

¹¹ Haù hkùn, haù má raxe shit zân tup nat dap luí, gùng loq lhoq hten hui é myiwe rayuq le nyi tô ri. Yhang gi, dàngngóm luí, gungdu ratsuí lhâng a wó lhoq nyhâng lô é sù nghut ri.

¹² Yesuq gi, myiwe haù lé myàng jáng, yhâng chyáng wut yù mù, "Myiwe myhi è, nàng, nòhpyo mai gè berá." ga luí,

¹³ yhâng é ahtoq má loq ke byi ri. Haù hkùn jáng, myiwe haù gi, nyàng za dum wó yap luí, Garai Gasang lé hkya-ôn nyi ri.

¹⁴ Haù mù, Bánno buinyi lé, Yesuq nòhpyo lhoq gè byi é yanmai, tarajong má up sù gi, wú nhik-yo luí, "Mù wó zui é buinyi hkyuq nyi joq tô le, buinyi haù pé má, lé wó lhoq gè yù lhê. Haù mù, Bánno buinyi má gi, hkâkut kò." ga luí, shiwa byu pé lé tái kat ri.

¹⁵ Haù hkùn, Yhumsing Yesuq gi, "Gegùn labyoq kut bang è, nungmoq yuq hkangmó gi, Bánno buinyi lé, yhumsing é no, logúng pé lé, hkup mai hpóng htoq yù mù uchyam byi huq huq kut akò a nghut lhu?"

¹⁶ Haù nghut le gi, raxe shit zân gón Tsadán èq tui to hui é, Abraham é yhangzo yhangshu myiwe zo shi lé, Bánno buinyi má Tsadán loq mai, hkyut byi a gíng rā lhu?" ga tái ri.

¹⁷ Haù su ga tái jáng, Yhang eq i-myt shai lhum é bang banshoq gi, hoq hpù byuq bum akò. Shiwa byi banshoq bang kúm gi, Yhang kut é mauhpo amú banshoq é yanmai, gabú nyi bum bekò nghut ri.

Angshi Cham Eq Munchi Dangké

Mht 13:31-33; Mrk 4:30-32

¹⁸ Haù hkùn, Yesuq tái é gi, "Garai Gasâng é mingdán gi, hai eq wui lhê lhu? Ngò hai eq tái kè wú rā lhu?"

¹⁹ Haù gi, byù rayuq mai, yhâng é hkyâm má hô tô é angshi cham eq wui ri. Angshi cham haù gi, yuq kò lò mò agâm mó dut lò jáng, hau é akoq pé má, maulat nghoq zò pé wó zung nô yu akò." gâ ri.

²⁰ Yhang dum xoq tái é gi, "Garai Gasâng é mingdán lé, ngò hai eq tái kè wú rā lhu?"

²¹ Haù gi, myiwe zo rayuq èq sungso mún sum búng má yu nyhó luí, haù pé banshoq lé wó lhoq dau nhang é múnchi eq wui ri." gâ ri.

Chyap É Hkúmdong

Mht 7:13-14, 21-23

²² Hau htàng, Yesuq gi, Yerusalem wà mó shut lai e ló uchyang, rawà bàn rawà má wàng mù, mhoqshit byi ri.

²³ Haù hkùn, byù rayuq gi, 'Yhumsing è, hkyi yu é hui rā bang gi, shau za nghut rā lhu?' ga luí, Yesuq lé myi ri.

²⁴ Yesuq gi, "Chyap é hkúmdong mai, Garai Gasâng é mingdán má wó wàng shoq shikut keq. Hkásu mù gâ le, ngò, nungmoq lé tái kòlé, byù myo myo gi, wó wàng shoq ga shikut wú kó rā. Nghut kôlháng, a wó wàng kó rā nghut lhê.

²⁵ Yhumsing hpó,* hkum toq myhi pyám é htàng má sheq, nungmoq gi, hkúmdong

* 13:25 Yhumsing hpó gi, Garai nghut lhê. Yhùm gi, Garai é mingdán lé tái é nghut lhê.

hí má yap to mù, hkum lé kok uchyang, 'Yhumsing ê, ngamoq lé hkum hpóng byi laq ô!' ga luí, wut dung jáng, haú yuq gi, 'Nungmoq ó nghut é lé le, hkarâ é bang nghut é lé le, ngò a sé.' ga tú tai rá nghut lhê.

²⁶ Haú jáng, nungmoq gi, 'Ngamoq gi, nàng eq rahá zo wú shuq wú bê bang nghut lhê; ngamoq é wà hkyô pé má le, nàng mhoqshit byi wú bê nghut lhê.' ga tai bekô rá.

²⁷ Nghut kôhlang, yhumsing hpó kúm gi, 'Nungmoq ó nghut é lé le, hkarâ é bang nghut é lé le, ngò a sé. Age ashop dông kut é bang banshoq ê, ngá chyáng mai gâng ló byuq keq.' ga tú tai kat rá nghut lhê.

²⁸ Garai Gasâng é mingdán má, Abraham, Isak, Yakup pé eq myightoi pé banshoq bang nyi to kô é lé, nungmoq wó myâng kôhlang, nungmoq gi, shinggan shut hkat pyâm é hui luí, haú jowò má ngaubyi ngau nhap eq zui kyik kyik shoq hpuzô nyi bùm bekô rá nghut lhê.

²⁹ Hau hkûn, buihtôq, buiwàng, maupyí, mautsung má é mingdán myo myo mai byu pé lé luí, Garai Gasâng é mingdán zoshuq poi má myang zung kô rá nghut lhê.

³⁰ Haú hkûn, ahkuí htâng gyó nyí bang gi, hí bekô rá; ahkuí hí to bang gi, htâng gyó bekô rá." ga luí, yhangmoq lé tai ri.

Yerusalem Wà Mó Eq Séng Luí, Yesuq Tai É Hkyô

³¹ Haú u lé, Hparishe pé ra-am gi, Yesuq chyáng lé luí, "Shí jowò mai htoq ló byuq aq. Hkâsu mù gâ le, Herut gi, nang lé sat rá hen nyi ri." ga luí, Yhang lé tai akô.

³² Haú jáng, Yesuq gi, "'Hkû-nyí, napmá,† ngò nat gang hkat pyâm luí, nò zo hpyo zo lhoq gê byi rá nghut lhê; sum nyí ngû rá buinyi‡ má sheq, ngá mù bàn rá nghut lhê.' ngû luí, agé ashop é wamhkui haú lé ló tai kyo keq.

³³ Hai wá dut kôhlang, hkû-nyí, napmá, sânghe nyí, ngò gi, e ló rá dut ashí. Hkâsu mù gâ le, myightoi pé gi, Yerusalem wà mó mai lai luí gotú jowò má a shi wú kó nghut ri.

³⁴ Yerusalem ê, Yerusalem ê, myightoi pé lé sat pyâm pyâm kut mù, náng chyáng nhang kat é bang lé, luqgok eq dú sat sat kut é myuq nàng é, woqzng gi, yhangzó pé lé, yhang é dúng hkaú má tsing lhung yu é su, nungzó pé lé, Ngò hkâ-myhó dâm shui tsing yu nàu kôhlang, nàng a dóng nghut ri.

³⁵ Wú keq, nungmoq é yhum gi, nungmoq é matú chamchyuiyui dut pyâm to berá nghut lhê; Ngò, nungmoq lé tai kôlé; 'Yhumsing é mying mai jé lé lo é Sú gi,

hkungsô wó nyi sháng gaq.*[†] ngû, nungmoq a tai tai gi, Ngo lé wó myâng kó rá a nghut lo." ga luí, yhangmoq lé tai ri.

14

Hparishe Rayuq É Yhum Má Yesuq Jé Nyi É Hkyô

¹ Bánno buinyi ra-nyí má, Yesuq gi, zang zo rá ga Hparishe suwún rayuq é yhum má, é wang nyi tô le, haú má é bang gi, Yhang lé gyui gyui chôm wú nyi bum akô.

² Haú u lé, wui wam ana dut sú rayuq gi, Yesuq é hí má jé nyi tô ri.

³ Haú mù, Yesuq gi, "Bánno buinyi má nôhpyo lé lhoq gê byi é gi, tarâ wang lhê lú, a wang é lú?" ga luí, tarâ sará pé eq Hparishe pé lé myí kat ri.

⁴ Nghut kôhlang, yhangmoq gi, zim za dut byuq akô. Haú hkûn, Yesuq gi, nôhpyo hui sú lé, zui to mù, lhoq gê byi luí, nhang kat ri.

⁵ Hau htâng, Yesuq gi, yhangmoq lé, "Nungmoq chyáng má é rayuq yuq gi, yhumsing é yhangzo rayuq yuq, haú a nghut jáng, no myang radu du, Bánno buinyi má, wuihtung má byit gyó le, haú hkûn jáng, a xe htoq yu é za, wó nyí kó rá nghut lhê lú?" ga myí kat ri.

⁶ Yhangmoq kúm gi, dang haú hkun lé, hai le a wó tú tai kó nghut ri.

⁷ Haú hkûn, Yesuq gi, jì tô é bang jé réng é zung jowò pé hkyin yu nyi kô é lé myâng jáng, yhangmoq lé dangtú dông tai é gi,

⁸ "Byú rayuq yuq nang lé, myiháng poi má jì é nghut jáng, je réng é jowò má hkâ-é zung. Hkâsu mù gâ le, náng htoq je aróng wó sú lé le, jì to shirá abe.

⁹ Jì tô é nghut jáng gi, nungnhik lé jì tô é yhumsing hpó lé lô mù, 'Shí yuq lé jowò hui byi aq.' ga luí, náng lé lé tai jáng, nàng hoq hpu luí, hkyí htâng shut hui zung ra rá nghut lhê.

¹⁰ Haú mù luí, supé nang lé jì le, hkyí htâng má é zung aq; haú hkûn, nang lé jì sú lé mù luí, 'Buinùm hpó é, shí je réng é jowò má hui doq zung aq.' ga luí, nang lé tai jáng, nàng eq rahá zung tô é bíng lhunglhâng bâng é hí má, nàng gi, myoqdong wó rá nghut lhê.

¹¹ Hkâsu mù gâ le, yhumsing gung lé waq toq é sú ó yuq nghut kôle, lhoq nyhum pyâm é hui rá nghut lhê; yhumsing gung lé, lhoq nyhum é sú kúm gi, waq toq é hui rá nghut lhê." ga tai ri.

¹² Hau htâng, Yesuq yhang lé jì é yhumsing hpó lé tai é gi, "Napzang, a nghut jáng, myinxún lé nàng byi tso nau le gi, náng é buinùm wui, âgu âmàng pé, mungmoq wui, sùt wó é yhumkyo chang pé lé hkâjì tso. Haú bang lé jì tsô é nghut jáng gi, yhangmoq

† 13:32 Hkû-nyí, napmá gâ é gi, Yesuq mingkan htoq má mù zui rá ahkying lé tai é nghut lhê. ‡ 13:32 Sum nyí ngû rá buinyi gâ é gi, Yesuq mingkan htoq má mù ban zui é buinyi lé tai é nghut lhê. * 13:35 Hkya-on 118:26

nang lé dum jì tsô é èq, jeju dum tau kó rá nghut lhê.

¹³ Nghut kôlhang, nàng poi kut mù, byi tso byi huq nau é nghut le gi, myùng bang, hkyi gyui loq hten bang eq myoqjit é bang lé, jì tso aq.

¹⁴ Haù su kut jáng, nàng hkungsô wó nyi rá nghut lhê. Yhangmoq nang lé jeju a wó tau kôlhang, dingmân bang dum dui toq lo é buinyi má, hau é akyú lé, nàng wó hkam yù rá nghut lhê." gá ri.

Zoshuq Poi Mó Lé Dangtú Yu É Hkyô
Mht 22:1-10

¹⁵ Yesuq eq rahá zô zung tô é byù rayuq gi, dang haù wó gyo jáng, "Garai Gasâng é mingdân má é zoshuq poi má wó zo rá sù gi, hkungsô wó nyi sù nghut rá." ga luí, Yesuq lé tai ri.

¹⁶ Yesuq haù yuq lé tú tai é gi, "Byù rayuq gi, myinzang byi tso rá ga, zoshuq poi mó ralhumm hen to mù, byù myo myo lé jì tò ri.

¹⁷ Zang byi tso rá yàm jé jáng, yhâng é dui-nhâng zoshâng lé, jì tò é bâng chyáng 'Lé keq hkoí, zoshuq jin to bê.' ga é châng wut nhang ri.

¹⁸ Nghut kôlhang, haù bang banshoq gi, zoshuq poi má a é rá dông chyat he pyám akó. Rayuq sù gi, 'Ngò yohtung rahkyang wui tò lhê; haù lé é wú rá dut ri. Haù mù, ngo lé ahkáng byi shi laq.' ga yhâng lé tai ri.

¹⁹ Dum rayuq le, 'Ngò, nohtò ngo zúm wui tò lhê; haù pé lé dui nhang chyam wú rá dut ri; ngo lé ahkáng byi shi laq.' ga tai wò ho ri.

²⁰ Dum rayuq le, 'Ngò myiwe hâng tô é a myáng shi mù, a wó lé.' ga tai wò ho ri.

²¹ Haù jáng, dui-nhâng zoshâng tau lò mù, yhâng é yhumsing lé haù hkyô banshoq lò tai kyô ri. Haù hkùn, yhumsing hpó gi, nhikmó gyô yo mù, 'Wà má é hkyô mó hkyô zo hkat hkangmó má hân hân é mù luí, myùng bang, hkyi gyui loq hten bang eq myoqjit bang lé, é jì lò aq.' ga luí, yhâng é dui-nhâng zoshâng lé nhang kat ri.

²² Hau htâng má, dui-nhâng zoshâng gi, 'Yhumsing é, nàng nhang é eq rajung za ban kut bê; nghut kôlhang, zùng rá jowò gi, mân tô ashí.' ga tai ri.

²³ Haù su ga jáng, yhumsing hpó gi, 'Ngá yhùm bying rá matú, wà yàm hkyô pé eq hkyâm yàm hkyô pé má htoq é mù, myang é bang lé a wó le wó shoq é tsing shuí lò aq.

²⁴ Nang lé ngò tai lé, hí lé jì to huí é bang rayuq lhâng, ngá é zoshuq poi lé wó chyim wú rá a nghut.' ga luí, yhâng é dui-nhâng zoshâng lé tai ri." gá ri.

Yesuq É Chángzo Wó Dut Rá Matú
Mht 10:37-38; 5:13; Mrk 9:50

²⁵ Byù hpúng mó Yesuq eq rahá e ló kô é hkùn, Yesuq gi, haù bang lé lhing wú luí,

²⁶ "Ngá chyáng lé sù ó yuq nghut kôle, yhumsing é ìnu, ìwa, yhangmyi, yhangzo eq,

yhanggu, yhangmang, yhâng nhammó pé lé le, haù htoq agó, yhumsing é asak lé le, ngo lé chyitdap é htoq má je chyitdap sù gi, ngá é chángzo a wó dut.

²⁷ Yhumsing é tapzing lé a waq é za, Ngá htâng châng é sù ó yuq nghut kôle, Ngá é chángzo a wó dut.

²⁸ Dangké, nungmoq chyáng má é byù rayuq yuq, tsehtung yhùm ralhumm saí nau le, yhang gi, yhùm haù ban saí rá matú, ngùn hkâ-myhó bàn rá eq yhang wó tô é ngùn luq a luq é lé, zùng mù luí, hí a sôn wú é byù nyi kó rá lhú?

²⁹ Laqmá mù, apùn awang gi, saí hi to mù luí, a wó lhoq pân é nghut jáng,

³⁰ myàng é bang banshoq èq, 'Shí yuq gi, apùn awang gi, saí hi to mù luí, banshoq a wó saí pân lo nghut ri.' ga luí, yhang lé jóng pyám bekô rá nghut lhê.

³¹ Dangké, hkohkâm rayuq gi, gyè zan rá hen le, gyezo í mun eq lé sù hkohkâm lé, gyezo ramùn eq za lhom wó zân ùng rá, a wó zân ùng rá lé, zùng mù luí, hí a myit wú é nyi rá lhú?

³² A ùng rá dut le gi, gyè pé we we má nyi tô ashí hkùn lé, lagyo suwún pé lé nhang kat luí, simsaq rá matú htíngmâm pyám ra rá nghut lhê.

³³ Haù eq rajung za, nungmoq chyáng má é ó yuq nghut kôlhang, yhumsing wó é zè banshoq lé, a pyám to sù gi, ngá é chángzo wó dut rá a nghut.

³⁴ Xo gi, gè lhê. Nghut kôlhang, xomân kân byuq jáng gi, haù lé hai éq dum wó lhoq ngam yù rá lhú?

³⁵ Haù gi, myigung matú le, myihpún kut rá matú le, akyú a bò lo. Haù mù luí, shinggan shut kúm gi, dù pyám sê akó.

Gyo rá nohkyap dap sù gi, gyô yù sháng gaq." ga tai ri.

15

Byuq Byuq É Sau
Mht 18:12-14

¹ Ra-nyi lé, Yesuq é dang gyo kó rá ga, kang guq bang eq yubak dap bang gi, Yhâng chyáng lé zing bum akó.

² Haù hkùn, Hparishe pé eq tará sará pé gi, "Shí yuq gi, yubak dap bang lé lhom hap yù mù, yhangmoq eq rahá za, zo shuq nyi ri." ga tai put nyi bum akó.

³ Haù mù, Yesuq yhangmoq lé dangtú dông tai é gi,

⁴ "Nungmoq má, sau rashò du wó luí radu byuq byuq é nghut le, gaú xe gaú du lé yoso mhan yô má nyhi pyám to mù, byuq byuq é sau haù lé, myàng shoq a châng ho yu é, ó yuq wá nyi kó rá lhú?

⁵ Byuq byuq é sau haù lé myang hô jáng, gyaí gau é ì-myit èq goqsân htoq má bún kè chúng mù,

⁶ yhùm má jé jáng, yhâng é buinùm ji-myi wui eq, yhumkyo chang pé lé ji yù mù, 'Ngá é byuq byuq é sau lé, ngò dum myang ho yù bê, ngò eq rahá chòm gabú sháng.' ga tái rà nghut lhê.

⁷ Haù eq rajung za, Ngò, nungmoq lé tái kôlé, myit lhîng a rà é dingmán bang gaú xe gau yuq lé gabú é htoq, myit lhîng é yubak dap sù rayuq é yanmai, mauhkûng htoq má, je riyhang gabú jowò dut rà nghut lhê.

Byuq Byuq É Ngùn Chap

⁸ Dum nghut jáng, dangtú ralhùm gi, myiwe rayuq, ngùn raxê chap wó é má, rachap byuq byuq é nghut le, yhang gi, myibung tap mù rayhùm é shum luí, myang yù shoq rago za, ho wú rà a nghut lú?

⁹ Haù lé ho myàng jáng le, yhâng é buinùm ji-myi wui eq yhumkyo chang pé lé ji yù mù, 'Byuq byuq é ngá ngùn chap lé dum myang ho yù bê, ngò eq rahá chòm gabú sháng.' ga tái rà nghut lhê.

¹⁰ Haù eq rajung za, Ngò, nungmoq lé tái kôlé, myit lhîng é yubak dap sù rayuq é yanmai, Garai Gasâng é maumang lagyô pé hí má, gabú jowò dut rà nghut lhê." gâ ri.

Byuq Byuq É Yuqzo

¹¹ Yesuq xoq tái é gi, "Byù rayuq gi, yuqzo í yuq wó ri.

¹² Haù nhik má é tiq sù yuq gi, yhâng wa lé, 'Áwa ê, ngò wó gíng é sutzè, ngo lé gàm byi laq.' ga dung jáng, yhâng wa le yhangnhik tâng lé sutzè gàm byi kat ri.

¹³ Hau htâng hkâ-myháng a myáng má, yhangzo tiq sù yuq gi, sutzè banshoq hkyom yu chung mù, mau we shut é luí, haù jowò má, mingkan ngón hkyô châng é má yhang wó é ngunzè banshoq lé langså pyâm bê.

¹⁴ Haù su kut ngunzè wó mi-wó lé ban langså pyâm é htâng má, haù mau má mutmó gyo é yanmai, yhang gi, asho awui dut lo nyi bê nghut ri.

¹⁵ Haù mù, haù mau má é byù rayuq chyáng, langchyáng é kut le, haù yuq gi, yhang lé waq rêm jang shut nhang kat mù, waq lé lhom zúng nhang ri.

¹⁶ Haù hkûn, yhang gi, waq jùm zô é shi-gyang cham pé lé lháng, zo naù shoq dut kôlhang, ó yuq le a byi zo kó nghut ri.

¹⁷ Haù mù, yhang myit bún lo é gi, 'Ngá wá chyáng nyi é langchyáng pé gi, agùn agó myàng zô nyi kó rà nghut lhê. Nghut kôlhang, ngò gi, shí jowò má, zo mut wuìshit é eq shí ló rà dut bê.

¹⁸ Ahkuí, ngò toq mù, ngá wá chyáng taù ló luí, "Áwa ê, ngò gi, Garai Gasang lé le, nang lé le, shut bê.

¹⁹ Ahkuí mai ngò gi, nung zo nghù rà a gíng lo, hau é yanmai, náng é langchyáng rayuq dông za ngo lé nyi nhâng laq." nghù luí, ló tái rà." gâ ri.

²⁰ Hau htâng, yhang toq luí, yhâng wá chyáng ló le, yhang we we má ru nghut ashí hkûn mai, yhâng wa gi, yhang lé lhom myàng jáng, wú shogyo luí, din é mù, yhangzô é lingzing má é po pyik dap to luí, bopuq puq byi ri.

²¹ Haù hkûn, yhangzo gi, 'Áwa ê, ngò gi, Garai Gasang lé le, nang lé le, shut bê. Ahkuí mai, ngò gi, nung zo nghù rà a gíng lo.' ga luí, yhâng wa lé dúng tóngbán ri.

²² Yhângwa kúm gi, yhâng é langchyáng pé lé, 'Réng dik é mebu hân hân yu lé mù, yhang lé hut byi keq; yhâng é loq má, loqchyop chyop byi keq; hkyí má le hkyí-tsung tsung byi keq.

²³ Tsò myum tô é nojúng zo le yu sat keq. Haù mù, nga-nhúng gi, zoshuq poi kut mù chòm ngón sháng.

²⁴ Haù mù gâ le, ngá zo shí yuq gi, shi byuq é mai, ahkuí dum ùi bê; byuq byuq é mai le, ahkuí dum myàng bê.' ga tái ri. Haù mù, yhangmoq gi, ngón ngón zo shuq ló bekò.

²⁵ Haù u lé, yhangzo kó sù yuq kúm gi, yò má nyi tô ri. Yhang gi, yò mai yhùm shut jé lo nyi é hkûn, zìng út bat luí gó nyi é hté lé lò wó gyo ri.

²⁶ Haù mù, langchyáng rayuq lé wut yù luí, haù hkyô lé yhang myí wú le,

²⁷ langchyáng haù gi, 'Nung gu dum taù jé lò bê. Haù mù, náng wa gi, nung gu wáng wáng zán zán dum taù jé lo é lé lhom myàng luí, tsò myum tô é nojúng zo lé sat bê nghut ri.' ga tái kyô ri.

²⁸ Dang haù lé wó gyo jáng, yhang gi, gyo nhik-yò luí, yhùmkaù shut a wàng lo kut ri. Haù mù, yhâng wa htoq é luí, yhang lé é chyuq ri.

²⁹ Yhangzo kúm gi, 'Wú aq, ngò, shí-myháng shílo náng é jùn dông kut luí, hkâ-nhám le náng dang lé a lu lai wú. Nghut kôlhang, ngò ngá é luzúm wui eq ngón kún rà matú, bainám zo radu lháng radàm le nàng a byi wú shi.

³⁰ Shiwa myhí pé eq zum yap wún luí, náng é sutzè lé lhoq pân pyâm é sù nung zo haù dum taù jé lò jáng kúm gi, tsò myum tô é nojúng zo lé, yhâng é matú náng sat byi bunhung!' ga luí, yhâng wa lé tù tái ri.

³¹ Yhângwa gi, 'Ngá zo è, náng gi, hkâ-nhám le ngò eq rahá yhang nyi nyi lhê mù, ngá é sutzè joq mijoq banshoq gi, náng é chyat nghut lhê.

³² Nghut kôlhang, shí nung gu gi, shi byuq é mai ahkuí dum ùi bê; byuq byuq é mai le, dum myàng bê. Haù mù, gabú hpo nghut bê.' ga luí, yhang lé tái ri." gâ ri.

16

Hpaqchyí Ge Dá É Sùt Zum Sù

¹ Yesuq, Yhâng é chángzô pé lé tái é gi, "Sahté rayuq chyáng sùt zum sù rayuq nyi

ri. Haú yuq gi, yhâng yhumsing é sutzè pé lé jai hpyuq pyám ri ga, yhâng yhumsing é hí má, yhang lé mara lé hun akò.

² Haú hkùn, sahtê hpó gi, yhang lé wut yù mù, 'Nàng é hkyô lé ngò wó gyo bê. Haú gi, hkâsu lhú? Nàng sùt zùm é eq séng lui kut tó é jìhpán laiká lé lò shit wú aq. Hkâsu mù gâ le, ahkuí mai nàng gi, sùt zum sù wó kut lo rá a nghut lo.' ga tai ri.

³ Haú jáng, sùt zum sù gi, 'Ahkuí, ngò hkâsu kut lo rá lhú? Ngá é yhumsing gi, ngo lé sùt zum ayá mai lhoq hkyô pyám bê. Myi du myi hkop zo rá le ngò wum a bò; dung zo dung shuq rá le ngò hoq ri.

⁴ Ngo lé sùt zùm é ayá mai hkyô pyám htàng má, supé ngo lé yhangmoq é yhùm má lhom hap yù rá matú, hkâsu kut rá hkyô lé ngò sé bê.' ga wó myit rot jáng,

⁵ yhang gi, yhâng yhumsing hpó lé chyin dap tó é bang rayuq htàng rayuq lé wut yù mù, sâng-hí yuq lé, 'Ngá yhumsing hpó chyáng nàng chyin hkâ-myhó dap tó lhê lhú?' ga myi jáng,

⁶ haú yuq gi, 'Xú rashô púng dap lhê.' ga tú tai ri.

Haú jáng, sùt zum sù gi, 'Náng é jìhpán yù lui, hân zùng mù, ngo xê púng kut kâ to aq.' ga yhang lé tai ri.

⁷ Dum rayuq lé, 'Nàng hkâ-myhó dap tó lhê lhú?' ga myi jáng, haú yuq gi, 'Sungô rashô búng dap lhê.' ga tú tai ri. Sutzum sù gi, haú yuq lé, 'Náng é jìhpán má shit xê búng kut kâ to aq.' ga tai ri.

⁸ Haú a dینگmán é sùt zum sù lé, yhumsing hpó gi, hpaqchyí ge da sù nghut ri ga hkyá-ôn ri. Ngò shí lé tai é gi, mingkan zo wui gi, yhangmoq é mingkan eq séng é hkyô pé má, maubó gung é yhangzo pé* htoq hpaqchyí je bò kò é yanmai nghut lhê.

⁹ Haú mù lui, Ngò nungmoq lé tai kyo kòle, a tara é sutzè pé éq buinùm ho nyi keq, haú mù, sutzè haú htùm byuq jáng, nungmoq lé, ahtum abyuq joq tó é yhùm má, lhom hap yu é hui kó rá nghut lhê.

¹⁰ Tiq é mù má wó lum é sù ó yuq nghut kòlhang, mù mó má le wó lùm rá nghut lhê. Tiq é mù má lhum a zuí é sù ó yuq nghut kòlhang, mù mó má le lhumzui rá a nghut.

¹¹ Haú mù, mingkan sutzè má lhang nungmoq lé a wó lùm kò é nghut le gi, haú tengmán é sutzè lé, nungmoq chyáng ó yuq wá kâm ap byi rá lhú?

¹² Supé é sutzè má, nungmoq lé a wó lùm kò é nghut le gi, nungmoq sng âng é sutzè lé, nungmoq chyáng ó yuq wá kâm ap byi rá lhú?

¹³ Dui-nhâng zoshâng ó yuq nghut kòlhang, yhumsing í yuq lé wó dojaú rá a nghut. Hkâsu mù gâ le, yhang gi, rayuq lé a jú kut

mù, rayuq lé, chyitdap rá nghut lhê; haú a nghut jáng, rayuq lé gi, lhumzui mù, rayuq lé gi, hpau a tap kut rá nghut lhê. Nungmoq gi, Garai Gasang lé le, ngunzè lé le, radá dâm wó dojaú kó rá a nghut." ga tai ri.

¹⁴ Ngùn myoqmoq é Hparishe pé gi, dang haú banshoq lé wó gyo kòjáng, Yesuq lé wuizui kut pyám byi akò.

¹⁵ Haú mù lui, Yesuq gi, yhangmoq lé, "Nungmoq gi, byu pé hí má yhumsing gung lé yhumsing dینگmán bang su kut shit mhaú é bang nghut akò; nghut kòlhang, Garai Gasang gi, nungmoq é i-myt unghkaú lé sé sù nghut lhê. Byú é hí má hpaudap é pé gi, Garai Gasâng é hí má achaq achyut é nghut nyi ri.

¹⁶ Jep é tarâ† eq myiqhtoí pé é dang, ahko ahkáng wó tó é ahkying gi, wui-myhup sará Yohan jé lé é buinyi jé shoq nghut bê. Haú hkyíng mai gi, Garai Gasâng é mingdán hkyô gabú danglù lé, hko kyô nyi mù, yuq du jup gi, haú hkyô má htung chyíng wang ló bum akò.

¹⁷ Jep é tarâ má é tiq dik é dangjí eq myihkyet zo ralhüm lé wó lhoq hten rá htoq, mauhkung eq myigùng hten rá gi, je lui rá nghut lhê.

¹⁸ Dangké, yhumsing é yhangmyi lé kâng pyám mù, myiwe gotú dum hâng yu é sù ó yuq nghut kòle, su-myi lú é sù nghut bê; yhumsing é yhanglàng eq gang bê myiwe lé hâng yu é sù le, su-myi lú é sù dut bê nghut ri." ga tai ri.

Sahtê Hpó Eq Lazaruq

¹⁹ Yesuq dum xoq tai é gi, "Radám lé, sahtê rayuq gi, nè é eq nú-nhâm é mebu wut mù lui, nyi nyi bui bui zo ngón shuq ngón nyi ri.

²⁰ Yhâng é hkúmdong má gi, ragúngdú é jeq byi tó é Lazaruq gâ é dung zo sù rayuq lé, lé nyhi tó akò.

²¹ Haú yuq gi, sahtê wá é siboi mai gyó é agyó ahtàng lé, wú zò nau nyi ri. Hkuí pé le yhâng é dâm pé má, lé yoq byi nyi akò.

²² Htàng má, haú dung zo sù shi byuq jáng, maumang lagyó pé gi, mauhkung má nyi é Abraham é tanghkoí má yhang lé shuí ló byi akò. Sahtê wá le shi byuq lui, yhùm pyám bekò nghut ri.

²³ Sahtê wá gi, ngaraí ming má dik shoq hpuzò nyi mù lui, tu wú kat le, we we má Abraham lé le, yhâng é tanghkoí má é Lazaruq lé le, myàng kat ri.

²⁴ Haú mù, yhang gi, 'Áwa Abraham é, ngo lé shogyo yù laq ô. Ngò gi, shí myi htum má achyí aku nyé é hui zò nyi ri. Haú mù, Lazaruq gi, yhâng é loqnyhui ù éq wui má tik yù mù, ngá é shô má wui ra-poq zo hkálhang lé tik cham byi sháng gaq, yhang lé ngá

* 16:8 Maubó gung é yhangzò pé nghu é gi, Garai Gasâng é yhangzò pé lé tai é nghut lhê. † 16:16 Jep é tarâ gâ é gi, Garai Gasang, Mosheq mai nga-nhúng lé byi tó é tarâ lé gâ lhê.

chyang nhang kat byi laq ô! ga lui, dung wut nyi ri.

²⁵ Haú hkûn, Abraham gi, 'Ngá zo ê, asak dui tô é u lé, nang nyi ngón yuqyo tô é hkûn, Lazaruq gi, asho awui dut é lé, bún nyi aq. Ahkuú, yhang kúm gi, shí má lo nyi byán to bê; nang chyaú gi, jamjau hui zô nyi bê.

²⁶ Haú mai gotú gi, shí mai nungmoq chyáng dap lé naú bang a wó dap shoq le, haú mai ngamoq chyáng ó a wó dap lé rá matú le, ngamoq eq nungmoq é gyoro má, nik dik é langhkung mó eq kyo pyâm to bê nghut ri.' ga tú tai ri.

²⁷ Sahtê wá gi, 'Áwa ê, haú nghut le gi, ngò, nang lé dung nau ri. Ngá gú pé ngo yuq nyi ashí; yhangmoq le ísu hpuzô é jowô má a je sháng gaq.

²⁸ yhangmoq myit lhing shoq ló tai pun rá matú, Lazaruq lé ngá wá yhúm shut nhang kat byi laq ô! ga lui, dung wut ngau nyi ri.

²⁹ Abraham gi, 'Yhangmoq chyáng, Mosheq eq myiqhtoí pé nyi lhê; haú bang dang lé gyô yù kó sháng gaq.' ga tai ri.

³⁰ Sahtê wá gi, 'Áwa Abraham ê, haú su a nghut. Shí byuq é bang má é rayuq yuq yhangmoq chyáng dum taú lo é nghut le kúm gi, yhangmoq myit lhing kó rá nghut lhê.' ga tai ri.

³¹ Abraham gi, 'Mosheq eq myiqhtoí pé é dang lé yhangmoq a gyo kô é nghut le gi, shí byuq é bang má é rayuq yuq dum dui toq ló mù, ló tai kyo kôhang, kám gyo kó rá a nghut.' ga lui, yhang lé tú tai ri." gá ri.

17

*Mara Hkyut É Hkyô Eq Lumjng Myit
Mht 18:6-7, 21-22; Mrk 9:42*

¹ Yesuq, Yhâng chángzô pé lé tai é gi, "Byu pé lé mara kut shut nhang é hkyô gi, joq htoq lô rá za nghut lhê. Nghut kôhang, mara kut shut nhang é hkyô lé lhoq htoq é sù gi, dingnyé wó rá.

² Zoshâng shí bang má é rayuq lé, mara kut shut nhang é sù gi, yhâng é lingzing má luqlú long mó tuí hut byi lui, wuimau má é dú hkyô pyâm é huí é nghut le gi, yhang é matú je gè rá nghut lhê.

³ Nungmoq gi, yhumsing gung yhumsing sidiq keq.

Nunggu nungmang nang lé mara kut shut é nghut le gi, yhang lé tan lui, mhoqshit aq; yhang myit lhing é nghut le gi, yhang lé mara hkyut pyâm byi aq.

⁴ Ra-nyí má za, yhang nang lé nyhit dâm shut mù, 'Ngò myit lhing bê.' ga lui, nang lé nyhit dâm dum tôngbán le, tôngbán hkangmó, nang, yhâng é mara lé hkyut pyâm byi aq." gá ri.

⁵ Haú hkûn, lagyô pé gi, "Ngamoq é lumjng myit lé lhoq ko byi laq." ga Yhumsing lé dung akô.

⁶ Haú jáng, Yhumsing gi, "Nungmoq é lumjng myit angshí cham í za hkálhâng bò kô é nghut le gi, shí hangwá gam lé, 'Sikgâm é, amyit eq roq bún lui, wuishuq lung-aú má, é yuq to aq ô.' gá le, nungmoq é dang lé sikgâm haú gyo byi rá nghut lhê.

⁷ Dangké, nungmoq má é rayuq yuq chyáng, yò hpuq é, a nghut jáng, sau zung é dui-nhâng zoshâng rayuq nyi é nghut le, dui-nhâng zoshâng haú yohtung pá mai je lo é hkûn, yhang lé, 'Hân zung mù zang zo aq.' ga lui, ó yuq wá tai kó rá thú?

⁸ Haú dui-nhâng zoshâng lé sheq, 'Ngò zo rá myinzang lajang aq. Ngò bàn zo shoq hpyidum má hpyihit hit mù, xun zang wú nyi aq. Ngò bàn zo jáng sheq nang wó zo rá nghut lhê.' ga lui, tai rá a nghut kó thú?

⁹ Tai mitái banshoq lé, dui-nhâng zoshâng ban zui sai byí é nghut kôhang, yhang lé jeju bún é dang ó yuq wá tai wú akó thú?

¹⁰ Haú eq rajung za, nungmoq gi, tai mitái ban kut jáng sheq, 'Nga-nhúng gi, jeju bun a gíng é dui-nhâng zoshâng pé nghut nyi lhê; kut rá é mù lé za lhoq pân é bang nghut lhê.' nghú tai keq." ga tai ri.

Manggâm Dap Bang Raxê Yuq Lé, Yesuq Lhoq Gé Byí É Hkyô

¹¹ Ahkuú, Yesuq gi, Yerusalem wá mó shut e ló nyi le, Samariq mau eq Galile mau gyoro mai lai e ló ri.

¹² Yhang, wá rawá shut wang ló é hkûn, manggâm dap é byu raxê yuq eq huí ri. Haú bang gi, we mai yap to mù, Yesuq lé,

¹³ "Yesuq, Zau é, ngamoq lé shogyô yù laq ô." ga lui, wut garú bum akó.

¹⁴ Yesuq gi, yhangmoq lé myàng jáng, "Nungmoq é gungdu lé, hkyangjông pé chyáng ló tún shit keq." ga yhangmoq lé tai ri. Yhangmoq gi, hkyô má ru só nyi ashí le lháng, sân-yúng ló byuq bekô.

¹⁵ Yhangmoq chyáng má é rayuq gi, yhumsing gungdu ge byuq é lé myàng jáng, Yesuq chyáng dum taú é mù, hê mó eq Garai Gasang lé hkya-ôn é eq,

¹⁶ Yesuq é hkyí wang má paí gop to lui, Yhang lé jeju hkya-ôn nyi ri. Haú yuq gi, Samariq byu nghut ri.

¹⁷ Haú mù, Yesuq gi, "Sân-yúng byuq é gi, raxê yuq a nghut thú? Gau yuq gi, hká ló byuq bekô?

¹⁸ Shí tângbau rayuq mai lai lui, dum taú lé mù Garai Gasang lé hkya-ôn é byu, rayuq le a nyi lo kó thú?" ga tai ri.

¹⁹ Hau htâng, Yesuq gi, haú yuq lé, "Toq mù lo aq, nang é lumjng myit gi, nang lé lhoq sân-yúng byi bê nghut ri." ga tai ri.

*Garai Gasang É Mingdán Jé Lô Rá Hkyô
Mht 24:23-28, 37-41*

²⁰ Radám lé, Hparishe pé gi, Garai Gasang é mingdán hká-nhám je rá hkyô, Yesuq lé myí akó. Haú jáng, Yesuq gi, "Garai Gasang

é mingdán jé lé rã gi, myoq eq wú luí myàng rã a nghut.

²¹ Garai Gasâng é mingdán gi, nungmoq yuq jup é ahkaú má nghut nyi é yanmai, 'Wú keq, shí má joq ri, mhó má joq ri.' ga luí le, byu pé gi, wó tái kó rã a nghut." ga luí, yhangmoq lé tú tái ri.

²² Chángzô pé lé le Yesuq tái é gi, "Haú Byu Yhangzô é buinyi ra-nyí lé, nungmoq myàng nau dik é ahkyíng jé rã. Nghut kôlhang, nungmoq gi, Byu Yhangzô lé wó myàng kó rã a nghut.

²³ Haú buinyi má, byu pé gi, nungmoq lé, 'Yhang shí má nyi ri.' haú a nghut jáng, 'Yhang hê má nyi ri.' ga tái kó rã a nghut lhê. Nghut kôlhang, hkâ-ê; hkácháng kó.

²⁴ Hkâsu mù gâ le, maumyí rahkyam má hpyat é maulhap gi, maumyí gó hkyam jé shoq duqbó é su, haú Byu Yhangzô dum jé lé é buinyi má le dut rã nghut lhê.

²⁵ Nghut kôlhang, haú su a dut htoq shimá, Yhang gi, zing-rí é myo myo lé le, ipyat shi má é byu pé eq hê-ngik pyám é lé le, hui shirã nghut lhê.

²⁶ Noaq é tsín pyat má dut é su, haú Byu Yhangzô jé lé é buinyi má le dut rã nghut lhê.

²⁷ Byu pé gi, Noaq, wui-sanghpo mó hkaú má wang é hkún jé shoq, zo zo shuq shuq, myi byi myi yú, myiháng kut luí, nyi nyi bum akó. Haú hkún, dowú dǐng lô mù, yhangmoq banshoq lé lo lhoq htên pyám bẽ nghut ri.

²⁸ Haú eq rajung za, Lot é pyat má le, byu pé gi, zo mù, shuq mù, ngo zo wui zo, ho zo ho shuq, yhùm kut luí nyi nyi akó.

²⁹ Nghut kôlhang, Sodom wá mai Lot htoq lô é buinyi má, mauhkúng mai, myi eq hang gi, mau su wò gyó lô luí, lunglhang lé lhoq htên pyám bẽ nghut ri.

³⁰ Haú Byu Yhangzô, lé htoq shit é buinyi má le, haú eq rajung za dut rã nghut lhê.

³¹ Haú buinyi má, yhumhkúng* htoq má nyi tô é sũ gi, yhùmkaú má é zè lé, a lô gyó wang yú lo sháng gaq. Yò má nyi tô é sũ gi, haú eq rajung za, yhùm shut a taú lô lo sháng gaq.

³² Lot é yhangmyi† lé bũn nyi keq.

³³ Yhumsing é asak duí hkyô hõ sũ ó yuq nghut kôle, asak sum rã nghut lhê; asak sum pyám é sũ kúm gi, asak wó duí rã nghut lhê.

³⁴ Ngò, nungmoq lé tái kyo kôlé, haú myín lé, yhupjang ralhum má byú í yuq nyi to kô le, rayuq gi, shuí yu é hui mù, rayuq gi, myit gyó to rã nghut lhê.

³⁵ Myiwe í yuq luí má rahá za chòm luí nyi tô le; rayuq gi, shuí yu é hui mù, rayuq gi, myit gyó pyám to rã nghut lhê.

³⁶ Yohtung má byú í yuq nyi to le, rayuq gi, shuí yu é hui luí, rayuq gi, myit gyó pyám to berã nghut lhê." gâ ri.

³⁷ Haú hkún, chángzô pé gi, "Yhumsing Yesuq ê, haú gi, hká gyo má dut rã lúh?" ga luí, Yesuq lé myi kôjáng, Yhang gi, "Màng leq é jang má, langdã pé, lé zing bũm rã nghut lhê." ga luí, yhangmoq lé tú tái ri.

18

Chuimó Myhí Eq Tarã Agyi É Hkyô Lé Dangtú Yú É Hkyô

¹ Yesuq, Yhâng é chángzô pé lé, myit wum a gyuí é za, hkâ-nhám le kyúdũng nyi rã hkyô lé, dangtú dõng mhoqshit é gi,

² "Wá rawã má, Garai Gasang lé le a gyuq hoq, byú lé le haí su a ngãm é tarã agyi rayuq nyi ri.

³ Haú wã má chuimó myhí rayuq le nyi ri. Yhang gi, haú tarã agyi wá chyáng é luí, 'Ngò eq amũ htoq sũ lé, yhâng é mara eq rajung za, jéyáng byi laq.' ga luí, é dum tái tái kut nyi ri.

⁴ Nghut kôlhang, tarã agyi wá gi, ahkyíng rayoq zo jé shoq tarã a jéyáng byí é tô tô ri. Hau htàng má, yhang gi, 'Ngò, Garai Gasang lé le a gyuq a hoq, byú lé le haí su a ngãm,

⁵ nghut kôlhang, chuimó myhí shí yuq é amũ lé, ngò a jéyáng a doqdan byí é nghut le gi, yhang dum lé lé kut mù, ngo lé myit hpèbũ nhâng rã dut ri. Haú mù, ngò yhâng é amũ lé jéyáng byi rã.' ga, yhâng é unghkaú má myit yu ri." gâ ri.

⁶ Haú mù luí, Yhumsing Yesuq gi, "A dǐng a mán é tarã agyi wá tái é dang mai mhoq yú keq.

⁷ Garai Gasang gi, Yhang lé nyí myín wut dũng nyi é, Yhang hkyin yu to bẽ bang lé, tarã é dõng a kut byí é gi, myáng myáng nyi to rã lúh?"

⁸ Ngò, nungmoq lé tái kôlé, Garai Gasang gi, yhangmoq lé hân yhang tengmán é dõng jéyáng byi berã nghut lhê. Nghut kôlhang, haú Byu Yhangzô jé lé é buinyi má, lumjing hkyô lé gi, mingkan htoq má myang wú shirã lúh?" ga tái ri.

Hparishe Eq Kang Guq Sũ Kyúdũng É Hkyô

⁹ Yhumsing gũng lé dǐngmán bun luí, byú góbang lé wú tiq é bang ra-am lé, Yesuq dangtú dõng tái é gi,

¹⁰ "Byú í yuq kyúdũng kó rã ga, noqkuq yhùm má doq é akó. Rayuq gi, Hparishe, rayuq gi, kang guq sũ nghut ri.

¹¹ Hparishe hpó gi, yap to luí, 'Garai Gasang é, ngò gi, byú góbang su lú zo lú shuq é hkyô le a kut, agé ashop é hkyô le a cháng, su-myi le a lú é htoq agó, shi kang guq sũ su

* 17:31 Yudaq byu pé é yhumhkúng gi, rá é nghut lhê mù, nyi kún jang kut akó. † 17:32 Lot é yhangmyi gi, Sodom wá shut dum taú lǐng wú é yanmai, Garai Gasang lhoq hten pyám é hui sũ nghut lhê.

le, a nghut é yanmai, ngò nàng lé jeju bûn lhê ô!

¹² Ngò gi, rabat má zoshuq í dâm gám nyi lhê; ngò wó yu é gû mà é xê gambùm ragambùm le kat nyi lhê." ga luí, yhang baú yhang gotú kut dúng nyi ri.

¹³ Kang guq sù kúm gi, we we má yap to mù, mauhkúng shut lháng a wám tu wú é za, wànggàng bat luí, 'Garai Gasang é, shí yubak dap sù ngo lé, shogyò yù laq ò!' ga dúng ri.

¹⁴ Ngò, nungmoq lé tai kôlé, kang guq sù kúm gi, Garai Gasang é hí má mara hkyut san byí é lé wó yù luí, yhúm shut dum tau lò bê; nghut kôlháng, Hparishe wá gi, a wó nghut ri. Hkásu mù gà le, yhumsing gúng lé waq toq sù ó yuq nghut kôle, lhoq nyhum pyám é hui rá nghut lhê; yhumsing gúng lé lhoq nyhum é sù kúm gi, waq toq é hui rá nghut lhê." ga tai ri.

Zoshâng Wuí Lé Yesuq Shimân Byí É Hkyô
Mht 19:13-15; Mrk 10:13-16

¹⁵ Byu pé gi, zonú wuí lé Yesuq záng htung byi sháng gaq ga, Yhâng chyáng shuí lé lo bum akò. Chángzò pé gi, haú lé myàng jáng, lhom tân hkùm akò nghut ri.

¹⁶ Nghut kôlháng, Yesuq gi, zoshâng wuí lé, wut yù luí, "Haú zoshâng wuí lé, Ngá chyáng lé nhâng keq; yhangmoq lé hkâhkùm zing to kò; hkásu mù gà le, Garai Gasang é mingdán gi, haú sù é bâng é mingdán ru nghut lhê.

¹⁷ Ngò, nungmoq lé teng za tai kôlé, Garai Gasang é mingdán lé, zoshâng su kut a lhom hap yu é nghut le gi, mingdán haú má gè gè yhang wó wàng rá a nghut." ga tai ri.

Ayá Wó É Sacht Hpó
Mht 19:16-30; Mrk 10:17-31

¹⁸ Ayá wó é byu rayuq le, Yesuq lé, "Ge é Sará é, ahtum abyuq é asak wó yù rá matú, ngò hai kut ra rá lhú?" ga myí ri.

¹⁹ Yesuq gi, "Hai mù, Ngo lé ge é Sará nghu lhê lhú? Garai Gasang mai lai luí, ge é ó yuq le a nyi.

²⁰ Jep é tará má, 'Su-myi sulàng hkálu, byù hkásat, hkâhkau, a teng a mán é saksé hkâhkám, nángnu nángwa lé hkungga aq.'¹⁸ gá é dang pé lé, nàng sé gû bê." ga luí, yhang lé tú tai ri.

²¹ Haú yuq gi, "Haú pé banshoq lé, ngò, zoshâng hkùn mai cháng bê nghut lhê." ga tai ri.

²² Yesuq gi, dang haú lé wó gyo jáng, "Nàng kut rá rajung rá tò ashí; nàng wó miwó lé ùng pyám luí, myùng bang lé byí pyám aq; haú jáng, nàng, mauhkúng htoq má sutzè wó rá nghut lhê; haú mù, Ngá htàng lé cháng aq." ga luí, yhang lé tai ri.

²³ Haú yuq gi, dang haú lé wó gyo jáng, sutzè gyai wó sù nghut é yanmai, gyai yhang myit a ngón dut byuq ri.

²⁴ Yesuq gi, haú yuq lé wú luí, "Sutzè wó bang gi, Garai Gasang é mingdán má wàng rá matú, haú-í yhang wuí ri-nhung!

²⁵ Sutzè wó sù rayuq, Garai Gasang é mingdán má wó wàng rá htoq, gola-uq radu ápno mai wó wang lai rá gi, je lui rá nghut lhê." ga tai ri.

²⁶ Dang haú lé wó gyô é bang gi, "Haú su ru nghut le gi, ó yuq za hkyi yu é hui rá nghut lhê lhú?" ga myí bum akò nghut ri.

²⁷ Haú hkùn, Yesuq gi, "Byù a wó kut é hkyô lé, Garai Gasang gi, wó kut lhê." ga tai kyô ri.

²⁸ Haú hkùn, Petruq gi, Yesuq lé, "Wú aq, ngamoq gi, wó miwó tò pyám to luí, Náng htàng cháng bê nghut lhê." ga tai jáng,

²⁹ Yesuq gi, "Ngò, nungmoq lé teng za tai kôlé, Garai Gasang é mingdán é yanmai, yhumsing é yhúm, yhumsing é yhangmyí, yhumsing é águ âmang, yhumsing é ínu íwa, yhumsing é yhangzò pé lé, pyám to sù ó yuq nghut kôle,

³⁰ shí pyat má, akyú myo myo wó hkam yù rá htoq agó, htang pyat má le, ahtum abyuq é asak a wó yu é gi, a nyi rá nghut lhê." ga luí, yhangmoq lé tai ri.

Yesuq, Yhang Shí Hkám Rá Lé Dum Tai É
Hkyô

Mht 20:29-34; Mrk 10:46-52

³¹ Yesuq gi, Yhâng é lagyô pé raxe í yuq lé gotú kut wut yù mù, "Gyô wú keq, nganhung gi, Yerusalem wá mó shut doq lò nyi é nghut lhê. Haú má jé jáng, haú Byu Yhangzo eq séng luí, myiqhtoí pé ká tò é banshoq gi, dik lò berá nghut lhê.

³² Hkásu mù gà le, Byu Yhangzo gi, tungbaú pé é loq má ap pyám é hui luí, haú bâng éq Yhang lé, wuizui kut pyám é, rhoi rip e, sôkan byé gyún é, nhuq bat é kut yù mù, sat pyám kó rá nghut lhê.

³³ Hau htàng sum nyí nghú rá buinyi má, Yhang gi, dum dui toq lò rá nghut lhê." ga luí, yhangmoq lé tai ri.

³⁴ Lagyo pé gi, dang haú pé rahkun lé lháng a sé gyo kó; dang hau é lichyúm gi, yhangmoq é hí má zaú nghop tò é nghut é yanmai, Yhang hai tai nyi é hkyô pé lé yhangmoq a sé kó nghut ri.

Dung Zo É Myoqjit Sù Lé, Yesuq, Myoq
Dum Myàng Nhang É Hkyô

³⁵ Ahkuí, Yesuq Yerihko wá nàm má jé lo nyi le, myoqjit é byu rayuq gi, hkyô yàm má zùng mù, dung zò nyi ri.

³⁶ Yhang gi, byù rajum rayò sô lai ló é hté lé wó gyo jáng, haú hai dut nyi é hkyô lé, myi kat ri.

³⁷ Haú hkùn, yhangmoq gi, "Nazaret wá byù Yesuq lai ló ri." ga luí, yhang lé tai kyo akò.

³⁸ Haù su gâ é lé wó gyo jáng, yhang gi, "Dawiq é Yhangzo Yesuq é, ngo lé shogyo yù laq ô!" ga wut dúng kat ri.

³⁹ Hí má lai ló é bang gi, zim za nyi rá matú yhang lé tân hkûm akò; nghut kôhlang, yhang gi, "Dawiq é Yhangzo é, ngo lé shogyo yù laq ô!" ga, je riyhang htê mó o mó èq wut dúng kat ri.

⁴⁰ Haù mù, Yesuq gi, yap kat mù, byù haù yuq lé Yhâng chyáng shuí lé lô nhang kat ri. Myoqjit sù Yhâng nàm má jé lé jáng, Yesuq gi,

⁴¹ "Ngò, nàng lé haù kut byi rá ô nau ri lhú?" ga, yhang lé myi kat ri.

Haù yuq gi, "Yhumsing é, ngo myoq myàng nau ri." ga tú tai ri.

⁴² Haù hkûn, Yesuq gi, "Náng myoq myàng sháng gaq! Náng é lumjing myit gi, nang lé lhoq gè byi bê nghut ri." ga, yhang lé tai ri.

⁴³ Haù yuq gi, haù hkûn jáng, yhang myoq wó myàng mù, Garai Gasang lé hkya-on uchyang Yesuq htàng cháng bê. Lhunglhang bang haù lé myàng kôjáng, Garai Gasang lé hkya-on nyi bum akò.

19

Yesuq Eq Zake

¹ Yesuq gi, Yerihko wà má wàng mù, sô lai lô nyi ri.

² Haù hkûn, haù wà má, Zake gâ é kang guq agyi rayuq nyi ri; haù yuq gi, sutzè wó sù nghut ri.

³ Yhang gi, Yesuq hká yuq nghut é lé myàng nau kôhlang, nyhûm sù nghut é htoq agó, byù rajum rayó chyin chyap tô é yan-mai, a wó myàng nghut ri.

⁴ Haù mù, yhang gi, Yesuq lé wó myàng shoq ga, Yesuq lai lô rá hkyô hí shut din é mù, hkohum gâm htoq má é doq zung tô ri.

⁵ Yesuq gi, haù jowò má jé jáng, tu wú kat lui, "Zake é, hân gyó lô aq; hkû-nyi ngò náng yhûm má bing rá nghut lhê." ga tai ri.

⁶ Haù jáng, Zake gi, hân hân gyó lô mù, gabú dik é èq Yesuq lé lhom hkulum yu ri.

⁷ Haù má nyi bang banshoq gi, haù lé myàng jáng, "Yhang gi, yubak dap sù rayuq chyáng bing kut rá ga wang e lô bê." ga lui, mara hân dang tai nyi bum akò.

⁸ Zake kúm gi, toq yap mù, "Yhumsing Yesuq é, ngo wó é sutzè rawui gù myung bang lé gâm byi pyám rá; ngò záng mop zô pyám é byù rayuq yuq nyi le gi, myi tú dum tau byi rá." ga Yhumsing Yesuq lé tai ri.

⁹ Haù hkûn, Yesuq gi, "Shí yuq le, Abraham é yhangzo* rayuq nghut é yanmai, hkû-nyi shí yhûm má hkyi yù hkyô jé bê,

¹⁰ hkâsu mù gâ le, haù Byu Yhangzo gi, byuq byuq bê bang lé, hkat hò mù hkyi yù rá matú, jé lé sù nghut lhê." ga lui, Zake lé tai ri.

Hkohkam É Dui-nhâng Zoshâng Raxê Yuq Mht 25:14-30

¹¹ Haù hkyô lé, yhangmoq gyô nyi bùm kô é hkûn, Yesuq gi, Yerusalem wà mó má jé rá chyâng lò bê nghut é yanmai le, Garai Gasang é mingdán gi, radá dâm htoq shit lô berá ga, byu pé myit ngam tô bùm kô é yanmai le, dangtú ralhum đông dum tai jat é gi,

¹² "Aróng wó sù byù rayuq gi, hkohkâm ayá é hkam yù lui, dum tau lò rá ga, wé é ming shut é rá matú hen nyi ri.

¹³ Haù mù, yhang gi, Yhâng é dui-nhâng zoshâng raxê yuq lé wut yù mù, rayuq lé ngùn rajoi joi ap byi lui, 'Ngò dum tau jé lô shoq, shi èq hpugá gá nyi láng keq.' ga lui, yhangmoq lé pying tô ri.

¹⁴ Yhâng é mingbyù wui kúm gi, yhang lé a ngui bum é nghut mù lui, yhang e lô é htàng má, 'Shí yuq ngamoq ahtoq má up nyi rá lé, ngamoq a ô nau.' ga lui, é tai rá matú lagyo cháng nhang kat akò.

¹⁵ Nghut kôhlang, yhang kúm gi, hkohkâm ayá wó hkam yù lui, dum tau jé lô jáng, yhang ngùn ap byi tô é dui-nhâng zoshâng wui lé, hpugá gá lui, amyat hkâ-myhó wó ho jat bê hkyô lé sé nau lui, yhangmoq lé wut nhang kat ri.

¹⁶ Haù hkûn, sâng-hi yuq gi, lé mù lui, 'Yhumsing é, ngò, náng é ngùn rajoi mai, amyat raxê joi wó ho jat yù bê.' ga tai ri.

¹⁷ Haù hkûn, yhumsing hpó gi, 'Ará! Nghut bê, kyet é dui-nhâng zoshâng é, náng gi, je tiq é mú má lhang wó lum é sù nghut é yanmai, wà raxê lé ujo lo aq hkoi.' ga lui, yhang lé tai ri.

¹⁸ Htang yuq le, lé mù lui, 'Yhumsing é, ngò, náng é ngùn rajoi mai, amyat ngo joi wó ho jat yù bê.' gâ ri.

¹⁹ Yhumsing gi, haù yuq lé, 'Náng gi, wà ngo wà lé up lo aq hkoi.' ga tai ri.

²⁰ Dum rayuq le, lé mù lui, 'Yhumsing é, náng é ngùn rajoi lé a byuq shoq, ngò panchoq èq htop tô lhê; wú aq, shí nghut lhê.

²¹ Náng gi, yhumsing yhang a tô tô é zè pé lé yù nau é eq, yhumsing yhang a hô tô é yò mai yâm yù nau é sù, byù wui nghut é yanmai, nang lé ngò gyuq ri.' ga tai ri.

²² Haù hkûn, yhumsing gi, 'Agé ashop é dui-nhâng zoshâng é, náng nhut má é dang eq rajung za, ngò, nang lé jéyáng rá nghut lhê. Ngò gi, yhumsing yhang a tô tô é zè pé lé yù nau é eq, yhumsing yhang a hô tô é yò mai yâm yù nau é sù, byù wui nghut é hkyô lé, náng sê to gù nghut le nhing,

²³ ngá ngùn lé, ngò dum tau jé lô jáng, aráng eq amyat wó yù shoq, ngùn hpún kat jang má, haù mù a kat tô é lhú? ga yhang lé tai ri.

* 19:9 Abraham é yhangzo ngò é lichyum gi, Abraham su Garai Gasang lé lumjing é sù lé gâ lhê.

²⁴ Hau htâng, yhumsing hpó gi, ayàm má yap tó é bang lé, 'Haù ngùn rajoi lé yhang chyáng mai taù yù luí, raxê joí wó sù lé jat byi keq.' ga tai ri.

²⁵ Haù bang gi, 'Yhumsing ê, yhang gi, raxê joí wó to bê lé nhing.' ga akô.

²⁶ Haù jáng, yhang gi, 'Ngò, nungmoq lé tai kôlé, wó sù' ó yuq le, jat byi é hui shirâ nghut lhê; a wó su chyáng mai kúm gi, yhang wó tó é lé lháng, yu pyám byi shirâ nghut lhê.

²⁷ Ahkuí, yhangmoq ahtoq má ngò hkohkâm kut rá lé a ô nau é, ngá é gyè pé lé, shí má shuí lé mù, ngá hí má sat pyám keq.' ga hkûnmó hkyô kat ri." gâ ri.

Yesuq Logúng Ji Mù, Yerusalem Wà Mó Shut Wang E Ló É Hkyô

Mht 21:1-11; Mrk 11:1-11; Yhn 12:12-19

²⁸ Yesuq gi, shí hkyô pé lé ban tai jáng, hí má so luí, Yerusalem wà mó shut doq ló nyi ri.

²⁹ Yesuq gi, Yhâng é chángzò pé eq Tsanlun Bùm má é Bethpage wà eq Behtani wà má jé ló kojáng, Yhâng é chángzo í yuq lé,

³⁰ "Nungnhik, hí má é wà má é keq; wà haù má wang é hkûn jáng, ó le a jì wú shí é logúng zo tuí tó láng é lé, ê myàng kó rá nghut lhê; haù lé hpyi yù mù, Ngá chyáng she lò keq.

³¹ Byù rayuq yuq mai, 'Haù haí mù hpyi nyi akô?' ga nungnhik lé myi kôjáng, 'Shí du lé, haù Yhumsing rá ri gâ.' nghú tú tai keq." ga pying luí, nhang kat ri.

³² Nhang kat é sù nhik ê jé lé, Yesuq tai kat é đông yhang, dut to láng é lé é myàng akô.

³³ Yhangnhik logúng zo haù lé hpyi nyi kô é hkûn, yhumsing wui gi, "Haù logúng zo lé, haí mù hpyi nyi akô lhú?" ga luí, yhangnhik lé myi akô.

³⁴ Haù jáng, yhangnhik gi, "Shí du lé haù Yhumsing rá ri gâ." ga tai akô.

³⁵ Yhangnhik gi, haù logúng zo lé Yesuq chyáng she lò mù, yhangmoq é buhîng pé lé logúng ahtoq má buí luí, Yesuq lé doq jì nhang akô.

³⁶ Haù su kut, Yhang jì e ló nyi le, byu pé gi, yhangmoq é buhîng pé lé hkyô má hkang byi akô.

³⁷ Ahkuí, Tsanlun Bùm hkêgyó gyó ló é jowò eq chyáng lo é mai gi, chángzò pé banshoq bang, yhangmoq myang é laklai kumlhá pé é yanmai, gabú myit mai htê mó o mó eq Garai Gasang lé hkya-on kô é dang gi,

³⁸ "Haù Yhumsing é mying mai jé lé lo é hkohkâm gi, hkungsò wó nyi sháng gaq ô![†] Mauhkung htoq má, ngu-ingón nyi sháng gaq ô!

Htoq tsáng myhâng má, Garai Gasang gi, hpungwup shing kang bo nyi sháng gaq ô!"

gâ akô.

³⁹ Haù mù luí, haù byù hpung hkaù má bo é Hparishe pé ra-am gi, "Sarâ é, náng é chángzò pé lé tân pyám aq." ga luí, Yesuq lé tai akô.

⁴⁰ Haù hkûn, Yesuq gi, "Ngò, nungmoq lé tai kôlé, shí bang zim za nyi kó é nghut le gi, luqgok pé garú lò rá nghut lhê." ga tú tai ri.

⁴¹ Ahkuí, Yesuq, Yerusalem wà mó eq chyáng lò luí, wà mó haù lé myàng jáng, haù wà mó é matú ngau mù, tai é gi,

⁴² "Wà náng ê! Hkû-nyi lhê é buinyi má, nguingón é hkyô lé náng bûn sé tó é nghut le gi, gè rá wá! Ahkuí kúm gi, haù hkyô lé nghop to bê nghut mù luí, náng a sé lo nghut ri.

⁴³ Hkâsu mù gâ le, náng chyáng Garai Gasang lé kúm jé é hkûn, náng a bun a sé wú kat é yanmai, náng é gyè pé gi, awui ayàm má gyewap xuq mù, náng é lhing hkyuq mai nang lé lom tó é buinyi jé lò rá nghut lhê.

⁴⁴ Haù hkûn, nang lé lhoq htên pyám luí, nung zo pé lé le, haù hkaù má yhang dùn nhê pyet sat pyám bekò rá; náng gi, luqgok racham htoq má racham lháng a kê lum loshoq, dut byuq rá nghut lhê." gâ ri.

Yesuq, Noqkuq Yhùm Lé Sêng Pyám É Hkyô

Mht 21:12-17; Mrk 11:15-19; Yhn 2:13-22

⁴⁵ Ahkuí, Yesuq gi, Yerusalem noqkuq yhùm má wàng mù, ung zo ung shoq é bang lé, "Ngá yhùm gi, kytdung yhùm dut rá nghut lhê."[‡] ga kâ to kôlháng,

⁴⁶ nungmoq gi, jowò shí lé 'damaq hkyúng'[†] kut akô." ga tai uchyang, hkat htoq pyám ri.

⁴⁷ Yhang gi, nyi wui noqkuq yhùm má mhoqshit nyi ri. Hkyangjong agyi pé, tarâ sarâ pé eq, byu pé é suwún yu kúm gi, Yhang lé wó sat pyám rá hkyô ho nyi akô.

⁴⁸ Nghut kôlháng, byù banshoq bang gi, Yhâng mhoqshit é dang lé gyo nau nyi kó é yanmai, wó sat rá hkyô lé, a myang hô kó nghut ri.

20

Yesuq É Ahko Ahkáng Lé Myi Chyam Wú É Hkyô

Mht 21:23-27; Mrk 11:27-33

¹ Ra-nyi lé, Yesuq gi, noqkuq yhùm wàng hkaù má, byu pé lé mhoqshit nyi é eq, gabú danglù hko kyô nyi é hkûn, hkyangjong agyi pé gi, tarâ sarâ pé, suwún wui eq rahá kut, Yhâng chyáng lé jé kômù,

[†] 19:26 Wó sù nghu é gi, yhumsing a-tsam lé rago dat chúng sù lé tai é nghut lhê. [‡] 19:38 Hkya-on 118:26 ^{*} 19:45

² "Hai ahko ahkàng eq Nàng shí pé lé kut nyi lhê lúh? Ahko ahkàng shí, Nang lé ó yuq byí é lúh? Ngamoq lé tai kyô wú aq." ga Yhang lé myí akô.

³ Haú hkûn, Yhang gi, "Ngò le, nungmoq lé rajuq myí wú kôle;

⁴ Yohan byí é baptisma gi, mauhkûng mai lúh? A nghut jáng, byu chyáng mai lúh? Ngo lé tai kyô wú keq?" ga yhangmoq lé myí ri.

⁵ Haú hkûn, yhangmoq chòm hpyê lhum kô é gi, "'Mauhkûng mai nghut lhê.', nghû nga-nhúng tai jáng le, 'Hai mù, yhang lé a lumjáng kô é lúh?' ga rã nghut;

⁶ 'Byu chyáng mai nghut lhê.' nghû jáng le, shiwa byu banshoq gi, Yohan lé, myightoi rayuq ga lumjáng to kô é yanmai, yhangmoq, nga-nhúng lé luqgok eq dú sat kó rã nghut." ga akô.

⁷ Haú mù, yhangmoq gi, "Hkâmai nghut é lé, ngamoq a sé." ga tú tai akô.

⁸ Yesuq gi, "Haú jáng, Ngò le, hai ahko ahkàng eq shí pé kut é hkyô lé, nungmoq lé a tai kyo." ga, yhangmoq lé tai ri.

Tsibiyiq Hkyâm Yhumsing Eq Hkyâm Sai Zo Bang

Mht 21:3-46; Mrk 12:1-12

⁹ Byu pé lé, Yesuq dangtú dòng xoq tai kyô é gi, "Byú rayuq gi, tsibiyiq hkyâm ralhum sai to mù, hkyâm sai zo bãng chyáng ngho byí to lui, gó ming shut myáng myáng é nyi byuq ri.

¹⁰ Kyôshu yoq jé jáng, yhang gi, hkyâm sai zo bãng eq, hkyâm má é tsibiyiq shí pé lé lhom byí kat sháng gaq ga, dui-nhâng zoshâng rayuq lé yhangmoq chyáng nhang kat ri. Nghut kôhang, hkyâm sai zo bang gi, haú yuq lé lhom bat mù, loq kôm tau nhang kat akô.

¹¹ Gotú dui-nhâng zoshâng rayuq lé, yhangmoq chyáng dum nhang kat ri. Nghut kôhang, yhangmoq gi, haú yuq lé le, lhom bat mù, hoq lhoq hpu lui, loq kôm dum tau nhang kat akô.

¹² Sum yuq nghû rã dui-nhâng zoshâng lé dum nhang kat ri. Yhangmoq gi, haú yuq lé le bat cheq lui, hkyâm mai hkat htoq kat akô.

¹³ Haú hkûn, tsibiyiq hkyâm yhumsing gi, 'Ngò hkâsu kut wú rã lúh? Ngò chyiitdap é ngá zo lé, nhang kat wú rã nghut ri. Yhang lé kúm gi, yhangmoq lhom hkungga kó abe.' ga tai ri.

¹⁴ Hkyâm sai zo bang gi, yhumsing hpô é yhangzo lé myàng kôjáng, 'Shí yuq gi, silí wunlí sing yú rã sù nghut lhê; nga-nhúng, silí wunlí haú pé wó yú shoq, yhang lé sat pyám sháng.' ga rayuq eq rayuq tai lhùm bum akô.

¹⁵ Haú mù, yhang lé hkyâm shinggan shut dú htoq kômù, sat pyám akô.

Haú su kut kôjáng, tsibiyiq hkyâm yhumsing gi, yhangmoq lé hkâsu kut rã lúh?

¹⁶ Yhang gi, é mù, haú hkyâm sai zo bang lé sat pyám lui, hkyâm haú lé góbang lé htot ngho byí pyám rã nghut lhê." ga ri.

Dang haú lé wó gyo bang gi, "Haú su gi, hkâ-nhâm le a dut sháng gaq ôi!" ga akô.

¹⁷ Hau htâng, Yesuq gi, yhangmoq lé byu wú lui, "Haú jáng gi,

'Yhùm sai bãng eq hkyin htoq pyám é luqgok gi, htungchyün mã é ahkyak dik é luqgok dut bê.'*

ga Chyúmdang mã kã tô é gi, hai gá nau é nghut lhê lúh?

¹⁸ Luqgok* haú má gyó záng é sù ó yuq nghut kôle, gyuú gyop byuq rã nghut lhê. Luqgok hau éq gyó nhê záng é sù le, nhê pyeq pyám é hui rã nghut lhê." ga tai ri.

¹⁹ Tarã sará pé eq hkyangjong agyi pé gi, dangtú shí gi, yhangmoq lé lhoq ang lui tai é hkyô lé, sé kô é yanmai, haú hkûn jáng lhang Yhang lé chyup yú rã matú hkyô ho nyi akô. Nghut kôhang, byu pé lé gyuq mù a chyup shí kó nghut ri.

Kang Kat É Hkyô Eq Séng Lui Myi É Dang
Mht 22:15-22; Mrk 12:13-17

²⁰ Haú mù, yhangmoq gi, Yesuq é dang má mara wó chyup yú shoq ga, gegùn labyoq kut bang lé jowú nhang nyi akô. Haú gi, ahkàng ayá wó é mauzaú chyáng Yhang lé wó ap pyám rã matú nghut ri.

²¹ Haú jowú bang gi, "Sarã é, nàng gi, dít dít mán mán tai mhoqshit é eq, byu é myoqdong lé a tê byí é za, Garai Gasâng é hkyô lé, tengmán é dòng mhoqshit é sù nghut é lé, ngamoq sé lhê.

²² Hkoséng Kehtaq lé, ngamoq kang kat rã gi, tarã wang lhê lúh? A wang é lúh?" ga lui, Yhang lé myí wú akô.

²³ Nghut kôhang, Yesuq gi, haú bãng é myit goí é hkyô lé sé mù lui, yhangmoq lé,

²⁴ "Ngo lé, ngùn rachap tûn shit wú keq. Ó yuq é alhò eq masat laiká dap tô ri lúh?" ga myi jáng,

²⁵ yhangmoq gi, "Kehtaq é nghut ri." ga akô.

Haú hkûn, Yesuq gi, "Haú nghut jang, Kehtaq é lé gi, Kehtaq lé byi keq; Garai Gasâng é lé gi, Garai Gasang lé byi keq." ga yhangmoq lé tai ri.

²⁶ Yhangmoq gi, byu pé hí má, Yhâng é dang má mara a wó ho myang é eq, Yhang tú tai é dâng é yanmai, maú hong byuq kôlui, zim byuq akô.

Dum Dui Toq Lô Rã Hkyô Eq Séng Lui Myi É Dang

Mht 22:23-33; Mrk 12:18-27

²⁷ Haú hkûn, haú dum dui toq hkyô a joq gá é Saduke pé ra-am gi, Yesuq chyáng lé jé kômù,

* 20:17 Hkya-on 118:22 * 20:18 Luqgok nghu é gi, Yesuq lé tai ri.

²⁸ "Sarà ê, myiwe wó é byù rayuq gi, zo dù a dap é za shi byuq é nghut jáng, yhanggu gi, yhangmâng é awut ashín xoq byi rà matú, yhâng rhat lé chui gon ra rà nghut lhê ga, nga-nhúng lé, Mosheq ká to byi ri.

²⁹ Hí hpyang lé, gumang nhiktâng wui nyhit yuq nyi akó. Lagám yuq gi, myiwe yù luí, zo dù a dap é za shi ló byuq bê nghut ri.

³⁰ Lanong yuq le, yhangmang mó é chui lé gon mù, zo dù a dap é za shi ló byuq bê.

³¹ Hau htâng, Lalaq yuq mai Lahká yuq jé shoq, chuimó háu lé rayuq htâng rayuq dum gon gon kut kólhang, zo dù a dap é chyat shi ló byuq bùm beko nghut ri.

³² Ló htâng má, myiwe myhi háu le châng shi ló byuq bê nghut ri.

³³ Háu mù luí, háu dum dui toq é buinyi má, myiwe myhi háu gi, háu nhiktâng wui má é hká yuq é yhangmyi nghut rà lú? Hkásu mù gà le, yhang gi, háu nyhit yuq é yhangmyi dut wú bê sù nghut ri." ga luí, Yhang lé myi wú akó.

³⁴ Háu hkún, Yesuq gi, "Shí mینگkan htoq má é byu pé gi, ikun kut é eq myi byi myi yú kut nyi bum akó.

³⁵ Shi é mai dum dui toq rá eq, háu pyat má nyi rà gíng bâng é matú gi, ikun kut é eq myi byi myi yú hkyô joq lo rà a nghut.

³⁶ Háu bang gi, maumang lagyô pé su dut byuq luí, a dat shi lo kó rà nghut lhê. Yhangmoq gi, dum dui toq lô su é yhangzô pé[†] nghut é yanmai, Garai Gasâng é yhangzô pé nghut beko.

³⁷ Háu nyé duq nyi é mhanpúng eq séng luí, Mosheq eq ká tó é má hláng, Yhumsing gi, 'Ngò gi, Abraham é Garai Gasang, Isak é Garai Gasang, Yakup é Garai Gasang nghut lhê.[‡] ga bo tó é yanmai, shi é bang dum dui toq lô rà hkyô lé tún shit to bê nghut ri.

³⁸ Garai Gasang gi, shi bê bâng é Garai Gasang a nghut, dui nyi bâng é Garai Gasang ru nghut nyi lhê; hkásu mù gà le, lhunglhâng bang gi, Garai Gasâng é hí má dui nyi é bang chyat nghut akó." ga yhangmoq lé tú tai ri.

³⁹ Háu hkún, tarà sará pé ra-am gi, "Sarà ê, nàng tai é jô ri." ga akó.

⁴⁰ Háu mù, yhangmoq gi, Yhang lé hai le a wám myi jat lo kó nghut ri.

Hkrisduq Gi, Ó Yuq É Yhangzo?

Mht 22:41-46; Mrk 12:35-37

⁴¹ Hau htâng, Yesuq gi, yhangmoq lé, "Byu pé gi, Hkrisduq lé, Dawiq é yhangzo nghut lhê, ga hkásu mù tai akó lú?"

⁴²⁻⁴³ Dawiq yhang yhang hláng gi, Hkya-on Kungtôn Laiká má,

'Hau Yhumsing Garai gi, ngá é Yhumsing lé, "Ngò, náng é gyé pé lé,

náng é hkyi nang tanghkuq kut pyám byi é hkying jé shoq, Ngá é loqyo hkyam[‡] shut zung nyi shi aq." gà ri.[‡]

ga ká tô ri.

⁴⁴ Háu mù, Dawiq yhang hláng, Hkrisduq lé, Yhumsing gà é nghut le gi, Hkrisduq gi, yhangzo za hkásu ge nghut rà lú?" ga tai ri.

Tarà Sarà Pé Lé Sidiq Rà Hkyô

Mht 23:1-36; Mrk 12:38-40; Luk 11:37-54

⁴⁵ Byù banshoq gyô nyi é u lé, Yesuq, Yhâng é chángzô pé lé tai é gi.

⁴⁶ "Tarà sará pé lé sidiq nyi keq. Yhangmoq gi, réng é buhng wut chùng mù, sô yông wún luí, gai pé má hkunggá é èq shichyen rà lé le, tarajong pé má é ahkyak dik é zùng jang pé eq poi pé má é je réng é zùng jowò pé má myang zùng rà lé le, ô nau nyi bum akó.

⁴⁷ Yhangmoq gi, chuimó pé é yhùm-yò pé lé hpyoq zo hpyoq shuq kólui, kyú hng hng dúng shit mhaú é bang nghut akó. Háu sù é bang gi, je riyhang htan é dòng dam byi é hui zo kó rà nghut lhê." gà ri.

21

Chuimó Myhi Kat É Alu

Mrk 12:41-44

¹ Yesuq tu wú kat é hkún lé, noqkuq yhùm má é alu sidek má, wó bang alu kat nyi bùm kô é lé myang ri.

² Dum nghut jáng, gyi htingchap ngùn zo í chap za kat é, myung é chuimó myhi rayuq lé lé myang ri.

³ Háu mù, Yhang gi, "Ngò, nungmoq lé teng za tai kólé, shi myung é chuimó myhi gi, góbang banshoq htoq má je myo kat bê nghut ri.

⁴ Hkásu mù gà le, háu góbang banshoq gi, yhumsing agùn agó wó é má é lé, lé kat akó; yhang kúm gi, myung sù nghut kôle, yhâng asak lé baú ra ngùn lhunglhâng lé kat bê nghut ri." ga tai ri.

Ló Htúm Buinyi Má Dut Lò Rà Hkyô

Mht 24:1-21, 29-35; Mrk 13:1-19, 24-31

⁵ Noqkuq yhùm lé, yung é luqgok pé èq le, alu chyunghuq pé èq le, mhôn tô ri ga, chángzô pé ra-am hkya-ôn bùm kójáng, Yesuq gi,

⁶ "Nungmoq myang nyi é shí pé gi, luqgok rachám htoq racham hláng a kê lhum loshoq, hpyoq hpyi pyám é buinyi jé rà nghut lhê." ga tai ri.

⁷ Háu su ga jáng, yhangmoq gi, "Sarà ê, háu nghut le gi, háu hkyô pé gi, hká-nhám dut lò rà lú? Háu dut rà chyâng lò jáng, hkásu é kumlhá htoq lò rà nghut lhê lú?" ga, Yhang lé myi akó.

[†] 20:36 Dum dui toq lô su é yhangzô pé gà é gi, Yesuq lé lumjing luí, shi é htâng má dum dui toq lô é bang lé gà lhê. [‡] 20:37 Htoq Lô 3:6 [‡] 20:42-43 Loqyo hkyam nghu é gi, ahko ahkáng wó é jowò nghut lhê. [✱] 20:42-43 Hkya-on 110:1

⁸ Haú hkûn, Yhang gi, "Nungmoq gi, hkyô shuí nghoq é a hui kó sháng gaq, sidiq nyi keq. Hkâsu mù gâ le, 'Ngò gi, Mesaia nghut lhê.' ga le, 'Ahkyíng chyâng lò bê.' ga le, Ngá myíng lé láng é byù myo myo pò htoq lò kó rá nghut lhê. Nghut kôlhang, nungmoq gi, yhangmoq htâng hkâcháng kó.

⁹ Majan htoq é eq, gumlau toq é hkyô lé, wó gyo kôjáng, hkâgyuq hkâ-kyûm kó, haú hkyô pé hí dut lò rá nghut lhê. Nghut kôlhang, lò htâng é buinyi gi, haú hkûn jáng dut rá a nghut shi." ga tai ri.

¹⁰ Hau htâng, Yhang, yhangmoq lé dum tai é gi, "Ra-myú eq ra-myú, mingdán ralhum eq ralhum majan zân lhûm lò kó rá nghut lhê.

¹¹ Jowò myo myo má, layàng mó nún lo é, noli nojàng myô lo é eq mutmó gyó lo é pé, dut lò rá nghut lhê; gyuq chiq jung pé eq kumlhá mó le, mauhkûng htoq mai htoq shit lò rá nghut lhê.

¹² Nghut kôlhang, haú hkyô banshoq a dut shimá, Ngá myíng é yanmai, byu pé gi, nungmoq lé chyup yú luí, zing-rí yú mù, tarajong pé eq htóng pé má ap pyám kó rá nghut lhê, hau htoq agó, nungmoq gi, hkohkam pé eq zau pé chyáng é ap byí é le, hui kó rá nghut lhê.

¹³ Haú su é pé mai, nungmoq gi, ngò eq séng luí, saksé wó hkám rá hkyô htoq lò berá nghut lhê.

¹⁴ Nghut kôlhang, hkâsu nghû lhom tú tai rá hkyô lé, hí mai a myit wui nyi rá lé, nungmoq myit hpyit to keq.

¹⁵ Hkâsu mù gâ le, nungmoq é gye pé lhunglhâng bang, hái le a wó lhom tú tai loshoq, ngò, nungmoq lé dang eq hpaqchyí byi rá nghut lhê.

¹⁶ Nghut kôlhang, nungmoq gi, ínu iwâ pé, águ âmâng pé, mungmoq eq buinùm ji-myi wui éq lháng, ap pyám é hui kó rá nghut lhê. Yhangmoq gi, nungmoq chyáng má é ra-am lé lháng, sat pyám kó rá nghut lhê.

¹⁷ Byù lhunglhâng bang gi, Ngá é yanmai, nungmoq lé a nguí kut kó rá nghut lhê.

¹⁸ Nghut kôlhang, nungmoq é xâm rahkat lháng wó htên byuq rá a nghut.*

¹⁹ Nungmoq gi, wó jân é hkyô mai, asak lé wó yú kó rá nghut lhê.

²⁰ Yerusalem wá mó lé gye hpúng mó èq lóm tò é lé, nungmoq myàng jáng, wá mó haú htên byuq rá ahkyíng chyáng lò bê lé, bún sê nyi keq.

²¹ Haú hkûn lé, Yuda mau má nyi é bang gi, bùm pé shut hpang doq lò kó sháng gaq; haú wá hkaú má nyi é bang le, hpang htoq kó sháng gaq; wá tiq wá zo pé má nyi é bang le, wá hkaú shut a wàng kó sháng gaq.

²² Hkâsu mù gâ le, Chyúmdang má ká to má ká to banshoq dik lò rá matú, buinyi haú pé

gi, mara dam byí é buinyi pé dut rá nghut lhê.

²³ Haú buinyi pé má, zogûng dut é myiwe wui eq náu huq ashí nghut é ínu wui gi, gyai yhang wuihke kó rá nghut lhê; hkâsu mù gâ le, shí ming ahtoq má wuihke mó eq, shí amyu ahtoq má Garai Gasang nhikmó-yô é jé lò rá nghut lhê.

²⁴ Yhangmoq gi, shâm lhâm èq sat pyám hui lhê eq, ming hkang ming mó má chyup shuí lò é le hui kó rá nghut lhê. Tungbaú pé lé byí tò é buinyi ahkyíng htáng shoq, Yerusalem wá mó gi, tungbaú pé èq náng zik tò é hui rá nghut lhê.

²⁵ Haú hkûn, bui, kyí, lhamó pé má, kumlhá htoq shit rá nghut lhê. Wuishuq lung-aú má é wuilhêng pé é mying é htê mó é yanmai, myigùng htoq má, byù myi chângjup gi, hkâsu kut rá a sé loshoq mau é eq myit wui myit hkê é hui bekó rá nghut lhê.

²⁶ Byu pé gi, mingkan htoq má dut lò rá é hkyô pé lé, a jé shi mai myit gyuq kó é yanmai, moq byuq lò bùm kó rá nghut lhê; hkâsu mù gâ le, mauhkûng má é wum-o a-tsam pé gi, lhoq nhûn é huí bùm kó rá nghut lhê.

²⁷ Haú hkûn, haú Byu Yhangzo gi, mhut ji mù, hpungwup a-tsam mó eq le, hpungwup shingkan mó eq le, gyó lé lo é lé, yhangmoq byu-myàng kó rá nghut lhê.

²⁸ Haú hkyô pé dut hí lò jáng, ulhum tú mù wú kat keq, hkâsu mù gâ le, nungmoq lé hkyi yú rá buinyi gi, chyáng lò bê nghut ri." gâ ri.

²⁹ Yhang, yhangmoq lé dangtú dông xoq tai é gi, "Maihpáng gâm eq siggâm banshoq lé wú wú keq.

³⁰ Sikbu nyún lo é lé myàng jáng, bui nyé nám chyáng lò bê ga luí, nungmoq yhang dat wú sê akó.

³¹ Haú eq rajung za, haú hkyô pé dut nyi é lé, nungmoq myàng kôjáng, Garai Gasang é mingdán gi, chyáng bê nghut é hkyô lé, nungmoq sé lo keq.

³² Ngò, nungmoq lé teng za tai kôlé, shí pyat má é byu pé a ban shi byuq shimá, haú hkyô pé banshoq dut byuq rá nghut lhê.

³³ Mauhkûng eq myigùng gi, a joq lo dut byuq rá nghut lhê; nghut kôlhang, Ngá é dang gi, ru joq nyi rá nghut lhê.

³⁴ "Nghut kôlhang, zo myo shuq myô é, í shuq wut é, mingkan htoq má é myit wui myit hkê é pé èq, nungmoq é i-myi wó laí nyi luí, haú ngò jé lé é buinyi gi, lhai bik lo é su, nungmoq ahtoq má byodàn tung a jé lò sháng gaq, sidiq nyi keq.

³⁵ Hkâsu mù gâ le, buinyi haú gi, mingkan htoq má nyi é byù banshoq bâng é ahtoq má, haú su jé lò rá nghut lhê.

* 21:18 Shí má gi, asak woi-nyí a shí rá hkyô lé tai é nghut lhê.

³⁶ Haù mù luí, haù dut lò rà hkyô ban-shoq mai, nungmoq wó lut lai mù, haù Byu Yhangzô é hí má, wó yap gíng é bang dut sháng gaq, hkâ-nhám le kyúdung luí, ahkyíng hkangmó má machya nyi keq." gá ri.

³⁷ Yesuq gi, nyí wuí noqkuq yhùm má mhoqshit nyí luí, myìn wuí Tsanlun Bùm gá é bùm shut htoq é mù, é nyi to to kut ri.

³⁸ Byù banshoq bang gi, Yhang mhoqshit é dang gyo rà ga, napsún noq noq má noqkuq yhùm má jé lé bum akò nghut ri.

22

Yesuq Lé, Yudaq Êq Ung Zô É Hkyô

Mht 26:1-5,14,16; Mrk 14:1-2, 10-11; Yhn 11:45-53

¹ Ahkuí, Lhoqlhai Poí gá é Azuma (múnchi a kat é Muk Zo Poí) jé rà chyáng lò bê.

² Haù mù, hkyangjong agyi pé eq tará sará pé gi, Yesuq lé hkâsu kut wó sat pyám rà hkyô, ho nyi akò; hkâsu mù gá le, yhangmoq gi, mingbyù wuí lé gyuq bùm kò é yanmai nghut ri.

³ Haù hkûn, lagyo raxe í yuq má bo é Iskarut gá é Yudaq chyáng Tsadán wàng mù luí,

⁴ yhang gi, htoq é mù Yesuq lé hkâsu kut ap pyám rà hkyô lé hkyangjong agyi pé, noqkuq yhùm zúng é gyezau pé eq, é hpyé ri.

⁵ Haù mù, yhangmoq gi, gyô nguì luí, Yudaq lé ngùn byi rà hkyô myit hui bekò.

⁶ Yudaq le hap yù luí, byù hpúng má a nghut é hkûn, Yesuq lé ap pyám rà hkyô ho nyi bê nghut ri.

Lhoqlhai Poí Lé Món É Hkyô

Mht 26:17-30; Mrk 14:12-26; Yhn 13:21-30

⁷ Ahkuí, haù Lhoqlhai Poí má é sauzo shigu hkungga sat nhông byi rá é Azuma buinyi jé bê.

⁸ Haù hkûn, Yesuq gi, Petruq eq Yohan lé, "Nga-nhúng zo rà matú Lhoqlhai Poí é món láng keq." ga luí, nhang kat ri.

⁹ Haù nhik gi, "Hkâmá é món to nhâng nau ri lú?" ga luí, Yhang lé myí akò.

¹⁰ Haù hkûn, Yesuq gi, "Nungnhik, myuq hkaù shut wang e ló le wuí yambú waq é byù rayuq lhom hui rà nghut lhê; haù yuq chyáng châng lò luí, yhang wang ló é yhùm má châng wàng mù,

¹¹ yhumsíng lé, "Ngò Ngá é chángzô pé eq rahá, Lhoqlhai Poí zo rà bíng wap hkâmá nghut lhê lú ga, Sará myí nhang kat ri." nghú tai keq.

¹² Haù hkûn, hen tô é ahtoq má é wap mó lé, nungnhik lé lhom tún shit rà nghut lhê; wap haù má é món to keq." ga tai kat ri.

¹³ Haù chángzo nhik htoq e ló le, Yesuq tai kat é eq roq za é myâng kômù, Lhoqlhai Poí lé món to bekò nghut ri.

Yhumsing É Myinzang

¹⁴ Ahkuí, ahkyíng jé jáng, Yesuq eq Yhâng é chángzô pé rahá za zohpoq má zung tô akò.

¹⁵ Haù hkûn, Yesuq gi, "Ngò wuíhke jamjau hpuzô é a hui shi má, Lhoqlhai Poí shi lé nungmoq eq rahá zo rà lé, Ngò gyai ô nau nyi lhê.

¹⁶ Hkâsu mù gá le, ngò, nungmoq lé tai kôlé, Garai Gasâng é mingdán má poi shi a ló dik dik gi, ngò haù lé dum zo rà a nghut ló." ga luí, yhangmoq lé tai ri.

¹⁷ Hau htâng, Yesuq gi, góm lé yù mù jeju ban hkyá-on jáng, "Góm shi lé yù luí, nungmoq yhangchang gam shuq lhum keq.

¹⁸ Ngò, nungmoq lé tai kôlé, ahkuí mai gi, Ngò, Garai Gasâng é mingdán a jé jé tsibiyiq wing lé dum shuq rá a nghut lo." ga tai ri.

¹⁹ Hau htâng, Yhang gi, muk lé yù mù, jeju hkyá-on luí, muk lé myihik hpé mù, yhangmoq lé byi uchyang, "Shí gi, nungmoq é matú byí pyám é, Ngá é gungdu nghut lhê; Ngo lé bún nyi rà matú, shi su kut nyi keq." ga tai ri.

²⁰ Haù eq rajung za, myinzang ban zo jáng, góm lé le yù mù, "Góm shi gi, nungmoq é matú htoq pyám é, Ngá é sui má xuq tô é dangshikaq asik nghut lhê.

²¹ Nghut kôhang, wú keq, Ngo lé ap pyám rà sù gi, zang bó shi má ngò eq rahá nyi tô ri.

²² Haù Byu Yhangzo gi, hkyin to huí é eq rajung za shi rà nghut lhê; nghut kôhang, Yhang lé ap pyám é sù gi, dingnyé wó ri." ga tai ri.

²³ Haù su ga jáng, lagyô pé gi, yhangmoq má shi hkyô kut rà sù gi, hká yuq nghut rà lú ga, rayuq eq rayuq myí lhum bum akò.

²⁴ Haù htoq agó, yhangmoq má é hká yuq sheq je kô lhê lú ga le, rayuq eq rayuq tai hting lhum bum akò.

²⁵ Haù mù luí, Yesuq gi, "Túngbau pé é hkohkam pé gi, yhangmoq byù myú pé é ahtoq má up zô nyi kô é nghut luí, byu pé gi, ahkáng ayá wó é bang lé jeju yhumsing pé ga luí, tai hkungga nyi bum akò.

²⁶ Nungmoq kúm gi, haù su hkâkut kó. Nungmoq má je ko sù gi, asak je tiq é sù su, up é sù le, dui-nhâng zoshâng su nghut nyi sháng gaq.

²⁷ Hká yuq sheq je kô lhê lú? Zô zung nyi sù lú? Haù a nghut jáng, saí tsô é sù lú? Zô zung nyi é sù sheq nghut ri. Nghut kôhang, ngò gi, nungmoq má é saí tso sù su za nghut nyi lhê.

²⁸ Nungmoq kúm gi, Ngò jamjau huí nyi le, Ngò eq rahá nyi nyi é bang nghut nyi akò.

²⁹ Haù su mù, Ngá wa gi, Ngo lé, mingdán ap byí é su, Ngò le, nungmoq lé mingdán ap byi rà nghut lhê.

³⁰ Haù mù, Ngá é mingdán má é, Ngá é zangbó má, nungmoq wó zo kó rà nghut lhê; nungmoq le hkohkâm-tanghkuq má zung to

mù, Israelaq amyù raxe í hú lé jéyáng kó rá nggut lhê.

Yesuq Lé, Petruq (Simun) He-ngik Pyâm Râ Hkyô

Mht 26:31-35; Mrk 14:27-31; Yhn 13:36-38

³¹ Simun, Simun ê, wú aq, sungsô cham lé shai é su, nungmoq lé wó shai shoq ga, Tsadán wá gi, ahkáng dung bê.

³² Nghut kôlhang, nang é lumjng myit a hten sháng gaq nghù, Ngò, nang é matú kyúdung byi bê; nang dum lhing bún lò jáng, nung gu nung mâng pé lé wum-o lhoq ging byi aq." ga tai ri.

³³ Háu hkûn, Simun gi, "Yhumsing ê, htóng wâng kôlhang, shí kôlhang, ngò gi, nang eq rahá cháng rá matú myit hpyit to bê." ga tú tai ri.

³⁴ Yesuq gi, "Petruq ê, nang lé Ngò tai lé, hkû-nyí* lháng woq a tân shi má, nang, Ngo lé a sé ga lui sum dâm he-ngik pyâm rá nggut lhê." ga tai ri.

³⁵ Hau htâng, Yesuq, yhangmoq lé tai é gi, "Ngò, nungmoq lé ngunhtung, jhtung, hkyi-
tsung a wún a chùng nhang é za, nhang kat é nggut hkûn, nungmoq chyáng hai ra akò lhú?" ga myi jáng, yhangmoq gi, "Hai le a ra lo." ga tai akò.

³⁶ Háu hkûn, Yhang gi, "Ahkuí kúm gi, ngunhtung wó sù gi, yù wun sháng gaq, jhtung wó sù le, yù wun sháng gaq, sâm a wó sù gi, bumó ung lui wú sháng gaq.

³⁷ Hkâsu mù gá le, Ngò, nungmoq lé tai kôlé, Ngò eq séng lui Chyúmdang má kâ tô é gi, dut lò berá nggut lhê; "Hau yuq gi, yubak mara wó bang má ngap lhôm to bê.[†] ga kâ tô é dang gi, Ngá chyáng dik lò rá nggut lhê." ga lui, yhangmoq lé tai ri.

³⁸ Háu mù, lagyô pé gi, "Yhumsing ê, wú aq, shí má sâm í hkyam joq tò ri." ga tai kôjáng, Yesuq gi, "Gé bê." ga lui, yhangmoq lé tai ri.

Tsanlun Bùm Má Yesuq Kyúdung É Hkyô
Mht 26:36-46; Mrk 14:32-42

³⁹ Ahkuí, Yesuq gi, htoq lui, gó hkun é eq rajung za, Tsanlun Bùm shut htoq e ló bê nggut ri; Yhâng é chángzô pé le Yhang htâng châng é ló akò.

⁴⁰ Háu jowó má jé jáng, Yhang gi, "Nungmoq, gunglaú é a hui sháng gaq, kyúdung nyi keq." ga lui, yhangmoq lé tai to mù,

⁴¹ chángzô pé nyi é mai lugqok radú we kô gâng é ló lui, hkyihput htug mù,

⁴² "Áwa ê, Náng ô nau é nggut le gi, góm† shí lé Ngá chyáng mai lhai pyâm byi laq. Nghut kôlhang, Ngò ô nau é dông a nggut, Nang ô é dông sheq nggut sháng gaq." ga kyúdung ri.

⁴³ Háu hkûn, mauhkûng mai maumang lagyo rayuq htoq lé lui, Yhang lé i-myyit nhik lé tai ting ri.

⁴⁴ I-myyit hkaú má dik shoq hkâm zo wú é yanmai, Yhang je riyhang kyúdung wum kat nyi ri; Yhâng é buibù le, sui hkyí sui pat su myigùng má yui gyó ri.

⁴⁵ Háu mù, kyú ban dung jáng, Yhang toq lui, chángzô pé chyáng ló wú le, yhangmoq gi, myit yón mù lui, yhup myhi to kô é lé ló myâng mù,

⁴⁶ "Hai mù yhup nyi akò lhú? Toq keq! Gunglaú é a hui sháng gaq, kyúdung nyi keq." ga lui, yhangmoq lé tai ri.

Yesuq Lé Chyup É Hkyô

Mht 26:47-56; Mrk 14:43-50; Yhn 18:3-11

⁴⁷ Háu su ga, ru tai nyi ashí le, wú keq, háu chángzo raxe í yuq má bo é Yudaq gi, hkyô hí mù byú rajum rayó lé shuí lé lô lui, yhang gi, Yesuq lé popuq puq rá ga lui lé lo ri.

⁴⁸ Háu mù lui, Yesuq gi, "Yudaq ê, nang gi, háu Byu Yhangzo lé popuq puq é eq gyê pé chyáng ap pyâm lhê lhú?" ga lui, yhang lé lhom myí ri.

⁴⁹ Háu hkûn, Yesuq htâng cháng bang gi, hai dut lò rá lé bún sé kô é yanmai, "Yhumsing ê, ngamoq gi, sham eq zân le, gè rá lhú?" ga myí akò.

⁵⁰ Yhangmoq chyáng má é rayuq gi, hkyangjong mó é dui-nhâng zoshâng lé zân kat lui, yhâng é loqyo nohkyap byit byuq bê nggut ri.

⁵¹ Yesuq kúm gi, "Gé bê. Yhangmoq ô nau é su nggut kó sháng gaq." ga tú tai mù, háu yuq é nohkyap lé é záng lui lhoq gè byí ri.

⁵² Yesuq gi, Yhang lé chyup rá ga jé lé é hkyangjong agyi pé, noqkuq yhùm zúng é zau pé eq agyi suwún wú lé, "Nungmoq gi, damaq rayuq lé chyup é su, sâm, dumbáng eq kut lui, lé lo akò lhú?

⁵³ Ngò gi, nyí wú, noqkuq yhùm má nungmoq eq rahá nyi kôlhang, nungmoq Ngo lé chyup yú rá ga a hen wú kó; ahkuí gi, mauchut eq up‡ nyi bê yanmai, nungmoq é ahkying nggut nyi ri." ga tai ri.

Yesuq Lé, Petruq Èq He-ngik Pyâm É Hkyô
Mht 26:57-58, 67-75; Mrk 14:53-54, 66-72; Yhn 18:12-18, 25-27

⁵⁴ Háu hkûn, yhangmoq gi, Yhang lé chyup yú mù she ló lui, hkyangjong mó é yhùm shut shuí wang ló akò. Petruq le we we mai châng tò ri.

⁵⁵ Ahkuí, yhangmoq gi, wàng hkaú má myi mut yú lui zung tò bum é hkûn, Petruq le yhangmoq é ahkaú má bo tò ri.

⁵⁶ Langchyáng myhi rayuq gi, myihkyom yâm má Petruq zung tò é lé, myang kat mù,

* 22:34 Yudaq byu pé é ra-nyí gi, myinhtáng bui wang é mai, htang nyi bui wang é jé shoq nggut lhê. Shí má é hkû-nyí gi, nga-nhùng é matú myín àng ri. † 22:37 Esai 53:12 ‡ 22:42 góm gá é gi, Yesuq jamjau hui rá hkyô eq shí rá hkyô lé, tai nau é nggut lhê. † 22:53 Mauchut eq up gá é gi, Tsadán eq up é lé gá ri.

yang lé rago wú tsuq to lui, "Shí yuq le Yesuq eq rahá nyi sù nghut ri." ga tái ri.

⁵⁷ Haú hkûn, Petruq gi, "Myiwe myhí ê, nàng tái é sù lé, ngò a sé." ga he pyám ri.

⁵⁸ Hau htàng hkâ-myhàng a myáng má, byù rayuq gi, yang lé dum myàng lui, "Nàng le yangmoq chyáng bo nyi sù nghut ri." ga tái kat jáng, Petruq gi, "Byù hpó ê, ngò a nghut." ga tù tái ri.

⁵⁹ Hkyíng hkum rahkum kô myáng jáng, rayuq le, "Gè gè yang, shí yuq gi, Yang eq rahá nyi wún sù nghut ri; hái mù gâ le, yang gi, Galile byù le nghut ri." ga zuq zuq tái ri.

⁶⁰ Petruq gi, "Byù hpó ê, nàng tái nyi é hkyô lé, ngò a sé." ga tù tái ri. Haú su ga ru tái nyi ashí le, woq tún bê nghut ri.

⁶¹ Haú hkûn, Yesuq gi, lhang lui, Petruq lé wú kat ri. Haú mù, Petruq gi, "Hkû-nyí lhang, woq a tún shí má, nàng Ngo lé sum dâm he pyám rá nghut lhê." ga lui, Yhumsíng yang lé tái é dang lé bìn kat ri.

⁶² Haú mù, yang gi, shinggan shut htoq é lui, gyai yang é ngau nyi ri.

Gyezô Pé Yesuq Lé Rhoi É Hkyô

⁶³ Yesuq lé zúng nyi é bang gi, Yang lé rhoi lui nghap myíng nghap htê mu nyi akò.

⁶⁴ Yangmoq gi, Yhâng é myoqdong nghop pyám byi lui, "Nang lé bat sù gi, ó yuq nghut ri lhu? Myiqhtoi htoi wú aq." ga myí akò.

⁶⁵ Yangmoq gi, Yang lé nyhap é dang ajung jung dông tái rhoi nyi akò.

Suwún Wui É Hí Má Yesuq Jé Nyi É Hkyô

24

⁶⁶ Napkyô myoqmyàng jáng, mingbyù wui é suwún hpúng bang eq rahá, hkyangjong agyi pé, tarâ sarâ pé, zup hpong kut nyi é má, Yesuq lé shuí é mù,

⁶⁷ "Nàng Hkrisduq nghut é têng le gi, ngamoq lé tái kyo laq." gâ akò.

Yesuq gi, "Ngò gi, Hkrisduq nghut lhê ngù tái kôlhang, nungmoq jing kô rá a nghut.

⁶⁸ Ngò, nungmoq lé myi kôlhang, nungmoq gi, tù tái kô rá a nghut.

⁶⁹ Nghut kôlhang, ahkuí mai haú Byu Yangzo gi, a-tsam bo dik é Garai Gasâng é loqyô hkyam má wó zung nyi berá nghut lhê." ga lui, yangmoq lé tái ri.

⁷⁰ Haú hkûn, yangmoqq banshoq bang gi, "Haú nghut le gi, Nàng, Garai Gasâng é Yangzo nghut lhê lhu?" ga myí akò.

Yesuq gi, "Nungmoq tái é eq rajung za Ngò nghut lhê." ga lui, yangmoq lé tái ri.

⁷¹ Haú hkûn, yangmoq gi, "Nga-nhúng hai jung saksé wá rá nyi ashí lhu? Yhâng é nhut mai yang, tái htoq kat é dang lé, nga-nhúng wó gyo bê nghut lhê." ga akò.

23

Yesuq Lé Mara Hun É Hkyô

Mht 27:1-2, 11-14; Mrk 15:1-5; Yhn 18:28-38

¹ Haú hkûn, zup zing tô é bang banshoq gi, htoq mù, Yesuq lé mauzau Pilat chyáng shuí wang é lui,

² "Shí yuq gi, mingbyù wui lé hkyô shuí nghoq é eq, hkoséng Kehtaq chyáng kang kat rá hkyô lé le hkûm to lui, Yhânggung yang gi, haú Hkrisduq ngù é hkohkâm nghut lhê ga lui, tái nyi é lé ngamoq myang ri." ga lui, Yang lé mara hun akò.

³ Haú hkûn, Pilat gi, Yesuq lé, "Nàng gi, Yudaq byu pé é hkohkâm nghut lhê lhu?" ga myi jáng, Yesuq gi, "Nàng tái é eq rajung za nghut lhê." ga tù tái ri.

⁴ Pilat gi, "Shí yuq lé hùn rá mara ngò a myàng." ga lui, hkyangjong agyi pé eq shiwa byu pé le tái ri.

⁵ Nghut kôlhang, haú bang gi, "Shí yuq gi, Yuda mau gón má yang mhooqshit é dông mai, mingbyù wui é i-myt lé shuí gabyông ri. Haú gi, Galile mau mai ahkuí shí má jé shoq nghut bê nghut ri." ga zuq zuq tái bum akò.

⁶ Pilat gi, haú su ga kô é lé wó gyo jáng, Yesuq Galile byù nghut é, a nghut é hkyô lé myí wú ri.

⁷ Yesuq gi, Herut up é mau má é byù nghut é lé Pilat sé jáng, haú u lé Yerusalem wá mó má nyi tô é Herut chyáng, é dé kat nhang ri.

⁸ Herut gi, Yesuq lé myàng jáng, gyai yang gabú pyám ri. Hkâsu mù gâ le, Yhâng é hkyô lé wó gyo wú mù, Yang laklai kumlhá ralhum lhum kut shit rá lé, wó myàng shoq ga, myit myoqbyu nyi é nghut lui, Yang lé myàng nau é gyai yang myàng bê nghut ri.

⁹ Haú mù, yang gi, Yesuq lé dangmyi myo myô èq myí wú kôlhang, Yesuq gi, dang rahkun lhang a tù tái byi nghut ri.

¹⁰ Hkyangjong agyi pé eq tarâ sarâ pé gi, yap to mù, Yang lé mara gyai yang chòm hun akò.

¹¹ Herut eq yhâng é gyezô pé gi, Yesuq lé rhoi jihkyoi kut mù, atam é dông tái hpoi kô lui, réng é mebu hut byi mù, Pilat chyáng dum tái dé nhang kat akò.

¹² Haú nyí jáng, hí hpyang gyè dut lhum é Herut eq Pilat gi, buinùm dut byuq bekò nghut ri.

Yesuq Lé Sat Râ Matú Doqdân É Hkyô

Mht 27:15-26; Mrk 15:6-15; Yhn 18:39-19:16

¹³ Haú hkûn, Pilat gi, hkyangjong agyi pé eq zau suwún wui, mingbyù wui lé wut tsíng to mù,

¹⁴ "Shí yuq gi, mingbyù wui lé hkyô shuí nghoq ri ga, Yang lé nungmoq ngá chyáng shuí lé lô bekò. Ahkuí, wú keq, nungmoq é hí má, Yang lé ngò myí wú le, Yang má

nungmoq hun é mara lé ngò a myàng nghut ri.

¹⁵ Hau htoq agó, Herut le, hai mara le a myàng mù, shí yuq lé nga-nhùng chyáng dum dé kat byi bê nghut ri; haú mù luí, wú keq, shí yuq gi, shí gíng é mara haí le a kut shut nghut ri.

¹⁶ Haú mù, ngò, Yhang lé dam byi luí, nhang pyám rá." ga luí, yhangmoq lé tai ri.

¹⁷ Nghut kólhang, Lhoqlhai Poí hkangmó má, Pilat gi, mingbyú wui lé htongbyú rayuq yuq nhang kat byi byi kut é yanmai,

¹⁸ yhangmoq banshoq bang gi, "Shí yuq lé gi, yu pyám aq; Barabaq lé kúm gi, nhang kat byi laq." ga luí, chòm wut garu bum akó.

¹⁹ Barabaq gi, wà htum má gumlau kut é eq byú sat é yanmai, htóng gyó nyí sù nghut ri.

²⁰ Pilat gi, Yesuq lé nhang pyám nau é nghut mù luí, yhangmoq lé dum puq tai ri.

²¹ Nghut kólhang, yhangmoq gi, "Yhang lé tapzìng má jén tap pyám aq, jén tap pyám aq!" ga luí, wut tai garú nyi bum akó.

²² Haú mù luí, sum dâm nghú rá hkún, Pilat dum tai é gi, "Haí mù luí lhu? Yhang gi, hai mara kut shut bê lhu? Yhang má shí gíng é mara lé ngò a myàng, haú mù, ngò, Yhang lé bat, nhuq, mhogshít luí, nhang pyám rá." ga luí, yhangmoq lé tai ri.

²³ Yhangmoq gi, Yesuq lé tapzìng má wó jén sat pyám shoq gi, zuq leq hté mó o mó èq dúng wut nyi akó nghut é yanmai, wó tai ung yú bekò nghut ri.

²⁴ Haú mù luí, Pilat gi, yhangmoq dúng é eq rajung za myit hpyit doqdan byí ri.

²⁵ Haú su mù, yhang gi, yhangmoq dúng é eq rajung za, wà htum má gumlau kut é eq byú sat é mai, htóng gyó nyí sù lé nhang kat byi luí; Yesuq lé gi, yhangmoq ô nau é đông ap byi kat bê nghut ri.

Yesuq Lé Tapzìng Htoq Má Jén Tap É Hkyó Mht 27:31-44; Mrk 15:21-32; Yhn 19:17-

27

²⁶ Yhangmoq gi, Yesuq lé shuí htoq ló kó é hkún, yosò wà mai lo é, Kuruni myuq byú nghut é Simun ga sù lé, chyup yú mù, tapzìng waq nhâng luí, Yesuq htâng má châng nhang akó.

²⁷ Byú rajùm rayò gi, Yhang htâng má châng e ló bum akó. Yhang é yanmai ngaubyi ngau nhap eq iyon yôn é myiwe zo wú le haú má bo tô ri.

²⁸ Yesuq gi, yhangmoq shut lhing wú luí, "Yerusalem byizo wui é, Ngá é yanmai hkàngau nyi kó, nungmoq gi, yhumsing gùng eq yhumsing é zo dù wui é matú sheq ngau nyi keq.

²⁹ Hkásu mù gá le, "Zogùng a dut wú é eq naú a huq wú é baùdung myhí pé gi,

hkungsò wó nyi ri." ga luí, tai é buinyi gi, jé lò rá nghut lhê.

³⁰ Haú buinyi má, byu pé gi, bùm pé lé, 'Ngamoq ahtoq má byoq nhé aq!'

ga luí le, kong pé lé,

'Ngamoq ahtoq má nghop aq!'

ga luí le, wut tai bùm bekò rá nghut lhê.

³¹ Byu pé gi, siggâm jùm tô ashí le isu kut kó é nghut le gi, màn jáng gi, hkásu wá dut lò rá lhu?" ga tai ri.

³² Haú hkún, damyaq í yuq lé le, sat pyám rá ga, Yesuq eq rahá shuí htoq ló akó.

³³ Ahkuí, Ugyap nghu é kong má jé jáng, Yesuq lé tapzìng htoq má jén tap tô é hkún, damyaq í yuq lé le, loqpai loqyò shut kut luí tapzìng má jén tap tô akó.

³⁴ Haú hkún, Yesuq gi, "Áwa é, yhangmoq lé mara hkyut pyám byi laq; hkásu mù gá le, yhangmoq kut é hkyó lé yhangmoq a sé kó nghut ri." ga tai ri. Gyezò pé gi, Yhâng é mebu pé lé lhâng, hkyin shosé she é đông gam yu pyám byi akó.

³⁵ Mingbyú wui gi, yap to mù tu wú nyi akó. Zau suwún wui Yhang lé nyhap é gi, "Yhang gi, byú góbang lé hkyi yu é sù nghut ri. Yhang gi, Garai Gasang hkyin yu é sù Hkrisduq nghut le gi; Yhânggung yhang le hkyi yu wú sháng gaq." ga akó.

³⁶ Gyezò pé le, huí é mù, rhoí nyaú nyaú akó. Yhangmoq gi, chyin wing lé yhun byi kólú.

³⁷ "Nàng gi, Yudaq byu pé é hkohkâm nghut é nghut le gi, Náng gung yhang náng, hkyi yu wú aq." ga Yhang lé tai akó.

³⁸ Yhâng é ulhum ahtoq má le, (Grik đông le, Latin đông le, Hebre đông le) "SHÍ YUQ GI, YUDAQ BYU PÉ É HKOHKÂM." gá é laiká ká tap tô akó.

³⁹ Tapzìng htoq má bat tap lhâng to huí é damyaq rayuq gi, "Nàng gi, Hkrisduq nghut lhê, a nghut lhu? Haú Náng gung náng le, ngá-nhik lé le, hkyi yú aq." ga luí, Yhang lé rhoí ri.

⁴⁰ Damyaq góyuq sù kúm gi, "Nàng le shí yuq eq rajung za jén tô é huí luí nhing, Garai Gasang lé a gyuq lhu?

⁴¹ Nga-nhik gi, yhumsing kut shut é mara eq rajung za, jéyáng hui zo gíng é sù nhik nghut lhê; shí yuq kúm gi, hai mara lé kut shut wú sù a nghut." ga luí, haú yuq lé tân kat ri.

⁴² Hau htâng, yhang Yesuq lé tai é gi, "Yesuq é, Nàng, Náng é mingdán má jé ló jáng, ngo lé myit bun laq ô." gá ri.

⁴³ Haú hkún, Yesuq gi, "Ngò, nang lé teng za tai lé, hkú-nyí yhang náng Ngò eq rahá hparadisú* má nyi rá nghut lhê." ga luí, yhang lé tú tai kat ri.

✧ 23:30 Hos 10:8 * 23:43 Hparadisú nghu é gi, mauhkùng mingdán lé tai ri.

Yesuq Soqkang Byit É Hkyô
Mht 27:45-56; Mrk 15:33-41; Yhn 19:28-

30

⁴⁴ Haú ahkyíng gi, nyí káng raxe í hkyíng nghut luí, myinhthàng sum hkyíng jé shoq ramau gón mauchut tuq dut byuq bê nghut ri;†

⁴⁵ hkâsu mù gâ le, builoq shum byuq é yanmai nghut ri. Noqkuq yhùm mã é pân-gyang le, í hkyam byáng dut byuq bê nghut ri.

⁴⁶ Haú hkûn, Yesuq gi, "Áwa ê, Ngò, Ngá é woi-nyí náng é loq mã ap byí lhê." ga htê mó èq garú kat ri. Haú su ga ban tái eq, Yhang káng byit bê nghut ri.

⁴⁷ Shô up gyezau hpó gi, haú su dut é lé myàng jáng, "Shí yuq gi, gè gè yhang, dtingmán sù nghut ri." ga luí, Garai Gasang lé hkya-on kungton ri.

⁴⁸ Haú hkyô lé wú râ ga, lé zîng tô é byù lhunglhang bang le, haú su dut é hkyô pé lé myàng kôjáng, myit yón kôluí, wànggàng bat mù, dum taú ló byuq bekô.

⁴⁹ Nghut kôlhang, Yhang lé sê é bang eq Galile mau mai Yhang htàng châng é myiwe wui gi, we we mã yap to mù, haú hkyô pé lé byu wú nyi akô.

Yesuq É Màng Lé Lup Hkaú Mã Kat É Hkyô

Mht 27:57-61; Mrk 15:42-47; Yhn 19:38-42

⁵⁰ Haú hkûn, Yuda mau Aramahti gâ é myuq mã, Yosep gâ é sù rayuq nyi ri. Haú yuq gi, nhik bo é sù eq dtingmán é sù nghut é htoq agó, Garai Gasâng é mingdán jé râ hkyô lé myit myoqbyu to sù le, nghut mù luí,

⁵¹ yhang gi, Yudaq uphkâng hpúng mã é rayuq nghut kôlhang, hpyé lhùm é hkyô mã le, zui saí é hkyô mã le, myit a bo huí lom é sù nghut ri.

⁵² Yhang gi, Pilat chyáng wàng luí, Yesuq é gungsôm lé dúng yu ri.

⁵³ Haú mù, gungsôm haú lé tapzîng mai hkyut hkyô yù luí, pán yúng èq htup yup mù, ó lé lhang a kat wú shí é, luqqok lé kyúng tô é luqqok lup hkaú mã kat tô ri.

⁵⁴ Haú nyí gi, Hên Lajang Buinyi nghut luí, Bánno buinyi jé râ za nghut bê.

⁵⁵ Galile mau mai Yesuq eq rahá htoq lé lo é myiwe zo wui le, Yosep htàng mã châng é luí, lup haú lé le, Yesuq é gungsôm lé le, hkâsu kut tô tô é lé, ê myang akô.

⁵⁶ Hau htàng, yhangmoq gi, yhùm shut taú lò mù, Yesuq é gung sôm lé but byi râ matú, namngón é jung eq mura xù lé hen tô akô. Bánno buinyi mã kúm gi, tarâ joq é eq rajung za, yhangmoq yuban bán nyi bum akô nghut ri.

† 23:44 Nga-nhùng é nyí káng raxe í hkyíng gi, Yudaq byù pé é napkyô hkyuq hkyíng nghut lhê; yhangmoq é gau hkyíng gi, nga-nhùng é myinhthàng sum hkyíng nghut bê.

24

Yesuq, Dum Dui Toq É Hkyô
Mht 28:1-10; Mrk 16:1-8; Yhn 20:1-10

¹ Bánno buinyi htang napsûn noq le, myiwe wui gi, yhangmoq hen tô é namngón jung pé lé yu chùng mù, lup shut e ló akô.

² Yhangmoq gi, lup mã é luqhkum lêng bống to lánng é lé, ê myàng kômù,

³ wang e wú kô le, haú Yhumsîng Yesuq é gungsôm lé, a myàng lo kó nghut ri.

⁴ Yhangmoq mau úng-âng nyi bùm kô é hkûn, radá dâm maulhap su duqbó é mebu wut é byù í yuq, yhangmoq é nam mã yap tô akô.

⁵ Haú mù, myiwe haú bang gi, gyuq dan bum kôluí, myigùng shut myoqdong ngóm gop tô bum é u lé, haú nhik gi, "Nungmoq gi, dui sù lé, shi to bâng chyáng haí mù ho nyi akô lhuí?

⁶ Yesuq gi, shí mã a nyi lo; Yhang dui toq lo bê! Yhang gi, nungmoq eq rahá Galile mau mã nyi tô ashí hkûn lé,

⁷ "Haú Byu Yhangzo gi, yubak dap bâng é loq mã ap pyâm é huí luí, tapzîng mã jén sat to huí é htàng, sum nyi nghú é buinyi mã lhoq dui toq yu é huí râ nghut lhê." ga nungmoq lé tái tô é dang lé myit bun keq." ga luí, yhangmoq lé tái ri.

⁸ Haú hkûn, yhangmoq gi, Yesuq é dang lé bûn kat bekô nghut ri.

⁹ Yhangmoq gi, lup mai dum taú lò mù, lagyo raxe rayuq eq gotú lhunglhang bang lé, haú hkyô banshoq lo tái kyô akô.

¹⁰ Lagyo pé lé lo tái kyo bang gi, Mag-adalaq wa mã é Mariq, Yoanaq, Yakuq é yhangnu Mariq eq, yhangmoq eq rahá nyi é myiwe góbang le nghut akô.

¹¹ Lagyo pé kúm gi, yhangmoq é dang lé dangsôm su ngam pyám kôluí, a jing byi kó nghut ri.

¹² Nghut kôlhang, Petruq gi, toq luí lup mã dín jé é mù ngóm wú kat le, màng htup é pán leq tô é lé za myàng mù luí, haú su dut é hkyô lé mau é èq, yhùm shut dum taú ló byuq bê nghut ri.

Chángzo Í Yuq Lé Yesuq Htoq Shit É Hkyô
Mrk 16:12-13

¹³ Haú ra-nyí mã za, Yesuq é chángzô pé mã é í yuq gi, Yerusalem wà mó mai nyhit dèng kô wê é Ema-u gâ é wà shut e ló akô.

¹⁴ Yhangnhik gi, dut lai ló é hkyô pé banshoq lé, rayuq eq rayuq tái lhùm nyi akô.

¹⁵ Yhangnhik gi, haú hkyô pé lé rayuq eq rayuq tái hpyé lhùm e ló kô le, Yesuq gi, yhangnhik chyáng jé lé lò mù, yhangnhik eq rahá sô nyi ri.

¹⁶ Nghut kôlhâng, yhangnhik gi, myoq hpuq hpuq pyám byí é lui kômù, Yhang lé a sê wú byuq kó nghut ri.

¹⁷ Hau hkûn, Yesuq gi, yhangnhik lé, "Nungnhik hkyô so uchyang tai lhum lé lo é gi, hai jung wa nghut akó lhu?" ga myi kat jang, yhangnhik gi, myoqdong shum kut lui, hkying yap to akó.

¹⁸ Yhangnhik ma é Hklupa ga é sù gi, "Nang gi, Yerusalem wa mó má lé bing nyi lui nhing, shí gyoro lé hau wa má dut lo é hkyô pé lé, a sê é bing gi, Nang bau za wa nghut lhê lhu?" ga myi kat ri.

¹⁹ Yhang gi, "Hai jung lhu?" ga dum myi é hkûn lé, yhangnhik gi, "Nazaret wa byu Yesuq é hkyô nghut lhê; hau yuq gi, Garai Gasang é hí má le, byu lunglhâng bang é hí má le, nhut shô hpaqchyí a-tsam eq hkyi loq a-tsam má wum-o bo é sù myiqhtoi nghut ri.

²⁰ Nghut kôlhâng, hkyangjong agyi pé eq ngamoq é zau suwún wui eq hau yuq lé sat pyám rá matú ap byí pyám kômù, yhangmoq gi, Yhang lé tapzing má jén sat pyám bekó nghut ri.

²¹ Ngamoq kúm gi, hau yuq lé, Israelaq byu myú lé hkyi yú rá sù nghut lhê nghu lui, myit myoqbyu nyi bum lhê. Nghut kôlhâng, hau su dut lai lo é gi, hkû-nyi sum nyi lhang bó bê.

²² Hau htoq agó, hkû-nap noq le, lup má é wú é, ngamoq hpung má é myiwe wui ra-am gi, ngamoq lé, lo lhoq mau akó.

²³ Yhangmoq gi, Yesuq é gungsóm lé a myang jang dum tai lò mù, "Hau Yhumsing dui nyi ri." ga lui, tai kyô é maumang lagyo htoq shit é shing-rán lé, myang é hkyô lé lo tai kyô akó.

²⁴ Hau mù, ngamoq é luzúm wui ra-am gi, lup má é wú kó le, myiwe wui tai é eq rajung za, dut to lánng é lé é myang akó. Nghut kôlhâng, hau yuq lé gi, yhangmoq a myang kó gá." ga lui, Yhang lé tai kyô akó.

²⁵ Hau hkûn, Yhang gi, "Myiqhtoi pé tai é dang banshoq lé lumjing rá matú, hpaqchyí a bo é eq ngha é sù nhik é,

²⁶ Hkrisduq gi, hau su é wuihke jamjau hkâm zô yu é htang má sheq. Yhâng é hpung-wup shingkang má wó wang nyi to rá, a nghut kó lhu?" ga lui, yhangnhik lé myi ri.

²⁷ Yhang gi, yhangnhik lé, Mosheq ká tô é eq myiqhtoi pé banshoq bang ká tô é Chyúmdang pé mai, Yhang má ang é dang banshoq é lichyúm lé, tai hpông kyô ri.

²⁸ Ahkuí, yhangmoq, hau nhik é rá é wa má chyâng lò kôjáng, Yesuq gi, lai lò rá su kut ri.

²⁹ Hau hkûn, yhangnhik gi, "Nga-nhik eq rahá wang bing shang; hkâsu mù gá le, buigyum bê mù, mau le chut lò bê nghut ri." ga lui, Yhang lé wum kat chom lung nyi akó. Hau mù lui, Yesuq gi, yhangnhik eq rahá wang bing bê nghut ri.

³⁰ Yesuq gi, zang zo rá ga, yhangnhik eq rahá zung tô é hkûn, muk lé yu lui, jeju hkyan mù, myhik hpé lui, yhangnhik lé gám byi ri.

³¹ Hau hkûn, yhangnhik é myoq bóng lò lui, Yesuq nghut é lé bún sé kat bekó. Yesuq kúm gi, yhangnhik chyáng mai byuq byuq bê nghut ri.

³² Hau mù, yhangnhik gi, "Yhang gi, hkyô má ngá-nhik eq dang nyo lhum é eq Chyúmdang é lichyúm tai hpóng shit é hkûn, ngá-nhik gi, i-myt unghkau má, achyi aku dut bê a nghut lhu?" ga lui, yhangnhik yhangchang tai lhum akó.

³³ Yhangnhik gi, toq mù, radá dâm Yerusalem wa mó shut dum tai lò kó le, lagyo raxe rayuq eq, yhangmoq eq rahá nyi é bang zup ming to kó é lé lò myang akó.

³⁴ Hau bang gi, "Hau Yhumsing gi, teng za yhang dum dui toq lò bê; Simun lé lhang htoq shit bê nghut ri." ga tai lhum nyi bum akó.

³⁵ Hau hkûn, yhangnhik gi, hkyô má dut lai lò é hkyô pé eq, muk hpé é hkûn má Yesuq lé bún sé kat é hkyô lé, tai kyô akó nghut ri.

*Chángzô Pé Lé Yesuq Htoq Shit É Hkyô
Mht 28:16-20; Mrk 16:14-18; Yhn 20:19-23; Lagyo 1:6-8*

³⁶ Yhangmoq hau hkyô lé chom tai nyi tò bum ashí le, Yesuq gi, Yhang gung yhang, yhangmoq é agung má yap to lui, "Nungmoq nguingón ucyyo nyi shang gaq." ga lui, yhangmoq lé tai ri.

³⁷ Yhangmoq kúm gi, gyuq dan byuq bùm kômù, sobyô lé myang bê ga myit yu pyám bum akó.

³⁸ Hau mù lui, Yhang gi, "Nungmoq gi, hai mù dan nyi bum akó lhu? Hai mù nungmoq é i-myt unghkau má úng-ang nyi bum akó lhu?"

³⁹ Ngá é loq eq Ngá é hkyi lé wú wú keq. Ngò yhang nghut nyi lhê. Ngo lé sop wú keq. Sobyô nghú é gi, ngo lé nungmoq myang é su, sho eq showui showang bo é a nghut." ga lui, yhangmoq lé tai kyô ri.

⁴⁰ Yhang gi, hau su ga tai mù, Yhâng é hkyi loq lé tún shit ri.

⁴¹ Yhangmoq gi, gabú é eq mau nyi bùm kômù, a wó jing shi dut tô é hkûn lé, Yesuq gi, "Nungmoq shí má zôhpo rajung jung wó akó lhu?" ga lui, yhangmoq lé myi kat ri.

⁴² Hau hkûn, yhangmoq gi, nyhin nyhoq tô é ngozo rahtung lé, byi akó.

⁴³ Yhang gi, hau lé yu mù, yhangmoq é hí má zô shit ri.

⁴⁴ Hau htang, Yhang, yhangmoq lé tai é gi, "Mosheq é tará eq, myiqhtoi laiká pé má le, Hkya-on Kungtôn Laiká pé má le, Ngò eq séng lui ká to má ká to banshoq gi, dik rá chyat nghut lhê nghu lui, nungmoq eq rahá

nyi to ashî hkûn lé, Ngò, nungmoq lé tai kyô tô é pé gi, shî nghut bê." ga tai ri.

⁴⁵ Hau htâng, Yhang gi, Chyúmdang pé lé sê gyo shoq ga, yhangmoq é i-myt hkum hpông byî ri.

⁴⁶ Hau mù, Yhang gi, "Hkrisduq gi, wuîhke jamjau hui zo mù, sum nyî nghû râ buinyî má, shî é mai dum dui toq lô râ hkyô lé le,

⁴⁷ Yerusalem wà mó mai hî luí, byù myú chângjup lé, Yhâng é mying lé lang luí yubak mara hkyut pyám byi râ hkyô eq myit lhîng râ hkyô lé le, hko kyo râ hkyô lé, kâ to bê nghut ri.

⁴⁸ Nungmoq gi, shî pé é saksé pé nghut nyi akò.

⁴⁹ Ngá Wa byî tô é danggidiq* lé, Ngò, nungmoq é ahtoq má nhang kat râ nghut lhê; nungmoq kúm gi, htoq tsáng myhâng mâ é wum-o a-tsam wó yu é buinyî jé shoq, Yerusalem wà mó má láng nyî keq." ga luí, yhangmoq lé tai ri.

Yesuq Mauhkûng Shut Shui Toq Yu Hui É Hkyô

Mrk 16:19-20; Lagyo 1:9-11

⁵⁰ Hau htâng, Yhang gi, yhangmoq lé Behtani wà yàm shut shui htoq é mù, Yhâng é loq tu toq luí, shimân byî ri.

⁵¹ Hau su kut shimân byi nyi ashî le, Yhang gi, yhangmoq chyáng mai gâng lô byuq luí, mauhkûng shut shui toq yu é hui bê nghut ri.

⁵² Yhangmoq kúm gi, Yhang lé noqkuq kômù luí, gyai gabú é myit èq Yerusalem wà mó shut dum tau lô akò.

⁵³ Yhangmoq gi, noqkuq yhùm má nyi to mù, Garai Gasang lé hkya-on kungton nyi bum akò nghut ri.

* **24:49** Ngá Wá byi tô é danggidiq nghu é gi, Chyoiyúng é Woi-nyí lé tai ri.

YOHAN é Gabú Danglù Laiká (The Gospel of John)

Haù Mungdang, Xângzo Byù Gùng Lé Dut É Hkyô

¹ A-nham sâng-hi má, Mungdang joq ri; Mungdang haù gi, Garai Gasang eq rahá nghut luí, haù Mungdang yhang Garai Gasang nghut ri.

² Yhang gi, a-nham sâng-hi má, Garai Gasang eq rahá nghut nyi ri.

³ Nyi mi-nyì, joq mijoq gi, Yhang đông mai hpan tó é chyat nghut lhê; Yhang đông mai a hpan é gi, haì lhang a joq nghut ri.

⁴ Asak chyungxe gi, Yhang má nghut lhê mù, asak haù gi, byu pè é matú maubó nghut ri.

⁵ Haù maubó gi, mauchut má duqbó byì nyì kôlhang, mauchut gi, haù lé a hap yù nghut ri.

⁶ Garai Gasang mai nhang kat é, Yohan gá é byù rayuq jé lé ri.

⁷ Yhang gi, maubó haù eq sêng é hkyô lé, saksé hkám byì luí, yhang é yanmai byù lhunglhang bang wó lumjing kó sháng gaq ga, saksé rayuq đông jé lé é sù nghut ri.

⁸ Yhang gi, haù maubó a nghut; maubó haù lé saksé hkám byì rà matú za sheq jé lé é ru nghut lhê.

⁹ Byù yuq jup lé duqbó byì é, maubó akying haù gi, mingkan htoq má jé nyi to bê.

¹⁰ Yhang gi, mingkan htoq má nyi to bê nghut ri; mingkan lé gi, Yhang đông mai hpan tó é nghut kôlhang, mingkan haù gi, Yhang lé a wú sé nghut ri.

¹¹ Yhang gi, yhumsing mau má jé lé kôlhang, Yhâng é amyù pé gi, Yhang lé a lhom hap yù kó nghut ri.

¹² Nghut kôlhang, Yhang gi, Yhang lé lhom hap yù luí, Yhâng é mying lé lumjing é bang lhunglhang lé, Garai Gasâng é yhangzô pé dut rà ahkáng byì bê nghut ri.

¹³ Haù bang gi, sui sho đông hku kat é le a nghut, byù ò nau é đông hku kat é le a nghut, gungsho ò nau é đông hku kat é le a nghut e za, Garai Gasang chyáng mai hku kat é bang ru nghut lhê.

¹⁴ Haù Mungdang gi, xângzo byù gùng lé dut luí, ngamoq chyáng nyi wú bê nghut lhê. Ngamoq gi, haù jeju eq tengmán hkyô bying tó é, Yhang é hpungwup shing kang lé myang wú bê nghut lhê; haù gi, haù Íwá é zote rayuq đông, Yhang wó yu é hpungwup shing kang nghut ri.

¹⁵ Wui-myhup Sará Yohan gi, Yhang eq sêng é hkyô lé saksé hkám é hkún, garú tai

é gi, "Ngá é htâng má jé lé é Sù gi, ngá é hí mai nyi to bê sù nghut é yanmai, ngá htoq je gyaú sù nghut ri." nghú, ngò tai é sù gi, shí yuq nghut bê." gá ri.

¹⁶ Yhâng é gumjup é jeju ahkaù mai, nga-nhúng banshoq bang gi, shimán jeju lé ralhùm htoq ralhum myang yu nyi bê nghut lhê.

¹⁷ Hkâsu mù gá lé, haù jep é tarâ gi, Mosheq é loq đông mai byì é nghut lhê; jeju eq tengmán hkyô kúm gi, Yesuq Hkrisduq é yanmai lé joq é nghut lhê.

¹⁸ Garai Gasang lé, ó yuq èq le a myang wú wú é nghut lhê; nghut kôlhang, haù Íwá é tangkhoi má lúng tó é, Yhang Zo zote gi, Garai Gasâng é gùng lé lhoq htoq shit bê nghut ri.

Wui-myhup Sará Yohan Hko Kyô É Hkyô Mht 3:1-12; Mrk 1:1-8; Luk 3:15-17

¹⁹ Yerusalem wà mó má é Yudaq byu pé gi, hkyangjông pé eq Lewiq byu pé lé, Yohan ó yuq nghut é hkyô myí nhang kat kó é hkún, Yohan saksé hkám é gi, a-ô má é hkyô pé nghut ri.

²⁰ Yhang gi, a hê a zaú tó e za, "Ngò gi, Hkrisduq" a nghut." ga lhom tai kyô ri.

²¹ Haù hkún, yhangmoq gi, "Haù nghut jáng, nàng gi, ó yuq nghut lhê lúh? Nàng gi, Eliyaq lúh?" ga myi kôjáng, yhang gi, "A nghut." ga tai ri; "Nàng gi, haù Myiightoi nghut lhê lúh?" ga dum myi kôjáng, yhang gi, "A nghut." ga tù tai ri.

²² Haù mù, yhangmoq gi, "Ngamoq lé nhang kat bang chyáng ló wó tai kyo rà matú, nàng gi, ó yuq nghut lhê lúh? Nàng gùng lé nàng hkâsu nghú lhê lúh? Tai kyô wú laq." ga dum myi akó.

²³ Haù hkún, Yohan gi, myiightoi Esai-aq é dang eq rajung za, "Ngò gi, haù yoso má, 'Yhumsing é matú hkyô lhoq nyhang to keq.' gá é htê lé, garú tai é sù nghut lhê." gá gi tù tai ri.

²⁴ Hparishe pé mai nhang kat é bang ram gi, yhang lé,

²⁵ "Nàng gi, haù Hkrisduq le a nghut, Eliyaq le a nghut, Myiightoi le a nghut é nhing, haù mù luí, wui-myhup hkám byì nyi lhê lúh?" ga dangmyi myí akó.

²⁶ Haù hkún, Yohan tù tai é gi, "Ngò gi, wui èq za wui-myhup hkám byì lhê; nghut kôlhang, nungmoq a sê é sù rayuq nungmoq chyáng yap tó ri.

²⁷ Yhang gi, ngá htâng má lé é sù yuq nghut bê; ngò gi, Yhâng é hkyí-tsung tui lé hpyí rà lhang a gingdán é nghut ri." gá ri.

²⁸ Shí pé banshoq gi, Yohan wui-myhup hkám byì nyi é, Yodan làng hé hpoq má é Behtani wà má dut é hkyô pé chyat nghut ri.

* 1:20 Grik dong *Hkrisduq* gá é gi, xù but hui Sù gá é lichyùm nghut mù, Hebre dong "Mesaia" gá é eq rajung za nghut lhê. ✪ 1:23 Esai 40:3

Yesuq Gi, Garai Gasâng É Sauzo Nghut É Hkyô

²⁹ Hau htang nyí, Yohan gi, yhâng chyáng Yesuq lé lo nyí é lé myàng luí, taí é gi, "Míngkan byu pé é yubak mara lé yu pyám byí é Garai Gasâng é Sauzo lé, wú keq!"

³⁰ Shí yuq gi, 'Ngá é htâng má jé lé é Sù gi, ngá é hí má nyí bê sù nghut é yanmai, ngá htoq je gyaú Sù nghut ri.' nghũ, ngò taí é sù yhang nghut bê.

³¹ Ngò gi, Yhang ó yuq nghut é lé a sê é nghut lhê, nghut kôlhang, Yhang lé, Israelaq byu pé wó sé kó sháng gaq nghũ, ngò lé jé mù, wui èq wui-myhup hkám byí nyí é nghut lhê." gâ ri.

³² Hau htâng, Yohan saksé hkâm é gi, "Hau Woi-nyí gi, mauhkung mai hpúngkyui gunghkyang sù é đông mai gyó lé mù, Yhâng chyáng lé nô tô é lé, ngò myàng ri.

³³ Ngò gi, Yhang ó yuq nghut é lé a sê é nghut kôlhang, wui èq wui-myhup hkám byí rá matú, ngo lé nhang kat é Sù, ngo lé taí kyô é gi, 'Hau Woi-nyí gyó lé lô mù, ó yuq chyáng lé nô tô é lé, nàng myàng jáng, hau yuq gi, hau Choyiyung Woi-nyí má wui-myhup hkám byí rá sù nghut lhê.' gâ ri.

³⁴ Hau èq rajung za ngò myàng bê nghut luí, shí yuq gi, Garai Gasâng é Yhangzo nghut lhê nghũ, ngò saksé hkâm lhê." gâ ri.

Sâng-hi Lhê É Chángzô Pé

³⁵ Hau htang nyí, Yohan gi, yhâng é chángzo í yuq eq rahá, hau má dum nyí tó akò.

³⁶ Hau hkùn, yhang gi, Yesuq lai ló nyí é lé myang kat jáng, "Hé, Garai Gasâng é sauzo lé, wú keq!" ga taí kat ri.

³⁷ Chángzo hau í yuq gi, yhang hau su gâ é lé wó gyo kôjáng, Yesuq é htâng cháng bekò nghut ri.

³⁸ Yesuq gi, lhang wú kat le, yhangnhik châng tô é lé myàng luí, "Nungnhik haí ó akò lhú?" ga myí jáng, yhangnhik gi, "Rabai ê, Nàng hkámá nyí lhê lhú?" ga taú myí kat akò nghut ri. (Rabai gâ é gi, Sará gâ é lichyúm nghut lhê.)

³⁹ Hau hkùn, Yhang gi, "Lé keq, hau jáng, nungnhik myàng kó rá nghut lhê." ga tú taí ri.

(Hau-u gi, raxê hkyíng[†] kô nghut ri.) Hau mù luí, yhangnhik gi, châng é mù, Yhang hkámá nyí é lé, é myàng kôluí, hau nyí buigyúm shoq, Yhang eq rahá é nyí nyí akò nghut ri.

⁴⁰ Yohan taí é dang lé wó gyo luí, Yesuq htâng châng é su nhik má é rayuq gi, Simun Petruq é yhanggu Andre nghut ri.

⁴¹ Andre gi, yhangmang Simun lé hí myàng luí, "Nga-nhik gi, Mesaia lé myàng

bê." ga yhang lé taí kyô ri. (Mesaia gâ é lichyúm gi, Hkrisduq gâ é nghut lhê.)

⁴² Hau htâng, yhang gi, yhangmang lé Yesuq chyáng shuí e ri.

Yesuq gi, Simun lé lhom myàng jáng, "Nàng gi, Yohan é yhangzo Simun nghut ri; Kehpa[‡] gâ é mying lé, nàng wó yú rá nghut lhê." ga taí ri. (Kehpa gâ é lichyúm gi, Petruq gâ é nghut lhê.)

Hpilip Eq Nahtanelaq Lé Hkyin Yu É Hkyô

⁴³ Hau htang nyí, Yesuq gi, Galile mau shut é rá matú, myit hpyit yú bê nghut ri. Yhang gi, Hpilip lé myàng jáng, "Ngá htâng cháng aq." ga taí ri.

⁴⁴ Hpilip gi, Andre eq Petruq nhik nyí é Bet-saida và mó má é byù nghut ri.

⁴⁵ Yhang gi, Nahtanelaq lé myàng jáng, "Mosheq mai tará laiká má kâ tô é eq myiqh-tóí pé mai le hoq ang lui kâ tô é sù, Yosep é yhangzo, Nazaret và byù Yesuq lé, ngamoq myàng bê." ga yhang lé taí kyô ri.

⁴⁶ Hau hkùn, Nahtanelaq gi, "Nazaret và ô! Hau mai, ge é jung haí wa wó htoq lhê lhú?" ga myí jáng, Hpilip gi, "Ru lé wú aq." ga yhang lé taí ri.

⁴⁷ Yesuq gi, Yhâng chyáng Nahtanelaq lé lo nyí é lé myàng jáng, yhang lé hoq ang lui, "Wú keq, shí yuq gi, mhaú é myit a bo é sù, Israelaq byù akying rayuq nghut ri." ga taí ri.

⁴⁸ Hau hkùn, Nahtanelaq gi, "Nàng, ngo lé hkásu kut sé é lhú?" ga myí jáng, Yesuq gi, "Nang lé, Hpilip èq a wut yú shimá, nàng, maihpáng gâm ô má ru nyí tó ashí hkùn, Ngò, nang lé myàng bê nghut lhê." ga tú taí ri.

⁴⁹ Hau mù, Nahtanelaq gi, "Rabai ê, Nàng gi, Garai Gasâng é Yhangzo nghut ri; Nàng gi, Israelaq byu pé é Hkòhkâm le nghut ri." ga taí ri.

⁵⁰ Hau hkùn, Yesuq gi, "Ngò, nang lé, maihpáng gâm ô má myang é nghũ taí kyô é yanmai, nàng lumjing lhê a nghut lhú? Hau htoq je kô é muzó pé lé, nàng myàng rá nghut lhê." ga taí ri.

⁵¹ Hau htâng, Yesuq xoq taí é gi, "Ngò, nungmoq lé teng za taí kôlé, mauhkung bóng lô luí, hau Byu Yhangzô ahtoq má, Garai Gasâng é maumang lagyô pé doq lô gyó lô kut nyí kô é lé, nungmoq myàng kó rá nghut lhê." gâ ri.

2

Wui Lé Tsiyiq Wing Dut Nhang É Hkyô

¹ Hau htâng, í nyí nghũ rá nyí má, Galile mau má é Hkanaq và mó má, myiháng pôi ralhum joq ri. Hau má Yesuq é yhângnu le, bo lom ri.

[†] 1:39 Raxê hkyíng gi, myinhâng myí hkyíng záng ri. [‡] 1:42 Aramaik dang đông *Kehpa* gâ é eq Grik dang đông "Petruq" gâ é lichyúm gi, luqgok gâ é nghut lhê.

2 Yesuq eq Yhâng é chángzô pé lé le, my-ihâng poi haù má ji akò nghut ri.

3 Tsibiyiq wing jaù tùm to kô é hkùn, Yesuq é yhângnu gi, "Yhangmoq, tsibiyiq wing a wó lo kó nghut ri." ga, Yesuq lé tai ri.

4 Haù hkùn, Yesuq gi, "Ánu ê,* haù, nàng gi, Ngò eq haì sêng lhê lú? Ngá é ahkyíng a jé shì é nghut lhê." ga tũ tai ri.

5 Nghut kôlhang, Yhâng nu gi, haù dui-nhâng zoshâng wui lé, "Yhang hai tai le, hai kut keq." ga tai ri.

6 Haù nàm má, í sum xê galan kô wang é luqgok wúng hkyuq cham joq tô ri; haù gi, Yudaq byu pé mai, lhoq san lhoq yúng hkíng é matú, chung é jung wúng nghut ri.

7 Yesuq gi, haù dui-nhâng zoshâng wui lé, "Wúng haù pé má wui lhoq pyíng keq." ga tai ri; haù mù, yhangmoq gi, wúng haù pé má byíng shoq shoq lhoq pying bekò nghut ri.

8 Hau htâng, Yhang gi, yhangmoq lé, "Ahkuí, ratsuí hkú yù mù, poi-up lé yu ló byi keq." ga tai jáng, yhangmoq gi, yu ló byi akò nghut ri.

9 Poi-up hpó gi, wui mai dut é tsibiyiq wing haù lé, shuq chyam wú ri; wui hkam é dui-nhâng zoshâng wui gi, tsibiyiq wing haù hkâmai lo é hkyô lé sé to kôlhang, yhang gi, a sé nghut ri. Haù mù, yhang gi, lusik lé, ji yù lui,

10 "Yuq hkangmó gi, tsibiyiq wing mún lé hí jaù mù, bíng pé shuq gyí bùm jáng sheq, tsibiyiq wing apyâng lé ru yu htoq lhê; nghut kôlhang, nàng gi, ngâm é tsibiyiq wing lé, ahkuí jé shoq wó hkong tô ri-nhung!" ga tai ri.

11 Galile mau má é Hkanaq wà mó má, Yesuq tũn shit é limik kumlhá gi, Yhang kut é limik kumlhá pé má é sâng-hí dàm nghut ri. Yhang gi, Yhâng é hpungwup shíngkang lé, haù dõng lhoq htoq shit é nghut mù lui, Yhâng é chángzô pé gi, Yhang lé lumjíng bum akò nghut ri.

Noqkuq Yhùm Lé Lhoq Sansêng Pyâm É Hkyô

Mht 21:12-13; Mrk 11:15-17; Luk 19:45-46

12 Hau htâng má, Yesuq gi, Yhâng nu, Yhâng gu yuqzo pé eq Yhâng é chángzô pé le mù, Kaperna-um wà má gyó ló ri; yhangmoq gi, haù má buinyi myi ngò nyi nyi akò nghut ri.

13 Yudaq byu pé é Lhoqlhai Poi jé rá nghut é hkùn, Yesuq gi, Yerusalem wà mó má doq ló ri.

14 Haù hkùn, noqkuq yhùm wàng má, nojúng, sau, hpúngkyui pé lé ùng nyi é bang lé le, siboí má ngùn htaí zô zung nyi é bang lé le, Yhang ló myàng ri.

15 Haù mù, Yhang gi, tui lé, nhuq rá wase saí yù mù, banshoq bang lé le, sau eq nojúng lé le, haù noqkuq yhùm wàng mai hkat htoq lui, ngùn htaí zo bâng é ngùn htingchap lé gi, tũ hut pyám byi mù, yhangmoq é siboí lé gi, tu mhug pyám byi ri;

16 haù hpúngkyui ung zô é bang lé le, "Zè shì pé lé yu htoq ló keq! Ngá Wá é yhùm lé, hpugá jawò hkâkut kó!" ga lui nhik-yô ri.

17 Haù mù, Yhâng é chángzô pé gi, "Ngò, Náng é yhùm lé chyitdap kàng tui é hkyô gi, Ngo lé myi su nyê jôm pyám rá nghut lhê."* ga ká tô é lé, myit bún kat akò nghut ri.

18 Yudaq byu pé gi, Yhang lé, "Nàng, shí pé kut rá ahko ahkáng wó é hkyô lé saksé tũn shit rá matú, ngamoq lé, hai jung limik kumlhá wó tũn shit rá lú?" ga chòm myi akò nghut ri.

19 Haù hkùn, Yesuq gi, "Noqkuq yhùm shí lé nungmoq hpyoq pyám keq, sum nyí gyoro má, Ngò, haù lé dum tu shap rá nghut lhê." ga, yhangmoq lé tũ tai ri.

20 Haù Yudaq byu pé gi, "Noqkuq yhùm shí lé, myi xé hkyuq zán tup saí é ru nghut lhê; sum nyí gyoro má za, Nàng wó tu shap rá lú?" ga tu myi akò nghut ri.

21 Nghut kôlhang, Yesuq tai é noqkuq yhùm gi, Yhâng é gùng lé lhoq ang lui tai é nghut ri.

22 Haù mù, Yhang, shì é mai lhoq dui toq huí é hkùn sheq, Yhâng é chángzô pé gi, Yhang haù su ga tai é dang lé myit bun kômù, Chyúmdang lé le, Yesuq tai é dang pé lé le, lumjíng akò nghut ri.

23 Haù Lhoqlhai Poi nghut é u lé, Yerusalem wà mó má Yesuq nyi nyi é hkùn, byù myo myo gi, Yhang kut shit é limik kumlhá pé lé myàng kômù, Yhang lé lumjíng bum akò nghut ri.

24 Nghut kôlhang, Yesuq gi, byù lhunglhâng bâng é myit lé sé é yanmai, yhangmoq chyáng, Yhânggùng lé a ap to nghut ri.

25 Yhang gi, byu é i-myt unghkaù má hai lúng tô é lé sé é yanmai, byù yhangchang saksé hkám byí é a ra nghut ri.

3

Nikodimu Lé, Yesuq Mhoqshit É Hkyô

1 Nikodimu gá é Hparishe rayuq nyi ri; yhang gi, Yudaq byu pé é byin tú wapdoq má bo é sũ nghut ri.

2 Yhang gi, myín lé, Yesuq chyáng lé mù, "Rabai ê, Nàng gi, Garai Gasâng chyáng mai lé é sará rayuq nghut é lé, ngamoq sé lhê. Hkâsu mù gá le, Nàng kut shit é limik kumlhá pé gi, Garai Gasang a lom é nghut jáng, ó yuq le wó kut rá a nghut." ga tai ri.

* 2:4 Ánu é gá é lé, Grik dõng gi, "Myiwe myí ê" ga bo tô é nghut lhê. * 2:17 Hkya-on 69:9

³ Haú hkún, Yesuq gi, yhang lé, "Ngò, nàng lé teng za tai kyo lé, ó yuq nghut kôle, dum hku é hui sù za a nghut le gi, Garai Gasâng é mingdán lé wó myâng rà a nghut." ga tù tai ri.

⁴ Haú jáng, Nikodimu gi, "Ipyat kó bê é byù gi, dum hkú é hkâsu kut wó hui rà lhú? Ínú é unghkaú má dum wàng mù, dum hku é hui rà gi, gè gè yhang wó dut rà a nghut!" ga tai ri.

⁵ Haú hkún, Yesuq gi, "Ngò, nàng lé teng za tai kyo lé, ó yuq nghut kôle, wui eq Woi-nyí mai hku kat é hui sù za a nghut le gi, Garai Gasâng é mingdán má wó wàng rà a nghut.

⁶ Gungsho mai hku kat é gi, gungsho nghut ri; Woi-nyí mai hku kat é kúm gi, woi-nyí nghut ri.

⁷ Nungmoq gi, dum hku é hui rà lhê' nghú Ngò tai é dang lé, nàng hkâmai nyí.

⁸ Haú, lai gi, yhang nau é shut lò lhê. Lai lò htê lé nàng wó gyo kôlhang, lai hkâmai lo é eq, hkâ shut lò é lé, nàng sé rà a nghut; haú Woi-nyí mai hku kat hui é sù, ó yuq nghut kôle, haú eq rajung za a nghut lhê." ga tù tai ri.

⁹ Haú hkún, Nikodimu gi, "Haú gi, hkâsu wó dut rà lhú?" ga myí ri.

¹⁰ Yesuq tù tai é gi, "Nàng gi, Israelaq byu pê é sará rayuq nghut lo lui nhing, haú hkyó pé lé a sê gyo lhú?

¹¹ Ngò, nang lé teng za tai kyo lé, ngamoq gi, ngamoq sê é hkyó lé tai mù, ngamoq myang wú bê lé saksé hkâm lhê; nghut kôlhang, nungmoq gi, ngamoq é saksé lé a hap yù kó nghut ri.

¹² Ngò gi, nungmoq lé, mingkan eq sêng é hkyó lé tai kyò le lháng, a lumjng kô é nghut le gi, mauhkung mingdán eq sêng é hkyó lé tai kyò é nghut le gi, hkâsu kut wó lumjng kô rà lhú?

¹³ Mauhkung mingdán mai gyó lo é sù, haú Byu Yhangzo mai lai lui, mauhkung mingdán má ó yuq lháng wó doq lò wú é a nghut.

¹⁴ Mosheq gi, yoso má lhangmui lé tu shap tô é su, haú Byu Yhangzo le tu shap tô é hui rà rà nghut lhê.

¹⁵ Haú mù, haú Byu Yhangzo lé lumjng é yuq hkangmó gi, ahtum abyuq é asak wó yù rà nghut lhê.

¹⁶ Hkâsu mù gâ le, Garai Gasang gi, mingkan lé gyai yhang chuyitdap é yanmai, Yhang Zo lé lumjng é sù ó yuq nghut kôle, htên byoq é a hui é za, ahtum abyuq é asak wó yù sháng gaq ga, rayuq za é Yhâng é Zote lé byí pyám bê nghut ri.

¹⁷ Hkâsu mù gâ le, Garai Gasang gi, mingkan lé mara byi rà matú, Yhang Zo lé mingkan htoq má nhang kat é a nghut é za, Yhang é yanmai mingkan hkyi yu é hui rà matú sheq nhang kat é ru nghut lhê.

¹⁸ Yhang lé lumjng é sù gi, mara byí é hui rà a nghut; nghut kôlhang, Yhang lé a lumjng é sù kúm gi, Garai Gasâng é Yhangzo zote lé a lumjng é sù nghut é yanmai, mara byí é hui tò gù bê nghut ri.

¹⁹ Maubó gi, mingkan htoq má lé je tò bê; nghut kôlhang, byu pé kut é hkyó gi, agè ashop hkyó nghut é yanmai, yhangmoq gi, maubó lé chyt rà malaí, mauchut lé chyt akó nghut ri; haú gi, mara byí é hui rà hkyó yhang nghut ri.

²⁰ Agè ashop hkyó kut é sù ó yuq nghut kôle, maubó lé a ngui nghut ri; haú yuq gi, yhang kut é hkyó lhoq htoq kat rà lé gyuq é yanmai, haú maubó shut lé lò rà a nghut.

²¹ Nghut kôlhang, haú tengmán hkyó đông asak dui é sù ó yuq le, yhumsing kut é hkyó gi, Garai Gasang lom é hkyó lé, san za byu-myàng sháng gaq ga, haú maubó shut lé lo ri." gâ ri.

Yesuq Eq Séng Lui, Wui-myhup Sará Yohan Saksé Hkâm É Hkyó

²² Hau htâng má, Yesuq gi, Yhâng é chángzô pé eq rahá, Yuda mau shut wang lò mù, haú má rayoq zo nyi lui, wui-myhup hkâm byí ri.

²³ Haú u lé, Yohan gi, Salim nàm má é E-nun gâ é jowò má, wui gyai myo joq é yanmai, wui-myhup hkâm byí nyi ri; byu pé gi, abyit alan lé lò kómù, wui-myhup lé hkâm yu nyi bum akó nghut ri.

²⁴ (Haú gi, Yohan lé htóng a lhoq hkyó shí é hkun lhê é hkyó nghut ri.)

²⁵ Haú hkún, Yohan é chángzô pé ra-am eq Yudaq byù rayuq gi, lhoq san lhoq yung hkang eq séng lui, dang htíng htíng lhùm bum akó nghut ri.

²⁶ Hau htâng, yhangmoq gi, Yohan chyáng lé lui, "Rabai é, Yodan làng hé hpoq shut nàng eq rahá nyi lui, nàng eq saksé hkâm byí é Sù gi, ahkuí, wui-myhup hkâm byí nyi é nghut mù, yuq hkangmó gi, Yhâng chyáng e bum akó nghut ri mhai." ga, yhang lé tai akó.

²⁷ Haú eq séng lui, Yohan tù tai é gi, "Byù rayuq gi, mauhkung mai byí é za a nghut jáng, hai le wó hap yù rà a nghut.

²⁸ Ngò gi, Hkrisduq a nghut, Yhang é hí má nhang kat hui é sù za a nghut lhê.' nghú, ngò tai é lé, nungmoq yhang saksé nghut bum akó.

²⁹ Myisik wó é sù gi, lusik nghut ri. Lusik lé, láng yap tò é luzúm hpó gi, lusik é htê lé wó gyô é yanmai, gyai yhang gabú nyi ri. Haú sù é gabú hkyó gi, ngá é gabú hkyó nghut mù, ngó má bying jup nyi bê nghut ri.

³⁰ Yhang gi, kô jat lò ra rà nghut lhê; ngò gi, yom lò ra rà nghut lhê.

³¹ Ahtoq mai lé é Sù gi, lhunglhâng é ahtoq má nghut ri; myigùng htoq mã é sù kúm gi, myigùng htoq eq séng é nghut lui, myigùng

htoq eq sêng é dông za tai ri; mauhkûng mai lé é Sû gi, lhunglhang é ahtoq má nghut ri.

³² Yhang gi, wó myâng wó gyô é hkyô lé, saksé hkâm kôlhang, Yhang hkâm é saksé lé, ó yuq le a hap yù kô nghut ri.

³³ Yhâng é saksé lé hap yù é sù kúm gi, haù Garai Gasang gi, tengmán sù nghut ri ga, saksé shit é sù nghut bê.

³⁴ Garai Gasâng eq nhang kat é hui Sû gi, Garai Gasâng é mungdang lé tai ri; hkâsu mù gâ le, Garai Gasang gi, haù Woi-nyí lé, laké a kat e za byí é yanmai nghut ri.

³⁵ Haù Íwa gi, Zo lé chyitdap lui, jung hkgangmó lé Yhâng é loq má ap byi bê nghut ri.

³⁶ Haù Zo lé lumjing é sù ó yuq nghut kôle, ahtum abyuq é asak wó lhê; nghut kôlhang, haù Zo lé he-ngik pyâm é sù ó yuq nghut kôle, asak haù lé myâng rà a nghut; hkâsu mù gâ le, Garai Gasâng é nhikmo-yo hkyô gi, yhang chyáng ru joq nyi ri." gâ ri.

4

Yesuq Eq Samariq Myhí Hui Ê Hkyô

¹ Yesuq gi, Yohan htoq má, chángzo je lhoq myô é eq wui-myhup hkâm byí nyi ri gâ é hkyô lé, haù Hparishe pé wó gyô akô nghut ri.

² (Nghut kôlhang, gè gè ga jáng, Yesuq gi, Yhang wui-myhup hkâm byí é a nghut, Yhâng é chángzô pé sheq ru nghut akô.)

³ Haù hkyô lé, Yesuq sé jáng, Yhang gi, Yuda mau mai htoq mù, Galile mau shut dum taù ló bê nghut ri.

⁴ Ahkuí, Yesuq gi, Samariq mau mai sô lai ló rá dut bê nghut ri.

⁵ Haù mù, Yhang gi, Yakup mai yhang zo Yosep lé byí é maumyí rajap eq chyáng lhùm é, Suhka ga myhng é, Samariq mau má é wà mó ralhum má lo jé ri.

⁶ Haù má, Yakup é wuihtung le joq to lui, Yesuq gi, hkyô sô ngu é yanmai, wuihtung hau é nàm má zung gyô tô ri. Haù u gi, nyi-káng raxe í hkyíng* nghut bê nghut ri.

⁷ Haù hkûn, Samariq myiwe myhí rayuq wui lé hkam ri; Yesuq gi, yhang lé, "Ngo lé wui byi shuq laq." ga tai ri.

⁸ (Haù u gi, Yhâng é chángzô pé, zoshuq wui rá matù wà hkaù shut e byuq kô é ahkyíng nghut ri.)

⁹ Haù Samariq myiwe myhí gi, Yhang lé, "Nàng gi, Yudaq byu rayuq nghut to lui nhng, ngò Samariq myiwe myhí chyáng, haù mù shuq wui dng lhê lú?" ga tai ri. (Hkâsu mù gâ le, Yudaq byu pé gi, Samariq byu pé eq a zùm yap kô nghut ri.)

¹⁰ Haù hkûn, Yesuq gi, yhang lé, "Nàng gi, haù Garai Gasâng é chyunghuq lé le, nang lé

wui dung sù ó yuq nghut é lé le, sê é nghut le gi, noq mai Yhang lé dng tngbán lui, Yhang gi, nang lé asak-wui byi berá nghut lhê." ga tú tai ri.

¹¹ Myiwe myhí haù gi, "Yhumsing é, Nàng gi, wui hkâm rà zê hai le a wó, wuihtung le nik ri; haù asak-wui lé, Nàng hkâmá é wó yù rá lú?"

¹² Ngamoq é íwa Yakup gi, ngamoq lé wuihtung shí byí to bê nghut lhê; yhang yhang le, yhang zo pé le, yhang rém é dusak pé le, wuihtung shí má é wui shuq bekô nghut ri; Nàng gi, Yakup htoq je kô lhê lú?" ga Yhang lé tai ri.

¹³ Yesuq gi, "Wui shí lé shuq é sù ó yuq le, wuishit é dum hui rá nghut lhê.

¹⁴ Nghut kôlhang, Ngò byí é wui lé shuq é sù ó yuq nghut kôle, wuishit é hkâm-nhâm a hui lo rá nghut lhê. Ngò byí é wui haù gi, haù yuq má, ahtum abyuq é asak matù wuibúm dut rá nghut lhê." ga yhang lé tú tai ri.

¹⁵ Myiwe myhí haù gi, Yhang lé, "Yhumsing é, ngò gi, wui le a shit lo, shí má wui hkâm le a lé ra lo sháng gaq, wui haù ngo lé byi laq." ga tai ri.

¹⁶ Haù hkûn, Yesuq gi, "Ló mù, nung làng lé ló wut lò aq." ga, yhang lé tai ri.

¹⁷ Yhang gi, "Ngò, làng a wó." ga tai jáng, Yesuq gi, yhang lé, "Nàng, làng a wó gâ é gi, tng ri.

¹⁸ Hkâsu mù gâ le, nàng gi, yuqgè ngo yuq wó wú bê sù nghut ri; nàng, ahkuí wó tô é yuqgè le nung làng a nghut. Nàng gi, tng é dang tai bê nghut ri." ga tai ri.

¹⁹ Haù hkûn, myiwe myhí haù gi, "Yhumsing é, Nàng gi, myiqhtoi rayuq nghut é hkyô lé, ngò wú sé bê.

²⁰ Ngamoq é ichyí íwá pé gi, bùm shí má noqkuq kô é nghut lhê; nghut kôlhang, nungmoq Yudaq byu pé gi, Yerusalem wá mó za noqkuq jowò nghut lhê ga tai akô nghut ri." ga tai ri.

²¹ Haù hkûn, Yesuq tai é gi, "Myiwe myhí é, Ngo lé jng aq; bùm shí má le a nghut, Yerusalem wá mó má le a nghut e za, haù Íwa lé noqkuq rá ahkyíng, jé lò nyi bê nghut ri.

²² Nungmoq Samariq byu pé gi, yhumsing lhang a sê é lé, noqkuq akô; ngamoq kúm gi, ngamoq sê é lé noqkuq lhê; hkâsu mù gâ le, hkyi yù hkyô gi, Yudaq amyù mai lo é nghut lhê.†

²³ Nghut kôlhang, haù tng é dông noqkuq é bang gi, woi-nyí mai le, tengmán hkyô mai le, haù Íwa lé noqkuq rá ahkyíng gi, jé lo nyi bê nghut lui, ahkuí lhang jé to bê nghut ri; hkâsu mù gâ le, haù Íwa gi, haù su kut noqkuq é bang lé ô nau ri.

* 4:6 Nyí-káng raxe í hkyíng gi, Yudaq byu pé é hkyuq hkyíng nghut ri. † 4:22 Bun zo shí má, Yesuq tai nau é gi, hkyi yù hkyô lé, Garai Gasang gi, Yudaq byu pé dông danggidiq byi to é nghut é lé tai nau é nghut ri.

²⁴ Garai Gasang gi, woi-nyí ngthut lhê; haù mù, Yhang lé noqkuq é bang gi, woi-nyí mai le, tengmân hkyô mai le, noqkuq ra rá ngthut lhê." ga tai ri.

²⁵ Myiwe myhi haù gi, "Hkrisduq gâ é Mesaia jé lé rá ngthut é lé gi, ngò sê lhê. Yhang jé lé jáng, nga-nhúng lé banshoq tai sân kyo rá ngthut lhê." ga tai ri.

²⁶ Hau htâng, Yesuq gi, "Nàng eq dang nyo nyi é sù ngò gi, haù yuq ngthut lhê." ga tai ri.

Haù Chángzô Pé Dum Taù Jé Lo É Hkùn Lhé Hkyô

²⁷ Haù u lé, Yhâng é chángzô pé gi, dum taù jé lo bum akô; yhangmoq gi, Yesuq, myiwe rayuq eq dáng nyo nyi é lé lo myàng lui, maù byuq bum akô. Ngthut kôlhàng, "Nàng, haù ô ri lú?" ga le, "Haù mù Yhang eq dáng nyo nyi lhê lú?" ga le, Yhang lé ó yuq a myi kô ngthut ri.

²⁸ Hau htâng, myiwe myhi haù gi, yhâng é wui yambú lé tô pyâm to lui, wà shut taù wang ló mù, wà byù wui lé ló tai kyô é gi,

²⁹ "Ngò kut lai lò bê hkyô pé lunglhang lé, tai kyô é byù rayuq lé, lé wú keq! Yhang gi, Hkrisduq ngthut lhê abe?" gâ ri.

³⁰ Haù mù, yhangmoq gi, wà mai htoq lé lui, Yesuq chyáng lé lo bum akô ngthut ri.

³¹ Haù u lé, Yhâng é chángzô pé gi, Yhang lé, "Rabai ê, zoshuq zo aq." ga chôm tai akô.

³² Haù hkùn, Yhang gi, yhangmoq lé, "Nungmoq a sê é jung zoshuq zo rá Ngò wó lhê." ga tù tai ri.

³³ Haù mù, Yhâng é chángzô pé gi, "Yhang lé, rayuq yuq eq zoshuq lé dé byi é abe?" ga, rayuq eq rayuq tai lhum bum akô.

³⁴ Haù hkùn, Yesuq tai é gi, "Ngò lé nhang kat Sù ô nau é hkyô lé kut rá eq Yhâng é muzô jizô lé lhoq pân rá hkyô gi, Ngá é zoshuq ngthut bê.

³⁵ 'Kyôshu yoq jé rá gi, lhamó myi hkyap rá ashí.' ga, nungmoq lhaq tai lhê a ngthut kó lú? Ngò, nungmoq lé tai kôlé, nungmoq é myoq hpông lui, haù yò pé má wú kat wú keq! Kyôshi gi, myhíng lui, kyô shu yoq gi, jé to bê ngthut ri.

³⁶ Haù kyô hkyô sù eq kyô shu sù gi, rahá wó gabú kó sháng gaq ga, ahkuí lhang, haù kyô shu sù gi, yhâng é zuihpau lé myang yù lui, ahtum abyuq é asak é matú, kyôshi shù tsing to bê ngthut ri.

³⁷ Haù su mù, 'Rayuq gi, sân hkyô, góyuq gi, shù yù.' gâ é sanghkyang gi, têng ri.

³⁸ Nungmoq a zui sai tô é jang má é shù yù rá matú, nungmoq lé Ngò nhang kat bê ngthut lhê. Góbang gi, haù má wum kat zui sai to bê ngthut mù, nungmoq gi, haù bang zui sai é akyù lé shu yù bekô ngthut ri." gâ ri.

Samariq Byù Myo Myo Lumjng Kô É Hkyô

³⁹ "Yhang gi, ngò kut lai lò bê hkyô lunglhang lé, tai kyô ri." ga lui, myiwe myhi

haù saksé hkâm é yanmai, haù wá má é Samariq byù myo myo gi, Yesuq lé lumjng bùm bekô ngthut ri.

⁴⁰ Haù mù, Samariq byu pé gi, Yesuq chyáng lé jé kômù, yhangmoq eq nyi rá matú, Yhang lé lung kô é yanmai, Yhang gi, í nyi bo nyi bê ngthut ri.

⁴¹ Yhâng é dang pé é yanmai, byù myo myo gi, lumjng bang dut jat lò bekô ngthut ri.

⁴² Yhangmoq gi, myiwe myhi haù lé, "Ahkuí, ngamoq lumjng é gi, nàng tai é dang yanmai za a ngthut lo; ngamoq yhang wó gyo bê ngthut é htoq agó, shí yuq gi, gè gè yhang, mingkan é hkyi yù Sù ngthut é lé, ngamoq sé bê ngthut é yanmai ngthut lhê." ga chôm tai akô ngthut ri.

Mingsuwún Hpó É Yhangzo Lé Lhoq Gê Byi É Hkyô

Mht 8:5-13; Luk 7:1-10

⁴³ Í nyi lai jáng, Yesuq gi, haù mai Galile mau shut htoq é ló bê ngthut ri.

⁴⁴ "Myightoi gi, yhumsing é mau má myoqdong a wó wú é ngthut lhê." ga, Yesuq yhang saksé hkâm é ngthut lhê.

⁴⁵ Yesuq gi, Galile mau má jé é hkùn, Galile byu pé gi, Yhang lé lhom hkulum yu akô; yhangmoq gi, Yerusalem wá mó má, Lhoql-hai Poi é lóm kô é ngthut é yanmai, poi u lé, Yesuq kut é hkyô lunglhang lé, myàng kô é bang ngthut ri.

⁴⁶ Yesuq gi, Yhang mai haù wui lé tsibiyiq wing dut nhang é, Galile mau má é Hkanaq wá mó má, é dum kúm ri. Haù ming suwún rayuq é yhangzo yuqzo gi, Kaperna-um wá má no nyi ri.

⁴⁷ Yesuq gi, Yuda mau mai Galile mau má jé lé bê gâ é hkyô lé, ming suwún haù wó gyo jáng, yhang gi, Yesuq chyáng é mù, shí-nò no nyi é yhangzo lé, lé lhoq gè byi rá matú, Yhang lé dúng tóngbân ri.

⁴⁸ Haù hkùn, Yesuq gi, yhang lé, "Byù nungmoq gi, limik kumlhá pé eq mauhpò muzô pé lé za a myàng kô é ngthut le gi, hkâ-nhám lé lumjng kó rá a ngthut." ga tai ri.

⁴⁹ Mingsuwún haù gi, "Yhumsing ê, ngá zo a shí shimá gyó lé laq." ga tai ri.

⁵⁰ Haù hkùn, Yesuq gi, "Nàng wó ló bê; nung zo byùn rá ngthut lhê." ga tù tai ri.

Suwún haù gi, Yesuq tai é dang haù lé gyó jing lui, tau ló bê ngthut ri.

⁵¹ Yhang gi, hkyô má ru ngthut nyi ashí hkùn, yhâng é dui-nhâng zoshâng wui gi, yhang lé lé hui lui, zoshâng haù gè byuq é hkyô, lé tai kyô akô ngthut ri.

⁵² Yhang gi, yhang zo hkâ-nhám gè byuq é ahkying lé myi wú é hkùn, yhangmoq gi, "A-nyí nap nyi hkyuí rahkying má, gùng nyé é chám ló byuq bê ngthut ri." ga tai kyô akô.

⁵³ Haù hkùn, ahkying haù gi, "Nung zo byùn rá ngthut lhê." ga, yhang lé, Yesuq tai

é ahkýing nghut é lé, haù yhangwa bûn sé bê nghut ri. Haù mù, yhang eq yhang yhumbyù banshoq bang gi, lumjing bekô nghut ri.

⁵⁴ Haù gi, Yesuq, Yuda mau mai Galile mau má lé jé é htâng, í dâm nghû râ dá kut shit é limik kumlhá nghut ri.

5

Wuhtum Yàm Má, Nòhpyo Lhoq Gê Byí É Hkyô

¹ Hau htâng a myáng má, Yudaq byu pé é poi ralhum joq é yanmai, Yesuq gi, Yerusalem wà mó má doq ló ri.

² Ahkuí, haù Yerusalem wà mó é Sau Hkúmdong nàm má, Hebre myíng dông gi, Betzahta ga myhíng é wuhtum ralhum joq ri; hau é lhhnghkyuq má, jirop ngo lhum joq tô ri.

³ Jirop haù pé má, myoqjit bang, hkyí hten bang, gùngjum shí bang ajùm ayò leq tô bum akò. (Haù bang gi, wui dui nún râ lé láng tô é bang nghut akò.

⁴ Hkâsu mù gà le, haù Yhumsing é mau-mang lagyo gyó lé lé kut mù, wui lé, lé lhu nhún jáng, wuhtum haù má hí wó wang é sù gi, hái jung ana wa dap to kólhang, ge byuq é hui é yanmai nghut ri.)*

⁵ Sùm xe shit zân tup no nyi é byù rayuq le, haù má bo tô ri.

⁶ Yesuq gi, haù yuq no leq tô é lé myàng mù, haù su no nyi é gyai myáng bê nghut é hkyô lé sé jáng, yhang lé, "Nàng, gè nau ri lhu?" ga myí ri.

⁷ Nò sù haù yuq gi, "Yhumsing ê, wui dui nún lo é hkún, wuhtum má wàng râ matú, ngo lé garúm râ byù ó a nyi; ngò wàng râ nghû jáng, góyuq hí, ngá hí má wàng wàng dut ri." ga tù tai ri.

⁸ Hau htâng, Yesuq gi, yhang lé, "Toq aq! Náng é taphkang yu chùng luí, sô ló aq." ga tai ri.

⁹ Haù yuq gi, radá dâm nò ge byuq bê nghut luí, yhang é taphkang yù mù, sô ló bê nghut ri.

Haù nyí gi, Bánno buinyi nghut ri.

¹⁰ Haù mù, Yudaq byu pé gi, haù nò ge byuq é hui sù lé, "Hkú-nyí gi, Bánno buinyi nyí nghut é yanmai, nàng, taphkang waq é gi, tará lu lai bê nghut ri." ga tai akò.

¹¹ Nghut kólhang, yhang tù tai é gi, "Haù ngo lé lhoq gê byi sù gi, ngo lé, 'Náng é taphkang yu chùng mù, sô ló aq.' ga tai é nghut lhê." gâ ri.

¹² Haù mù, yhangmoq gi, "'Náng é taphkang yu chùng mù sô ló aq.' ga, nang lé tai é sù gi, ó yuq wá nghut ri lhu?" ga myí akò.

¹³ Nghut kólhang, haù ó yuq nghut é lé, nò ge byuq é hui sù gi, a châng sê kat nghut ri;

hkâsu mù gà le, Yesuq gi, haù má é byù moq mó má wang nyó ló byuq é yanmai nghut ri.

¹⁴ Htâng má, Yesuq gi, haù yuq lé noqkuq yhùm má myàng jáng, "Wú aq, nàng wángzán bê nghut ri; hí lhê htoq má je wuihke é hkyô a hui zo sháng gaq, mara hkâkut shut lo." ga luí, yhang lé tai ri.

¹⁵ Haù yuq gi, htoq ló mù, yhang lé lhoq gê byí é sù gi, Yesuq nghut ri ga, Yudaq byu pé lé tai kyô ri.

Asak Wó Yù Râ Hkyô

¹⁶ Haù mù, Yudaq byu pé gi, Bánno buinyi nyí má, Yesuq, haù hkyô kut é yanmai, Yhang lé gunjang lo akò nghut ri.

¹⁷ Haù hkún, Yesuq gi, yhangmoq lé, "Ngá Wa gi, hkú-nyí jé shoq, hkâ-nhám le mù zui nyi é nghut mù, Ngò le mù zui nyi lhê." ga tai ri.

¹⁸ Haù mù luí, Yesuq gi, Bánno buinyi lé lhoq htên é htoq agó, Garai Gasang lé lhang, Yhang Wa ga wut é dông, yhumsing gùng lé, Garai Gasang eq lhoq whuí é yanmai, Yudaq byu pé gi, Yhang lé sat pyám râ matú, je riyhang shikut lo akò nghut ri.

¹⁹ Yesuq, yhangmoq lé tù tai é gi, "Ngò, nungmoq lé teng za tai kôlé, haù Zo gi, yhumsing é myit dông hái le a wó kut; Yhang Wa kut é hkyô lé myang é gù za wó kut é nghut lhê; hkâsu mù gà le, haù Íwa kut é hkyô lé za, haù Zo châng kut é yanmai nghut lhê.

²⁰ Hkâsu mù gà le, haù Íwa gi, Zo lé chyitdap é nghut luí, Yhang kut é hkyô lunglhang, haù Zo lé tùn shit ri; nungmoq mau hông shoq, shí pé htoq je ko é hkyô pé lé lhang, haù Zo lé tùn shit shirâ nghut lhê.

²¹ Haù Íwa gi, shí bê bang lé lhoq dui toq mù, yhangmoq lé asak byí é eq rajung za, haù Zo le, Yhang byí nau é bang lé, asak byi râ nghut lhê.

²² Hau htoq agó, haù Íwa lé hkunggá é eq rajung za, haù Zo lé le, lunglhang bang hkungga kó sháng gaq ga, haù Íwa gi, ó yuq lé le a jéyáng e za, jéyáng é hkyô lunglhang, haù Zo lé lum to bê nghut ri.

²³ Haù Zo lé a hkunggá é sù gi, haù Yhang lé nhang kat é sù Íwa lé le, a hkunggá é sù nghut ri.

²⁴ Ngò, nungmoq lé teng za tai kôlé, Ngá dang lé gyo luí, Ngo lé nhang kat é Sù lé lumjing é sù, ó yuq nghut kôlé, mara byí é a hui e za, ahtum abyuq é asak wó é nghut lhê; haù yuq gi, shí é mai lut luí, asak dui bê sù nghut ri.

²⁵ Ngò, nungmoq lé teng za tai kôlé, haù Garai Gasang é Yhangzô é htê lé, shi byuq bê bang wó gyo râ ahkýing gi, jé lo nyi bê nghut ri; ahkuí lhang jé to bê nghut ri. Htê haù lé gyô é bang gi, asak dui kó râ nghut lhê.

* 5:4 Bun zo 3 lhum má é ahtang túm eq bun zo 4 lhum gi, chyúmding myo myo má a bo é nghut lhê.

²⁶ Hkâsu mù gâ le, Garai Gasang gi, Yhânggùng má yhang, asak bo é eq rajung za, Yhang Zo lé le, Yhânggùng má yhang, asak bò nhang é yanmai nghut ri.

²⁷ Hau htoq agó, Yhang gi, haù Byu Yhang nghut é yanmai, Garai Gasang gi, tarâ jéyáng râ ahko ahkáng, Yhang lé byi bê nghut ri.

²⁸ Shí hkyô lé hkâ-maù hong nyi kó: lup pé má lúng tó é bang banshoq gi, Yhâng é htê lé wó gyo kôluí, htoq ló râ ahkyíng jé lò râ nghut lhê.

²⁹ Ge é hkyô kut é bang gi, asak dui râ matú, dui toq kó râ nghut lhê; agè ashop hkyô kut é bang gi, mara byi é hui zo râ matú, dui toq kó râ nghut lhê.

³⁰ Ngò gi, Ngá myit đông mai hai le a wó kut é nghut lhê; Ngò wó gyô yu é eq rajung za sheq, jéyáng é nghut luí, Ngò jéyáng é hkyô gi, tengmán lhê; hkâsu mù gâ le, Ngò gi, Ngò ô nau é đông châng é a nghut e za, Ngo lé nhang kat é Sù ô nau é đông châng é sheq ru nghut lhê.

Yesuq Eq Séng Luí, Saksé Hkâm É Hkyô

³¹ Ngá gũng lé ngò saksé hkâm é nghut jáng, ngò za saksé hkâm é hkyô gi, teng râ a nghut.

³² Ngá é hkyô lé saksé hkâm byi é Sù (Ngá Wa) góyuc nyi lhê; Ngò eq séng luí, haù yuq hkâm é saksé gi, teng é hkyô lé, Ngò sê lhê.

³³ Nungmoq gi, Yohan† chyáng byù nhang kat wú bekô nghut ri; yhang gi, haù tengmán hkyô lé saksé hkâm byi bê nghut lhê.

³⁴ Ngò gi, xângzo byu pé mai saksé hkâm byi râ lé, ra luí a nghut, nghut kôlháng, nungmoq hkyi yu é wó hui râ matú sheq, haù su nghù tai é ru nghut lhê.

³⁵ Yohan gi, duq nyi é myibung su duqbó byi é nghut mù luí, nungmoq gi, haù duqbó é hkaù má, rayoq zo ngón nau nyi akô nghut ri.

³⁶ Nghut kôlháng, Ngò wó é saksé gi, Yohan byi é saksé htoq je kô lhê; hkâsu mù gâ le, ahkuí Ngò zui sai nyi é muzó gi, Ngò lhoq pán râ matú, haù Íwa, Ngo lé ap byi tô é nghut luí, haù Íwa, Ngo lé nhang kat é hkyô lé, saksé hkâm byi nyi ri.

³⁷ Hau htoq agó, haù Ngo lé nhang kat é sù Íwa le, Ngò eq séng luí saksé hkâm byi ri; nungmoq gi, Yhâng é htê lé le, a wó gyô wú kó; Yhâng é gunghkyáng lé le, a myang wú kó;

³⁸ haù Yhâng é mungdang le, nungmoq chyáng a bò kô nghut ri; hkâsu mù gâ le, nungmoq gi, Yhang nhang kat é Sù lé a lumjúng kô é yanmai nghut ri.

³⁹ Nungmoq gi, haù Chyúmdang mai ah-tum abyuq é asak wó yù râ nghut lhê ga myit yù kô é yanmai, haù Chyúmdang má ho wú akô nghut ri; nghut kôlháng, Chyúmdang haù gi, Ngò eq séng luí saksé hkâm byi ri;

⁴⁰ nghut kôlháng, asak wó yù râ matú, nungmoq gi, Ngá chyáng a kâm lé kô nghut ri.

⁴¹ Ngò gi, byu eq hkya-ôn é lé a lhom yu é nghut lhê.

⁴² Nghut kôlháng, nungmoq lé gi, Ngò sê lhê; nungmoq é i-myt hkaù má, Garai Gasang lé chyitdap é myit a bò kô nghut ri.

⁴³ Ngò gi, Ngá Wá é mying mai jé lé é sù nghut kôlháng, nungmoq gi, Ngo lé a lhom hap yù kó; yhâng mying yhang lang é byù, gotú rayuq jé lé é ru nghut le gi, haù yuq lé, nungmoq lhom hap yù kó râ nghut lhê.

⁴⁴ Nungmoq gi, rayuq eq rayuq hkya-ôn lhùm é lé za hap yù luí, rayuq za nghut é Garai Gasang chyáng mai lo é hkya-ôn hkyô lé gi, a hō kô é bang nhing, hkâsu kut wó lumjúng kó râ lú?

⁴⁵ Nghut kôlháng, haù Íwá é hí má, Ngò, nungmoq lé mara hùn nhô hkâ-ngâm kó; nungmoq lé mara hun é sù gi, haù nungmoq mai myit myoqbyu lé é Mosheq ru nghut lhê.

⁴⁶ Mosheq lé nungmoq gè gè yhang lumjúng kô é ru nghut le gi, Ngo lé le lumjúng kó râ nghut lhê; hkâsu mù gâ le, Mosheq gi, Ngá é hkyô lé kâ tô é sù nghut ri.

⁴⁷ Nghut kôlháng, nungmoq gi, yhang kâ tô é pé lé lhang a lumjúng kô é nhing, Ngá dang lé, hkâsu kut wó lumjúng kó râ lú?" gâ ri.

6

Byù Ngo Hkyíng Lé Zoshuq Byi Tsó É Hkyô

Mth 14:13-21; Mrk 6:30-44; Luk 9:10-17

¹ Hau htâng a myáng má, Yesuq gi, Tiberi nhông le gâ é, Galile nhông he hpoq shut gú dap ló bê nghut ri.

² Haù hkùn, byù ajùm ayò gi, haù nò bâng htoq má, Yhang kut shit é limik kumlhá pé lé myàng kô é yanmai, Yhang htâng châng e ló bum akô nghut ri.

³ Yesuq gi, bùm shut doq ló mù, Yhâng é chángzô pé eq rahá zung tò ri.

⁴ Yudaq byu pê é Lhoqlhai Poí gi, chyáng lo nyi bê nghut ri.

⁵ Yesuq gi, tu wú kat le, byù ajùm ayò Yhâng shut lé lo bùm kô é lé byu-myang kat luí, Hpilip lé, "Shí bang zo râ muk, ngan-húng, hkâmá ê wó wui râ lú?" ga tai ri.

⁶ Yesuq, haù su ga tai é gi, yhang lé chyam wú râ matú za nghut ri; hkâsu mù gâ le, hkâsu kut râ hkyô gi, Yhâng é myit má bo to gú bê nghut ri.

† 5:33 Yohan shí yuq gi, Wui-myhup Sará Yohan nghut lhê. wui é nghut lhê.

* 6:7 Denari rachap gi, byù rayuq é ra-nyí é zuihpau eq

⁷ Hpilip gi, Yhang lé, "Denari* í sho èq muk wui le lhang, rayuq ratsui tsui ngap rá a nghut." ga tú tai ri.

⁸ Haú hkûn, Yhâng é chángzo nghut é, Simun Petruq é yhanggu Andre gi, Yhang lé,

⁹ "Muk-yo muk ngo long eq ngozo í du wó é yuggè zo rayuq, shí má nyi ri; nghut kôlhang, byù shí myhò bang lé luq shoq, hkâsu kut wó gâm byi rá lhu?" ga tai htoq kat ri.

¹⁰ Yesuq gi, "Haú shiwa byu pé lé, zùng nhâng keq." ga tai ri. Jowò haú gi, mhán htu é jang nghut mù, yuggè wui baú lhang, ngo hkying kò zung tô bùm beko nghut ri;

¹¹ hau htâng, Yesuq gi, muk long pé lé yù mù, jeju hkyá-on luí, zung tô é bang lé, yhangmoq o é myhò tsing gâm byi ri. Haú eq rajung za, ngozo lé le haú su kut ri.

¹² Yhangmoq banshoq bang zò gyí bùm kò é htâng má Yhang gi, Yhâng é chángzò pé lé, "Myit gyó tô é ajap azo pé lé châng guq tsing yu keq. Hai le a langsa pyám sháng gaq." ga tai ri.

¹³ Haú mù, yhangmoq gi, zò myhit tô é muk-yo muk ngo long má é ajap azo pé lé châng guq tsing le, raxe í mung bying shoq wó guq tsing yu akò nghut ri.

¹⁴ Haú shiwa byu pé gi, Yesuq kut é limik kumlhá lé myàng kò é hkûn, "Shí yuq gi, mingkan htoq má jé lé lô rá gà é, Myiqhtoi yhang nghut ri-nhung!" ga tai bum akò.

¹⁵ Yesuq gi, yhangmoq lé mù, Yhang lé hkohkâm zik kut nhâng kó rá dâ é hkyô lé, sè é yanmai, Yhang baú tsik za bùm shut dum haq doq lô bê nghut ri.

*Yesuq, Wui Htoq Má Sô É Hkyô
Mht 14:22-27; Mrk 6:45-52*

¹⁶ Buigyum htâng, Yhâng é chángzò pé gi, haú nhông shut gyó lô mù,

¹⁷ lhai má wang ji luí, nhông hé hpoq má é Kaperna-um wà shut gû e ló akò; haú hkûn, mauchut bê nghut kôlhang, Yesuq gi, yhangmoq chyáng a jé gyó lo shi nghut ri.

¹⁸ Haú u lé, laidun htan lo é yanmai, wuilhêng toq lô bê nghut ri.

¹⁹ Yhangmoq gi, sum myi déng kò lhai kôn e ló kò é hkûn, Yesuq gi, nhông htoq má so luí, haú lhai shut chyáng lé lo nyi é lé myàng kômù, gyuq dan bùm beko nghut ri.

²⁰ Nghut kôlhang, Yesuq gi, "Hkâgyuq kó, Ngò ru nghut lhê." ga yhangmoq lé tai ri.

²¹ Haú mù, yhangmoq gi, Yesuq lé gabú myit eq lhai hkaú má shuí hâng yù nau akò. Haú hkûn, lhai haú gi, radá dâm yhangmoq jé nau é jang wuiyàm má jé bê nghut ri.

²² Nhông hé hpoq má nyi tô é byù moq mó gi, haú má lhai racham za joq lai lo é hkyô eq, lhai haú má Yesuq a bo doq ji e za, chángzò pé baú ji htoq lô kò é hkyô lé, hau htang nyí, bûn sè kat akò nghut ri.

²³ Haú hkûn, haú Yhumsing, jeju hkyá-on é htâng, byu pé muk zò é jowò nám má, Tiberi myuq má é lhai pé jé lé bum ri.

²⁴ Haú byù moq mó gi, Yesuq eq Yhâng é chángzò pé, haú má a nyi lo kò é hkyô lé sé kò é yanmai, Yesuq lé châng hô rá matú lhai haú pé má wang ji mù, Kaperna-um wà shut e ló akò nghut ri.

Yesuq, Asak Muk Nghut É Hkyô

²⁵ Yhangmoq gi, nhông hé hpoq má Yesuq lé myàng kôjáng, "Rabai ê, Nang gi, shí má hkâ-nhám jé lé é lhu?" ga, Yhang lé myi akò.

²⁶ Haú hkûn, Yesuq gi, "Ngò, nungmoq lé teng za tai kôlé, nungmoq gi, limik kumlhá pé lé myàng kò é yanmai, Ngo lé hô kò é a nghut, muk gyi shoq myàng zo kò é yanmai sheq, hô kò é ru nghut lhê.

²⁷ Htên byuq sè é zoshuq é matú, hkâshikut kó; haú Byu Yhangzo byi rá nghut é ahtum abyuq é asak é matú, ru gíng nyi é zoshuq wó yú rá lé sheq shikut nyi keq. Yhâng chyáng gi, haú Iwa Garai Gasang mai Yhâng é saksé dizik tap to bê nghut lhê." ga tú tai ri.

²⁸ Haú mù, yhangmoq gi, "Garai Gasang ô nau é muzò pé zui sai rá matú, ngamoq hai kut ra rá lhu?" ga Yhang lé myi akò.

²⁹ Haú hkûn, Yesuq gi, "Garai Gasang nhang kat é Sù lé, lumjing é gi, Garai Gasang ô nau é muzò nghut bê." ga tú tai ri.

³⁰ Haú mù luí, yhangmoq gi, Yhang lé, "Ngamoq myoq eq wó myàng luí, Nang lé lumjing rá matú, Nang, hai jung limik kumlhá kut shit rá lhu? Nang, hai jung kut shit rá lhu?"

³¹ Haú Chyúmdang má, Yhang gi, yhangmoq zo rá matú, mauhkung mai muk byi ri.³² ga kâ tô é eq rajung za, ngamoq é íchyí iwa pé gi, haú yoso hkaú má mannaq muk zo beko nghut lhê." ga tai akò.

³² Haú hkûn, Yesuq gi, yhangmoq lé, "Ngò, nungmoq lé teng za tai kôlé, nungmoq lé mauhkung mai muk byi é Sù gi, Mosheq a nghut, haú Ngá Wa sheq, nungmoq lé mauhkung mai tengmán é muk byi é Sù ru nghut lhê.

³³ Hkâsu mù gà le, Garai Gasang byi é muk gi, mauhkung mai gyó lé luí, haú mingkan lé asak byi é Sù nghut lhê." ga tai ri.

³⁴ Yhangmoq gi, "Yhumsing ê, ahkuí mai, ngamoq lé muk haú hkâ-nhám le byi nyi laq." ga chòm tai bum akò.

³⁵ Haú mù, Yesuq tai kyô é gi, "Ngò gi, asak muk nghut lhê. Ngá chyáng lé é sù gi, hkâ-nhám le zòmut é hui rá a nghut; Ngo lé lumjing é sù le, hkâ-nhám le wuishit é hui rá a nghut.

³⁶ Nghut kôlhang, Ngò, nungmoq lé tai wú bê eq rajung za, nungmoq gi, Ngo lé myàng wú é nghut kôlhang, a lumjing shi kó nghut ri.

³⁷ Haù Íwa mai Ngo lé ap byí tô é byù lhunglhâng bang gi, Ngá chyáng lé kó rà nghut luí, Ngá chyáng lé é sù ó yuq lé le, Ngó gi, hkâ-nhám lé hkát htoq pyám rà a nghut.

³⁸ Hkâsu mù gâ le, Ngó, mauhkúng mai gyó lé é gi, Ngó ô nau é hkyó lé kut rà matú a nghut e za, Ngo lé nhang kat Sù ô nau é hkyó lé kut rà matú ru nghut lhê.

³⁹ Haù Ngo lé nhang kat Sù ô nau é hkyó gi, Yhang mai Ngo lé ap byí tô é bang mã é rayuq lé lhâng, Ngó, a lhoq hpyuq pyám e za, jìhtùm buinyi má yhangmoq lé dum lhoq dui toq yù rà matú ru nghut lhê.

⁴⁰ Hkâsu mù gâ le, Ngá Wa ô nau é hkyó gi, haù Zo lé wú mù, Yhang lé lumjing é sù yuq hkangmó, ahtum abyuq é asak lé wó yù rà matú nghut lhê; Ngó le, jìhtùm buinyi má haù bang lé lhoq dui toq rà nghut lhê." gâ ri.

⁴¹ Haù mù, "Ngó gi, mauhkúng mai gyó lé é muk nghut lhê." ga, Yesuq tai é yanmai, Yhang eq séng luí, Yudaq byu pé tai put kó é gi,

⁴² "Shí yuq gi, Yosep é yhangzo Yesuq a nghut lhi? Yhâng nu Yhâng wa lé, nga-nhúng sê lhê a nghut kó lú? Haù sù é nhing, ahkuí, 'Ngó gi, mauhkúng mai gyó lé é nghut lhê.' ga, Yhang hkâsu kut wó tai lhê lú?" gâ bum akó.

⁴³ Haù hkún, Yesuq gi, "Nungmoq ahkaù má hkâtai put nyi kó.

⁴⁴ Haù Ngo lé nhang kat é sù Íwa mai shuí jé é sù za a nghut jáng, ó yuq le Ngá chyáng wó jé rá a nghut; jé lé é sù lé gi, jìhtùm buinyi má, Ngó lhoq dui toq rà nghut lhê.

⁴⁵ Myiqhtoi laiká pé má, 'Yhangmoq lhunglhâng bang gi, Garai Gasâng eq mhoq byí é hui kó rà nghut lhê.'* ga ká tô é eq rajung za, haù Íwâ chyáng mai gyo yù, mhoq yu é bang yuq hkangmó gi, Ngá chyáng lé kó rà nghut lhê.

⁴⁶ Haù gi, rayuq yuq mai, haù Íwa lé myang wú bê nghú nau é a nghut; Garai Gasâng chyáng mã é Sù za sheq, haù Íwa lé myang wú é Sù nghut lhê.

⁴⁷ Ngó, nungmoq lé teng za tai kôlé, lumjing é sù gi, ahtum abyuq é asak wó lhê.

⁴⁸ Ngó gi, asak muk nghut lhê.

⁴⁹ Nungmoq é íchyí iwâ pé gi, haù yoso hkaù má mannaq muk zo bekó nghut lhê; nghut kôlé, shi byuq bekó nghut ri.

⁵⁰ Nghut kôlháng, shí gi, mauhkúng mai gyó lé lo é muk nghut lhê; haù lé zô é sù gi, a shí lo rà nghut lhê.

⁵¹ Ngó gi, mauhkúng mai gyó lé lo é, haù asak dui é muk nghut lhê; rayuq yuq, muk shí lé zô é nghut le gi, ahtum abyuq dui nyi rà nghut lhê; muk shí gi, mingkan zô wui é asak matú, Ngó byi rà nghut é Ngá gungsho nghut lhê." ga tú tai ri.

⁵² Haù mù, haù Yudaq byu pé gi, "Byù shí yuq gi, nga-nhúng lé, Yhâng é gungsho hkâsu kut wó byi tso rà lú?" ga, yhangmoq yhangchang dang htíng htíng lhùm bum akó.

⁵³ Haù hkún, Yesuq gi, yhangmoq lé, "Ngó, nungmoq lé teng za tai kôlé, haù Byu Yhangzô é gungsho lé zô é eq Yhâng é sui lé shuq e za a nghut le gi, nungmoq asak wó kó rà a nghut.

⁵⁴ Ngá é gungsho lé zô é eq Ngá é sui lé shuq é sù, ó yuq nghut kôlé, ahtum abyuq é asak wó é nghut lhê; Ngó gi, jìhtùm buinyi má, haù yuq lé lhoq dui toq yù rà nghut lhê.

⁵⁵ Hkâsu mù gâ le, Ngá é gungsho gi, zojung yhang nghut lhê; Ngá é sui gi, shuqjung yhang nghut lhê.

⁵⁶ Ngá é gungsho lé zô é eq Ngá é sui shuq é sù, ó yuq nghut kôlé, Ngó má nghut nyi luí, Ngó le haù yuq má nghut nyi bê nghut lhê.

⁵⁷ Haù rú dui nyi é Íwa gi, Ngo lé nhang kat luí, Ngó gi, haù Íwâ é yanmai, dui nyi é eq rajung za, Ngá é gungsho lé zô é sù gi, Ngá é yanmai, dui nyi rà nghut lhê.

⁵⁸ Shí gi, mauhkúng mai gyó lé lo é muk nghut lhê. Nungmoq é íchyí iwâ pé gi, mannaq muk zo kôlé, shi byuq bekó nghut ri; nghut kôlháng, muk shí lé zô é sù gi, ahtum abyuq dui nyi rà nghut lhê." ga tai ri.

⁵⁹ Dang haù pé gi, Yesuq, Kaperna-um wà mã é tarajong má mhoqshít nyi é u lé, tai é dang nghut ri.

Chángzô Pé Myo Myo, Yesuq Lé Kâng Pyám To Kó É Hkyó

⁶⁰ Yhâng é chángzô pé myo myo gi, haù lé wó gyo kóráng, "Dang shí gi, gyai wú ri. Ó yuq wá wó cháng rà lú?" ga tai bum akó.

⁶¹ Yesuq gi, haù eq séng luí, Yhâng é chángzô pé tai put nyi bùm kó é lé Yhâng é myit má sé luí, yhangmoq lé, "Dang shí é yanmai, nungmoq myit htén bum akó lú?"

⁶² Haù Byu Yhangzo gi, Yhang nyi lai lò bê jowò shut taù doq ló é lé, nungmoq myàng kó é nghut le gi, hkâsu nghú kó rà lú?"

⁶³ Haù Woi-nyí gi, asak byí lhê; gungsho kúm gi, haù le a wó dut nghut ri. Nungmoq lé, Ngó tai é dang pé gi, Woi-nyí le nghut lhê, asak le nghut lhê.

⁶⁴ Nghut kôlé, nungmoq chyáng mã é ram gi, a lumjing kó nghut ri." ga tai ri. Hkâsu mù gâ le, ó pé gi, a lumjing kó rá eq, ó yuq gi, Yhang lé ap pyám rà nghut é hkyó lé, Yesuq gi, sâng-hi mai sê to gù bê nghut ri.

⁶⁵ Yhang xoq tai é gi, "Haù su mù, haù Íwâ èq ahkáng byí é sù za a nghut le gi, ó yuq le Ngá chyáng wó lé rà a nghut nghú, Ngó, nungmoq lé tai kyo wú bê nghut lhê." gâ ri.

⁶⁶ Haù ðam mai, Yhâng é chángzô pé myo myo gi, Yhâng htàng a cháng lo kó e za, taù ló byuq bùm bekó nghut ri.

* 6:45 Esai 54:13

⁶⁷ Haù su mù, Yesuq gi, haù chángzo raxe í yuq lé, "Nungmoq le, ló byuq nau akô, a nghut lú?" ga myí ri.

⁶⁸ Haù hkún, Simun Petruq gi, "Yhumsing ê, Nàng gi, ahtum abyuq é asak mungdang wó Sù nghut to bê lê nhing, ngamoq gi, ó yuq chyáng é shirâ lú?"

⁶⁹ Nàng gi, Garai Gasang é Chyoiyung Sù nghut é lé, ngamoq, lumjing lhê, sê nyi lhê." ga, Yhang lé tú tai ri.

⁷⁰ Haù hkún, Yesuq gi, "Nungmoq raxe í yuq lé, Ngò hkyin yù bê a nghut kó lú? Nghut kôle, nungmoq má é rayuq gi, nat nghut ri." ga tú tai ri.

⁷¹ (Yhang gi, haù Simun Iskarut é yhangzo, Yudaq lé tai nau é nghut ri; haù yuq gi, chángzo raxe í yuq má bò sù nghut kôle, htâng má, Yhang lé ap pyám rà sù nghut ri.)

7

Yesuq Eq Yhâng É Gumang Wui

¹ Hau htâng má, Yesuq gi, Yhang lé sat rà matú, Yudaq byu pé ho nyi bùm kô é yanmai, Yuda mau má a kâm sô wún mù, Galile mau má sô lhing wún ri.

² Nghut kôlháng, haù Yudaq byu pé é Saksé Zúm Poi chyáng lo nyi é hkún,

³ Yesuq é yhanggu yuqzô pé gi, Yhang lé, "Nàng é chángzô pé gi, Nàng kut é laklai kumlhá pé lé myàng kó sháng gaq, Nàng, shí mai htoq ló luí, Yuda mau shut é ló aq.

⁴ Myìng hu nau é sù gi, hkaù zaù luí haí le a kut wú é nghut lhê. Nàng gi, haù pé lé kut nyi bê nghut é yanmai, mingkan lé, Nàng gung tún shit aq." ga tai akô.

⁵ Hkâsu mù gâ le, yhanggu sîng yuqzô pé lháng, Yhang lé a lumjing kó nghut ri.

⁶ Haù mù luí, Yesuq gi, yhangmoq lé, "Ngá é ahkying gi, a jé shi nghut ri; nungmoq é ahkying kum gi, hkâ hkún le joq nyi ri.

⁷ Haù mingkan gi, nungmoq lé a jú a wó kut kó nghut ri; nghut kôlháng, Ngo lé gi, a jú kó; haí mù gâ le, yhang kut é hkyô gi, agê ashop é nghut é lé, Ngò, saksé tún shit é yanmai nghut ri.

⁸ Nungmoq gi, poi haù shut doq ló keq. Ngò kum gi, Ngá é ahkying a jé shi nghut é yanmai, poi haù shut a doq ló shirâ nghut lhê." ga tai ri.

⁹ Haù su ga tai luí, Yhang gi, Galile mau má nyi gyó to bê nghut ri.

¹⁰ Nghut kôlháng, Yhang gu pé, haù poi shut doq ló byuq é htâng má, Yhang gi, de de a nghut é đông, tsik za châng doq ló bê nghut ri.

¹¹ Yudaq byu pé gi, haù poi má, Yhang lé châng hô kômù, "Haù yuq gi, hkâmá nghut lhê lú?" ga, myi wún akô nghut ri.

¹² Haù byù hpung hkaù má, Yhang eq séng luí tai lhum bùm kô é má, ra-am gi, "Yhang gi,

byù gè nghut ri." ga tai kôjáng, ra-am gi, "A nghut, Yhang gi, byu pé lé hkyô shui nghoq sù nghut ri." ga tú tai akô.

¹³ Nghut kôlháng, haù Yudaq suwún wui lé gyuq kô é yanmai, ó yuq le, Yhang eq séng é hkyô lé de de a wám tai kó nghut ri.

Haù Poi Má, Yesuq Mhoqshit É Hkyô

¹⁴ Haù poi rawui nghut ló é hkún, Yesuq gi, noqkuq yhum má doq é luí, mhoqshit hi ló bê nghut ri.

¹⁵ Haù hkún, Yudaq byu pé gi, gyô mau byuq kômù, "Shí yuq gi, mhoq yu é hkyô le a joq wú é wá, haù-í hkâsu mù sê lhê laq?" ga myi bum akô.

¹⁶ Haù mù, Yesuq tú tai é gi, "Ngò mhoqshit é dang gi, Ngá é dang a nghut; Ngo lé nhang kat Su é dang ru nghut lhê.

¹⁷ Rayuq yuq, Garai Gasang ô nau é hkyô lé châng kut nau é nghut jáng, Ngò mhoqshit é dang gi, Garai Gasang chyáng má é nghut a nghut é eq, Ngá é myit đông tai é dang nghut a nghut é lé, yhang sé gâm hkoq yú rá nghut lhê.

¹⁸ Yhumsing é myit đông tai é sù gi, yhum-sing é matú aróng hô sù nghut ri; nghut kôlháng, yhumsing lé nhang kat su é matú, aróng ho é sù gi, tengmán é byù nghut ri; yhang má, a tengmán é hkyô haí le a bò nghut ri.

¹⁹ Mosheq gi, nungmoq lé jep é tarâ byí to bê, a nghut kó lú? Nghut kôlháng, nungmoq ó yuq le, jep é tarâ haù lé a cháng kó nghut ri. Haí mù luí, Ngo lé sat nau nyi akô lú?" gâ ri.

²⁰ Haù hkún, haù byù hpung gi, "Nàng gi, nat gang wang to sù nghut ri-nhung! Nàng lé, ó yuq wá sat nau nyi ri lú?" ga tú tai akô.

²¹ Yesuq gi, yhangmoq lé, "Ngò, laklai kumlhá ralhum kut jáng, nungmoq ban-shoq bang gi, mau byuq bum akô.

²² Nghut kôlháng, nungmoq gi, ahpyo-kuq hpyit byí é hkyô lé, Mosheq byí é nghut lhê ga luí, Bánno buinyi má, zoshâng lé ahpyo-kuq hpyit byí akô (gê gè ga jáng, ahpyo-kuq hpyit é hkyô gi, Mosheq chyáng mai lo é a nghut e za, ichyí iwá pé chyáng mai lo é ru nghut lhê.)

²³ Haù, Mosheq é jep é tarâ lé a lhoq htên pyám sháng gaq nghù, Bánno buinyi má, zoshâng lé ahpyo-kuq hpyit byí é nghut le gi, haí mù luí, Bánno buinyi má, byù rayuq é gung gón lé, Ngò lhoq gè byí é yanmai, Ngo lé nhikjum yô akô lú?"

²⁴ Byù du lé wú luí hkâjéyáng kó; tengmán é đông sheq jéyáng keq." ga tai ri.

Yesuq Gi, Hkrisduq Nghut Lhê Lú?

²⁵ Haù mù luí, Yerusalem wá mó má é byu pé ra-am gi, "Haù yhangmoq sat pyám nau nyi é sù gi, shí yuq a nghut lú?"

²⁶ Yhang gi, shí má de de dǎng nyo nyi le, yhangmoq gi, Yhang lé, hái le a ga kó myhinhung! Yhang gi, Hkrisduq nghut lhê ga, haù ahkáng ayá wó bang gi, gè gè yhang, sé akò abe?

²⁷ Haù Hkrisduq jé lé é hkún gi, Yhang hkâmai lé lo é lé, ó yuq lhang sé rá a nghut." ga taí bum akò. Nghut kôlhang, shí yuq gi, hkâmâ é sù nghut é lé, nga-nhung sê lhê;

²⁸ Haù mù, Yesuq gi, noqkuq yhùm wàng má mhqshít uchyang, htê mó èq taí kat é gi, "Nungmoq gi, Ngo lé sê é htoq agó, Ngò, hkâmâi lé é sù nghut é lé le, sé akò nghut ri. Ngò gi, Ngá myit dòng shí má lé nyi tô é sù a nghut kôlhang, Ngo lé nhang kat é Sù gi, tengmán lhê; nungmoq gi, Yhang lé a sé kôlhang,

²⁹ Ngò gi, Yhang lé sê lhê; hkâsu mù gâ le, Ngò gi, Yhàng chyang mai lé é sù eq Yhang mai nhang kat é sù nghut lhê." gâ ri.

³⁰ Haù mù, yhangmoq gi, Yhang lé chyup rá dâ akò; nghut kôlhang, Yhàng é ahkying a jé shí é yanmai, Yhang lé chyup rá matú, ó yuq le loq a jé kó nghut ri.

³¹ Nghut kôlhang, byù hpúng hkaù má é bang myo myo gi, Yhang lé lumjing bùm kôlú, "Haù Hkrisduq jé lé é hkún, Yhang gi, shí yuq htoq má, limik kumlhá pé je wó kut shít rá lú?" ga taí bum akò nghut ri.

³² Haù Hparishe pé gi, haù byù hpúng hkaù má, Yesuq eq sêng é hkyô lé, haù su ga dangsoq soq lhùm nyi kô é hkyô lé wó gyô yu akò. Haù mù, haù hkyangjong agyi pé eq Hparishe pé gi, Yhang lé é chyup rá matú, noqkuq yhùm zúng é bang lé nhang kat akò.

³³ Haù hkún, Yesuq gi, "Ngò gi, nungmoq eq rahá rayoq zo za nyi rá nghut lhê; hau htàng, Ngo lé nhang kat Su chyang taù ló rá nghut lhê.

³⁴ Haù hkún, nungmoq gi, Ngo lé hô kôlhang, myang hô kó rá a nghut; Ngò nyi é jang má, nungmoq wó jé kó rá a nghut." ga taí ri.

³⁵ Hau é yanmai, Yudaq byu pé, rayuq eq rayuq taí lhum kô é gi, "Shí yuq gi, Yhang lé nga-nhung a myang hô loshoq, hká shut e byuq rá dâ lhê lú? Yhang gi, Grik byu pé má nyi byo myín tô é nga-nhung é byu pé nyi é jawò má é mù, Grik byu pé lé, é mhqshít rá dâ lhê lú?"

³⁶ "Nungmoq gi, Ngo lé hô kôlhang, myang hô kó rá a nghut." gâ é eq, "Ngò nyi é jang má, nungmoq wó jé kó rá a nghut." gâ é, Yhang taí é dang gi, hái jung wá gá naù é nghut lhê lú?" gâ akò.

³⁷ Haù lô htàng é eq je ahkyak é Poi buinyi má, Yesuq toq yap luí, htê mó èq taí é gi, "Wuì shít sù gi, Ngá chyang lé mù, shuq sháng gaq.

³⁸ Ngo lé lumjing é sù ó yuq nghut kôle, haù Chyúmdang má taí tô é eq rajung za, "Yhàng chyang mai asak uchyang é wuìlàng yui htoq lô rá nghut lhê." gâ ri.

³⁹ Yhang haù su gâ é gi, Yhang lé lumjing é bang myang hap yù rá nghut é, haù Woi-nyi lé taí é nghut ri. Haù hkún jé shoq, haù Woi-nyi lé a byi kat shí nghut ri. Hkâsu mù gâ le, Yesuq gi, hpungwup shinggang dan hù é a hui nhàng shí é yanmai nghut ri.

⁴⁰ Yhàng é dang pé lé wó gyo kôjáng, ra-am gi, "Shí yuq gi, gè gè yhang, Myiqhtoi haù nghut ri." ga taí akò.

⁴¹ Ra-am gi, "Shí yuq gi, Hkrisduq nghut ri." ga taí akò. Góbang nghut jáng, "Hkrisduq wá Galile mau mai htoq lé rá nghut lhê lú?"

⁴² Haù Chyúmdang má, Hkrisduq gi, Dawiq é awut ashín má é nghut luí, Dawiq nyi laí lo é Betlehem wà mai htoq ló rá nghut lhê gâ é, a nghut lú?" ga myi bum akò nghut ri.

⁴³ Haù mù luí, Yesuq é yanmai, shiwa byu pé gi, gàm hkoq lò byuq bekò nghut ri.

⁴⁴ Ra-am gi, Yhang lé chyup yù nau bùm kôlhang, Yhang lé loq a záng kó nghut ri.

Yudaq Byu Pé Lé Shuì U É Bang A Lumjing Kô É Hkyô

⁴⁵ Hau htàng má, haù noqkuq yhùm zúng bang gi, haù hkyangjong agyi pé eq Hparishe pé chyang taù ló kô é hkún, haù bang gi, yhangmoq lé, "Nungmoq, hái mù luí, Yhang lé a shuì lo kô é lú?" ga lhom myi akò.

⁴⁶ Haù hkún, haù noqkuq yhùm zúng bang gi, "Shí yuq su ga taí é byù gi, ó le a nyi wú é nghut lhê." ga taí kyô akò.

⁴⁷ Haù mù, haù Hparishe pé gi, "Nungmoq lé le, Yhang èq mhoq hpyoq yù bekò lú?"

⁴⁸ Haù zaù wui chyang le, Hparishe pé chyang le, Yhang lé lumjing é byù bò akò lú?"

⁴⁹ A bò! Nghut kôlhang, haù jep é tarâ lé a sê é byù moq mó shí gi, nhing pyâm é hui bekò nghut ri." ga nhik-yô é dòng tú taí kat akò nghut ri.

⁵⁰ Nghut kôlhang, yhangmoq hpúng má bo é, hí hkún Yesuq chyang e wú bē sù nghut é, Nikodimu gi,

⁵¹ "Nga-nhung é tarâ gi, byù rayuq lé, yhàng é dang hí a gyô wú é eq, yhang hái kut é lé a sê e za, mara byi lhê lú?" ga, yhangmoq lé myi ri.

⁵² "Nga hkún, yhangmoq gi, "Nàng le, Galile mau byù nghut lhê lú? Galile mau mai myiqhtoi rayuq lhang a htoq é hkyô lé, nàng gon wú aq, haù jáng sé rá nghut lhê." ga tú taí akò.

⁵³ Hau htàng, yuq hkgangmó gi, ó le ô yhùm shut taù ló byuq bùm bekò nghut ri.*

* 7:53 Yohan Laiká 7:53 mai 8:11 jé shoq gi, chyúmding axau myo myo má a bo é nghut lhê.

8

Yesuq Lé, Lé Myí Chyam Wú Kô É Hkyô

¹ Yesuq kúm gi, Tsanlun Bùm shut e ló bê nghut ri.

² Htang napkyô napsûn noq le, Yesuq gi, noqkuq yhùm wàng hkaù má dum ê luí, byu pé lhunglhang gi, Yhâng é lhinghkyuq má lé zing bum akô; haù mù, Yhang gi, zung to luí, yhangmoq lé mhoqshit ri.

³ Haù hkùn, haù tarà sará pé eq Hparishe pé gi, sulàng shut nyi é má myang chyup yu é su-myi rayuq lé shuí lé lô kômù, gung gung má shap to kôluí,

⁴ Yesuq lé, "Sará ê, myiwe myhí shí lé, sulàng shut nyi é má myang chyup yu é nghut lhê.

⁵ Haù Mosheq é tarà má gi, shí su é myiwe lé, luqgok èq dú sat pyám keq ga, nga-nhúng lé hkunmò hkyô tô ri. Ahkuí, Nàng gi, hkâsu nghù rá lhu?" ga myí akô.

⁶ Yhangmoq haù su ga myí é hkyô gi, Yhang lé mara wó hùn shoq ga, chyam wú rá matú nghut ri.

Nghut kôlhang, Yesuq gi, ngóm mù, myigùng má loqnyhuí èq htaù ká nyi ri.

⁷ Yhang lé, yhangmoq ru jang myí nyi kô é hkùn, Yhang gi, yap nyhang kat mù, yhangmoq lé, "Nungmoq má é mara a wó é sù hí, myiwe myhí shí yuq lé luqgok èq dú sháng gaq." ga tai ri.

⁸ Hau htàng, Yhang gi, dum ngóm luí, myigùng má ká nyi ri.

⁹ Yhangmoq gi, haù su gá é lé wó gyo kôjáng, je mang bang mai hí luí, rayuq htàng rayuq ló byuq bekò nghut luí, Yesuq baù za myit gyó tô é eq, myiwe myhí haù jàng yap nân tô ri.

¹⁰ Yesuq gi, yap nyhang kat luí, yhang lé, "Myiwe myhí é, yhangmoq hká ló bekò lhu? Ó yuq èq le, nàng lé mara a byi kó lhu?" ga myí ri.

¹¹ Yhang gi, "Yhumsing ê, ó yuq le mara a byi kó nghut ri." ga tú tai ri.

Haù hkùn, Yesuq gi, "Ngò le, nàng lé mara a byi, ló aq hkoi, ahkuí mai mara hkádum kut shut lo." ga tai kat ri.

Yesuq, Mingkân É Maubó

¹² Yesuq gi, shiwa byu pé lé dum nyo é hkùn, "Ngò gi, mingkân é maubó nghut lhê; Ngá htàng châng é sù ó yuq nghut kôle, mauchut hkaù má hkâ-nhám le so rá a nghut, asak maubó lé wó rá nghut lhê." ga tai ri.

¹³ Haù mù, haù Hparishe pé gi, "Wú aq, Náng gung Nàng saksé hkâm yu é nghut ri; Náng é saksé gi, teng rá a nghut." ga tai akô.

¹⁴ Haù hkùn, Yesuq gi, "Ngá gung Ngò saksé hkâm kôlhang, Ngá é saksé gi, teng lhê; hkâsu mù gá le, Ngò gi, Ngò hkâmai lé lo é eq Ngò hká shut e ló é lé, sê lhê. Nghut kôlhang,

nungmoq gi, Ngò hkâmai lé lo é lé le, Ngò hká shut e ló é lé le, a sé kó nghut ri.

¹⁵ Nungmoq gi, byù hkyam dông za jéyáng akô; Ngò gi, ó yuq lé le a jéyáng é nghut lhê.

¹⁶ Nghut kôlhang, Ngò jéyáng é nghut jáng, Ngò jéyáng é hkyô gi, jô lhê; hkâsu mù gá le, Ngò gi, Ngò baù a nghut, haù Ngo lé nhang kat é sù Iwa eq rahá nghut nyi lhê.

¹⁷ Haù nungmoq é tarà má yhang le, í yuq mai hkâm é saksé gi, teng lhê ga ká tô ri.

¹⁸ Ngò gi, Ngá é matú saksé hkâm yu sù nghut lhê; hau htoq agó, haù Ngo lé nhang kat é sù Iwa le, Ngá é matú saksé hkâm byí é nghut lhê." ga tú tai ri.

¹⁹ Haù mù, yhangmoq gi, Yhang lé, "Náng Wa gi, hkâmá lhu?" ga myi kôjáng, Yhang gi, "Nungmoq gi, Ngo lé le, Ngá Wa lé le, a sé kó nghut ri; nungmoq, Ngo lé sé kó é nghut le gi, Ngá Wa lé le, sé kó rá nghut lhê." ga tú tai ri.

²⁰ Dang haù pé gi, haù noqkuq yhùm wàng hkaù má é alu kat jang nâm má, Yhang mhoqshit nyi é u lé tai é dang nghut ri. Nghut kôlhang, Yhang lé, ó yuq le a chyup kó; hkâsu mù gá le, Yhâng é ahkyíng a jé shí é yanmai nghut ri.

²¹ Haù mù luí, Yesuq gi, yhangmoq lé, "Ngò gi, ló byuq rá nghut lhê, haù hkùn, nungmoq Ngo lé hô kó rá, yhumsing é mara má le shí kó rá nghut lhê. Ngò ló é jang má, nungmoq wó jé kó rá a nghut." ga, radàm dum puq tai ri.

²² Hau é yanmai, haù Yudaq byu pé gi, "Ngò ló é jang má, nungmoq wó jé kó rá a nghut." gá é gi, Yhânggung yhang sat shí rá gá é nghut lhê lhu?" ga myi bum akô.

²³ Nghut kôlhang, Yesuq xoq tai é gi, "Nungmoq gi, a-ô mai lo é bang nghut akô; Ngò gi, ahtoq mai lé é sù nghut lhê. Nungmoq gi, mingkan shí eq sêng é bang nghut akô; Ngò kúm gi, mingkan shí eq sêng é sù a nghut.

²⁴ Haù mù, nungmoq gi, yhumsing é mara má shí kó rá nghut lhê nghù, Ngò tai é nghut lhê. Ngò gi, haù Yuq nghut lhê nghù tai é lé, nungmoq a lumjáng kô é nghut jáng, nungmoq gi, gè gè yhang, yhumsing é mara má shí kó rá nghut lhê." gá ri.

²⁵ Haù hkùn, yhangmoq gi, "Nàng, ó yuq nghut lhê?" ga myi kôjáng, Yesuq gi, "Ngò ó yuq nghut é lé, Ngò, hkâ-nhám le tai nyi bê nghut lhê.

²⁶ Ngò gi, nungmoq eq séng luí, tai rá hkyô eq jéyáng rá hkyô, myo myo joq lhê. Nghut kôlhang, Ngo lé nhang kat é Sù gi, tengmán é Sù nghut lhê mù, Yhâng chyáng mai wó gyó yu é gú lé, Ngò, mingkan lé tai kyô lhê." ga tú tai ri.

²⁷ Yesuq gi, yhangmoq lé, Yhâng Wa eq séng é hkyô tai kyô nyi é lé, yhangmoq gi, a sé gyo kó nghut ri.

²⁸ Haù mù luí, Yesuq gi, "Haù Byu Yhangzo lé nungmoq tu shap* kat é hkûn sheq, Ngò gi, haù Yuq nghut é hkyô lé le, yhumsing myit đông haì le a kut e za, haù Íwa mhoq byí é đông za taí é hkyô lé le, nungmoq sé kó rà nghut lhê.

²⁹ Haù Ngo lé nhang kat é Sù gi, Ngò eq rahá nghut nyi lhê; Ngò gi, hkâ-nhám le, Yhang lé myit ngón nhang é hkyô chyat kut é yanmai, Yhang gi, Ngò lé baù za a tô pyám to nghut ri." ga taí ri.

³⁰ Yhang, haù su taí nyi é u lé lhang, byù myo myo gi, Yhang lé lumjng bùm bekò nghut ri.

Abraham É Awut Ashín Pê Hkyô

³¹ Haù mù, Yesuq gi, Yhang lé lumjng é Yudaq byu pé lé, "Ngò mhoqshit é hkyô lé châng kut nyi bekò nghut jáng, nungmoq gi, gè gè yhang, Ngá é chángzò pé nghut bekò.

³² Nungmoq gi, haù tengmán hkyô lé sé kó rà nghut luí, haù tengmán hkyô gi, nungmoq lé lhoq lhut kat rà nghut lhê." ga taí ri.

³³ Haù hkûn, yhangmoq gi, "Ngamoq gi, Abraham é awut ashín pé nghut luí, ó yuq é jùn le hkâ-nhám a dut wú é nghut lhê. Haù mù, 'nungmoq lé lhoq lhut kat rà' nghú Nàng hkâsu kut wó taí lhê lhu?" ga tù taí akò.

³⁴ Yesuq dum tù taí é gi, "Ngò, nungmoq lé teng za taí kôlé, mara kut shut é sù gi, mará é jùn nghut lhê.

³⁵ Jùn gi, yhum ikun eq hkâ-nhám le sêng nyi rà a nghut; zo kúm gi, ikun eq ahtum abyuq sêng lhê.

³⁶ Haù mù luí, haù Zo gi, nungmoq lé lhoq lhut kat é nghut jáng, nungmoq gi, gè gè yhang, lut berá nghut lhê.

³⁷ Nungmoq gi, Abraham é awut ashín pé nghut é lé, Ngò sê lhê. Nghut kôlhang, nungmoq gi, Ngá é dang lé a lhom yù kô é yanmai, Ngo lé sat rà dà akò nghut ri.

³⁸ Ngò gi, Ngá Wá chyáng mai myang yu é eq rajung za, nungmoq lé taí kyô nyi lhê; nungmoq le, nungmoq é íwa chyáng mai wó gyo yu é eq rajung za kut nyi akò nghut ri." gá ri.

³⁹ Haù hkûn, yhangmoq gi, "Ngamoq é íwa gi, Abraham nghut lhê." ga tù taí kôjáng, Yesuq gi, "Nungmoq, Abraham é yhangzò pé nghut é nghut le gi, Abraham kut é su kut kó rà nghut lhê.

⁴⁰ Nghut kôlhang, nungmoq gi, haù Garai Gasâng chyáng mai wó gyo yu é tengmán hkyô lé taí kyo sù nghut é Ngo lé, sat pyám nau akò nghut ri. Haù sù é hkyô gi, Abraham a kut é nghut lhê.

⁴¹ Nungmoq gi, nungmoq é íwa kut é muzó lé yhang, kut nyi akò." ga taí ri.

Haù hkûn, yhangmoq gi, "Ngamoq gi, dezo amyù a nghut; ngamoq gi, Íwa rayuq za

wó lhê; haù gi, Garai Gasang nghut lhê." ga taí he akò nghut ri.

Zô Wuí É A-kyang Gi, Mó Ó Nghut É Hkyô Shit

⁴² Yesuq gi, yhangmoq lé, "Garai Gasang gi, nungmoq é Íwa nghut é nghut jáng, nungmoq gi, Ngo lé chyitdap kó rà nghut lhê; hkâsu mù gá le, Ngò gi, Garai Gasâng chyáng mai lé jé luí, ahkuí, shí má nyi tô é nghut lhê. Ngò gi, Ngá myit đông lé lo é a nghut, Yhang sheq Ngo lé nhang kat é ru nghut lhê.

⁴³ Nungmoq gi, haù mù Ngá é dang lé a sê gyo kô é lhu gá le, Ngò taí é dang lé, nungmoq a wó lhom yù kô é yanmai nghut ri.

⁴⁴ Nungmoq gi, haù nungmoq é íwa nghut é nat Tsadán eq sêng é bang nghut luí, nungmoq é íwa ô nau é hkyô lé kut nau bum akò. Yhang gi, a-nham sâng-hi mai byù sat sù nghut ri. Yhang má tengmán hkyô a bo é yanmai, yhang gi, haù tengmán hkyô má a yap gíng nyi nghut ri. Yhang gi, mhaù é hkûn, yhang é myit má bo é đông taí ri; hkâsu mù gá le, Yhang gi, byù mhaù nghut luí, mhaù hkyô pé é íwa nghut ri.

⁴⁵ Haù su mù, Ngò, nungmoq lé, haù tengmán hkyô taí kyô é yanmai, nungmoq gi, Ngo lé a lumjng kó nghut ri.

⁴⁶ Nungmoq má é ó yuq wá, Ngo lé mara bo lhê nghú saksé wó tún shit akò lhu? Ngò gi, haù tengmán hkyô lé taí nyi é nghut le nhing, nungmoq, Ngo lé haù mù a lumjng kô é lhu?

⁴⁷ Garai Gasang eq sêng é sù gi, Garai Gasang taí é dang lé gyo lhê. Nungmoq a gyo kô é gi, nungmoq, Garai Gasang eq a sêng kô é yanmai nghut ri." ga taí ri.

Yesuq Eq Abraham

⁴⁸ Haù hkûn, haù Yudaq byu pé gi, Yhang lé, "Nàng gi, Samariq byù nghut é htoq agó, nat gang wang júng to sù nghut lhê nghú, ngamoq taí é dang gi, jô lhê a nghut lhu?" ga myí akò.

⁴⁹ Yesuq gi, "Ngò gi, nat gang wang júng é hui sù a nghut; Ngò gi, Ngá Wá le sheq hkunggá é ru nghut lhê; nungmoq kúm gi, Ngo lé taí hpoi nyi akò nghut ri.

⁵⁰ Ngò gi, Ngá é matú aróng ho nyi é a nghut; nghut kôlhang, hô byi Sù rayuq nyi lhê, haù yuq jéyáng sháng gaq.

⁵¹ Ngò, nungmoq lé teng za taí kôlé, Ngá dang lé châng é sù gi, hkâ-nhám le, shí rà a nghut." ga taí ri.

⁵² Hau é yanmai, haù Yudaq byu pé gi, "Nàng gi, nat gang wang júng to sù nghut é lé, ahkuí, ngamoq sé bê! Abraham gi, shi byuq bê; haù myiqtoí pé le, shi byuq bekò nghut ri; nghut kôlhang, Nàng gi, 'Ngá dang lé châng é sù gi, hkâ-nhám le, shí rà a nghut.' ga taí ri.

* 8:28 Tu shap gá é lichyúm gi, tapzng htoq má jén sat pyám rà gá é nghut lhê.

⁵³ Nang gi, ngamoq é íwa Abraham htoq hkik lhê lúh? Yhang gi, shi byuq bê; haú myiqhtoi pé le, shi byuq bekô nghut ri. Náng gung nang ó yuq su ngam lhê lúh?" ga tai akô.

⁵⁴ Yesuq gi, "Ngá gung Ngô lhoq gyaú yu é nghut jáng, Ngá é arông gi, hai hpaudap é a nghut; nghut kôlhang, haú nungmoq é Garai Gasang nghut lhê ga nungmoq tai é sù, Ngá Wa gi, Ngo lé lhoq gyaú é sù ru nghut lhê.

⁵⁵ Nungmoq gi, Yhang lé a sé kó nghut ri; nghut kôlhang, Ngô gi, sê lhê. Yhang lé a sé nghú Ngô tai é ru nghut le gi, Ngô le nungmoq su byù mhaú dut râ nghut lhê; nghut kôlhang, Ngô gi, Yhang lé sé lui, Yhâng é dang gyo sù nghut lhê.

⁵⁶ Nungmoq é íwa Abraham gi, Ngo lé râ buinyi lé myoqbyu gabú nyi é nghut lui, myang mù, gabú bê nghut ri." ga tú tai ri.

⁵⁷ Haú hkún, haú Yudaq byu pé gi, Yhang lé, "Nang gi, asak ngo xê zàn lhang a nghut shi é nhing, Abraham lé myang wú é nghut lhê lúh?" ga tai akô.

⁵⁸ Yesuq gi, "Ngò, nungmoq lé teng za tai kôlé, Abraham lhang a hkú shi má, Ngò nyi gù bê nghut lhê."^{*} ga tú tai ri.[†]

⁵⁹ Haú mù lui, yhangmoq gi, Yesuq lé, dú rá ga luqgok kui yu akô; nghut kôlhang, Yesuq gi, haú noqkuq yhúm mai haq htoq lô byuq bê nghut ri.

9

Myoqjit Sù Lé Lhoq Gê Byi É Hkyô

¹ Yesuq gi, só yông lô nyi é u lé, hku lé é mai myoqjit to gú nghut é byù rayuq lé myang ri.

² Haú hkún, Yhâng é chángzò pé gi, Yhang lé, "Rabai é, shi yuq, myoqjit gù hku lé é gi, ó yuq kut shut é yubak é yanmai nghut lhê lúh? Yhang kut shut é lúh? A nghut jáng, yhâng nu yhâng wa kut shut é lúh?" ga myi akô.

³ Yesuq tú tai é gi, "Haú gi, yhang kut shut é yanmai le a nghut, yhâng nu yhâng wa kut shut é yanmai le a nghut; haú Garai Gasang é muzó lé, yhang má wó lhoq htoq shit rá matú, haú dut é ru nghut lhê.

⁴ Nga-nhung gi, haú Ngo lé nhang kat Su é muzó lé, nyi nghut tô ashí hkún, zui sai nyi ra rá dut lhê; myín jé jáng gi, ó yuq le, mù wó zui sai rá a nghut.

⁵ Ngò gi, mingkan htoq má nyi tô é u lé, mingkân é maubó nghut lhê." ga ri.

⁶ Yhang gi, haú su ga tai lui, myigung má sókan byé hkyó mù, tse-nyhaq sai yù lui, haú yuq é myoqji má but byi ri.

⁷ Hau htang, haú yuq lé, "Haú Siloam wuhtum má é chí pyám aq." ga tai ri. (Siloam gá é gi, nhang é gá é lichyúm nghut lhê.). Haú mù, haú yuq gi, é chí mù, myoq myang lui, yhúm shut lô bê nghut ri.

⁸ Haú yhâng é yhumkyo bang eq yhang dung zô wún é lé myang wú é bang gi, "Shí yuq gi, haú zung to mù, dung zo zo lhaq kut é sù, a nghut kó lúh?" ga myi bum akô.

⁹ Ra-am gi, "Haú yuq nghut lhê." ga bum akô.

Góbang gi, "A nghut, haú yuq su dut e za ru nghut lhê." ga tai akô.

Nghut kôlhang, yhang gi, "Ngò, haú yuq yhang nghut lhê." ga tai ri.

¹⁰ Haú hkún, yhangmoq gi, "Haú nghut le gi, náng myoq hkâsu kut wó myang é lúh?" ga myi akô.

¹¹ Yhang gi, "Haú Yesuq gá é byù rayuq, tse-nyhaq ratsuí sai yù lui, ngá é myoqji má but byi mù, 'Siloam wuhtum má é chí pyám aq.' ga ngo lé tai ri; haú mù, ngò é chí pyám é htang má, ngá myoq wó myang é nghut lhê." ga tú tai ri.

¹² Haú hkún, yhangmoq gi, "Byù haú yuq gi, hkâmá nyi ri lúh?" ga, yhang lé myi akô.

Yhang gi, "Ngò a sé." ga tai ri.

Myoq Dum Myang Byuq É Hkyô Lé, Hparishe Pé Gôn Wú É Hkyô

¹³ Yhangmoq gi, haú myoqjit wú bê sù lé, Hparishe pé chyáng shuí lé akô.

¹⁴ Yesuq, tse-nyhaq sai yù mù, haú yuq é myoq lé lhoq myang byi é buinyi gi, Bánno buinyi nghut ri.

¹⁵ Haú mù, yhang, myoq hkâsu kut wó myang é hkyô lé, haú Hparishe pé le dum myi akô. Haú jáng, yhang gi, "Haú yuq gi, ngá é myoqji má tse-nyhaq but byi mù, ngò gi, é chí pyám jáng, ngá myoq myang bê nghut lhê." ga tú tai ri.

¹⁶ Haú Hparishe pé ra-am gi, "Shí yuq gi, Bánno buinyi é tará lé a châng é sù nghut é yanmai, Garai Gasang chyáng mai lé é sù a nghut." ga tai akô.

Nghut kôlhang, ra-am gi, "Yubak dap sù rayuq gi, haú su é limik kumlhá pé lé, hkâsu wó kut htoq rá lúh?" ga myi akô. Haú mù, yhangmoq gi, myit a huí lhum bùm lò kó nghut ri.

¹⁷ Haú mù, yhangmoq gi, haú myoqjit wú sù shut lhing mù, "Nang lé myoq lhoq myang byi é sù gi, hkasú é byù nghut lhê nghú, nang tai rá lúh?" ga dum myi kôjáng, "Yhang gi, myiqhtoi rayuq nghut ri." ga, yhang tú tai ri.

¹⁸ Haú Yudaq byu pé gi, haú yuq myoqjit wú é hkyô lé le, ahkuí myoq dum myang bê nghut é hkyô lé le, haú yhâng nu eq yhâng wa lé, é ji lô nhang é hkún jé shoq, a lumjing kó nghut ri.

¹⁹ Haú mù, Yhangmoq gi, haú yhâng nu eq yhâng wa lé, "Shí yuq gi, nungnhik é yhangzo nghut lhê lúh? Hku lé é hkún mai, myoqjit gù nghut lhê lúh? Yhang, ahkuí, hkâsu kut wó myang é lúh?" ga myi akô.

* 8:58 Htoq Lô 3:14

† 8:58 Bun zo shi má, Yesuq gi, Yhânggung yhang Garai Gasang nghut lhê gá nyi nghut ri.

²⁰ Haú hkûn, yhang nu eq yhang wâ nhik gi, "Yhang gi, ngá-nhik é yhangzo nghut é lé le, hku lé é hkûn mai myoqjit gù nghut é lé le, ngá-nhik sê lhê.

²¹ Nghut kôlhang, yhang, ahkuí hkâsu kut wó myang é hkyô lé le, yhang é myoq lé ó yuq èq lhoq myàng byí é hkyô lé le, ngá-nhik a sé. Yhang, asak wáng bê, yhang lé myí wú keq, yhanggùng yhang dat taí kyo rá nghut lhê." ga tú taí akô.

²² Haú yhang nu eq yhang wâ nhik gi, Yudaq byu pé lé gyuq kô é yanmai, haú su ga taí kô é nghut ri; hkâsu mù gâ le, Yesuq gi, haú Hkrisduq nghut lhê ga yín yu é sù, ó yuq lé nghut kôle, haú tarajong mai lhoq htoq pyám rá nghut lhê ga, haú Yudaq suwún wú chôm myit hpyit to bekô nghut é yanmai nghut ri.

²³ Hau é yanmai, yhang nu eq yhang wâ nhik gi, "Yhang, asak wáng bê, yhang lé myí wú keq." ga taí kô é nghut ri.

²⁴ Haú Hparishe pé gi, myoqjit wú bê sù haú yuq lé dum ji yù mù, "Garai Gasang lé za hkya-on waq toq aq! Haú yuq gi, yubak dap sù rayuq nghut é lé ngamoq sê lhê." ga taí akô.

²⁵ Haú hkûn, yhang tú taí é gi, "Yhang gi, yubak dap sù rayuq nghut lhê luq, a nghut é luq, ngò a sé. Ngò gi, hí lé myoqjit sù nghut kôle, ahkuí wó myàng bê nghut é lé za, ngò ru sê lhê." gâ ri.

²⁶ Hau htàng, yhangmoq gi, "Yhang, nang lé haí kut byí ri lúhú? Náng é myoq lé, yhang, hkâsu kut lhoq myàng byí ri lúhú?" ga, yhang lé myí akô.

²⁷ Haú hkûn, yhang gi, "Ahkuí za, ngò, nungmoq lé taí kyo bê le, nungmoq sheq a gyo kôluí nhing! Nungmoq gi, haí mù dum gyô nau akô lúhú? Nungmoq le, Yhang é chángzô pé dut nau akô lúhú?" ga taú myí ri.

²⁸ Haú mù, yhangmoq gi, yhang lé gyaí rhoí é đông mai, "Nàng gi, haú yuq é chángzo nghut ri-nhung! Ngamoq kúm gi, Mosheq é chángzô pé ru nghut lhê!

²⁹ Garai Gasang gi, Mosheq lé dáng nyo é hkyô lé, ngamoq sê lhê; nghut kôlhang, haú yuq eq séng luí, Yhang gi, hkâmai lé é sù nghut é lé lhang, ngamoq a sé." ga taí akô.

³⁰ Haú hkûn, haú yuq gi, "Yhang, ngo lé myoq wó lhoq myang byí kôlhang, Yhang gi, hkâmai lé é sù nghut é lé, nungmoq a sé kô é gi, mauhpo yhang nghut bê!

³¹ Garai Gasang gi, yubak dap bâng é dang lé a gyo byí é hkyô lé, nga-nhung sê lhê. Garai Gasang gi, Yhang lé noqkuq luí, Yhang ó nau é hkyô lé, kut é sù é dang lé kúm gyo byí lhê.

³² Hku lé é hkûn mai myoqjit gù nghut é byù lé, ó yuq èq myoq lhoq myàng byí é gâ é hkyô lé, mingkan lé joq é hkûn mai, ó yuq le a wó gyô wú é nghut lhê.

³³ Haú yuq gi, Garai Gasang chyáng mai lé é sù za a nghut le gi, haí le wó kut rá a nghut." ga tú taí ri.

³⁴ Haú su ga jáng, yhangmoq gi, "Nàng gi, yubak htui má hku lé é sù nghut to luí nhing, ngamoq lé wám mhoqshit lhê lúhú?" ga tú taí kôluí, yhang lé hkat htoq pyám akô nghut ri.

Woi-nyí Má Myoqjit É Hkyô

³⁵ Yesuq gi, haú yuq lé yhangmoq hkat htoq pyám é hkyô lé wó gyo luí, yhang lé myàng hui jáng, "Nàng gi, haú Byu Yhangzo lé lumjing lhê lúhú?" ga taí ri.

³⁶ Haú hkûn, haú yuq gi, "Yhumsing ê, haú gi, ó yuq nghut lhê lúhú? Yhang lé, ngò wó lumjing sháng gaq, taí kyo laq." ga myí ri.

³⁷ Yesuq gi, "Nàng, haú yuq lé myàng wú bê nghut lhê; ahkuí, nàng eq dáng nyo nyi é sù gi, haú yuq yhang nghut lhê." ga taí ri.

³⁸ Haú mù, haú yuq gi, "Yhumsing ê, ngò lumjing lhê!" ga taí luí, Yhang lé noqkuq ri.

³⁹ Haú hkûn, Yesuq gi, "Haú myoqjit bang myoq myàng kó rá hkyô eq myoq myàng bang myoqjit kó rá hkyô lé, tará jéyáng rá matú, mingkan shí má Ngò jé lé é nghut lhê." ga taí ri.

⁴⁰ Yhang eq rahá nghut nyi é Hparishe pé ra-am gi, Yhang haú su ga taí é lé wó gyo kôjáng, "Hkâsu htá? Ngamoq gi, myoqjit bang dut bê lúhú?" ga myí akô.

⁴¹ Haú hkûn, Yesuq gi, "Nungmoq, myoqjit é bang ru nghut le gi, yubak mara a bò kô rá nghut lhê; nghut kôlhang, ahkuí, nungmoq gi, myoq myàng bang nghut lhê ga kô é yanmai, nungmoq má yubak mara bo ashí kó nghut ri.

10

Sau Zúng Sù Eq Sau Hpúng

¹ Ngò, nungmoq lé teng za taí kôlé, haú sau hkup má, hkúmdong mai a wang e za, gó hkyô đông doq lut wang é sù gi, hkau sù eq damyaq nghut ri.

² Haú hkúmdong mai wang é sù kúm gi, sau zúng sù nghut ri.

³ Haú hkum zúng sù gi, yhang lé hkum hpóng byí é htoq agó, haú sau pé gi, yhang é htê lé gyo byí akô. Yhang gi, yhang é sau pé lé, mying lang luí wut yù mù, yhangmoq lé shuí htoq htoq kut nyi ri.

⁴ Yhang é sau pé banshoq lé hpông htoq yù mù, yhang gi, hí má sô ri; sau pé gi, yhang é htê lé sê gyo kô é yanmai, yhang é htàng má châng akô nghut ri.

⁵ Nghut kôlhang, yhangmoq gi, byù bing é htàng má, hkâ-nhám lhang cháng kó rá a nghut e za, yhang chyáng mai kúm hpang byuq kó rá nghut lhê; hkâsu mù gâ le, haú byù bing é htê lé, yhangmoq a sê gyo kô é yanmai nghut ri." ga taí ri.

⁶ Yesuq gi, dangtú haú lé yù mù, yhangmoq lé taí kyô ri; nghut kôlhang, yhangmoq

gi, Yhang haí taí kyô nyi é lé, a sê gyo kó nghut ri.

⁷ Haú mù, Yesuq dum taí é gi, "Ngò, nung-moq lé teng za taí kôlé, Ngò gi, haú sau pé wang é hkúmdong nghut lhê.

⁸ Ngá é hí má lé é lhunglhâng bang gi, hkau bang eq danyaq pé nghut akó; haú sau pé kúm gi, yhangmoq é dang lé a lhom gyo byi kó nghut ri.

⁹ Ngò gi, hkúmdong nghut lhê; Ngò mai wang é sù ó yuq nghut kôle, hkyi yu é hui rá nghut lhê. Haú yuq gi, htoq htoq wàng wàng wò kut rá eq mhan-yô myang hô rá nghut lhê.

¹⁰ Haú hkau sù gi, hkau rá, sat rá eq lhoq htên pyám rá matú, lé e za nghut lhê. Ngo lé é gi, yhangmoq, asak wó yú rá eq byíngjup é asak lé wó yú rá matú sheq nghut lhê.

¹¹ Ngò gi, ge é sau zúng sù nghut lhê; haú ge é sau zúng sù gi, sau pé é matú, yhumsing é asak lé ap byi pyám é nghut lhê.

¹² Haú langchyang kut sù gi, sau pé lé sing é sau zúng sù a nghut; haú mù, yhang gi, haú wamhkui lé lo é lé myàng jáng, sau pé lé pyám to mù hpang ló byuq rá nghut lhê; haú hkún, wamhkui gi, sau hpúng lé é htím lui, lhoq pyo pyám rá nghut lhê.

¹³ Yhang gi, langchyang hpó nghut lui, haú sau pé é matú haí le a myit chiq byí é yanmai, hpang é nghut ri.

¹⁴ Ngò gi, haú ge é sau zúng sù nghut lhê; haú Iwa gi, Ngo lé sê é nghut lui, Ngo le, haú Iwa lé sê é eq rajung za,

¹⁵ Ngá é sau pé lé, Ngò sê lhê; Ngá é sau pé le, Ngo lé sê akó nghut ri; Ngò gi, haú sau pé é matú, yhumsing é asak lé ap byí pyám é nghut lhê.

¹⁶ Ngò gi, sau hkup shí má é a nghut é gotú sau pé wó ashí; sau haú pé lé le, Ngò, shuí yu rá rá nghut lhê; sau haú pé le, Ngá é htê lé gyo kó rá nghut lhê; haú hkún, sau hpúng rahpúng za dut lui, sau zúng sù le rayuq za, nghut rá nghut lhê.*

¹⁷ Ngò gi, Ngá é asak lé dum wó taú yù sháng gaq nghú, yhumsing é asak lé ap byí pyám é yanmai, Ngá Wa gi, Ngo lé chytidap é nghut lhê.

¹⁸ Ngá é asak lé, ó yuq èq le wó yu pyám é a nghut, Ngá é myit dông byi pyám é ru nghut lhê. Ngò gi, yhumsing asak lé ap byi pyám rá ahko ahkáng eq haú lé dum taú yù rá ahko ahkáng wó sù nghut lhê. Haú gi, Ngá Wá chyang mai Ngò wó yu é hkunmó nghut lhê." gá ri.

¹⁹ Dang haú pé é yanmai, haú Yudaq byu pé gi, myit a hui lhum dum dut byuq bekó nghut ri.

²⁰ Haú má é bang myo myo gi, "Yhang gi, nat gang wang júng to lui, ná byuq bê nghut

ri. Yhâng é dang lé, haí mù gyo nyi akó lú?" ga taí bum akó.

²¹ Nghut kôlhâng, góbang gi, "Dang shi pé gi, nat gang wang júng tô é byú taí é dang a nghut. Nat gang gi, myoqjit sù lé, myoq wó lhoq myâng nhâng rá lú?" ga taí bum akó nghut ri.

Yudaq Byu Pé A Lumjng Kô É Hkyô

²² Yerusalem wà mó má, Ap Nóng Poi* jé bê nghut ri. Haú gi, gyoqmyò nám nghut ri.

²³ Haú hkún, Yesuq gi, haú noqkuq yhúm wàng má é, Sholumon é Jirop má sô yông wún ri.

²⁴ Haú u lé, haú Yudaq byu pé gi, Yhâng é lhinghkyuq má lé zing bùm kômù, "Nàng gi, ngamoq lé hká-myhâng jé shoq ùng-àng nhang nyi rá lú? Nàng, Hkrisduq nghut le gi, ngamoq lé san za taí kyô pyám laq." ga taí akó.

²⁵ Yesuq gi, "Ngò, nungmoq lé taí kyo bê nghut lhê; nghut kôlhâng, nungmoq a lumjng kó nghut ri. Ngá Wá é mying mai, Ngò kut é laklai kumlhá haú pé gi, Ngá é matú saksé hkám byí nyi ri.

²⁶ Nghut kôlhâng, nungmoq gi, Ngá é sau a nghut kô é yanmai, a lumjng kó nghut ri.

²⁷ Ngá é sau pé gi, Ngá é htê lé dat gyô akó; Ngò gi, yhangmoq lé sê lhê; yhangmoq le, Ngá htâng chàng akó nghut ri.

²⁸ Ngò gi, yhangmoq lé, ahtum abyuq é asak byí é nghut mù, yhangmoq gi, hká-nhám le htên byoq kó rá a nghut; ó yuq èq le, yhangmoq lé, Ngá é loq mai wó lú yú rá a nghut.

²⁹ Yhangmoq lé, Ngá é loq má ap byi tô é sù, haú Ngá Wa gi, lhunglhâng htoq má je gyaú Sù nghut lhê; ó yuq èq le, yhangmoq lé, Ngá Wá é loq mai wó lú yú rá a nghut.

³⁰ Ngò eq haú Iwa gi, rayuq za nghut lhê." ga tú taí ri.

³¹ Haú hkún, haú Yudaq byu pé gi, Yesuq lé, dú rá matú luqgok dum kui akó.

³² Nghut kôlhâng, Yesuq gi, yhangmoq lé, "Haú Iwá chyang má é laklai kumlhá mó pé myo myo, Ngò, nungmoq lé tún shit bê nghut lhê. Nungmoq, Ngo lé dú rá gi, hká lhúm é yanmai nghut akó lú?" ga myí ri.

³³ Haú Yudaq byu pé gi, "Ngamoq, Nang lé dú rá gi, haú pé hká lhúm é yanmai le a nghut; Nàng gi, byu rayuq nghut to lui, Garai Gasang nghut é dông taí whuí lui, Yhang lé rhoi dang taí é yanmai, dú rá nghú lhê." ga tú taí akó.

³⁴ Haú hkún, Yesuq gi, yhangmoq lé, "Nungmoq gi, garai pé nghut akó nghú, Ngò taí bê nghut lhê.* ga nungmoq é tará má ká to lhê a nghut kó lú?"

* 10:16 Esai 56:8

* 10:22 Ap Nóng Poi gá é gi, Garai Gasáng é yhúm lé ap nóng lé gá lhê.

* 10:34 Hky-a-on 82:6

³⁵ Chyúmdang haù lé gi, a ge lhoq hpyoq pyâm é nghut lui, haù Garai Gasâng é mung-dang lé wó yu é bang lé, 'garaí pé' gá é nghut le gi,

³⁶ haù Íwa mai, Yhang é matú hqyin htoq yú lui, mingkan má nhang é Sù eq séng lui gi, hká dòng nghú kó rá lúh? 'Ngò gi, Garai Gasâng é Yhangzo nghut lhê.' nghú tái é yanmai, Ngò gi, Garai Gasang lé tái hpoi ri nghú, nungmoq, hái mù Ngo lé mara hùn akò lúh?

³⁷ Ngá Wá é muzó pé lé, Ngò kut é a nghut jáng, Ngo lé hkálumjǐng kó.

³⁸ Nghut kôlháng, Ngò, haù pé lé kut é nghut le gi, nungmoq, Ngo lé a lumjǐng kôlháng, haù muzó pé lé lumjǐng keg; haù hkùn, haù Íwa gi, Ngò má nghut nyi é hkyô lé le, Ngò gi, haù Íwa má nghut nyi é hkyô lé le, nungmoq wó sé lui, sê gyo kó rá nghut lhê." ga tú tái ri.

³⁹ Yhangmoq gi, Yhang lé chyup rá dum hen akò; nghut kôlháng, Yhang gi, yhangmoq é loq mai wó ló bé nghut ri.

⁴⁰ Hau htàng, Yesuq gi, haù Yodan làng he hpoq má é, Yohan, wui-myhup hkám býi hi é jowò má ló jé ri. Haù má, Yhang nyi nyi é nghut lui,

⁴¹ býi myo myo gi, Yhàng chyáng lé jé bum akò. Yhangmoq gi, "Yohan gi, limik kumlhá a kut wú é nghut kôlháng, shí yuq eq séng lui, Yohan tái é hkyô lhungláng gi, têng ri." ga tái bum akò.

⁴² Haù jowò má, býi myo myo gi, Yesuq lé lumjǐng bùm bekò nghut ri.

11

Lazaruq Shi Byuq É Hkyô

¹ Ahkuí, Lazaruq gá é býi rayuq gi, no nyi ri. Yhang gi, haù Mariq eq yhàngnhá Mahtaq nhik nyi é Behtani wá má é sù nghut lhê.

² Mariq haù gi, Yhumsing lé namngón-xú hut gyun lui, hkyi má yhàng xam eq sùt býi é sù nghut ri; yhang gi, haù no nyi é Lazaruq é yhàngnhá nghut ri.

³ Haù mù, haù yhàngnhá nhik gi, "Yhumsing ê, Nàng chyitdap é sù gi, no nyi ri." ga, Yesuq chyáng é tái nhang akò.

⁴ Yesuq gi, dang haù lé wó gyo jáng, "Nòhpyo haù gi, shí-nò a nghut. Haù Garai Gasâng é Yhangzo gi, hau é yanmai, hpungwup shing kang wó dan hù é hui sháng gaq ga, Garai Gasâng é hpungwup shing kang é matú dut é ru nghut lhê.

⁵ Yesuq gi, Mahtaq eq yhanggu Mariq lé le, Lazaruq lé le, chyitdap ri.

⁶ Haù su mù, Yhang gi, haù Lazaruq no nyi ri gá é lé, wó gyo é hkùn, haù Yhang nyi é jowò má, í nyi nyi tô ashí nghut ri.

⁷ Hau htàng, Yhang gi, Yhàng é chángzô pé lé, "Nga-nhúng gi, Yuda mau shut dum tái ló sháng." ga tái ri.

⁸ Haù hkùn, yhangmoq gi, "Rabai ê, hkù-yoq za, haù Yudaq byu pé, Nang lé lugkok eq dú sat rá da kó é nghut le nhing, ahkuí, haù shut dum tái ló rá lúh?" ga Yhang lé myi akò.

⁹ Yesuq gi, "Nyí gi, hkying hkum raxe í hkum bo lhê a nghut kó lúh?*" Nyí má hkyô sô é sù gi, mingkan shí é maubó é yanmai myoq myàng lui, lengbat rá a nghut.

¹⁰ Myin lé hkyô sô é sù kúm gi, maubó lé a wó é yanmai, lengbat lhê." ga tú tái ri.

¹¹ Haù su ga tái é htàng má, Yhang, yhangmoq lé xoq tái kyô é gi, "Nga-nhúng é luzúm Lazaruq yhup myhi byuq bé nghut ri; nghut kôlháng, Ngò gi, yhang lé é nhaù toq rá nghut lhê." gá ri.

¹² Haù hkùn, Yhàng é chángzô pé gi, "Yhumsing ê, yhang yhup myhi tô é nghut le gi, ge lò rá nghut lhê." gá tái akò.

¹³ Yesuq gi, Lazaruq shí byuq bé hkyô lé tái é nghut ri; nghut kôlháng, Yhàng é chángzô pé gi, gè gè yhup myhi tô é tái tái é su ngam pyâm akò nghut ri.

¹⁴ Haù mù lui, Yesuq, yhangmoq lé san za jáng tái kyô é gi, "Lazaruq gi, shí byuq bé nghut lhê.

¹⁵ Ngò haù má a nyi záng é gi, nungmoq wó lumjǐng rá matú nghut lui, nungmoq é matú Ngò gabú býi ri; yhàng chyáng e ló sháng hkoi." gá ri.

¹⁶ Haù mù, haù Zozùm le gá é Htomaq gi, gotú chángzô pé lé, "Nga-nhúng le, Yhang eq rahá shí sháng gaq, châng e ló sháng." ga tái ri.

Haù Í-nhà Nhik Lé, Yesuq Nhik Ting É Hkyô

¹⁷ Yesuq gi, jé e é hkùn, haù Lazaruq lé lup má kat pyâm é myi nyi nghut bé hkyô lé, lhom tái kyô akò.

¹⁸ Behtani wá gi, Yerusalem wá mó eq í dèng kô za wè lhum ri.

¹⁹ Haù mù, Yudaq byu pé myo myo gi, Mahtaq eq Mariq nhik é yhanggu shi byuq é yanmai, nhik ting býi kó rá gá lé jé nyi bum akò nghut ri.

²⁰ Mahtaq gi, Yesuq jé lé lo é hkyô lé wó gyo jáng, htoq é mù, Yhang lé é hui ri; nghut kôlháng, Mariq gi, yhùm má nyi tô ri.

²¹ Mahtaq gi, Yesuq lé, "Yhumsing ê, Nàng, shí má nyi tô é ru nghut le gi, ngá gu shí byuq rá a nghut.

²² Nghut kôlháng, ahkuí le, Garai Gasâng chyáng Nàng hái dung kôlháng, Yhang býi rá nghut é lé, ngò sê lhê." ga tái ri.

²³ Yesuq gi, yhang lé, "Nung gu, dum dui toq rá nghut lhê." ga tái ri.

* **11:9** Nyí gi, hkying hkum raxe í hkum bo lhê a nghut kó lúh? gá é gi, ahkying a jé shimá, muzó nó é gi, a ge é nghut lhê gá é nghut ri.

24 Haú hkûn, Mahtaq gi, "Haú jìhtûm buinyi má dum dui toq é hkûn, yhang le dum dui toq rá nghut é lé, ngò sê lhê." ga tú tai ri.

25 Haú hkûn, Yesuq gi, yhang lé, "Ngò gi, dum dui toq hkyô eq asak nghut lhê. Ngò lé lumjîng é sù gi, shi byuq kôlhang, dum dui rá nghut lhê.

26 Asak dui nyi luí, Ngo lé lumjîng é sù ó yuq nghut kôle, hkâ-nhâm le shi é hui rá a nghut. Nang gi, dang shi lé lumjîng lhê lúhú?" ga tai ri.

27 Haú hkûn, yhang gi, "Yhumsîng ê, ngò lumjîng lhê. Nang gi, haú mingkan má jé lé lô rá nghut é, Garai Gasâng é Yhangzo, Hkrisduq† nghut é lé, ngò lumjîng lhê." ga, Yhang lé tai kyô ri.

28 Yhang gi, haú su ga tai é htâng má, taú lô mù, yhanggu Mariq lé, tsik za wut yù luí, "Haú Sará jé tô ri; Yhang gi, nang lé myi nyi ri." ga tai kyô ri.

29 Mariq gi, haú lé wó gyo jáng, hân za toq mù, Yesuq chyáng ê bê nghut ri.

30 Haú u lé, Yesuq gi, haú wâ hkaú má a wang lô shi é za, Mahtaq eq hui é jowò má ru nyi tô ashí nghut ri.

31 Haú yhúmhkaú má, Mariq lé nhik tîng nyi é Yudaq byu pé gi, yhang hân za toq luí, htoq lô é lé myàng kôjáng, yhang, lup má é ngau rá dà lhê abe ga, myit yù kômù, yhang htâng châng e lô bum akò nghut ri.

32 Mariq gi, Yesuq nyi tô é jang má jé mù, Yhang lé myàng jáng, Yhâng é hkyi wang má ngóm gop to luí, "Yhumsîng ê, Nang, shi má nyi tô é ru nghut le gi, ngá gu shi byuq rá a nghut." ga tai ri.

33 Yesuq gi, Mariq ngau nyi é lé le, haú yhang eq rahá lé lo é Yudaq byu pé ngau nyi kô é lé le, myàng jáng, Yhâng é myit má gyai yhang hkâm zo wui é eq myit wui myit hke dut nyi ri.

34 Haú mù, Yhang gi, "Yhang lé, hkámá tô tô akò lúhú?" ga myi jáng, yhangmoq gi, "Yhumsîng ê, lé wú wú aq." ga tú tai akò.

35 Yesuq gi, ngau bê nghut ri.

36 Haú mù, haú Yudaq byu pé gi, "Wú keq, Yhang gi, Lazaruq lé, haú-í yhang chyt ri-nhung!" ga tai akò.

37 Nghut kôlhang, ra-am gi, "Haú myoqjit sù lé, myoq wó lhoq myàng byi é Sù gi, shi yuq lé le, a shi lo shoq a wó kut é lúhú?" ga tai bum akò nghut ri.

Lazaruq Lé Lhoq Dui Toq É Hkyô

38 Yesuq gi, Yhâng é myit má radàm dum gyai yhang hkâm zo wui é eq, lup má lé jé ri. Lup haú gi, luqhkýng dong nghut luí, luqgok rachâm eq chí tô akò.

39 Haú mù, Yhang gi, "Luqgok haú lé yu pyám keq." ga tai ri.

Haú hkûn, haú shi byuq su é yhângnhá Mahtaq gi, "Yhumsîng ê, yhang lé, haú má tô tô é myi nyi lháng nghut bê yanmai, ahkuí gi, bup nám berâ nghut lhê." ga tai ri.

40 Haú mù, Yesuq gi, "Nang, lumjîng é nghut le gi, haú Garai Gasâng é hpungwup shíngkang lé, wó myàng rá nghut lhê ngû, Ngò, nang lé tai kyô wú bê a nghut lúhú?" ga tai ri.

41 Haú mù luí, yhangmoq gi, luqgok haú lé yu pyám akò. Hau htâng, Yesuq gi, mauhkûng shut tu wú luí, "Áwa é, Nang, Ngá é dang lé gyo byi é yanmai, Ngò, Nang lé jeju hkya-ôn lhê.

42 Nang gi, hkâ-nhâm le, Ngá é dang lé gyo byi nyi é lé, Ngò sê lhê; nghut kôlhang, Nang, Ngo lé nhang kat é hkyô lé, shi má yap tô é bang lumjîng kó sháng gaq ngû, yhangmoq é matú, Ngò, isu ngû tai é nghut lhê." ga tai ri.

43 Yhang gi, haú su ga tai luí, "Lazaruq é, htoq lô aq." ga htê mó eq wut kat ri.

44 Haú hkûn, haú shi byuq bê sù gi, yhâng é loq hkyi pé má pân eq htup yup to gû eq, yhâng é myoqdong má hpajet eq htup to gû htoq lo ri.

Haú mù, Yesuq gi, yhangmoq lé, "Yhang lé hpyi pyám byi mù, nhang kat keq." ga tai ri.

Yesuq Lé Sat Pyám Râ Haq Dâ É Hkyô
Mht 26:1-5; Mrk 14:1-2; Luk 22:1-2

45 Haú mù luí, Mariq chyáng lé kûn é Yudaq byu pé myo myo gi, Yesuq kut é hkyô lé myàng jáng, Yesuq lé lumjîng bùm bekò nghut ri.

46 Nghut kôlhang, yhangmoq chyáng má é ra-am gi, haú Hparishe pé chyáng lô mù, Yesuq kut é hkyô lé, lô tai kyô akò.

47 Haú mù, haú hkyangjong agyi pé eq Hparishe pé gi, Yudaq byin tú wapdoq‡ zuphpong lé ji tsing to mù, "Byù shi yuq gi, limik kumlhá myo myo kut shít nyi ri. Nga-nhung, hkâsu kut le gè rá lúhú?

48 Nga-nhung, Yhang lé haú su ru kut nyi nhang é nghut jáng, yuq hkangmó gi, Yhang lé lumjîng kó rá nghut lhê; haú hkûn, Romaq byu pé gi, jé lé mù, nga-nhung é jowò eq nga-nhung é byuhú lé, lé lhoq htên pyám kó rá nghut lhê." ga tai akò nghut ri.

49 Haú hkûn, yhangmoq chyáng má é, haú zân má hkyangjong mó nghut nyi é sù, Kayahpaq gi, yhangmoq lé, "Nungmoq gi, haí lháng a sé kó nghut ri-nhung!

50 Haú byuhú gôn htên byoq byuq rá htoq má, byuhú hau é matú, byù rayuq shi hkâm byi le gi, nungmoq é matú je gè rá hkyô lé, nungmoq, a myit jé kó nghut ri." ga tai kat ri.

51 Yhang haú su ga tai é gi, yhumsîng myit đông a nghut e za, haú zân má, yhang gi,

† 11:27 Hkrisduq lé Mesaia le gá lhê.

‡ 11:47 Yudaq byin tú wapdoq lé Grik đông gi, San-hedrin gá lhê.

hkyangjong mó nghut é eq rajung za, haú Yudaq byuhú é matú, Yesuq shí hkám byi rá nghut é hkyô lé le,

⁵² byuhú hau é matú baú a nghut e za, haú byo myín tô é, Garai Gasâng é yhangzô pé lé, shuí tsíng yù mù, Radíng ralhúm za dut nhâng rá matú, shí hkám byi rá nghut é hkyô lé le, myiqhtoi dang taí é ru nghut lhé.

⁵³ Haú nyí mai, yhangmoq gi, Yesuq lé sat rá matú chòm da bekò nghut ri.

⁵⁴ Hau é yanmai, Yesuq gi, Yudaq byu pé gyoro má, de de a sô shít wún e za, haú mai htoq luí, haú yoso eq chyâng lhúm é mau má é, Ehprim gâ é wà má é mù, Yhâng é chángzô pé eq rahá nyi nyi ri.

⁵⁵ Haú Yudaq byu pé é Lhoqlhai Poí jé rá za nghut é hkún, byù myo myo gi, Lhoqlhai Poí a jé shí má, lhoq san lhoq yúng hking dông yhumsing gùng lé lhoq sân-yúng yù rá matú, yosó wà pé mai, Yerusalem wà mó shut doq ló bum akò.

⁵⁶ Haú mù, yhangmoq gi, Yesuq lé ho nyi kô é nghut luí, haú noqkuq yhúm wàng má yap to uchyang, rayuq eq rayuq, "Nungmoq, hkâsu wó myit akò lhú? Yhang gi, Poí má a lé lô rá gâ lhé là?" ga myí lhúm bum akò.

⁵⁷ Nghut kôlháng, haú hkyangjong agyi pé eq Hparishe pé gi, Yesuq lé wó chyup yù rá matú, Yesuq hkámá nyi é lé, sê é sù ó yuq nghut kôle, yhangmoq lé lo shít kyó rá lhé ga dangmó hkyô tô akò nghut ri.

12

Yesuq, Namngón-xú But Byi Huí É Hkyô Mht 26:6-13; Mrk 14:3-9

¹ Haú Lhoqlhai Poí jé rá hkyuq nyí rá ashí hkún, Yesuq gi, Yhâng eq shi é mai lhoq dui toq yu é sù, Lazaruq nyi é Behtani wà má ló jé ri.

² Haú má, Yesuq lé hkunggâ é dông myin-zang byi tsô akò; Mahta q gi, zoshuq jaú ri; Lazaruq gi, haú Yesuq eq rahá siboí má zó zung nyi bang má é rayuq nghut ri.

³ Haú hkún, Mariq gi, haú nardu amyit mai za saí yu é, gyai hpaú é namngón-xú raxe í rúng kô yu lé mù, Yesuq é hkyí má hut gyun byi luí, yhâng é uxam eq sùt byí ri. Haú mù, yhúm haú gi, namngón-xú shôm byíng to bê nghut ri.

⁴ Nghut kôlháng, Yesuq lé ap pyám rá nghut é, Yhâng é chángzo rayuq nghut sù, Yudaq Iskarut gi,

⁵ "Haú myùng bang lé byí pyám rá matú, haú namngón-xú lé denari sum sho eq haí mù a ùng pyám é lhú?" ga taí ri.

⁶ Yhang haú su ga taí é gi, myùng bang lé chiq byí é yanmai taí é a nghut, yhang gi, ngùn htúng chùng sù nghut luí, haú má kat

tô é ngùn lé, yhumsing é matú lhaq yu chùng chùng kut é, hkau sù nghut é yanmai taí é nghut ri.

⁷ Yesuq gi, "Nghut shang gaq; yhang gi, Ngo lé myhup yhum rá buinyi é matú, namngón-xú shí lé hkong to byí é nghut lhé.

⁸ Haú myùng bang gi, nungmoq eq rahá hká-nhám le nyi rá nghut lhé; nghut kôlháng, Ngò gi, nungmoq eq rahá ayang nyi nyi rá sù a nghut." ga tù taí ri.

⁹ Haú u lé, Yudaq byu pé ajùm ayò gi, haú má Yesuq nyi é lé sé kôluí, lé lo akò; haú bang gi, Yesuq é yanmai za lé kô é a nghut, haú Yhâng eq shí bê mai lhoq dui toq yu é Lazaruq lé, lé myâng nau kô é yanmai le nghut ri.

¹⁰ Haú mù, haú hkyangjong agyi pé gi, Lazaruq lé le, sat pyám rá matú chòm hpyé lhúm akò.

¹¹ Hkâsu mù gâ le, yhâng é yanmai, haú Yudaq byu pé myo myo gi, Yesuq chyáng lhing ló kômù, Yhang lé lumjìng bùm kô é yanmai nghut ri.

Yesuq, Yerusalem Wà Mó Má Wang E Ló É Hkyô

Mht 21:1-11; Mrk 11:1-11; Luk 19:28-40

¹² Hau htang nyí, haú Poí má lé jé é byù moq mó gi, Yerusalem wà mó shut Yesuq jé doq ló é hkyô lé, wó gyò bum akò.

¹³ Haú mù, yhangmoq gi, byùm-haq pé yu chùng mù, Yhang lé é tē uchyang, "Hosana!"*

Haú Yhumsing é myìng mai jé lé lô Sù gi, hkungsó wó nyí sháng gaq ó! Haú Israelaq byu pé é Hkohlkâm gi, hkungsó wó nyí sháng gaq!"[†] ga, taí garú bum akò nghut ri.

¹⁴ Haú hkún, Yesuq gi, logúng zo radu lé myàng luí, doq jì ri;

¹⁵ haú gi, "Zi-un byizo[†] é, hkágyuq; wú keq, nungmoq é hkohlkâm gi, logúng zo má jì mù lé lo nyi ri."[‡]

ga, kâ tô é eq rajung za nghut ri.

¹⁶ Haú pé banhoq lé, Yhâng é chángzô pé gi, sâng-hi lé a sê gyo kò; nghut kôlháng, Yesuq gi, hpungwup shíngkang dan hu huí é htàng má za sheq, haú pé gi, Yhang eq séng luí kâ tô é hkyô lé le, haú eq rajung za, Yhang lé, yhangmoq mai kut bê hkyô lé le, bùn sé kat akò nghut ri.

¹⁷ Haú Yesuq gi, lup hkaú má é Lazaruq lé wut luí, shi é mai lhoq dui toq yu é hkún, Yhang eq rahá nghut é shiwa hpúng gi, haú hkyô lé, saksé hkám byí nyi akò.

¹⁸ Haú mù, byù myo myo gi, Yesuq tùn shít é limik kumlhá hau é hkyô lé, wó gyo kô é yanmai, Yhang lé hui rá matú htoq e akò.

* **12:13** Hebre dang má, *hosana* gâ é gi, "ahkuí hkyi yù aq" gâ é nghut lhé. Nghut kôlháng, bun zo shí má gi, hkyá-on dang dông chung é nghut lhé. † **12:13** Hkya-on 118:25-26 ‡ **12:15** Hebre myìng dông *Zi-un byizo* gâ é gi, Yerusalem má é byu pé lé gâ é nghut lhé. ✧ **12:15** Zhk 9:9

¹⁹ Hau é yanmai, haù Hparishe pé gi, "Wú keq, nga-nhung, hkâsu yang a ge kut lo nhung! Haù mingkan gón gi, Yhang htàng châng bùm bekô." ga, rayuq eq rayuq taí lhum bum akô nghut ri.

Yesuq, Yhang Shi Râ Hkyô Lé Te Tai É Hkyô

²⁰ Haù hkûn, noqkuq râ matú Poi má doq ló é bang má, Grik pé ra-am le bo tô akô.

²¹ Yhangmoq gi, Galile mau, Bet-saida wà mó mã é Hpilip chyáng lé jé kômù, "Áhkaú ê, ngamoq gi, Yesuq lé myàng nau ri." ga, dung tôngbán akô.

²² Haù mù, Hpilip gi, Andre lé, ê taí kyô ri; Andre eq yháng nhik gi, Yesuq lé, ê taí kyô akô.

²³ Haù mù, Yesuq gi, "Haù Byu Yhangzo gi, hpungwup shingkang dan hù é hui râ matú, ahkying jé bê nghut ri.

²⁴ Ngò, nungmoq lé teng za taí kôlé, sungso racham gi, myigùng má gyó luí, shi byuq e za a nghut jáng, acham roq za dut nyi râ nghut lhê. Nghut kôlhang, shi byuq é nghut le gi, ashi myo myo lhoq htoq râ nghut lhê.

²⁵ Haù yhumsing é asak lé chyitdap é sù gi, asak sùm byuq râ nghut lhê. Mingkan shí má, haù yhumsing é asak lé a jú é sù kùm gi, ahtum abyuq é asak matú, yhumsing é asak lé wó sing to râ nghut lhê.

²⁶ Ngo lé dojaú é sù ó yuq nghut kôle, Ngá htàng cháng râ lhê; Ngò, hkâmá nyi le, Ngá é dui-nhâng zoshâng le nyi râ nghut lhê. Ngá Wa gi, haù Ngo lé dojaú é sù lé, shigyaú râ nghut lhê.

²⁷ Ahkuí, Ngò, myit wuihke nyi ri; Ngò hkâsu nghú taí râ lhi? 'Áwa ê, ahkying shí mai Ngo lé lhoq lhut yù laq.' nghú taí râ lú? Nghut kôle, Ngò gi, ahkying shi é matú za sheq jé lé é ru nghut lhê.

²⁸ Áwa ê, Náng é mying lé hpungwup shingkang dan hu nhâng aq hkoil!" ga taí ri.

Haù hkûn, "Ngò gi, Ngá é mying lé hpungwup shingkang dan hu nhâng bê nghut luí, dum dan hu nhâng shirâ nghut lhê." gâ é htê, mauhkung mai htoq lo ri.

²⁹ Haù má nyi tô é byù moq mó gi, haù lé wó gyo kôjáng, "Maugum gum ri." gâ bum akô; ra-am gi, "Yhang lé, maumang lagyo rayuq nyo ri." ga taí bum akô nghut ri.

³⁰ Haù hkûn, Yesuq gi, "Danghtê shí gi, Ngá é matú a nghut, nungmoq é matú ru nghut lhê.

³¹ Ahkuí gi, mingkan shí lé jéyáng râ ahkying nghut bê; mingkan shi é zau gi, ahkuí hkat htoq pyâm é hui râ nghut lhê.

³² Nghut kôlhang, Ngò gi, myigùng mai tu shap kat é hui é hkûn, byù lhunglhang bang lé, Ngá chyáng shê yù râ nghut lhê." ga taí ri.

³³ Yhang haù su ga taí é gi, Yhang hkâsu kut shí râ nghut é hkyô lé shit é nghut ri.

³⁴ Haù hkûn, haù byù moq mó gi, "Haù tarâ laiká mã, Hkrisduq gi, ahtum abyuq dui nyi râ nghut lhê gâ é lé sheq, ngamoq wó gyô wú é ru nghut le nhing, 'Haù Byu Yhangzo gi, tu shap é hui ra râ nghut lhê.' nghú, Náng hkâsu kut wó taí lhê lú? Haù Byu Yhangzo gi, ó yuq nghut lhê lú?" ga, myí akô.

³⁵ Haù mù, Yesuq gi, yhangmoq lé, "Nungmoq chyáng, haù maubó joq nyi râ ahkying gi, a lúm myáng lo nghut ri. Mauchut gi, nungmoq chyáng a hkyit jé sháng gaq, nungmoq chyáng, haù maubó joq nyi ashí hkûn sô nyi keq; hkâsu mù gâ le, haù mauchut má sô nyi é sù gi, yhang hká shut e ló nyi é lé, a sé nghut ri.

³⁶ Nungmoq gi, maubó é yangzô pé wó dut kó sháng gaq, haù maubó joq nyi ashí hkûn, haù lé lumjing keq." ga taí ri. Yesuq gi, dang haù ban tai jáng, yhangmoq chyáng mai htoq ló luí, haq byuq bê nghut ri.

Yudaq Byu Pé, A Lumjing Ru Dut Nyi Kô É Hkyô

³⁷ Yesuq gi, yhangmoq é hí mã, limik kumlhá haù pé banshoq kut shit kôlhang, yhangmoq gi, Yhang lé a lumjing shi kô nghut ri.

³⁸ Haù gi, "Yhumsing ê, nga-nhung é danglù lé, ó yuq wá lumjing byi wú é lú? Haù Yhumsing é loq* gi, ó yuq lé htoq shit wú é lú?"*

ga, myiqhtoi Esai-aq taí tô é dang lo dik é nghut ri.

³⁹ Yhangmoq a wó lumjing kô é hkyô gi, Esai-aq taí é dang má,

⁴⁰ "Yhang gi, yhangmoq é myoqjí lé lhoq chit byi luí, yhangmoq é i-myt lé lhoq htan to byi bê nghut ri;

haù mù, yhangmoq gi, myoqjí eq a wó myàng, i-myt eq a wó sê gyo, Ngò, yhangmoq lé yâ ge byi râ matú, a wó lling tau lò kó dut râ nghut lhê."*

ga le bo tô é yanmai nghut lhê.

⁴¹ Esai-aq gi, Yesuq é hpungwup shingkang lé myang é yanmai, Yhang eq sêng é hkyô lé, haù su ga taí é nghut ri.

⁴² Nghut kôlhang, haù uphâng bang myo myo lhang gi, haù u má, Yesuq lé lumjing bum akô. Nghut kôle, yhangmoq gi, Hparishe pé eq tarajong mai lhoq htoq pyâm é hui râ lé, gyuq kô é yanmai, yhangmoq lumjing bê hkyô lé a yin yu bùm kô nghut ri.

⁴³ Hkâsu mù gâ le, yhangmoq gi, Garai Gasâng chyáng mã é aróng lé, ô nau é htoq má, byu pé chyáng mã é aróng lé, je ô nau kô é yanmai nghut ri.

⁴⁴ Haù mù, Yesuq, hte mó èq taí é gi, "Ngo lé lumjng é sù gi, Ngo lé baù lumjng é a nghut; haù Ngo lé nhang kat é Sù lé le, lumjng é nghut lhê.

⁴⁵ Ngo lé myang é sù gi, haù Ngo lé nhang kat é Sù lé le myang é nghut lhê.

⁴⁶ Ngò gi, Ngo lé lumjng é sù ó yuq le, mauchut hkaù má a nyi sháng gaq nghù, maubò dông mingkan má lé jé é nghut lhê.

⁴⁷ Ngò gi, Ngá é dang lé wó gyo lu, a châng é sù ó yuq lé le, jéyang rà a nghut; hkâsu mù gà le, Ngò gi, mingkan lé jéyang rà matú jé lé é a nghut; haù mingkan lé hkyi yù rà matú sheq, jé lé é ru nghut lhê.

⁴⁸ Ngo lé he-ngik lui Ngá é dang lé a hap yu é sù lé, jéyang rà Sù rayuq nyi lhê; Ngò taí é danghkan haù gi, haù jihâm buinyi má, haù yuq lé mara byi rà nghut lhê.

⁴⁹ Hkâsu mù gà le, Ngò gi, Ngá é myit dông taí é a nghut; nghut kôhng, Ngò haí taí rà eq hkâsu nghù taí rà lé gi, haù Ngo lé nhang kat é sù Îwa mai, Ngo lé hkunmó hkyô to bé nghut lhê.

⁵⁰ Haù Yhâng é hkunmó gi, ahtum abyuq é asak nghut é lé, Ngò sê lhê. Haù mù lui, Ngò, haí taí kôlé, haù Îwa mai Ngo lé taí kyô é lé za, taí é nghut lhê." gà ri.

13

Chángzô Pé É Hkyi Chi Byi É Hkyô

¹ Haù Lhoqlhai Pói jé rà hí má za, Yesuq gi, Yhang, mingkan shí mai Yhâng Wâ chyáng htot ló rà ahkying jé bé hkyô lé, sê ri. Yhang gi, mingkan má nyi é, Yhâng é byu pé lé chyitdap nyi é nghut lui, jihâm jé shoq Yhâng é chyitdap myit lé shit rà nghut lhê.

² Myinzang zô nyi bùm kô é u lé, nat Tsadán gi, Simun é yhangzo Yudaq Iskarut chyáng, Yesuq lé ap pyám rà myit kat byi to gù nghut ri.

³ Yesuq gi, haù lhunglhang lé Îwa mai Yhâng é loq má ap byi to bé nghut é lé le, Yhang gi, Garai Gasâng chyáng mai lé é sù nghut lui, Garai Gasâng chyáng dum taù ló rà sù nghut é lé le, sê ri.

⁴ Haù mù, Yhang gi, zohpoq mai toq lui, Yhâng é bumó lé hkyut pyám mù, hpyidum má hpajet ralhùm èq hpyihit hit tó ri.

⁵ Hau htâng, Yhang gi, jirung má uchyam hut kat mù, Yhâng é chángzô pé é hkyi chi byi lui, haù Yhâng é hpyidum má hit tó é hpajet èq sut huí byi ri.

⁶ Yhang gi, Simun Petruq chyáng jé jáng, Simun Petruq gi, "Yhumsing è, Nang gi, ngá hkyi lé chi byi rà nghut lhê thú?" ga myi ri.

⁷ Haù hkùn, Yesuq gi, "Ngò, haí kut nyi é hkyô lé, ahkuí, nang sê gyo rà a nghut; nghut kôhng, htâng má sê gyo rà nghut lhê." ga tú taí ri.

⁸ Petruq gi, "Ngá hkyi lé, Nang, hká-nhám le wó chi byi rà a nghut." ga taí jáng, Yesuq gi, "Nang lé, Ngò a chi byi é nghut jáng, nang gi, Ngò eq séng rà a nghut." ga tú taí ri.

⁹ Haù hkùn, Simun Petruq gi, "Yhumsing è, haù su nghut jáng gi, ngá é hkyi lé baù za a nghut, ngá é loq eq ulhum lé le chi byi laq!" ga tú taí ri.

¹⁰ Yesuq gi, "Gùng chi bé sù gi, hkyi za chi jáng, ragùndù é sanséng bé nghut ri. Nungmoq gi, sanséng bekô; nghut kôhng, yuq hkangmó gi, sanséng é a nghut." ga tú taí ri.

¹¹ Hkâsu mù gà le, Yhang gi, Yhang lé ap pyám rà sù ó yuq nghut é lé, sê é yan-mai, "Nungmoq gi, sanséng é bang chyat a nghut." ga taí é nghut ri.

¹² Yesuq gi, yhangmoq é hkyi lé ban chi byi jáng, Yhâng é bumó lé wut mù, Yhâng é jowò má ló dum zùng lui, yhangmoq lé myi é gi, "Nungmoq gi, ahkuí, ngò kut byi é hkyô lé, sê gyo akò thú?"

¹³ Nungmoq, Ngo lé, 'Sarà' ga le, 'Yhumsing' ga le, wut kô é gi, a shut; hkâsu mù gà le, Ngò gi, haù yuq yhang nghut lhê.

¹⁴ Ngò, nungmoq é Sarà eq Yhumsing nghut sù lhang, nungmoq é hkyi lé chi byi é nghut le gi, nungmoq le, rayuq eq rayuq é hkyi lé chi byi lhum rà dut lhê.

¹⁵ Nungmoq gi, Ngò, nungmoq lé kut byi é su kut kô sháng gaq nghù, Ngò, nungmoq lé alik kut shit tó é nghut lhê.

¹⁶ Ngò, nungmoq lé teng za taí kôlé, dui-nhâng zoshâng gi, yhumsing htoq je kô é a nghut; lagyo gi, nhang kat é sù htoq je kô é a nghut.

¹⁷ Ahkuí, nungmoq gi, haù pé lé sé bekô nghut lui, châng kut kô é nghut jáng, hkungsò wó kó rà nghut lhê.

Yesuq Lé Ap Pyám Rà Lé, Te Tai É Hkyô

¹⁸ Ngò gi, nungmoq banshoq bang lé lhoq ang lui taí é a nghut; Ngò hkyin yu é bang lé gi, Ngò sê lhê. Nghut kôhng, 'Haù ngá é muk lé bo zô é sù gi, ngo lé, yhâng é hkyihtáng la-nhik èq nang htng rà nghut lhê.'¹⁸ gà é Chyúmdang lé, lhoq dik rà matú ru nghut lhê.

¹⁹ Haù a dut htoq shimá, Ngò, nungmoq lé taí kyô nyi é gi, haù dut é hkùn, Ngò gi, haù Yuq* nghut é lé, nungmoq wó lumjng kó rà matú nghut lhê.

²⁰ Ngò, nungmoq lé teng za taí kôlé, Ngò nhang kat é sù lé, lhom hap yu é sù ó yuq nghut kôle, Ngo lé hap yu é nghut bé; Ngo lé hap yu é sù ó yuq nghut kôle, haù Ngo lé nhang kat é Sù lé hap yu é nghut bé." gà ri.

²¹ Yesuq gi, haù su ga taí é htâng má, myit wuihke nyi mù, saksé hkám é gi, "Ngò, nungmoq lé teng za taí kôlé, nungmoq má é

* 13:18 Hkya-on 41:9

* 13:19 Haù Yuq gà é gi, Hkrisduq lé gà é nghut lhê.

rayuq sù gi, Ngo lé ap pyám rà nghut lhê." gâ ri.

²² Haù mù, Yhâng é chángzô pé gi, ó yuq lé tai záng nyi é hkyô lé, rago a sé kô é yanmai, rayuq eq rayuq wú tsuq lhùm bum akô nghut ri.

²³ Haù Yesuq chyitdap é chángzo rayuq gi, Yesuq é tanghkoí nâm má leq nge zung tô ri.

²⁴ Haù mù, Simun Petruq gi, chángzo haù yuq lé, loq lik kat mù, "Yhang, ó yuq lé lhoq ang lui, tai nyi é hkyô lé, myi wú aq." ga tai ri.

²⁵ Haù mù, chángzo haù gi, Yesuq é tanghkoí má sai leq nge zung mù, "Yhumsing ê, haù gi, ó yuq nghut lhê lhu?" ga, Yhang lé myi ri.

²⁶ Yesuq gi, "Ngò, muk jap zo shí lé jum yù mù, byí é sù gi, haù yuq nghut lhê." ga tú tai lui, muk jap zo haù lé jum yù mù, Simun é yhangzo Yudaq Iskarut lé byí ri.

²⁷ Yudaq gi, muk haù lé yù zo kat é eq, Tsadán gi, yhâng chyáng wàng bê nghut ri.

Haù mù, Yesuq gi, "Nàng kut rà é hkyô lé, hàn kut aq hkoí." ga yhang lé tai kat ri.

²⁸ Nghut kôlhang, yhang lé, Yesuq haù su ga hai mù tai é hkyô lé, zohpoq haù má nyi tô é bang gi, rayuq lhang a sê gyo kô nghut ri.

²⁹ Haù Yudaq gi, ngùn zum sù nghut é yanmai, ra-am gi, haù Poi má rà é hkyô lé, é wú rà matú, Yesuq tai ri ga lui le, myùng bang lé rajung jung byí nhang ri ga lui le, myit yu bum akô nghut ri.

³⁰ Yudaq gi, muk haù lé lhom yù eq, htoq lô byuq bê nghut ri. Haù u gi, mauchut bê nghut ri.

Petruq He-ngik Pyám Rà Lé, Yesuq Te Tai É Hkyô

Mht 26:31-35; Mrk 14:27-31; Luk 22:31-34

³¹ Haù yuq htoq lô byuq jáng, Yesuq tai é gi, "Ahkuí, haù Byu Yhangzo gi, hpungwup shingkang dan hù é nghut lui, Garai Gasang gi, haù Byu Yhangzô é yanmai, hpungwup shingkang dan hu bê nghut ri.

³² Garai Gasang gi, haù Byu Yhangzô é yanmai, hpungwup shingkang dan hù é nghut jáng, Yhang le, Yhang má haù Zo lé hpungwup shingkang dan hu nhâng rà nghut lhê; radá dâm dan hu nhâng rà nghut lhê.

³³ Ngá zo pé ê, Ngò, nungmoq eq rahá nyi rà gi, razup za ru nghut alô. Nungmoq gi, Ngo lé hô kô rà nghut lhê; nghut kôlhang, "Ngò lô é jang má, nungmoq wó jé kô rà a nghut." nghú, haù Yudaq byu pé lé, Ngò tai é eq rajung za, ahkuí, nungmoq lé le, Ngò tai lhê.

³⁴ Ngò, nungmoq lé, hkunmó asik byi to kô lé, nungmoq yhangchang chyitdap lhum

keq. Ngò, nungmoq lé chyitdap é su, nungmoq yhangchang chyitdap lhum rà dut lhê.

³⁵ Nungmoq yhangchang chyitdap lhum kô é nghut jáng, nungmoq gi, Ngá é chángzô pé nghut é hkyô lé, byù lhunglhang bang sé kô rà nghut lhê." gâ ri.

³⁶ Haù hkùn, Simun Petruq gi, "Yhumsing ê, Nàng, hká shut lô rà lhu?" ga, Yhang lé myi jáng, Yhang gi, "Ngò lô é jang má, nungmoq, ahkuí a wó châng kô rà nghut lhê. Nghut kôlhang, htâng má gi, nungmoq cháng ra kô rà nghut lhê." ga tú tai ri.

³⁷ Petruq gi, "Yhumsing ê, hai mù lui, ahkuí ngò Nàng htâng a wó châng é lhu? Ngò gi, Nàng é matú, shí hkám rà ri ri nghut lhê." ga tai ri.

³⁸ Haù mù, Yesuq tai é gi, "Nàng gi, gè gè yhang, Ngá é matú shí hkám rà lhu? Ngò, nàng lé teng za tai lé, woq a tûn shimá, nàng, Ngo lé sum dâm he-ngik pyám rà nghut lhê.

14

Yesuq, Yhâng É Chángzô Pé Lé Nhkik Tng É Hkyô

¹ Nungmoq é i-myt nhiklhum lé, myit wui myit hkê hkácut nhâng kô. Garai Gasang lé lùm keq; Ngo lé le lùm keq.

² Ngá Wá é yhùm má, nyi jowò myo myo joq lhê; a joq é ru nghut le gi, noq mai, Ngò, nungmoq lé tai kyo rà nghut lhê. Ngò, haù má lô é gi, nungmoq é nyi jowò lô hên llang rà matú ru nghut lhê.

³ Ngò gi, lô mù, nungmoq é matú nyi jowò lô hen é nghut jáng, Ngò nyi é jang má nungmoq le wó nyi shoq, Ngò eq rahá nyi rà matú, Ngò dum tau lé mù, nungmoq lé, lé shuí yù rà nghut lhê.

⁴ Ngò lô é jang má jé é hkyô lé, nungmoq sé lhê." gâ ri.

Yesuq Za Hkyô

⁵ Haù hkùn, Htomaq gi, Yhang lé, "Yhumsing ê, Nàng hká shut lô é lé lhang, ngamoq a sê le nhing, hkyô haù lé, ngamoq hkásu kut wó sé rà lhu?" ga myi ri.

⁶ Yesuq gi, "Ngò gi, hkyô nghut lhê; haù tengmán hkyô eq asak le nghut lhê. Ngò mai za a nghut jáng, ó yuq le, Íwâ chyáng wó jé é a nghut.

⁷ Nungmoq, gè gè yhang, Ngo lé sé kô é nghut le gi, Ngá Wa lé le, nungmoq sé kô rà nghut lhê. Ahkuí mai, nungmoq gi, Yhang lé sé kô é htoq agó, myàng le myang wú bekô nghut lhê." ga tú tai ri.

⁸ Haù hkùn, Hpilip gi, "Yhumsing ê, ngamoq lé, haù Íwa tûn shit laq, haù hkùn, ngamoq nhik shí rà nghut lhê." ga tai ri.

⁹ Yesuq tú tai é gi, "Hpilip ê, Ngò, nungmoq eq shí myáng lhang nyi lô bê le nhing, nàng, Ngo lé a sé lhu? Ngo lé myang é sù gi, haù Íwa lé myàng bê nghut ri; haù nghut le nhing,

'Nungmoq lé, haú Íwa tûn shit laq.' nghû, nàng hkâsu wó tai lhê lhú?

¹⁰ Ngò gi, haú Íwa má nghut nyí luí, haú Íwa gi, Ngò má nghut nyi é hkyô lé, nàng a lumjîng lhú? Ngò, nungmoq lé tai é dang haú pé gi, Ngá é myit mai tai é a nghut; haú Ngò má lúng nyi é Íwa sheq, Yhâng é mú zuí nyi é ru nghut lhê.

¹¹ Ngò gi, haú Íwa má nghut nyí luí, haú Íwa gi, Ngò má nghut nyi lhê nghû é lé lumjîng keq; haú a nghut jáng, kut shit é limik kumlhá pé dông za lháng, lumjîng keq.

¹² Ngò, nungmoq lé teng za tai kôlé, Ngò lé lumjîng é sù gi, Ngò kut é muzó lé kut rá nghut lhê. Ngò gi, haú Íwá chyáng ló rá nghut é yanmai, haú yuq gi, hau htoq je kó é muzó pé lé lháng kut rá nghut lhê.

¹³ Haú Yhangzô é yanmai, Íwá é hpungwup shîngkang wó hû ló shoq, Ngá é myîng lé lang luí, nungmoq haí jung dung kôlháng, Ngò gyo byi rá nghut lhê.

¹⁴ Nungmoq gi, Ngá é myîng lé lang luí, haí dung kôlháng, Ngò gyo byi rá nghut lhê.

Chyoyiúng Woi-nyí Byi Rá Danggidíq

¹⁵ Nungmoq gi, Ngo lé chyitdap kó é nghut jáng, Ngò hkyô tô é hkunmó pé lé, cháng kó rá nghut lhê.

¹⁶ Haú Íwa gi, nungmoq eq ahtum abyuq nyi nyi rá nghut é, hpaqchyí byi Sù gotú rayuq, nungmoq lé byi rá matú, Ngò gi, haú Íwa lé dung rá nghut lhê.

¹⁷ Haú yuq gi, tengmán é Woi-nyí nghut lhê. Haú mingkan gi, Woi-nyí haú lé a myàng a sê é yanmai, Yhang lé a wó hap yu é nghut lhê. Nghut kôlháng, Yhang gi, nungmoq eq rahá nyi nyi é nghut luí, nungmoq má nyi to rá Sù nghut é yanmai, nungmoq gi, Yhang lé sê akó.

¹⁸ Ngò gi, nungmoq lé, chuzô pé dông pyám to rá a nghut; nungmoq chyáng Ngò dum jé lé rá nghut lhê.

¹⁹ Adé myàng má, haú mingkan gi, Ngo lé a myàng lo rá nghut lhê; nghut kôlháng, nungmoq gi, Ngo lé myàng kó rá nghut lhê. Hkâsu mù gá le, Ngò gi, asak dui nyi é nghut mù, nungmoq le dùi kó rá nghut lhê.

²⁰ Ngò gi, Ngá Wá chyáng nghut nyi é lé le, nungmoq gi, Ngò má nghut nyi é lé le, Ngò gi, nungmoq má nghut nyi é lé le, haú buinyi má, nungmoq sé kó rá nghut lhê.

²¹ Ngá é hkunmó pé lé wó mù, châng kut é sù ó yuq nghut kôlé, Ngo lé chyitdap é sù nghut ri. Ngo lé chyitdap é sù lé gi, Ngá Wa chyitdap rá nghut lhê; Ngò le, haú yuq lé chyitdap luí, Ngá gûng lé yhang, yhang lé shit rá nghut lhê." gá ri.

²² Hau htâng, (Yudaq Iskarut a nghut sù) Yudaq gi, "Yhumsîng ê, Nàng gi, haú mingkan lé Náng gûng a shit e za, ngamoq

lé shit rá nghut é gi, haí mù nghut lhê lhú?" ga myí ri.

²³ Haú hkûn, Yesuq tû tai gi, "Rayuq yuq, Ngo lé chyitdap é nghut le gi, Ngá dang lé gyo rá nghut lhê. Ngá Wa le, haú yuq lé chyitdap rá nghut luí, Ngá hpe gi, haú yuq chyáng lé mù, yhang eq rahá nyi rá nghut lhê.

²⁴ Ngo lé a chyitdap é sù gi, Ngá dang lé gyo rá a nghut. Nàng wó gyo é dang shí pé gi, Ngá myit mai tai é a nghut; dang haú pé gi, Ngo lé nhang kat é Sù, haú Íwá é ru nghut lhê.

²⁵ Ngò gi, shí pé banshoq lé, nungmoq eq rahá nyi tô ashí u lé tai bê nghut lhê.

²⁶ Nghut kôlháng, Ngá é myîng dông, haú Íwa nhang kat rá nghut é, hpaqchyí byi Sù nghû é, haú Chyoyiúng Woi-nyí gi, nungmoq lé, jung hkangmó mhoq byi rá eq, Ngò, nungmoq lé tai kyo bê hkyô lhunglháng, nungmoq lé lhoq pun rá nghut lhê.

²⁷ Ngò gi, nungmoq chyáng, nguóngón hkyô tô to byi bê; Ngá é nguóngón hkyô, Ngò, nungmoq lé byi é nghut lhê. Ngò gi, mingkan byi é dông, nungmoq lé byi é a nghut. Nungmoq é i-myit nhikhum lé, myit wui myit hke é eq gyuq kyûm é hkâdut nhâng kó.

²⁸ 'Ngò gi, ló byuq luí, nungmoq chyáng dum tau lé rá nghut lhê.' nghû, Ngò tai é lé, nungmoq wó gyo yù bê nghut lhê. Nungmoq, Ngo lé chyitdap kó é nghut le gi, haú Íwá chyáng Ngò ló rá nghut é hkyô lé, nungmoq gabú kó rá nghut lhê; hkâsu mù gá le, haú Íwa gi, Ngá htoq je ko Sù nghut lhê.

²⁹ Haú dut é hkûn, nungmoq lumjîng kó sháng gaq nghû, ahkuí, haú a dut shimá, Ngò, nungmoq lé tai kyô é nghut lhê.

³⁰ Ahkuí mai, Ngò gi, nungmoq lé, dang myo myo wó nyô rá a nghut lo; hkâsu mù gá le, mingkan shí é zau gi, jé lé lo nyi bê nghut ri. Haú yuq gi, Ngo lé up rá ahkáng haí a wó é sù nghut ri.

³¹ Nghut kôlháng, haú Íwa lé Ngò chyitdap é hkyô, mingkan sé sháng gaq nghû, Ngò gi, Ngá Wa hkyô tô é hkunmó eq roq za kut nyi lhê.

Toq keq, e ló sháng hkoi.

15

Tsibiyiq Nuí Eq Akoq Pé É Hkyô

¹ Ngò gi, haú tsibiyiq nuí akyîng nghut lhê; Ngá Wa gi, tsibiyiq hkyâm yhumsîng nghut lhê.

² Yhang gi, ashí a zuí é akoq hkangmó lé, Ngá chyáng mai kyik pyám luí, ashí zuí é akoq hkangmó lé kûm gi, ashí je myo zui sháng gaq ga, shang pyám byi ri.

³ Nungmoq gi, Ngò, nungmoq lé tai é mungdang hau é yanmai, sanséng gû nghut bekó nghut ri.

⁴ Ngò má nyi nyi keq; Ngò le, nungmoq má nyi nyi rá nghut lhê. Akoq hkangmó gi, tsibiyiq nú má nui nyi é za a nghut jáng, yhang baú ashí wó zúí é a nghut. Haú eq rajung za, nungmoq le, Ngò má nyi nyi e za a nghut jáng, ashí wó zúí kó rá a nghut.

⁵ Ngò gi, tsibiyiq nú nghut lhê; nungmoq gi, akoq pé nghut akò. Byù rayuq yuq, Ngò má nyi nyi é nghut luí, Ngò gi, yhang má nyi nyi é nghut jáng, haú yuq gi, ashí myo myo zui rá nghut lhê; hkásu mù gá le, Ngò mai gang jáng, nungmoq gi, haí le a wó kut kò é nghut lhê.

⁶ Ngò má a nyi nyi é sù gi, haú dú pyâm é hui luí, kyuuq shi byuq é akoq eq wui ri; haú sù é akoq pé gi, byu pé eq guq yù mù, myihkyóm má dú kat pyâm é hui luí, nyé gyó byuq rá nghut lhê.

⁷ Nungmoq gi, Ngò má nyi nyi luí, Ngá é dang pé gi, nungmoq má bo nyi é nghut le gi, nungmoq ô nau é haí nghut kólhang, dung keq; haú hkún, nungmoq lé byi rá nghut lhê.

⁸ Nungmoq gi, haú ashí ga-myhò zúí é dông, Ngá Wá é hpungwup shingang lé lhoq htoq shit é nghut luí, Ngá é chángzò pé nghut é hkyô lé tûn shit nyí beko nghut ri.

⁹ Haú Íwa gi, Ngo lé chyitdap é su, Ngò gi, nungmoq lé chyitdap é nghut lhê. Ahkuí, Ngá é chyitdap myit má gíng nyi keq.

¹⁰ Ngò gi, Ngá Wá é hkunmó lé châng é nghut luí, Yhâng é chyitdap myit má gíng nyi é su, Ngá é hkunmó lé, nungmoq châng nyi kò é nghut jáng, nungmoq gi, Ngá é chyitdap myit má gíng nyi kó rá nghut lhê.

¹¹ Nungmoq má Ngá é gabú hkyô joq nyi rá eq, nungmoq é gabú hkyô wó bying jup rá matú, Ngò, nungmoq lé, dang shí pé tai é nghut lhê.

¹² Ngò, nungmoq lé chyitdap é su, nungmoq yhangchang chyitdap lhum keq; haú gi, Ngá é hkunmó nghut lhê.

¹³ Haú yhumsing é luzúm wui é matú, yhumsing é asak ap byí pyâm é chyitdap myit htoq kò é, chyitdap myit gi, ó yuq chyáng le a bò nghut ri.

¹⁴ Ngò hkyô tô é hkunmó pé lé, nungmoq châng kut é nghut jáng, nungmoq gi, Ngá é luzúm wui nghut beko.

¹⁵ Ngò gi, Ngá Wá chyáng mai Ngò wó gyó yu é hkyô lhunglhang, nungmoq lé sé nhâng bê nghut é yanmai, nungmoq lé, dui-nhâng zoshâng wui nghú, a wut lô e za, luzúm wui nghú wut é nghut lhê; hkásu mù gá le, dui-nhâng zoshâng gi, yhâng yhumsing hpò é muzó lé a châng sé nghut ri.

¹⁶ Nungmoq, Ngo lé hkyin yu é a nghut, Ngò sheq, nungmoq lé, htoq e ló mù, gíng nyi é ashí zui rá matú hkyin masat tô é ru nghut lhê. Hau hkún sheq, Ngá é mying lé

lang mù, haú Íwa chyáng nungmoq haí jung dung kòle, Yhang byi rá nghut lhê.

¹⁷ Nungmoq yhangchang chyitdap lhum keq; haú gi, Ngá é hkunmó nghut lhê.

Haú Míngkan Gi, Chángzò Pé Lé A Jú É Hkyô

¹⁸ Haú míngkan, nungmoq lé a jú é nghut jáng, Ngo lé hí a jú kut bê nghut é lé, sé nyi keq.

¹⁹ Nungmoq gi, haú míngkan eq sêng é bang nghut é nghut jáng, haú míngkan gi, yhang eq sêng é bang nungmoq lé chyitdap rá nghut lhê. Nghut kólhang, nungmoq lé gi, Ngò, haú míngkan mai hkyin htoq yú bê nghut luí, nungmoq gi, haú míngkan eq a sêng lo kò é yanmai, míngkan gi, nungmoq lé a jú é nghut ri.

²⁰ 'Dui-nhâng zoshâng gi, yhâng é yhumsing htoq je kò é a nghut.' nghú, Ngò, nungmoq lé tai é dang pé lé bûn nyi keq. Ngo lé lhang, yhangmoq zing-ri yù beko nghut le gi, nungmoq lé le, zing-ri kó rá nghut lhê. Ngò mhoqshit é hkyô lé, yhangmoq châng kò é nghut le gi, nungmoq mhoqshit é lé le, châng kó rá nghut lhê.

²¹ Nghut kólhang, yhangmoq gi, Ngá é mying é yanmai, nungmoq lé haú su kut kó rá nghut lhê; hkásu mù gá le, haú Ngo lé nhang kat é Sù lé, yhangmoq a sé kòluí nghut ri.

²² Yhangmoq lé, Ngò a lé nyo wú é nghut le gi, yhangmoq mara bò kó rá a nghut; nghut kólhang, ahkuí gi, yhangmoq mara wó tai hkyut rá a nghut lo.

²³ Ngo lé a jú é sù gi, Ngá Wa lé le a jú é sù nghut ri.

²⁴ Haú ó yuq lhang a wó kut é muzó lé, Ngò, yhangmoq chyáng a kut é nghut le gi, yhangmoq mara bò kó rá a nghut; ahkuí kúm gi, laklai kumlhá haú pé lé yhangmoq myang nyi kólhang, Ngò eq Ngá Wa lé a jú kò é nghut ri.

²⁵ Haú gi, 'Yhangmoq gi, jumgúyô má Ngo lé a jú kut akò nghut ri.'[☉] ga, yhangmoq é tarà má kà tô é dang lé lhoq dik é nghut ri.

²⁶ Haú Íwa chyáng mã é, Ngò nhang kat rá nghut é, Íwa mai htoq lé lo é tengmán é Woi-nyí nghut é, haú hpaqchyí byi Sù jé lé é hkún, Ngá é hkyô lé saksé hkám byi rá nghut lhê.

²⁷ Nungmoq le, Ngò eq rahá sâng-hi mai nyi beko nghut é yanmai, saksé hkám byi ra kó rá nghut lhê.

16

¹ Nungmoq gi, myit lingbat jowò a joq kó sháng gaq nghú, haú pé banshoq lé, Ngò, nungmoq lé tai kyo bê nghut lhê.

² Yhangmoq gi, nungmoq lé, tarajong mai hkat htoq pyâm kó rá nghut lhê; ó yuq nghut kòle, yhang mai nungmoq lé sat pyâm é

hkùn, yhang gi, haù dông mai Garai Gasang lé dojaú nyi lhê ga myit yu é ahkyíng, gè gè yhang, jé rà nghut lhê.

³ Yhangmoq gi, haù Íwa lé le, Ngo lé le, a sé kô é yanmai, haù su kut kó rà nghut lhê.

⁴ Nghut kôlháng, nungmoq lé, Ngò sidiq byi é hkyô lé, ahkyíng jé jáng nungmoq bún nyi kó sháng gaq nghû, Ngò haù hkyô tái kyô é nghut lhê. Ngò gi, nungmoq eq rahá nghut nyi é yanmai, haù hkyô lé, hí hkùn nungmoq lé a tái kyô é nghut lhê.

Chyoiyúng Woi-nyí é muzô

⁵ Nghut kôlháng, ahkuí, Ngò gi, Ngo lé nhang kat Su chyáng ló rà nghut lhê. Nghut kôlháng, nungmoq ó yuq le, 'Nàng, hká shut ló rà lú?' ga, Ngo lé a myi kó nghut ri.

⁶ Ngò, nungmoq lé, haù hkyô pé tái kyô é yanmai, nungmoq é i-myit unghkaú má iyon hkyô byíng to bekô nghut ri.

⁷ Nghut kôlháng, Ngò, nungmoq lé teng za tái kôlé, Ngò ló byuq é gi, nungmoq é matú je gè rà hkyô ru nghut lhê. Ngò ló byuq e za a nghut jáng, haù hpaqchyí byi Sú gi, nungmoq chyáng lé rà a nghut; Ngò ló jáng sheq, Yhang lé, Ngò, nungmoq chyáng nhang kat byi rà nghut lhê.

⁸ Yhang jé lé é hkùn, Yhang gi, haù mara wó é eq séng luí le, dingmán hkyô eq séng luí le, tará jéyáng hkyô eq séng luí le, haù mingkan lé tún shit rà nghut lhê.

⁹ Haù yubak mara wó é eq séng luí ga jang, byu pé gi, Ngo lé a lumjing kó é yanmai nghut ri.

¹⁰ Haù dingmán hkyô eq séng luí ga jang, Ngò gi, haù Íwa chyáng ló rà nghut luí, nungmoq, Ngo lé a myàng lo kó rà nghut é yanmai nghut ri.

¹¹ Haù tará jéyáng hkyô eq séng luí ga jang, mingkan shi é zau gi, mara byi é hui é nghut é yanmai nghut ri.

¹² Ngò gi, nungmoq lé tái rà hkyô myo myo wó ashí; nghut kôlháng, ahkuí, nungmoq wó hkâm kó rà a nghut.

¹³ Nghut kôlháng, haù tengmán é Woi-nyí jé lé é hkùn, Yhang gi, tengmán hkyô lhungláng lé shuí sé rà nghut lhê. Yhang gi, Yhang myit dông tái rà a nghut; Yhang, wó gyô yu é hkyô lé za tái luí, dut lò rà hkyô pé lé le, nungmoq chyáng tái pyô rà nghut lhê.

¹⁴ Yhang gi, Ngò wó é lé, yù mù, nungmoq lé tái kyô é eq sé nhang é dông, Ngá é hpung-wup shingkang lé hủ lò nhâng rà nghut lhê.

¹⁵ Haù Íwa wó é lhungláng gi, Ngá é chyat nghut lhê. Hau é yanmai, haù Woi-nyí gi, Ngò wó é lé yù mù, nungmoq lé sé nhâng rà nghut lhê nghû, Ngò tái é nghut lhê.

¹⁶ Adé myáng má, nungmoq gi, Ngo lé a myàng lo kó rà nghut lhê; hau htàng, dum adé myáng má, nungmoq gi, Ngo lé myàng kó rà nghut lhê." gá ri.

Changzô Pé Ê Iyon Hkyô Gi, Gabú Hkyô Tàú Dut Râ

¹⁷ Yhâng é changzô pé ra-am gi, "'Adé myáng má, nungmoq gi, Ngo lé a myàng lo kó rà nghut lhê; hau htàng, dum adé myáng má, nungmoq gi, Ngo lé myàng kó rà nghut lhê.' gá é eq 'Ngò gi, Íwa chyáng ló rà nghut é yanmai nghut lhê.' ga, Yhang tái é gi, hái jung gá nau é nghut lhê lú?" ga, rayuq eq rayuq myí lhum bum akô.

¹⁸ Hau htoq agó, yhangmoq gi, "'Adé myáng má, gá é gi, Yhang hái jung gá nau lhê lú? Nga-nhùng gi, Yhang hái tái nau é lé a sê gyô." ga, tái lhum bum akô nghut ri.

¹⁹ Yesuq gi, yhangmoq myi nau kô é hkyô lé sê ri; haù mù, Yhang, yhangmoq lé tái é gi, "'Adé myáng má, nungmoq gi, Ngo lé a myàng lo kó rà nghut lhê; hau htàng, dum adé myáng má, nungmoq gi, Ngo lé myàng kó rà nghut lhê.' nghû, Ngò tái é lé, hái jung gá nau lhê laq nghû, rayuq eq rayuq myi lhum nyi akô lú?"

²⁰ Ngò, nungmoq lé teng za tái kôlé, haù mingkan gi, gabú nyi é u lé, nungmoq gi, ngau é eq iyon yón é hui kó rà nghut lhê. Nungmoq gi, iyon yón é hui kó rà nghut lhê; nghut kôlháng, nungmoq é iyon hkyô gi, gabú hkyô taú dut rà nghut lhê.

²¹ Myiwe gi, zoshâng hkù rà nghut jáng, zohkú-nò nò rà ahkyíng jé bê nghut é yanmai, myit chiq nyi ri; nghut kôlháng, zoshâng lé wó hku htoq kat é hkùn gi, mingkan htoq má zoshâng rayuq wó hku to bê nghut luí, yhang gabú é yanmai, haù no hpu é hkyô lé a bun byuq lo nghut ri.

²² Haù eq rajung za, ahkuí gi, nungmoq iyon yón é ahkyíng nghut ri; nghut kôlháng, Ngò, nungmoq lé dum hui é hkùn, nungmoq gi, gabú kó rà nghut lhê; nungmoq é gabú hkyô haù lé, nungmoq chyáng mai ó yuq eq le wó yu pyám byi rà a nghut.

²³ Haù buinyi má, nungmoq gi, Ngo lé, hái le a dung lo kó rà nghut lhê. Ngò, nungmoq lé teng za tái kôlé, nungmoq gi, Ngá myíng lang luí, Ngá Wá chyáng hái dung kôlé, Yhang byi rà nghut lhê.

²⁴ Ahkuí jé shoq, nungmoq gi, Ngá myíng lé lang luí, hái le a dúng wú shi kó nghut ri. Dung keq, haù hkùn, nungmoq myang hap yù kó rà nghut luí, nungmoq é gabú hkyô gi, byíng jup lò rà nghut lhê.

²⁵ Ngò gi, nungmoq lé, dangtú dông haù pé tái kyo bê nghut lhê; nghut kôlháng, Ngò gi, dangtú a chùng ló e za, haù Íwa eq séng é hkyô, nungmoq lé san za tái kyô é ahkyíng jé rà nghut lhê.

²⁶ Haù buinyi má, nungmoq gi, Ngá é myíng lé lang luí dung kó rà nghut lhê. Ngò gi, nungmoq é matú, haù Íwa chyáng dung byi rà nghut tái nyi é a nghut.

²⁷ Hkâsu mù gà le, nungmoq gi, Ngo lé chyitdap kô é eq, Ngò gi, Íwa Garai Gasâng chyáng mai jé lé é Sù nghut é lé, nungmoq lumjǐng kô é yanmai, haũ Íwa yhang, nungmoq lé chyitdap é nghut lhê.

²⁸ Ngò gi, haũ Íwa chyáng mai htoq lé mù, mingkan má lé jé wang é nghut lhê; ahkuí, Ngò gi, mingkan mai htoq mù, haũ Íwa chyáng dum taũ ló rà nghut lhê." gà ri.

²⁹ Haũ hkún, Yesuq é chángzò pé gi, "Ahkuí, Nàng gi, dangtú a chùng é dǒng, san za tai kyô nyi é nghut bê!

³⁰ Nàng gi, lhunglhang lé sê é sù nghut é lé le, Nàng lé, ó yuq eq le dangmyi myi nó a rà é hkyô lé le, ahkuí, ngamoq wó sé bê. Hau é yanmai, Nàng gi, Garai Gasâng chyáng mai lé é sù nghut é lé, ngamoq lumjǐng lhê." ga tai bum akô.

³¹ Haũ hkún, Yesuq tú tai é gi, "Nungmoq, ahkuí lumjǐng bekô lhu?

³² Nghut kǒlhang, nungmoq gi, lhoq pyo pyâm é hui luí, Ngo lé baũ za tô pyâm to kǒmù, ó le ô yhùm shut ló byuq rà ahkyǐng jé lo nyi bê nghut ri; ahkuí lhang jé to bê. Nghut kǒlhang, Ngò gi, Ngò baũ za a nghut; hkâsu mù gà le, Ngá Wa gi, Ngò eq rahá nghut nyi lhê.

³³ Nungmoq gi, Ngò má nguingón hkyô wó kó sháng gaq nghũ, Ngò gi, haũ hkyô pé lé tai kyô é nghut lhê. Nungmoq gi, mingkan shí má, wuĩhke hkyô hui kó rà nghut lhê; nghut kǒlhang, myit wum lhoq kǐng keq. Ngò gi, mingkan lé ung pyâm bê nghut lhê." gà ri.

17

Yesuq Kyûdung É Hkyô

¹ Yesuq gi, haũ su ga tai é htàng má, mauhkung shut tu wũ luí, kyûdung é gi, "Áwa é, ahkyǐng jé bê nghut ri; haũ Nung Zo gi, Nang lé hpungwup shǐngkang wó hu nhâng sháng gaq, Nung Zo lé hpungwup shǐngkang hũ ló nhâng laq ô!

² Hkâsu mù gà le, Nàng mai Yhang lé ap byi tô é bang banshoq lé, Yhang, ahtum abyuq é asak wó byi sháng gaq ga, Nàng gi, byũ lhunglhang bang lé up rà ahkáng, Yhang lé byi tô é yanmai nghut ri.

³ Nàng za tengmán é Garai Gasang nghut é eq Nàng nhang kat é sù Yesuq Hkrisduq lé, sé é gi, ahtum abyuq é asak nghut lhê.

⁴ Ngò gi, Nàng, Ngo lé wũn waq nhang é muzó lé lhoq pán é dǒng, myidàm htoq má, Náng é hpungwup shǐngkang lé lhoq htoq shit bê nghut lhê.

⁵ Áwa é, haũ mingkan lhang a joq shí mai, Ngò, Nàng eq rahá chǒm wó é hpungwup shǐngkang eq, ahkuí, Náng é myoq hũ má, Ngo lé hpungwup shǐngkang dan hu nhâng laq.

Chángzò pé matú, Yesuq kyûdung byi é hkyô

⁶ Mingkan mai, Nàng, Ngo lé hkyin htoq yũ byi é bang lé, Ngò gi, Náng é myǐng lhoq htoq shit bê nghut lhê. Yhangmoq gi, Náng é byu pé nghut bekô; Nàng gi, yhangmoq lé, Ngá é loq má ap byi bê nghut luí, yhangmoq gi, Náng é dang lé châng kut bekô nghut ri.

⁷ Nàng, Ngo lé byi é lhunglhang gi, Náng chyáng mã é nghut é lé, ahkuí, yhangmoq sé bekô nghut ri.

⁸ Hkâsu mù gà le, Nàng, Ngo lé byi kat é mungdang pé lé, Ngò, yhangmoq lé byi bê nghut luí, yhangmoq gi, haũ pé lé hap yũ bekô nghut ri; Ngò gi, Náng chyáng mai lé é sù nghut é lé le, yhangmoq hkyak sé akô; Nàng, Ngo lé nhang kat é hkyô lé le, yhangmoq lumjǐng bekô nghut ri.

⁹ Ngò gi, yhangmoq é matú kyûdung byi lhê. Ngò gi, haũ mingkan byu pé é matú dung byi nyi é a nghut; Nàng, Ngo lé ap byi tô é bang é matú sheq dung byi nyi é ru nghut lhê; hkâsu mù gà le, yhangmoq gi, Náng é byu pé nghut akô.

¹⁰ Ngò wó é lhunglhang gi, Náng é chyat nghut mù, Nàng wó é lhunglhang le, Ngá é chyat nghut lhê. Haũ mù, Ngò gi, yhangmoq má hpungwup shǐngkang hũ é hui bê nghut lhê.

¹¹ Ngò gi, Nàng chyáng lò rà nghut lhê mù, mingkan htoq má nyi nyi rà a nghut lo; nghut kǒlhang, yhangmoq gi, mingkan htoq má nyi nyi shirá nghut lhê; chyoiyúng é Áwa ê! Ngá hpe gi, ragùng za nghut é su, yhangmoq le ragùng za wó dut nyi kó sháng gaq, Nàng, Ngo lé byi é, haũ Nang myǐng é a-tsam eq yhangmoq lé upzúng nyi aq.

¹² Ngò gi, yhangmoq eq rahá nghut nyi é u lé, yhangmoq lé upzúng bê nghut luí, Nàng, Ngo lé byi é myǐng hau eq, yhangmoq lé rago zúng bê nghut lhê. Haũ Chyũmdang lhoq ðik sháng gaq ga, haũ bang mã é htên byoq hui rà sù mai lai luí, ó yuq le a byuq byuq é nghut lhê.

¹³ Ngò gi, ahkuí, Náng chyáng lò rà nghut bê; nghut kǒlhang, Ngá é gabú hkyô gi, yhangmoq chyáng byǐng jup sháng gaq nghũ, Ngò gi, haũ pé lé mingkan má tai é nghut lhê.

¹⁴ Ngò gi, yhangmoq lé, Náng é mungdang byi bê nghut lhê; haũ mingkan gi, yhangmoq lé a jú nghut ri; hkâsu mù gà le, Ngò gi, mingkan mã é a nghut é su, yhangmoq le, mingkan mã é a nghut kó é yanmai nghut ri.

¹⁵ Ngò kyûdung é gi, Nàng, yhangmoq lé mingkan mai shuí htoq yũ rà matú ðung é a nghut, haũ agè ashop su chyáng mai, yhangmoq lé upzúng yũ rà matú sheq ðung é ru nghut lhê.

16 Ngò gi, mingkan mà é a nghut é su, yhangmoq le, mingkan mà é a nghut kó.

17 Yhangmoq lé, haù tengmán hkyò eq lhoq sân-yúng yù laq; Náng é mungdang gi, tengmán hkyò nghut ri.

18 Nàng, Ngo lé, mingkan mà nhang hâng kat é su, Ngò le, yhangmoq lé, mingkan mà nhang hâng kat é nghut lhê.

19 Yhangmoq lé, tengmán hkyò má wó lhoq sân-yúng yù kó sháng gaq nghú, Ngò gi, yhangmoq é matú, yhumsing gùng lé lhoq sân-yúng yu é nghut lhê.

Lumjǐng Bang Lhunglǐhàng É Matú, Yesuq Kyúdung Byí É Hkyò

20 Ngò gi, yhangmoq é matú baù za kyúdung byí é a nghut; Yhangmoq é danglu é yanmai, Ngo lé lumjǐng kó rà bâng é matú le, Ngò kyúdung byí é nghut lhê.

21 Haù mù, yhangmoq banshoq bang gi, rading ralhũm za dut nyi kó sháng gaq. Haù mingkan gi, Nàng, Ngo lé nhang kat é hkyò lé wó lumjǐng sháng gaq; Áwa, Nàng gi, Ngò má nyi nyi mù, Ngò gi, Nàng má nyi nyi é su, yhangmoq le, ngá hpe má nyi nyi kó sháng gaq.

22 Ngá hpe gi, ragùng za nghut é su, yhangmoq le, rading ralhũm za dut nyi kó sháng gaq nghú, Ngò gi, Nàng, Ngo lé byí é hpungwup shǐngkang lé, yhangmoq lé byí bê nghut lhê.

23 Nàng, Ngo lé nhang kat bê hkyò eq Nàng, Ngo lé chyitdap é su, yhangmoq lé chyitdap é hkyò lé, haù mingkan wó sé rà matú, yhangmoq gi, gumjup shoq rading ralhũm za wó dut kó sháng gaq nghú, Ngò gi, yhangmoq má nyi nyi lui, Nàng gi, Ngò má nyi nyi é nghut lhê.

24 Áwa é, haù mingkan lǐhàng a joq shi mai, Nàng, Ngo lé chyitdap lui byi tó é hpungwup shǐngkang haù lé, Nàng, Ngo lé byi tó é bang, wó myàng kó rà matú le, Ngò nyi é jang má, Ngò eq rahá wó nyi kó rà matú le, Ngò ô nau ri.

25 Dingmán é Áwa é, haù mingkan gi, Nang lé a sé kólhang, Ngò gi, Nang lé sê lhê; Nàng, Ngo lé nhang kat é hkyò lé gi, yhangmoq sé akò nghut ri.

26 Nàng, Ngo lé chyitdap é chyitdap myit gi, yhangmoq má wó joq nyi rà matú le, Ngò gi, yhangmoq má wó nyi nyi rà matú le, yhangmoq lé, Ngò, Nang é hkyò sé nhâng bê nghut lui, xoq mù sé nhang nyi shirâ nghut lhê." gâ ri.

18

Yesuq Chyup Yù Huí É Hkyò
Mht 26:47-56; Mrk 14:43-50; Luk 22:47-

53

1 Yesuq gi, haù su ga kyúdung é htàng má, Yhâng é chángzò pé eq rahá, Kedron wuìhkung mai laí byit dap ló lui, haù hpoq má joq é hkyâm ralhũm má wang e akò nghut ri.

2 Hkyâm haù gi, Yesuq eq Yhâng é chángzò pé lhaq hui hui kut é jowò nghut é yanmai, haù Yesuq lé ap pyám rà sù Yudaq le sê ri.

3 Haù mù, Yudaq gi, haù hkyangjong agyi pé eq Hparishe pé chyáng ma nhang kat é noqkuq yhũm zúng bang ra-am eq gyezo rajùm lé, haù jowò shut shuí wang lé lo ri. Haù bang gi, myihu, myibung eq shâm lǐhàng pé chung lé lo akò.

4 Yesuq gi, Yhang má dut lò rà hkyò lhunglǐhàng lé sé gũ nghut mù, htoq é lui, yhangmoq lé, "Nungmoq, ó yuq lé ho akò lǐhàng?" ga myí ri.

5 Haù hkũn, yhangmoq gi, "Nazaret wà byù Yesuq lé ho lhê." ga tú tai kǒjáng, Yesuq gi, "Ngò gi, haù yuq nghut lhê." ga tai ri. (Yesuq lé ap pyám sù Yudaq le, yhangmoq eq rahá yap tó ri.)

6 "Ngò gi, haù yuq nghut lhê." ga Yesuq tai kat é hkũn jáng, yhangmoq gi, nungzut zut mù, myigùng má lèng leq ló bum akò nghut ri.

7 Yhang gi, "Nungmoq, ó yuq lé ho akò lǐhàng?" ga, yhangmoq lé dum myí kat jáng, yhangmoq gi, "Nazaret wà byù Yesuq lé ho lhê." ga tai akò.

8 Haù hkũn, Yesuq gi, "Ngò gi, haù yuq nghut lhê nghú, nungmoq lé tai kyo bê nghut lhê; nungmoq, Ngo lé hô kô é nghut le gi, shí bang lé ló nhang pyám keq." ga tú tai ri.

9 Haù gi, "Nàng, Ngo lé byi tó é bang rayuq le lǐhàng, Ngò, a lhoq hpyuq pyám." ga, Yhang tai tó é dang dik rà matú nghut ri.

10 Haù hkũn, Simun Petruq gi, shâm wun tó é nghut lui, shâm shê mù, haù hkyangjong mó é dui-nhâng zòshang é loqyo nohkyap lé zân hpyit kat byi ri. (Dui-nhâng zoshâng haù yuq é mying gi, Malhku gâ ri.)

11 Haù mù, Yesuq gi, Petruq lé, "Náng é shâm lé, shambyâng má xâng pyám aq! Haù Íwa, Ngo lé byi é góm* lé, Ngò a shuq é wó nyi rà lǐhàng?" ga tai kat ri.

Yesuq Lé, Anna Chyáng Shuí É Hkyò
Mht 26:57-58; Mrk 14:53-54; Luk 22:54

12 Hau htàng, gyezo haù jùm eq yhangmoq é gyezau hpó, Yudaq byu pé é mingsuwún wuì gi, Yesuq lé chyup yù mù, tuí akò nghut ri.

13 Yhangmoq gi, haù zân má é hkyangjong mó Kayahpaq é yhâng-tsa Anna chyáng hí, Yhang lé shuí ló akò nghut ri.

* 18:11 Góm lé shuq gâ é gi, jamjau hui rà eq shí hkám rà lé, tai nau é nghut lhê.

¹⁴ Kayahpaq gi, byu pê é matú rayuq shí hkám byí le je gè rá nghut lhê ga, haú Yudaq byu pé lé hpaqchyí byí é sú yuq nghut ri.

Yesuq Lé, Petruq Sâng-hi Dam He-ngik Pyâm É Hkyô

Mht 26:69-70; Mrk 14:66-68; Luk 22:55-57

¹⁵ Simun Petruq eq gotú chángzo rayuq gi, Yesuq htâng châng e ló akò nghut ri. Gotú chángzo haú yuq gi, hkyangjong mó lé rago sê lhê nghut mù lui, hkyangjong mó é yhumwàng hkaú shut, Yesuq é htâng má châng wang ló ri.

¹⁶ Petruq kúm gi, hkúmdong shinggan má láng yap tô ri. Haú hkyangjong mó lé rago sê é sú, gotú chángzo haú yuq gi, taú htoq ló mù, hkum zúng é myiwe myhí lé tai lui, Petruq lé shuí hâng yu ri.

¹⁷ Haú hkún, haú hkum zúng é myiwe myhí gi, Petruq lé, "Nàng gi, haú yuq é chángzô pé má é rayuq a nghut lú?" ga myi jáng, yhang gi, "Ngò a nghut." ga tũ tai ri.

¹⁸ Haú u lé, gyoq é yanmai, dui-nhâng zoshâng wui eq noqkuq yhum zúng bang gi, yhangmoq gyoq gâng rá matú myigyé eq mut tô é myihkyóm má, gyoq gang yap nyi bum akò. Petruq le, yhangmoq eq rahá gyoq gang yap tô ri.

Yesuq Lé, Hkyangjong Mó Myi Choq Wú É Hkyô

Mht 26:59-66; Mrk 14:55-64; Luk 22:66-71

¹⁹ Haú u lé, haú hkyangjong mó gi, Yesuq lé, Yhâng é chángzô pê hkyô eq Yhâng mhoqshít é hkyô eq sêng lui myí ri.

²⁰ Haú hkún, Yesuq gi, "Haú mingkan htoq má, Ngò, de de tai bê nghut lhê. Ngò gi, haú Yudaq byu pé banshoq bang chôm zing é, tarajong pé má le, noqkuq yhum má le, ayang mhoqshít é nghut lhê. Ngò gi, haq zaú lui tai é hkyô hai le a joq.

²¹ Nàng, hai mù Ngo lé myi lhê lú? Haú, Ngò tai é lé wó gyó é bang lé myi aq; Ngò hai tai é hkyô lé, yhangmoq gè gè sê akò nghut ri." ga tũ tai ri.

²² Yesuq haú su ga tai jáng, haú nàm má nyi tô é noqkuq yhum zúng sú rayuq gi, Yhang lé pyuq kat lui, "Hkyangjong mó lé wá, Nàng, haú su nghú dang tũ lhê lú?" ga tai ri.

²³ Haú hkún, Yesuq gi, "Ngò tai shut é nghut le gi, shut é hkyô lé saksé tũn shít aq. Nghut kôhang, Ngò gi, têng é đông ru tai le nhing, nàng, hai mù Ngo lé pyuq lhê lú?" ga tũ tai ri.

²⁴ Hau htâng, Anna gi, Yhang lé tuí to gũ, haú hkyangjong mó Kayahpaq chyáng dé kat nhang ri.

Yesuq Lé, Petruq Xoq He-ngik Pyâm É Hkyô

Mht 26:71-75; Mrk 14:69-72; Luk 22:58-62

²⁵ Haú Simun Petruq gyoq gang yap tô é hkún, "Nàng gi, Yhâng é chángzô pé má é rayuq a nghut lú?" ga, yhang lé myi kôjáng, yhang gi, "Ngò a nghut." ga, dum he pyâm ri.

²⁶ Haú Petruq eq nohkyap zân hpyit pyâm byí é hui su é buinùm nghut é sú, haú hkyangjong mó é dui-nhâng zoshâng rayuq gi, yhang lé, "Haú hkyâm má, nàng, Yhang eq rahá nghut nyi é lé, ngò a myang é su ngam lhê lú?" ga tai ri.

²⁷ Haú hkún, Petruq gi, xoq he pyâm ri; haú u yhang, woq tũn bê nghut ri.

Pilat É Myoq Hí Má, Yesuq Jé Nyi É Hkun Lhê Hkyô

Mht 27:1-2, 11-14; Mrk 15:1-5; Luk 23:1-5

²⁸ Hau htâng, yhangmoq gi, Yesuq lé, Kayahpaq chyáng mai, haú mauzau hpò é yhumwàng shut shuí e ló akò. Haú u gi, napsùn noq ashí nghut ri. Yhangmoq gi, agot a-ù a dut e za, htàngli đông Lhoqlhai Pôí lé wó zo rá matú, yhumhkaú má a wàng kó nghut ri.

²⁹ Haú mù lui, mauzau Pilat gi, yhangmoq chyáng htoq é mù, "Shí yuq lé, nungmoq hai mara hũn nau akò lú?" ga myí ri.

³⁰ Haú hkún, yhangmoq gi, "Shí yuq, a ge é muzó kut é a nghut le gi, Yhang lé, nàng é loq má ngamoq lé ap byi rá a nghut." ga tũ tai akò.

³¹ Pilat gi, "Yhang lé, nungmoq yhang shuí ló mù, nungmoq é tará đông ló jéyáng keq." ga tai jáng, haú Yudaq byu pé gi, "Nghut kôhang, ngamoq gi, ó yuq lé sat rá ahkáng le a wó é nghut lhê." ga tũ tai akò nghut ri.

³² Haú su dut é hkyô gi, Yesuq, Yhang hká đông shí rá ga tai é dang lé lhoq dik rá matú nghut lhê.

³³ Haú mù, Pilat gi, yhumhkaú má taú wang ló mù, Yesuq lé wut yù lui, "Nàng gi, Yudaq byu pé é hkohkâm nghut lhê lú?" ga myí ri.

³⁴ Haú hkún, Yesuq gi, "Haú gi, nàng é myit đông tai é nghut lhê lú? A nghut jáng, góbang mai, nang lé, Ngá é hkyô tai kyo lui nghut lhê lú?" ga taú myí ri.

³⁵ Pilat gi, "Ngò gi, Yudaq byu nghut lhê lú? Haú Nàng é byu myú eq Nàng é hkyangjong agyi pé sheq, Nang lé, ngá loq má ap byi é ru nghut lhê. Nàng gi, hai kut é nghut lhê lú?" ga dum myí ri.

³⁶ Haú hkún, Yesuq gi, "Ngá é mingdán gi, mingkan shí eq a sêng. Mingkan shí eq sêng é ru nghut le gi, haú Yudaq byu pé, Ngo lé a wó chyup yu lo shoq. Ngá é dui-nhâng zoshâng wui, Ngo lé chôm hung yù kó rá nghut lhê. Nghut kôhang, Ngá é mingdán gi,

mingkan shí eq a sêng é ru nghut lhê." ga tai ri.

³⁷ Haù mù, Pilat gi, "Haù jáng, Nàng gi, hkohkâm nghut bê lúhú?" ga myi jáng, Yesuq gi, "Ngo lé, hkohkâm nghut lhê ga, nàng tai nyi é jô ri. Gè gè ga jáng, Ngò gi, hau é yan-mai hku lé lo é sù nghut lhê; haù tengmán hkyô lé saksé hkâm rà matú, Ngò, mingkan htoq má jé lé é nghut lhê. Haù tengmán hkyô eq sêng é sù ó yuq le, Ngá é dang lé gyô ri." ga tù tai ri.

³⁸ Haù hkún, Pilat gi, "Tengmán hkyô gá é gi, hái jung lúhú?" ga myi ri. Yhang gi, haù su ga myi luí, haù Yudaq byu pé chyáng dum htoq é mù, "Shí yuq chyáng mara hùn rà hkyô, ngò a myàng nghut ri.

³⁹ Nghut kôlhang, haù Lhoqlhai Poí u lé, nungmoq é matú, ngò, htông byù rayuq nhang htoq kat byi byi kut é htông, nungmoq wó akò. Haù mù, 'Yudaq byu pé é hkohkâm' lé, nhang htoq kat byi rà lé, nungmoq ô nau akò lúhú?" ga myi ri.

⁴⁰ Haù hkún, yhangmoq gi, "Haù yuq lé a nghut! Barabaq lé sheq nhâng byi aq." ga, garú kat akò. Barabaq gi, damyaq nghut ri.

19

Yesuq Lé, Tapzîng Má Jén Sat Rà Matú Doqdân É Hkyô

Mht 27:15-31; Mrk 15:6-20; Luk 23:13-25

¹ Haù mù luí, Yesuq lé lãng she yù mù, nhuq bat rà matú, Pilat hkunmó hkyô ri.

² Haù gyezô pé gi, zujanmaù sai yù kôluí, Yesuq é ulhum má tsung byi kômù, Yhang lé, buhíng nè hut byí akò nghut ri.

³ Hau htông, yhangmoq gi, Yhâng chyáng dum huí é è kut luí, "Yudaq byu pé é hkohkâm é! Chyung híng xê híng nyi sháng gaq ô!" ga tai kômù, Yhâng é myoqdong má puyq byí akò nghut ri.

⁴ Pilat gi, haù Yudaq byu pé chyáng radám dum htoq é mù, "Wú keq, shí yuq chyáng mara hùn rà hkyô, ngò a myàng é lé nungmoq sé sháng nghú, Yhang lé, ngò nungmoq chyáng shuí htoq lé byí lhê." ga tai ri.

⁵ Yesuq gi, haù zumuq tsúng tô é eq bu nè híng wut tò mù htoq lé jáng, Pilat gi, yhangmoq lé, "Wú keq, Yhang, shí yuq nghut lhê." ga tai ri.

⁶ Haù hkyangjong agyi pé eq yhangmoq é noqkuq yhùm zúng bang gi, Yhang lé myang kat kôjáng, "Yhang lé tapzîng má jén sat pyám aq! Yhang lé tapzîng má jén sat pyám aq!" ga garú bum akò.

Nghut kôlhang, Pilat gi, "Nungmoq shuí yù mù, tapzîng má jén sat keq. Ngò gi, Yhâng chyáng mara hùn rà hkyô a myàng." ga tù tai ri.

⁷ Haù hkún, haù Yudaq byu pé gi, "Ngamoq chyáng tará rahkat joq lhê; tará haù dông ga jang, Yhang gi, shí gíng bè nghut ri;

hkâsu mù gá le, Yhang gi, Garai Gasâng é Yhangzo haù nghut lhê gá ri." ga xoq tai akò.

⁸ Pilat gi, dang haù lé wó gyo jáng, je gyô gyuq luí,

⁹ yhùmhaù shut dum wang ló mù, Yesuq lé, "Nàng, hkâmá é sù nghut lhê lúhú?" ga myi ri. Nghut kôlhang, Yesuq gi, dang rahkun lhang a tù tai byi nghut ri.

¹⁰ Haù hkún, Pilat gi, "Nàng, ngo lé a tù tai kut lhê lúhú? Ngò gi, Nàng lé, wó lhoq lhut kat é eq tapzîng má wó jén sat pyám é ahkáng wó sù nghut é lé, Nàng a sé lúhú?" ga myi ri.

¹¹ Yesuq gi, "Nàng lé, haù ahtoq mai ahkáng byi é za a nghut le gi, nàng, Ngo lé hái kut rà a-tsam le wó rà a nghut. Haù mù luí, Ngo lé, nàng é loq má ap byí é sù gi, mara je bo é nghut lhê." ga tù tai ri.

¹² Haù hkún mai, Pilat gi, Yesuq lé lhoq lhut kat byi nau nyi bê nghut ri. Nghut kôlhang, haù Yudaq byu pé gi, "Nàng, haù yuq lé nhang pyám é nghut jáng, nàng gi, hkoséng Kehtaq é luzúm a nghut lo; yhum-sing gúng lé, hkohkâm gá é sù gi, hkoséng Kehtaq eq shai lúm é sù nghut lhê." ga, ru jáng garú nyi bum akò nghut ri.

¹³ Haù lé wó gyo jáng, Pilat gi, Yesuq lé shuí htoq é mù, Hebre myíng dông Gabahta gá é Luggok hkâng myhang tò jang nghu é jowò má é tará jéyàng tanghkuq má zung tò ri.

¹⁴ Haù u gi, Lhoqlhai Poí é matú, Hên Lajáng é Buinyi nyí-káng raxe í hkyíng nghut ri.

Pilat gi, haù Yudaq byu pé lé, "Nungmoq é hkohkâm lé wú keq." ga tai ri.

¹⁵ Nghut kôlhang, yhangmoq gi, "Yhang lé yu pyám aq! Yhang lé yu pyám aq! Yhang lé tapzîng má jén sat pyám aq!" ga garú bum akò.

Haù hkún, Pilat gi, "Nungmoq é hkohkâm lé wá, ngò, tapzîng má jén sat pyám rà lúhú?" ga myi jáng, haù hkyangjong agyi pé gi, "Haù hkoséng Kehtaq mai lai luí, gotú hkohkâm ngamoq a wó." ga, tù tai akò nghut ri.

¹⁶ Hau htông má, Pilat gi, Yesuq lé tapzîng má jén sat pyám rà matú, yhangmoq é loq má ap byí kat bè nghut ri. Haù mù luí, yhangmoq gi, Yesuq lé shuí ló bekò nghut ri.

Tapzîng Má Jén Pyám É Hkyô

Mht 27:32-44; Mrk 15:21-32; Luk 23:26-43

¹⁷ Yesuq gi, yhum-sing é tapzîng lé waq mù, Hebre myíng dông Golgahta gá é, Ugyap joq é Jowò gá é jang má htoq jé e ri.

¹⁸ Yhangmoq gi, haù má, Yesuq lé tapzîng htoq má jén tap pyám akò; Yhang eq raha, gotú í yuq lé le, rahkyam shut rayuq kut jén tò kò é nghut luí, Yesuq gi, goro má nghut ri.

¹⁹ Pilat le, masat laiká ká yù luí, haù tapzìng htoq má tap tò ri. Haù má gi, "YU-DAQ BYU PÊ É HKOHKÂM, NAZARET WÀ BYÙ YESUQ" gâ tò ri.

²⁰ Yesuq lé jén tô é jowò gi, myuq eq chyâng lhum é htoq agò, haù masat laiká gi, Hebre dông le, Latin dông le, Grik dông le, kâ tô é yanmai, haù Yudaq byu pé myo myo gi, masat laiká haù lé nghap bum akò nghut ri.

²¹ Haù Yudaq byu pé é hkyangjong agyi pé gi, Pilat lé, "Yudaq byu pé é hkohkâm" nghù hkáká, 'Ngò gi, Yudaq byu pé é hkohkâm nghut lhê ga, Yhang tái ri.' nghù luí sheq ká aq." ga tái akò.

²² Haù hkùn, Pilat gi, "Ngò kâ é dông, ngò kâ to bê nghut lhê." ga tái ri.

²³ Haù gyezò pé gi, Yesuq lé tapzìng má jén tap pyám é htâng má, Yhâng é mebu pé lé yù mù, myí hkyam gàm luí, rayuq rahkyam yu akò; haù ahte bu lé le, gàm rá dâ akò; nghut kôlhâng, haù gi, hkyupshi a bo e za, awang mai ahpyo hpyot kut woq tô é nghut ri.

²⁴ Haù mù, yhangngi, "Bu shí lé gi, a lâng cheq e za, ó yuq myang yù ang rá laq, hkyin shosé she wú sháng." ga, rayuq eq rayuq tái lhum akò.

Haù gi,
"Yhangmoq, Ngá é mebu lé chòm gam yù kó rá; Ngá é ahtê bú é matú, hkyin shosé shê kó rá nghut lhê."^{*}

gâ é Chyúmdang lé lhoq dik rá matú dut é nghut lhê. Haù mù, gyezò pé gi, haù su kut bekò nghut ri.

²⁵ Haù Yesuq é tapzìng nàm má gi, Yhângnu, Yhângnú é yhanggu byizo eq, Klopa é yhangmyi Mariq eq Magadalaq wà má é Mariq pé, yap tò bum akò.

²⁶ Yesuq gi, Yhang nàm má, Yhang chyt-dap é chángzo eq Yhâng nu yap tò é lé myang kat jáng, Yhâng nu lé, "Ánu é * nung zo lé wú aq." ga tái mù,

²⁷ chángzo haù lé le, "Náng nu lé wú aq." ga tái ri. Haù hkùn mai, chángzo haù yuq gi, Yesuq é yhângnu lé, yhâng é yhùm shut shuí ló bê nghut ri.

Yesuq Soqkâng Byit É Hkyò

Mht 27:45-56; Mrk 15:33-41; Luk 23:44-

49

²⁸ Hau htâng, Yesuq gi, ahkuí, muzò bàn bê nghut é lé sé luí, haù Chyúmdang lhoq dik rá matú, "Ngò, wui shít ri." ga tái ri.

²⁹ Haù má, tsibiyiq wíng chyín rayambú joq tò ri; haù mù, yhangmoq gi, wuimaù lé tsibiyiq wíng chyín haù má jum yù luí, jàmyang ahpyo má tuí tap mù, Yhâng é nhutwuí jé shoq yhun byí akò nghut ri.

³⁰ Yesuq gi, tsibiyiq wíng chyín haù lé shuq yù mù, "Mú bàn bê." ga tái ri. Yhang, haù su

ga tái eq yhang, ulhum nghuq ló mù, kâng byit bê nghut ri.

³¹ Htang nyí gi, ahkyak é Bánno buinyi nghut luí, haù nyí gi, Hên Lajang Buinyi nghut ri. Haù mù, Yudaq byu pé gi, Bánno buinyi má, màng pé lé tapzìng htoq má a joq to nhâng nàu kò é yanmai, hkyí pé lé bat hkyuí pyám mù, màng pé lé yù hkyò pyám nhâng rá matú, Pilat chyáng dúng tóngbán akò.

³² Haù mù luí, gyezò pé gi, lé mù, Yesuq eq jén hui su nhik má é, rayuq é hkyí lé hí bat hkyuí pyám mù, rayuq é hkyí lé dum bat hkyuí pyám akò nghut ri.

³³ Nghut kôlhâng, yhangmoq gi, Yesuq chyáng jé é hkùn, Yhang shi to lánng bê nghut é lé myàng kômù, Yhâng é hkyí lé a bat hkyuí byi kó nghut ri.

³⁴ Nghut kôlhâng, gyezo rayuq gi, Yesuq é namcham má lham eq htaù kat byi jáng, radá dâm sui eq wui yui htoq lo ri.

³⁵ Haù lé myàng é sù gi, saksé hkám byí ri; yhâng saksé hkám é hkyò gi, tengmán ri. Haù yhang tái kyó é hkyò gi, têng é lé, yhang sé mù, nungmoq le wó lumjìng kó sháng gaq ga, saksé hkám byí é nghut ri.

³⁶ Haù hkyò pé dut é gi, "Yhâng é showui rahkat lháng a lhoq hkyuí rá nghut lhê."* gâ é Chyúmdang haù lhoq dik rá matú nghut lhê.

³⁷ Chyúmdang gotù ralhumm má le, "Yhangmoq eq htaù htông é sù lé, yhangmoq tu wú kó rá nghut lhê."* gâ é bo tô ashí nghut ri.

Yesuq Lé, Myhup Yhum É Hkyò

Mht 27:57-61; Mrk 15:42-47; Luk 23:50-

56

³⁸ Hau htâng, Yesuq é chángzo dut nyí é Aramahti myuq byú Yosep gi, haù Yudaq byu pé lé gyuq é yanmai, tsik za Pilat chyáng Yesuq é gungsôm lé, lé dúng ri. Pilat eq ahkáng byí kat jáng, yhang gi, gungsôm haù lé, lé yu ló bê nghut ri.

³⁹ Yhang gi, hí hkùn, myín lé, Yesuq lé é hui é sù, Nikodema eq rahá lé é nghut ri; Nikodema gi, mura eq achyò nyhò tô é namngón jung sum xê jói kó yu lé ri.

⁴⁰ Yhangnhik gi, Yesuq é gungsôm lé yù mù, Yudaq byu pé é màng yhum htàng eq rajung za, namngón jung eq rahá, pán yúng eq htup yap to byí akò.

⁴¹ Haù Yesuq lé tapzìng má jén sat pyám é jowò nàm má, hkyám ralhumm joq ri; ó yuq lé le a lheq wú shí é, lup sik ralhumm hkyám hkaù má joq tò ri.

⁴² Haù nyí gi, Yudaq byu pé é Hên Lajang Buinyi nghut é yanmai le, lup haù le chyáng é yanmai le, yhangnhik gi, Yesuq lé, haù má é lheq tò akò nghut ri.

* 19:24 Hkya-on 22:18 * 19:26 Ánu é, gâ é lé, Grik dông gi, "myiwe myhi é" ga bo tô é nghut lhê. * 19:36 Htoq Ló 12:46; Gyung So 9:12; Hkya-on 34:20 * 19:37 Zhk 12:10

20

*Lup Akôm**Mht 28:1-10; Mrk 16:1-8; Luk 24:1-12*

¹ Bánno buinyi htâng, napsûn noq le mau a bó shimá, Magadalaq wà mà é Mariq gi, haù lup má é jé le, lup hkum má é luqlong huì hpyuq to láng é lé myang ri.

² Haù mù, yhang gi, Simun Petruq eq Yesuq chyitdap é chángzo góyuq chyáng đin jé ló mù, "Haù Yhumsing lé, lup mai yu htoq ló byuq bekô; hkâmá é kat to kô é lé, ngamoq a sé." ga tai ri.

³ Haù mù, Petruq eq chángzo haù gi, lup shut e ló akô.

⁴ Yhangnhik í yuq é din akô; nghut kôlhang, chángzo haù gi, Petruq htoq má wó đin lui, lup má hí đin jé e ri.

⁵ Haù mù, yhang gi, ahkaù shut ngóm wú kat é hkûn, haù pân yung htui leq tô é lé myang ri; nghut kôlhang, yhang gi, a wang é nghut ri.

⁶ Hau htâng, Simun Petruq gi, châng jé lui, lup hkaù shut wang e ri; haù hkûn, yhang gi, haù má pân yung htui joq tô é lé le,

⁷ haù Yesuq é ulhum má htup é panchoq lé le, myang ri. Panchoq haù gi, pân yung htui eq rahá a nghut e za htui jup leq tô ri.

⁸ Haù lup má hí jé é chángzo le, ahkaù má wang é lui, myàng jáng, lumjing bè nghut ri.

⁹ (Yesuq gi, shi é mai dum dui toq lô rà nghut lhê ga bo tô é Chyúmdang lé, yhangnhik gi, a sé gyo shi kô nghut ri.)

¹⁰ Hau htâng, haù chángzô nhik gi, yhum taù ló bekô nghut ri.

Magadalaq Wà Mà É Mariq Lé, Yesuq Htoq Shit É Hkyô
Mrk 16:9-11

¹¹ Nghut kôlhang, Mariq gi, lup shinggan má ngau yap tô ri. Yhang gi, ngau uchyang lup hkaù má ngóm wú kat ri.

¹² Haù hkûn, yhang gi, Yesuq é gungsóm lheq tô é jang má, hpyu é mebu wut é mau-mang lagyo í yuq hkyi htâng shut rayuq, umhtung shut rayuq, zung to kô é lé, myang ri.

¹³ Yhangnhik gi, "Myiwe myhi é, nàng, haì mù ngau nyi lhê lú?" ga myi kôjáng, yhang gi, "Ngá é Yhumsing lé yù ló hpyuq kôlui, Yhang lé hkâmá ló lheq to kô é lé, ngò a sé é yanmai nghut lhê." ga tai ri.

¹⁴ Haù su ga lui, yhang, lhang wú kat é hkûn, Yesuq yap tô é lé myàng kôlhang, Yesuq nghut é lé yhang a wú sé nghut ri.

¹⁵ Yesuq gi, "Myiwe myhi é, nàng, haì mù ngau nyi lhê lú? Nàng gi, ó yuq lé ho wún lhê lú?" ga myi jáng, yhang gi, hkyâm sai zo sù su ngam pyám mù, "Sarà é, nàng, Yhang lé waq htot pyám é nghut le gi, hkâmá é lheq tô é, ngò lé tai kyo laq, ngò, Yhang lé yu ló rà." ga tai ri.

¹⁶ Haù hkûn, Yesuq gi, yhang lé, "Mariq é" ga wut kat ri.

Mariq gi, Yhâng shut lhang mù, Hebre mying đông, "Raboni!" ga wut kat ri. (Haù gi, "Sarà é" gà é lichyúm nghut ri.)

¹⁷ Yesuq gi, "Ngo lé hkázang shi; hkásu mù gà le, Ngò gi, haù Íwá chyáng a taù doq ló shi é nghut lhê. Nàng gi, Ngá é gumang wui chyáng ló mù, yhangmoq lé, 'Ngò gi, Ngá Wa eq nungmoq é Yhângwa, Ngá é Garai Gasang eq nungmoq é Garai Gasang nghut su chyáng doq ló zó nghut lhê.' gà ri nghù, ló tai kyo aq." ga, yhang lé tai kat ri.

¹⁸ Magadalaq wà mà é Mariq gi, chángzô pé chyáng ló mù, "Yhumsing lé, ngò myàng bè!" ga tai lui, yhang lé shit kat é pé lé, tai kyô ri.

Yesuq, Yhâng É Chángzô Pé Lé Htoq Shit É Hkyô

Mht 28:16-20; Mrk 16:14-18; Luk 24:36-49

¹⁹ Haù nyi, Bánno buinyi htang myin lé, haù chángzô pé gi, Yudaq byu pé lé gyuq kô é yanmai, hkum tsing myhi pyám mù, zing tô bum kô é u lé, Yesuq gi, lé jé mù, yhangmoq é agùng má yap to lui, "Nungmoq nguingón yuqyo nyi sháng gaq!" ga tai ri.

²⁰ Yhang gi, haù su ga tai é htâng má, yhangmoq lé, Yhâng é loq pé eq namcham lé tûn shit ri. Chángzô pé gi, haù Yhumsing lé myàng kôjáng, gyaì gabú bum bekô nghut ri.

²¹ Yesuq gi, "Nungmoq nguingón yuqyo nyi sháng gaq! Haù Íwa gi, Ngo lé nhang kat é su, Ngò gi, ahkuì, nungmoq lé nhang kat é nghut lhê." ga dum tai ri.

²² Haù su ga tai mù, Yhang gi, yhangmoq é ahtoq má soq mut lui, "Haù Chyoiyung Woi-nyì lé hap yù keq.

²³ Ó yuq é mara pé lé nghut kôle, nungmoq hkyut byi é nghut jáng, mara haù pé gi, hkyut pyám byi é hui rà nghut lhê; nungmoq a hkyut byi é nghut jáng, mara haù pé gi, hkyut pyám é hui rà a nghut." ga tai ri.

Htomaq Lé, Yesuq Htoq Shit É Hkyô

²⁴ Haù chángzo raxe í yuq má bo é, Zozúm le gà é Htomaq gi, Yesuq lé jé é hkûn, haù chángzô pé eq rahá a nyi to nghut ri.

²⁵ Haù mù lui, gotú chángzô pé gi, yhang lé, "Haù Yhumsing lé, ngamoq myàng bè." ga tai kyô akô.

Nghut kôlhang, yhang gi, yhangmoq lé, "Ngò gi, Yhâng é loq pé mà é shamtoq zuhkô lé myàng mù, ngá é loqnyhuì eq joí wú é eq, Yhâng é namcham má, ngá é loq eq myang lap wú é za a nghut jáng, haù lé ngò lumjing rà a nghut." ga tai ri.

²⁶ Rabat myàng jáng, chángzô pé gi, haù yhumhkaù má dum nyi tô akô; Htomaq le, yhangmoq eq rahá nghut nyi ri. Haù hkum

pé myhí to kôlhang, Yesuq gi, lé jé mù, yhang-moq é agùng má yap to luí, "Nungmoq ngu-ingón yuqyo nyí sháng gaq!" ga tai ri.

²⁷ Hau htàng, Yhang gi, Htomaq lé, "Náng é loqnyhui, shí má lé joí mù, Ngá é loq pé lé wú aq. Náng é loq lhám kat mù, Ngá é namcham má lé lap wú aq. A lùm hkákut, lumjǐng nyí aq." ga tai ri.

²⁸ Hau hkún, Htomaq gi, "Ngá é Yhumsing, ngá é Garai Gasang è!" ga Yhang lé tai ri.

²⁹ Yesuq gi, yhang lé, "Nàng gi, Ngo lé myang é yanmai, lumjǐng é a nghut lhú? A myàng kôlhang, lumjǐng é bang gi, hkungsó wó nyí ri." ga tai ri.

³⁰ Laiká buk shí má a ká tò é limik kumlhá pé gotù myo myo lé le, Yesuq gi, Yhàng é chángzò pé hí má kut shit bê nghut ri.

³¹ Nghut kôlhang, Yesuq gi, Garai Gasang é Yhangzo Hkrisduq nghut é lé, nungmoq wó lumjǐng rá matú eq, lumjǐng é yanmai, nungmoq Yhàng é myíng má asak wó kó rá matú, shí hkyò pé lé ká tò é nghut lhé.

21

Ngozo Wó Chyup Yu É Limik Kumlhá

¹ Hau htàng má, Yesuq gi, Tiberi nhông yàm má, Yhàng é chángzò pé lé dum htoq shit ri. Yhang htoq shit é hkyò gi, a-ò má é đông nghut ri.

² Simun Petruq, Zozùm le gâ é Htomaq, Galile mau Hkanaq wá mó má é Nah-tanelaq, Zebedi é yhangzo nhik eq gotù chángzo í yuq pé gi, raha nyi to bum akò.

³ Hau hkún, Simun Petruq gi, yhangmoq lé, "Ngò gi, ngozo kóng è rá." ga tai jáng, yhangmoq gi, "Ngamoq le châng lé rá." ga tai akò. Hau mù luí, yhangmoq gi, htoq é mù, hau lhai má wàng bekò nghut ri; nghut kôlhang, hau myín, radu lhang a wó kóng kó nghut ri.

⁴ Htang napkyó maubó lo é hkún, Yesuq gi, wuyàm má yap tò ri; nghut kôlhang, hau chángzò pé gi, Yesuq nghut é lé a wú sé kó nghut ri.

⁵ Yesuq gi, yhangmoq lé, "Luzùm wui è, nungmoq, ngozo wó akò lhú?" ga, wut myi kat jáng, yhangmoq gi, "A wó." ga tú tai akò.

⁶ Hau hkún, Yhang gi, "Nungmoq é gùn lé, hau lhai é loqyo hkyam shut dú hkyò kat keq; hau jáng, nungmoq wó kông yù kó rá nghut lhé." ga tai ri. Hau mù, yhangmoq gi, gùn dú hkyò kat é hkún, ngozo lùm myò é yanmai, hau gùn lé lhang a wó llang yù lo kó nghut ri.

⁷ Hau mù luí, hau Yesuq chyitdap é chángzo gi, Petruq lé, "Yhumsing ru nghut ri." ga tai ri. Simun Petruq gi, "Yhumsing ru nghut ri." gâ é lé wó gyo eq yhang, yhang gi, mebu hkyut pyâm tò é yanmai, buhǐng mó

lé, yhâng é gùng má baiyup yù mù, wui hkaú má byam wang ló bê nghut ri.

⁸ Hau chángzo góbang gi, wuyàm eq ngo xê làm kô za wê é yanmai, ngozo byíng tò é gùn lé, wuyàm shut lhai mai she jé lo akò nghut ri.

⁹ Yhangmoq gi, wuyàm má jé dap ló kô é hkún, myigyé gyúng é myihkyóm htoq má ngozo nyhín tò é lé le, muk ratsuí joq tò é lé le, myang akò.

¹⁰ Yesuq gi, yhangmoq lé, "Hau, ahkuí za nungmoq wó kông yu é ngozo, ra-am yù lé keq." ga tai ri.

¹¹ Hau mù, Simun Petruq gi, lhai má doq ji luí, kô é ngozo rasho ngó xe sùm du yhang bo é gùn lé, dùng yàm má she htoq tô ri. Ngozo hau myhó myo kôlhang, gùn gi, a jeq nghut ri.

¹² Yesuq gi, yhangmoq lé, "Napzang lé zo keq." ga tai ri. Chángzò pé gi, Yhang, hau Yhumsing nghut é lé sé kô é yanmai, ó yuq lhang, "Nàng, ó yuq nghut lhé?" ga, a wám myi kó nghut ri.

¹³ Yesuq gi, lé mù, muk lé è yù luí, yhang-moq lé byl ri; ngozo lé le, hau su kut ri.

¹⁴ Yesuq gi, shí é mai lhoq dui toq yù huí é htàng, Yhàng é chángzò pé lé htoq shit é má, shí gi, sum dâm nghú rá dâm nghut ri.

Yesuq Eq Petruq

¹⁵ Yhangmoq bàn zò bùm kô é htàng má, Yesuq gi, Simun Petruq lé, "Yohan é yhangzo Simun é, nàng gi, shí bang htoq má, Ngo lé teng za je chyitdap lhé lhú?" ga myi jáng, yhang gi, "Nghut lhé; Yhumsing è, ngò, Nàng lé chyitdap é hkyò lé, Nàng sé lhé." ga tú tai ri. Hau hkún, Yesuq gi, "Ngá é sau zò pé lé, baú aq." ga, yhang lé tai ri.

¹⁶ Hau htàng, Yesuq gi, "Yohan é yhangzo Simun è, nàng gi, Ngo lé teng za chyitdap lhé lhú?" ga dum myi jáng, yhang gi, "Nghut lhé; Yhumsing è, ngò, Nàng lé chyitdap é hkyò lé, Nàng sé lhé." ga tú tai ri. Hau hkún, Yesuq gi, "Ngá é sau pé lé, rém aq." ga tai ri.

¹⁷ Dum radám, Yesuq gi, yhang lé, "Yohan é yhangzo Simun è, nàng gi, Ngo lé chyit lhé lhú?" ga myi ri.

Hau hkún, Petruq gi, "Nàng gi, ngo lé chyitdap lhé lhú?" ga, yhang lé Yesuq eq sùm dam dâm tai é yanmai, yhang myit nó luí, "Yhumsing è, Nàng gi, lhunglhang lé sé lhé; ngò, Nàng lé chyitdap é hkyò lé, Nàng sé lhé." ga tai ri.

Hau hkún, Yesuq gi, "Ngá é sau pé lé, baú aq.

¹⁸ Ngò, nàng lé teng za tai lé, nàng, zorâm nghut é hkún gi, yhumsing gùng yhumsing hpyihit baiyup* yù mù, é nau é jowò hkangmó má wó è é nghut lhé; nghut kôlhang, nàng mang jáng gi, loq í loq lham luí,

* 21:18 Hpyihit baiyup gâ é lichyúm gi, mebu wut luí ri ri kut tò é lé gâ lhé.

nang lé góyuq eq hpyihit baíyup byi mù, nàng a ê nau é jowò shut shuì ê rà nghut lhê." ga tái ri.

¹⁹ (Yesuq haú su ga tái é gi, haú Petruq, hkâsu kut shi é đông mai, Garai Gasâng é hpungwup shingkang lé dan hu nhâng rà nghut é lé, tái nau é nghut ri.) Hau htâng, Yesuq gi, yhang lé, "Ngá htâng cháng aq." ga tái ri.

²⁰ Haú hkûn, Petruq gi, lhing wú kat le, haú Yesuq chyitdap é chángzo, yhangmoq htâng châng wún é lé myàng ri. Chángzo haú gi, hí hkûn, myinzang zô é ulé, Yesuq chyáng leq ngè mù. "Yhumsing ê, Nang lé ap pyám rà sù gi, ó yuq lú?" ga, myi wú é sù nghut ri.

²¹ Petruq gi, haú yuq lé myàng jáng, Yesuq lé, "Yhumsing ê, shí yuq gi, hkâsu dut rà lú?" ga myí ri.

²² Yesuq gi, "Ngò jé lé é hkûn jé shoq, Ngò, yhang lé dui nyi nhâng nau é nghut le gi, nàng eq hai sêng lhê lú? Nàng gi, Ngá htâng cháng aq." ga tú tái ri.

²³ Dang hau é yanmai, chángzo haú yuq a shí rà nghut lhê gâ é danglám gi, haú gumang wui chyáng byo myín to bê nghut ri. Nghut kôlhang, Yesuq gi, haú yuq a shí rà hkyô lé tái é a nghut, "Ngò jé lé é hkûn jé shoq, Ngò, yhang lé dui nyi nhâng nau é nghut le gi, nàng eq hai sêng lhê lú?" ga, tái é ru nghut lhê.

²⁴ Shí pé lé saksé hkám mù, shí pé lé kê tô é sù gi, chángzo haú yuq nghut lhê. Yhâng é saksé gi, têng é lé, ngamoq sê lhê.

²⁵ Yesuq gi, gotù muzó myo myo le kut ashí nghut ri. Muzó haú pé lhum jup lé, kê htoq yu é ru nghut le gi, kê tô é laiká buk haú pé gi, mingkan gón má lháng ngo rà a nghut nghú, ngò wó myit ri.

LAGYO Laiká (Acts)

Yesuq, Mauhkúng Má Shuí Yù Huí É Hkyô

¹ Htohpilug ê, Yesuq yhang hkyin yu tô é lagyô pé lé, Chyoiyúng Woi-nyí wum-o éq dang ban pying tô é htâng má, Garai Gasang yhang lé mauhkúng shut shuí yu é buinyi jé shoq,

² Yhang kut shit é hkyô pé eq, mhoqshit é hkyô pé banshoq lé, hí lhê é laiká buk má ngo ká kat bê nghut lhê.

³ Yesuq gi, shí hkám é htâng má, Yhang dui toq bê hkyô lé, lumging é saksé myo myô éq yhangmoq lé tún shit mù, buinyi myi xê nyi gyoro má yhangmoq chyáng lé htoq shit shit kut luí, Garai Gasang é mingdán hkyô lé hko kyô ri.

⁴ Yhang, yhangmoq eq rahá zup tô é hkún, hkunmó hkyô é gi, "Nungmoq gi, Yerusalem wá mó mai a htoq é za, ngá chyáng mai wó gyô yu é, ngá wá é danggidiq byí tô é chyunghuq lé láng nyí keq.

⁵ Hkásu mù gà le, Yohan gi, wui éq wui-myhup hkám byí é nghut lhê; nghut kólhang, nungmoq kúm gi, buinyi hká-myháng a myáng má, Chyoiyúng Woi-nyí mai bap-tisma wó hkam yú kó rá nghut lhê." gà ri.

⁶ Lagyô pé gi, Yhang eq rahá chôm zup ming tô é hkún, Yhang lé, "Yhumsing ê, nàng, haú Israellaq byu pé lé mingdán dum xuq byí rá gi, ahkuí yhang nghut bê lhú?" ga myí akó.

⁷ Yesuq gi, "Áwa gi, Yhâng é ahkáng ayá éq kut to bé é ahkying yam-yoq pé lé, nungmoq sé nó ra.

⁸ Nghut kólhang, Chyoiyúng Woi-nyí nungmoq chyáng jé jáng, nungmoq gi, wum-o a-tsam wó yú mù luí, Yerusalem wá mó eq Yuda mau banshoq, Samariq mau eq maumyí htáng shoq, ngá é saksé pé dut kó rá nghut lhê." ga luí, yhangmoq lé taí ri.

⁹ Dang haú ban taí é htâng má, yhangmoq wú nyi le, Yhang gi, mauhkúng shut shuí yu é hui mù, yhangmoq hí mai Yhang lé a myàng loshoq, mhut éq htup ló byuq bê nghut ri.

¹⁰ Yesuq doq ló nyi é u lé, yhangmoq mauhkúng shut ru wú tsuq nyi bum ashí le, hpyu é mebu wut é byú í yuq gi, radá dâm yhangmoq nàm má htoq yap lò mù,

¹¹ "Galile byu pé é, haí mù luí mauhkúng shut wú tsuq nyi akó lhú? Nungmoq é hí mai mauhkúng shut shuí yu hui é, haú

Yesuq mauhkúng shut doq ló é u lé, nungmoq myang kat é su, Yhang dum jé lé rá nghut lhê." ga taí akó.

Yudaq É Jowò Má, Mahtiaq Lé Hkyin Kat É Hkyô

¹² Hau htâng má, yhangmoq gi, Tsanlun Bùm mai, Yerusalem wá mó shut taú ló bekô.* Haú gyoro gi, Bánno buinyi má ge sô é í za wê ri.

¹³ Yhangmoq jé ló kôjáng, yhangmoq nyi nyi kô é yhùm ahtoq pyâm má é wap shut doq ló akó; haú bang gi, Petruq, Yohan, Yakuq, Andre, Hpilip eq Htomaq, Barhtol-ume eq Mahte, Alhpe é yhangzo Yakuq, Zelutug dut é Simun, góyuq Yakuq é yhangzo Yudaq pé nghut akó.

¹⁴ Yhangmoq lhunglhâng bang gi, miyiwe wui le, Yesuq é yhângnu Mariq le, yhanggu pé le kut mù, i-myiit rahkat za kyú chôm dung dung kut nyi akó.

¹⁵ Buinyi haú yoq má, Petruq gi, lumjing é gumang gu-nhá[†] wui rasha í xê yuq kó zup zing tô é gung gung má, toq yap mù,

¹⁶ "Gumang gu-nhá wui é, Yesuq lé chyup é bang lé hkyô shuí hí é sù Yudaq eq séng luí, hí hpyang Dawiq é nhut mai Chyoiyúng Woi-nyí taí tô é Chyúmdang gi, dik byuq bê nghut ri.

¹⁷ Yhang gi, nga-nhúng má nghap lhôm é hui mù, hpúng sará ayá wó bê sù nghut kólhang shí hkyô dut bê nghut ri." ga taí ri.

¹⁸ (Yudaq gi, yhang kut é agé ashop é muzó mai wó é aphaú éq myigùng ratóng wui yu é htâng, haú má yhang, a-nghop dòng byit gyó mù wam buq goq luí, ú banshoq buq myín byuq bê nghut ri.

¹⁹ Haú hkyô lé Yerusalem wá mó má nyi é lhunglhâng bang wó gyo kôjáng, myigùng haú lé yhangmoq é mying dòng, 'Akeladama' ga myhng akó; haú gi, 'Sui myigùng', gà é nghut ri.)

²⁰ Petruq xoq taí é gi, "Hkásu mù gà le, Hkya-on Kungtón Laiká má,

'Yhâng é jowò chamchyuiyui dut byuq sháng gaq; haú má ó le a nyi kó sháng gaq.'[✧] ga luí le, dum

'Yhang wó é ayá lé byú góyuq wó yu pyám byi sháng gaq.'[✧]

ga luí le, bo tó ri.

²¹⁻²² Haú mù luí, Yohan bap-tisma byí hí é hkún mai, Yesuq lé nga-nhúng chyáng mai shuí yu é buinyi jé shoq, Yhumsing Yesuq nga-nhúng eq rahá htoq htoq wàng wàng kut nyi é buinyi banshoq pé má, nga-nhúng eq yhang zum nyi sù rayuq lé, hkyin kat rá dut ri. Haú yuq gi, Yesuq dum dui toq é hkyô lé nga-nhúng eq rahá saksé dut rá sù nghut lhê." gà ri.

* 1:12 Tsanlun bùm eq Yerusalem gyoro gi, déng rawuí hkup kó we ri.
gumang za gà to lhê. ✧ 1:20 Hkya-on 69:25 ✧ 1:20 Hkya-on 109:8

† 1:15 Gumang gu-nhá gà é lé, Grik má gi,

²³ Haù hkùn, yhangmoq gi, Yustu ga le myhng é, Barsabaq gâ é Yosep eq Mahtiaq nhik lé hkyin tô akô.

²⁴⁻²⁵ Haù mù, yhangmoq kyûdung kô é gi, "Byù banshoq é i-myt lé sê é Yhumsing é, Yudaq Iskarut gi, yhang lô gíng é jowò shut lô rà ga, tô pyâm tô é yhâng é lagyo ayá é matú shí nhik mâ é nàng hkyin tô é sù lé tûn shit laq ò." ga akô.

²⁶ Hau htâng, yhangmoq, byù hkyin shosé she le, Mahtiaq chyâng ang bê. Haù mai, Mahtiaq lé gi, haù lagyo raxe rayuq má jat kat bê nghut ri.

2

Chyoiyúng Woi-nyí Jé Gyó Lo É Hkyó

¹ Penteko-ti* buinyi jé jáng, lumjng bang banshoq gi, jowò ralhüm má za, chòm zup míng nyi tô akô.

² Haù hkùn, laidun mó lo é su gâ é htê gi, byodàn ratung, mauhkung mai mying htoq lô mù luí, yhangmoq zing tô é yhüm byíng shoq dut to bê nghut ri.

³ Myishâm su dut é le byò myín htoq lô mù, yhangmoq yuq jup é ahtoq má jé to bùm bê nghut ri.

⁴ Yhangmoq lhunglhâng bang gi, Chyoiyúng Woi-nyí byíng lo bùm kômù, Woi-nyí èq tái nhang é eq rajung za, laklaí dang dông nyo lo bum akô.

⁵ Haù u lé, mauhkung ô má joq é mingdán hkangmó má é, tarâ hkunggâ é Yudaq byu pé gi, Yerusalem wà mó má bíng nyi bum akô.

⁶ Haù mying é htê lé wó gyo kôjáng, byù rajùm rayò zing lé lô kômù, ó le ó é myíng dông sê gyò yù kô é yanmai, maù úng-âng byuq bùm kôluí,

⁷ maù bùm uchyang tái kô é gi, "Wú keq, ahkuí dang tái nyi é byù shí bang lhunglhâng gi, Galile byu pé chyat a nghut kô lúh?"

⁸ Haù nghut é wa, hkâsu mù nga-nhúng ó le ó é yhumsing mau má é myíng dông sê gyò yu lhé lúh?

⁹ Parhti, Medi, Elam mau má é bang eq Mesopotamiaq mau, Yuda eq Kapadokia mau, Pontuq eq Asia,

¹⁰ Hprugi eq Pamhpuli, Egotuq ming má nyi é bang eq Kuruni myuq nâm má nyi é Libya ming má é bang, Romaq myuq mai lé bíng nyi é Yudaq byu pé eq Yudaq noqkuq htung má lhing wang lô bang,

¹¹ Kreti zinlóng eq Arabiq mau má é bang, nga-nhúng gi, yhangmoq hko kyó é Garai Gasâng é mauhpo muzó hkyó lé, yhumsing mau má é myíng dông yhang wó sê gyò yu ri-nhung." gâ ri.

¹² Yhangmoq banshoq bang gi, maù úng-âng byuq kômù, "Shí gi, haí wà nghut lhé lúh?" ga le, rayuq eq rayuq myi lhùm bum akô.

¹³ Nghut kôlhâng, byù ra-am gi, "Shí bang gi, í shuq wut é bang nghut akô." ga luí, tái jhpoi bum akô nghut ri.

Petruq Hko Kyó É Mungdang

¹⁴ Haù hkùn, Petruq gi, lagyo góbang raxe rayuq eq toq yap mù, htê mò èq byù haù bang lé tái é gi, "Yudaq byu pé eq Yerusalem wà mó má nyi nyi é lhunglhâng bang é, rago gyò wú keq! Ngò, nungmoq lé, shí hkyó tái kyo kólé.

¹⁵ Shí bang gi, nungmoq sù-ngam é dông, shuq wut é bang a nghut; hkâsu mù gâ le, ahkuí gi, napkyó gau hkyíng za ru nghut ashí.

¹⁶ Shí hkyó kúm gi, myiqhtoi Yoelaq tái tô é eq rajung za dut é nghut ri.

¹⁷ Yhang tái tô é gi,

"Garai Gasang ísu gâ ri: Lô htâng é buinyi pé má, Ngò Ngá é Woi-nyí lé byù lhunglhâng bâng é ahtoq má hut gyun rà nghut lhé.

Haù mù, nungmoq é yuqzo byizò pé gi, myiqhtoi htoi kó rà; nungmoq é zorâm wui gi, myoqwup shing-rán myàng kó rà; nungmoq é hpaù mâng pé gi, yhpumoq myàng kó rà nghut lhé.

¹⁸ Buinyi haù pé má, Ngá é dui-nhâng zoshâng hpò pé eq dui-nhâng zoshâng myhi pé é ahtoq má lhâng, Ngò Ngá é Woi-nyí lé hut gyun mù luí, yhangmoq gi, myiqhtoi htoi kó rà nghut lhé.

¹⁹ Ngò gi, ahtoq mauhkung htoq má mauhpo muzó pé lé, a-ò myigùng htoq má, kumlhá pé lé, sui eq, myi eq, myihkau dùm pé eq kut mù tûn shit rà.

²⁰ Haù Yhumsing é kô hkikhkam é buinyi a jé shimá, bui gi, mauchut byuq, lhamó gi, sui dut byuq é hí dut rà nghut lhé.

²¹ Haù hkùn, Yhumsing é myíng lé lãng é bang yuq hkangmó gi, hkyi yu é hui kó rà nghut lhé.¹²

gâ ri.

²² Israellaq byu pé é, dang shí lé gyò yù keq, nungmoq sê é eq rajung za, Nazaret wà byù Yesuq nungmoq é hí má tûn shit é, laklaí kumlhá, mauhpo muzó eq kumlhá pé gi, Yhang lé Garai Gasang nhang kat é saksé dut bê nghut ri.

²³ Shí yuq gi, Garai Gasang myit hpyit tô é hkyó eq, hí te sê é hpaqchyí dông, nungmoq chyáng ap pyâm é hui mù, nungmoq gi, agé ashop byu pé é loq èq, Yhang lé tapzing htoq má jén sat pyâm nhâng bekò nghut ri.

* 2:1 Penteko-ti gâ é gi, Lhoqlhai Poi láí é htâng ngo xê nyi jé é buinyi má, kut é poi lé gâ lhé.

✧ 2:21 Yol 2:28-32

²⁴ Nghut kôlhang, haù shî-nò hkyô gi, Yhang lé wó hkùm zing jung a nghut é yanmai, Garai Gasang gi, Yhang lé shî-nò jamjau mó mai, lhut pyám byi lui lhoq dui toq yú bê nghut ri.

²⁵ Dawiq gi, shî yuq eq séng lui tai é má, 'Haù Yhumsing gi, ngá é myoq hí má hkâ-nhâm le nyi nyi é lé ngò myàng bê.

Yhang ngá é loqyo hkyam má nyi nyi é yanmai, ngo lé wó lhoq nhún rà a nghut lo.

²⁶ Haù mù, ngá i-myt gi, nguingón nyi lui, ngá nhut shò gabú hkyá-ôn nyi ri; ngá é gungdu le myit myoqbyu jowò má nyi nyi rà nghut lhê.

²⁷ Hkâsu mù gà le, nàng, ngá é woi-nyí lé mosumhkung má tò pyám to rà a nghut. Nàng, náng é Chyoiyúng Sù lé bup byuq é hui nhâng rà a nghut.

²⁸ Nàng, ngo lé asak dui é hkyô sé nhâng bê. Náng é myoq hí má, nàng, ngo lé gabú hkyô lhoq pying byi rà nghut lhê.[†]

gà ri.

²⁹ Gumang wui ê, nga-nhùng é ichyí iké Dawiq kàng byit mù, myhup pyám hui bê hkyô lé le, yhâng é lup gi, hkũ nyí jé shoq nga-nhùng chyáng joq tò é lé le, ngò, nungmoq lé a gyuq a kyum wám tai lhê.

³⁰ Dawiq gi, myiqhtoi rayuq nghut é yanmai, yhâng é awut ashín mã é rayuq lé, yhâng é hkohkâm tanghkuq má zùng nhâng rà ga Garai Gasang byi tò é danggidiq lé sê tò mù,

³¹ 'Hkrisduq† gi, mosumhkung má pyám to a hui rà eq, Yhâng é gungsho a bup byuq é za, dum dui toq ló rà nghut lhê.', gà é hkyô lé te sê tò lui tai tò ri.

³² Garai Gasang gi, haù Yesuq lé lhoq dui toq yú bê. Ngamoq banshoq bang gi, haù hkyô é saksê pé nghut nyi ri.

³³ Haù mù, Garai Gasang gi, Yesuq lé Yhâng é loqyo hkyam má lhoq toq to bê. Yesuq gi, Garai Gasang byi tò é danggidiq Chyoiyúng Woi-nyí lé hkam yú mù, hut hkyô kat bê nghut é yanmai, ahkuí nungmoq shî su wó myàng, wò gyo bekò nghut ri.

³⁴⁻³⁵ Hkâsu mù gà le, Dawiq gi, mauhkung htoq tsáng myhâng má a doq ló wú kôlhang, yhang gi,

'Haù Yhumsing Garai gi, ngá é Yhumsing lé, "Ngò, náng é gye pé lé, náng é hkyí nang tanghkuq kut pyám byi é hkyíng jé shoq,

Ngá é loqyo hkyam shut zung nyi shi aq." gà ri.[‡]

gà lui, tai ri.

³⁶ Hau é yanmai, Garai Gasang gi, nungmoq eq tapzing má jén sat pyám é haù Yesuq

lé, Yhumsing eq Hkrisduq dut nhang é hkyô, Israelaq byu pé lhunglhang bang hkyak sê nyi kó sháng gaq ô." gà ri.

Sâng-hi Lumjing É Bang

³⁷ Yhangmoq gi, haù lé wó gyô bùm kôjáng, yhangmoq é i-myt má záng kô é nghut mù lui, "Gumang wui ê, ngamoq hkâsu kut lo rà lúhú?" ga lui, Petruq eq lagyo góbang lé myi akò.

³⁸ Petruq gi, "Nungmoq yuq hkangmó myit lhang mù, Yesuq Hkrisduq é mying mai wui-myhup hkâm yú keq; Haù jáng, nungmoq é yubak hkyut pyám byi é hui kó rà nghut lhê. Haù hkũn, Chyoiyúng Woi-nyí gà é chyunghuq lé, nungmoq wó yú kó rà nghut lhê.

³⁹ Hkâsu mù gà le, danggidiq haù gi, nga-nhùng é Yhumsing Garai Gasang ji yú rà bang banshoq nghut é, nungmoq eq nungmoq é yhangzo yhangshú pé eq le, mau we má nyi é lhunglhang bang eq le, sêng lhê." ga lui, yhangmoq lé tai kyô ri.

⁴⁰ Yhang gi, dang gotú myo myô eq le saksé hkâm mù, "Shî agé ashop é amyú mai wó lut htoq lo keq ô!" ga lui, yhangmoq lé lhoq pun lhoq kyíng ri.

⁴¹ Dang haù lé guq yu é bang gi, wui-myhup hkâm yu bùm kôlui, haù nyi má byu sum hkyíng kó jat wàng lo bum bekò nghut ri.

Lumjing Bang Zùm Yap É Hkyô

⁴² Haù bang gi, lagyo pé mhoqshit é hkyô, zùm yap é hkyô, muk hpê gam é hkyô[‡] eq akyú dúng é hkyô má, i-myt rahkat za chòm châng nyi akò.

⁴³ Lagyo pé kut shit é mauhpo muzó eq limik kumlhá pé myo myô é yanmai, lhunglhang bang gi, gyuq mau nyi bum akò nghut ri.

⁴⁴ Lumjing é lhunglhang bang gi, rawò má za zup zing tò mù, azing zè banshoq lé chòm chung nyi akò.

⁴⁵ Yhangmoq gi, yhumsing é sutzè pé lé, ùng pyám mù, yuq hkangmó lé, yhang rà tò é eq rajung za gám byi akò.

⁴⁶ Yhangmoq gi, nyi wui myit rahkat zâ eq noqkuq yhùm wàng má nyi nyi akò. Yhumsing é yhùm pé má le muk hpê gam é hkũn,

⁴⁷ Garai Gasang lé hkyá-on kungtôn uchyang, gabú é eq myit hui é eq chòm zo chòm shuq nyi bum akò; byu banshoq bâng é hí má le myoqdong wó bum akò. Haù Yhumsing gi, nyi wui yhangmoq chyáng hkyi yú hui bang jat lò nhang ri.

† 2:28 Hkyá-on 16:8-11 † 2:31 Grik dong Hkrisduq gà é gi, xù but hui Sù gà é lichyúm nghut mù, Hebre dong Mesaia gà é eq rajung za nghut lhê. ‡ 2:34-35 Hkyá-on 110:1 ‡ 2:42 Muk hpê gam hkyô gà é lé lichyúm í dông wó yu lhê - radông gi, rahá chòm zo chòm shuq é lé gà lhê; radông gi, Poído chòm zô é lé gà lhê.

3

Hkyi Hten Sû Rayuq Lé, Petruq Lhoq Gê Byi É Hkyô

¹ Ahkuí, Petruq eq Yohan gi, myinhêng zó sum hkyíng lhê é kyúdung nám má, noqkuq yhúm shut doq e ló akô.

² Háu hkún, inú unghkaú mai hkyi hten lugú dut é byù rayuq lé, noqkuq yhúm má wang lé lô bâng chyáng mai dung zo sháng gaq ga, Yúnglho hkum ga myhíng é hkúmdong má nyi hkang nyi mó waq lé lô mù, lé nyhi to to kut akô.

³ Yhang gi, Petruq eq Yohan, noqkuq yhúm háu má wang e ló é lé, myàng lui, lhom dúng nyi ri.

⁴ Petruq eq Yohan kúm gi, yhang lé chóm wú tsuq to mù, "Nga-nhik lé tu wú aq." ga akô.

⁵ Háu mù, yhang, yhangnhik chyáng mai rajung jung wó yú rá lé myit myoqbyù lui, yhangnhik lé rago za sai wú tò ri.

⁶ Petruq kúm gi, "Ngún, hng gi, ngò a wó; nghut kôlháng, ngò wó é nang lé byi lé: Nazaret wà byù Yesuq Hkrisduq é myíng mai toq sô ló aq." ga tai uchyang,

⁷ yháng é loqyo loq má zui mù láng toq kat ri; háu hkún jáng, yháng é hkyi kochang-chap pé wúm bo lò bê nghut ri.

⁸ Háu mù, yhang gi, radá dâm toq yap mù sô kat lui, so uchyang, byàm uchyang Garai Gasang lé hkyá-on mù, yhangnhik eq rahá noqkuq yhúm má wang ló ri.

⁹ Yhang sô e ló nyi é eq Garai Gasang lé hkyá-on kungton nyi é lé, lhunglhang bang chóm myang akô.

¹⁰ Háu yuq gi, noqkuq yhum é Yúnglho hkum gá é hkúmdong má zung to mù, dung zo sù nghut é lé yhangmoq matsíng kô é nghut mù lui, yháng chyáng dut lò bê hkyo é yanmai, maú hong byuq bum akô nghut ri.

Petruq Hkô Kyô É Mungdang

¹¹ Petruq eq Yohan chyáng háu dung zo sù byin châng tò é hkún, shiwa byu pé gi, wú maú uchyang, Sholomon jiroq shut, yhangmoq chyáng din yán wang lé lo bum akô.

¹² Petruq háu lé myàng jáng, shiwa byu pé lé tai é gi, "Israellaq byu pé ê, shí yuq é hkyô lé hái mù lui maú nyi akô lhu? Nga-nhik é dingmán hkyô eq wum-o a-tsám eq, shí yuq lé wó sô nhang é su ngâm lui, ngá-nhik lé wú tsuq bum akô lhu? Háu dông a nghut.

¹³ Abraham, Isak eq Yakup pé é Garai Gasang, nga-nhùng é íchyí iwa pé é Garai Gasang gi, Yhâng é dui-nhâng zoshâng Yesuq lé hpungwup shingkang lhoq htoq byi é nghut ri; nungmoq kúm gi, Yhang lé sat hui shoq ga ap pyám kóm lui, Pilat zau hpó mai Yhang lé nhang pyám rá ga myit to bê lé,

nungmoq gi, Yhâng é hí má yhang, Yhang lé he-ngik pyám akô nghut ri.

¹⁴ Háu chyoiyúng dingmán é Sù lé nungmoq he-ngik pyám kómù, byù sat sù lé sheq dúng htoq yú kôluí,

¹⁵ Asak Yhumsíng lé gi, sat pyám bekô. Garai Gasang kúm gi, háu yuq lé shi é mai lhoq dui toq yú bê nghut ri; ngá-nhik gi, háu hkyo é saksé nghut nyi lhê.

¹⁶ Yesuq é myíng lé lumjíng é yanmai, háu lumjing myit mai za, shí nungmoq myang é sê é sù lé wum-o lhoq pyíng byi bê nghut ri; nghut bê, Yesuq lé lumjíng é yanmai, shí yuq lé, nungmoq banshoq bâng é hí má, gumjup shoq lhoq ge to byi bê nghut ri.

¹⁷ Ahkuí, gumang wui ê, nungmoq é uphkâng bang kut é su, nungmoq le háu hkyô lé a sé mù kut pyám é hkyô lé ngò sê nyi lhê.

¹⁸ Nghut kôlháng, háu hkyô gi, Garaí é Hkrisduq shí-nò jamjau hui rá nghut lhê ga lui, myiqhtoi banshoq bang lé hí hí mai tai nhang tò é Garai Gasang yhang, lhoq dik é nghut ri.

¹⁹ Hau é yanmai, háu Yhumsing chyáng má é nguingón é ahkyíng yàm yoq jé lô rá matú le,

²⁰ nungmoq é matú hkyin tò é Hkrisduq nghut é Yesuq lé, Yhang nhang kat byi rá matú le, nungmoq é yubak mara hkyut pyám byi é hui rá matú le, nungmoq gi, myit lhim mù Garai Gasang chyáng lhim lò keq.

²¹ Garaí Gasang gi, a-nham pyat mai, Yhâng é chyoiyúng myiqhtoi pé é nhut mai, tai nhang to bê eq rajung za, nyi mi-nyi, joq mijoq lé asik dum sai é pyat jé shoq, Yesuq lé mauhkúng htoq má nyi nhang to rá nghut lhê.

²² Hkâsu mù gá le, Mosheq tai tò é le, 'Háu Yhumsíng Garai Gasang gi, nungmoq é yhanggu yhangmàng pé chyáng mai, nungmoq é matú ngò sù é myiqhtoi rayuq pô htoq lò nhâng rá nghut lhê; háu yuq tai mitai nungmoq gyo ra rá nghut lhê.

²³ Myiqhtoi hau é dang lé a gyo sù ó yuq nghut kôlháng, yhumsing é byù myú mai chyung hpyit pyám é hui rá nghut lhê.^{1*} gá ri.

²⁴ Gè gè yhang, Samuelaq mai, yhâng é htàng má châng pô htoq lo é myiqhtoi pé banshoq bang hko kyô lo é má le, buinyi shí pé eq séng mù tai to bekô nghut ri.

²⁵ Nungmoq gi, háu myiqhtoi pé é dang silí wunli eq, Garai Gasang mai, Abraham lé, 'Náng é awut ashín é yanmai, mingkan htoq má é byù myú chângiup hkungsô wó kó rá nghut lhê!^{1*} gá é eq rajung za, nungmoq é íchyí iwa pé eq tò é danggidiq lé wó hkam yú rá bang nghut akô.

²⁶ Garai Gasang gi, nungmoq yuq hkangmó lé yhumsing agé ashop é hkyô mai wó lhing taú lò nhang é đông, shimân byi râ matú, Yhâng é dui-nhâng zoshâng lé pô htoq lò nhâng lui, nungmoq chyáng hi nhang kat byi bê nghut ri." gâ ri.

4

Petruq Eq Yohan Nhik Chyup Hui É Hkyô

¹ Hkyangjông pé, noqkuq yhúm zúng é suwún hpô eq Saduke pé gi, Petruq eq Yohan shiwa byu pé lé dang nyo nyi é hkún, htoq lé lô kômù,

² yhangnhik, shiwa byu pé lé mhoqshit é eq, Yesuq é yanmai shi byuq bê bang Yesuq má dum dui toq lò râ gâ é hkyô lé tai nyi kô é yanmai, yhangmoq gyai yhang myit myô nyi bum akô.

³ Haú mù, yhangmoq gi, yhangnhik lé chyup yú lui, myinhâng mauchut lô bê nghut é yanmai, htang napkyô jé shoq htông má lhung tô akô.

⁴ Nghut kôlhâng, mungdang lé wó gyô yu é bang myo myo gi, lumjing kômù lui, yugge ngo hkying kô jé shoq myô jat lò bekô nghut ri.

Yudaq Byin Tú Wapdoq Má, Yhangnhik Lé Myi Jep Wú É Hkyô

⁵ Htang nyi, yhangmoq é zau wui, suwún wui eq tará sará pé gi, Yerusalem wá mó má chôm hui zup akô.

⁶ Hkyangjong mó Anna, Kayahpaq, Yohan, Alesander pé eq hkyangjong mó é amyú pé banshoq le, haú má bo tô akô.

⁷ Haú mù, yhangmoq gi, Petruq eq Yohan lé gang gung má nyhi to lui, "Nungnhik gi, hai a-tsam, ó yuq é mying mai mù shí lé kut akô lhu?" ga myi akô.

⁸ Haú hkún, Petruq gi, Choyiyung Woi-nyi bying tô é nghut mù lui, yhangmoq lé tai é gi, "Mingbyu wui é zaugun suwún wui é,

⁹ hkyi hten sù shí yuq lé lhoq gê byi é jeju yanmai, yhang hkâsu kut lhoq ge yú hui é hkyô lé, hkú-nyi nungmoq ngâ-nhik lé myi gôn wú naú kô é nghut le gi,

¹⁰ nungmoq lhunglhang bang eq Israelaq byu pé banshoq lé sé nhâng kôlé, nungmoq eq tapzing má jên sat pyám mù, Garai Gasâng eq shi é mai lhoq dui toq yu é, Nazaret wá byu Yesuq Hkrisduq é mying mai, shí yuq gi, nungmoq é hí má ísu wáng wáng zán zán yap tô é nghut ri.

¹¹ Yhúm sai bang nungmoq hkyin htoq pyám é luqgok gi, htungchyun má é ahkyak dik é luqgok dut bê.^{1*}

¹² Hkyi yú hkyô gi, Yhang mai lai lui gotú a nyi lo, hkâsu mù gâ le, nga-nhung hkyi yu é hui râ matú, mauhkung a-ô má, Yhâng é

mying mai lai lui, xângzo byu pé lé byi tô é mying gotú a joq lo é yanmai nghut ri." gâ ri.

¹³ Yhangmoq kúm gi, Petruq eq Yohan nhik a gyuq a kyum tai é lé myàng kôjáng, yhangnhik, jong a doq wú é, mayú byu za nghut é hkyô lé sé to kô é yanmai, maú nyi bum akô; nghut kôlhâng, hí hpyang Yesuq eq zum wún wú sù nhik nghut é lé, yhangmoq bún kat akô nghut ri.

¹⁴ Hau htoq agó, lhoq gê byi é hui sù le, yhangnhik eq rahá yap tô é lé, yhangmoq myàng kô é nghut mù lui, tai râ hkyô hai le a joq lo kô nghut ri.

¹⁵ Haú mù, yhangnhik lé, haú Yudaq byin tú wapdoq* mai lhoq htoq to mù, yhangmoq rayuq eq rayuq hpyé lhum kô é gi.

¹⁶ "Shi nhik lé hkâsu kut lé gê râ lhu? Yhangnhik kut shit e laklai kumlhá gi, Yerusalem wá mó má nyi é lhunglhang bang é hí má de za dut bê nghut é yanmai, nga-nhung haú lé a wó hê lo nghut ri.

¹⁷ Nghut kôlhâng, mingbyu wui má shí hkyô je riyhang a byo myin lò sháng gaq, ahkuí mai mying haú lé lang mù ó lé le a tai kyo lo râ matú, yhangnhik lé kyuq hkúm pyám sháng." gâ bum akô.

¹⁸ Haú mù, yhangnhik lé dum wut hâng yú lui, Yesuq é mying lé lang mù, hai le hkâtai, hkâ-mhoqshit kô ga chôm hkúm akô.

¹⁹ Petruq eq Yohan kúm gi, "Garai Gasâng é mungdang lé gyo râ htoq má, nungmoq é dang gyo le gi, Garai Gasâng é hí má gê râ, a gê râ lé, nungmoq yhang doqdân yú keq.

²⁰ Nga-nhik kúm gi, myàng yú, wó gyô yú bê é hkyô pé lé, a tai é, a wó nyi nghut lhê." ga lui, yhangmoq lé dum tú tai akô.

²¹ Haú hkún, yhangmoq gi, dut lai lò bê hkyo é yanmai, shiwa byu pé Garai Gasang lé hkya-on kungton nyi bum kôlui, yhangnhik lé dâm byi râ hkyô a myàng kô é nghut mù lui, yhangnhik lé dum tân kyuq lui nhang pyám bekô nghut ri.

²² Hkâsu mù gâ le, haú laklai kumlhá đông lhoq gê byi hui é sù gi, asak myi xê zân chyân bê sù nghut é yanmai nghut ri.

Lumjing Bâng É Kyúdung Dang

²³ Yhangnhik gi, nhang kat pyám é hui kôjáng, yhangnhik é luzum wui chyáng taú lò kômù, hkyangjong agyi pé eq suwún wui eq yhangnhik lé hkyim é dang banshoq lé, lò tai kyo akô nghut ri.

²⁴ Haú hkyô lé wó gyo kôjáng, yhangmoq gi, myit rahkat zâ eq yhumsing é htê lhoq ko mù, Garai Gasang lé kyúdung kô é gi, "Mauhkung eq myigung, wuìshuq lung-aú eq, haú pé má, nyi mi-nyi lé hpan tô é, ahko ahkáng lhunglhang wó é Yhumsing é,

* 4:11 Hkya-on 118:22

* 4:15 Yudaq byin tú wapdoq lé Grik đông gi, San-hedrin gâ lhê.

²⁵ Nàng, náng é dui-nhâng zoshâng, ng-amòq é íchyí iké Dawiq é nhut mai, Chy-oiyúng Woi-nyí èq taí tò é gi,

'Haí mù luí, tûngbaù amyù pé gi, nhikjum yô akô? haí mù luí, byu pé gi, akôm dá pyám akô lúh?

²⁶ Haù Yhumsing eq Yhâng é Hkrisduq lé gumlau toq rá matú, mingkan hkohkâm pé gi, toq mù, zau suwún wui eq rahá zup zing bum akô.^{1*}

gá ri.

²⁷ Gè gè yang, Herut eq Pontu Pilat nhik gi, tûngbaù pé eq Israelaq byu pé le mù, wà mó shí má chòm zing to kôluí, nàng xú but byi é sù,† náng é Chyoiyúng dui-nhâng zoshâng Yesuq lé gumlau toq rá dá nyi akô.

²⁸ Náng é wum-o a-tsam eq nàng ô nau é dông dut rá matú, hí hkún mai nàng myit hpyit doqđán tò é hkyô lé, yhangmoq gi, kut pyám bekô nghut ri.

²⁹ Yhumsing é, ahkuí yhangmoq taí kyuq nyi é dang lé myàng byi laq ô! Náng é dui-nhâng zoshâng wui, a gyuq a kyum é myit èq náng é dang lé taí rá matú wum-o byi laq!

³⁰ Náng é wum-o bo é loq lhâm kat luí, noli nojàng lé lhoq gè byi mù, náng é Chyoiyúng dui-nhâng zoshâng Yesuq é mying mai, limik kumlhá eq mauhpo muzó pé lé kut shit laq ô!" gá akô.

³¹ Haù su, kyû ban dung kôjáng, yhangmoq zing tò é jowò gi, dui nún lô mù, yhangmoq lhunglhâng bang gi, Chyoiyúng Woi-nyí bying lô luí, Garai Gasâng é mungdang lé a gyuq a kyum é za taí bùm bekô nghut ri.

Azing Zê Lé Chòm Gam Chùng Kô É Hkyô

³² Haù lumjing é lhunglhâng bang gi, i-myit rahkat za nghut nyi akô; ó yuq le, yhumsing wó é zè lé ngá é a gá é za, banshoq eq chòm gam chung nyi akô.

³³ Lagyo pé le, haù Yhumsing Yesuq dum dui toq é hkyô lé a-tsam mò èq saksé hkâm nyi kô é nghut mù luí, yhangmoq banshoq bâng é ahtoq má jeju myo myo joq nyi ri.

³⁴ Yhangmoq chyáng a wó a lom é byù rayuq le a nyi kô. Hkásu mù gá le, maumyí ratóng wó é, a nghut jáng, yhùm wó é bang ó yuq nghut kôlhâng, haù pé lé adàm dàm ùng pyám luí wó yu é ngùn le gi,

³⁵ lagyo pé é hkyí wang má lé to byi akô. Haù mù luí, a wó a lòm sù ó yuq lé le ra tò é eq rajung za gàm byi akô nghut ri.

³⁶ Haù hkùn, Barnaba ga luí lagyo pé eq myhíng byi é, Kupru ming má é Lewiq byù Yosep le, yang wó é maumyí ratóng lé ung luí, wó yu é ngùn lé lagyo pé é hkyí wang má, lé to byi ri.

³⁷ Barnaba gá é dang lichyúm gi, myit wum byi su é yhangzo gá é lichyúm nghut lhê.

5

Anani Eq Sahlira Nhik É Hkyô

¹ Nghut kôlhâng, Anani ga sù gi, yhangmyi Sahlira eq rahá, yháng nhâm wó é maumyí ratóng lé ùng pyám luí,

² yhangmyi le bo sé é dông, ngùn haù ram lé gi, haq myhit wu to mù, ra-am lé za lagyo pé é hkyí wang má lé to byi akô.

³ Haù mù luí, Petruq gi, "Anani é, Chy-oiyúng Woi-nyí lé mhaù pyám rá matú eq, maumyí hpau má é ra-am lé haq yu to rá matú, haí mù luí, náng é myit má Tsadán le bying nhang tò lhê lúh?

⁴ Maumyí haù joq tò le, náng é zè nghut lhê a nghut lúh? Wó ung é ngùn le náng é zè nghut ashí, a nghut lúh? Haí mù luí, nàng haù dông dà lhê lúh? Byù lé mhaù é a nghut, Garai Gasang lé mhaù pyám bê nghut ri." ga taí ri.

⁵ Anani gi, dang haù lé wó gyo jáng, lèng mù, shi byuq bê nghut ri. Haù hkyô lé wó gyô é bang banshoq le, gyai yang gyuq bùm bekô nghut ri.

⁶ Haù hkùn, zorâm wui gi, toq mù, yhâng é mâng lé htup luí, è waq myhup pyám akô.

⁷ Hau htâng, sum hkyíng kô myàng jáng, yhangmyi le, wang lé lo ri. Haù su dut é hkyô lé gi, yang a sé nghut ri.

⁸ Haù hkùn, Petruq gi, "Ngo lé taí kyô wú aq. Nungnhik ùng é maumyí hpau gi, shí gú za nghut lhê lúh?" ga myí jáng, yang gi, "Nghut lhê, haù gú za nghut bê." ga tú taí ri.

⁹ Petruq gi, "Nungnhik gi, haù Yhumsing é Woi-nyí lé isu kut chyam wú rá matú, hkásu mù chòm myit huí akô lúh? Wú aq, náng é yhumsing hpó lé é myhup pyám bang gi, haù hkúmdong má jé bê; yhangmoq gi, nang lé le waq htoq pyám kô rá nghut lhê." ga taí ri.

¹⁰ Radá dâm, yang le lagyo hpó é hkyí wang má lèng shi byuq bê. Zorâm wui le wang lo wú le, myiwe haù shi to lánng é lé myàng kôluí, waq é mù, yanglang é nàm má, é myhup pyám bekô.

¹¹ Hau é yanmai, haù hkun lhê é hpúng byù banshoq bang eq, haù su dut é hkyô lé wó gyo má wó gyô é bang gi, gyai yang gyuq bùm bekô nghut ri.

Byù Myo Myo Lé, Lagyo Pé Lhoq Gê Byí É Hkyô

¹² Ahkuí, lagyo pé gi, mingbyù wui é hí má limik kumlhá eq mauhpo muzó myo myo lé, kut shit nyi akô. Haù lumjing bang gi, i-myit rahkat za èq, Shulomon jìrop má chòm huí huí kut bum akô.

* 4:26 Hkya-on 2:1-2 † 4:27 Xú but é hkyô gi, Yudaq byu pé htung dông xú but byi jáng, rajung jung kut rá matú hkyin masat yu é hkyô nghut lhê. Xú but byi é sù gi, Griik dông Mesaia gá é nghut lhê.

13 Shiwa byu pé gi, yhangmoq lé hkunggá nyi bùm kôlhang, yhangmoq lé a wám ê zum bùm kô.

14 Nghut kôlhang, haù Yhumsing lé lumjing é myiwe yuqgè wui gi, myo sheq myô jat lò kômù, yhangmoq chyáng je myô jat lò bê nghut ri.

15 Haù mù luí, byu pé gi, Petruq lai lo é hkùn, yhang é wupzo za lhang rayuq yuq é ahtoq má zang sháng gaq ga, nôhpyo huí é bang lé, wà mà é hkyô yàm má waq htoq é mù, yhuphpú pé eq taphkang pé má lheq tô akô.

16 Hau htoq agó, Yerusalem awui ayàm mà é wà pé mai le, byù ajùm ayò gi, no é bang eq agè ashop é nat wang zing-ri huí é bang lé shuí jé lé bum akô; haù bang lhunglhang gi, lhoq gè lhoq yò byí é huí bum akô nghut ri.

Lagyo Pé Zing-ri Huí É Hkyô

17 Hkyangjong mó eq yhang é luzúm wui, Saduke hpung mà é byu pé kúm gi, gyai yhang wú manon bùm kôluí, toq mù,

18 lagyo pé lé chyup yù luí, wà mà é htóng má lhung tô akô.

19 Nghut kôlhang, haù myín lé, Yhumsing é maumang lagyo rayuq gi, htóng hkum pé lé hpông pyám mù, yhangmoq lé shuí htoq yù uchyang,

20 "Nungmoq htoq lò mù, noqkuq yhùm má é yap to luí, dui é asak hkyô sik eq sêng é danglù banshoq, shiwa byu pé lé tai kyo keq." ga tai ri.

21 Napsùn myoqmyàng zó lé, yhangmoq gi, noqkuq yhùm má wàng mù yhangmoq wó gyô yu é eq rajung za, shiwa byu pé lé, mhoqshit hi lò akô.

Haù u lé, hkyangjong mó eq yhang é luzúm wui gi, Israelaq byu pé é suwún wui lhunglhang bang lé ji yù mù, Yudaq byìn tú wapdoq chòm zung yù luí, lagyo pé lé é shuí yù rá matú htóng shut byù nhang kat akô.

22 Haù bang kúm gi, htong má jé é hkùn, lagyo pé lé a myàng kôjáng, dum tau lò mù lo tai kyo kô é gi,

23 "Htóng hkum le ging ging myhi to lánq ri, htóng zung bang le hkum yàm má yap tô akô. Nghut kôlhang, hpông wú le, ahkaù má ó le a nyi to lo nghut ri." gà ri.

24 Noqkuq yhùm zung é zau hpó eq hkyangjong agyi wui gi, dang haù lé wó gyo kôjáng, "Shí hkyô haí dut lò rá lhu?" ga, gyai gyuq maù bum akô.

25 Haù hkùn, byù rayuq wang lé lò mù, "Wú keq, nungmoq eq htóng má lhung tô é bang gi, noqkuq yhùm má yap to mù byu pé lé mhoqshit nyi bum akô." ga luí, yhangmoq lé tai kyô ri.

26 Haù mù luí, zau hpó haù gi, yhang é a-ô mà é bang eq é mù, lagyo pé lé é shuí yu akô. Nghut kôlhang, shiwa byu pé luqgok eq dú lò kô rá lé gyuq kô é yanmai, htân htân a wám kut kô nghut ri.

27 Lagyo pé lé shuí jé lò kôjáng, Yudaq byìn tú wapdoq hí má yhangmoq lé nyhi tô akô. Haù hkùn, hkyangjong mó gi,

28 "Yesuq é mying lé lang luí a mhoqshit rá matú, nungmoq lé, htan é hkunmó hkyô to bê nghut lhé. Nghut kôle, nungmoq mhoqshit é hkyô gi, Yerusalem wà mó jam shoq, nungmoq kut bekô nghut luí, Yesuq é sui lé, ngamoq é ahtoq má ke byi rá dà nyi akô." ga luí, yhangmoq lé tai akô.

29 Haù hkùn, Petruq eq gotú lagyo pé tú tai kô é gi, "Ngamoq gi, byù dang lé gyo ra htoq má Garai Gasang é mungdang lé je luí gyo rá dut lhé.

30 Nga-nhung é íchýí íwà pé é Garai Gasang gi, nungmoq eq tapzing má lhang sat pyám é Yesuq lé, shi e mai lhoq dui toq kat bê nghut ri.

31 Israelaq amyú lé, myit lhang hkyô eq mara hkyut byi hkyô hpông byi rá matú, up é ahkáng wó Sú eq hkyi yù Sú kut nhang rá ga, Garai Gasang gi, Yhang lé, Yhang é loqyo loq* má waq toq to bê nghut ri.

32 Ngamoq le shí hkyô é saksé pé nghut nyi lhé; mungdang lé gyô yù luí châng é bang lé Garai Gasang byi tô é Chyoiyung Woi-nyí le, shí pé é saksé nghut lhé." ga akô.

Gamalelaq Hpaqchyí Byí É Hkyô

33 Yhangmoq gi, dang haù lé wó gyo kôjáng, lùm gyo nhik-yo naù kômù, lagyo pé lé sat pyám rá lhang myit akô.

34 Nghut kôlhang, mingbyù banshoq bang é hí má aróng wó é tará sará Gamalelaq gá é Hparishe rayuq, haù Yudaq byìn tú wapdoq má toq yap mù, lagyo pé lé razup zo lhoq htoq to nhang luí,

35 yhang tai é gi, "Israelaq byu pé é, shí bang lé hkâsu kut rá hkyô, rago za hí myit wú keq.

36 Hkâsu mù gá le, hí hpyang Htudaq gá é byù rayuq pô htoq lò mù, yhanggung yhang byù mó rayuq yuq nghut lhé ga tai jáng, byù myi shô kô yhang chyáng châng wú bekô. Yhang sat pyám é hui luí, yhang htang châng é lhunglhang bang le byo myin byuq kômù, haí le a wó kut dut byuq akô nghut ri.

37 Hau htang, mying jilpán guq yu é buinyi má, Yudaq gá é Galile byù rayuq pô htoq mù, mingbyù wui lé yhang hkyam shut mhoq hpyoq yu ri. Yhang le sat pyám é hui mù, yhang htang châng é lhunglhang bang le, byo myin byuq bekô nghut ri.

38 Ahkuí le, shí bang lé haí le hkâgon ko, yhangmoq kâm é đông nghut nyi kô sháng

* 5:31 Garai é loqyo loq gá é gi, hpautap hkungga ging é jowò lé tai nau é nghut lhé.

gaq; yhangmoq kut nyi é hkyô eq dá nyi é hkyô pé gi, byù myit dông kut é nghut jáng, htên byoq byuq rà za nghut lhê.

³⁹ Nghut kôllhang, Garai Gasâng chyáng má é nghut le gi, nungmoq wó lhoq hkyíng pyám kó rà a nghut. Garai Gasâng é gyê sheq dut lò kó rà nghut lhê." gâ ri.

⁴⁰ Dang haù lé yhangmoq gyô htuk bum akô. Haù mù, lagyo pé lé wut yù mù lui, nhuq bat yù kômù, Yesuq é mying lé lang lui mhoqshit é hkyô a ge kut rà nghut lhê ga tai kômù, nhang pyám akô nghut ri.

⁴¹ Lagyo pé kùm gi, Yesuq é mying é yan-mai ru hpuzô é hkyô gi, gíngdán nyi ri, ga myit yù kômù, Yudaq byin tú wapdoq haù mai gabú myit éq htoq lò bekô.

⁴² Hau htâng, yhangmoq gi, nyi wui làng noqkuq yhùm má le, rayhùm htâng rayhùm má le, Yesuq gi, Hkrisduq nghut é hkyô gabú danglù lé mhoqshit hkô kyô nyi akô nghut ri.

6

Garúm Râ Byù Nyhit Yuq Lé Hkyin Yu É Hkyô

¹ Ahkuí, chángzô pé myô jat lo nyi é buinyi pé má, Grik dang nyo é Yudaq byu pé gi, yhangmoq é chuimó myhi pé lé, nyi wui lhê é gam tso gam huq é hkyô má rago a wó kut kô é yanmai, Hebre myíng mu é Yudaq byu pé lé mara hùn dang tai bum akô.

² Haù hkùn, lagyo raxe í yuq gi, chángzô pé lhunghâng bang lé wut yù mù, "Ngamoq, Íwa Garai Gasâng é mungdang hko kyô é muzó lé rap pyám to mù, zangbó amù lé za lazang nyi é nghut le gi, a htuk rà nghut lhê.

³ Haù mù lui, gumang wui é, Chyoiyúng Woi-nyí byíng é eq hpaqchyí byéng-yá bo é nhik bo byù nyhit yuq lé nungmoq chyáng má é hkyin to keq. Haù bang lé muzó shí lham hun to rà nghut lhê.

⁴ Ngamoq kùm gi, kyúdung é hkyô eq mungdang hkô é hkyô lé za, noqzuq tung kut nyi rà nghut lhê." ga tai akô.

⁵ Dang haù lé shiwa byù lhunghâng bang gyô htuk kômù lui, lumjíng myit kô é, Chyoiyúng Woi-nyí byíng é Stehpan ga sù eq, Hpílíp, Prokoru, Nikanora, Timun, Par-mena, Yudaq noqkuq htúng má lhing wang lò bê sù Antioku wà mó má é Nikolaq pé lé hkyin yù mù,

⁶ lagyo pé chyáng shuí lò akô; lagyo pé gi, kyúdung byi kômù, yhangmoq lé loq ke byi akô nghut ri.

⁷ Garai Gasâng é mungdang gi, je myô jam lò lui, Yerusalem wà mó má chángzô pé gyai myô jat lawán lo é htoq agó, hkyangjông pé myo myo le, haù lumjíng hkyô má châng nyi bum akô.

Stehpan Chyup Yù Huí É Hkyô

⁸ Ahkuí, Stehpan gi, Garai Gasâng é jeju chyunghuq eq wum-o a-tsam byíng nyi é nghut mù, byu pé é hí má mauhpo muzó pé eq limik kumlhá mó pé tûn shit ri.

⁹ Haù hkùn, luthkyô ga bâng é tarajong eq sêng é Kuruni, Alesander eq Kiliki, Asia mau má é bang ra-am gi, toq mù, Stehpan eq dang chyin chyin lhùm akô.

¹⁰ Nghut kôllhang, Stehpân é dang gi, Chyoiyúng Woi-nyí lom é hpaqchyí dang nghut é yanmai, yhangmoq a ùng kó nghut ri.

¹¹ Haù mù, yhangmoq gi, "Shí yuq, Mosheq eq Garai Gasang lé rhoi dang tai nyi é lé, ngamoq wó gyô ri." ga lui, mhaù tai nhâng rà byù haq lung tô akô.

¹² Haù mù, yhangmoq gi, mingbyù wui eq nhik bô suwún wui, tará sará pé lé, chun htaù mù, Stehpan lé chyup yù nhâng lui, Yudaq byin tú wapdoq má shuí nyhi tô akô.

¹³ Mhaù é saksé byu pé lé le lhoq hâng kat lui, haù bang gi, "Shí yuq, shí chyoiyúng jowò* eq jep é tará lé shut shai é dang ru tai nyi ri.

¹⁴ Nazaret wà byù Yesuq ga sù gi, jowò shí lé hpyoq pyám mù, nga-nhúng lé Mosheq éq byi tô é htungking lé htaí pyám rà nghut lhê ga lui, yhang tai é dang lé ngamoq wó gyô é nghut lhê." ga tai akô.

¹⁵ Haù Yudaq byin tú wapdoq má zung to bang banshoq, yhang lé chòm wú tsuq nyi kô é hkùn, yhâng é myoqdong gi, maumang lagyo é myoqdong su dut é lé, yhangmoq myang akô nghut ri.

7

Stehpan Tai É Dang

¹ Haù hkùn, hkyangjong mó gi, "Dang haù pé têng lhê lú?" ga lui, yhang lé myi jáng,

² Stehpan tú tai é gi, "Gumang wui eq íwa wui é, gyô wú keq, nga-nhúng lhunghâng bâng é íchyí Abraham gi, Haran wà má a lò nyi shi lé, Mesopotamiaq mau má nyi tô ashí hkùn, hpungwup shíngkang bo é Garai Gasang gi, yhâng chyáng lé htoq shit mù,

³ Náng é ming eq náng é amyú mai htoq lò lui, ngò tûn shit rà ming shut é ló aq.[†] ga lui, yhang lé tai ri.

⁴ Haù mù, yhang gi, Hkaldea byu pé é mau mai htoq lò lui, Haran wà má lò nyi nyi ri. Yhâng wa shi byuq é htâng má, Garai Gasang gi, ahkuí, nungmoq nyi nyi é ming shí má yhang lé htot lò nhâng bê nghut ri.

⁵ Garai Gasang gi, shí ming má yhang lé silí wunlí ngù rà, hkyí rahkô nang í é myigùng lháng a byi é nghut kôllhang, yhang, zodù lháng a wò shi mai, yhang lé le, yhâng é awut ashín pé lé le, maumyí shí byi rà ga danggidiq byi to bê nghut ri.

* 6:13 Shí chyoiyúng jowò gi, Yerusalem noqkuq yhùm lé gâ lhê. † 7:3 Apùn 12:1

⁶ Hau htoq agó, shí hkyô lé Garai Gasang xoy taí é gi, 'Náng é awut ashín pé, túngbaù ming má bíng nyí mù, haù ming báng èq myi shô zàn jùn zô é eq zing-rí é lé hui kó rà.

⁷ Nghut kôhlang, yhangmoq lé jùn zô é amyú lé le, ngò jéyang rà nghut lhê.' gâ ri. 'Haù hkûn, yhangmoq gi, haù ming mai htoq lô mù, jowô shí má ngo lé noqkuq kó rà nghut lhê.¹⁰ ga le, Garai Gasang taí ri.

⁸ Hau htàng, yhang lé ahpyo-kuq hpyit byi rà hkyô eq séng é dangshikaq le, byi ri. Haù mù, Abraham gi, Isak lé hku é htàng shit nyí buinyi má ahpyo-kuq hpyit byi ri; Isak gi, Yakup lé hkû mù, Yakup gi, íchyi íwa achyùng raxe í yuq lé hku kat bê nghut ri.

⁹ Haù íchyi íwâ pé gi, Yosep lé manôn kôluí, Egutuq ming shut jùn dông ùng kat akô. Nghut kôhlang, Garai Gasang gi, yhang eq rahá nghut nyi mù luí,

¹⁰ wuìhke jamjau banshoq mai yhang lé lhoqlhut yù mù, Egutuq hkohkâm Hpara-uq é hí má le myoqdong wó, hpaqchyí byéng-yá le bô nhang é yanmai, hkohkâm haù gi, Egutuq ming eq, yhâng é hkohkâm-wàng banshoq lé up nhang ri.

¹¹ Haù u lé, Egutuq ming eq Hkanan ming banshoq má mutmó gyó lô mù, wuìhke jamjau mó hui bekô. Nga-nhùng é íchyi íwâ pé le zoshuq a myang hô zo lo dut byuq bekô nghut ri.

¹² Ahkuí, Yakup gi, Egutuq ming má guqzo joq é hkyô lé wó gyo jáng, nga-nhùng é íchyi íwâ pé lé sâng-hí dàm é nhang ri.

¹³ Htang dàm dum ê é hkûn, Yosep gi, yhanggu yhangmâng pé lé yhang ó nghut é hkyô taí kyô ri. Hpara-uq le Yosep é yhumbyù ikon hkyô lé sê yù byi bê nghut ri.

¹⁴ Hau htàng, Yosep gi, yhâng wa Yakup eq yhumbyù banshoq nyhit xe ngo yuq lé, yhâng chyáng pying yù bê nghut ri.

¹⁵ Yakup le Egutuq ming má jé gyó lô luí, yhang eq nga-nhùng é íchyi íwâ pé gi, banshoq haù ming má shí lô byuq bekô nghut ri.

¹⁶ Yhangmoq é mâng lé gi, Shehkem wà má yu taù lô mù, Shehkem wà má é Hamora é yhangz yhangshu pé chyáng mai, Abraham èq ngùn byi mù wui hpyit tô é lupdùng má lô myhup tô akô nghut ri.

¹⁷ Abraham lé Garai Gasang byi tô é dang-gidiq dik rà ahkying jé lo nyi é u lé,

¹⁸ nga-nhùng é amyú gi, Egutuq ming má Yosep lé a sê é hkohkâm pò htoq é pyat jé shoq, myoluq jebe lò bekô nghut ri.

¹⁹ Hkohkâm hpó haù gi, nga-nhùng é amyú htoq má a ge é hpaqchyí da luí, nyhe-qnú pé lé shi byuq sháng gaq ga, dú pyám nhang é dông mai nga-nhùng é íchyi íwâ pé lé zing-ri bê nghut lhê.

²⁰ Haù u má, Mosheq lé hkû to bê. Yhang gi, Garai Gasâng é hí má gyai yúnglô é sù nghut ri; yhang gi, yhângwâ é yhùm má lhamó sum hkyap baù tô é hui mù,

²¹ htot tô tô é hui jáng, yhang lé Hpara-uq é byizô èq xe yù mù, zosíng kut yù luí, hku kó ri.

²² Mosheq gi, Egutuq ming má é hpaqchyí byéng-yá banshoq lé mhoq yù luí, nhut shô a-tsam eq hkyi loq a-tsam gyai bô sù nghut ri.

²³ Yhang asak myi xê zàn jé lò jáng, yhâng é gumang Israelaq byu pé chyáng é kúm wú rà matú wó myit htoq kat ri.

²⁴ Ê jé jáng, zing-ri hui nyi é sù rayuq lé é myàng luí, haù yuq lé búng mù, zing-rí nyi é Egutuq byù lé, loqchoq hpuq é dông sat pyám ri.

²⁵ Mosheq gi, yhâng é byu pé lé yhâng é loq dông Garai Gasang hkyi yù hkyô byi nyi é lé, yhâng é amyú pé sê gyo byi nhô ngàm kôhlang, yhangmoq a sê gyo byi kó nghut ri.

²⁶ Htang nyi lé, Israelaq byu yhangchang mabyoq htoq nyi é má, e ang mù, yhangn-hik lé pyín nàu luí, 'Ahkaù nhik ê, gumang yhangchang sheq ru nghut lhê nhing, haù mù rayuq eq rayuq byoq lhum nyi akô lhú?' ga taí ngón wú ri.

²⁷ Luzúm hpó lé zing-rí nyi sù yuq gi, 'Ngamoq é ahtoq má zau eq tarâ agyi kut rà matú, nàng lé ó yuq hkyin tô é lhú?

²⁸ A-nyí nap Egutuq byù lé sat pyám é su, ngo lé le sat pyám nau ri lhú?'²⁹ ga luí, tú taí uchyang yhang lé dùn chyn pyám ri.

²⁹ Mosheq gi, dang hau é yanmai, hpàng luí Midian ming má é nyi byuq ri. Haù má yuqzo í yuq é wó ri.

³⁰ Haù ming má myi xê zàn lai jáng, Sinaq Bùm yàm, yoso hkaù má é myi gyung tô é mhanpúng mai, maumang lagyo rayuq gi, Mosheq lé htoq shit ri.

³¹ Mosheq gi, haù lé myàng jáng, hau é yanmai maù luí, wú wú rà ga huí e lô le, Yhumsing é htê htoq lo é gi,

³² 'Ngò gi, nàng íchyi íwâ pé é Garai Gasang, Abraham, Isak, Yakup é Garai Gasang nghut nyi lhê.³³ gâ ri. Mosheq kúm gi, gyuq nán luí, a wám tu wú nghut ri.

³³ Haù Yhumsing gi, 'Náng é hkyi-tsong hkyut pyám aq, nàng yap tô é jowô gi, chy-oiyung é myigùng nghut lhê.

³⁴ Egutuq ming má ngá é amyú pé zik zo huí nyi é hkyô lé, ngò gè gè yhang myàng bê; yhangmoq é ngàu nhik ngàu htê lé ngò wó gyo bê; yhangmoq lé hkyi yù rà matú ngò gyó lé é nghut lhê; ahkuí, lé aq, ngò, nang lé Egutuq ming shut nhang taù kat rà.³⁵ ga luí, yhang lé dum taí ri.

³⁵ Yhangmoq eq, 'Nang lé zau eq tará agyi kut rá matú, ó yuq hkyin tó é lhuú?' ga luí he-ngik pyâm é Mosheq lé yhang, mhanpúng má htoq shit é maumang lagyo đông mai, Garai Gasang gi, yhangmoq é zau eq hkyi yù sù kut nhâng luí, taù nhang kat é nghut ri.

³⁶ Haù Mosheq yhang, Egotuq ming má le, Nhong Nè má le, yoso hkaù pé má le, myi xê zàn gyoro má mauhpo muzó pé eq limik kumlhá pé tún shit uchyang, yhâng é byù myû pé lé Egotuq ming mai shuí htoq ló ri.

³⁷ Israellaq byu pé lé, 'Nung gu nung mâng pé mai, nungmoq é matú ngò eq dù é myiqhtoi rayuq lé, Garai Gasang gi, pò htoq lô nhâng rá nghut lhê.*' ga luí, taí tó é sù le Mosheq yhang nghut ri.

³⁸ Yoso hkaù má nghut nyi ashí hkùn lé, shiwa byù hpúng má, Sinaq Bùm má yhang lé dang taí é maumang lagyo eq le, nga-nhông é íchyí iwâ pé eq le rahá nghut sù gi, yhang yhang nghut nyi ri; nga-nhông lé ap byi rá asak ùi é mungdang lé lom yu é sù le, yhang nghut nyi ri.

³⁹ Nghut kôlhang, nga-nhông é íchyí iwâ pé kúm gi, yhâng é dang lé a kâm gyo kômù, yhang lé he pyám luí, Egotuq ming shut taù nau é myit bo bum akò.

⁴⁰ Haù mù, Arun lé, 'Egotuq ming mai nga-nhông lé shuí htoq lo é Mosheq gi, haí ùt byuq bè hkyô lé, ngamoq a sé lo; haù mù, nga-nhông hí má so byi rá hpara lhô pé saí byi aq.*' ga taí akò.

⁴¹ Haù buinyi pé má, yhangmoq gi, nojùng zo lhô saí mù, alhò haù lé hkungga nhông byi uchyang, yhangmoq é loq eq saí tó é muzó jizó má gabú nhik dik nyi akò.

⁴² Haù mù luí, myiqhtoi pê é laiká má ká tó é gi,

'Israellaq byu pé ê, myi xê zàn tup yoso má chung é shigu eq hkungga gi, ngo lé nhông byí é nghut akò lhuú?

⁴³ Nungmoq gi, nungmoq noq rá matú saí yu é alhò, Molak é zúm eq Rehpan hpara é kyí lé sheq, waq lhing wún ko é yanmai,

Babelon lai shoq ngò nungmoq lé lhoq lhâm pyâm rá nghut lhê.*'

ga luí, bo tó é eq rajung za, Garai Gasang gi, yhangmoq chyáng mai myoqdong lhing pyám mù, mauhkúng htoq mã é buí, kyí, lhamó pé lé noqkuq rá matú ap pyám bé nghut ri.

⁴⁴ Mosheq lé, nàng myang é azòng eq rajung za saí aq ga, Garai Gasang taí é đông saí tó é saksé zúm lé, haù yoso má nga-nhông é íchyí iwâ pé wó yù bekò nghut ri.

⁴⁵ Haù mù, nga-nhông é íchyí iwâ pé gi, yhangmoq é myoq hí mai Garai Gasang eq hkak htoq pyám byí é byù myù pé é mau má,

Yoshuq eq rahá wang nyi ló kô é hkùn, saksé zúm haù lé yu wang ló akò. Haù gi, Dawiq é pyat jé shoq joq to bê nghut ri.

⁴⁶ Dawiq kúm gi, Garai Gasâng hí má myoqdong wó sù nghut mù luí, Yakup é Garai Gasâng matú nyi jowò saí rá ahkáng dung kôlhang,

⁴⁷ Sholumon eq sheq saí bê nghut ri.

⁴⁸ Nghut kôlhang, Myhang htáng htum Sù gi, byu é loq eq za saí é yhùm má nyi é a nghut, haù hkyô eq séng luí myiqhtoi wá taí tó é gi,

⁴⁹ 'Mauhkúng gi, ngá é zùng tanghkuq, myigùng gi, ngá é hkyí nang jang nghut nyi lhê;

ngá é matú hkasú é yhùm saí byi shi kó rá lhuú? Ngò nô yù rá jang gi, hkámá nghut kó rá lhuú?

⁵⁰ Haù banshoq lé ngá é loq eq baú saí tó é a nghut kó lhuú? ga luí, haù Yhumsing taí ri.*'

gà ri.

⁵¹ I-myt htân mù, i-myt eq nohkyap má ahpyo-kuq a hpyit é bang* é, nungmoq gi, nungmoq é íchyí iwâ pé su, Chyoiyung Woi-nyí lé hkâ-nhám le lhom he-ngik pyâm nyi akò;

⁵² Nungmoq é íchyí iwâ pé eq a zing-rí wú é myiqhtoi, ó yuq wá nyi lhê lhuú? Haù Dingmán Sù pò htoq rá hkyô lé hko kyô é bang lé, yhangmoq sat pyâm é chyat nghut akò; ahkuí, nungmoq le, haù Dingmán Sù lé ap pyâm é bang eq sat pyâm é bang nghut nyi akò.

⁵³ Maumang lagyo eq shit kyo byí é tará lé nungmoq wó yù kôlhang, haù lé a cháng kó nghut ri." gà ri.

Stephan Lé Luqgok Èq Dù Sat É Hkyô

⁵⁴ Haù hkyô lé yhangmoq wó gyo kôjáng, yhangmoq é nhikhum má lùm htaù záng kô é yanmai, Stephan lé, zùi wang ngat kyáng shoq wú nhik-yô nyi akò.

⁵⁵ Stephan kúm gi, Chyoiyung Woi-nyí bying mù, mauhkúng shut tu wú kat le, Garai Gasâng é hpungwup shing kang lé le, Garai Gasâng é loqyo hkyam shut Yesuq yap tó é lé le, myang ri.

⁵⁶ Haù mù, yhang gi, "Wú keq, mauhkúng hpông tó é lé le, Garai Gasâng é loqyo hkyam shut haù Byu Yhangzo yap tó é lé le, ngò myàng ri." ga taí kat ri.

⁵⁷ Haù hkùn, yhangmoq gi, htê mó o mó garu uchyang, yhumsing é nohkyap xaù pyám mù, radá dâm yhang lé chôm htim kômù,

⁵⁸ yhang lé wá mai she htoq ló kôluí, luq-gok eq chôm ùi ló bekò nghut ri; saksé kut é

* 7:37 Tará Pun 18:15 * 7:40 Htoq Ló 32:1 * 7:43 Amo 5:25-27 * 7:50 Esai 66:1-2 * 7:51 I-myt eq nohkyap má ahpyo-kuq a hpyit é bang gà é gi, Garai dang lé a lùm a châng é bang lé gà lhê.

bang gi, Sholuq gâ é zoram é hkyí wang má yhangmoq é buhíng pé lé hkyut bum tô akô.

⁵⁹ Luqgok êq dú nyí bùm kô é u lé, Stehpan gi, "Yhumsing Yesuq ê, ngá é woi-nyí lé hap yú laq." ga kyúdüng ri.

⁶⁰ Hau htàng, yhang gi, hkyihput htuoq mù, "Yhumsing ê, yhangmoq kut é mara hau lé hkyut pyám byi laq." ga lui, htê mó êq wut düng ri; hau ban tai jáng, yhang kâng byit byuq bê nghut ri.

8

Hpúng Byú Lé Sholuq Zing-rí É Hkyô

¹ Sholuq gi, hau má nyi to mù, Stehpan lé sat pyám é muzô má myit bo huí ri.

Hau nyí mai, Yerusalem wà mó mã é no-qluq hpúng gi, zing-ri mó huí lo é nghut mù lui, lagyo pé mai lai lui, lumjáng bang lunglhang gi, Yuda mau eq Samariq mau jowô hkangmó má byo myín lô bekô.

² Nghut kôlhang, tará hkunggâ é bang gi, Stehpan lé yhum pyám é htàng má, yhang é yanmai iyon mó huí nyi akô nghut ri.

³ Sholuq kúm gi, rayhum htàng rayhúm wàng mù, myiwe yuqgê lé she hkyut htoq yú lui, htóng má lhung tô é đông mai, noqluq hpúng hau lé lhoq hpyoq lô nyi ri.

Samariq Wà Má, Gabú Danglù Hkô Kyô É Hkyô

⁴ Byo htoq lô é bang kúm gi, jé é jowô hkangmó má mungdang lé hkô kyô lô akô.

⁵ Hau hkún, Hpilip gi, Samariq mau má é myuq ra-myuq shut e lô mù, Hkrisduq é hkyô lé hkô kyô ri.

⁶ Byú ajùm ayô gi, Hpilip tai kyô é hkyô lé wô gyô é eq, yhang tún shit é limik kumlhá lé myàng kôjáng, i-myit rahkat za eq yhang é dang chòm gyô nyi bum akô.

⁷ Nat wang júng é byú myo myô pé chyáng mai, agê ashop é nat pé wut garu uchyang htoq lô byuq bum akô; gùngjum shi é bang eq hkyí htên é bang myo myo le, ge lô byuq bum akô.

⁸ Hau mù lui, hau myuq má gabú hkyô gyai yhang wô bekô nghut ri.

Myoqheq Sará Simun É Hkyô

⁹ Simun gâ é byú rayuq gi, hí lé hau myuq má myoqheq hpaqchyí kut shit mù, Samariq byu pé lé lhoq mau lui, yhang gùng lé yhang, laklai sú nghut lhê gâ ri.

¹⁰ Byú tiq ko banshoq le, "Byú shí yuq gi, 'hau a-tsam mó' gâ é, Garaí chyáng mai hpungwup a-tsam wô yú sú nghut ri." ga lui, yhang é dang lé gyô bum akô.

¹¹ Hau yuq gi, myáng myáng yhang é myoqheq hpaqchyí êq yhangmoq lé lhoq mau lo é yanmai, yhang dang lé chòm lum bum akô.

¹² Nghut kôlhang, Hpilip hko kyô é Garaí Gasâng é mingdán hkyô eq, Yesuq Hkrisduq

é myìng eq sêng é gabú danglù hkyô lé, lumjáng kôjáng, myiwe yuqgê wui-myhup hkâm yu bum akô.

¹³ Simun yhang yhang le lumjáng mù lui, wui-myhup hkâm yu mù, Hpilip htàng châng wún ri. Hpilip é kumlhá mó eq laklai kumlhá pé lé myàng jáng, yhang gi, gyai mau byuq ri.

¹⁴ Garaí Gasâng é mungdang lé Samariq byu pé, lhom hap yú bê hkyô lé, Yerusalem wà mó mã nyi é lagyo pé wô gyô bùm kôjáng, yhangmoq gi, Petruq eq Yohan nhik lé hau má nhang kat akô.

¹⁵ Yhangnhik gi, lé jé jáng, byú hau bang Chyoiyúng Woi-nyí wô yú rá matú kyúdung byí akô.

¹⁶ Hkâsu mù gâ le, Chyoiyúng Woi-nyí gi, yhangmoq chyáng ó yuq é ahtoq má lé, a gyô lô shi; Yhumsing Yesuq é myìng mai wui-myhup hkâm yu é za ru nghut bùm ashí.

¹⁷ Hau mù lui, lagyo nhik yhangmoq é ahtoq má loq ke byi jáng, yhangmoq gi, hau Chyoiyúng Woi-nyí lé wô hkâm yú bekô nghut ri.

¹⁸ Lagyo nhik é loq ke kat jáng Chyoiyúng Woi-nyí wô hkâm yu é lé, Simun myàng jáng, yhang gi, yhangnhik lé ngùn é byi wú mù,

¹⁹ "Hká yuq é ahtoq má nghut kôlhang, ngò loq ke byi jáng, hau yuq gi, Chyoiyúng Woi-nyí wô yú rá matú, hau su é a-tsam ngo lé le byi kó laq." ga dung ri.

²⁰ Petruq kúm gi, "Garaí Gasâng é chyunghuq lé ngun êq wô wui yú rá nghut lhê ga lui, myit é yanmai, náng é ngùn gi, náng eq rahá htên byoq byuq sháng gaq.

²¹ Nàng gi, Garaí Gasâng é hí má myit a dítg sú nghut é yanmai, shí hkyô má náng wô bo lhom rá a nghut.

²² Hau mù lui, shí agê ashop é hkyô mai myit lhung mù, Yhumsing Garaí chyáng dítg tóngbán aq. Hau hkún, náng é unghkau má myit pyám é hkyô lé, mara hkyut pyám byi abe.

²³ Nàng gi, ladu lai shoq nhikhko zo mù, yubak mará êq tuí zing to huí é lé, ngò myàng ri." ga yhang lé tai ri.

²⁴ Hau hkún, Simun gi, "Nungnhik tai é hkyô hai le ngá chyáng a jé sháng gaq, ngá é matú hau Yhumsing chyáng kyúdung byi kó laq." ga tú tai ri.

²⁵ Yhangnhik kúm gi, hau Yhumsing é mungdang lé saksé hkâm mù ban hko kyo jáng, Samariq byu pé é wà myo myo má, hau gabú danglù lé hkô kyo uchyang, Yerusalem wà mó shut dum tau lô bekô nghut ri.

Hpilip Eq U-nuk Nhik É Hkyô

²⁶ Ahkuí, Yhumsing é maumang lagyo gi, Hpilip lé, "Toq aq, Yerusalem wà mó mai Gaza shut lô é hkyô jé shoq, maupyí shut nyàng za e lô aq. Hkyô hau gi, yoso hkyô nghut lhê." ga tai ri.

²⁷ Haú hkûn, yhang toq mù e ló ri. Haú u lé, Ehtiopi ming lé up é hkohkâm myhí Kandake é hí má ahko ahkáng mó wó mù, yhâng é sutzè banshoq lé zûm é, Ehtiopi byù u-nuk rayuq gi, noqkuq râ ga Yerusalem wà mó má é mù,

²⁸ dum taù lo é hkûn, yhâng é myanglhêng má zùng luí, myiqhtoi Esai-aq laiká lé nghap nyi ri.

²⁹ Woi-nyí gi, Hpilip lé, "Myanglhêng shut chyâng e ló aq." ga taí ri.

³⁰ Haú mù, Hpilip gi, din é mù, myiqhtoi Esai-aq laiká nghap nyi é lé wó gyo jáng, "Nàng nghap nyi é hkyô lé sê gyo ri lúhú?" ga luí, yhang lé myí ri.

³¹ Haú yuq gi, "Mhoqshit sù yuq a nyi le, ngò hkâsu kut sê gyo râ lúhú?" ga tú taí mù, yhang eq rahá lo doq zùng aq ga Hpilip lé lung ri.

³² Yhang nghap é Chyúmdang gi, "Sat râ sau lé su, Yhang lé she e ló bê nghut ri;

sau zo gi, sau máu nyhám su é hí má zim za nyi tô é su, Yhang le nhut a hpông é za nyi tô ri.

³³ Yhânggùng lé lhoq shôm pyâm to huí é hkûn, Yhang lé a tara é đông doqđân pyâm bekò;

Yhâng é asak lé myigùng htoq mai yù pyâm bekò nghut mù luí, Yhâng é awut ashín lé ó yuq wó gôn kyo râ lúhú?"*

gâ ri.

³⁴ Haú hkûn, haú u-nuk wa gi, Hpilip lé, "Haú nghut le gi, ngo lé taí kyo laq! Myiqhtoi shí yuq gi, ó lé lhoq ang luí, taí é nghut lhê lúhú? Yhânggùng lé taí é nghut lhê lúhú? Haú a nghut jáng, góyuq é hkyô lé taí é nghut lhê lúhú?" ga myí ri.

³⁵ Haú hkûn, Hpilip gi, Chyúmdang haú lé yù mù, Yesuq eq sêng é gabú danglù lé taí kyô ri.

³⁶ Haú su e ló kô le, wui joq é má jé jáng, haú u-nuk hpó gi, "Wú aq, shí má wui joq tô ri, wui-myhup hkâm yù râ matú ngo lé hkúm râ jang haí joq ashí lúhú?" ga taí ri.

³⁷ Hpilip gi, "Náng i-myt banshoq eq, nàng lumjúng bê nghut le gi, hkâm yu le ge lhê." ga taí ri; yhang le, "Yesuq Hkrisduq gi, Garai Gasâng é Yhangzo nghut é lé, ngò lumjúng bê." ga tú taí ri.*

³⁸ Haú hkûn, yhâng é myanglhêng hkying nhâng mù, yhangnhik wui má gyó wâng luí, Hpilip gi, u-nuk hpó lé wui-myhup hkâm byí ri.

³⁹ Wui hkaù mai htoq ló kô é hkûn, haú Yhumsing é Woi-nyí gi, Hpilip lé myhik za shuí ló byuq mù, u-nuk hpó le Hpilip lé dum a myàng lo; nghut kôhang, yhang gi, e ló é hkyô shut gabú myit eq xoq sô e ló bê nghut ri.

⁴⁰ Hpilip kúm gi, Azutu wà má lo htoq jé kat mù luí, Kesare wà mó jé shoq haú mau mâ é myuq pé wà pé hkangmó má gabú danglù hkô kyô wún ri.

9

Sholuq Lhik Wang Lo É Hkyô

¹ Haú u lé, Sholuq kúm gi, Yhumsing é chángzô pé lé hkat kyuq nha râ eq sat pyâm râ ga, nhikmó-yô nyi é nghut mù luí, hkyangjong mó chyáng é mù,

² Yhumsing é Hkyô lé lumjúng é myiwe yugè myàng mi-myàng lé chyup yù luí, Yerusalem wà mó shut wó she ló râ matú, Damaskuq myuq má é tarajong pé má byi râ laiká pé lé dúng chùng ri.

³ Yhang e ló le, Damaskuq myuq eq chyáng ló nyi é hkûn, yhâng é lhinghkyuq má mauhkúng mai dân loq tung duqbo htoq ló ri.

⁴ Yhang myigùng má lêng ngop tô é u lé, "Sholuq, Sholuq, nàng ngo lé haí mù zing-rí nyi lhê lúhú?" ga luí, yhang lé taí é htê wó gyô ri.

⁵ Haú hkûn, yhang gi, "Yhumsing é, nàng gi, ó yuq nghut lhê lúhú?" ga myi jáng, haú Yhumsing gi, "Nàng zing-rí nyi é Yesuq nghut lhê,

⁶ toq aq, myuq shut wang ló aq. Nàng zui saí râ hkyô lé lhôm taí kyo râ nghut lhê." ga tú taí ri.

⁷ Yhang eq rahá e ló é luzúm wui gi, htê haú wó gyo kôhang, ó yuq lé le a myàng kô é yanmai, maù hong yap tô bum akò.

⁸ Sholuq toq mù, myoq hpông kat wú le, haí lé le a myàng dut byuq mù luí, yhang-moq gi, yhang lé loq mai shê mù Damaskuq myuq shut shuí wang ló akò.

⁹ Sholuq gi, sum nyí tup myoqjit byuq mù luí, a zo a shuq é nyi byuq ri.

¹⁰ Damaskuq myuq má Anani gâ é chángzo rayuq nyi ri. Yhumsing gi, yhang lé, "Anani é." ga shing-rân đông wut ri.

Yhang gi, "Yhumsing é, shí má nyi lhê." ga tú taí ri.

¹¹ Haú Yhumsing dum taí é gi, "Toq aq, Hkyô-Nyàng gâ é wà hkyô shut é mù, Yudaq é yhùm má, Tarshu byù Sholuq lé é hô aq, yhang gi, kyúđung nyi ri.

¹² Yhang gi, Anani ga sù wang lé lô mù, yhâng é myoq dum myàng sháng gaq ga, yhâng é ahtoq má loq ke byí é lé, shing-rân đông myàng bê nghut ri." gâ ri.

¹³ Anani kúm gi, "Yhumsing é, shí yuq gi, Yerusalem wà mó má, nàng é sán-yúng bang lé a ge é đông hkâ-myhó kut lai lo é hkyanglù lé ngò myo myo wó gyô wú bê;

¹⁴ Shí pé má le, nàng é mying lé lêng é bang banshoq lé chyup râ ga, hkyangjong agyi pé

* 8:33 Esai 53:7-8

* 8:37 Bun zo 37 shí lé Chyúmlaiká ra-am má gi, bo lhê; ra-am má gi, a bô.

chyang mâ é ahkáng wó yu to sù nghut ri." ga tũ tai ri.

¹⁵ Nghut kôlhang, Yhumsing gi, "Ru é aq, shí yuq gi, tungbau pé eq yhangmoq é hkohkam pé é hí má le, Israelaq byu pé é hí má le, ngá é mying lé wùn waq rá matú, ngò chùng rá ngù luí hkyin to sù nghut lhê;

¹⁶ Ngá mying é yanmai hkâ-í hpuzo ra hkyô lé, Ngò, yhang lé tũn shit rá nghut lhê." ga tai ri.

¹⁷ Hau htang, Anani gi, jé é mù, yhùm hau má wàng luí, Sholuq é ahtoq má loq kê to mù, "Gumang Sholuq é, náng myoq dum wó myàng mù, Chyoiyung Woi-nyi bying shang gaq ga, nàng lé lo é hkyô má, nàng lé htoq shit é Yhumsing Yesuq eq ngo lé nhang kat é nghut lhê." ga tai ri.

¹⁸ Hau hkũn jang, Sholuq é myoq mai akyap sù é wui gyô byuq mù, yhang myoq dum wó myàng bê. Hau hkũn, yhang gi, toq mù wui-myhup hkâm yù luí,

¹⁹ zoshuq lé zo mù, wum-o dum lhoq pying yù bê nghut ri.

Sholuq, Damaskuq Myuq Má Mungdang Hko É Hkyô

Hau htang, yhang gi, Damaskuq myuq mâ é chángzô pé eq rahá rayoq zo zùm yap nyi uchyang,

²⁰ Yesuq gi, Garai Gasang é Yhangzo nghut é hkyô, hau hkũn jang tarajong pé má hko kyô nyi bê nghut ri.

²¹ Sholuq é dang lé wó gyô é lhunglhang bang gi, mau byuq bùm kômù, "Shí yuq gi, Yerusalem wá mó má mying hau llang é bang lé lhoq hten lhoq hpyoq sù nghut lhê, a nghut kó lhú? Ahkuí, shí má le, hau sù é bang lé chyup yù mù, hkyangjong agyi pé chyang ló ap rá da luí jé lé é sù a nghut kó lhú?" ga myi bum akô.

²² Sholuq kúm gi, a-tsam je bo lò mù, Damaskuq myuq má nyi é Yudaq byu pé lé tai hpyi kyo luí, Yesuq gi, Hkrisduq yhang nghut nyi é hkyô lé saksé tũn shit ri.

²³ Buinyi tsómra myang é htang má, Yudaq byu pé gi, yhang lé sat pyám rá matú haq dá akô.

²⁴ Nghut kôlhang, yhangmoq dá é hkyô lé Sholuq sé pyám ri. Yhangmoq gi, yhang lé wó sat pyám shoq ga, nyi lé myin lé myuq hkum pé má lhom nyi akô.

²⁵ Sholuq é chángzô pé kúm gi, myin má yhang lé shuí yù mù, manghkoq má lúng nhang luí, wá kyám xewâm mai lhoq nyhum hkyô kat akô nghut ri.

Sholuq, Yerusalem Wá Mó Má Tau Jé Lo É Hkyô

²⁶ Hau htang, yhang gi, Yerusalem wá mó má jé lo é hkũn, chángzô pé eq zùm yap rá matú shikut wú kôlhang, yhang gi,

chángzo dut bê hkyô lé a jing kô é yanmai, lhunglhang bang gi, yhang lé gyuq bum akô.

²⁷ Barnaba kúm gi, Sholuq lé lagyo pé chyang shuí lò mù, Sholuq, hkyô má Yesuq eq hkásu kut huí é hkyô lé le, Yesuq eq yhang lé tai é dang wó gyô é hkyô lé le, Damaskuq myuq má Yesuq é mying mai gyuq myit a bo é za hkásu kut hko kyô é hkyô lé le, yhangmoq lé tai kyô ri.

²⁸ Hau mù, Sholuq gi, yhangmoq eq rahá Yerusalem wá mó má htoq htoq wàng wàng kut nyi uchyang, Yhumsing é mying mai a gyuq a kyum é za hko kyô nyi ri.

²⁹ Grik dang nyo é Yudaq byu pé eq le, tai he lhùm nyi akô; nghut kôlhang, yhangmoq gi, yhang lé sat pyám rá dà akô.

³⁰ Hau hkyô lé, gumang wui sé kôjang, yhang lé Kesare wá mó má jé shoq dé mù, Tarshu myuq shut nhang kat akô nghut ri.

³¹ Yuda mau, Galile mau eq Samariq mau jowò hkangmó má é noqkuq hpung gi, hau yoq pé má, lhoq ging lhoq ting é hkyô wó yù mù, nguingón nyi akô; hau Yhumsing lé gyuq hkunggá é hkyô má le, Chyoiyung Woi-nyi eq lhoq pun lhoq kying é hkyô pé má le châng nyi mù, myò jat lo bùm bekò nghut ri.

Ainea Ge Byuq É Hkyô

³² Hau hkũn, Petruq gi, hau mau pé má hkat kúm wùn uchyang, Ludaq wá mó má nyi é sãn-yung bang chyang é jé ri.

³³ Hau wá má, gungjum shí luí shit zân tup yhupjang mai a wó toq é Ainea gá é byù rayuq lé é myang ri.

³⁴ Hau mù, Petruq gi, "Ainea ê, Yesuq Hkrisduq, nang lé lhoq gè byi bê nghut ri, toq mù, náng é yhuppu hen yù aq." ga luí, yhang lé tai ri. Hau hkũn jang, Ainea wó toq yap bê nghut ri.

³⁵ Ludaq eq Sharon pá má nyi é lhunglhang bang gi, hau yuq lé myàng mù luí, Yhumsing Yesuq chyang lhing wang lo bum akô.

Dorka Ga Sù Dum Dui Lo É Hkyô

³⁶ Ahkuí, Yopa myuq má Tabihta gá é chángzo myiwe rayuq nyi ri; mying hau lé Grik dang dong gi, Dorka* gá é nghut lhê. Myiwe hau gi, ge é muzò kut nyi é sù eq, asho awuí bang lé alu byi nyi é sù nghut ri.

³⁷ Hau u lé, yhang gi, nõhpyo huí mù shi lò bê nghut ri. Yhang mang lé gi, chi mù luí ahtoq gok má jang tó akô.

³⁸ Ludaq wá mó gi, Yopa myuq eq chyang é yanmai, hau myuq má Petruq nyi é lé chángzô pé wó gyô kôjang, yhangmoq gi, byù í yuq lé nhang kat mù, "Ngamoq chyang myap lé lò aq." ga jì nhang kat akô.

³⁹ Hau hkũn, Petruq gi, toq mù, hau nhik htang châng é ló ri. Yhang jé jang, ahtoq pyám gok má shuí hâng yu akô. Chuimó

* 9:36 Dorka gá é lichyúm gi, "chochì" gá é nghut lhê.

myhî pé lhunghâng bang gi, yhang nàm má yap mù ngaú ulyang, yhangmoq eq rahá nyi tô ashî hkûn Dorka hkyup é bûhng eq gotû mebu pé lé tûn shit nyi akô.

⁴⁰ Petruq kúm gi, lhunghâng bang lé htoq ló nhâng mù, hkyihput htuq luí, kyûdung mù, mâng shut lhing wú luí, "Tabihta é, toq aq!" ga tai ri, haú hkûn myiwe haú myoq hpông lô mù, Petruq lé myàng jâng, toq zung lo ri.

⁴¹ Petruq gi, loq lhâm kat mù yhang lé lêng toq yù luí, lumjîng bang eq chuimó myhî pé lé wut yù mù, ðui gû ap byi ri.

⁴² Haú hkyô lé, Yopa myuq má é bang banshoq wó gyô lô kômù luí, byù myo myo gi, haú Yhumsîng Yesuq lé lumjîng bum akô nghut ri.

⁴³ Haú mù, Petruq gi, shokuq loqmú sai é Simun ga sù eq rahá, Yopa myuq má rayoq zo nyi nyi ri.

10

Koneli É Shîng-rán

¹ Ahkuí, Kesare wà mó má gyezo rashô up é Koneli gâ é gyezau rayuq nyi ri. Yhang gi, Itali gyedap má é nghut lhê.

² Yhang gi, tarâ hkungga myit bò luí, yhâng é yhumbyù banshoq bang eq rahá Garai Gasang lé gyuq hkunggâ nyi lhê eq, myûng bang lé alu myo myo byi ulyang, Garai Gasang lé hkâ-nhâm le kyûdung nyi ri.

³ Ra-nyí lé, myinhâng sum hkyîng kô má, Garai Gasang é maumang lagyo rayuq gi, yhâng chyáng jé mù, "Koneli é." ga luí, yhang lé wut é lé, shîng-rán mai de de myang ri.

⁴ Haú mù, haú yuq lé wú tsuq to mù, "Yhumsîng é, hai hkyô nghut lhê thú?" ga gyuq myit eq myí ri.

⁵ Maumang kúm gi, "Náng é kyûdung dang eq alu byí é hkyô gi, Garai Gasang é hí má, hkungga masat ðông hkyâng bê nghut ri.

⁵ Ahkuí, Yopa myuq shut byù nhang kat mù, Petruq gâ é sù Simun lé é shui lò nhâng aq.

⁶ Yhang gi, wuimau yàm má é, shokuq hkyup zô é Simun yhûm má bíng nyi ri." ga tai ri.

⁷ Koneli gi, yhang eq dang tai é maumang lagyo lô byuq jâng, ðui-nhâng zoshâng í yuq eq, yhâng chyáng hkâ-nhâm le châng nyi bang má é, tarâ hkunggâ é gyezo rayuq lé ji yù mù,

⁸ dut lai lo é hkyô banshoq, yhangmoq lé tai kyo luí, Yopa myuq shut nhang kat ri.

Petruq É Shîng-rán

⁹ Htang nyi nyí-káng u lé, yhangmoq, Yopa myuq jé lô yàm má, Petruq gi, kyûdung râ ga, yhumhkûng shut doq lô ri.

* 10:14 Nhong 11 lé wú aq.

¹⁰ Haú hkûn, yhang gi, zòmut luí rajung jung zô nau nyi ri; nghut kôlhng, zoshuq ru gai nyi ashî le, yhang moq byuq lô mù myoqwup shîng-rán myang é gi,

¹¹ mauhkûng bóng lô mù, hpajóng mó sù é lé, myi chyên má zui luí myigùng shut lhoq hkyô kat é azîng lé myang ri.

¹² Haú hkaú má, myigùng htoq má é hkyi myi hkyi ðap é jung dusak ahú hú eq ðô yé é jung ahú hú, mau má dang é nghoq ahú hú, lûng tô ri.

¹³ "Petruq é, toq mù, sat zo aq." gâ é danghtê le mying htoq lo ri.

¹⁴ Petruq kúm gi, "Yhumsîng é, haú gi, a wó dut, achaq achyut é eq a sansêng é zè lé, ngò hkâ-nhâm le a zô wú." ga tû tai ri.*

¹⁵ Haú hkûn, "Garai Gasang lhoq san lhoq séng bê zè lé, a sansêng hkâ-nghû." ga luí, yhang lé dum tai kat ri.

¹⁶ Haú su ga sum ðâm tai é htâng má, zè haú lé radá ðâm mauhkûng shut wup yu lô bê nghut ri.

¹⁷ Ahkuí, Petruq gi, yhang myang é shîng-rán lé hai wá nghut lhê thú ga luí, myit mau nyi é hkûn, haú Koneli nhang kat é bang gi, Simun é yhûm lé myang hô kômù, hkumtot má yap to luí,

¹⁸ Petruq gâ é sù Simun, yhûm haú má nyi a nyi é lé, wut myi wú akô.

¹⁹ Petruq gi, shîng-rán haú lé ru myit wú nyi ashî le, Woi-nyí gi, "Wú aq, byù sum yuq nang lé ho nyi akô, toq mù gyô lô aq;

²⁰ yhangmoq gi, ngò nhang kat é bang nghut é yanmai, myit hai a ùng-âng é za, yhangmoq eq rahá bo lô aq." ga tai ri.

²¹ Haú mù, Petruq gi, haú bâng chyáng gyô lô luí, "Nungmoq hô nyi é sù gi, ngò nghut lhê, hai ra lui lé kô é thú?" ga myi ri.

²² Yhangmoq tai é gi, "Dingmán é, Garai Gasang lé gyuq hkunggâ é, Yudaq amyú lhunghâng bâng é hí má myoqdong wó é, shô up gyezau Koneli gi, nang lé yhâng é yhûm má ji hâng yù mù, nàng tai é dang gyo yù rà matú, yhang lé chyoiyung maumang lagyo eq tai shit kyô é hkyô lé wó yù luí, ngamoq lé nhang kat é nghut lhê." ga akô.

²³ Haú mù luí, Petruq gi, yhangmoq lé wut hâng yù mù, bíng nhang ri. Hau htang nyi, yhang gi, toq mù, yhangmoq eq rahá bo lô ri; Yopa myuq má é gumang wui ra-am le châng akô nghut ri.

Koneli Lé Petruq Hui É Hkyô

²⁴ Hau htang nyi, yhangmoq gi, Kesare wà mó shut wang lô akô. Koneli gi, yhâng é gumang wui eq buinùm ji-myi wui lé ji tsing to mù, yhangmoq lé láng nyi ri.

²⁵ Petruq wang lô jâng, Koneli gi, te yù mù, yhâng é hkyi wang má pai gop noquq ri.

²⁶ Petruq kúm gi, "Toq aq, ngò le byù ru nghut lhê." ga luí, taí uchyang yhang lé tu toq ri.

²⁷ Haù mù, Petruq gi, yhang eq dang nyò uchyang wang ló wú le, byù myo myo zup zing tó bum é lé myang ri.

²⁸ Haù hkún, yhang gi, yhangmoq lé, "Yudaq byù rayuq gi, noqkuq htùng dông tũngbaù rayuq eq a wó zùm yap é, htoq htoq wàng wàng a wó kut é hkyò lé, nungmoq sé lugù nghut akò. Nghut kólhang, ó yuq lé le achag achyut dut ri, a sanséng dut ri nghù a ge taí é hkyò lé gi, Garai Gasang, ngo lé tũn shit bê.

²⁹ Hau é yanmai, nungmoq ngo lé ji kat é hkún, ngò a he pyâm é za châng lé lo é nghut lhê. Haù mù luí, haí ra kò é yanmai, ngo lé ji akò nghù ngò myí nau ri." ga taí ri.

³⁰ Haù hkún, Koneli gi, "Lai lò bê myi nyí nyí, myinhàng sum hkying má, ngá é yhùm má, ngò kyùdũng nyi le, danso loq, duqbó é mebu wut é byù rayuq ngá é hí má yap htoq shit mù,

³¹ 'Koneli ê, Garai Gasang gi, náng é kyùdung danghtê lé le gyo byi bê; nàng alu byí é hkyò lé le, bun byi bê nghut ri.

³² Hau é yanmai, Yopa myuq shut byù nhang kat mù, Petruq gá é Simun lé ji nhâng aq. Haù yuq gi, wuimau yàm má é shokuq hkyup zò é Simun yhùm má bing nyi ri." ga taí ri.

³³ Haù mù luí, haù hkún jáng ngò náng chyáng byù nhang kat bê nghut lhê. Ahkuí, náng jé é gi, gyaí gè bê nghut ri. Yhumsing yhang nang lé tai nhang é gù banshoq gyò yù rà matú, ahkuí ngamoq lhunglhang bang Garai Gasang é hí má nghut nyi lhê." ga taí ri.

Petruq Hko Kyò É Mungdang

³⁴ Haù hkún, Petruq dang-hi hpông é gi, "Garai Gasang, myoqdong a hkyin é hkyò lé, ahkuí ngò gè gè yhang sé bê.

³⁵ Byù myù chângiup má, Yhang lé gyuq hkunggá é eq tengmán é muzó jizó saí é sũ gi, Yhang é hí má myoqdong wó nyi ri.

³⁶ Nyi mi-nyí, joq mijoq é Yhumsing, Yesuq Hkrisduq é yanmai, nguigón hkyò eq sèng é gabú danglù lé hko kyo sháng gaq ga, Israelaq byu pé chyáng Garai Gasang hun kat é mungdang eq rajung za,

³⁷ bapisma hkyò lé, Yohan hko é htàng, Galile mau mai Yuda mau banshoq má taí pyo ló é hkyò lé, nungmoq sé gù nghut nyi lhê.

³⁸ Haù gi, Garai Gasang eq Chyoiyúng Woi-nyí eq wum-o a-tsam byí to bê sũ, Nazaret wa byù Yesuq é hkyò nghut nyi ri. Garai Gasang yhang eq rahá nghut nyi é yanmai, yhang gi, ge é muzó lé kut wún é eq, nat eq zing-ri huí é bang banshoq lé lhoq gè byí wún ri.

³⁹ Haù mù, Yudaq byu pé é ming má le, Yerusalem wà mó má le, yhang zui saí bê muzó banshoq é saksé pé gi, ngamoq nghut nyi lhê. Haù yuq lé yhang, yhangmoq sik zing má jén sat pyâm bekò nghut ri.

⁴⁰ Garai Gasang kúm gi, sum nyi nghù rà buinyi má, haù yuq lé lhoq dui toq kat é nghut mù luí, byù banshoq é hí má a nghut e za, saksé kut rà matú Garai Gasang hkyin to gù nghut é bang ngamoq é hí má za htoq shit bê nghut ri.

⁴¹ Yhang shi é mai dum dui toq ló é htàng má, ngamoq yhang, Yhang eq rahá razo rashuq wó kut yu é nghut lhê.

⁴² Yhang gi, asak dui é bang eq shi bê bâng é tará agyi kut rà matú, Garai Gasang eq Yhang lé hkyin tó é sũ nghut é hkyò lé, byu pé lé hko kyo rà eq, saksé hkám rà matú, ngamoq lé hkunmó hkyò to bê nghut ri.

⁴³ 'Yhang lé lumjing é bang yuq hkangmó gi, Yhâng é mying é yanmai, yubak hkyut pyám byí é hui kó rà nghut lhê.' ga luí, taí é myiqhtoi banshoq gi, Yhâng é hkyò lé saksé hkám byí é bang nghut nyi akò." ga taí ri.

Chyoiyúng Woi-nyí Lé, Tũngbaù Pé Wó Hap Yu É Hkyò

⁴⁴ Petruq gi, haù hkyò lé ru taí nyi ashí le, dang haù wó gyò é banshoq bâng ahtoq má Chyoiyúng Woi-nyí gyó jé lo ri.

⁴⁵ Tũngbaù pé é htoq má lhâng Chyoiyúng Woi-nyí gá é chyunghuq lé hut hkyò kat é yanmai, Petruq eq rahá lé é, ahpyo-kuq hpyit bê é lumjing bang Yudaq byu pé gi, maú bum akò.

⁴⁶ Hkásu mù gá le, yhangmoq gi, laklai dang nyo é lé le, Garai Gasang lé hkyo-on kò é lé le, wó gyò bum kò é yanmai nghut ri.

⁴⁷ Haù mù, Petruq gi, "Ngamoq su Chyoiyúng Woi-nyí hkám yù bê bang lé, bapisma a byi nhâng rà gi, wui lé ó yuq wó hkúm to rá lú?" ga taí ri.

⁴⁸ Hau htàng, yhang gi, yhangmoq lé Yesuq Hkrisduq é mying lang luí wui-myhup hkám yù rà matú pying tò ri. Haù hkún, yhangmoq gi, Petruq lé buinyi ra-í nyí, nyi gyó shi aq ga chòm hkúm akò.

11

Petruq, Yhang Kut É Muzó Lé Shit Kyò É Hkyò

¹ Tũngbaù pé le, Garai Gasang é mungdang lhom yù bê gá é hkyò lé, lagyo pé eq Yuda mau pé má é gumang wui wó gyò akò.

² Haù mù, Petruq, Yerusalem wà mó má doq ló é hkún, ahpyo-kuq hpyit hkyò lé myit zuq é lumjing bang gi,

³ "Nàng gi, ahpyo-kuq a hpyit é bâng é yhùm má wàng mù, yhangmoq eq razo rashuq kut ri." ga luí, yhang lé mara lhom taí hun bum akò.

⁴ Haú hkún, Petruq gi, haú dut lò bê hkyô lé awang mai ahpyo hpyot, yhangmoq lé tai sân kyô hi kat é má,

⁵ "Ngò gi, Yopa myuq má kyûdùng nyi le, moq byuq lô mù shing-rán myang é gi, mauhkùng mai hpajóng mô sù é myi chyún shut zui lui, ngá shut lhoq hkyô kat é zè gyô jé lo é lé, myang ri.

⁶ Haú lé rago za sai wú le, myigùng htoq má hkyi myi hkyi dap é jung dusak, yosò zè, dô yê é jung eq, maulat nghoqzò pé bo tô é lé, ngò myàng lui, myit wú nyi é hkún,

⁷ 'Petruq ê, toq mù, sat zo aq.' gâ é danghtê lé, ngò wó gyô ri.

⁸ Ngò kúm gi, 'Yhumsing ê, haú gi, a wó dut, achag achyt é eq a sansêng é zè, ngá é nhut má hkâ-nhám le a wang wú.' nghù tai kat é nghut lhê.

⁹ Haú hkún, 'Garai Gasang lhoq san lhoq yúng bê zè lé, a sansêng hkâ-nghù.' ga lui, mauhkùng mai dum tai kat ri.

¹⁰ Haú su ga sum dâm tai é htàng má, haú pé banshoq lé mauhkùng shut dum wup yu lò bê nghut ri.

¹¹ Haú hkún jáng, Kesare wà mó mai, ngá chyáng nhang kat é byù sum yuq gi, ngò nyi é yhùm hkumtot má jé nyi tô akò.

¹² Chyoiyúng Woi-nyí gi, ngo lé myit a úng-âng é za, yhangmoq htàng châng é aq ga tai ri; shí gumang hkyuq yuq le ngò eq rahá é mù, Koneli é yhùm má ngamoq wang é.

¹³ Haú hkún, haú yuq gi, yhâng é yhùm má maumang lagyo lé htoq shit é hkún, yhang hkâsu myang é hkyô lé le; maumang lagyo èq yhang lé, 'Yopa myuq shut byù nhang kat mù, Petruq gâ é sù Simun lé é jì nhâng aq;

¹⁴ nàng eq náng yhumbyù lunglhang bang hkyi yù hui rá danglù, yhang, náng chyáng wun lé lô byi rá nghut lhê.' ga tai é hkyô lé le, ngamoq lé tai kyô ri.

¹⁵ Ngò dang tai hi lô nyi é u lé, Chyoiyúng Woi-nyí gi, sâng-hi lé ngamoq é ahtoq má gyô lé é su, yhangmoq ahtoq má le gyô lé bê nghut ri.

¹⁶ Haú hkún sheq, ngò gi, 'Yohan gi, wui èq wui-myhup hkám byi ri; nungmoq kúm gi, Chyoiyúng Woi-nyí èq wui-myhup hkám byi é hui kó rá nghut lhê.' ga lui, Yhumsing tai é dang lé bün kat ri.

¹⁷ Haú mù lui, Yhumsing Yesuq Hkrisduq lé lumjing é hkún, ngamoq lé Garai Gasâng jeju chyunghuq byi é su, Yhang, yhangmoq lé le byi é nghut le gi, ngò gi, hkasù é byù nghut lui, Garai Gasang lé wó lhom hkúm pyám rá lú?" ga tai ri.

¹⁸ Yhangmoq gi, haú hkyô lé wó gyô kôjáng, tai jang a joq lo kômù, "Ó! Nghut bê, Garai Gasang gi, tungbaù pé lé le, asak duì rá matú myit lhing hkyô byi bu-nhung!" ga lui, Garai Gasang lé chóm hkya-ôn akò nghut ri.

Antioku Wà Mã É Noqkuq Hpúng

¹⁹ Ahkuí, Stehpan lé sat pyám kô é htàng má, zing-ri hui kô é yanmai, byo myín lò é bang gi, Hpinisi mau, Kupru zinlóng eq Antioku wà mó jé shoq byo lò kômù, Yudaq byu pé lé baú za, mungdang haú hko kyô akò nghut ri.

²⁰ Nghut kôlhâng, yhangmoq má é Kupru byù eq Kuruni byù ra-am gi, Antioku wà mó má châng jé lò kômù, Yhumsing Yesuq é gabú danglù lé, Grik pé lé le tai kyô bum akò.

²¹ Haú Yhumsing é loq gi, yhangmoq eq rahá nghut nyi mù lui, byù myo myo gi, lumjing mù, Yhumsing chyáng lhing wang lo büm bekò nghut ri.

²² Haú bâng é hkyô lé, Yerusalem noqkuq hpúng é no má hkyang jé lò é nghut mù lui, yhangmoq gi, Barnaba lé Antioku wà mó jé shoq nhang kat akò.

²³ Yhang jé é hkún, Garai Gasâng jeju bo nyi é lé myàng jáng, yhang gi, gabú lui, yhangmoq é myit nhikhlum banshoq èq haú Yhumsing má lhumzui nyi rá matú, lunglhang bang lé myit wum byi ri.

²⁴ Hkâsu mù gâ le, Barnaba gi, byù gè nghut mù, Chyoiyúng Woi-nyí le, lumjing myit le bying tô é sù nghut nyi ri. Haú mù, byù myo myo gi, haú Yhumsing chyáng jat wang lo büm bekò nghut ri.

²⁵ Hau htàng, Barnaba gi, Sholuq lé é hô rá ga Tarshu myuq shut é mù, yhang lé myàng jáng, Antioku wà mó má shui lo ri.

²⁶ Haú mù, yhangnhik gi, razàn gón no-qquq hpúng haú eq rahá zum nyi kô é nghut mù lui, byù myo myo lé wó mhoqshit akò. Chàngzò pé gi, Hkristan gâ é mying lé, Antioku wà mó má sâng-hi wó yù bekò nghut ri.

²⁷ Haú u lé, myiqhtoí pé ra-am gi, Yerusalem wà mó mai, Antioku wà mó má lé jé bum akò.

²⁸ Haú bang má é Agabu gâ é sù gi, toq yap mù, Romaq mingkan títng má mutmó gyô lô rá nghut é hkyô lé, Woi-nyí èq tün shit é dòng tai kyô ri; (Haú gi, hkohkâm Klodi é pyat má dut bê nghut lhê.)

²⁹ Haú mù lui, chángzò pé gi, Yuda mau má é gumang wui lé, ó le ó wó dut é myhó garum kat rá ga, myit hpyit yu bum akò.

³⁰ Haú eq rajung za kut kômù, yhangmoq gi, chyunghuq haú pé lé Barnaba eq Sholuq nhik é loq mai suwún wui pé chyáng hun kat bekò nghut ri.

12

Petruq, Htóng Mai Wó Lut Htoq Lo É Hkyô

¹ Haú u lé, Herut hkohkâm gi, hpúng byù ra-am lé chyup yù mù, zing-ri rá ga ngantsá nyi ri.

² Haú mù, Yohan é yhangmang Yakuq lé sham èq sat pyám nhang ri.

³ Haú hkyô lé Yudaq byu pé wú gabú é lé myàng jáng, yhang gi, Petruq lé le, jàng chyup yu ri. Haú dut é gi, mún a kat é muk zo poi u lé nghut ri.

⁴ Herut gi, Lhoqlhai Poi lai jáng sheq, mingbyù wui hí má jéyáng rá ga myit tó é yanmai, yhang lé chyup yu é htâng má, htóng má lhùng to mù, yhang lé zúng rá matú, gye myi yuq yuq kut myi hpúng lé ap tó ri.

⁵ Haú mù, Petruq gi, htóng má lúng tó ri; hpúng byù wui kúm gi, yhang é matú Garai Gasâng chyáng kyú gyai chòm dung byi nyi akò nghut ri.

⁶ Petruq gi, Herut eq yhang lé jéyáng rá matú she htoq yù rá hí myin lé, shamtoq-tui í hkat eq tui é hui lui, gyezo í yuq é gyoro má yhup myhi tó ri; zúng é bang le htóng hkum má zúng nyi bum akò.

⁷ Haú hkùn, Yhumsing é maumang lagyo rayuq lé htoq shit mù, gok haú má duqbó lo ri. Maumang lagyo haú gi, Petruq é namcham má é hpuk kat mù, "Myap toq wú aq." ga nhaù ri; haú hkùn, Petruq é loq má é toqjàng tui pé le gyut gyó ló bê nghut ri.

⁸ Maumang dum tai é gi, "Hpyihit hit mù, hkyi-tsung tsung aq." gá ri; Petruq lé tai é eq rajung za kut ri. "Náng é bumó wut mù ngá htâng cháng aq." ga yhang lé maumang lagyo dum tai ri.

⁹ Haú hkùn, yhang gi, htóng mai yhang htâng cháng htoq ló ri; nghut kôhlang, maumang lagyo kut é muzó haú gi, gè gè nghut é lé, yhang a sé mù, shing-rán myang é nghut ri ga myit yu ri.

¹⁰ Ahkuí, yhangnhik gi, zúng tó é jowò í wô lai mù, wá má htoq é shamtoq hkum má jé jáng, hkum haú le yhang baú bóng ló mù, yhangnhik htoq lui, wá hkyô rahkat má sô ló le, maumang lagyo gi, haú hkùn jáng, yhang chyáng mai gâng ló byuq bê nghut ri.

¹¹ Ahkuí, Petruq gi, dum bân gyíng lò jáng, "Yhumsing gi, Yhâng é maumang lagyo lé nhang kat mù, Herut é loq eq Yudaq byu pé myit myoqbyù tó é hkyô banshoq mai, ngo lé hkyi yù bê nghut é lé, ahkuí ngò gè gè sé bê." ga tai ri.

¹² Haú hkyô lé myit sê kat jáng, yhang gi, byù myo myo zing mù, kyúdüng nyi é jowò, Markuq gá é Yohan é yhangnu Mariq é yhúm má jé ló ri.

¹³ Haú mù, yhang gi, yhúm wàng hkum lé ló bat é hkùn, Roda gá é dui-nhâng zoshâng myiwe zo rayuq gi, gyô wú rá ga htoq lé lo ri.

¹⁴ Yhang gi, Petruq é htê nghut é lé sê gyó kat jáng, lùm gabú lui hkum a hpóng byi shí é za, yhúmhkaù shut din wang ló mù, "Petruq gi, hkum mhó lut má lo yap tó ri." ga ló tai kyô ri.

¹⁵ Yhangmoq kúm gi, "Nàng na bê nghut ri." ga yhang lé tai akò. Yhang gi, gè gè nghut ri ga ru tai nyi ri. Dum, yhangmoq gi, "Yhâng é maumang lagyo nghut àng ri." ga tai akò.

¹⁶ Nghut kôhlang, Petruq gi, hkum ru bat nyi mù, yhangmoq hpông kat é hkùn, yhang lé myàng kôjáng, chòm maú byuq bum akò.

¹⁷ Yhang gi, yhangmoq lé zim za nyi keq ga loq lik shit mù, yhang lé Yhumsing eq htóng mai hkásu kut shuí htoq yu é hkyô lé tai kyo lui, "Shí hkyô lé Yakuq eq gumang wui lé tai kyô kat keq." ga tai ri. Hau htâng, yhang htoq ló lui, jowò gó shut é ló bê nghut ri.

¹⁸ Ahkuí, maubó jáng, gyezo pé gi, Petruq haí dut byuq é hkyô lé a sé kô é yanmai, gyai maú gabyông bum akò.

¹⁹ Herut kúm gi, Petruq lé ho wú le a myàng jáng, zúng é bang lé myi gôn wú mù, yhangmoq lé sat pyám rá matú hkunmó hkyô ri.

Herut Hkohlâm Shi Byuq É Hkyô

Hau htâng, yhang gi, Yuda mau mai Kesare wá mó má gyó ló mù ló nyi nyi ri.

²⁰ Haú gyoro má, Herut hkohlâm gi, Turuq eq Sidun byu pé lé gyai nhik-yô nyi ri. Haú mù lui, yhangmoq gi, myit rahkat zâ eq yhâng chyáng é mù, Blastu gá é, hkohlâm wa lum tó é suwún hpó lé é lùm hkaù mù, simsaq hkyô é düng akò. Hkásu mù gá le, yhangmoq é zoshuq wó rá matú gi, Herut é ming lé lùm hkaù nyi kô é yanmai nghut ri.

²¹ Haú hkùn, ding lùm tó é buinyi má, Herut gi, hkohlâm hking wut chùng mù, hkohlâm tanghkuq má zùng lui, yhangmoq lé hkohlâm mungdang byi ri.

²² Haú jáng, mingbyù wui gi, "Htê shí gi, waxâng byu é htê a nghut, garai wá é htê sheq nghut ri." ga garù bum akò.

²³ Radá dâm, Herut gi, Garai Gasâng é hpungwup shing kang lé a tê byi é yanmai, Yhumsing é maumang lagyo gi, yhang lé dâm byi lui, yhang gi, luq eq hkê é hui mù, shi byuq bê nghut ri.

²⁴ Haú Garai Gasâng é mungdang gi, sé é bang myô jat ló mù, je riyhang byo myin ló bê nghut ri.

²⁵ Barnaba eq Sholuq nhik gi, Yerusalem wá mó má yhangnhik sai tùm nyi é muzó ban sai jáng, Markuq gá é Yohan lé shuí chùng mù, Antioku wá mó shut taù ló bekó nghut ri.

13

Barnaba Eq Sholuq, Hkyin Nhang Kat Hui É Hkyô

¹ Ahkuí, Antioku wá mó má é noqkuq hpúng má, myightoi pé eq sará pé le lom nyi akò. Haú bang gi, Barnaba, Niger* gá é

* 13:1 Grik dong Niger gá é gi, byù noq gá é nghut lhê.

Simeon, Kuruni byù Luki, (Herut zau hpó eq zum kò lò sù) Manaen eq Sholuq pé nghut akò.

² Yhangmoq gi, zoshuq gám luí Yhumsing lé noqkuq dojaú nyi é hkùn, Chyoiyúng Woi-nyí gi, "Ngá é mù wùn waq rà matú ji tò é Barnaba eq Sholuq nhik lé, hkyin to keq." ga tai ri.

³ Haú mù luí, yhangmoq gi, zoshuq gám luí kyúdung mù, yhangnhik ahtoq má loq ke byi kò é htàng, yhangnhik lé nhang htoq kat akò nghut ri.

Kupru Zinlóng Má Dut É Hkyô

⁴ Haú mù, yhangnhik gi, Chyoiyúng Woi-nyí eq nhang kat é eq rajung za, Seluki wà shut gyó lò mù, haú mà é lhai ji luí, Kupru zinlóng má jé lò luí,

⁵ Salami wà mó má nyi nyi é hkùn, Yudaq byu pé é tarajong pé má, Garai Gasang é mungdang hko kyô akò. Markuq gá é Yohan le yhangnhik lé htuqluq htuqbang kut nyi ri.

⁶ Yhangmoq gi, haú zinlóng mai lai byit e ló mù Pahpu wà mó jé lò kò é hkùn, myiqhtoi pyoq nghut sù Bara-Yesuq gá é Yudaq byu myoqheq sará rayuq eq htàng hui akò.

⁷ Haú yuq gi, Sergi Poluq gá é, myit hpaqchýi kúng é ginwáng zau hpó é byù rayuq nghut lhè. Minggyi hpó haú gi, Garai Gasang é mungdang gyô yù nau mù, Barnaba eq Sholuq nhik lé ji yu ri.

⁸ Haú hkùn, myoqheq sará gá é lichyúm dông myhng é Eluma le gá é Bara-Yesuq kúm gi, ginwáng zau hpó lé haú lumjing hkyô má a jau lò nhang nau é nghut mù luí, yhangnhik lé lhom he tang pyám ri.

⁹ Haú hkùn, Poluq le gá é Sholuq gi, Chyoiyúng Woi-nyí bying mù, yhang lé wú tsuq to luí,

¹⁰ "Myit goí é hkyô eq hpuq lò lhik é hkyô banshoq bying tò é, nat é yangzo nghut sù, tengmán hkyô hkangmó é gyè hpó é, Yhumsing é tengmán hkyô lé a lhoq hpyoq é a wó nyí lhu?

¹¹ Ahkuí, wú aq, Yhumsing é loq gi, náng chyáng jé mù, náng gi, rayoq zo builoq a wó myang é za, myoqjit byuq rà nghut lhè." ga tai ri.

Haú hkùn jáng, yhang é myoq gi, myhi-myhà ga luí mauchut tuq dut lò byuq ri; haú mù, yhang lé shè rà byù ho sop lhng wún ri.

¹² Haú hkyô lé ginwáng zau hpó myàng jáng, Yhumsing eq sêng é mhooqshit é hkyô lé wú maú luí lumjing bè nghut ri.

Antioku Wà Mó Má Dut É Hkyô

¹³ Hau htàng, Poluq eq yhang luzúm wui gi, Pahpu wà mó mai lhai ji mù, Pamhpuli mau mà é Perga wà má jé lò akò. Markuq gá é Yohan kúm gi, yhangmoq eq gang luí, Yerusalem wà mó shut tau lú byuq bè nghut ri.

¹⁴ Dum, yhangmoq gi, Perga mai toq e ló le, Pesidi ginwáng mà é Antioku wà mó má jé lò akò. Bánno buinyi má, yhangmoq gi, tarajong má wang zung tò akò.

¹⁵ Haú hkùn, Mosheq é tarà laiká eq myiqhtoi laiká pé lé ban nghap jáng, tarajong má up bang gi, "Gumang wui é, mingbyù wui lé myit wum byi dang joq kò é nghut le gi, ahkuí tai lo keq." ga luí, yhangmoq chyáng tai nhang kat ri.

¹⁶ Haú hkùn, Poluq gi, toq yap mù, zím byuq kó sháng gaq ga loq tú luí, "Israelaq byu pé eq Garai Gasang lé gyuq hkunggá é byu pé é, chòm gyô yù keq.

¹⁷ Israelaq byu pé é Garai Gasang gi, ngamoq é ichyi iké pé lé hkyin yù bè nghut mù luí, Egutuq ming má byùbing dut nyi to ashí hkùn, yhangmoq lé kò myhàng nhâng mù, hpungwup a-tsam bo é loq eq haú mau mai shuí htoq lò ri.

¹⁸ Dum, myi xè zàn kò, yoso pé má yhangmoq é a-kyang lé ján pyám byi mù,

¹⁹ Hkanan ming mà é byuhú nyhit luí lé lhoq htên pyám luí, haú bâng é mingdán mà é silí wunli yhangmoq lé gám byi ri. Haú gi, myi shò ngo xè zàn kò myáng ri.

²⁰ Hau htàng má, Garai Gasang gi, myiqhtoi Samuelaq é pyat jé shoq tarà agyí pé lé to byi ri.

²¹ Hau htàng má, yhangmoq mai hkohkám dung kòmù, Garai Gasang gi, yhangmoq lé, Ben-yamyin amyù mà é, Kisha é yhangzo Sholuq lé byi luí, yhang gi, myi xè zàn up bè nghut ri.

²² Hau htàng, Sholuq lé lhoq hkyô pyám mù, Dawiq lé, yhangmoq é hkohkám kut nhang ri. Dawiq é hkyô lé Yhang saksé hkám é gi, 'Ngò nhik dik é Yese é yangzo Dawiq lé myàng bè; yhang gi, ngò kut nhang é hkyô banshoq lé kut rà nghut lhè.' gá ri.

²³ Garai Gasang gi, Yhàng é danggidiq joq é eq rajung za, Israelaq byu pé é matú, haú yuq é awut ashín mai, hkyi yù Sù Yesuq lé, pò htoq nhâng bè nghut ri.

²⁴ Yesuq a jé lé shimá, Yohan gi, Israelaq byu pé banshoq lé myit lhng hkyô eq sêng é baptisma hkyô lé hko kyo bè nghut ri.

²⁵ Dum Yohan gi, yhang zuí é muzó ban ló é u lé, 'Ngò lé ó nghut é su ngâm tò akò lhu? Ngò gi, haú yuq a nghut, wú keq, ngá é htàng má rayuq jé rà nghut lhè, haú yuq é hkyi-tsung tuí hpyí rà háng ngò a gíng.' ga tai ri.

²⁶ Abraham é yangzo yhangshù pé eq Garai Gasang lé gyuq hkunggá é tungbau, gumang wui é, shí hkyi yù hkyô mungdang lé, nga-nhùng chyáng byi kat bè nghut ri.

²⁷ Yerusalem wà mó mà é bang eq, yhangmoq é zau suwún wui gi, Yhang hkyi yù sù nghut é lé le, Bánno buinyi hkangmó nghap é myiqhtoi pé é dang lé le, a sê gyo kò é yanmai, Yesuq lé sat rà doqdán é hkùn,

myiqhtoî pé é dang lé lhoq dik pyám bekô nghut ri.

²⁸ Yhâng chyáng shî gíng é mara a myàng kôlhang, Yhang lé sat pyám nhâng rá matú, Pilat chyáng dúng akô.

²⁹ Yhangmoq gi, yhang eq séng lui, kâ to má kâ to ban lhoq dik kôjáng, Yhang lé tapzîng mai yu hkyó mù, lup má kat tô akô nghut ri.

³⁰ Garai Gasang kúm gi, Yhang lé shi é mai lhoq dui toq yû bê nghut lhê.

³¹ Yhang gi, Galile mau mai Yerusalem wâ mó jé shoq, hí lé Yhâng htâng châng é bâng chyáng buinyi tsómra myáng shoq htoq shit shit kut ri. Háu bang gi, ahkuí, nga-nhúng Israelaq byu pé é hí má, Yhâng é saksé dut bekô nghut ri.

³² Háu mù, í dam lhê é Hkya-on Kungtôn Laiká má,

'Nàng gi, Ngá Zo nghut ri. Hkû-nyí, Ngò gi, Náng Wa dut bê nghut lhê.[✧]

ga lui, kâ tô é eq rajung za,

³³ Garai Gasang gi, íchyí iwâ pé lé byi tô é danggididí lé, Yesuq lé lhoq dui toq byí é dông, yhangmoq é yhangzo yhangshu ngamoq é matú, lhoq dik byí é gabú danglù lé, nungmoq chyáng ngamoq wun lé byi bê.

³⁴ Háu htoq agó, Yhang htên byoq é hkâ-nhám a hui shoq, shi é mai lhoq dui toq yû rá hkyô eq séng lui, Garai Gasang tai é gi,

'Dawiq lé byí tô é danggididí eq rajung za, chyoiyúng é eq lumgíng é jeju lé, ngò nungmoq lé byi rá nghut lhê.[✧]

gâ ri.

³⁵ Hkya-on Kungtôn Laiká gó wô má le, 'Náng é Chyoiyúng Sû lé, Nàng htên byoq nhâng nau rá a nghut.[✧]

ga tai tô ri.

³⁶ Ahkuí, Dawiq gi, yhâng é pyat banshoq má Garai Gasang ô nau é dông ban wùn waq jáng, shi byuq lui, íchyí iwâ pé eq rahá myhup pyám hui mù, htên byoq byuq é hui bê nghut ri.

³⁷ Garai Gasang lhoq dui toq yu é sù kúm gi, htên byoq hui é a nghut.

³⁸ Háu nghut é yanmai, gumang wui é, háu yuq mai yubak wó hkyut pyám byí é hkyô lé, nungmoq lé hko kyô nyí é nghut é le, sé nyí keq.

³⁹ Háu htoq agó, Mosheq é tarâ eq mara hkyut san byí é a hui kôlhang, háu yuq lé lumjíng é bang gi, hkyô lhumjup má mara hkyut san byí é hui rá nghut lhê.

⁴⁰ Háu é yanmai, 'Wú keq, jihpoi é bang ê, máu mù lui htum byuq keq;

nungmoq é buinyi pé má ngò rajung jung kut htoq rá nghut lhê;

⁴¹ háu hkyô lé, rayuq yuq, nungmoq lé hkai kyo kôlhang, jíng kó rá a nghut.[✧]

ga lui, myiqhtoî pé tai é dang, nungmoq má a ang sháng gaq, sidiq nyi keq." ga hko kyô nyi ri.

⁴² Ahkuí, Poluq eq Barnaba nhik tarajong mai htoq ló le, htâng lhê é Bánno buinyi má le, háu pé lé dum hkai kyo rá matú yhangmoq chôm dúng akô.

⁴³ Chôm byo htoq ló kô é hkûn, Yudaq byu pé eq Yudaq noqkuq htúng má lhing wang lo é tarâ hkunggá é byu myo myo gi, yhangnhik é htâng má châng bùm kô é nghut mù lui, Garai Gasang jeju má gíng nyi rá matú, yhangnhik gi, yhangmoq lé lhoq pun lhoq kyíng akô nghut ri.

Túngbau Pé Chyáng Lhing Lo É Hkyô

⁴⁴ Háu htang lhê é Bánno buinyi má, Garai Gasang é mungdang gyô yû rá matú, rawa bang aluq shoí banshoq, lé zup zîng to bum akô.

⁴⁵ Yudaq byu pé kúm gi, byu moq mó háu lé myàng jáng, manon myit baú byíng bùm kômù lui, Poluq tai é dang lé tai htíng é eq nhíng pyám akô.

⁴⁶ Poluq eq Barnaba le gyuq myit a bo é dông tai é gi, "Garai Gasang é mungdang lé, nungmoq lé hí tai kyo rá dut é yanmai, ngá-nhik tai bê nghut lhê. Nghut kôlhang, nungmoq gi, háu lé lhom he-ngik pyám kômù, ahtum abyuq é asak eq gíngdán é dông yhumsing gúng lé a myit yû kô é yanmai, wú keq, ahkuí, ngá-nhik gi, túngbau pé shut lhing ló berá nghut lhê.

⁴⁷ Hkâsu mù gâ le, háu Yhumsing gi, 'Hkyi yû hkyô lé maumyí htum shoq wó chúng jé rá matú, Ngò, nàng lé túngbau pé é maubó dut nhâng bê.[✧]

ga lui, ngamoq lé hkunmó hkyô kat bê." gâ ri.

⁴⁸ Túngbau pé gi, dang háu lé wó gyo kôjáng, gabú é eq Yhumsing é mungdang lé hkya-on kungtôn nyi bum akô. Ahtum abyuq é asak lé wó rá matú hkyin to hui é lhunglhang bang le, lumjíng bum akô nghut ri.

⁴⁹ Yhumsing é mungdang gi, háu ming gón jam lò bê nghut ri.

⁵⁰ Yudaq byu pé kúm gi, Poluq eq Barnaba nhik lé zing-ri rá matú, aróng wó é myiwe wui má é tarâ hkungga bang eq, háu wâ má é suwún wui lé, nhik lhoq yo kôlui, yhangnhik lé maukyo mai chôm hkak htoq pyám akô.

⁵¹ Yhangnhik gi, yhangmoq lé a nau é hkyô tún shit é dông, yhumsing é hkyí má é hpuilhaú lé yhangmoq chyáng ko hkyô pyám to kômù, Ikoni wâ mó shut ló byuq bekô nghut ri.

15 Chángzô pé kúm gi, gabú é htoq agó, Chyoiyúng Woi-nyí byíng nyi bum akó nghut ri.

14

Poluq Eq Barnaba Nhik, Ikoni Wà Mó Má Ló Jé É Hkún Lhê Hkyô

¹ Ahkuí, Ikoni wà mó má nghut nyi é hkún, Poluq eq Barnaba nhik gi, Yudaq byu pé é tarajong má rahá wàng mù, Yudaq byu eq tûngbaù pé ajùm ayò lumjìng bùm kó shoq, wum kat hko kyô akó.

² Nghut kôlhang, a lumjìng é Yudaq byu pé gi, lumjìng é gumang wui lé a ngui rà dông tûngbaù pé lé mhoq hpyoq yù mù, shuí gumlaù akó.

³ Haù mù luí, yhangnhik gi, tsómra myang shoq haù má nyi mù, haù Yhumsing é matú gyuq myit a bo é za hko kyô akó; Yhang Yhumsing le yhangnhik é loq mai limik kumlhá eq mauhpo muzó dut nhang é dông, Yhâng é jeju mungdang lé saksé hkám byi nyi ri.

⁴ Haù wà má é bang kúm gi, myit byo ló bùm kô é nghut mù luí, Yudaq byu pé chyáng ra-am, lagyô pé chyáng ra-am, lom byuq ló akó.

⁵ Ahkuí, tûngbaù pé le, Yudaq byu eq yhangmoq é uphkàng bang le, yhangnhik lé rhoi mù luqgok èq dù sat rà ga htím lo bum akó.

⁶ Nghut kôlhang, yhangnhik gi, haù hkyô lé bún sê kat kôjáng, Lukaoni ginwáng má é Lustra eq Derbe wà mó eq, hau é awui ayám wà tiq wà zo pé shut hpang é ló akó.

⁷ Haù pé má le, gabú danglù xoq hko kyô wún akó nghut ri.

Lustra Wà Mó Má Ló Jé É Hkún Lhê Hkyô

⁸ Ahkuí, Lustra wà mó má, ínu unghkaù mai hkyí hten mù luí, hká-nhám le hkyô a wó sô wú é sù rayuq zung tò ri.

⁹ Yhang le Poluq tái é dang lé gyô nyi ri. Poluq gi, haù yuq lé wú tsuq kat é hkún, wó lhoq gé byi hui rà nghut lhê gá é lumjìng myit yhâng chyáng bo tò é lé, myàng byi ri.

¹⁰ Haù mù, Poluq gi, "Toq yap aq!" ga luí, htê mó èq yhang lé tái kat jáng, yhang gi, byam toq kat mù, wó sô bê nghut ri.

¹¹ Haù mù, Poluq kut é muzó lé shiwa byu pé myàng kôjáng, yhangmoq gi, Lukaoni dang dông, "Nat hparà pé gi, byù gùng dông kut luí ngamoq chyáng gyó ló bekô nghut ri." ga luí, wut garu bum akó.

¹² Hau htâng, Poluq gi, dang myô tái sú nghut é yanmai, yhang lé Herme ga, Barnaba lé gi, Zeu ga myhíng byi akó.

¹³ Haù wà yàm má é Zeu hparà noqkuq yhùm hkyangjong hpó gi, wà hkum má nohtó pé eq ban hkông pé yu lé mù, shiwa byu pé eq rahá yhangnhik lé hkungga nhông byi rà hen akó.

¹⁴ Nghut kôlhang, lagyo nhik Barnaba eq Poluq gi, haù lé wó gyo kôjáng, yhumsing é mebu lâng cheq pyám kôluí, shiwa hpông gung gùng shut din wang é kômù, garú tái kô é gi,

¹⁵ "Hkaù pé ê, haí mù haù su kut lo akó lhú? Nga-nhik le nungmoq eq rajung za, xângzo byù za nghut lhê, akyú a bo é hkyô shí pé lé tò pyám to mù, mauhkúng eq myigùng, wuìshuq lung-aù eq haù pé má nyi mi-nyí, joq mijoj lé hpan to sù, rú dui nyi é Garai Gasâng chyáng lhing wang lò kó sháng gaq ngù luí sheq, nungmoq lé gabú danglù hko kyô é nghut lhê.

¹⁶ Garai Gasang gi, byù myù chângjup lé hí hpyang lhê é pyat bán má ó le ó kám é dông kut nhâng bê nghut ri.

¹⁷ Nghut kôlhang, Yhang gi, mauhkúng mai mau wò nhâng luí, kyôshi zui nhang é ahkyíng yam-yoq byi mù, nungmoq lé zoshuq agùn agó byi é eq, nungmoq lé i-myt ngón nhang nyi é dông, Yhang ge é hkyô lé tûn shit mù, Yhang nyi é hkyô lé saksé hkám nyi ri." ga akó.

¹⁸ Haù su ga tái kô le lhang, yhangnhik lé shiwa byu pé mai hkungga nhông byi rà hkyô lé, yhangnhik gi, gyaí wuihke luí sheq wó hkúm pyám akó nghut ri.

¹⁹ Hau htâng, Antioku wà mó eq Ikoni wà mó pé má é Yudaq byu pé ra-am lé jé kômù, shiwa byu pé lé shuí-u luí, Poluq lé luqgok èq chòm dù kômù, yhang lé shi byuq bê su ngàm kô é yanmai, wà shinggan shut shê hkyut htoq pyám akó.

²⁰ Nghut kôlhang, Poluq gi, yhâng é lhingkyuq má chángzô pé yap tò kô é hkún, toq mù wà shut tau wang ló ri. Hau htang nyí, yhang gi, Barnaba eq rahá Derbe wà mó shut e ló bekô nghut ri.

Antioku Wà Mó Má Tau Jé Ló É Hkyô

²¹ Haù wà má yhangnhik èq gabú danglù hkô kyo kô é yanmai, byi myo myo gi, chángzô pé dut lo akó. Hau htâng, yhangnhik gi, Lustra, Ikoni, Antioku wà mó hkyô dum tau ló kômù,

²² chángzô pé lé myit lhoq ging byi uchyang, haù lumjìng hkyô má ru gíng nyi rà matú myit wum byi akó. "Nga-nhúng gi, Garai Gasâng é mingdán má wàng rà matú, wuihke jamjau myo myo hui ra rà nghut lhê." ga le, mhoqshit akó.

²³ Yhangnhik gi, noqkuq hpúng hkangmó má, hpúng suwún kut rà bang lé hkyin yù mù, zoshuq gám luí kyúdung mù, yhangmoq lumjìng nyi é Yhumsing Garai chyáng ap byi tò akó.

²⁴ Hau htâng, yhangnhik gi, Pesidi ginwáng mai lai byit ló mù, Pamhpuli ginwáng má jé ló akó nghut ri.

25 Haú ginwáng mâ é Perga wà mó má mungdang hko kyo luí, Atali wà mó shut laí gyô lô akò nghut ri.

26 Haú mai, lhai ji mù, ahkuí yhangnhik wùn waq laí lô bê muzò é matú, Garai Gasàng jeju má ap luí yhangnhik lé nhang kat é Antiokwa wà mó má dum jé lò bekò nghut ri.

27 Jé lo é hkùn, yhangnhik gi, hpúng byú wui lé wut tsing yù mù, yhangnhik dōng mai Garai Gasang kut é hkyô banshoq lé le, tūngbaù pé lé haú lumjing hkyô hkum hpóng byí é hkyô lé le, shit kyô akò.

28 Haú mù, yhangnhik gi, haú wà má chángzô pé eq tsómra myang shoq nyi nyi akò nghut ri.

15

Ahpyo-kuq Hpyit Hkyô Eq Sêng É Manghkáng

1 Ahkuí, Yuda mau mâ é byù ra-am gi, Antiokwa wà mó má lé jé mù, gumang wui lé, "Nungmoq gi, Mosheq é htūngtará eq rajung za, ahpyo-kuq a hpyit é nghut jáng, hkyi yu é hui rá a nghut." ga luí, mhoqshit bum akò.

2 Hau é yanmai, myit a hui lhum é hkyô htoq lô mù, Poluq eq Barnaba nhik gi, haú bang eq gyai yhang myíng myô lhum akò; haú mù luí, gumang wui gi, Yerusalem wà mó má nyi é lagyô pé eq suwún wui chyáng, haú hkyô lé lô hpyé lhum rá matú, Poluq, Barnaba nhik eq rahá, yhangmoq chyáng mâ é ra-am lé, nhang kat rá ga hkyin tô akò.

3 Haú mù, hpúng byú wui yhangmoq lé dé kat kôjáng, yhangmoq gi, Hpinisi mau eq Samariq mau gyoro mai só laí lô uchyang, tūngbaù pé lhing wang lò bê hkyô lé tai kyô akò. Haú mâ é gumang wui lé gyai yhang gabú nhang akò nghut ri.

4 Yhangmoq, Yerusalem wà mó má jé kô é hkùn, hpúng byú wui, lagyô pé eq suwún wui gi, yhangmoq lé lhom hkulum yù kô é nghut mù luí, yhangmoq gi, yhangmoq dōng mai Garai Gasang kut é hkyô lunglhang lé, haú bang lé shit kyô akò.

5 Haú hkùn, Hparishe hpúng mâ é lumjing bang ra-am gi, toq mù luí, "Tūngbaù pé lé, ahpyo-kuq hpyit nhâng rá eq, Mosheq é tará dōng cháng nhâng rá gi, ra yhang rá lhê." ga tai bum akò nghut ri.

Yerusalem Wà Mó Má Kut É Byin Tú Wap Hpong

6 Ahkuí, lagyô pé eq hpúng suwún wui gi, shí hkyô lé chōm myit wú rá ga, zup tô bum akò.

7 Shí hkyô lé gyai yhang dang rhâng lhum bùm kô é htāng má, Petruq gi, toq mù luí, "Gumang wui é, Garai Gasang gi, ngá nhut mai tai é, haú gabú danglù lé, tūngbaù pé

gyô yù mù lumjing kô sháng gaq ga, hí hkùn nungmoq chyáng mai ngo lé hkyin yù bê hkyô lé, nungmoq sé lugu nghut bê.

8 Haú mù, myit nhikhlum lé sé byi sù Garai Gasang gi, nga-nhúng lé byí é eq rajung za, yhangmoq lé le Chyoiyung Woi-nyí byí é dōng, yhangmoq lé hap yù bê hkyô lé saksé tūn shit bê nghut ri.

9 Garai Gasang gi, yhangmoq lumjing luí, yhangmoq é myit nhikhlum lé lhoq san lhoq yung byi bê nghut é yanmai, nga-nhúng eq yhangmoq é gyoro má gamhkuí é hkyô a joq nhang lo nghut ri.

10 Haú nghut le gi, íchyí iwà pé èq le, nga-nhúng èq le a ung é wólai lé, haú chángzô pé é lingzing má ke byí é dōng mai, hai mù, ahkuí Garai Gasang lé chyam wú nyi akò lhu?

11 Nghut kôlhang, ngamoq gi, yhangmoq eq rajung za, Yhumsing Yesuq é jeju mai za hkyi yu é hui é hkyô lé lumjing é bang nghut lhê." ga luí, yhangmoq lé tai ri.

12 Haú hkùn, zup ming tô é bang lunglhang gi, zim za kut luí, Barnaba eq Poluq nhik mai, tūngbaù pé chyáng, Garai Gasang eq yhangnhik é loq dōng limik kumlhá pé eq mauho muzò pé kut shit é hkyô, tai kyô nyi é lé chōm gyô nyi akò.

13 Yhangnhik dang ban tai kôjáng, Yakuq gi, "Gumang wui é, ngá dang lé gyô wú keq.

14 Garai Gasang gi, tūngbaù pé chyáng mai Yhâng mying é matú byù ra-myú hkyin yù rá ga, yhangmoq lé sâng-hi mai hkásu kut lé kum nyi é hkyô lé, Simun tai kyo bê nghut ri.

15-16 Shí hkyô gi,

'Hau é htāng má gi, ngò dum taù lò mù luí, lēng gyop byuq bê Dawiq é yhūm* lé dum sai rá nghut lhê.

Haú byoq htēn tô é pé lé sai sai mù, haú lé dum lhoq toq rá nghut lhê.

17 Haú hkùn sheq, ngá myíng mai ji yu é tūngbaù pé eq, myit gyo tô é byù lunglhang bang gi, Yhumsing Garai lé hô kó rá nghut lhê ga,

18 a-nham mau htoq xāng hkun mai, shí hkyô pé lé sé nhang é Yhumsing Garai tai ri. ✧

ga myiqhtoí pé kâ tô é dang eq rajung za nghut ri.

19 Haú mù luí, ngò tai nau é gi, tūngbaù pé chyáng mai Garai Gasang shut lhing lo é bang lé, gotú hai le a lhoq wui é za,

20 hpará lhô pé lé kyáng byí é a sansēng é zoshuq pé lé le, ashop é dōng gungsho zūm yap é hkyô lé le, lingzing mai myhik sat é dusak sho lé le, sui lé zô é hkyô lé le, koi pyám rá matú za, yhangmoq lé, nga-nhúng laiká mai wó shit kat lhê.

21 Hkásu mù gá le, gó hkùn mai yhang, Mosheq é tará lé wà hkangmó má hko kyô

* 15:15-16 Dawiq é yhūm gá é gi, Dawiq eq yhāng é awut ashin pé up é hkyô lé gá é nghut lhê. ✧ 15:18 Amo 9:11-12

ló kômù, Bánno buinyi hkangmó tarajong pé má nghap kyo kyo kut bùm kô é nghut lhê." ga tai ri.

Lumjǐng É Tungbaù Pê Chyáng Hun Kat É Laiká

²² Haù hkûn, lagyo pé, suwún wui eq, hpúng byù wui lhunglhâng bang gi, Poluq, Barnaba nhik eq rahá Antioku và mó shut nhang kat rà byù lé, yhangmoq chyáng mai hkyin yù rà matú chôm myit hpyit akô. Haù eq rajung za, yhangmoq gi, gumang wui chyáng mã é nhik bô suwún nhik Barsabaq gâ é Yudaq eq Sila lé hkyin yu akô nghut ri.

²³ Yhangnhik é loq má, hun kat kô é laiká gi,

"Antioku và mó, Suriq mau eq Kiliki mau pé má nyi é, tungbaù gumang wui é, nungmoq é gumang wui nghut é, ngamoq lagyo pé eq suwún wui gi, nguingón dang shit kyô kat lhê.

²⁴ Ngamoq nhang kat é le a nghut bang ra-am gi, ngamoq chyáng mai htoq lô mù, nungmoq lé dâng éq lhoq byok pyám luí, nungmoq é myit lé lhoq nhúng byí nyi é hkyô lé, ngamoq wó gyo bê.

²⁵ Haù mù, ngamoq lhunglhâng bang gi, byù ra-am lé hkyin yù mù,

²⁶ nga-nhúng é Yhumsing Yesuq Hkrisduq é matú, yhumsing asak lé lháng a há é nga-nhúng chyitdap é Barnaba, Poluq nhik eq rahá, nungmoq chyáng nhang kat rà matú chôm myit hui bê.

²⁷ Haù mù luí, ngamoq gi, Yudaq eq Sila lé nhang kat lhê; yhangnhik gi, laiká mã bo é eq rajung za, yhangnhik é nhut mai yhang tai kyo kô rà nghut lhê.

²⁸ Nungmoq é matú gi, hparà ló pé lé tǐng byí é zoshuq eq sui, lingzing mai myhik sat é dusak sho eq ashop é đông gungsho zùm yap é hkyô pé lé, koi pyám rà hkyô mai lai luí, gotù wòwùn hùn rà hkyô a joq nghù luí, Chyoiyúng Woi-nyí le, ngamoq le, myit hui to bê.

²⁹ Nungmoq haù pé lé koi pyám nyi kôjáng gi, gè rà nghut lhê.

Nguingón wángzán nyí kó sháng gaq ô!" ga ká tô ri.

³⁰ Yhangmoq lé nhang kat kôjáng, yhangmoq gi, Antioku và mó mã gyo jé lô kômù, hpúng byù wui lé ji tsing to kôluí, haù hùn kat é laiká lé ap byí akô nghut ri.

³¹ Hpúng byù wui gi, laiká haù lé ban nghap kôjáng, wum-o byí é danglù hau é yanmai, gabù nyi bum akô.

³² Yudaq eq Sila gi, myiqhtoi nhik le nghut kômù luí, gumang wui lé mungdang myo myô éq lhoq pun lhoq kying kômù, wum-o lhoq gǐng to byí akô.

³³ Rayoq zo haù mã nyi nyi kô é htàng mã, gumang wui gi, yhangmoq lé nhang kat é bâng chyáng, ngui ngui ngón ngón dum tau ló nhâng bekô nghut ri.

³⁴ (Sila kúm gi, yhang ô nau é đông nyi gyo tô ri.)†

³⁵ Poluq eq Barnaba kúm gi, Antioku và mó mã nyi gyo to kômù, Yhumsing Yesuq é mungdang lé, góbang myo myo eq, mhoq kyo hko kyô akô nghut ri.

Poluq Eq Barnaba Nhik Gâng Lhum É Hkyô

³⁶ Hau htàng, buinyi tsómra myáng jáng, Poluq gi, Barnaba lé, "Yhumsing é mungdang hko kyô lai lo wú bê, và hkyap hkangmó mã é gumang wui chyáng tau lò luí, yhangmoq hkâsu dut nyi é hkyô lé, lô dum kùm wú lo goq." ga tai ri.

³⁷ Barnaba gi, Markuq gâ é Yohan lé le shuí chùng nau ri.

³⁸ Nghut kôlhàng, Poluq gi, haù yuq lé a kâm shuí chùng nau nghut ri; hkâsu mù gâ le, yhang gi, Pamhpuli mau mã yhangnhik lé tô pyám to mù, yhangnhik eq rahá muzó a kâm xoq zui nau é sù nghut é yanmai nghut ri.

³⁹ Hau é yanmai, yhangnhik gi, gyai yhang tai shai lhum kômù, rayuq eq rayuq gâng lhum bekô nghut ri. Barnaba gi, Markuq lé shuí chùng luí, lai ji mù Kupru zinlóng shut e lô byuq bê nghut ri.

⁴⁰ Poluq kúm gi, Sila lé hkyin yù mù, gumang wui éq yhang lé Yhumsing Garaí é jeju mã ap kat kô é htàng mã, yhangnhik gi, htoq e lô byuq bekô.

⁴¹ Haù mù, Poluq gi, Suriq mau eq Kiliki mau mai sô lai lô uchyang, haù mã é noqkuq hpúng pé lé wum-o lhoq gǐng byí wún bê nghut ri.

16

Poluq Eq Sila Nhik Chyáng Timohti Châng É Hkyô

¹ Poluq gi, Derbe và mó mã jé é htàng, Lustra và mó mã dum jé ri. Haù và mã, Timohti gâ é chángzo rayuq nyi ri. Yhâng nu gi, Yesuq lé lumjǐng é Yudaq myiwe myhi nghut ri; yhâng wa kúm gi, Grik amyú nghut ri.

² Timohti gi, Lustra và mó eq Ikoni và mó mã nyi é gumang wui éq hkya-ôn é hui sù nghut ri.

³ Poluq gi, hkyowui mã yhang lé shuí chùng nau mù luí, ahpyo-kuq hpyit byí ri. Hkâsu mù gâ le, yhâng wa gi, Grik nghut é hkyô lé haù mã é Yudaq byu pé lhunglhâng bang sé kômù, haù bang lé myit tē byí é yanmai nghut ri.

† 15:34 Bun zo shí lhum gi, Grik Chyúmlaiká myo myo mã a bô nghut lhê.

⁴ Haù mù, yhangmoq gi, rawa htàng rawá mai lai ló uchyang, Yerusalem wà mó má é lagyo pé eq hpúng suwún wui, chòm myit hpyit tó é hkyô lé, cháng kó sháng gaq ga, yhangmoq lé tai kyô akò.

⁵ Haù mù lui, hpúng byù wui gi, lumjìng hkyô má wum-o bo lò kòmù, ra-nyí èq ra-nyí byù du myò jat lo nyi ri.

Makedoni Byù Rayuq Lé, Poluq Shìng-rán Myang É Hkyô

⁶ Ahkuí, yhangmoq gi, Asia mau má mungdang é hko kyo rà hkyô lé Chyoiyúng Woi-nyí èq yhangmoq lé hkùm pyâm é yan-mai, Hprugi mau eq Galatiq mau đông số lai lò mù,

⁷ Musi mau kyo má jé lò kôjáng, Bihtuni mau shut wang ló rà dá akò; nghut kôlhang, Yesuq é Woi-nyí gi, yhangmoq lé ahkáng a byí nghut ri.

⁸ Haù mù, yhangmoq gi, Musi mau mai số lai lò lui, Troa myuq má gyó jé lò akò.

⁹ Haù má, myín lé, Poluq gi, Makedoni byù rayuq lé yap to mù, "Makedoni mau shut dap lé lui, ngamoq lé le garúm yú laq." ga lui, yhang lé dung wut nyi é shìng-rán myang ri.

¹⁰ Shìng-rán haù lé Poluq myang é eq, Makedoni byu pé lé gabú danglù hko kyo rà matú, ngamoq lé Garai Gasang wut yù bê nghut ri nghù myit yù lui, haù hkùn yhang, ngamoq gi, Makedoni mau shut dap é rà matú rì rì kut lò bê nghut lhê.

Ludia Gà É Myiwe Myhí Hpúng Byù Dut Lo É Hkyô

¹¹ Haù mù lui, ngamoq gi, Troa myuq mai Samohtake zinlóng ang ang shut hai ji é mù lui, htang nyi gi, Neapoli wà má jé bê nghut lhê.

¹² Haù mai lai jáng, Makedoni mau má, Romaq byu pé xuq tó é, haù ginwáng má é ahkyak wà mó nghut é, Hpilipi myuq má ngamoq lé mù, haù má rayoq zo nyi nyi é nghut lhê.

¹³ Bánno buinyi jé jáng, ngamoq gi, kyúdung jowò joq nhò ngam mù, wà hkum shìnggan má é, wuìlàng yàm shut htoq é lui, haù má zìng to lánng é myiwe wui lé, zung gyó mù nyo hi é nghut lhê.

¹⁴ Haù dang gyo nyi é bang má, Garai Gasang lé noqkuq é, Htuatira myuq byù, pán nê ung zo sù Ludia gà é myiwe myhí rayuq bo ri; Yhumsìng Garai gi, Poluq tai kyô é hkyô lé rago gyó yù sháng gaq ga, yhang lé myit hkum hpóng byi ri.

¹⁵ Yhang gi, yhang eq yhang yhumbyù wui wui-myhup ban hkâm yù kôjáng, "Nungmoq gi, ngo lé haù Yhumsìng Yesuq má lumjìng bê sù nghut é đông, myit yù byi kô é nghut jáng, ngá yhùm má lé bing keq." ga lui, ngamoq lé zuq zuq ji yu ri.

Poluq Eq Sila Nhik Htóng Lúng É Hkyô

¹⁶ Ra-nyí lé, ngamoq gi, haù kyúdung é jowò shut e ló nyi le, nat wang júng lui gumhpân hpan é jùnmyhí rayuq ngamoq lé lhom lui ri. Haù yuq gi, gumhpân hpan é đông yhang yhumsìng wui lé ngunzè gyai yhang hò byi é sù nghut lhê.

¹⁷ Myiwe haù gi, Poluq eq ngamoq htàng má châng to mù, "Shí bang gi, nungmoq lé hkyi yù hkyô tai kyô wún é, Myhang Htàng é Garai Gasang é dui-nhàng zoshàng wui nghut bum akò ô!" ga wut garú ri.

¹⁸ Buinyi myo myo haù su chyat châng garú wún é yanmai, Poluq gi, gyai yhang myit hpêbu byuq wù, lình wú kat lui, nat haù lé, "Yesuq Hkrisduq é myìng lang lui ngò nang lé hkunmó hkyô kat lhê, yhang chyáng mai htoq ló byuq aq." ga lui, nat haù lé, nhik-yô kat ri. Haù hkùn jáng, nat haù gi, yhang chyáng mai htoq ló byuq bê nghut ri.

¹⁹ Ahkuí, myiwe hau é yhumsìng wui gi, ngunzè myàng zo rà myoqbyù jowò a joq lo é hkyô lé sé kôjáng, Poluq eq Sila nhik lé chyup yù mù, gài má é suwún wui chyáng she hkyut e akò.

²⁰ Dum, yhangmoq gi, yhangnhik lé tará agyi pé chyáng shuí é mù, "Shí nhik gi, Yu-daq byù nghut mù lui, ngamoq Romaq byu pé mai a ge châng é htungking lé mhoqshit byi nyi é đông,

²¹ nga-nhùng é myuq lé gunjàng nyi akò nghut ri." ga tai akò.

²² Haù mù lui, shiwa byu pé gi, yhangnhik lé chòm htím akò. Tará agyi pé gi, yhangnhik é mebu lé lánng hkyut pyám lui, wumchùm hkat èq bat rà matú, hkunmó hkyô kat akò.

²³ Yhangmoq gi, yhangnhik lé gyai yhang nhuq bat yu é htàng, htong má lhung kat mù, rago za wú zúng rà matú htóng suwún lé hkunmó hkyô tó akò.

²⁴ Htóng suwún hpó gi, haù sù é hkunmó lé wó jáng, yhangnhik lé hkyi kyum hut lui, htóng má é, je ahtè gok má lhung tó ri.

Htóng Suwún Hpó Hkyi Yù Huí É Hkyô

²⁵ Nghut kôlhang, gunggàm yoq lé, Poluq eq Sila nhik gi, kyúdung lui, Garai Gasang lé mahkôn hkya-ôn nyi kô é hkùn, htóng byù góbang gi, yhangnhik é hté lé chòm gyó nyi bum akò.

²⁶ Haù hkùn, byodàn ratung layàng mó nún lò mù htóng yhùm gón le nún lò lui, hkum pé banhoq le radá dâm bóng hà lo bum ri; dum nghut jáng, yuq hkangmó má é toqjàng tui pé le gyut gyó byuq bê nghut ri.

²⁷ Htóng suwún hpó gi, yhup bún lò mù, htóng hkum pé bóng hà tó bum é lé myang kat jáng, htóng byu pé ban hpang byuq bùm bekò rà nghut lhê ga myit yù lui, shâm shé mù, yhanggùng yhang sat shí rà dà ri.

²⁸ Nghut kôlhang, Poluq gi, "Ê, náng gûng yhang nàng haù su hkâkut, ngamoq banshoq shí má nyi tô lhê." ga luí, htê mó eq wut garu tai kat ri.

²⁹ Haù hkûn, yhang gi, duq é myibung lé dúng yù mù, ahkaù shut din wang lô luí, Poluq eq Sila nhik é hí má gyuq nán é eq ngóm gop tô ri.

³⁰ Hau htâng, yhang gi, yhangnhik lé shuí htoq yù luí, "Sarâ nhik ê, ngò hkyi yu é hui rá matù, haí kut ra rá lhú?" ga myi kat ri.

³¹ Haù hkûn, yhangnhik gi, "Yhumsing Yesuq lé lumjing jáng, nàng eq náng yhumbyù lhunglhang bang hkyi yu é hui rá nghut lhê." ga tai akò.

³² Hau htâng, yhangnhik gi, haù htóng suwún hpò eq yhang yhumbyù lhunglhang lé, Yhumsing é mungdang hko kyô akò.

³³ Haù myin haù u lé yhang, htóng suwún hpò gi, yhangnhik lé shuí é mù, yhangnhik é dâm pé lé tsing chí pyám byi luí, haù htâng, yhang eq yhang yhumbyù banshoq bang wui-myhup hkâm yù bekò nghut ri.

³⁴ Hau htâng, yhang gi, yhangnhik lé, yhang é yhumhkaù má shuí wang lô mù, zoshuq hkang byi ri. Yhang eq yhang yhumbyù banshoq bang gi, Garai Gasang lé wó lumjing bekò nghut é yanmai, gyai gabú nyi bum akò nghut ri.

Haq Nhang Pyám Râ Lé A Đông É Hkyô

³⁵ Ahkuí, maubó jáng, tarâ agyi wui gi, "Haù nhik lé nhang pyám aq." ga, htóng suwún hpò chyáng pyata pé lé tai nhang kat akò.

³⁶ Haù hkûn, htóng suwún hpò gi, "Nungnhik lé nhang pyám aq ga, tarâ agyi wui mai byù nhang kat ri; haù mù, ahkuí, nungnhik gi, ngón za htoq lô lo keq." ga luí, Poluq lé tai ri.

³⁷ Poluq kúm gi, "Nga-nhik gi, Romaq mingdán byù sheq ru nghut le wa, myí gôn wú é hkyô le a bo é, byu pé hí má ngá-nhik lé nhuq bat mù, htóng má hkyô kat kôluí nhing, ahkuí tsik za haq nhang pyám rá dá akò nhung lhi? A wó dut, yhangmoq yhang sheq lé shuí htoq yù kó sháng gaq." ga luí, yhangmoq lé tú tai kat ri.

³⁸ Pyata pé gi, tarâ agyi wui lé dang haù pé lô tai kyo kôjáng, tarâ agyi wui gi, Poluq eq Sila nhik Romaq mingdán byù nghut é hkyô lé wó gyo kôjáng, garò gyuq kôluí,

³⁹ yhangmoq yhang, yhangnhik chyáng lé mù, tóngbán luí, shuí htoq yù mù, wà haù mai htoq lô byuq rá matù chòm dúng akò.

⁴⁰ Haù mù, Poluq eq Sila nhik gi, htóng mai htoq lô é htâng, Ludia é yhum má wang lô akò; haù má, gumang wui eq le hui kômù, yhangmoq lé wum-o byi luí, htoq lô bekò nghut ri.

17

Htesaloni Wà Mó Má Mungdang Hko Kyô É Hkyô

¹ Hau htâng, yhangmoq gi, Amhipoli wà mó eq Apolon wà mó mai sô lai lô mù, Htesaloni wà mó má jé akò. Haù wà má gi, Yudaq byu pé é tarajong ralhüm joq ri.

² Poluq gi, yhang lhaq kut nyi é eq rajung za, tarajong má wang luí, Bánno buinyi sum nyi yhang, Chyúmdang má bo é eq séng mù, yhangmoq eq chòm ming lhum uchyang,

³ Hkrisduq wuihke jamjau hui mù, shí bê mai dum duoi toq lô rá hkyô lé tai hkoq sum kyo luí, "Nungmoq lé, ngò hko kyô nyi é haù Yesuq gi, Hkrisduq nghut lhê." ga tai ri.

⁴ Yudaq byu pé má é ra-am gi, gyô jing kômù, Poluq eq Sila nhik chyáng lé xoq yu akò; haù eq rajung za, Garai Gasang lé hkunggâ é Grik pé myo myo eq, ahkyak é myiwe wui tsómra myo shoq le, gyô jing kômù, lé xoq yu akò.

⁵ Nghut kôlhang, a gyô jing é Yudaq byu pé gi, manôn kôluí, gai má é byúgang jùm ra-am lé lung yù mù, byù moq mó tsing yù luí, rawa é shuí gabyong kômù, shiwa byu pé é hí má Poluq eq Sila nhik lé wó shuí htoq shit shoq ga, Yason é yhum má htim e lô akò.

⁶ Nghut kôlhang, yhangnhik lé a myàng kôjáng, yhangmoq gi, Yason eq gumang wui ra-am lé, yhangmoq é wà suwún wui chyáng llang she é kômù, "Mingkan gón lé atau ahú kut é byù shí nhik, ahkuí shí má jé jáng, Yason gi, yhang é yhum má lhóm hkulum yu ri.

⁷ Yhangmoq lhunglhang bang gi, Yesuq gâ é hkohkâm góyuq nyi lhê ga kôluí, hkoséng Kehtaq é tarâ lé lhoq shai é dngkut é bang nghut akò." ga tai garú bum akò.

⁸ Shiwa byu pé eq wà suwún wui gi, dang haù lé wó gyo kôjáng, myit wui myit hke dut nyi bum akò.

⁹ Hau htâng, yhangmoq gi, manghkáng a lhoq htoq rá matù Yason eq góbang lé danggidiq zè byi nhâng mù, nhang pyám bekò nghut ri.

Beria Wà Mó Bang, Mungdang Lé Lhom Yu É Hkyô

¹⁰ Haù myin jáng yhang, gumang wui gi, Poluq eq Sila nhik lé Beria wà mó shut nhang kat akò; yhangnhik gi, haù wà má jé jáng, Yudaq byu pé é tarajong má wang lô akò nghut ri.

¹¹ Haù Beria wà mó byu pé gi, Htesaloni wà mó byu pé htoq má je riyhang nhik bo bum akò; haù mù, danglù haù lé gyai ô nau é myit eq hap yù mù, danglù shí teng a têng é hkyô lé wó sé shoq ga, nyi wui Chyúmdang lé chòm nghap wú nyi akò nghut ri.

¹² Haù mù luí, Yudaq byu pé myo myo gi, lumjing bum akò, haù eq rajung za, aróng

wó é Grik myiwe wui eq yuqgè wui myo myo le, lumjing bùm bekò nghut ri.

¹³ Poluq gi, Beria wà mó má le, Garai Gasang é mungdang hko kyô nyi é hkyô lé, Htesaloni wà mó má é Yudaq byu pé sé kôjáng, yhangmoq gi, haú má lé kômù, wà byu wui lé mhoq hpyoq lui, gabyông lò nhang akò.

¹⁴ Haú hkûn, gumang wui gi, Poluq lé wuimau yàm jé shoq, radá dâm dé kat akò; nghut kôlhang, Sila eq Timohti nhik gi, Beria wà mó má nyi gyó tô akò nghut ri.

¹⁵ Poluq lé châng dé é bang gi, Ahten myuq jé shoq lé dé to kômù, Sila eq Timohti nhik lé hân hân châng ló rá matú pying kat é dang lé wun chûng mù, dum taú lò bekò nghut ri.

Poluq, Ahten Myuq Má Nyi É U Lhê Hkyô

¹⁶ Ahkuí, Poluq gi, Ahten myuq má haú nhik lé láng nyi tô é u lé, haú wá má rawa é hparà lhô baú dut tô é lé myàng mù lui, yhang i-myt gyai yhang a ngon dut byuq ri.

¹⁷ Hau é yanmai, yhang gi, tarajong pé má Yudaq byu pé eq Garai Gasang lé gyuq hkunggá é Grik pé eq le, gai pé má hui mihui bang eq le, nyi wui taí sán kyô lhùm nyi akò nghut ri.

¹⁸ Haú mù lui, Epikuri hpaqchyí eq Sto-i hpaqchyí* lé sé é, myit wú hpaqchyí bo é bang ra-am gi, yhang eq dang chyin chyin lhùm akò; haú hkûn, yhang gi, Yesuq é hkyô eq dum dui toq hkyo é gabú danglú lé hko kyô é yanmai, ra-am gi, "Byù pyok shí yuq gi, haí wá taí nyi lhê lú?" ga; ra-am gi, "Gómíng hparà pé é hkyô lé taí kyo sù nghut sam ri." ga, taí bum akò nghut ri.

¹⁹ Hau htâng, yhangmoq gi, Aripagu gá é byìn tú wap shut Poluq lé shuí doq ló mù, "Nang mhoqshit é hkyô asik, ngamoq lé sé nhang le a gè lú?"

²⁰ Nang eq taí é maú nhô za gá é hkyô lé ngamoq wó gyô ri; haú é dang kyíng lé ngamoq sé nau ri." ga taí bum akò.

²¹ (Ahten byu pé eq haú má nyi é gómíng byu pé lhunglhâng bang gi, dang sik lù sik haú lé taí kún gyô kún mù, yhangmoq é ahkyíng lé lhoq pán nyi bum akò nghut ri.)

Poluq, Aripagu Zuphpong Má Mung-dang Hko É Hkyô

²² Haú u lé, Poluq gi, Aripagu zuphpong má toq yap mù, "Ahten byu pé é, nungmoq gi, hkyô hkat hkangmó má hparà lhô pé lé gyai yhang dat gyuq hkungga kô é lé, ngò myang ri.

²³ Hkâsu mù gá le, ngò sô lhing wún mù nungmoq jaú é ze pé lé rago wú wú lé, 'A sé é Garai matú.', ga lui, kâ tô é hkungga gyap ralhum lé myang záng ri; haú nungmoq a sé

é za jaú nyi é Garai hkyô lé, ngò, nungmoq lé hkaí kyo kôlé.

²⁴ Myidàm htoq eq haú má joq mijoj lé hpan tô é Garai Gasang gi, mauhkúng eq myigùng é Yhumsing le nghut lhê mù lui, byu loq eq saí é noqkuq yhùm má nyi rá a nghut.

²⁵ Yhang gi, byù lhunglhâng bang lé asak, soq, ra mira gumjup shoq byí to sù nghut nyi é yanmai, rajung jung rá é sù lé su, byu loq eq dojaú rá sù a nghut.

²⁶ Yhang gi, gunchyung rayuq mai za byuhú chângjup myô lò nhang mù, myidàm htoq jàm shoq má nyi nhâng lui, yhangmoq é matú hí hí mai ahkyíng yam-yoq eq nyi rá jowò masat to byi bê nghut ri.

²⁷ Yhang gi, nga-nhúng yuq hkangmó eq a we to kôle, byu pé yhang lé châng hô mù, myang hô kó sháng gaq ga shí hkyô lé kut é nghut ri.

²⁸ Hkâsu mù gá le, nungmoq é jihkyang kat bang, 'Nga-nhúng le yhâng é awut ashín pé nghut nyi lhê.' ga taí tô bum é eq rajung za, nga-nhúng gi, Yhang é yanmai wó nyi, wó dui é eq ísu wó dut é nghut lhê.

²⁹ Haú mù, nga-nhúng gi, Garai Gasang é yhangzô pé nghut nyi é yanmai, Garai gung gi, byu é hpaqchyí loq eq kyúng kâ tô é húng, ngùn, luqgok pé eq pûng lhê nghù lui hkâ-myt yù kô.

³⁰ Laí lò bê haú myoq a bóng shi é pyat lé, Garai Gasang gi, haí le a ga haí pyám to kôlhang, ahkuí gi, jowò hkangmó má é byù lhunglhâng bang lé, myit lhing keq ga hkunmó hkyô to bê nghut ri.

³¹ Hkâsu mù gá le, Yhang hkyin to sù mai mingkan gón lé tara é dông jéyáng rá buinyi ra-nyí masat to bê nghut ri. Shí hkyô lé, byù lhunglhâng bâng é hí má wó lum é saksé dut sháng gaq ga, Yhang haú yuq lé shi é mai lhoq dui toq yù bê nghut ri." ga taí ri.

³² Shí é mai dum dui toq lo é hkyô lé wó gyô bùm kôjáng, ra-am gi, taí hpoí pyám byí akò; ra-am kúm gi, "Nàng shí hkyô taí é lé ngamoq dum gyô wú nau ashí." ga taí akò.

³³ Hau htâng, Poluq gi, haú zuphpong mai htoq ló byuq bê nghut ri.

³⁴ Nghut kôlhang, byù ra-am gi, Poluq é htâng cháng kômù, lumjing bang dut bekò nghut ri. Haú bang má, Aripagu zuphpong má bo é Dionisi ga sù le bo ri. Hau htoq agó, Damari gá é myiwe rayuq eq gotú byu pé le, bo bum akò nghut ri.

18

Poluq, Korinhtuq Myuq Má Nyi É U Lhê Hkyô

¹ Hau htâng má, Poluq gi, Ahten myuq mai htoq lui, Korinhtuq myuq má jé lo ri.

* 17:18 Epikuri hpaqchyí gi, htang pyat a joq, ahkuí ngon yù rá za ahkyak gá é nghut lhê. Sto-i hpaqchyí gi, haí wá dut kôlhang i-myt zim za kut mù, htang pyat matú chiq a ra gá é nghut lhê.

² Haù má, yang gi, Romaq myuq mai Yudaq byù lhunglhang bang htoq ló byuq rà dut lhê ga, hkohkâm Klodi èq hkunmó hkyô é yanmai, a myáng shi lé Itali ming mai yangmyi Priskila eq htoq jé lo é. Pontuq mau byi nghut é, Akula gâ é Yudaq byù rayuq lé hui luí, yangnhik chyáng ê ri.

³ Yhangmoq gi, jonghpang sai zo bang chyat nghut kô é yanmai, muzó pûng kôluí, Poluq gi, yangnhik eq rahá nyi nyi mù, muzó chôm sai akô.

⁴ Bánno buinyi hkgámó, Poluq gi, tarajong má Yudaq byù eq, Grik pé lé, tai sân kyo luí, lhoq pun lhoq kyíng yu ri.

⁵ Ahkuí, Sila eq Timohti nhik Makedoni mau mai châng jé jáng, Poluq gi, mungdang hkô hkyô má za wum kat luí, haù Yesuq gi, Hkrisduq yang nghut lhê ga, Yudaq byu pé lé saksé hkâm kyô ri.

⁶ Nghut kôlhang, Yudaq byu pé gi, lhom he-ngik pyám kômú, yang lé rhoi dang tai pyám akô; haù mù, Poluq gi, yhang mebu ko shit é dòng yangmoq lé a nau é hkyô tún shit uchyang, "Nungmoq é sui mara gi, nungmoq é ulhum má jé sháng gaq, ngò eq haí a séng lo; ahkuí mai, ngò gi, túngbaù pé chyáng e ló berá nghut lhê." ga luí, yangmoq lé tai ri.

⁷ Hau htâng, yang gi, tarajong mai htoq luí, jong haù eq yhep nghut é, Garai Gasang lé noqkuq é Titu Yustu ga su é yhum má wang ló ri.

⁸ Krispu gâ é tarajong má up sù gi, yhang yhumbyù lhunglhang bang eq rahá, Yhum-sing lé lumjing akô. Korinhduq myuq byu pé myo myo le, Poluq é dang lé gyô yù mù, lumjing luí, wui-myhup hkâm yu bum akô nghut ri.

⁹ Ra-myìn lé, shing-rán ralhú má Yhum-sing mai Poluq lé tai é gi, "Hkâgyuq, tai aq, zim za hkâ-nyí.

¹⁰ Ngò nang eq rahá nghut nyi lhê, nang lé ó yuq èq le haí wó kut rà a nghut, hkâsu mù gâ le, myuq shí má, ngá é byù myo myo nyi bum lhê." gâ ri.

¹¹ Haù mù luí, Poluq gi, Garai Gasang é mungdang mhoqshit uchyang, razán eq lhamó hkyuq hkyap yang, haù myuq má nyi nyi ri.

¹² Galio ga sù, Ahkaia mau má é ginwáng zau kut nyi é u lé, Yudaq byu pé gi, myit rahkat zâ èq Poluq lé chôm chyp yù kôluí, tará hpyit wap má she háng kômú,

¹³ "Byù shí yuq gi, jep é tará eq shai lhum é dòng, Garai Gasang lé noqkuq rà matú, byu pé lé mhoq hpyoq wún ri." ga mara hún akô.

¹⁴ Haù hkún, Poluq tú tai rà dá lò jáng, Galio gi, Yudaq byu pé lé, "Yudaq byu pé é, muzó shí gi, tará lu lai é muzó, haù a nghut

jáng, agé ashop é muzó mai, dut lo é nghut le gi, nungmoq lé ngò gyo byi rà hkyô joq lhê.

¹⁵ Nghut kôlhang, muzó shí gi, nungmoq é tará eq séng luí, dang eq séng luí, mying eq séng luí, tai lhum kô é hkyô nghut é yanmai, nungmoq yang ru ló hpyit lhum keq. Haù sù é muzó má, ngò gi, tará agyì kut byi rà a nghut." ga tai mù,

¹⁶ tará hpyit wap mai yangmoq lé hkat htoq pyám nhang ri.

¹⁷ Haù hkún, yangmoq lhunglhang bang gi, tarajong má up sù Sositeni lé chyup yù mù, tará hpyit wap hí má chôm bat akô. Galio kúm gi, haù hkyô lé hai gún a kut byi nghut ri.

Poluq, Antioku Wà Mó Má Dum Taù Jé É hkyô

¹⁸ Poluq gi, Korinhduq myuq má buinyi tsómra myáng shoq lumjing bang eq nyi nyi ri. Hau htâng, yang gi, haù bang lé shi-kyâm to luí, Priskila eq Akula nhik lé by-inzùm kut mù, lhai ji luí Suriq mau shut e ló akô. Hau hí má, yang gi, danggidiq tô tô é yanmai, Kenhkrea wà má xâm nyhâm pyám ri.*

¹⁹ Yhangmoq Ehpesu myuq má jé kô é hkún, Poluq gi, Priskila eq Akula nhik lé nyhi pyám to luí, yang baù tarajong má wàng mù, Yudaq byu pé lé tai sân kyo byi ri.

²⁰ Haù má é bang gi, yangmoq eq rahá rayoq zo nyi shi rà dòng yang lé dung kô é nghut kôlhang, yang gi, a nhò lo nghut ri.

²¹ Haù mù, yang gi, Ehpesu myuq mai lhai ji mù htoq ló uchyang, "Garai Gasang ô nau é hkyô nghut le gi, ngò nungmoq chyáng dum jé lé rà nghut lhê." ga, yangmoq lé danggidiq byí tò ri.

²² Ahkuí, Poluq gi, Kesare wà mó má ló jé dap jáng, Yerusalem wà mô shut doq ló mù, noqkuq hpung lé ló hui tò é htâng, Antioku wà mó má dum gyô ló ri.

²³ Yang gi, haù wà má rayoq zo nyi é htâng, htoq ló mù, Galatiq mau eq Hprugi mau mai sô lai ló uchyang, rawa htâng rawa má é chángzó pé lé wum-o lhoq ging byí ri.

Apolo Zui Sai É Muzó

²⁴ Ahkuí, Alesandru myuq byù nghut é sù, Apolo gâ é Yudaq byù rayuq gi, Ehpesu myuq má jé lé ri. Yang gi, hpaqchyí bò sù nghut é htoq agó, Chyúmdang le gyai kung é sù nghut ri.

²⁵ Yang gi, Yohan é baptisma hkyô lé za sé sù nghut kôlhang, Yhum-sing é hkyô lé mhoq yù bê nghut luí, Yesuq é hkyô pé lé mhoq yu to bê eq rajung za wum zuq tung ga luí, hkyak hkyak mhoqshit byí ri.

²⁶ Ahkuí, yang gi, gyuq kyúm myit a bo é za tarajong má tai hi ló ri. Haù hkún,

* 18:18 Xâm nyhâm pyám é gi, Yudaq htung dòng rajung jung kut rà matú danggidiq to luí, haù lé ban kut jáng, yhum-sing xâm lé nyhâm pyám é nghut lhê.

Priskila eq Akula nhik gi, haù lé wó gyo kôjáng, yhang lé ji yù mù, Garai Gasàng é mungdang hkyô lé azó tung taí sãn kyo byi akò nghut ri.

²⁷ Apolo gi, Ahkaia mau shut dap e ló nau é hkùn, gumang wui gi, yhang lé wum saí byi mù, yhang lé lhom hkùlum yu rà matú, chángzô pé chyáng laiká ká byi kat akò; yhang gi, jé jáng, Garai Gasàng jeju mai lumjúng bê bang lé, gyai yhang wó garúm sù dut bê nghut ri.

²⁸ Hkâsu mù gâ le, yhang mai, Yesuq gi, Hkrisduq yhang nghut nyi ri ga luí Chyúmdang má tún shit uchyang, byu pé hí má Yudaq byu pé lé, wum kat wó taí ung pyâm é yanmai nghut ri.

19

Poluq, Ehpesu Myuq Má Nyi U Lhê Hkyô

¹ Ahkuí, Apolo gi, Korinhduq myuq má nyi tô é hkùn, Poluq gi, mau káng mai sô lai ló mù, Ehpesu myuq má jé ri. Haù má, yhang gi, chángzô pé ra-am eq hui luí,

² yhangmoq lé, "Nungmoq gi, lumjúng é hkùn, Chyoiyúng Woi-nyí lé, wó yù beko lhu?" ga myí ri.

Haù hkùn, yhangmoq gi, "Chyoiyúng Woi-nyí nyi lhê gâ é lháng, ngamoq a wó gyô wú." ga tú taí akò.

³ Haù mù, Poluq gi, "Haù nghut jáng, nungmoq gi, hái jung baptisma hkam yú kô é lhu?" ga luí, yhangmoq lé myi jáng, yhangmoq gi, "Yohan é baptisma hkam yu é nghut lhê." ga tú taí akò.

⁴ Haù hkùn, Poluq gi, "Yohan é baptisma nghu é gi, myit lhing mù wui-myhup hkâm yu é hkyô lé gâ lhê. Yohan gi, yhang é htàng má jé lé rá sù, haù Yesuq lé sheq lumjúng rá lhê ga shiwa byu pé lé taí ri." ga taí ri.

⁵ Yhangmoq gi, dang haù lé wó gyo kôjáng, Yesuq é mying lang luí baptisma byí é lé, hkam yu bum akò.

⁶ Poluq gi, yhangmoq é htoq má loq ke byi jáng, haù Chyoiyúng Woi-nyí gi, yhangmoq htoq má jé lé mù, yhangmoq gi, laklai dang nyo lo é htoq agó myiqhtoi le htoi lo bum akò.

⁷ Haù bang lhunglháng gi, yuqgè raxe í yuq kó nghut ri.

⁸ Hau htàng, Poluq gi, tarajong má wàng luí, gyuq kyâm myit a bo é za lhamó sum hkyap Garai Gasàng é mingdán hkyô lé taí sãn kyo mù, lhoq pun lhoq kyíng yu ri.

⁹ Nghut kôlhang, ra-am gi, myit htan lo bùm kôluí a kâm lumjúng kô é htoq agó, haù Yhumsing é Hkyô lé byu pé hí má lhoq hpoi pyâm byi kôjáng, Poluq gi, yhangmoq chyáng mai htoq luí, chángzô pé lé shuí chùng mù, Turanu gá su é hpaqchyí mhoq jong má, nyí wui taí sãn kyô lhùm nyi akò.

¹⁰ Haù su kut í zân yhang mhoqshit nyi é yanmai, Asia mau gón mã é Yudaq byu pé eq Grik pé lhunglháng bang gi, Yhumsing é mungdang lé wó gyô yu bum akò nghut ri.

Skewa É Yhangzo Nyhit Yuq É Hkyô

¹¹ Garai Gasang gi, Poluq é loq dòng laklai kumlhá kut ri.

¹² Haù mù, Poluq chyáng mã é hpajet eq hpyihit rajung jung lé, nò bang chyáng yu ló mù, ló záng byi jáng lháng, yhangmoq é nòhpyo ge ló byuq é eq, agè ashop é nat pé lé yhangmoq chyáng mai htoq ló byuq bum akò.

¹³ Haù u lé, nat hkat htoq wun é Yudaq byu pé ra-am gi, agè ashop é nat pé lé, "Poluq hko taí é Yesuq é mying mai, ngò, nungmoq lé hkat htoq lhê." ga, agè ashop é nat wàng júng to bâng é ahtoq má, Yhumsing Yesuq é mying lé lang luí, hkat chyam wú akò.

¹⁴ Skewa gâ é, Yudaq hkyangiong agyi rayuq é yuqzo nyhit yuq le haù su kut wun akò.

¹⁵ Ra-nyí lé, agè ashop é nat gi, yhangmoq lé, "Yesuq lé ngò sé lhê; Poluq é hkyô lé le ngò sé lhê; nghut kôlhang, nungmoq gi, ó pé nghut akò?" ga tú taí mù,

¹⁶ agè ashop é nat haù wàng júng é byù gi, yhangmoq htoq má byam doq jì to luí, nhuq bat yù mù yhangmoq lé ung pyâm ri. Yhangmoq gi, yhùm haù mai gùngchín sui nê yang yang hpang htoq ló beko nghut ri.

¹⁷ Haù hkyô lé, Ehpesu myuq má nyi é Yudaq byu pé eq Grik pé sé kôjáng, yhangmoq lhunglháng bang gi, chòm gyô gyuq bum akò. Yhumsing Yesuq é mying gi, hkya-on lhoq toq é hui bê nghut ri.

¹⁸ Lumjúng bê bang myo myo gi, lé mù, yhumsing kut shut é agè ashop hkyô lé, myo myô hí má yín yu akò.

¹⁹ Myoqheq hpaqchyí kut zô é bang le, yhangmoq é laiká lé yu lé kôluí, shiwa byu pé hí má nyhê hkyô pyâm akò. Mausau haù pé é ahpai lé sôn wú le, ngùn chap ngo mun záng ri.

²⁰ Haù dòng mai, haù Yhumsing é mungdang gi, ko lam lò mù, wum-o a-tsam je bo lò bê nghut ri.

Ehpesu Myuq Má Gabyông É Hkyô

²¹ Shí pé ban dut lai htàng má, Poluq gi, Makedoni mau eq Ahkaia mau dòng sô lai ló mù, Yerusalem wa mó má ló jé rá ga myit hpyit yu luí, "Haù má ló jé tô é htàng má, ngò, Romaq myuq má le, jé wú rá dut ashí." ga taí ri.

²² Haù mù, yhang lé htuqbang garúm é Timohti eq Erastu nhik lé hí Makedoni mau shut nhang kat luí, yhang gi, Asia mau má rayoq rabun zo nyi gyô tô ri.

²³ Haù yoq lé, haù Yhumsing é Hkyô yanmai gyai yhang gabyông lo bum akò.

²⁴ Demetri gâ é ngùn bat zo sù rayuq gi, Artemi hpara é ngùn yhùm zông zo saí lúi, mù saí luzúm wuí lé wó sùt nhang nyi ri.

²⁵ Yhang gi, yhâng é ngùn bat zo luzúm wuí eq haú jung amù kut é góbang lé le ji tsing to mù, taí é gi, "Luzúm wuí ê, muzó shí lhùm é yanmai, nga-nhúng nyi ngón yuqyo nyi é hkyô lé, nungmoq sê lhê.

²⁶ Nghut kôle, ahkuí gi, Ehpesu myuq má za le a nghut lo, Asia mau lháng aluq jàm shoq, byu loq eq sai é zè lé, garaí pé a nghut ga, shí Poluq ga sù mai byù myo myo lé mhoq hpyoq yù mù, hkyô shuí lhoq nghoq nyi é hkyô lé, nungmoq wó myâng, wó gyô nyi akô.

²⁷ Haú mù lúi, nga-nhúng é muzó shí gi, hpoi byuq rá lé chiq rá é za a nghut, hpara myhí mó Artemi é noqkuq yhùm gi, haí a dut byuq lúi, Asia mau gón eq mingkan gón mai noq é hpara myhí é shingkan hpoi byuq rá lé le myit chiq rá dut bê." gâ ri.

²⁸ Yhangmoq gi, dang haú lé wó gyô bùm kôjáng, nhik mó gyô yò kôlúi, "Ehpesu myuq byu pé é Artemi gi, kô nyi sháng gaq ô!" ga chòm garú bum akô.

²⁹ Hkâ-myháng a nghut má, rawa bang gabyông lò bekô. Shiwa byu pé gi, Poluq é byinzùm Makedoni byù Ge-u eq Aristakuq nhik lé chyup she yù mù, yhangmoq é poi wàng mó shut radá dâm chyín chyap wang lò bum akô.

³⁰ Poluq gi, moq hpúng hau hí má htoq shit naú kôlhang, chángzô pé gi, yhang lé a wàng nhâng kô nghut ri.

³¹ Poluq é luzúm wuí nghut é, haú mau mâ é suwún wuí ra-am lháng, yhang lé poi wàng hkaú má a ê rá matú, hkùm pyám nhang akô nghut ri.

³² Zing tô é bang gi, hai hù háng le a sé lo dut byuq kômù lúi, ra-am rajung ga garú bum akô. Myo mi-myo gi, haí mù lúi yhangmoq haú má nyi tô é lé lháng a sê bùm kô nghut ri.

³³ Yudaq byu pé gi, Alesander lé hí má chòm chyún htoq kat kôlúi, shiwa hpong mai ra-am gi, yhang hká dông taí rá hkyô lé mhoq byi kat akô. Alesander le shiwa hpong lé taí san kyo naú lúi, zim byuq rá matú loq tu ri.

³⁴ Nghut kôlhang, Alesander, Yudaq byu nghut é lé sé kôjáng, yhangmoq lhunglháng bang gi, rahtê za kut kôlúi, "Ehpesu myuq byu pé é Artemi gi, kô nyi sháng gaq ô!" ga hkying hkum í hkum kô garú bum akô.

³⁵ Haú, myuq chyare hpó gi, shiwa moq mó lé lhoq zim lúi taí é gi, "Ehpesu myuq byu pé é, Ehpesu myuq shí gi, Artemi myhí mó é noqkuq yhùm eq mauhkung mai byit gyó lo é yhâng é alhò lé, wó zúng nyi é wá

nghut é hkyô lé, mingkan má a sê é ó yuq wa nyi lhê lhu?

³⁶ Haú mù lúi, shí hkyô pé gi, wó he pyâm jung a nghut é yanmai, zim za nyi le ge lhê, hân so hân dùn hkâk ko.

³⁷ Shí nhik gi, noqkuq yhùm lé hpyoq zo su nhik le a nghut, nga-nhúng é hpara myhí lé lhoq hpoi su nhik le a nghut kô é le nhing, nungmoq shuí lé bekô nghut ri.

³⁸ Demetri eq yhâng é ngùn bat zo luzúm wuí gi, rayuq yuq é ahtoq má mara hùn rá hkyô joq kô é nghut jáng, tarâ rùng pé hpông tô lhê. Tarâ agyi pé nyi lhê. Haú má yhangmoq é kô sháng gaq.

³⁹ Nungmoq taí nau é gó hkyô rajung jung joq é nghut le kúm gi, tarâ wang zuphpong mó má chòm taí pyâm rá nghut lhê.

⁴⁰ Hkû-nyí gabyông é mù shí má, mù htoq wang a bo é yanmai, nga-nhúng lé mara hùn rá chiq rá ri. Shí su kut chòm ming é hkyô lé, hai é yanmai nghut lhê ngù, nga-nhúng a wó taí kyo nghut ri." gâ ri.

⁴¹ Shí pé ban taí é htâng má, yhang gi, shiwa moq mó lé lhoq pyo kat bê nghut ri.

20

Makedoni Mau Éq Grik Mau Đông Lai Ló É ULHê Hkyô

¹ Haú gabyông é hkyô zim byuq é htâng má, Poluq gi, chángzô pé lé ji yù lúi, yhangmoq lé wum byi dang taí to mù, shi-kyâm to lúi, Makedoni mau shut htoq é ló bê nghut ri.

² Yhang gi, haú mau mai sô lai ló uchyang, byu pé lé wum byi é dang myo myo taí lúi, Grik mau má ló jé bê.

³ Yhang haú má lhamó sum hkyap nyi yù mù, lhai ji lúi Suriq mau shut é rá hen nyi é hkùn, Yudaq byu pé gi, yhang lé gyám nyi kô é yanmai, yhang gi, Makedoni mau dông tau lò rá lé myit hpyit bê nghut ri.

⁴ Yhang eq rabyin za châng é bang gi, Beria wá mó mã é Purú yhangzo Sopata, Hte-saloni wá mó mã é Aristakuq eq Sekundu nhik, Derbe wá mó mã é Ge-u, Timohti, Asia mau mã é Tuhkiku eq Trohpimu nhik pé nghut akô.

⁵ Yhangmoq gi, hí so lánq lúi, ngá-nhik lé Troa myuq má ló lánq nyi akô.

⁶ Nghut kôlhang, ngá-nhik gi, Azuma Poi* lai é htâng má, Hpilipi wá mó mai lhai ji ló le, ngo nyi ngù jáng, Troa myuq má yhangmoq lé hui lúi, haú má nyhit nyi chòm nyi é nghut lhê.

Troa Wá Má, Utuhku Ga Sù Lhoq Tui Toq Hui É Hkyô

⁷ Rabat é sâng-hi nyi lé, ngamoq gi, muk hpê gám rá matú lé chòm zup zing tô é hkùn, Poluq gi, htang nyi ló byuq rá ga hen tô é

* 20:6 Múnchi a bo é Muk zo Poi lé, Azuma Poi le gâ lhê.

yanmai, chángzô pé lé gunggàm jé shoq hko kyô nyi ri.

⁸ Ngamoq zup zîng nyi é haù ahtoq pyâm wap má, myibung myo myo le duq tô ri.

⁹ Poluq dang nyo hing nyi é u lé, Utuhku gâ é zorâm zo rayuq gi, hkohot hkum yâm má yhup mui zung tô ri. Haù yuq gi, yhupmó myi byuq luí, yhùm sum tsáng mai byit gyó mù, yhang lé bún toq wú le shi byuq bê nghut ri.

¹⁰ Haù hkùn, Poluq gi, gyó ló mù, po ngop to luí, "Hkádán ko, yhang soq bo ashí." ga tai ri.

¹¹ Haù mù, yhang gi, dum tau doq ló luí, muk lé hpé mù, zo luí, maubó shoq yhang-moq eq dang nyo kún mù htoq ló bê nghut ri.

¹² Zorâm zo haù lé duì gù shuí ló kômù, nhik tîng é gyai yhang hui bekô nghut ri.

Troa Wà Eq Melitu Wà Gyoro Mâ É Hky-owui

¹³ Poluq gi, myi hkyô ló rá matú hen tô é yanmai, yhang lajang byí é eq rajung za, yhang lé Asu wá má lhaí lhom shuí jì rá matú, ngamoq gi, lhaí jì mù hí ló láng bê nghut lhê.

¹⁴ Haù mù, yhang gi, Asu wá má ngamoq eq hui luí, ngamoq gi, yhang lé lhaí má shuí jì chûng mù, Mitulene myuq shut é ló bê.

¹⁵ Htang nyi, ngamoq gi, haù mai lhaí jì mù, Kiu zinlóng yâm mai lai ló luí, hau htang nyi gi, Samu zinlóng má lai dap ló luí, htang nyi gi, Melitu wá mó má jé ló bê nghut lhê.

¹⁶ Poluq gi, wó dut é nghut jáng, Pentekoti buinyi lé Jerusalem wá mó má wó jé shoq gâ é yanmai, Asia mau má buinyi a kám lhoq htuam nàu mù luí, Ehpesu myuq lé lhaí pyâm to rá matú, myit hpyit to bê nghut ri.

Ehpesu Hpúng Suwún Wuí Lé, Poluq Shikyám Tô É Dang

¹⁷ Poluq gi, Melitu wá mó mai Ehpesu shut byù nhang kat luí, hpúng suwún wuí lé é jì nhang ri.

¹⁸ Haù bang jé lé kôjáng, yhang yhangmoq lé tai é gi, "Ngò, Asia mau má sâng-hí jé é buinyi mai, nungmoq eq hkâsu kut nyi nyi é ahkying banshoq lé lé;

¹⁹ Yudaq byu pé jeq hô luí, ngò wuîhke jamjau hui zo kôlhang, haù Yhumsing é muzó lé, ngò myit gyai lhoq nyhùm é eq ngaubyi ngaù nhap é eq wùn waq é hkyô lé lé;

²⁰ nungmoq é matú akyù bo é hkyô banshoq lé, a myhit to loshoq tai é hkyô lé lé; shiwa byu pé hí eq rayhùm htàng rayhùm má ngò nungmoq lé mhoqshít é hkyô lé lé;

²¹ ngò gi, Yudaq byu pé eq Grik pé lé, myit lhing mù Garai Gasâng chyang lhing lô ra eq, nga-nhùng é Yhumsing Yesuq lé lumjing ra

hkyô lé, saksé hkâm kyo lugù nghut bê lé lé, nungmoq sê nyi akô.

²² Ahkuí, ngò gi, Woi-nyí má tuí tô é hui bê yanmai, Yerusalem wá mó má é ló lhê; haù má, ngò hai ló dut rá lé kúm gi, a sé nghut ri.

²³ Ngò gi, htóng eq wuîhke jamjau hkyô ngo lé láng tô ri ga, wá hkangmó má Chyoiyung Woi-nyí eq lhoq pùn é hkyô lé za sê nyi lhê.

²⁴ Nghut kôlhang, ngò gi, òn rá hkyô ban òn rá eq, Garai Gasâng jeju eq sêng é gabú danglù lé saksé hkâm rá matú, Yhumsing Yesuq ngo lé byi tô é muzó lé ban wùn waq rá za nghut jáng, ngá asak lé ratsuí le a myit ha lô é nghut lhê.

²⁵ Garai Gasâng é mingdán hkyô lé hko kyô wún é hkùn, ngò eq hui é nungmoq lhunglhang bang gi, htàng nùng má ngo lé a myàng lo kó rá nghut é lé, ahkuí ngò sê to bê.

²⁶ Haù mù luí, ó yuq nghut kôlhang, yubak mara má shi byuq ló é nghut le, haù yuq é sui chyín gi, ngò má a dap lô é hkyô lé, hkú-nyí, ngò saksé hkâm tô lhê.

²⁷ Hkâsu mù gâ le, Garai Gasang ô nau é hkyô banshoq nungmoq lé hko kyo rá matú, ngò záu tô é hkyô a joq wú é yanmai nghut lhê.

²⁸ Nungmoq gi, yhumsing gùng lé le, nungmoq lé Chyoiyung Woi-nyí eq up zúng nhang é sau hpúng† lhunglhang lé le, zúng nyi keq. Garai Gasang Yhâng suí eq wui tô é noqkuq hpúng lé le, rém zúng nyi keq.

²⁹ Ngò ló byuq é htàng má, sau hpúng lé a shogyô é, ashop é wamhkuí gi, nungmoq chyáng jé rá nghut é hkyô lé, ngò sê lhê.

³⁰ Hau htoq agó, chángzô pé lé wó mhoq hpyoq yù shoq ga, shut é òng tai é byu pé lhang nungmoq chyáng mai htoq lô rá nghut lhê.

³¹ Haù mù luí, nungmoq yuq hkangmó lé, ngò sum zân tup ngaubyi ngau-nhap eq nyí myín a hkying loshoq, lhoq pun lhoq kyíng tô é dang pé lé, nungmoq gi, myit bun mù machya nyi keq.

³² Ahkuí, ngò gi, nungmoq lé, Garai Gasâng chyáng le, nungmoq lé wó lhoq ging lhoq tîng mù, lhoq chyoiyung é hui bê bang eq nungmoq lé silí wunlí wó byí é, Yhâng é jeju mungdang má le, ap tô lhê.

³³ Ngò gi, ó yuq é hing, ngùn, mebu pé lé le a myoqnoq wú.

³⁴ Ngá é loq shí í loq gi, ngò eq ngá htàng châng é bang ra châ é lé kut byi bê hkyô lé, nungmoq yhang sé gù nghut lhê.

³⁵ Ngò kut é muzó banshoq gi, nungmoq é alik dut bê nghut luí, shí su kut shikut é òng mai, nga-nhùng gi, wum-o nyhôm bang lé htuq bang luí, 'Lhom yu é htoq má byí é gi, je riyhang hkungsó wó nyi ri.' ga luí,

† 20:28 Sau hpúng gâ é gi, lumjing é bang lé gâ lhê.

Yhumsing Yesuq taí é dang lé bún nyí sháng." gâ ri.

³⁶ Poluq gi, haú su ga ban taí jáng, hkyihput htuq mù, yhangmoq lhunglhang bang eq rahá za kyúdung ri.

³⁷ Yhangmoq lhunglhang bang gi, yhang lé po to lui, bopuq puq mù, chôm ngau akò.

³⁸ Htâng nùng má, yhang lé dum myàng rá a nghut lo gâ é dang yanmai, yhangmoq gi, je riyhang yón kuq bum akò. Yhang lé, lhai má je shoq lé châng dé kat akò nghut ri.

21

Yerusalem Wà Mó Shut Doq Lô Nyi É U Lhê Hkyô

¹ Ngamoq gi, yhangmoq lé kang pyâm to lui, lhai jì chùng mù, nyâng za Kusa zinlóng má je é nghut lhê. Hau htang nyí gi, Rode zinlóng má je mù, haú mai Patara wà má dum je bê.

² Haú wâ má Hpinisi mau shut dap ló é lhai lé, ngamoq myàng lui, haú mai chôm jì chùng bê.

³ Haú hkún, ngamoq gi, Kupru zinlóng lé myàng jáng, hau é loqyo hkyam đông lai ló lui, Suriq mau shut é ló le, hpugá zé lé hkyó rá matú, Turuq myuq má nó é nghut lhê.

⁴ Haú wâ má, chángzô pé lé myang hô lui, yhangmoq chyáng nyhit nyí bíng yu é. Chángzo hau bang gi, Chyoiyung Woi-nyí eq lhoq pùn é đông Poluq lé Yerusalem wà mó shut a ló rá matú, chôm hkúm akò.

⁵ Nghut kôlhang, nyhit nyí haú lai jáng, ngamoq gi, ngamoq é hkyowui shut dum xoq sô htoq ló bê. Chángzô pé lhunglhang bang gi, yhangmoq é myi zo wui eq rahá, ngamoq lé wà shinggan je shoq châng dé kôlui, ngamoq gi, yhangmoq eq rahá wuiyâm má hkyihput htuq mù, kyú chôm dung bê nghut lhê.

⁶ Hau htâng, rayuq eq rayuq ban shi-kyâm lhum jáng, ngamoq gi, lhai má wàng bê; yhangmoq gi, yhùm shut dum tau ló byuq bekò nghut ri.

⁷ Ngamoq gi, Turuq myuq mai lhai jì chùng mù, Toleme wà má je ló bê. Ngamoq gi, haú wâ má é gumang wui lé shichyên yù mù, yhangmoq eq rahá ra-nyí chôm nyi kùn é nghut lhê.

⁸ Htang nyí gi, ngamoq haú wâ mai htoq ló mù, Kesare wà mó má dum je bê. Haú wâ má, haú htuqluq htuqbang nyhit yuq* má bò sù, gabú danglù hko taí é Hpilip gá su é yhùm má, ngamoq wang bíng bê nghut lhê.

⁹ Yhang gi, yhang hku tô é byizo zomyi myiqhtoi myi yuq wó ri.

¹⁰ Ngamoq gi, haú yhùm má rayoq zo nyi é htâng má, Agabu gâ é myiqhtoi rayuq, Yuda mau mai je lé ri.

¹¹ Yhang gi, ngamoq chyáng je lé lui, Poluq é hpyihit lé yù mù, yhanggung yhang loq eq hkyí pé má tui mù lui, taí é gi, "Shí hpyihit yhumsing lé, Yerusalem wà mó má é Yudaq byu pé mai shí su kut lhom tui lui, tungbaù pé é loq má ap pyâm kó rá nghut lhê;" ga lui, Chyoiyung Woi-nyí taí ri." gâ ri.

¹² Dang haú lé wó gyo jáng, haú má é bang eq ngamoq gi, Poluq lé Yerusalem wà mó má a doq ló rá matú, gyai yhang chôm hkúm bê nghut lhê.

¹³ Nghut kôlhang, Poluq gi, "Nungmoq gi, hai mù lui ngaubyi ngau-nhap kut é eq, ngo lé myit wum gyui rá đông kut nyi akò lhu? Ngò gi, Yhumsing Yesuq é yanmai, Yerusalem wà mó má, tui é hui rá za a nghut, shí hkâm rá matú le rì rì nghut lhê." ga tui taí pyâm ri.

¹⁴ Yhang lé wó taí hkúm rá su a dut lo jáng, ngamoq gi, "Garai Gasang ô nau é đông nghut sháng gaq." nghu lui, zim za chôm nyi bùm bê.

¹⁵ Hau htâng má, ngamoq gi, zè món chùng mù Yerusalem wà mó shut doq ló bê nghut lhê.

¹⁶ Kesare wà mó má é chángzô pé ra-am le, ngamoq eq rabyìn za nghut kôlui, yhangmoq gi, ngamoq lé Kupru byù Manason ga sù, hí hí lhê é chángzo rayuq é yhùm má shui ló mù, yhang chyáng bíng nhang akò.

Yerusalem Wà Mó Má, Yakuq Lé Ê Hui É Hkyô

¹⁷ Yerusalem wà mó má ngamoq je é hkún, gumang wui gi, ngamoq lé gabú tung lhom hkúlum yu akò.

¹⁸ Htang nyi, Poluq eq ngamoq gi, Yakuq lé ê hui le, hpúng suwún wui le zing nyi to lánq akò.

¹⁹ Poluq gi, yhangmoq eq ban shichyen jáng, yhang wun waq lai lo é hpúng mù đông mai, Garai Gasang eq tungbaù pé chyáng kut byi bê hkyô pé lé, jikhúm nuquq shit kyô ri.

²⁰ Yhangmoq gi, haú lé wó gyo kôjáng, Garai Gasang lé hkya-ôn akò. Hau htâng, Poluq lé taí kô é gi, "Âmang ê, Yudaq byu pé má lumjing é bang hkâ-myhó hkying mun nghut bê lé, nàng sê lhê. Haú bang lhunglhang gi, jep é tará má myit zuq to bê bang chyat nghut bum akò.

²¹ Nghut kôlhang, yhangmoq lhunglhang bang gi, tungbaù pé chyáng nyó lúng tô é Yudaq byù banshoq bang lé, nàng, yhum-sing yhangzo yangshù pé é matú ahpoykuq hpyit a ra nghu é eq nga-nhùng é htung tará lé châng nyi a ra nghu lui, Mosheq é tará lé tô pyâm rá đông mhoqshit ri gâ é dang lé, wó gyo yu bùm bekò nghut ri.

²² Nàng je bê hkyô lé, yhangmoq wó gyo berá za nghut lhê. Ahkuí, ngamoq hkâsu kut lo rá lhu?

* 21:8 Lagyo 6:1-6

²³ Haù mù, ngamoq taí é dõng kut aq, yhangmoq chyáng danggidiq mó byi bê byù myi yuq nyi lhê.

²⁴ Nang gi, haù bang lé ji yù mù, yhangmoq eq rahá lhoq san lhoq yung yù aq, yhangmoq lé u wó wuq yù rá matú, ahpau le htoq byi aq. Haù hkûn sheq, byù lhunglhâng bang gi, yhangmoq wó gyô tô é hkyô a têng byuq é eq, nang yhang lháng, jep é tará lé, châng kut nyi sù nghut é hkyô lé, sé kó rá nghut lhê.

²⁵ Lumjing é tungbaù pé é matú kúm gi, hpará lhô pé lé ting byí é zoshuq, sui, lingzing mai myhik sat é dusak sho eq ashop é dõng gungsho zùm yap é hkyô pé lé, yhangmoq koi pyám rá matú, ngamoq chõm doq-dan lui, ká hùn kat bê nghut lhê." ga akò.

²⁶ Haù mù lui, Poluq gi, hau htang nyi haù bang lé ji yù lui, yhangmoq eq rahá, lhoq san lhoq yung yù mù, noqkuq yhùm má wàng lui, yhangmoq yuq hkangmó é matú hkungga wó byi shoq ga, yhangmoq é lhoq san lhoq yung buinyi ngap bê hkyô lé, taí kyô ri.

Poluq Chyup Yù Huí É Hkyô

²⁷ Buinyi nyhit nyi haù ngap rá yàm má, Asia mau má é Yudaq byu pé ra-am gi, noqkuq yhùm má Poluq lé myàng kômù, shiwa byu pé lé shuí gabyong lui, yhang lé chyup yù mù, garú taí kó é dang gi,

²⁸ "Israelaq byu pé é, garúm yù keq, shí yuq gi, nga-nhúng byuhú lé le, jep é tará lé le, jowò shí lé le, shut shai é dõng jowò hkangmó má é byù banshoq lé mhoqshit sù nghut ri. Hau htoq agó, noqkuq yhùm má Grik pé lé shuí háng é eq, choyiyung jowò shí lé achaaq achyut kut é sù nghut ri." gá akò.

²⁹ (Hkâsu mù gá le, yhangmoq gi, Ehpesu myuq byù Trohpinu ga sù eq Poluq wá hkaù má rahá nghut kó é lé, myàng kômù, haù yuq lé noqkuq yhùm shut shuí háng nhõ ngam pyám kó é yanmai nghut ri.)

³⁰ Rawá gón gabyông lo mù, shiwa byu pé lhinghkyuq mai din lé lò kôluí, Poluq lé chyup zing to uchyang, noqkuq yhùm shinggan shut she hkyut htoq lò akò. Haù hkûn jáng, hkum pé lé myhi pyám akò nghut ri.

³¹ Poluq lé yhangmoq sat rá dà nyi kó é hkûn, Yerusalem wá gón gabyông nyi akò gá é hkyô lé, Romaq dap up zau é no má, lò je ri.

³² Haù mù, yhang gi, radá dâm shô up gyezau ra-am eq gyezô pé lé shuí chùng mù, byù hpung shut, din yán gyó lò akò. Yhangmoq gi, gyezau eq gyezô pé lé lhõm myàng kôjáng, Poluq lé nhuq nyi é mai hkying byuq akò nghut ri.

³³ Haù hkûn, dap up zau hpó gi, Poluq chyáng é je mù, yhang lé chyup yù lui, toqjáng tui í hkat eq tuí to nhang ri; hau htang,

yhang ó yuq nghut é hkyô lé le, haì kut shut é hkyô lé le myi wú ri.

³⁴ Shiwa byu pé kúm gi, rayuq rajung ga garú bum akò. Haù mù, gyezau hpó gi, lùm garu kó é yanmai, têng é hkyô lé rago a wó sê yù jáng, Poluq lé gyewap má shuí lò nhang ri.

³⁵ Poluq gi, zumhtang wang má je lo é hkûn, byù moq mó lùm htim chyin chyap lô kó é yanmai, gyezô pé gi, yhang lé waq doq lò akò.

³⁶ Shiwa byu pé gi, "Yhang lé sat pyám keq." ga châng garú nyi akò nghut ri.

Poluq, Yhumsing Gùng Mara A Bo É Lé Taí Sân Kyô É Hkyô

³⁷ Gyezô pé gi, Poluq lé gyewap má shuí wàng rá za nghut é hkûn, Poluq gi, dap up zau hpó lé, "Ngò nang lé dang wó nyò rá lúhú?" ga myi jáng, dap up zau hpó gi, "Nang, Grik mying dat mu lhê lúhú?"

³⁸ Nang gi, hí hkûn gumlao kut mù, byù sat wún bang myi hkying lé, yoso shut shuí htoq lò é sù, Egutuq byù a nghut lúhú?" ga tau myi ri.

³⁹ Haù hkûn, Poluq gi, "Ngò gi, Kiliki mau Tarshu myuq má é Yudaq byù nghut lhê; ngò nyi é wá gi, wá chyap wá zo za a nghut, jeju mai, byù shí bang lé ngò dang taí rá ahkáng byi laq." ga dũng ri.

⁴⁰ Gyedap up zau hpó ahkáng byi jáng, Poluq gi, zumhtang má yap to mù, shiwa byu pé shut loq he ri. Haù hkûn, yhangmoq lhunglhâng bang zim byuq kômù, Poluq, yhangmoq lé Hebre mying dõng taí é gi,

22

¹ "Gumang wui eq íwa pé é, ahkuí, ngò mara a bò nghu taí é dang lé gyô wú shi keq." gá ri.

² Yhangmoq gi, yhang Hebre mying dõng taí é dang lé wó gyô bùm kôjáng, gyai yhang zim byuq bekò. Haù mù, Poluq xoq taí é gi.

³ "Ngò gi, Yudaq byù rayuq nghut lhê. Kiliki mau Tarshu myuq má choq hpyit kôlháng, wá mó shí má nyi kó lò sù nghut lhê. Ngò gi, nga-nhúng ichyi íwa pé é jep é tará lé, Gamalelaq é loq má jikhùm nuquq mhoq yù lui, hkû-nyi lhê é nungmoq lhunglhâng bang su, Garaí Gasang lé gyai myit zing zuq é sù nghut lhê.

⁴ Ngò gi, shí Hkyô cháng bang lé shí é je shoq, zing-ri wú é sù eq, myiwe yuqgè ó yuq lé nghut kôlháng, chyup yù mù htóng má lhúng pyám wú bê sù nghut lhê.

⁵ Hkyangjong mó eq byin tú wap suwún wui lhunglhâng bang gi, ngá é saksè pé nghut akò. Ngò gi, Damaskuq myuq má nyi é yhangmoq é Yudaq gumang wui lé byi rá laiká yhangmoq chyáng mai wó yu chùng lui, haù má é bang lé le Yerusalem wá mó

má dam byi rá matú, chyup tuí ló rá ngú, Damaskuq myuq shut e é nghut lhê.

⁶ Nyigúng tú zó lé, ngò Damaskuq myuq shut sô chyáng ló nyi é hkún, maubó gi, ngá é lhinghkyuq má mauhkúng mai byodàn tung duqbó to bê nghut ri.

⁷ Haú mù, ngò myigúng má lêng gop tô le, wó gyô kat é danghtë gi, 'Sholuq, Sholuq, nang ngo lé haí mù zing-rí nyi lhê lúhú?' gá ri.

⁸ Ngò le, 'Yhumsing ê, nang ó nghut lhê lúhú?' nghu myí kat jáng, 'Ngò gi, nang zing-rí wún é sù, Nazaret wà byú Yesuq nghut lhê.' ga luí, Yhang tú tai kat ri.

⁹ Ngò eq rahá e ló é bang kúm gi, maubó lé myàng kôlháng, ngo lé tai é danghtë lé a sê gyo kó nghut ri.

¹⁰ Dum, ngò gi, 'Yhumsing ê, ngò haí kut ra rá lúhú?' nghu myi jáng, haú Yhumsing gi, 'Toq mù, Damaskuq myuq má wang ló aq, nang kut rá matú wò byi tô é hkyô pé lhunglhang, nang lé haú má lhom tai kyô berá nghut lhê.' ga ngo lé dum tai ri.

¹¹ Haú maubó é shingkang é yanmai, ngò myoqjit byuq mù, ngá é byinzùm wú gi, Damaskuq myuq shut ngo lé loq mai she wang ló akò.

¹² Haú hkún, Anani gá é yuqgê rayuq ngá chyáng lé huí ri. Yhang gi, jep é tará lé gyuq hkunggá é eq, haú má nyi é Yudaq byú lhunglhang bâng é hí má myoqdong gyai wó é sù nghut ri.

¹³ Yhang gi, ngá nâm má yap to luí, 'Gumang Sholuq é, nang myoq myàng aq hkoí!' ga tai ri. Haú hkún jáng yhang, yhang lé ngò wó myang kat bê nghut lhê.

¹⁴ Yhang dum xoq tai é gi, 'Nga-nhung íchyi íwa pé é Garai Gasang gi, nang lé, Yhang ô nau é hkyô sé sháng gaq ga luí le; Dingmán Sù lé wó myàng luí, Yhâng é nhut má é mungdang lé wó gyo sháng gaq ga luí le, hkyin to bê nghut ri.

¹⁵ Haú mù, nang gi, nang myang é eq wó gyô yu é hkyô pé lé, byú lhunglhang bâng é hí má, Yhâng é matú saksé hkám byi rá su dut rá nghut lhê.

¹⁶ Ahkuí, nang haí lé láng nyi ashí lúhú? Toq aq, Yhâng é mying lé lang luí wui-myhup hkám yu é eq, nang é yubak mara pé lé chí sân pyám aq.' gá ri.

¹⁷ Hau htang, ngò gi, Yerusalem wà mó má dum tau jí ló mù, noqkuq yhùm má kyú é dúng nyi le, moq byuq ló mù,

¹⁸ Nang, ngá é hkyô lé saksé hkám rá dang lé, yhangmoq a lhom hap yú kó rá nghut é yanmai, Yerusalem wà mó má hân htoq ló aq.' ga Yhumsing ngo lé tai nyi é lé, myoqwup shing-rán dông myang ri.

¹⁹ Haú mù, ngò gi, 'Yhumsing ê, tarajong ralhùm htang ralhùm má nang lé lumjing bang lé, htóng má chyup lhung pyám é eq,

hkat bat lhing wún é hkyô lé, yhangmoq sé bum akò.

²⁰ Nang é saksé Stehpan sat hui luí suí shun u lé, ngò nâm má yhang yap to mù, haú hkyô lé myit bo hui luí, yhang lé sat pyám bâng é mebu lé zúng byi é nghut lhê.' nghú tú tai bê.

²¹ Haú hkún, Yhumsing gi, 'Ê aq, ngò, nang lé, wê gâng é tưngbaù pé chyáng nhang kat rá.' ga, ngo lé tai ri." gá ri.

Poluq, Romaq Mingdán Byú Nghut É Hkyô

²² Shiwa byu pé gi, dang haú hkun jí za gyô yú kômú, "Shí sù é byú gi, myigúng htoq má nyi a gíng, sat pyám keq." ga, htê mó eq garú bum akò.

²³ Yhangmoq gi, haú su garu uchyang, yhumsing buhng lé hkyut dú pyám lhê, hpuilhup lé mauhkúng shut kyaq tâng lhê, kut nyi kôjáng,

²⁴ dap up zau hpó gi, Poluq lé gyewap má shuí hâng yú nhâng mù, yhang lé shiwa byu pé haí mù shí su ga garú bum kô é hkyô lé wó sé shoq ga, nhuq bat nhâng luí, myí choq nhang ri.

²⁵ Nhuq bat rá matú shokuq tuí eq tuí kôjáng, Poluq gi, nâm má yap tô é shô up gyezau lé, "Romaq mingdán byú ru nghut sù lé nhing, lhang a jéyáng shimá, nungmoq nhuq bat le gi, tará wang akò lúhú?" ga tai ri.

²⁶ Rashô up gyezau gi, dang haú lé wó gyo jáng, dap up zau chyáng ló mù, "Nang haí kut rá dá nyi lhê lúhú? Shí yuq gi, Romaq mingdán byú sheq ru nghut ri." ga luí, yhang lé ló tai kyô ri.

²⁷ Haú mù, dap up zau gi, Poluq chyáng é mù, "Nang gi, Romaq mingdán byú nghut lhê lúhú? Tai kyô wú laq." ga myí ri.

Poluq gi, "Ngò, Romaq mingdán byú nghut lhê." ga tú tai ri.

²⁸ Haú hkún, dap up zau hpó gi, "Ngò lhang ahpau myo myo byí pyám luí sheq, Romaq mingdán byú ru wó dut é nghut lhê." ga tú tai jáng, Poluq gi, "Ngò kúm gi, Romaq mingdán byú dut gú hku lé lo é sù nghut lhê." ga tai ri.

²⁹ Yhang lé myí choq wú rá gá é bang gi, haú hkún jáng, yhâng chyáng mai huí zut ló bum bekò. Gyedap up zau hpó le, Poluq gi, Romaq mingdán byú nghut é lé sé jáng, yhang lé tuí pyám bê nghut é yanmai, gyuq byuq bê nghut ri.

Yudaq Byin Tú Wapdoq Suwún Wuí Gam Hkoq Byuq É Hkyô

³⁰ Htang nyí, dap up zau hpó gi, Yudaq byu pé mai Poluq lé hun é mara haí nghut é hkyô lé hkyak wó sé shoq ga, Poluq lé tuí hpyi pyám byi mù, hkyangjong agyi pé eq Yudaq byin tú wapdoq suwún wuí lhunglhang lé jí tsing to luí, yhangmoq é gung gung má Poluq lé shuí wàng mù, shap to bê nghut ri.

23

¹ Haú hkûn, Poluq gi, Yudaq byin tú wapdoq suwún wui lé wú tsuq to mù, "Ngá gumang wui ê, ngò gi, hkû-nyí jé shoq Garai Gasâng é hí má sansêng é i-myyit êq asak dui nyí bê nghut lhê." ga tai ri.

² Haú mù luí, hkyangjong mó Anani gi, Poluq nâm má yap to bang lé, yhâng nhut má bat byi keq gà ri.

³ Haú hkûn, Poluq gi, yhang lé, "But hpyu tô é xewâm* nàng ê, nàng lé sheq Garai Gasâng êq bat rá nghut lhê. Nàng gi, tará eq rajung za ngo lé jéyáng rá matú shí má zung to lui nhing, hái mù tará eq shut shai é đông ngo lé bat nhang lhê thú?" ga tai ri.

⁴ Poluq nâm má yap tô é bang gi, yhang lé, "Nàng gi, Garai Gasâng é hkyangjong mó lé wám rhoi lhê thú?" ga lui, chòm tai akò.

⁵ Poluq gi, "Gumang wui ê, yhang gi, hkyangjong mó nghut é lé ngò a sê pyám mù nghut bê. Chyúmdang má le, 'Nàng amyú lé up é sú lé wó rhoi rá a nghut.'[☆] ga le ká tô é nghut lhê." ga tú tai ri.

⁶ Hau htàng, haú zing tô é bang má é ram gi, Saduke pé, góbang gi, Hparishe pé nghut é lé, Poluq gi, sé jáng, Yudaq byin tú wapdoq suwún wui lé, "Gumang wui ê, ngò gi, Hparishe awut ashín má é, Hparishe rayuq nghut lhê. Shí bê bang dum dui toq lô rá hkyô lé myit myoqbyú é yanmai, ngò jéyáng é huí nyi ri." ga lui, garú tai kat ri.

⁷ Yhang haú su ga tai kat jáng, Hparishe pé eq Saduke pé gi, dang jet jet lhùm lò kômù, Yudaq byin tú wapdoq hpông gi, gam hkoq lò byuq bekò nghut ri.

⁸ (Hkâsu mù gà le, Saduke pé gi, dum dui toq hkyô a joq; maumang lagyo pé le, sobyo pé le, a nyi ga tai bum akò. Hparishe pé kúm gi, haú pé joq lhê ga, lumjing bang nghut akò.)

⁹ Haú mù luí, gyai yhang tai garú bum akò. Haú hkûn, Hparishe hpúng má é tará sará pé ra-am gi, toq mù, "Shí yuq chyáng hai mara le, ngamoq a myàng nghut ri. Sobyô a nghut jáng, maumang lagyo rayuq yuq, yhang lé dang tai bê nghut jáng gi, hkâsu nghú kó rá thú?" ga lui, zuq zuq tai htíng lhùm akò nghut ri.

¹⁰ Haú su kut gyai yhang tai htíng lhùm lò kóráng, dap up zau hpó gi, Poluq lé láng myha pyám kó rá lé chiq é yanmai, yhang-moq chyáng gyó é mù, Poluq lé haú bâng é gung gung mai é lú shuí lò lui, gyewap má shuí wang ló rá matú, gyezô pé lé nhang kat ri.

¹¹ Haú myín, Yhumsing gi, Poluq é nâm má yap to lui, "Hkâgyuq, Yerusalem wà mó má nàng ngá é hkyô lé saksé hkám bê eq rajung

za, Romaq myuq má le saksé hkám ra shirá nghut lhê." ga, yhang lé tai ri.

Poluq Lé Sat Râ Haq Dâ É Hkyô

¹² Htàng napkyô, Yudaq byu pé gi, Poluq lé sat rá hpaqchyí chòm da kômù, yhang lé a wó sat sat gi, a zo a shuq rá nghut lhê ga, ó le ó dakam yu akò nghut ri.

¹³ Hpaqchyí shí lé chòm dâ é bang gi, myi xê yuq chyân nghut bum akò.

¹⁴ Yhangmoq gi, hkyangjong agyi pé eq suwún wui chyáng é kômù, "Poluq lé a wó sat sat gi, ngamoq hái le a zo nghú, chòm dakam yu to bê nghut lhê.

¹⁵ Hau é yanmai, ahkuí nungmoq gi, Yudaq byin tú wapdoq suwún wui eq rahá kut lui, Poluq é hkyô lé rago za myí gon wú rá nghu mhaú é đông, yhang lé nungmoq chyáng wut yù rá matú, dap up zaú chyáng dúng kat keq. Haú hkûn, ngamoq gi, hkyolat má yhang lé lhom sat pyám rá ri ri kut to rá nghut lhê." ga tai akò.

¹⁶ Nghut kôlhang, haú lhom haq sat kó rá gà é hkyô lé, Poluq é yhâng nhammó é yhangzo yuqgê zo wó gyô yù lui, yhang gi, gyewap má wang é mù, Poluq lé é tai kyô ri.

¹⁷ Haú hkûn, Poluq gi, shô up gyezau rayuq lé ji yù mù, "Zorâm shí lé dap up zaú chyáng shuí é aq, yhang, yhang lé shit kyo rá hkyô rajung joq lhê ga." ga tai ri.

¹⁸ Haú mù luí, shô up gyezau hpó gi, zorâm haú lé dap up zaú chyáng shuí é mù, "Zorâm shí nang lé shit kyo rá hkyô rajung joq lhê gà ri ga, yhang lé náng chyáng shuí lé rá matú, htóng byú Poluq gi, ngò lé ji yù mù tai ri." ga, yhang lé tai ri.

¹⁹ Haú jáng, dap up zau hpó gi, jauwò má zorâm haú lé yhâng loq mai she é mù, "Nàng ngo lé hái jung shit kyo nau ri thú?" ga, yhang lé baú tsik za myí ri.

²⁰ Haú hkûn, zorâm haú gi, "Yudaq byu pé gi, Poluq lé rago za sai myí wú rá su kut mhaú mù, napmá, Yudaq byin tú wapdoq má shuí yù rá matú, náng chyáng dung kó rá ga, myit chòm lui to bekò nghut ri.

²¹ Haú mù luí, yhangmoq ô nau é đông hkâgyo byi, hkâsu mù gà le, Poluq lé a wó sat sat gi, hái le a zo a shuq rá nghut lhê ga, byu myi xê yuq chyân yhang, ó le ó dakam yù bekò nghut ri. Haú bang gi, yhang lé lhom chyup yù rá matú haq lhom to láng kó rá nghut lhê. Ahkuí láng, yhangmoq gi, mù haú kut rá matú ri ri nghut bum bekò; náng é ahkáng lé za láng nyi bum akò nghut ri." ga shit kyô ri.

²² Haú hkûn, dap up zau hpó gi, zorâm haú lé, "Nàng, ngo lé shí hkyô shit kyo bê hkyô lé, ó yuq lé le hkátai kyo." ga, sidiq byi mù, tau nhang kat bê nghut ri.

* 23:3 But hpyu tô é xewâm gà é gi, gegùn labyoq kut bang lé gà lhê. ☆ 23:5 Htoq Lô 22:28 † 23:23 Myín sum hkying gi, nga-nhùng é myín gau hkying nghut lhê.

Mingzau Hpilik Chyang Poluq Lé Dé Kat É Hkyô

²³ Hau htâng, yhang gi, shô up gyezau í yuq lé ji yù mù, "Hkû-myin sum hkying† má Kesare wà mó shut é rà matú, gyezô pé í shô, myang ji bang nyhit xê, lâhâm chûng bang í shô kut mù, rì rì hen to keq.

²⁴ Hau htoq agó, Poluq lé mingzau Hpilik chyang ngón za wó dé kat rà matú, yhang ji rà myang pé le lajang byi keq." ga, yhangnhik lé pying kat ri.

²⁵ Laiká hun kat é le:

²⁶ "Aróng wó dik é mauzau Hpilik é, ngò Klodi Lusi gi, nguingón danglù shit kyô kat lhê.

²⁷ Shí yuq lé gi, Yudaq byu pé èq chyup yù mù sat pyám rà dà nyi bekò za nghut lhê. Nghut kôhlang, ngò gi, gyezô pé eq rahá é wú le, yhang Romaq mingdán byù nghut é lé wó sê yu é yanmai, yhangmoq chyang mai yhang lé hkyi lo é nghut lhê.

²⁸ Haù su mù, haù mù yhang lé mara hùn kô é hkyô lé sé nau é yanmai, yhangmoq é Yudaq byin tú wapdoq má yhang lé shuí jé byi wú bê nghut lhê.

²⁹ Haù hkûn, yhangmoq é tará hkyô eq séng luí za mara hun bùm kô é lé ngò myang ri. Nghut kôhlang, shí gíng é eq htóng lhung gíng é mara haì le a bò nghut ri.

³⁰ Shí yuq lé sat pyám rà hpaqchyí da kô é hkyô, ngo lé shit kyo kô é hkûn, radá dâm, yhang lé ngò náng chyang dé nhang kat bê. Yhang lé mara hùn nau é bang lé gi, nang hí má yhang hun lhum keq nghù pying kat bê nghut lhê." gâ ri.

³¹ Haù mù luí, gyezô pé gi, haù pying kat é dang eq rajung za, myín lé yhang, Antipatri wà mó jé shoq Poluq lé dé kat bekò nghut ri.

³² Htang nyí, myang ji bang lé ê châng dé nhâng kômù, yhangmoq gi, gyewap shut dum taù lò bekò nghut ri.

³³ Myang jí é gyezô pé gi, Kesare wà mó má jé kô é hkûn, mauzau hpó lé laiká byi mù, Poluq lé le jâng ap byi akò nghut ri.

³⁴ Haù hkûn, mauzau hpó gi, laiká haù lé ban nghap jáng, Poluq hká mau má é byù nghut é hkyô lé myí wú luí, Kiliki mau má é byù nghut é lé sé jáng,

³⁵ "Nang lé mara hùn bang jé jáng sheq, náng mù lé ngò gôn wú rà." ga taí ri. Hau htâng, yhang gi, Poluq lé Herut é hkohkâm-wâng má byam zúng byi keq ga hkunmó hkyô tô ri.

24

Poluq, Mara Hùn Huí É Hkyô

¹ Hau htâng, ngo nyí lai jáng, hkyangjong mó Anani gi, suwún wuí ra-am eq tará sé sú Tertulu lé shuí gyó ló mù, mauzau hpó hí má Poluq lé mara lé tai hun bum akò.

² Haù hkûn, Poluq lé hí má ji hâng tô é nghut mù, Tertulu, yhang lé mara hùn dang tai hí é gi, "Aróng wó dik é Hpilik é, ngamoq gi, nyi-ngón yuqyo é hkyô lé nang é yanmai gyaì myáng shoq wó hkam yu bum é nghut lhê. Nang sê up sé hking é jeju lé, byù myú shí wó hkâm zô nyi é yanmai,

³ ngamoq gi, haù lé hkyô hkat hkingmó eq jowò hkingmó má jeju bûn é myit eq hkam yu nyi bê nghut lhê.

⁴ Nghut kôhlang, ngò nang lé lhoq hkyik é dông a dut sháng gaq, tai rà dang ratot zo lé, myit hâng hng to mù gyo byi laq nghù dúng tóngbân lhê ô!

⁵ Shí yuq gi, byù lé gunjang sù, mingkan gón má é Yudaq byu pé lhunglhang lé shuí gabyong sù eq, haù Nazaret hpúng má é hkyô-u shê sù nghut é lé, ngamoq myang ri.

⁶ Hau htoq agó, yhang gi, noqkuq yhùm lé achaq achyut kut rà dà nyi luí, yhang lé ngamoq chyup yù mù, (ngamoq é tará dông jéyáng rà hen nyi é hkûn,

⁷ dap up zau Lusi gi, lé lò mù, ngamoq é loq mai yhang lé lé lú shuí yù luí, yhang lé mara hùn bang lé, náng chyang jé keq ga hkunmó hkyô tô é nghut lhê.)

⁸ Haù mù, náng, yhang lé myí wú jáng, ngamoq yhang lé hun é mara banshoq têng é hkyô lé, náng wó sé rà nghut lhê." gâ ri.

⁹ Yudaq byu pé le, haù pé gi, têng lhê ga bò chòm tai akò nghut ri.

Poluq, Mara A Bò É Lé Tai Hung É Hkyô

¹⁰ Mingzau hpó gi, Poluq lé dang tai rà dông loq lik kat jáng, Poluq tai é gi, "Zau ê, shí mau bâng é ahtoq má, náng zanwut myo myo jéyáng byi nyi é hkyô lé, ngò sê é yanmai, ngò gabú myit èq yhumsing matú, mara a bò é hkyô tai bá.

¹¹ Ngò, Yerusalem wà mó má noqkuq rà matú doq e é buinyi raxe í nyi lhang a chyán shi é gi, náng luí za wó sé rà nghut lhê.

¹² Noqkuq yhùm má ngò ó yuq eq tai htíng lhum é lé lhang, tarajong, a nghut jáng, wà hkaù hká jowò má le byu pé lé shuí gabyông é lé lhang, ngo lé mara hun é bang gi, a myàng kó.

¹³ Ahkuí, ngo lé yhangmoq hun é mara pé lé, náng hí má yhangmoq saksé lhang a wó tûn shit kó nghut ri.

¹⁴ Nghut kôhlang, náng hí má ngò yín yù rà hkyô rahkat gi, yhangmoq eq shut shai hkyô ga myhng tô é Hkyô lé cháng luí, ngamoq é ichyí iwá pé é Garai Gasang lé noqkuq nyi lhê. Jep é tará eq myiqhtoi laiká pé má kâ tô é lhunglhang lé le lumjáng lhê.

¹⁵ Ngò gi, dingmán é bang eq a dingmán bâng é dum duí toq lò rà hkyô joq é lé, yhangmoq eq rajung za Garai Gasang má myit myoqbyu nyi é sú nghut lhê.

¹⁶ Haù mù luí, Garai Gasang eq byu é hí má, ngò gi, rà é hkyô a bo é za, myít é hkyô san za wò dut nyi shoq, shikut nyi lhê.

¹⁷ Zanwut tsómra lai é htâng má, ngò gi, ngá é byù myù má é myùng bang lé chyunghuq byi rà eq alu kat rà matú, Yerusalem wà mó shut lò jé bê nghut lhê.

¹⁸ Haù su kut nyi é hkùn, ngò eq rahá hai byù moq mó le a nyi, hai jung gabyông é hkyô le a htoq, ngò noqkuq yhùm má lhoq san lhoq yung yù bê hkyô lé za, yhangmoq myang akò.

¹⁹ Nghut kôhang, Asia mau má é Yudaq byù ra-am gi, haù má nyi tô é nghut lhê; yhangmoq mai ngo lé mara hùn rà hkyô joq kô é nghut le gi, shí náng é hí má yhangmoq lé jé kô ra nghut lhê.

²⁰⁻²¹ Haù a nghut jáng, shí má nyi tô é bang gi, ngò Yudaq byìn tú wapdoq hí má yap to mù, 'Shi byuq bâng é dum dui toq rà hkyô é yanmai, hkù-nyi nungmoq ngo lé jéyáng nyi akò.' nghù luí, garú é dang hkùn mai lai luí, ngò má gotú mara myàng shi kô é nghut le gi, yhangmoq yhang tái kyo kó sháng gaq." gá ri.

²² Hpilik gi, Hkyô haù lé rago sê lhê nghut mù, "Gyedap up zau Lusi jé jáng sheq, ngò, nungmoq é mù lé doqdan byi rà nghut lhê." ga luí, yhangmoq lé ahkying htot kat byi ri.

²³ Poluq lé le, zúng za zúng to mù, yhâng é buinùm ji-myi wui mai yhang ra chá é hkyô lajang byi naù kô é bang nyi le gi, ahkáng byi keq ga luí, shò up gyezau lé hkunmó hkyô kat ri.

²⁴ Buinyi rayoq zo lai é htâng má, Hpilik gi, Yudaq myiwe myhí nghut é sù yhangmyi Drusila eq jé lé mù, Poluq lé ji lò nhâng luí, yhang, Hkrisduq Yesuq lé lumjing hkyô tái kyô é le gyô yu ri.

²⁵ Poluq gi, dingmán hkyô, yhumsing gùng lé hkang é hkyô eq, jé lò rà tará dara hkyô lé mhoqshit jáng, Hpilik gi, gyô sheq mù, "Nàng ahkuí wó lò bê, ngò jin jáng sheq nang lé dum ji yù rà nghut lhê." ga tái ri.

²⁶ Hpilik kùm gi, Poluq eq ngùn haq byi rà lé myít myoqbyu mù, yhang lé anum num ji yù luí, yhang eq nyo lhum lhum kut ri.

²⁷ Zanwut í zân lai jáng, Hpilik é mauzau ayá má Porku Hpestu lé htaí kat pyâm akò. Nghut kôhang, Hpilik gi, Yudaq byu pé é hí má myoqdong wó nau é yanmai, Poluq lé htóng má jáng lhung pyâm to bê nghut ri.

25

Poluq, Kehtaq Chyáng Jé Râ Matú Dúng Ê Hkyô

¹ Hpestu gi, haù mau má jé é sum nyi lai jáng, Kesare wà mó mai Yerusalem wà mó shut doq lò ri.

* 25:8 Kehtaq gá é gi, "hkoséng" gá é nghut lhê.

² Haù hkùn, hkyangjong agyi pé eq Yudaq byù hkyô-u shê bang gi, yhang lé Poluq é hkyô lé hkyang lhom shit kômù,

³ yhangmoq gi, Poluq lé hkyolat má lhom haq sat pyâm rà dà to kômù luí, jeju ralhum kut byi é dông Poluq lé Yerusalem wà mó shut dé kat byi rà matú, Hpestu lé lhom dúng akò.

⁴ Nghut kôhang, Hpestu gi, "Poluq lé Kesare wà mó má sheq ru lhung tô lhê, hkâ-myháng a myáng má, ngò yhang le haù má dum taù lò rà nghut lhê.

⁵ Haù mù, nungmoq má é hkyô-u shê bang ra-am, ngò eq rahá gyó lò mù, haù yuq kut shut é hkyô bo é nghut jáng gi, yhang lé mara lé hùn kó sháng gaq." ga tù tái ri.

⁶ Hau htâng, yhang gi, shit nyi, raxê nyi kô yhangmoq chyáng nyi yù luí, Kesare wà mó má taù lò mù, htang nyi gi, tará tanghkuq má zùng luí, Poluq lé yhâng hí má shuí wang lò rà matú hkunmó hkyô kat ri.

⁷ Poluq jé jáng, Yerusalem wà mó mai gyó lo é Yudaq byu pé gi, yhâng é lhinghkyuq má yap to kôluí, saksé a wó tùn shit é mara mó myo myo lé, yhâng é ahtoq má chôm tái hun akò nghut ri.

⁸ Haù hkùn, Poluq gi, "Yudaq byu pé é jep é tará eq shai é dông le, noqkuq yhùm lé shut é dông le, Kehtaq* lé shut é dông le, ngò a kut wú." ga luí, mara a bo é hkyô tái ri.

⁹ Nghut kôhang, Hpestu gi, Yudaq byu pé é hí má myoqdong wó nau mù, Poluq lé, "Nàng, Yerusalem wà mó má doq lò luí, shí hkyô pé lé ngò haù má doqdan byi rà matú, nàng dóng lhê lhú?" ga myí ri.

¹⁰ Poluq kùm gi, "Ngò gi, doqdan hui rà nghut jáng, shí doqdan é jowò, Kehtaq é tará hpyit wap má ahkuí yap to bê nghut lhê. Nàng sê é eq rajung za, ngò gi, Yudaq byu pé lé hai lhang a shut wú sú nghut lhê.

¹¹ Laqma mù, shí gíng é mara lé, ngò kut shut pyâm é nghut le gi, shí hkâm rà hkyô lé ngò a he pyâm; nghut kôhang, shí Yudaq byu pé mai ngo lé mara hun é hkyô a teng é nghut jáng gi, ó yuq lhang ngo lé yhangmoq é loq má ap byi rà ahkáng wó rà a nghut, ngò gi, Kehtaq chyáng wang tái rà nghut lhê." ga tù tái ri.

¹² Haù hkùn, Hpestu gi, yhâng é byìn tú wap bang eq ban hpyê lhum jáng, "Nàng Kehtaq chyáng wang tái rà ga bê nghut lhê, Kehtaq chyáng wang lò aq hkoí!" ga tái kat ri.

Poluq Lé, Hkohkâm Agripa Hí Má Shuí Hâng Yu É Hkyô

¹³ Hau htâng, buinyi hkâ-myháng a myáng má, Hkohkâm Agripa eq yhanggu myiwe zo Bernike gi, Kesare wà mó má jé lé mù, Hpestu lé lé hui nyo akò nghut ri.

¹⁴ Haù mù, yhangnhik tâng gi, buinyi tsómra myáng nyi nyi é htâng má sheq, Hpestu gi, haù Poluq é hkyô lé hkohkâm wa eq taí kyô lhúm é gi, "Hpiilik, lhúng to láng é htóng byù rayuq nyi ri.

¹⁵ Ngò Yerusalem wà mó má nyi tô é hkùn, hkyangjong agyi pé eq Yudaq byu pé é suwún wuì gi, haù yuq é hkyô lé taí kyo kôluì, haù yuq lé mara byi rã matú ngo lé chòm dúng akô.

¹⁶ Haù hkùn, ngò gi, mara hun é hui sù, mara hun é bang eq chyung chyôq yoq kut luì, yhangmoq hun é mara lé yhumsing matú mara a bò é hkyô a wó taí shi lé, ó yuq lé ap byi pyám rã le, Romaq htúng a joq nghú luì yhangmoq lé taí kyo bê nghut lhê.

¹⁷ Yhangmoq ngá htâng châng gyô lô kô é hkùn, ngò gi, a nô yu é za, htang nyi jáng tarã tanghkuq má zúng luì, haù yuq lé shui wang lò rã matú hkunmó hkyô kat é.

¹⁸ Haù hkùn, haù yuq lé yhangmoq mara chòm hun bùm kôle, ngò myit ngàm tô é su mara rallhum le a hun htòq lô kô nghut ri.

¹⁹ Yhangmoq é noqkuq htúng hkyô eq, haù dui nyi ri ga Poluq eq taí é, shi byuq bê Yesuq é hkyô lé za dang jet jet lhúm bum akô.

²⁰ Haù mù, ngò gi, haù hkyô lé hká dông gon yù rã le a sé lô é yanmai, haù hkyô lé Yerusalem wà mó má doqđân é lô hkam yù rã matú, yhang dóng a dóng é hkyô lé myí wú le,

²¹ Poluq yhang sheq, Hkoséng mó chyáng jé rã ga taí é yanmai, Kehta q chyáng a dé kat shi é u lé, yhang lé zúng nyi shirã matú, ngò hkunmó hkyô kat é nghut lhê." gá ri.

²² Haù hkùn, Agripa gi, "Ngò le haù yuq é dang gyô wú nau ri." ga, Hpestu lé taí jáng, yhang gi, "Napmá, nàng wó myang gyô rã nghut lhê." ga tũ taí ri.

²³ Htâng nyi, Agripa eq Bernike nhiktàng gi, shing kang bò bò za lé lô mù, dap yù zau wuì eq wà mà é agyi suwún wuì eq rahá, rúng gok mó má wang zung tô bùm kô é hkùn, Hpestu hkunmó hkyô kat jáng, Poluq lé shui hâng tô akô.

²⁴ Haù hkùn, Hpestu taí é gi, "Hkohkâm Agripa eq ahkuì shi má zup zing tô é lhunglhang bang é, Yerusalem wà mó eq shi wú mà é Yudaq byu pé banshoq bang, ngá chyáng lé taí kôluì, shi yuq lé asak a wó dui nhang to lo ga garũ bùm é gi, ahkuì nunqmoq myang é shi yuq yhang nghut bê.

²⁵ Nghut kôlhang, shi yuq zui sai é má shi gíng é mara haì lé lhang ngò a myàng nghut ri. Yhang gi, Hkoséng chyáng wàng rã ga taí é yanmai, yhang lé Romaq myuq shut dé kat rã matú ngò myit hpyit to bê.

²⁶ Dé kat bá nghú jáng le, ngá é yhumsing Hkoséng chyáng yhang é hkyô jihkúm nuqguq kã hun kat rã haì le a bò nghut ri. Haù mù luì, yhang lé ban myi gôn wú jáng

sheq, kã rã hkyô rajung jung hkálhang ngò myàng abe nghú, nunqmoq banshoq bãng é hí má le, je riyhang nàng Hkohkâm Agripa é hí má le, yhang lé ngò lhoq htoq shit é nghut lhê.

²⁷ Hkãsu mù gã le, htóng byù rayuq yuq lé dé kat é hkùn, yhang lé hun é mara a wó tũn shit lé gi, a htuk nghú luì, ngò myit lhê." gá ri.

26

Poluq É Hí Hpyang Lhê É Nyi Yap Hkyô

¹ Haù hkùn, Agripa gi, Poluq lé, "Nàng, nàng matú dang tai rã ahkáng wó bê." ga taí ri.

Haù mù luì, Poluq loq tũ kat mù mara a bò é hkyô taí é gi,

²⁻³ "Hkohkâm Agripa ê, nàng gi, Yudaq byu pé é htung hking banshoq eq taí htíng lhúm é hkyô hkat hkangmó lé, gyai sê to sũ nghut é yanmai, Yudaq byu pé ngo lé hun é mara hkat hkangmó lé, ngò hkũ-nyi nàng é hí má mara a bò é hkyô myang taí é gi, ngá matú gabú hpo yhang nghut ri nghú myit yu nyi lhê; haù mù luì, ngá dang lé myit hing é eq gyô yù byi laq nghú, dúng tóngbãn kat lhê.

⁴ Ngò gi, zoshàng hkùn mai, ngá amyù má le, Yerusalem wà mó má le, hkãsu kut nyi kô lo é hkyô lé, Yudaq byu pé lhunglhang bang gi, sé gũ nghut akô.

⁵ Yhangmoq gi, ngò lé hí hkùn mai sé kô é yanmai, ngò, ngamoq é noqkuq htúng mà é tarã htan dik é hpúng má bò é Hparishe rayuq nghut é hkyô lé, saksé hkãm nau kô é nghut jáng, yhangmoq wó hkâm lhê.

⁶ Nghut kôlhang, doqđân é hui zo rã matú, ahkuì ngò shi má yap tô é gi, Garai Gasang eq ngamoq é ichyí wa pé lé byi tô é danggidiq lé myit myoqbyu nyi é yanmai nghut lhê.

⁷ Ngamoq é byù myù raxe í hú gi, danggidiq jeju haù lé wó hkam yù shoq ga, Garai Gasang lé nyi myin noqkuq dojau shikut nyi bum akô; Hkohkâm wa é, myit myoqbyù hkyô hau é yanmai, ngo lé Yudaq byu pé mara hun bum akô nghut ri.

⁸ Garai Gasang gi, shi bê bang lé dum lhoq tui lhê gã é hkyô lé, a wó lùm nghú, haì mù myit yu akô lhu?

⁹ Ngò le, Nazaret wà byù Yesuq é myieng eq shai lhúm é dông myo myo wó kut rã nghut lhê nghú, gè gè yhang myit yu wú bê nghut lhê.

¹⁰ Gè gè haù dông le Yerusalem wà mó má kut wú bê nghut lhê; hkyangjong agyi pé chyáng mà é ahkáng wó yù luì, ngò gi, sân-yung bang myo myo lé htóng má kat pyám é eq, yhangmoq sat hui kôjáng le, ngò myit bò huì wú bê nghut lhê.

¹¹ Ngò gi, tarajong banshoq má a lhung lhung yhangmoq lé dam byi luì, Yesuq lé rhoi dang taí kô shoq shikut wú bê nghut lhê; nhik mó góng yu luì, gó mau mà é wà pé

lhang-jé shoq, yhangmoq lé châng zing-rí wú bē nghut lhê.

Poluq Hpúng Byú Dut Lo É Hkyô

¹² Háu hkún, radám lé, ngò gi, hkyangjong agyi pé chyáng mai ahko ahkáng eq hkunmó lé yu chùng mù, Damaskuq myuq shut e ló nyi le,

¹³ Hkohkâm wa ê, nyígùng tu ló zó lé, bui htoq má je duq é maubó gi, háu hkyô má, ngò eq ngá é luzúm wui é lhinghkyuq má, mauhkúng mai duq bó htoq lo é lé myang ri.

¹⁴ Háu hkún, ngamoq banshoq bang myígùng má léng gop tó bum le, Hebre myíng dōng, 'Sholuq, Sholuq, nàng, ngo lé háu mù zing-rí nyi lhê lúh? Zuchún lé pik le gi, náng é matú gyai yhang wui lhê.' ga luí, ngo lé taí é dangtê lé ngò wó gyô kat ri.

¹⁵ Háu mù, ngò gi, 'Yhumsing ê, nàng gi, ó yuq nghut lhê lúh?' nghú luí, myi jáng, háu Yhumsing tú taí é gi, 'Nàng zing-rí nyi é Yesuq nghut lhê.

¹⁶ Ahkuí toq yap aq, hkâsu mù gâ le, ahkuí, nàng, ngo lé myáng bē hkyô eq, ngò, nang lé tún shit shirâ nghut é hkyô pé é matú, ngá é mú wún rá byu eq saksé dut nhâng rá dōng nang lé hkyin to rá nghú, ngò náng chyáng lé htoq shit é nghut lhê.

¹⁷ Náng é amyú pé é loq mai le, tūngbaù pé é loq mai le, ngò, nang lé hkyi yù nyi rá nghut lhê.

¹⁸ Yhangmoq, yubak hkyut pyám byí é jeju wó yú rá eq, ngo lé lumjǐng é yanmai, lhoq sán-yúng huí é bang eq rahá silí wunlí wó hkam yú kó sháng gaq nghú, yhangmoq é myoq lhoq hpóng byí mù, mauchut hkaù mai maubó shut, Tsadán é a-tsam hkaù mai Garai Gasáng shut yhangmoq lhing ló rá matú, ngò, náng lé yhangmoq chyáng nhang kat rá nghut lhê.' gâ ri.

Poluq Kut É Muzó Hkyô

¹⁹ Háu mù luí, hkohkâm Agripa ê, ngò gi, mauhkúng má é myoqwup shing-rán háu lé a gyô é a wó é nyi nghut lhê.

²⁰ Ngò gi, yhangmoq myit lhing luí, Garai Gasang shut lhing taù lò mù, myit lhing bē hkyô lé, hkyí zó loq zó dōng mai tún shit kó sháng gaq nghú, sǎng-hi má Damaskuq myuq má nyi é bǎng chyáng mai hí luí, Yerusalem wà mó má é bǎng chyáng má le, Yuda mau gón má é bǎng chyáng má le, tūngbaù pé chyáng má le, hkó kyo bē nghut lhê.

²¹ Hau é yanmai, Yudaq byu pé gi, ngo lé noqkuq yhúm má chyup yú luí, sat pyám rá da kó é nghut lhê.

²² Nghut kōlhang, ngò gi, hkú-nyí jé shoq Garai Gasáng eq garúm é lé wó yú luí, ahkuí shí má yap to mù, tiq ko banshoq bang lé saksé wó hkâm kyô é nghut lhê.

²³ Ngò taí é má, Hkrisduq gi, hpuzo luí, shí bē bang mai sǎng-hi duí toq lò mù, Yhǎng é

amyú eq tūngbaù amyú pé lé maubó é hkyô lé wó taí kyo rá nghut lhê ga luí, dut lò rá hkyô lé, myiqhtoí pé eq Mosheq taí tó é hkyô mai lai luí, ngò gotú hái le a taí é nghut lhê." gâ ri.

²⁴ Yhang háu su ga mara a bo é hkyô taí é lé, Hpestu gi, "Poluq ê, nàng na bē! Lúm mhoq myô yu é yanmai na bē nghut ri." ga luí, htê mó eq dang lat taí hpyit kat ri.

²⁵ Poluq kúm gi, "Aróng wó dik é Hpestu ê, ngò gi, nâ é a nghut, ngò taí é dang gi, tengmán é dang eq dang gyíng nghut lhê.

²⁶ Shí hkyô lé hkohkâm wa yhang le sê to gù nghut lhê mù, yhǎng é hí má ngó a gyuq a kyum taí é nghut lhê. Hkâsu mù gâ le, shí hkyô gi, nungwò má kut é a nghut é yanmai, hkohkâm wa yhang a bo sê é gi, hái le a joq ra nghut lhê nghú, ngò myit lum nyi lhê.

²⁷ Hkohkâm Agripa ê, nàng gi, myiqhtoí pé é dang lé lumjǐng lhê lúh? Náng lumjǐng é hkyô lé ngò sê lhê." ga tú taí ri.

²⁸ Háu hkún, Agripa gi, Poluq lé, "Razup za má, nàng, ngo lé Hkristan rayuq wó dut nhâng nhô ngam ri lúh?" ga taí ri.

²⁹ Dum Poluq gi, "Razup za má nghut nghut, myáng myáng má nghut nghut, shí shamtoq-tui pé mai lai luí, nàng za a nghut, hkú-nyí ngò taí é dang lé gyô nyi é lhunglhǎng bang, ngò su dut rá matú, ngò gi, Garai Gasang lé kyúdūng nyi lhê." ga tú taí ri.

³⁰ Háu hkún, hkohkâm wa gi, ginwáng zau hpó eq Bernike le mù, háu má zūng tó é bang eq rahá toq yap ri.

³¹ Yhangmoq htoq lò kó é hkún, "Shí yuq gi, sat gíng é mara eq htóng lhúng gíng é mara hái le a kut shut nghut ri." ga, rayuq eq rayuq taí lhum bum akó nghut ri.

³² Agripa gi, Hpestu lé, "Shí yuq gi, yhang mai Kehta q chyáng jé rá ga a taí tó é nghut le gi, yhang lé wó nhang pyám berâ nghut lhê." ga taí ri.

27

Poluq, Romaq Myuq Shut Wui-sanghpo Mai E Ló É Hkyô

¹ Ahkuí, ngamoq lé Itali ming shut wui-sanghpo mai gũ dap lò nhǎng rá matú myit hpyit to kólú, yhangmoq gi, Poluq eq htong-byú góbang ra-am lé, Augustuq Hkosēng é gyewap mó má é, Yuliu gâ é shó up gyezaù é loq má ap byí kat akó.

² Háu hkún, Asia mau má é wuimau gin-gau chǎng luí wà pé má wang jón lò é, Adramuti myuq mai toq é wui-sanghpo má ngamoq wang ji bē nghut lhê. Htesaloni wà mó má é Aristakuq gâ é Makedoni byú rayuq le ngamoq eq rahá nghut lhê.

³ Htang nyí, ngamoq gi, Sidun myuq má no bē nghut lhê. Yuliu gi, Poluq lé shogyo mù, yhǎng chyáng rá é hkyô lé yhǎng é

buinùm wui mai lhom lajang byi kó sháng gaq ga, yangmoq eq é hui rá matú ahkáng byí kat ri.

⁴Haù mai dum toq ló é hkùn, lai tau mut é yanmai, Kupru zinzóng lé lai hkaù uchyang jí lai ló mù,

⁵Kiliki eq Pamhpuli mau má é wuimau đông lai byit ló le, Laiki mau má é Mura myuq má jé bê nghut lhê.

⁶Haù má, shô up gyezau hpó gi, Itali ming shut dap e ló é, Alesandru myuq má é wui-sanghpo lé myang hkyup luí, ngamoq lé haù má jí nhâng bê nghut ri.

⁷Haù mai buinyi myo myo yhó yhó lé za jí e ló luí, awui ahke yang Kídu wà mó eq ang má wó jí ló jáng, lai tau mut é yanmai, hí shut a wó lai ló ló mù, ngamoq gi, lai lé cháng luí, Kreti zinzóng lé lai hkaù mù, Salamone kongzô é tú tap àng é mai lai ló é nghut lhê.

⁸Haù má é wuiyám mai awui ahke jí ló lé, Lasea wà eq a wê lhum é Yuqyo é Guhkan gá é jowò má jé ri.

⁹Ahkuí, buinyi tsómra lhoq lhai pyám luí, haù Zoshuq gám pói lai bê nghut é yanmai, wui-sanghpo mai sô wún le gi, gyuq chiq rá nám jé bê nghut ri. Haù mù, yangmoq lé Poluq tái pun tái kyíng é gi,

¹⁰"Ahkaù pé ê, shí dàm lhê é wui hkyô gi, wuihke mó hui luí, wui-sanghpo eq zé pé sùm pyám rá htoq agó, nga-nhùng é asak lhang sum rá dut é hkyô lé, ngò byu myang ri." gá ri.

¹¹Nghut kôlhang, shô up gyezau hpó gi, Poluq é dang lé gyo rá malaí, wui-sanghpo hkàng sù eq wui-sanghpo yhumsing é dang lé, je lum ri.

¹²Guhkan haù gi, gyoqmyò* wó lhoq lhai rá su a dut é yanmai, myo hpyang gi, Hponik guhkan má wó jé le jé mù, haù má gyoqmyò ló nyi lhai rá matú chôm myit huí akô. Guhkan haù gi, Kreti zinzóng má maupyi buiwàng hkyam eq mautsung buiwàng hkyam shut hu tô é jowò nghut ri.

Wuimau Má, Laidun Mó Htùng Hui É Hkyô

¹³Maupyi shut má é lai yhó le hik ló jáng, yangmoq myit tô é má hkyak nghut bê su ngam pyám kôluí, shamtoq goknghe lé lhoq toq yú kômù, Kreti zinzóng yám đông jí e ló bê nghut lhê.

¹⁴Nghut kôlhang, hká-myháng a myáng má, Buihtoq mautsung lai gá é laidun mó gi, haù zinzóng mai mut ló luí,

¹⁵wui-sanghpo lé ló mut htùng é yanmai, hí shut a wó ló ló jáng, ngamoq gi, lai mut ló é shut châng yông ló bê nghut lhê.

¹⁶Ngamoq gi, Koda gá é zinzóng zo lé lai hkaù uchyang yông ló nyi é hkùn, haù sakhkyilhai lé gyai shikut é eq wó llang yú luí,

¹⁷wui-sanghpo ahtoq má llang toq to bé. Wui-sanghpo lé gi, a byoq lo shoq tuí eq tuí kít to bê nghut lhê. Dum, yangmoq gi, Surti gá é semui bùm má ló kê gyám to rá lé chiq kô é yanmai, wui-sanghpo má é panlong pé lé lhoq nyhum hkyô yú mù, châng yông ló bekô nghut ri.

¹⁸Laidun mó lùm htan é yanmai, htang nyi yangmoq gi, hpugá zé pé lé hkyom dú hkyô pyám bekô nghut ri.

¹⁹Sum nyi nghu é nyi má, yangmoq gi, wui-sanghpo zé pé lé yhumsing é loq eq yang hkyô pyám bekô.

²⁰Buinyi myáng myáng, bui lé le, kyí pé lé le a myàng é eq, laidun mó za ru mut nyi é yanmai, wó lut rá nghu myit myoqbyu tô é hkyô lé, ngamoq tô pyám bê nghut lhê.

²¹Yhangmoq zoshuq a zô é, buinyi tsómra myáng lô bê nghut mù luí, Poluq gi, yangmoq é gung gung má yap to mù, "Ahkaù pé ê, nungmoq ngá é dang gyo luí, Kreti zinzóng mai a htoq ló é nghut le gi, shí su htên byoq é marop hui zo rá a nghut.

²²Ahkuí nghut kôlhang, ngò tái é dang lé gyô yú mù myit wum yú keq; nungmoq má é hká yuq lé asak sum rá a nghut, wui-sanghpo za sheq htên byoq byuq rá nghut lhê.

²³Hkásu mù gá le, ngo lé sing é, ngò dojaú nyi é Garai Gasang é maumang lagyo rayuq, amàn ngá é nàm má lé yap to mù, ngo lé tái é gi,

²⁴'Poluq ê, hkágyuq, Kehtaq é hí má nàng wó yap rá nghut lhê. Wui-sanghpo shí má nàng eq rahá jí tô é lunglhang báng é asak lé, Garai Gasang gi, náng é yanmai, lai lai byi rá nghut lhê.' gá ri.

²⁵Hau é yanmai, ahkaù pé ê, myit wum yú keq, ngo lé tái kyô é eq rajung za dut lò rá nghut lhê ngù luí, Garai Gasang lé ngò lumjing nyi lhê.

²⁶Nghut kôlhang, nga-nhùng gi, zinzóng ralhum lhum má ló htùng chyap to rá nghut lhê." ga luí, yangmoq lé i-myi tai tít gi.

²⁷Buinyi raxe myi nyi myín má, gunggam yoq lé, ngamoq gi, Adria wuimau má yông lhang wún é hkùn, sanghpo hkàng bang gi, dùng yám eq chyàng lo nyi é su gá é lé sê gyo kat akô.

²⁸Haù su mù, wui nik é lé kê wú lé, loqlam í xê kô nik é lé wó sê akô. Razup zo má dum kê wú le, loqlam raxe ngò kô za nik é lé myàng akô nghut ri.

²⁹Haù mù luí, luqmq má ló záng htung rá lé chiq kômù, yangmoq gi, wui-sanghpo htàng shut má é shamtoq goknghe myi lhum lé lhoq hkyô kat luí, mau hân bó sháng gaq ga kyúdtung nyi bum akô nghut ri.

³⁰Wui-sanghpo hkàng bang gi, wui-sanghpo lé tô pyám to luí hpàng rá dà é myit eq, wui sanghpo-u shut má é shamtoq goknghe pé

* 27:12 Gyoqmyò lé, haù mau má laidun mó lò dut mù, yông wún le gyuq chiq nám nghut lhê.

lé lhoq hkyô râ su kut mhaú luí, sakhkyílhai lé wui má lhoq hkyô nyi bum akô.

³¹ Haú mù, Poluq gi, shô up gyezau eq gyezô pé lé, "Shí bang wui-sanghpo má a nyi lé gi, nungmoq wó lut râ a nghut." ga tai ri.

³² Haú hkùn, gyezô pé gi, sakhkyílhai lé tui tô é tui lé zân hpyit kat kôluí, sakhkyílhai gi, byit gyô byuq bê nghut ri.

³³ Maubô lô jáng, Poluq gi, yhangmoq banshoq bang lé zang zo râ matú myit wum byí é gi, "Nungmoq gi, myit chiq luí, zoshuq hai le a zô é, hkû-nyi raxe myi nyi myang lô bê.

³⁴ Haú mù luí, zoshuq rajung jung zo keq! Haú gi, nungmoq wó lut râ matú nghut lhê. Nungmoq chyâng mâ é ó yu é xâm rahkat lhang byuq râ a nghut." ga ri.

³⁵ Haú su ga ban tai é eq, yhang gi, muk lé yú luí, yhangmoq banshoq bâng é hí má Garai Gasâng jeju lé hkya-on mù, muk lé hpé luí, zô hí bê nghut ri.

³⁶ Haú hkùn sheq, banshoq bang gi, myit wum wó yú kômù, zoshuq zô bum beko nghut ri.

³⁷ Wui-sanghpo haú mâ é byù lhunglhang gi, í sho nyhit xe hkyuq yuq nghut lhê.

³⁸ Yuq hkangmó bàn zô gyí é htâng má, wui-sanghpo sôm râ matú, sungso pé lé wui má dú kat pyâm akô nghut ri.

Wui-Sanghpo Htên Gyop Byuq É Hkyô

³⁹ Myoq san za myàng jáng, yhangmoq gi, jowô haú lé a sé kôlhang, semui-jàng chyûn ralhum lé byu myàng kôluí, wó dut é nghut jáng, haú má sanghpo lé kôn gyam râ matú chôm doqdân yu akô nghut ri.

⁴⁰ Haú mù, yhangmoq gi, shamtoq goknghe pé lé wuimau má hkyut hkyô pyâm tô akô. Lhaishap tui lé le hkyut yú luí, wui-sanghpo ulhum mâ é panlong lé lhoq toq yú mù, lai hkyô cháng luí wuiyâm shut mut lô bê nghut ri.

⁴¹ Nghut kôlhang, semui lo bum tô é jowô ralhum má, wui-sanghpo lô htung chyap byuq luí, sanghpo u gi, a wó dui lo mù, sanghpo htâng lé gi, wuillheng eq lò bat hkyop myha pyâm bê nghut ri.

⁴² Haú hkùn, gyezô pé gi, htongbyú pé wuili li hpang byuq kô râ lé gyuq kô é yan-mai, yhangmoq lé sat pyâm râ chôm dá akô.

⁴³ Nghut kôlhang, shô up gyezau hpô gi, Poluq lé hkyi yú naú luí, yhangmoq dá é hkyô lé hkùm pyâm mù, wuili dat li bang gi, wui má byam gyô luí wuiyâm shut hí li dap lô kô sháng ga luí le,

⁴⁴ góbang gi, siklong eq wui-sanghpo má é gotú zè pé má zui mù, gu dap lô sháng ga le, hkunmó hkyô kat ri. Haú đông mai lhunglhang bang gi, wuiyâm shut rago wó jé dap lô beko nghut ri.

28

Malata Zinlóng Má Jé Nyi Tô É U Lhé Hkyô

¹ Ngamoq wó lut dap lô jáng sheq, zinlóng haú gi, Malata gâ é lé sê ri.

² Zinlóng byu pé gi, ngamoq lé shogyo myit gyai lhom tûn shit akô. Mau ru jáng wo nyi luí gyoq é yanmai, yhangmoq gi, myi mut byi mù, ngamoq banshoq bang lé hkûlum yu akô.

³ Haú hkùn, Poluq gi, htang rawaq guq tsing yù mù, myihkyóm má kat kat é hkùn, myi soq htan lô jáng, duq htân lhangmui radu gi, htoq lô mù, yhâng é loq má htê zing tô ri.

⁴ Zinlóng byu pé gi, Poluq é loq má lhang-mui haú htê lhang tô é lé myàng kôjáng, "Shí yuq gi, gè gè yhang byù sat é sù teng râ dut ri; wui mai wó lut lô kôlhang, yhang asak dui nyi râ matú, Tengmán tará gi, a dóng lo nhung!" ga luí, rayuq eq rayuq tai lhum bum akô nghut ri.

⁵ Poluq kúm gi, lhangmui haú lé myihkyóm má ko hkyô kat luí, hai le a dut é za nyi tô ri.

⁶ Yhangmoq gi, yhânggung wâm lò berâ, haú a nghut jáng, byodân ratung shi hkyaq lêng lô berâ, ga myit láng nyi bum akô. Nghut kôlhang, myáng myáng láng wú nyi bum le, yhang má hai le a dut lo é lé myàng kôjáng, yhangmoq é i-myyit dum htai pyâm kôluí, shí yuq gi, hparà rayuq sheq nghut ri ga dum tai bum akô nghut ri.

⁷ Hau é nâm má, zinlóng agyi hpô Popli sing é maumyi pé joq tô ri. Haú yuq gi, ngamoq lé lhom te yú mù, yhâng yhùm má sum nyí yhang lalúm la-nye lhom hkûlum yu ri.

⁸ Haú u lé, Popli é yhângwa gi, ali nyé no nyi é eq wuiwam shun leq tô ri. Poluq gi, haú yuq chyáng wàng mù, kyûdung byi luí, yhâng é ahtoq má loq ke byi mù, yhang lé lhoq gè byí ri.

⁹ Haú su dut é yanmai, zinlóng mâ é nò byù góbang banshoq le, lé luí lhoq gè byí é hui beko nghut ri.

¹⁰ Yhangmoq gi, ngamoq lé a hkyô hkyô dông hkungga kôluí, ngamoq wui-sanghpo ji mù, dum toq lô râ hkùn, ngamoq râ é gú lé châng byi kat akô nghut ri.

Romaq Myuq Má, Poluq Jé É Hkyô

¹¹ Lhamó sum hkyap lai jáng, Alesandru myuq má é, "Hparà zozûm nhiktâng" gâ é alhô dap é wui-sanghpo má, ngamoq wang jî htoq lô bê nghut lhê. Wui-sanghpo haú gi, gyoqmyô lé zinlóng haú má joq lai é nghut ri.

¹² Surakusa wà mó má jé jáng, haú má ngamoq sum nyi nô yu é nghut lhê.

¹³ Haú mai jî xoq lhing lô le, ngamoq gi, Regi wà mó má jé ri. Htang nyi gi, maupýlai

hik lô mù luí, í nyí nyí má nghut jáng, Potioli wá mó má jé lô bê nghut lhê.

¹⁴ Haú mã é gumang wui ra-am eq hui luí, ngamoq lé nyhit nyí no rá matú lùng kômù, ngamoq gi, nô yù bê; hau htâng, Romaq myuq má jé lô bê nghut lhê.

¹⁵ Haú mã é gumang wui gi, ngamoq jé lo nyi é hkyô lé wó gyo kôjáng, te yù rá ga, Api Gai gá é wá eq Bìng Yhùm Sùm Lhum gá é wá jé shoq lé akô. Poluq gi, haú bang lé lhom myàng jáng, Garai Gasang lé hkya-on kungtôn mù, myit wum wó yù bê nghut ri.

¹⁶ Ngamoq, Romaq myuq má jé wang lô é hkùn, Poluq gi, yang lé zúng rá gyezo rayuq eq gotú san nyí rá matú, ahkáng wó ri.

Poluq, Romaq Myuq Má, Mungdang Hko Kyô É Hkyô

¹⁷ Buinyi sum nyí lai é htâng má, Poluq gi, haú mã é Yudaq suwún wui lé ji yu ri. Yangmoq jé lé bùm kôjáng, yang gi, "Gumang wui ê, ngò gi, nga-nhùng é amyú lé le, ichyí íwá pé é htungking lé le, shut shai é dông haí le a kut wú; nghut kôlhang, ngò gi, Yerusalem wá mó má chypu yu é hui mù, Romaq byu pé é loq má ap byí kat é hui bê nghut lhê.

¹⁸ Romaq zau wui kúm gi, ngo lé ban jep gôn wú jáng, ngá chyáng shí gíng é mara lé a myàng kô é yanmai, ngo lé nhang kat nau akô nghut ri.

¹⁹ Nghut kôlhang, haú lé Yudaq byu pé a dông kô é yanmai, ngò hkâsu a dat kut lo mù, Kehtaq chyáng jé rá matú dúng é nghut lhê. Haú nghut kôle, ngá amyú lé mara hùn rá jowò joq é yanmai gi, a nghut.

²⁰ Haú mù luí, Israelaq amyú é myit myoqbyù hkyô* é yanmai, shí shamtoq-tuí eq tuí é ngò hui zô é hkyô eq séng luí, nungmoq eq nyo kún rá matú, ngò, nungmoq lé ji kat é nghut lhê." ga luí, yangmoq lé tai ri.

²¹ Haú hkùn, yangmoq gi, "Náng é hkyô eq séng luí Yuda mau mã é laiká ngamoq a wó yù nghut ri. Haú mai lé é gumang wui ó yuq le, náng eq séng é a ge é luhkyang lé shit kyô é a bò kó nghut ri.

²² Nghut kôlhang, shí nàng lom é hpúng gi, jowò hkangmó má tai he pyâm é hui é hkyô lé, ngamoq sê é yanmai, nàng byu myang é hkyô lé ngamoq gyô wú nau ri." ga tú tai akô.

²³ Yangmoq gi, yang eq hui kún rá buinyi ding to kôluí, yang bíng é yhùm má byù myo myo lé zing bum akô. Haú hkùn, yang gi, napkyó mai myín htâng jé shoq, Garai Gasang é mingdán hkyô lé saksé hkâm kyô é eq, Mosheq é tará eq myiqhtoi pé é dang má cháng mù, yangmoq lé shikut luí, Yesuq é hkyô tai pun tai kyíng ri.

²⁴ Yang tai é hkyô lé, ra-am gi, lumjing bum akô; ra-am kúm gi, a lumjing kó nghut ri.

²⁵ Yangmoq rayuq eq rayuq haú su myit a hui lhum bùm kô é yanmai, Poluq gi, yangmoq lé, "Chyoyíung Woi-nyí, Myiqhtoi Esai-aq é nhut mai nungmoq é ichyí íwá pé lé tai é dang gi, gyai yang têng ri. Dang haú gi,

²⁶ 'Byù haú hù chyáng ê mù, "Nungmoq gyô tsuq to kôlhang, sê gyo kó rá a nghut;

wú tsuq to kôlhang, wú sé kó rá a nghut.", ngò é tai aq.

²⁷ Hkâsu mù gá le, amyú shí é i-myt gi, htan byuq luí,

yangmoq é nohkyap gi, htu byuq bê nghut ri;

yangmoq é myoq gi, chum byuq bê nghut ri;

haú a nghut le gi, yangmoq é myoq eq myàng mù,

yangmoq é nohkyap eq wó gyo luí,

yangmoq é i-myt má sê hkyang kômù, ngá chyáng lhing lò kôluí, ngò yangmoq lé lhoq gè byi berá nghut lhê.*

gá ri.

²⁸ Haú mù luí, shí Garai Gasang é hkyi yù hkyô lé, tungbaù pé chyáng byí kat bê nghut luí, yangmoq lhom gyô yù berá hkyô lé, nungmoq yang sê nyí keq ô!" ga luí, danghkon haú tai kat é htâng má, yangmoq gi, htoq lô byuq bùm bekô nghut ri.

²⁹ (Poluq haú su ga tai é htâng má, Yudaq byu pé gi, yangmoq yangchang dang jet jet lhum uchyang lô byuq bekô nghut ri.)

³⁰ Poluq gi, yang ngò lúng é yhùm má í zân tup nyí é u lé, yhàng chyáng lé má lé é bang lé lhom hkulum yu ri.

³¹ Haú mù, a gyuq a kyum é za, Garai Gasang é mingdán hkyô lé hko tai kyô é eq, Yhumsing Yesuq Hkrisduq eq séng é hkyô lé mhoqshit byí ri; yang lé, ó le a hkum zing to kó nghut ri.

* 28:20 Israelaq amyú é myit myoqbyù hkyô gi, Mesaia gá é hkyi yù sú lé myoqbyù nyí é nghut lhê.

* 28:27 Esai

ROMAQ

Pê Chyáng Hun Kat é Laiká (Romans)

¹ Hkrisduq Yesuq é dui-nhâng zoshâng eq lagyo dut rã matú, Garai Gasâng eq ji yu é hui lui, chyoiyúng Chyúmdang pé má,

² Garai Gasang gi, hí hí mai Yhâng é my-ichtoi pé dòng danggidiq byi to bê nghut é, Yhâng é Yuqzô é hkyô nghut é, Garai Gasâng é gabú danglu é matú hkyin to hui é sù, ngò Poluq gi, Romaq myuq má nyi é, Garai Gasâng eq chyitdap é hui lui, sân-yúng bang dut rã matú jí yu é bang banshoq lé, dang kyô kat lhê.

³ Yhâng é Yuqzo haù gi, byù hkyam dòng ga jáng, Dawiq é awut ashín nghut ri;

⁴ Yhang gi, shi é mai dum dui toq é dòng, Garai Gasâng é Yhangzo nghut é hkyô lé, chyoiyúng hkyo é Woi-nyí dòng mai, hpungwup a-tsâm èq sé nhâng bê nghut ri. Yhang gi, nga-nhúng é Yhumsing Yesuq Hkrisduq nghut ri.

⁵ Yhang dòng mai le, Yhâng myíng é matú le, ngamoq gi, byù myú chângiup mai byù jí yu mù, lumjing hkyô lé châng nyi nhâng rã matú, jeju eq lagyo ayá lé wó hkam yu bê nghut lhê.

⁶ Nungmoq le, Yesuq Hkrisduq eq séng rã matú jí yu hui é bang má lòm bekô nghut ri.

⁷ Nga-nhúng é Iwa Garai Gasang eq Yhumsing Yesuq Hkrisduq chyáng má é jeju eq nguínghón hkyô gi, nungmoq chyáng ru joq nyi sháng gaq ô!

Poluq, Romaq Myuq Má Ló Kum Nau É Hkyô

⁸ Nungmoq é lumjing hkyô lé, mingkan gón má tai pyo ló bê nghut é yanmai, sâng-hi má, ngò gi, Yesuq Hkrisduq é myíng mai, nungmoq banshoq bâng é matú, ngá é Garai Gasang lé, jeju hkya-on lhê.

⁹ Ngá é kyúndung dang pé má, ngò, nungmoq lé hká-nhám le bún nyi é hkyô lé, Yhâng é Yuqzô é hkyô gabú danglu lé hko kyô nyi é má, ngá é myit nhikhlum banshoq eq dojaú é Garai Gasang gi, ngá é saksé nghut lhê;

¹⁰ Garai Gasang ô nau é nghut jáng, hká-í a myáng má, ngò, nungmoq chyáng wó jé lé rã hkyô htong byi rã matú, ahkuí, ngò kyúndung lhê.

¹¹ Ngò gi, nungmoq lé, woi-nyí hkyô eq séng é chyunghuq wó gám byi mù, nungmoq lé wum-o wó lhoq kng byi rã matú, nungmoq lé gyai yhang myíng nau nyi ri.

¹² Haù su nghu é gi, nga-nhúng rayuq eq rayuq é lumjing hkyô dòng mai, nungmoq eq ngò, myit wum byi é hui rã matú nghut lhê.

¹³ Gumang wui é, ngò gi, haù túngbaù pé chyáng mai ashi wó yu é eq rajung za, nungmoq chyáng mai le ashi wó yú rã matú, nungmoq chyáng lé jé rã nghú adam dàm dâ wú é nghut kôlhang, ahkuí jé shoq hkúm tang pyám hui é hkyô lé, nungmoq lé sé nhâng nau ri.

¹⁴ Ngò gi, Grik pé lé le, Grik a nghut bang lé le, hpaqchyí bò bang lé le, hpaqchyí a bò bang lé le, chyín dap to sù nghut lhê.

¹⁵ Haù nghut é yanmai, ngò gi, Romaq myuq má é bang nungmoq lé le, haù gabú danglu gyai yhang hko kyo nau nyi é nghut lhê.

¹⁶ Haù gabú danglu hkyô má, ngò gi, a hoq é nghut lhê; hkâsu mù gâ le, haù gi, sâng-hi má Yudaq byu pé, hau htâng túngbaù pé má, lumjing é sù yuq hkangmó lé hkyi yu é wó hui nhâng rã nghut é, Garai Gasâng é hpungwup a-tsam nghut lhê.

¹⁷ Hkâsu mù gâ le, lumjing myit mai wó yú lui, lumjing myit má gíng nyi é, Garai Gasâng chyáng má é dngmán hkyô lé gi, gabú danglu haù má hpông shit bê nghut ri. Haù gi, "Haù dngmán sù gi, lumjing myit mai asak dui rã nghut lhê."¹⁸ ga kâ tô é eq rajung za nghut ri.

Xângzo Byu Pé Htoq Má Garai Nhkmo-yô É Hkyô

¹⁸ Haù tengmán hkyô lé, yhumsing é agè ashop hkyo eq zik hkúm pyám é byu pé é agè ashop hkyô eq garai a bo é hkyô pé banshoq htoq má, mauhkung mai Garai Gasâng é nhikmo-yo hkyô lé hpông shit bê nghut ri.

¹⁹ Haù mù gâ le, Garai Gasang gi, Yhang eq séng é hkyô, yhangmoq lé san za tún shit bê nghut é yanmai, Garai Gasang lé sé àng é hkyô gi, yhangmoq chyáng san za dut bê nghut ri.

²⁰ Hkâsu mù gâ le, mau htoq xâng hkun mai, hpan tô é zè pé lé wú jáng, Yhâng é a byu-myang é isâm nghut é, ahtum abyuq é hpungwup a-tsam eq Garai é myit sâmlai lé gi, san za wó myáng, wó sê gyô é nghut lhê. Haù mù lui, byu pé gi, mara mai wó he lut rã hkyô a joq lo nghut ri.

²¹ Haù mù gâ le, yhangmoq gi, Garai Gasang lé sê to kôlhang, Yhang lé Garai dòng a shigyaú kô é eq, jeju a hkya-on kó nghut ri; yhangmoq myit é hkyô pé gi, akóm dut byuq é eq, nhik a gyíng é yhangmoq é myit nhikhlum gi, chut byuq bê nghut ri.

²² Yhangmoq gi, hpaqchyí bò bang nghut lhê ga kôlhang, a-ngok é bang dut byuq bekô nghut ri.

²³ Haù mù, htên byoq a sê é Garai Gasâng é hpungwup shingkang lé, htên byoq sê é byù zông, nghoq lhô, dusak lhô eq yê jung dusak lhô pé èq, htai lhik pyám bekô nghut ri.

²⁴ Hau é yanmai, Garai Gasang gi, yhang-moq é gungdu lé rayuq eq rayuq hpau a tap lhum kó rá matú, a sansêng é gungsho zùm-yap hkyô kut rá nghut é, yhangmoq é yut yut ô nau é i-myt má, yhangmoq lé ap pyám bê nghut ri.

²⁵ Yhangmoq gi, haù Garai Gasâng é tengmán hkyô lé, mhaù é hkyo eq htaì lhik pyám kômù, hpân Sù lé noqkuq dojaù rá malaì, mhaù hkyô nghut é hpan tô é zè pé lé noqkuq mù, dojaù akò nghut ri. Hpân Sù haù gi, ahtum abyuq hkya-on hui sù nghut ri. Amen.

²⁶ Haù nghut é yanmai, Garai Gasang gi, yhangmoq lé, ahoq ahí é yut yut ô nau hkyô má ap pyám bê nghut ri. Yhangmoq é myiwe wui lhâng gi, htùng akying lé tô pyám kômù, haù eq shai é dng htaì lhik pyám nyi akò nghut ri.

²⁷ Haù eq rajung za, yuqgè wui le, myiwe wui eq zum é htùng akying lé tô pyám kômù, rayuq eq rayuq, myi su nyé shoq yut yut ô nau lhum kômù, yuqgè yhangchang rayuq eq rayuq agot a-ù hkyô kut shut lhum kólú, yhangmoq kut shut é eq gingdán é yubak dam lé, yhumsing gùng yhumsing hkam yù nyi bekò nghut ri.

²⁸ Hau htoq agó, haù Garai Gasang lé sè é hkyô gi, akyù bo é a nghut ga yhangmoq myit yù kô é yanmai, a kut àng é hkyô kut nhâng rá matú, Garai Gasang gi, yhangmoq lé, htên byoq sè é myit má ap pyám é nghut lhê.

²⁹ Yhangmoq gi, agè agaù hkyô ajung jung, agè ashop hkyô, myoqnoq hkyô eq a jú lhùm é hkyô pé bying jup tô é bang dut bekò nghut ri; manon é, byù sat é, mabyoq jishùm htoq é, mhaù zô é eq myit goi bo é pé le bying bum ri.

³⁰ Yhangmoq gi, lumu é bang, gansang é bang, Garai lé a jú é bang, byù rhoi é bang, nghutbùn é bang, gyáng é bang, agè ashop kut rá hkyô lhoq htoq é bang, mó wui é jìno a gyô é bang nghut akò.

³¹ Yhangmoq gi, a gying a hâng é bang, gidìq a zung é bang, chyt myit a bo é bang, shogyo nhikmyin a sè é bang nghut akò.

³² Haù pé lé kut é bang gi, shí gíng lhê gâ é, Garai Gasâng é dingmán tarâ joq é lé, yhangmoq sè to kólhang, haù pé lé, yhangmoq xoq kut nyi kô é htoq agó, haù hkyô lé kut é bang lé le, hkya-on waq toq akò nghut ri.

2

Garai Gasang Tarâ Jéyáng É Hkyô

¹ Haù mù luí, góyuq lé tarâ jéyáng é sù nang è, nang gi, mara mai wó he lut rá hkyô a joq lo; hkásu mù gâ le, nang yhang jéyáng nyi luí, mù haù pé lé, nang kut nyi é yanmai,

* 2:12 Haù jep é tarâ lé a sè bang gâ é gi, tũngbaù pé lé gâ é nghut luí, haù jep é tarâ hkaù má é bang gâ é gi, Yudaq byu pé lé gâ é nghut lhê.

byù góbang lé jéyáng é hkùn, nang gũng nang mara byi nyi bê nghut ri.

² Haù dng kut nyi é bang lé, Garai Gasang gi, tengmán é dng tarâ jéyáng é lé, ngan-hũng sè nyi lhê.

³ Haù mù, byù za nghut to luí, góbang lé gi, jéyáng mù, yhumsing gi, haù dng roq châng kut nyi é sù nang è, nang gi, Garai Gasâng é tarâ jéyáng hkyô mai wó hpang lut rá su ngam nyi lhê lú?

⁴ Haù a nghut jáng, nang gi, Garai Gasâng é ge é hkyo eq nang lé myit wó shuí lhing nhang é lé a sè é za, Yhâng é agùn agó é ge é hkyô lé le, myit hing é hkyô eq jân shirang é hkyô lé le, wú tiq pyám nyi lhê lú?

⁵ Nghut kólhang, nang é myit htân hkyô eq myit a lhing é nhikhùm é yanmai, haù Garai Gasang dingmán é dng tarâ jéyáng shit rá nghut é, Yhâng é nhikmo-yô é buinyi má hkâm zo rá nhikmo-yo hkyô lé, yhumsing gũng yhang hkong tô nyi bê nghut ri.

⁶ Garai Gasang gi, yuq hkangmó lé, ó le ó kut é má cháng luí, hkâm zo nhâng rá nghut lhê.

⁷ Jân shirâng mù, ge é hkyô kut nyi é dng, hpungwup shingkan lé le, aróng eq htên byoq a sè é hkyô lé le, ho é bang lé, Yhang gi, ahtum abyuq é asak byi rá nghut lhê.

⁸ Nghut kólhang, haù yhumsing wuizat hkyô za hô luí, tengmán hkyô lé he-ngik pyám mù, agè ashop hkyô lé châng bãng é matú gi, nhikmo-yo hkyô eq nhikjum yo hkyô jé rá nghut lhê.

⁹ Wuìhke hkyô eq iyon yon hkyô gi, agè ashop kut é xângzo byù yuq hkangmó chyáng jé rá nghut lhê; sâng-hi má Yudaq byu pé chyáng jé mù, tũngbaù pé chyáng le jé rá nghut lhê.

¹⁰ Nghut kólhang, hpungwup shingkan, aróng eq nguigón hkyô gi, haù ge é hkyô kut é bang yuq hkangmó chyáng jé rá nghut lhê: sâng-hi má Yudaq byu pé chyáng jé mù, tũngbaù pé chyáng le jé rá nghut lhê.

¹¹ Hkásu mù gâ le, Garai Gasang gi, myoq-dong a hkyin é Sù nghut lhê.

¹² Haù jep é tarâ lé a sè é mara kut shut é bang lhunglhang gi, jep é tarâ dng a nghut é za htên byoq kó rá nghut lhê. Haù jep é tarâ hkaù má mara kut shut é bang lhunglhang gi, jep é tarâ dng jéyáng é hui zo kó rá nghut lhê.*

¹³ Hkásu mù gâ le, haù jep é tarâ lé wó gyô é bang lé, Garai Gasâng é hí má dingmán bang gâ é a nghut é za, jep é tarâ lé châng kut é bang za sheq, dingmán bang gâ é hui rá nghut lhê.

¹⁴ Haù jep é tarâ lé a wó é tũngbaù pé gi, jep é tarâ hkyô lé, yhang baù yhang châng nyi kô é hkùn, jep é tarâ lé a wó kólhang,

yhumsing gùng yhumsing é matú tarâ dut bekô nghut ri.

¹⁵ Yhangmoq gi, haù jep é tarâ hkyô pé lé, yhangmoq é i-miyit unghkaù má kâ to bê nghut é lé, tún shit bekô nghut mù, yhangmoq é myit má hkâm zô é hkyô le, haù lé saksé hkâm byi nyi é eq, yhangmoq myit é hkyô gi, ahkuí mara hun kat, ahkuí mara hkyut kat kut nyi ri.

¹⁶ Haù hkyô gi, ngò tai pyo é gabú danglù eq rajung za, byu pê é záu nghop tô é hkyô pé lé, Hkrisduq Yesuq òng mai Garai Gasâng èq tarâ jéyáng é buinyi má dut rá nghut lhê.

Yudaq Byu Pé Eq Jep É Tarâ

¹⁷ Nghut kôlhang, nàng gi, náng gùng nàng Yudaq byu rayuq nghut lhê ga mù, haù jep é tarâ lé lumhkaù nyi é eq Garai Gasang lé xoq é hkyô má nghutbùn nyi é sù;

¹⁸ Yhâng ô nau é hkyô lé sê é eq haù jep é tarâ mhoqshit é hkyô wó yù bê nghut é yanmai, je ahkyak é hkyô lé sê gàm hkoq é sù;

¹⁹ haù jep é tarâ má, hpaqchyí eq tengmán hkyô é alik wó sù nghut é yanmai, haù myoqjít bâng é matú hkyô-u shê sù eq mauchut hkaù má é bâng é matú maubó nghut sù;

²⁰ byù ngok pé lé mhoqshit sù eq zoshâng wui é sará nghut sù nghut é lé, sê gyô to sù nghut é nghut le gi,

²¹ nàng, góbang lé mhoq byi sù nhing, yhumsing gùng yhumsing a mhoq yù lhú? A wó hkaù ga hko tai luí nhing, nàng gi, hkaù lhê a nghut lhú?

²² Su-myi sulàng lú hkyô a wó kut ga byu pé lé tai luí nhing, nàng gi, su-myi sulàng lú hkyô kut lhê a nghut lhú? Hpara lhô lé a jú dik sù nàng gi, noqkuq yhúm lé hpyoq zo hpyoq shuq nyi lhê a nghut lhú?

²³ Jep é tarâ eq séng luí nghutbun sù nàng gi, haù jep é tarâ lé lu lai é òng, Garai Gasang lé a hkungga kut lhê a nghut lhú?

²⁴ Haù gi, "Garai Gasâng é mying gi, nungmoq é yanmai, tûngbaù pê chyáng lhoq hpoi pyâm é huí ri."* ga kâ tô é eq rajung za nghut ri.

²⁵ Haù jep é tarâ lé nàng châng é nghut jáng, ahpyo-kuq hpyit hkyô gi, akyù bò bê nghut ri. Nghut kôlhang, nàng, jep é tarâ lé lu lai é nghut jáng, a hpyit é eq rajung za dut bê nghut ri.

²⁶ Ahpyo-kuq a hpyit kôlhang, jep é tarâ hkyô pé lé châng é bang lé gi, ahpyo-kuq hpyit bê bang òng ge sôn byi lhê a nghut kô lhú?

²⁷ Kâ tô é tarâ lé wó mù, ahpyo-kuq hpyit hkam to gù nghut é, tarâ lu lai é sù nàng lé, gungsho má ahpyo-kuq a hpyit kôlhang, jep é tarâ lé châng é sù gi, mara hún rá nghut lhê.

²⁸ Hkâsu mù gâ le, shinggan má za Yudaq byù nghut é sù gi, Yudaq byù kyíng a nghut; gungsho má za ahpyo-kuq hpyit é gi, ahpyo-kuq hpyit kyíng a nghut.

²⁹ Ahte myit hkaù má Yudaq byù nghut sù za, Yudaq byù kyíng nghut lhê. Kâ tô é tarâ òng a nghut é za, Woi-nyí èq myit má ahpyo-kuq hpyit é gi, ahpyo-kuq hpyit kyíng nghut bê. Haù yuq é hkya-on kungtôn hkyô gi, byù mai lo é a nghut, Garai mai lo é ru nghut lhê.

3

Garai É Lhumzui Hkyô

¹ Haù òng ga jang, Yudaq byù rayuq dut nyi é gi, hai akyù hkâm zo rá lhú? Ahpyo-kuq hpyit hkyô gi, hai akyù bò rá lhú?

² Hkyô hkangmó má gyai akyù bò lhê! Je hí má gi, haù Garai Gasâng é mungdang lé yhang, yhangmoq lé ap byi bê nghut ri.

³ Yhangmoq má é ra-am lumjít myit a bo é nghut le gi, hkâsu kó lhú? Yhangmoq lumjít myit a bo é yanmai, Garai Gasâng é lhumzui hkyô lé akyù a bò nhâng wó dut rá lhú?

⁴ Hká òng le a wó dut!

"Haù mù, nàng dang tai é hkùn, dingmán é hkyô wó lhoq htoq rá eq,

nàng jéyáng huí é hkùn, ùng rá nghut lhê."[†]

ga kâ tô é eq rajung za, byù yuq hkangmó gi, byù-mhaù dut kôlhang, Garai Gasang gi, tengmán nyí sháng gaq.

⁵ Nghut kôlhang, nga-nhúng é a dingmán hkyô gi, Garai Gasâng é dingmán hkyô lé san za je lhoq htoq shit é nghut lhê; haù nghut jáng, nga-nhúng hkâsu nghú tai rá lhú? Nga-nhúng lé Garai Gasang nhikmo-yô é hkyô gi, Yhang a tarâ mù nghut lhê lhú? (Ngò gi, byù hkyam òng tai htíng é nghut lhê.)

⁶ Ratsuí lháng a nghut! Haù su ru nghut le gi, haù mingkan lé, Garai Gasang hkâsu wó jéyáng rá lhú?

⁷ Rayuq yuq, "Ngò mhaù é hkyô gi, Garai Gasang tengmán é hkyô lé lhoq ko jat mù, Yhâng é hpungwup shingkan lé je wó lhoq hu nhang é nghut le nhing, haù mù luí, ngò, yubak byù rayuq òng mara byí é huí zô nyi ra shirá lhú?" ga tai dang-rháng rá nghut lhê.

⁸ "Ge é hkyô htoq sháng gaq, nga-nhúng, agè ashop hkyô kut sháng," nghú haù mù a tai kó é lhú? Dang haù lé ngamoq tai é nghut lhê ga luí, ngamoq lé lumù gansang é òng byù ra-am tai akó. Haù bang gi, mara dam byí é huí zo ging bang nghut akó.

Dingmán Byù A Nyi

⁹ Haù jáng, hkâsu nghú lo rá lhú? Nga-nhúng gi, je gè bang nghut lhê lhú? Ratsuí lháng a nghut. Yudaq byù nghut nghut, tûngbaù pé nghut nghut, yubak mara hkaù

má é bang chyat nghut lhê nghû, ngamoq tai san kyô wú bê nghut lhê.

¹⁰ Chyúmdang má kê tô é le,

"Dingmán é byù a nyi, rayuq lhang a nyi nghut ri;

¹¹ Sê gyô é byù rayuq le a nyi, Garai Gasang lé ho é byù le a nyi nghut ri;

¹² Lhunglhang bang gi, lhing ló byuq bekô; yhangmoq gi, hpau a dap bang chyat dut byuq bekô nghut ri.

Ge é kut sú ó a nyi, rayuq lhang a nyi nghut ri."^{*}

gâ ri.

¹³ "Yhangmoq é hkyung gi, hpông tô é lup pé nghut akô; yhangmoq é shô gi, mhaú akô."^{*}

"Yhangmoq é nhutwuí pé má gi, shíduq bò lhangmuí é duq dap bum ri."^{*}

gâ tô ri.

¹⁴ "Yhangmoq é nhut pé gi, nhing myíng nhing htê eq myit nô danghko baú byíng zan tô ri."^{*}

gâ tô ri.

¹⁵ "Yhangmoq é hkyí pé gi, byù sat sui lhoq htoq rá matú, lawán nau akô;

¹⁶ Yhangmoq sô nyi é hkyô pé gi, htên byoq é eq wuíhkê é ahkô tông tô é nghut mù,

¹⁷ nguóngón é hkyô lé gi, yhangmoq a sé kó nghut ri."^{*}

gâ tô ri.

¹⁸ "Yhangmoq é myoq hí má Garai Gasang lé gyuq hkunggá é hkyô, a bò kó nghut ri."^{*}

gâ tô ri.

¹⁹ Byù yuq hkanmó é nhut gi, tú tai jang a joq dut byuq mù, mingkan gón gi, Garai Gasang é hí má mara bo é bang dut nyi sháng gaq ga, haú jep é tará má tai é lhunglhang gi, jep é tará ô má nyi é bang lé tai é nghut é hkyô lé, nga-nhúng sê lhê.

²⁰ Haú mù luí, jep é tará lé châng é đông mai, ó yuq le, Yhâng é hí má dingmán sú gâ é wó hui rá a nghut; jep é tará đông gi, yubak mara bo é hkyô lé wó sé yu é za nghut lhê.

Lumjǐng Jǎng, Dingmán Sû Wô Dut É Hkyô

²¹ Ahkuí kúm gi, jep é tará đông a nghut é za, haú jep é tará eq myihtoq laiká pé mai saksé hkâm tô é Garai Gasang chyáng má é dingmán hkyô lé, sé nhâng bê nghut ri.

²² Garai Gasang chyáng má é dingmán hkyô haú gi, Yesuq Hkrisduq lé lumjǐng é đông mai nghut mù, lumjǐng bang banshoq htoq má jé é nghut lhê. Gamhkuí é hkyô a joq.

²³ Hkâsu mù gâ le, lhunglhang bang gi, yubak mara kut shut bê bang chyat nghut mù, Garai Gasang é hpungwup shingkan lé a hkyit hkap byuq ló kó nghut ri.

²⁴ Ahkuí kúm gi, Hkrisduq Yesuq mai lo é hkyi yù hkyô đông, Garai Gasang é jejù èq, mara hkyut san byi é lai lai wó hui bê nghut ri.

²⁵ Garai Gasang gi, Yesuq é sui lé lumjǐng bang matú, shíhtai gunglik hkungga ralhum đông, Yesuq lé byi pyám bê nghut ri. Haú gi, lai lò bê yubak mara lé lhut pyám byi shoq, Garai Gasang myit hǐng byi bê nghut é yanmai, Yhâng é tengmán hkyô lé tǔn shit é nghut ri.

²⁶ Garai Gasang haú su kut é gi, Yhǎnggǔng yhang dingmán Sû nghut é eq, Yesuq lé lumjǐng é sú lé mara hkyut san byi é sú nghut rá matú, ahkuí lhê ipyat má, Yhâng é tengmán hkyô lé shit byi é nghut lhê.

²⁷ Haú su nghut jǎng, nghutbun jowò joq ri lú? A joq. Hai tará mai a joq dut byuq é lú? Haú jep é tará châng é yanmai nghut lhê lú? A nghut, lumjǐng hkyo é yanmai sheq a joq dut byuq é nghut lhê.

²⁸ Hkâsu mù gâ le, byù gi, haú jep é tará châng é đông a nghut é za, lumjǐng luí, mara hkyut san byi hui é hkyô lé, ngamoq lum nyi lhê.

²⁹ Garai Gasang gi, Yudaq byu pé é Garai Gasang za nghut lhê lú? Tǔngbaú pé é Garai Gasang le a nghut lú? Nghut lhê, tǔngbaú pé é Garai Gasang le nghut lhê.

³⁰ Hkâsu mù gâ le, Garai Gasang gi, rayuq za nghut é yanmai, rajung za lumjǐng luí, ahpyo-kuq hpyit hkam é bang lé le, ahpyo-kuq a hpyit é bang lé le, Yhang, mara hkyut san byi rá nghut lhê.

³¹ Haú nghut jǎng, nga-nhúng gi, lumjǐng myit hau èq, jep é tará lé lhoq hpoí pyám rá lú? Ratsuí lhang a nghut! Nga-nhúng gi, jep é tará haú lé lhoq ging tǐng é bang ru nghut lhê.

4

Abraham, Mara Hkyut San Hui É Hkyô

¹ Haú su nghut jǎng, nga-nhúng é ichyí íwa Abraham gi, haú hkyô mai hai wó sé yu ri nghû, tai rá lú?

² Abraham gi, zui sai é đông mai, mara hkyut san byi hui é ru nghut le gi, yhang nghutbun jang joq rá nghut lhê; nghut kôlhang, Garai Gasang é hí má gi, yhang haú đông a nghut.

³ Chyúmdang má hkâsu gâ tô ri lú gâ le, "Abraham gi, Garai Gasang lé lumjǐng bê nghut mù, yhang lé, dingmán sú ga són byi bê nghut ri."^{*} gâ ri.

⁴ Zui sai é sǔ gi, yhâng é zuihpau lé, chyunhuq đông wó yu é a nghut é za, wó yù ging luí, wó yu é ru nghut lhê.

⁵ Nghut kôlhang, zui sai é hkyô đông a nghut é za, haú agè ashop hkyô lé mara

* 3:12 Hkya-on 14:1-3

* 3:13 Hkya-on 5:9

* 3:13 Hkya-on 140:3

* 3:14 Hkya-on 10:7

* 3:17 Esai 59:7-8

* 3:18 Hkya-on 36:1

* 4:3 Apûn 15:6,22

hkyut san byí é Garai Gasang lé lumhkau é sù gi, yhâng é lumjǐng myit é yanmai, dingmán sù ga sòn byi huí é nghut lhê.

⁶ Haù eq rajung za, yhang zui sai é hkyò dông a nghut é za, Garai Gasâng eq dingmán sù ga sòn byi huí é, Garai Gasâng chyáng mã é shimân jeju wó é sù eq séng lui, Dawiq tai é gi,

⁷ "Tarâ lu lai é lé mara hkyut pyâm byi huí é eq yubak mara lé nghop pyâm byi huí é bang gi, hkungso wó nyi ri.

⁸ Bo tô é mara lé, Yhumsing eq mara a sòn byí é hui sù gi, hkungso wó nyi ri."^{*}

gâ ri.

⁹ Haù sù é jeju gi, ahpyo-kuq hpyit hkâm bâng é matú za nghut lhê lú? Ahpyo-kuq a hpyit bâng é matú le nghut lhê lú? Hkâsu mù gâ le, Abraham é lumjǐng myit lé, dingmán sù ga sòn byi bê nghut lhê nghù, ngamoq tai nyi bê nghut lhê.

¹⁰ Haù su sòn byí é gi, hkâ-nhâm nghut lhê lú? Ahpyo-kuq hpyit hkâm é htâng má lú? A nghut jǎng, hí má lú? Haù gi, ahpyo-kuq hpyit hkâm é htâng má a nghut é za, hí má ru nghut lhê.

¹¹ Hau htoq agó, Abraham gi, yhang, ahpyo-kuq hpyit a hkam yù shí é hkûn mai, lumjǐng lui wó é dingmán hkyò gâ é dizik nghut é, ahpyo-kuq hpyit masat lé myang hkam yù bê nghut ri. Haù mù, yhang gi, haù ahpyo-kuq hpyit a hkam yù kôlhang, lumjǐng é lhunglhang bang lé dingmán bang ga sòn byí é wó hui râ matú, haù bâng é iwa dut bê nghut ri.

¹² Haù ahpyo-kuq hpyit hkâm é za a nghut, nga-nhúng é iwa Abraham, ahpyo-kuq hpyit a hkam yù shi má wó é lumjǐng hkyo é hkyi-kám lé cháng lui ahpyo-kuq hpyit bâng é iwa le, yhang nghut ri.

¹³ Míngkân é amyú hkúng xoq pé dut râ ga, Abraham eq yhâng é awut ashín pé lé byi tô é danggidiq gi, jep é tara é yanmai a nghut é za, lumjǐng hkyò mai lo é dingmán hkyò dông ru nghut lhê.

¹⁴ Hkâsu mù gâ le, jep é tarâ dông nyi yap é bang gi, amyú hkúng xoq pé nghut é nghut jǎng, lumjǐng hkyò gi, akyú a bo é eq, danggidiq gi, hpau a dap é dut byuq lhê.

¹⁵ Haù jep é tarâ gi, nhikmo-yo hkyò lhoq htoq é nghut lhê; nghut kôlhang, jep é tarâ a joq jǎng gi, tarâ lu lai hkyò le joq râ a nghut.

¹⁶ Haù mù lui, danggidiq gi, Abraham é awut ashín lhunglhang bâng chyáng, jeju mai za lo é eq gingtǐng nyi é dut sháng gaq ga, lumjǐng hkyò mai lo é nghut lhê. Haù gi, jep é tarâ má lóm bâng é matú baú za a nghut, Abraham é lumjǐng hkyò má lóm bâng é matú le nghut lhê. Abraham gi, nga-nhúng lhunglhang bâng é iwa nghut ri.

¹⁷ "Ngò gi, nang lé, byù myù myo myò é iwa dut nhâng bê."^{*} ga kâ tô é eq rajung za, haù shi byuq bê bang lé wó lhoq dui é eq a joq wú é zè lé joq shoq wó kut é, yhang lumjǐng é sù Garai Gasâng hí má, Abraham gi, nga-nhúng é iwa nghut lhê.

¹⁸ "Náng é awut ashín pé le, haù eq rajung za myò lò râ nghut lhê."^{*} ga yhang lé tai kyò to bê eq rajung za, yhang gi, myit myoqbyù jowò hai a joq kôlhang, lumjǐng lui myoqbyu nyi é nghut mù, byù myù myo myò é iwa dut bê nghut ri.

¹⁹ Yhang gi, rashô zàn kô jé byuq bê nghut mù, yhànggung gi, shi é gyá dut é hui zô é eq Sarah é zoyhùm shibó le shum byuq kôlhang, yhang gi, lumjǐng myit a yom byuq nghut ri.

²⁰ Hau htoq agó, Garai Gasâng é danggidiq eq séng lui, a lumjǐng a dut é eq hê myit mhó myit a dut é za, yhâng é lumjǐng myit lé sai lhoq ging tǐng mù, Garai Gasang lé hkyá-on kungtôn lui,

²¹ Garai Gasang gi, Yhang byi tô é danggidiq eq rajung za wó kut râ a-tsam bò sù nghut é lé, yhang myit zing nyi ri.

²² Hau é yanmai, "Yhang lé, dingmán sù ga sòn byi bê nghut ri."^{*} gâ tô é nghut lhê.

²³ "Yhang lé, sòn byi bê." ga, kâ tô é dang gi, yhang é matú za a nghut,

²⁴ nga-nhúng é Yhumsing Yesuq lé, shi é mai lhoq dui toq yù sù Garai Gasang lé lumjǐng lui, Yhang eq dingmán bang ga sòn byi râ nghut é, nga-nhúng é matú le nghut lhê.

²⁵ Yhumsing Yesuq gi, nga-nhúng é yubak marâ é matú, shi hkâm byi râ dông ap pyâm é hui lui, nga-nhúng, mara hkyut san byí é hui râ matú, lhoq dui toq é hui bê nghut ri.

5

Nguingón Hkyô Eq Gabú Hkyô

¹ Haù mù lui, nga-nhúng gi, lumjǐng é dông mai mara hkyut san byí é hui bê nghut é yanmai, nga-nhúng é Yhumsing Yesuq Hkrisduq dông, Garai Gasang eq buinùm wó xoq yù bê nghut lhê.

² Yesuq é yanmai, nga-nhúng gi, ahkuí wó yu to bê jeju shi má, lumjǐng lui wó wáng bê nghut mù, Garai Gasâng é hpungwup shingkan lé myoqbyù lui gabú gumrong nyi lhê.

³ Haù za a nghut, nga-nhúng gi, wuihke jamjau hkyò pé má le gabú gumrong nyi lhê. Hkâsu mù gâ le, wuihke jamjau hkyò gi, hkam jan hkyò lhoq htoq ri;

⁴ hkam jan hkyò gi, myit a-tsam lhoq htoq lhê; myit a-tsam gi, myoqbyu to hkyò lhoq htoq é lé, nga-nhúng sé lhê.

⁵ Myoqbyu to hkyò haù gi, nga-nhúng lé myit wum gyui nhang é a nghut; hkâsu mù gâ le, Garai Gasang gi, Yhâng é chytidap

myit lé, Yhang mai, nga-nhúng lé byi tô é Chyoiyúng Woi-nyí dǒng, nga-nhúng é i-myit unghkaú má hut kat byi bê nghut ri.

⁶ Hkâsu mù gà le, nga-nhúng gi, a-tsam a bò dut tô ashí u lé, ahkýng hkyak má yhang, Hkrisduq gi, yubak dap bang nghut é nga-nhúng é matú shí hkâm byi bê nghut ri.

⁷ Gè gè ga jáng, dingmán su é matú shí hkâm byi rá byù gi, shau rá nghut lhê; nghut kôlháng, byù gè rayuq é matú kúm gi, wám shí hkâm é byù nyi sê lhê.

⁸ Nghut kôlháng, nga-nhúng gi, yubak dap bang nghut nyi ashí hkún, nga-nhúng é matú Hkrisduq shí hkâm byi é má, Garai Gasang gi, Yhâng é chyitdap myit, nga-nhúng lé shit byi bê nghut ri.

⁹ Nga-nhúng gi, ahkuí, Yhâng é sui mai mara hkyut san byi é hui bê nghut mù, Yhâng é yanmai, Garai Gasang é nhikmo-yo hkyô mai, hkyi yu é je riyhang hui rá nghut lhê.

¹⁰ Hkâsu mù gà le, nga-nhúng gi, Garai Gasang é gyè pé nghut nyi ashí u le, Yhâng Zo shí hkâm byi é dǒng, Garai Gasang eq buinùm wó xoq yu é hui bê nghut lhê. Wó xoq yu to bê nghut jáng, nga-nhúng gi, Yhâng é asak dǒng mai, gè gè yhang hkyi yu é hui rá nghut lhê.

¹¹ Haù su za a nghut, nga-nhúng gi, nga-nhúng é Yhumsing Yesuq Hkrisduq dǒng mai, buinùm wó xoq yu é jeju lé, ahkuí wó yu to bê nghut mù, Yhâng é yanmai, Garai Gasang má le, gabú gumrong nyi lhê.

Shi É Gi, Adam É Yanmai, Dui É Asak Gi, Hkrisduq É Yanmai

¹² Byù rayuq dǒng mai, yubak mara gi, mingkan má jé wǎng bê nghut luí, shí-nò hkyô gi, yubak mará é yanmai chǎng jé bê nghut ri; haù dǒng mai, byù lhunglháng bang gi, yubak dap bang chyat nghut byuq mù, shí-nò hkyô gi, byù lhunglháng bǎng chýáng jé bê nghut ri.

¹³ Hkâsu mù gà le, haù jep é tará lé a byi shimá, yubak mara gi, mingkan má joq to bê nghut lhê. Nghut kôlháng, jep é tará a joq shí é hkún gi, yubak mara lé mara su a ngám shí é nghut lhê.

¹⁴ Haù su ga kôlháng, Adam su hkunmó lé lu lai é dǒng mara a kut shut bǎng é ahtoq má lháng, shí-nò hkyô gi, Adam é ipyat mai Mosheq é ipyat jé shoq up nyi bê nghut ri. Adam gi, jé lé lò rá su é azǒng nghut ri.

¹⁵ Nghut kôlháng, jeju chyunhuq gi, haù mara kut shut é hkyô su a nghut; hkâsu mù gà le, mara kut shut é byù rayuq é yanmai, byù myo shí pyám é nghut le gi, Garai Gasang jeju eq Yesuq Hkrisduq gá é byù rayuq é jeju mai lo é chyunhuq gi, byù myo myó é htoq má hkâ-í yhang bying mui nyi rinhung!

¹⁶ Garai Gasang jeju chyunhuq gi, byù rayuq kut é yubak mara su a nghut; hkâsu mù gà le, tará jéyáng é hkyô gi, byù rayuq é mara má chǎng mù, mara dam byi é hkyô lhoq htoq é nghut lhê; nghut kôlháng, jeju chyunhuq gi, tará lu lai bang myo má chǎng mù, mara hkyut san byi hkyô lhoq htoq é nghut lhê.

¹⁷ Haù htoq agó, byù rayuq tará lu lai luí, haù rayuq é yanmai, shí-nò hkyô up nyi bê nghut lhê, ahkuí kúm, haù Garai Gasang é agún agó shimán jeju eq dingmán hkyo é chyunhuq lé hap yu é bang gi, Yesuq Hkrisduq gá é byù rayuq dǒng mai, je riyhang asak dui hkyô má upháng nyi kó rá nghut lhê.

¹⁸ Haù mù luí, tará lu lai é hkyô ralhúm é yanmai, byù lhunglháng bang gi, mara dam byi é hui zo kó é su, dingmán hkyo é muzó ralhúm é yanmai, byù lhunglháng bang gi, asak dui hkyô eq sǎng é mara hkyut san byi hkyô lé wó bê nghut ri.

¹⁹ Hkâsu mù gà le, byù rayuq jìno a gyô é yanmai, myo myo gi, yubak dap bang dut byuq é su, byù rayuq jìno gyô é yanmai, myo myo gi, dingmán bang gá é hui kó rá nghut lhê.

²⁰ Haù jep é tará jat é gi, tará lu lai hkyô je myo rá matú nghut lhê. Nghut kôlháng, yubak mara myó jat é hkún, jeju gi, je riyhang myó jat lo é nghut lhê.

²¹ Haù mù, yubak mara gi, shí-nò hkyô dǒng upháng bê su, jeju gi, nga-nhúng é Yhumsing Yesuq Hkrisduq é yanmai, ahtum abyuq é asak wó byi é dingmán hkyô dǒng up rá nghut lhê.

6

Hkrisduq Eq Rading Ralhum

¹ Haù nghut jáng, nga-nhúng gi, hkâsu nghú tai rá lú? Jeju myó jat lò sháng gaq nghú, nga-nhúng, yubak mara kut xoq nyi rá lú?

² Haù su a nghut sháng gaq! Nga-nhúng gi, yubak mara eq shi gang bê bang nghut lhê; hkâsu mù haù má wó dui nyi lo rá lú?

³ Hkrisduq Yesuq eq rading ralhum za dut rá matú, wui-myhup hkâm yù bê bang nga-nhúng banshoq gi, Yhâng é shí hkâm hkyô má le rading ralhum za dut rá matú, wui-myhup hkâm yù bê nghut é lé, nungmoq a sé kó lú?

⁴ Haù mù luí, Hkrisduq gi, íwá é hpung-wup shingkáng eq, shí bê mai lhoq dui toq hui é su, nga-nhúng le, asak asik dǒng wó dui nyi sháng gaq nghú, nga-nhúng gi, wui-myhup hkâm é dǒng, Yhang eq rahá, shí hkâm é eq myhup yhum é hui bê nghut lhê.

⁵ Nga-nhúng gi, Yhang shí hkâm é hkyô má, Yhang eq rading ralhum za dut bê nghut jáng, Yhâng é dum dui toq hkyô má

le, Yhang eq rading ralhum za hkyak dut rá nggut lhê.

⁶⁻⁷ Hkâsu mù gà le, shí bê sù gi, yubak mara mai lhoq lhut é hui bê nggut é yanmai, nga-nhúng gi, yubak marâ é jùn dut nó a ra lo mù luí, yubak mara gùng gi, lhoq htên pyâm é hui rá matú, nga-nhúng é byú xau gi, Yhang eq rahá jén sat pyâm é hui bê nggut é hkyô lé, nga-nhúng sê lhê.

⁸ Haú mù, nga-nhúng gi, Yhang eq rahá shí hkám bê nggut jáng, Yhang eq rahá dui nyi rá nggut lhê nghú, lumjáng lhê.

⁹ Hkâsu mù gà le, Hkrisduq gi, shí bê mai lhoq dui toq é hui bê nggut mù, Yhang gi, dum wó shí lo rá a nggut é lé, nga-nhúng sê lhê; shí-nò hkyô gi, Yhang lé hkâ-nhám le wó sing to rá a nggut lo.

¹⁰ Yhang shí hkám é shí-nò hkyô gi, ban-shoq bâng é matú, yubak mara eq séng luí radám za shí hkám byi bê nggut ri; nggut kólhang, Yhang dui nyi é asak gi, Garai Gasâng hí má dui nyi é nggut lhê.

¹¹ Haú eq rajung za, nungmoq gi, yubak mara eq shí gang luí, Hkrisduq Yesuq đông Garai Gasâng é matú asak dui nyi lhê nghú, sôn yú keq.

¹² Haú mù luí, nungmoq é htên byoq sê é gungdu má, yubak mara lé hkâ-uphkâng nhâng, uphkâng nhâng kô é nggut jáng, gungdu yut yut ô nau é agê ashop hkyô lé, nungmoq châng é nggut bê.

¹³ Nungmoq é gungdu showui showang pé lé, agê ashop hkyô é chùng zè pé đông yubak mara má hkâ-ap byi pyâm kó, shí bê mai lhoq dui toq yú hui é bang su, yhum-sing gùng yhumsing, Garai Gasâng chyáng kúm ap byi keq; nungmoq é gungdu showui showang pé lé, dingmán hkyô é chùng zè pé đông, Garai Gasâng chyáng ap byi keq.

¹⁴ Hkâsu mù gà le, nungmoq gi, jep é tarâ hkaú má a nggut lô é za, jeju hkaú má nggut nyí bekô yanmai, yubak mara gi, nungmoq lé sing sù wó dut rá a nggut lo.

Dingmán Hkyô É Jùn Pé

¹⁵ Haú jáng gi, hkâsu kó lúhú? Nga-nhúng gi, jep é tarâ hkaú má a nggut lo é za, jeju hkaú má nggut nyí bekô yanmai, mara wó kut shut kó rá lúhú? Haú su a wó kut!

¹⁶ Nungmoq gi, rayuq yuq é jìno gyo rá matú, yhumsing gùng lé jùn pé đông ap pyâm é hkùn, shí-nò hui rá nggut é yubak marâ é jùn đông nggut kólhang, dingmán hkyô wó rá nggut é jìno gyo hkyô nggut kólhang, nungmoq châng nyi é nggut le gi, nungmoq, haú é jùn dut bê lé, a sé kó lúhú?

¹⁷ Nungmoq gi, yubak marâ é jùn dut wú bê bang nggut kólhang, nungmoq hkam yu to bê mhoqshit hkyô lé, nungmoq é myit nhiklum banshoq eq cháng bekô nggut é yanmai, Garai Gasâng lé jeju hkyá-on sháng.

¹⁸ Nungmoq gi, yubak mara mai lhoq lhut é hui bang nggut kômù, dingmán hkyô é jùn dut bekô nggut ri.

¹⁹ Nungmoq gi, sê gyô é nyan má wum nyhôm é bang nggut kô é yanmai, byu pé sê gyo rá đông ngò tái rá ga jáng: nungmoq gi, nungmoq é gungdu showui showang pé lé, a sansêng é hkyô eq agê ashop hkyô myô jat nhang é má jùn đông lhang ap byi wú bekô nggut é su, ahkuí gi, chyoiyúng hkyô wó yú rá matú, haú pé lé, dingmán hkyô má jùn đông ap byi keq.

²⁰ Nungmoq gi, yubak marâ é jùn dut nyi kô é hkùn, dingmán hkyô eq uphkang é mai lut nyi kô é nggut lhê.

²¹ Ahkuí, nungmoq hoqjung nghú wú htoq é pé gi, haú u lé, hai akyú wó yú kô é lúhú? Hau pé gi, shi byuq é má htúm é chyat nggut ri.

²² Nggut kólhang, ahkuí gi, nungmoq, yubak mara mai lhoq lhut é hui bekô nggut mù, Garai Gasâng é jùn dut bekô nggut ri; hau é akyú gi, chyoiyúng hkyô wó yu é nggut mù, ahtum abyuq é asak wó rá nggut lhê.

²³ Hkâsu mù gà le, yubak marâ é ah-pau gi, shi é hkyô nggut ri; nggut kólhang, Garai Gasâng é chunghuq gi, nga-nhúng é Yhumsing Hkrisduq Yesuq é yanmai, ahtum abyuq é asak nggut ri.

7

Tarâ Mai Lut É Hkyô

¹ Gumang wui ê, ngò gi, tarâ lé sê é bang nungmoq lé tai nyi lhê: hau tarâ gi, byú rayuq lé, yhang, asak dui nyi é u lé za wó uphkang é lé, nungmoq a sé kó lúhú?

² Dangké, ikun wàng bê myiwe myhí rayuq gi, yhâng é yhumsing hpó asak dui nyi é ahkyúng má, tarâ eq up zing tô é hui ri; nggut kólhang, yhâng é yhumsing hpó shi byuq é nggut jáng gi, haú ikun wàng tarâ mai, yhang wó lut bê nggut ri.

³ Haú nggut é yanmai, yhâng é yhumsing hpó asak dui nyi ashí u lé, yuggê góyuq eq hâng lhùm é nggut jáng gi, yhang lé, sulàng lú sù ga kó rá nggut lhê. Nggut kólhang, yhâng é yhumsing hpó shi byuq é nggut jáng gi, yhang, tarâ haú mai lut bê nggut luí, yuggê góyuq eq hâng lhum kólhang, sulàng lú sù a nggut lo.

⁴ Haú mù luí, ngá é gumang wui ê, nungmoq le, haú shi byuq é mai lhoq dui toq yú hui bê sù Yuggê chyáng wó xoq mù, nga-nhúng gi, Garai Gasâng lé ashí wó zui byi sháng gaq ga, Hkrisduq é gungdu đông mai, jep é tarâ eq shí gang bê nggut lhê.

⁵ Hkâsu mù gà le, nga-nhúng, yubak gungsho má nggut nyi é hkùn, nga-nhúng gi, shí-nò hkyô é ashí zui sháng gaq ga, jep é tarâ é yanmai htoq lo é yubak yut yut ô nau é hkyô

gi, nga-nhung é gungdu pé má mù zui nyi é nghut lhê.

⁶ Nghut kôlhang, ahkuí gi, nga-nhung lé up zing tô é jep é tarâ eq shi gang bê nghut mù, jep é tarâ mai lut bê nghut é yanmai, kê tô é hkyô xau đông a nghut é za, Woi-nyí é hkyô sik đông nga-nhung dojaú nyi é nghut lhê.

Jep É Tarâ Eq Yubak Mara

⁷ Haú jáng, nga-nhung hkâsu tái rã lú? Jep é tarâ gi, yubak mara nghut lhê lú? Ratsui lhang a nghut! Gè gè ga jáng, haú jep é tarâ đông mai za a nghut le, yubak mara lé, ngò wó sê é a nghut. Hkâsu mù gâ le, "myoqnoq myit hkâbô" ga jep é tarâ má a tái tô é nghut jáng, myoqnoq é hkyô lé, ngò sé rã a nghut.

⁸ Nghut kôlhang, yubak mara gi, hkunmó é ahkáng lé chùng mù, ngò má myoqnoq hkyô jung hkgangmó lhoq htoq byí ri; hkâsu mù gâ le, jep é tarâ hkaú má a nghut jáng, yubak mara gi, shi é za nghut lhê.

⁹ Ngò gi, tarâ hkaú má a nghut é za asak dui wú bê nghut lhê; nghut kôlhang, haú hkunmó htoq lô jáng, yubak mara gi, dui lò mù, ngò gi, shi bê nghut lhê.

¹⁰ Haú mù luí, asak dui nhâng rã matú nghut é hkunmó haú gi, shi-nò hkyô dut byuq é lé, ngò wó sê é nghut lhê.

¹¹ Hkâsu mù gâ le, yubak mara gi, hkunmó é ahkáng lé chùng mù, ngò lé mhaú yù luí, hau eq ngo lé shi nhang ri.

¹² Hau pé lé wú jáng, jep é tarâ gi, chyoiyung ri; haú hkunmó gi, chyoiyung, dingmán é eq ge é nghut ri.

¹³ Haú nghut jáng, ge é hkyô haú gi, ngá é matú shi-nò hkyô dut byuq bê lú? Haú đông a nghut! Nghut kôlhang, yubak mara lé gi, yubak mara đông hkyak wó lhoq htoq shit rã matú, haú ge é hkyô đông mai, yubak mara gi, ngò má shi-nò hkyô lhoq htoq bê nghut luí, yubak mara gi, gè gè yang agé ashop dut é lé, hkunmó đông mai tân shit é nghut lhê.

¹⁴ Hau htoq agó, jep é tarâ gi, woi-nyí eq sêng é hkyô nghut é lé, nga-nhung sê lhê; nghut kôlhang, ngò má gi, gungsho eq sêng é hkyô za bo é nghut luí, yubak mara má jùn đông ung zô é hui bê nghut lhê.

¹⁵ Ngò haí kut nyi é hkyô lé, ngò a sé. Hkâsu mù gâ le, ngò kut nau é hkyô lé gi, a kut é za, ngò a jú é hkyô lé kut é yanmai nghut lhê.

¹⁶ Ngò a kut nau é lé kut é nghut jáng gi, haú jep é tarâ ge é lé, ngò myit huí é nghut lhê.

¹⁷ Ahkuí gi, haú lé ngò yang kut nyi é a nghut lo, ngò má lúng tô é haú yubak sheq kut é ru nghut lhê.

¹⁸ Ngò má, nghut bê, ngá é yubak gungsho má ge é hkyô haí le a bo é lé, ngò sê lhê. Hkâsu mù gâ le, ge é hkyô lé kut nau é myit

ngò má bò kôlhang, haú lé a wó kut htoq nghut ri.

¹⁹ Hau é yanmai, ngò kut nau é ge é hkyô lé gi, a kut é za, ngò a kut nau é agé ashop hkyô lé gi, ngò xoq kut nyi ri.

²⁰ Ahkuí, a kut nau é hkyô lé ngò kut nyi é nghut jáng, haú lé ngò yang kut nyi é a nghut lo é za, ngò má lúng tô é haú yubak sheq haú lé kut nyi é ru nghut lhê.

²¹ Haú mù, ge é hkyô lé ngò kut nau é hkun, ngò má agé ashop hkyô htoq lô lô mù é tarâ lé, ngò myang ri.

²² Hkâsu mù gâ le, ngò gi, Garai Gasâng é tarâ lé, ngá é i-myt unghkaú má myit ngui gabú nyi lhê.

²³ Nghut kôlhang, ngá é gungdu showui showang pé má bo é gotú tarâ gi, ngá é i-myt tarâ eq majan zân lhum é nghut luí, ngá é gungdu showui showang hkaú má mù zui nyi é yubak é tarâ má, ngo lé shúmbyú dut nhang é lé, ngò myang ri.

²⁴ Ngò gi, shogyo rayph dut sú nghut ri-nhung! Shi nhang é gungdu shi mai, ó yuq wá, ngò lé wó hkyi yù rã lú?

²⁵ Nga-nhung é Yhumsing Yesuq Hkrisduq đông mai wó lut bê nghut mù, Garai Gasang lé jeju hkyâ-ôn nyi lhê!

Haú mù luí, ngò yang, myit é đông gi, Garai Gasâng é tarâ lé châng lhê, nghut kôlhang, yubak gungsho đông gi, yubak é tarâ lé châng lhê.

8

Haú Woi-nyí Mai Asak Dui É Hkyô

¹ Haú mù luí, ahkuí, Hkrisduq Yesuq má nghut nyí bãng é matú gi, mara byí é hkyô a joq lô é nghut lhê.

² Hkâsu mù gâ le, asak dui hkyô eq sêng é Woi-nyí é tarâ gi, Hkrisduq Yesuq đông, yubak mara eq shi-nò hkyô é tarâ mai, ngo lé lhoq lhut yú bê nghut lhê.

³ Haú jep é tarâ gi, yubak gungshô é yanmai, wum nyhóm luí a wó kut é hkyô lé, Garai Gasang gi, yubak mara hkgungga dut nhâng rã matú, yubak byu é gungghyâng đông, Yang Zo sítg lé nhang kat é đông kut pyám bê nghut ri.

⁴ Haú mù, Garai Gasang gi, yubak gungsho đông asak a dui é za Woi-nyí đông asak dui bang nghut é nga-nhung má, haú jep é tarâ má bo é hkyô pé lé, wó lhoq dik rã matú, gungsho ralhú má, mara lé doqđân pyám bê nghut ri.

⁵ Haú yubak gungsho đông asak dui é bang gi, gungsho yut yut ô nau é hkyô pé lé myit zuq nyi akó; haú Woi-nyí đông asak dui é bang kúm gi, Woi-nyí ô nau é hkyô pé lé myit zuq nyi akó nghut ri.

⁶ Haú yubak byu é myit gi, shi é hkyô nghut ri; haú Woi-nyí eq hkgang to huí su é

myit kúm gi, asak eq nguínón hkyô nghut ri.

⁷ Haú yubak myit gi, Garaí é tarâ ô má a nyi é htoq agó, haú lé a wó cháng kut é yanmai, Garaí é gyê nghut ri.

⁸ Haú yubak gungshô êq hkang tô é hui bang gi, Garaí Gasang lé a wó gabú nhâng kó nghut ri.

⁹ Nghut kôle, Garaí Gasâng é Woi-nyí gi, nungmoq chyáng lúng nyi bê nghut jáng, nungmoq gi, haú yubak gungshô êq hkang to huí é bang a nghut lô é za, Woi-nyí êq hkang to huí é bang nghut akó. Rayuq yuq gi, Hkrisduq é Woi-nyí lé a wó é nghut jáng, Hkrisduq eq a sêng é sù nghut lhê.

¹⁰ Nghut kôlhâng, nàng má Hkrisduq nyi nyi é nghut jáng, nàng é gungdu gi, yubak marâ é yanmai shí kôlhâng, nàng é woi-nyí gi, dingmán hkyô é yanmai dui nyi ri.

¹¹ Hau htoq agó, Yesuq lé shi é mai lhoq dui toq yú Su é Woi-nyí gi, nungmoq má nyi nyi é nghut jáng, Hkrisduq Yesuq lé shi é mai lhoq dui toq yú Sù gi, nungmoq má nyi nyi é, Yhâng é Woi-nyí dông mai, nungmoq é, shí sé é gungdu pé lé le, asak dui nhâng rá nghut lhê.

¹² Haú mù luí, Gumang wui ê, nga-nhúng gi, yubak gungsho dông asak dui rá matú, wò wó é bang a nghut.

¹³ Hkâsu mù gà le, haú yubak gungsho dông asak dui kô é nghut jáng, nungmoq gi, shí rá nghut lhê; nghut kôlhâng, haú gungshô é shut shaí hkyô lé, Woi-nyí êq sat pyám kô é nghut jáng, nungmoq gi, asak dui rá nghut lhê.

¹⁴ Garaí Gasâng é Woi-nyí êq shuí u é hui bang gi, Garaí Gasâng é yhangzô pé nghut lhê.

¹⁵ Hkâsu mù gà le, nungmoq gi, gyuq rá matú, nungmoq lé jún dum taú dut nhang é woi-nyí lé, a hap yu é za, nga-nhúng lé zo yín yu é Woi-nyí lé hap yu tô é bang ru nghut lhê; haú mù, nga-nhúng gi, Yhang é yanmai, "Aba,* Áwa ê" nghú wut é nghut lhê.

¹⁶ Nga-nhúng gi, Garaí Gasâng é yhangzô pé nghut é lé, Woi-nyí haú gi, nga-nhúng é woi-nyí eq rahá saksé hkâm nyi ri.

¹⁷ Ahkuí, nga-nhúng gi, zo wui nghut bê yanmai, Hkrisduq eq rahá, Garaí Gasâng é amyú hkúngxoq pé wó dut é nghut lhê. Nga-nhúng gi, Hkrisduq é wuihke jamjau pé lé, gè gè yhang bo hui zô é nghut jáng, Yhâng é hpungwup shing kang lé le, bo myang hkam yú rá nghut lhê.

Htângnùng Lhê É Hpungwup Shing kang

¹⁸ Nga-nhúng é ahkuí lhê é wuihke jamjau hkyô pé gi, nga-nhúng lé shit rá nghut é

hpungwup shing kang eq whuí rá a gingdán nghú, ngò wó myit ri.

¹⁹ Haú hpan to huí é lhunglhang gi, Garaí Gasâng é yhangzô pé lé lhoq htoq shit byi rá lé, gyai yhang myit lánng nyi akó nghut ri.

²⁰ Hkâsu mù gà le, haú hpan to huí é lhunglhang gi, akyú a bo é chyat dut byuq bê nghut ri. Haú gi, yhumsing hkyin yu é dông a nghut é za, haú su dut nhâng Sù ô nau é dông kut é nghut ri.

²¹ Haú hpan to huí é lhunglhang gi, htên byoq byuq rá matú shum dut é mai lhoq lhut é hui luí, Garaí Gasâng é yhangzo pé é hpungwup bo é luthkyô má wó wàng rá matú, myoqbyu tô é nghut lhê.

²² Haú hpan to huí é lhunglhang gi, ahkuí hkyíng jé shoq, zohkú-nò no é su nò-kying kyíng nyi kô é lé, nga-nhúng sé lhê.

²³ Haú pé za a nghut, Woi-nyí é sâng-hi ashi† lé wó yú bê bang nga-nhúng le, zo pé dông yín yu é jeju lé lánng uchyang, i-myt unghkaú má nò-kying kyíng é nghut lhê. Zo pé dông yín yu é jeju haú gi, nga-nhúng é gungdu hkyi xe yú hkyô nghut lhê.

²⁴ Hkâsu mù gà le, nga-nhúng gi, myit myoqbyu hkyô haú mai hkyi yu é hui bê nghut lhê. Nghut kôlhâng, byu-myang é lé myit myoqbyu é gi, myit myoqbyu é hkyô ratsuí le a nghut. Yhumsing myang to bé é lé, ó yuq wá myit myoqbyu shirá lú?

²⁵ Nghut kôlhâng, nga-nhúng gi, a wó shí é lé myit myoqbyu é nghut jáng, myit hính hính kut lánng é nghut lhê.

²⁶ Haú eq rajung za, Woi-nyí gi, nga-nhúng wum nyhôm é hkyô má garúm byi ri. Nga-nhúng gi, haú dung rá é lé a sé kôlhâng, haú Woi-nyí yhang gi, dang mai a wó tai htoq é nò-kying htê dông, nga-nhúng é matú bo dúng xoq byi ri.

²⁷ Nga-nhúng é i-myt unghkaú lé gôn wú é Sù gi, haú Woi-nyí myit é hkyô lé sé lhê, hkâsu mù gà le, haú Woi-nyí gi, Garaí Gasang ô nau é dông, sân-yúng bâng é matú bo dúng xoq byi ri.

Banshoq Lé Je Wó Ung Pyám Râ Hkyô

²⁸ Garaí Gasang gi, Yhang myit sôn tô é eq rajung za, ji yú luí, Yhang lé chyitdang bâng é matú, lhunglhang lé ge é dông chyat kut é hkyô lé, nga-nhúng sé lhê.

²⁹ Hkâsu mù gà le, Yhang Zo gi, gumang wui myo myo má zomún dut sháng gaq ga, Garaí Gasang gi, hí te sé tô é bang lé, Yhang Zô é sâmlai eq wó púng nhâng rá matú, hí mai masat to bê nghut ri.

³⁰ Hau htoq agó, Yhang, hí mai masat to bê bang lé gi, ji yú ri; ji yú bê bang lé gi, mara hkyut san byi ri; mara hkyut san byi é hui bang lé gi, hpungwup shing kang bò nhang ri.

* 8:15 *Aba* gà é gi, Aramaik dang dông "áwa" gà é lichyúm nghut lhê.

† 8:23 *Woi-nyí é sâng-hi ashi* gà é gi, Woi-nyí gi, Garaí Gasang byi é chyunhuq pé má é sâng-hi lhum nghut lhê.

³¹ Haù jáng gi, shí hkyô eq séng luí, nga-nhúng hai tá shirá lúhú? Garai Gasang gi, nga-nhúng hkyam shut nghut jáng, nga-nhúng lé, ó yuq wá gyê wám kut rá lúhú?

³² Yhumsing é Yhangzo lé lhang a ha bún é za, nga-nhúng banshoq báng é matú ap byí pyâm é Sù gi, Yhang lé le, lhunglhang lé le, rahá lai lai byi rá a nghut lúhú?

³³ Garai Gasâng èq hkyin yu to bê bang lé, ó yuq wá mara wó hún rá lúhú? Garai Gasang gi, mara hkyut san byi Sù nghut ri.

³⁴ Hkrisduq Yesuq gi, shí hkám luí, shí hkám é htoq agó, shí é mai lhoq dui toq yu é hui mù, Garai Gasâng é loqyo hkyam má nghut nyí luí, nga-nhúng é matú bo dúng xoq byí nyi bê nghut é yanmai, ó yuq wá mara wó byi rá lúhú?

³⁵ Hkrisduq é chyitdap myit mai, nga-nhúng lé, hai eq wá wó lhoq kang rá lúhú? Gunjang huí é hkyo èq luq? Wuíhke huí é hkyo èq luq? Zing-ri huí é hkyo èq luq? Mutmó huí é hkyo èq luq? Gùng chin dut huí é hkyo èq luq? Gyuq jung èq luq? Sham èq luq?

³⁶ Haù gi,
"Náng é yanmai, ngamoq, nyí wuí sat pyâm é huí nyi ri;

sat rá matú nyhi tô é sau pé lé su, ngamoq lé myit pyâm akô."^{*}

ga kâ tô é eq rajung za nghut ri.

³⁷ A wó lhoq kang; nga-nhúng lé chyitdap Su é yanmai, nga-nhúng gi, haù pé banshoq lé je wó ung pyâm é nghut lhê.

³⁸ Hkâsu mù gà le, shí kôlhang, byùn kôlhang, maumang lagyô pé nghut kôlhang, agê ashop é nat pé nghut kôlhang, shí ipyat nghut kôlhang, htang pyat nghut kôlhang, hai jung a-tsam pé nghut kôlhang,

³⁹ htoq tsáng má é nghut kôlhang, a-ô tsáng má é nghut kôlhang, hpan tô é gotú hai nghut kôlhang, nga-nhúng é Yhumsing Hkrisduq Yesuq má bo é Garai Gasâng é chyitdap myit mai, nga-nhúng lé wó lhoq kang pyâm rá a nghut nghú, ngò gi, hkyak wó sé yu ri.

9

Garai Gasang Hkyin Yu É Israellaq Byu Pé

¹ Ahkuí, ngò gi, Hkrisduq má tengmán é dang tá rá; ngò a mhaù é lé, haù Chyoiyúng Woi-nyí gi, ngá é unghkaú myit má hkyak saksé hkâm nyi ri.

² Ngò gi, ngá é myit nhiklum má, gyai yhang yón kuq nyi é eq ayang hpuzô nyi lhê.

³ Hkâsu mù gà le, ngò gi, ngá é byuhú, ngá é gumang wui é matú, nhúng é hui luí Hkrisduq eq gang le lhang gè rá su gà ri.

⁴ Haù bang gi, Israellaq byu pé nghut lhê. Zo yín yú huí é hkyô le, hpungwup shingklang le, dangshikaq pé le, tarâ lé

myang hap yu é hkyô le, noqkuq yhùm má noqkuq é hkyô le, danggidiq pé lé le, yhangmoq wó yu akò nghut ri.

⁵ Haù mying hú é íchyí iwâ pé gi, yhangmoq é íchyí iwâ pé nghut luí, byu é hkyam dông gon jáng, Hkrisduq gi, yhangmoq amyú má é nghut ri. Yhang gi, lhunglhang lé up é, ahtum abyuq hkya-on huí é Garai Gasang nghut ri! Amen.

⁶ Haù gi, Garai Gasâng é danggidiq akôm dut byuq bê nghú nau é a nghut. Hkâsu mù gà le, Israellaq byu pé banshoq bang gi, Israellaq byu akying chyat a nghut kó nghut ri.

⁷ Abraham é awut ashín banshoq bang gi, yhang é zo wuí akying chyat nghú a wó tá é nghut lhê. Hau é malaí, "Isak dông mai lo é lé, náng é awut ashín nghú són byi rá nghut lhê."^{**} gà tô ri.

⁸ Radông tá sháng ga jáng, gungsho mai hku é zo wuí gi, Garai Gasâng é zo wuí akying a nghut kó, danggidiq eq séng é zo wuí za sheq, Abraham é awut ashín pé dông són byí é nghut lhê.

⁹ Hkâsu mù gà le, "Masat tô é ahkying má, ngò dum tau lé mù, Sarah gi, yuqzo hkú rá nghut lhê."^{**} ga taí tô é danggidiq é yanmai nghut lhê.

¹⁰ Haù za a nghut, Rebeka é yhangzô nhik-tang é íwa gi, nga-nhúng é íwa nghut su Isak rayuq za nghut lhê.

¹¹⁻¹² Nghut kôlhang, Garai Gasang myit hpyit to mù hkyin yu é hkyô gi, muzó mai a nghut é za, hkyin ji yú Su é yanmai nghut é lé, wó gng nyi sháng gaq ga, haù zozúm nhik a hku lé shí é htoq agó, ge é eq a ge é muzó hai lhang a kut shimá, "Haù ko sú yuq gi, tíq sú yuq lé dojaú rá nghut lhê."^{**} ga, Rebeka lé taí kyô tô é nghut lhê.

¹³ Haù gi, "Yakup lé, ngò chyitdap lhê, nghut kôlhang, Eso lé gi, a ngui é nghut lhê."^{**} ga kâ tô é eq rajung za nghut ri.

¹⁴ Haù nghut é yanmai, nga-nhúng hkâsu nghú tá rá? Garai Gasang gi, a tarâ é sú nghut lhê lúhú? Ratsuí lhang a nghut!

¹⁵ Hkâsu mù gà le,

"Ngò, shogyo nhikmyin nau sú lé, shogyo nhikmyin rá nghut lhê;

Ngò, jeju byi nau sú lé, jeju byi rá nghut lhê."^{**}

ga, Mosheq lé Yhang taí ri.

¹⁶ Haù mù luí, haù hkyin yu é hkyô gi, byu yut yut ô nau é yanmai le a nghut, shikut é yanmai le a nghut, Garai Gasâng é shogyo nhikmyin é yanmai za nghut lhê.

¹⁷ Hkâsu mù gà le, Chyúmdang má, "Náng chyáng Ngá é a-tsam wó tún shit rá eq mingkan gón má Ngá é mying lhoq pyo é hui

* 8:36 Hkya-on 44:22 * 9:7 Apùn 21:12 * 9:9 Apùn 18:10,14 * 9:11-12 Apùn 25:32 * 9:13 Mal 1:2-3 * 9:15

Htoq Ló 33:19 * 9:17 Htoq Ló 9:16

râ matú sheq, Ngò, nang lé lhoq toq kat é nghut lhê."[✠] ga, Hpara-uq lé tai ri.

¹⁸ Haú mù luí, Garai Gasang gi, shogyo nhikmyin nau sù lé, shogyo nhikmyin mù, myit lhoq htân byi nau sù lé, myit lhoq htân byi ri.

¹⁹ Nungmoq mâ é rayuq yuq, "Haú jáng, Garai Gasang gi, ngamoq lé haí mù mara hun nyi ashí lúh? Yhang ô nau é hkyô lé, ó yuq wá wó hkúm pyám lhê lúh?" ga, ngo lé tai kó rá nghut lhê.

²⁰ Nghut kôlhang, Garai Gasang lé dang tu sù byù nang gi, ó yuq wá nghut lhê lúh? Saí to hui bê é zè pé gi, "Nang, haí mù ngo lé shí su kut sai tó lhê lúh?" nghú sai é Sù lé wó tai rá lúh?

²¹ Tso-au sai sù gi, tsoitung ralhúmai mai za, hkié é tso-au pé eq á hkié é tso-au pé sai rá ahkáng wó lhê á nghut kô lúh?

²² Garai Gasang gi, Yhâng é nhikmo-yo hkyô tún shit luí. Yhang é a-tsam lé sé nhâng nau kôlhang, htên byoq rá matú hen tô é, nhikmo-yo gíng é tso-au pé lé, myit hng hng shirang pyám nyi é hkyô lé, tai rá jang haí joq ashí lúh?

²³ Hpungwup shingkáng é matú noq mai hen tó bang nghut é, Yhang shogyo nhikmyin hui é bang lé, Yhâng é agùn agó é hpungwup shingkáng lé sé nhâng nau mù, Yhang haú su kut é nghut jáng, tai rá haí joq ashí lúh?

²⁴ Haú bang gi, Yudaq byu pé mai za á nghut, tungbaú pé mai le ji yù hui é bang nga-nhúng nghut lhê.

²⁵ Haú eq rajung za, Hosea laiká má Yhang tai tó é gi,

"Ngá é byù myú á nghut é bang lé, 'Ngá é byù myú' nghú;

Ngò á chyit é byizo lé 'Ngò chyit sù' nghú wut rá nghut lhê."[✠]

gâ ri.

²⁶ Haú mù,

"Nungmoq gi, ngá é byù myú pé á nghut.' nghú yhangmoq lé tai é jowò má yhang,

yhangmoq gi, 'Rù dui nyi é Garai Gasâng yhangzó pé' ga wut é hui kó rá nghut lhê."[✠]

gâ ri.

²⁷ Esai-aq le, Israelaq byu pé eq séng luí garu tai é gi,

"Israelaq yhangzó yhangshú pé gi, wuishuq lung-au yám má é semui su myo kôlhang,

myit gyó tô é bang za sheq hkyi yu é hui kó rá nghut lhê.

²⁸ Hkâsu mù gâ le, haú Yhumsing gi, myidám htoq má Yhâng é tará jéyáng hkyô lé

hân hân lhoq dik lhoq htúm pyám rá nghut lhê."[✠]

gâ ri.

²⁹ Haú eq rajung za, hí lé Esai-aq tai tó é gi, "A-tsam dik shoq bò sù haú Yhumsing za, nga-nhúng lé, awut ashín á myhit to byi é nghut jáng,

nga-nhúng gi, Sodom wá su dut byuq luí, Gomoraq myuq eq pung byuq rá nghut lhê."[✠]

gâ ri.

Israelaq Byu Pé A Lumjng Kô É Hkyô

³⁰ Haú mù, nga-nhúng hkâsu nghú tai rá lúh? Dingmán hkyô lé á châng hkat é tungbaú pé gi, haú lé wó yù bekó; haú gi, lumjng hkyô é yanmai wó yu é dingmán hkyô nghut ri.

³¹ Nghut kôlhang, tarâ eq séng é dingmán hkyô lé châng hkat é Israelaq byu pé gi, haú lé á wó yù kó nghut ri.

³² Haí mù á wó yù kô é lúh? Yhangmoq gi, lumjng myit eq châng hkat kô é á nghut é za, muzó pé eq châng hkat kô é yanmai, á wó yù kô é nghut ri. Yhangmoq gi, "htung htê rá luqgok" má htung leng bekó nghut ri.

³³ Haú,

"Wú keq, htung leng rá luqgok eq myit leqbat nhâng rá luqmó cham lé, Ngò, Zi-un bùm má lhez to luí,

Yhang lé lumhkaú sù gi, hkâ-nhám le hoq hpu é hui rá á nghut."[✠]

ga kâ tô é eq rajung za nghut ri.

10

¹ Gumang wui é, ngò gi, haú Israelaq byu pé hkyi yu é hui kó sháng gaq nghú, gyai yhang myit shirông luí, Garai Gasâng chyáng yhangmoq é matú kyúdung byi nyi lhê.

² Hkâsu mù gâ le, yhangmoq gi, Garai Gasâng é hkyô lé gyai yhang myit zuq é bang nghut é lé, ngò saksé hkâm lhê; nghut kôlhang, yhangmoq myit zuq é hkyô gi, hpaqchyí bo é đông á nghut kó.

³ Yhangmoq gi, Garai Gasâng chyáng mai jé lé é dingmán hkyô lé á sé kômú, yhumsing dingmán bún é hkyô lé za ho shikut nyi kô é yanmai, Garai Gasâng é dingmán hkyô hkaú má á nyi kó nghut ri.

⁴ Hkrisduq gi, lumjng bang yuq hkanmó, dingmán é má wó jé kó sháng gaq ga, jep é tará ló htúm jang dut bê nghut ri.

⁵ Mosheq gi, "Haú pé đông châng é sù gi, haú pé mai asak dui rá nghut lhê."[✠] ga, jep é tará eq séng é dingmán hkyô lé kâ sân kyó tó é nghut lhê.

⁶ Nghut kôlhang, lumjng hkyô eq séng é dingmán hkyô gi, "Náng é myit nhikhlum má, 'Mauhking má, ó yuq doq ló rá lúh?'"

✠ 9:25 Hos 2:23

✠ 9:26 Hos 1:10

✠ 9:28 Esai 10:22-23

✠ 9:29 Esai 1:9

✠ 9:33 Esai 8:14; 28:16

✠ 10:5

Nhong 18:5

✠ 10:6 Tará Pun 30:12

✠ 10:7 Tará Pun 30:13

(Haù gi, Hkrisduq lé shuí gyó lò rà gá nau é nghut lhê),

⁷ haù a nghut jáng, 'Nik é jang má, ó yuq gyó wàng rà lúh?'[✧] (Haù gi, Hkrisduq lé, shi é mai dui toq nhâng rà gá nau é nghut lhê.), nghú hkátái kó." gâ tô ri.

⁸ Haù jáng, hkâsu gâ tô ri lúh? "Haù mung-dang gi, nàng eq chyâng nyi ri; náng é nhut má le, náng é myit nhikhlum má lé nghut nyi ri."[✧] gâ tô ri. Haù gi, ngamoq hko tái é lumjúng hkyô eq sêng é mungdang nghut lhê.

⁹ Haù mù, "Yesuq gi, Yhumsing nghut ri." nghú náng é nhut eq yín yú mù, Garai Gasang gi, Yhang lé, shi é mai dui toq nhâng bê nghut lhê nghú, náng é myit nhikhlum má lumjúng é nghut jáng, nàng gi, hkyi yu é hui rà nghut lhê.

¹⁰ Hkâsu mù gâ le, byù gi, myit nhikhlum má lumjúng jáng, mara hkyut san byí é hui mù, nhut mai yín yú jáng, hkyi yù hui é nghut lhê.

¹¹ Haù Chyúmdang tái é gi, "Yhang lé lumhkau é sú ó yuq le, hkâ-nhám háng hoq hpú é hui rà a nghut."[✧] gâ ri.

¹² Hkâsu mù gâ le, Yudaq byù eq tûngbaù pé é gyoro má gam hkoq é hkyô hái le a Joq é za, haù Yhumsing gi, banshoq bâng é Yhumsing nghut lhê mù, Yhang lé wut dung bang lunggháng lé, agùn agó shimân byí ri.

¹³ Hkâsu mù gâ le, "Haù Yhumsing é mying lé lêng é bang yuq hkangmó gi, hkyi yu é hui rà nghut lhê."[✧] gâ tô ri.

¹⁴ Haù nghut lé gi, yhangmoq a lumjúng é sú lé nhing, hkâsu wó wut dung kó rà lúh? Yhangmoq a wó gyó wú é sú lé nhing, hkâsu wó lumjúng kó rà lúh? Hko kyô é sú a nyi le nhing, hkâsu wó gyo kó rà lúh?

¹⁵ Nhang kat é a hui le gi, yhangmoq hkâsu kut wó hko kyo kó rà lúh? Haù eq rajung za, "Gabú danglù pé hko kyo bâng é hkyi-kám pé gi, hkâ-í yhang yúng ri myhi-nhung!"[✧] ga kâ tô ri.

¹⁶ Nghut kôlháng, Israelaq byu pé banshoq bang gi, gabú danglù lé hap yú kô é a nghut. Hkâsu mù gâ le, Esai-aq gi, "Yhumsing ê, ngamoq é danglù lé ó yuq wá lumjúng é lúh?"[✧] ga tái ri.

¹⁷ Haù nghut mù luí, lumjúng myit gi, danglù lé wó gyó é mai lò mù, danglù gyó yu é gi, Hkrisduq é mungdang mai lo é nghut lhê.

¹⁸ Nghut kôlháng, ngò myi kó lé: yhangmoq gi, a wó gyó wú kô é nghut lhê lúh? Yhangmoq gi, wó gyo gù za nghut lhê, haù eq rajung za,

"Yhangmoq é htê gi, myidàm htoq banshoq má jam bê nghut ri;

yhangmoq é mungdang pé gi, mingkan htungchyún hkangmó má jé bê nghut ri."[✧]

gâ tô ri.

¹⁹ Ngò dum myi kó lé: Israelaq byu pé gi, a sê gyo kô é nghut lhê lúh? Moshéq sâng-hi má tái é gi,

"Byù rahú lháng a nghut bang eq, Ngò, nungmoq lé manôn nhâng rà;

sê gyo nyan a bo é amyú eq, Ngò, nungmoq lé wú nhik-yo nhâng rà nghut lhê."[✧]

gâ ri.

²⁰ Hau htoq agó, Esai-aq a gyuq a wàm tái é gi,

"Ngo lé a ho é bang gi, Ngo lé myang hô bekò nghut ri;

Ngá hkyô lé a myí é bang lé, Ngò htoq shit bê nghut lhê."[✧]

gâ ri.

²¹ Nghut kôlháng, Israelaq byu pé eq séng luí, Yhang tái é gi,

"Ngò gi, jìno a gyô é eq ngegáng-htu é byù myí lé, nyi wuí Ngá loq lham mù jì nyi lhê."[✧]

gâ ri.

11

Israelaq Byu Pé Lé A He-ngik Pyám

¹ Haù mù luí, ngò myi kó lé, Garai Gasang gi, Yhâng é byu pé lé he-ngik pyám bê nghut lhê lúh? Ratsuí lháng a nghut! Ngò yhang le, Israelaq byu myú nghut luí, Abraham é awut ashín eq Ben-yamyin hú má é sú nghut lhê.

² Garai Gasang gi, Yhang te sê to gú nghut é, Yhâng é byu pé lé a he-ngik pyám é nghut lhê. Eliyaq eq séng é hkyô Chyúmdang má bo tô é lé, nungmoq a sé kó lúh? Garai Gasang é hí má, yhang, Israelaq byu pé lé mara hùn é gi,

³ "Yhumsing ê, yhangmoq gi, Náng é my-ightoi pé lé sat pyám kô é eq Náng é hkungga gyap pé lé tu lêng pyám akò nghut ri; ngò rayuq za myit gyó tô é nghut luí, ngo lé sat rá matú le yhangmoq ho nyi akò nghut ri."[✧] gâ ri.

⁴ Garai Gasang gi, yhang lé, hkâsu ga tû tái é nghut lhê lúh? Haù gi, "Balaq hpara é hí má hkyihput a htuq shí é byù nyhit hkyíng lé, Ngá é matú myhit to lhê."[✧] gâ é nghut lhê.

⁵ Haù eq rajung za, ahkuí gi, jeju yanmai hkyin yù hui é bang za myit gyó tô é nghut lhê.

⁶ Jeju yanmai nghut é nghut le gi, muzó é yanmai a nghut lo; muzó đông ru nghut le gi, jeju gi, jeju a nghut lo.

✧ 10:8 Tará Pun 30:14 ✧ 10:11 Esai 28:16 ✧ 10:13 Yol 2:32 ✧ 10:15 Esai 52:7 ✧ 10:16 Esai 53:1 ✧ 10:18 Hkya-on 19:4 ✧ 10:19 Tará Pun 32:21 ✧ 10:20 Esai 65:1 ✧ 10:21 Esai 65:2 ✧ 11:3 1 Hko 19:10,14 ✧ 11:4 1 Hko 19:18

⁷ Haù nghut jáng, hkâsu lúh? Israelaq byu pé gyai ho shikut kôlhang, a wó kô é lé, hkyin htoq yú huí é bang kúm gi, wó bekô nghut ri. Góbang gi, myit lhoq htân byí é huí akô nghut ri;

⁸ haù gi,

"Garai Gasang gi, hkù-nyí jé shoq, yhangmoq lé nhikshi jit é woi-nyí lé le, a wó myang é myoqjí lé le, a wó gyô é nohkyap lé le, byí to bê nghut ri."[✧]
ga kâ tô é eq rajung za nghut ri.

⁹ Dawiq taí é le,

"Yhangmoq é zangbó gi, yhangmoq é matú, dumzo eq lhaí, myit leqbat jowô eq lató hpuq hkyô dut sháng gaq;

¹⁰ Yhangmoq myoq a wó myâng shoq, myoqjí lhoq chut pyám byí é huí sháng gaq;

yhangmoq é nunghkúng gi, ayang wòlai wun goí nhang é huí sháng gaq."[✧]
gâ ri.

Túngbaù Pé Lé Hkyi Yu É Hkyô

¹¹ Ngò dum myí kó lé: Israelaq byu pé gi, a wó dum gè rá í leqbat byuq bekô lúh? Ratsuí lhang a nghut! Yhangmoq é tará lu lai hkyô é yanmai, yhangmoq lé manôn nhang rá matú, hkyi yú hkyô gi, túngbaù pé chyáng jé byuq é nghut lhê.

¹² Nghut kôlhang, yhangmoq é tará lu lai hkyô gi, mingkân é matú wó sùt hkyô eq, yhangmoq sum pyám é hkyô gi, túngbaù pé é matú wó sùt hkyô dut é nghut jáng, yhangmoq é byíng jup hkyô gi, je riyhang kó é wó sùt hkyô dut rá nghut ri-nhung!

¹³ Nungmoq túngbaù pé lé ngò tai nyi lhê: ngò gi, túngbaù pé é lagyo nghut nyi é u má, ngá é hpungmú lé hpautap nyi lhê.

¹⁴ Haù gi, ngá é amyú pé lé manôn myit wó bô nhang mù, yhangmoq ra-am lé wó hkyi yú rá lé myit myoqbyu é hkyô nghut lhê.

¹⁵ Hkâsu mù gâ le, yhangmoq lé he-ngik pyám é hkyô gi, mingkân é matú Garai eq buinùm xoq hkyô dut bê nghut jáng, yhangmoq lé dum hap yu é hkyô gi, shi é mai dui toq é dông dut bê a nghut lhi?

¹⁶ Hau htoq agó, sáng-hí ashi dông nhông byí é mún ra-am gi, chyoiyúng é nghut jáng, muk htung gón gi, chyoiyúng é nghut lhê; haù amyit gi, chyoiyúng é nghut jáng, akoq pé le chyoiyúng é nghut lhê.

¹⁷ Haù tsanlun akoq pé* ra-am gi, lhoq hkyui pyám é huí luí, yosô tsanlun a-nyuq[†] nghut sù nang gi, haù pé má xoq é huí mù, haù tsanlun amyit é xú lé bo shuq lom é nghut jáng,

¹⁸ akoq haù pé lé hkáwú tiq pyám kó. Nungmoq haù su kut é nghut jáng, nungmoq gi, haù amyit lé htuq é a nghut é za,

amyit haù sheq nungmoq lé htuq é hkyô lé, nungmoq myit sé keq.

¹⁹ Nungmoq kúm gi, "Ngò, haù má xoq é huí rá matú sheq, akoq haù pé gi, lhoq hkyui pyám é huí é ru nghut lhê." ga taí rá nghut lhê.

²⁰ Haù su gi, nghut lhê. Nghut kôlhang, yhangmoq gi, a lumjíng é yanmai, lhoq hkyui pyám é huí kômù, nungmoq kúm gi, lumjíng é yanmai, wó ging títng nyi é nghut lhê. Hká gumrong nyi, gyuq kyum nyi keq.

²¹ Hkâsu mù gâ le, Garai Gasang gi, akoq akying pé lé a ha bûn é nghut le gi, nungmoq lé le ha bun rá a nghut.

²² Haù mù luí, Garai Gasang é shogyo nhikmyin hkyô eq htân htân kut pyám é hkyô lé, myit wú keq: leqbat é bang lé htân htân kut pyám kôlhang, nungmoq gi, Yhâng é shogyo nhikmyin hkyô má xoq nyi nyi é myhâng, nungmoq lé gi, shogyo nhikmyin nyi rá nghut lhê. Haù a nghut jáng, nungmoq le, zân hpyit pyám é huí rá nghut lhê.

²³ Yhangmoq gi, a lumjíng hkyô lé tô pyám kó é nghut jáng, dum xoq yu é huí kó rá nghut lhê; hkâsu mù gâ le, Garai Gasang gi, yhangmoq lé dum wó xoq yu é Sù nghut lhê.

²⁴ Haí mù gâ le, yosô tsanlun gam akoq nghut gù nungmoq lé hpyit yú mù, htúng a nghut é dông, hô é tsanlun agám má xoq é nghut le gi, haù akoq akying pé nghut é yhangmoq gi, ó le ó é tsanlun-ngut akying má xoq yu é lé je riyhang huí rá nghut lhê ô!

Israelaq Byu Pé Hkyi Yu É Hui Rá Hkyô

²⁵ Haù mù, gumang wui é, nungmoq a nghutbun kó sháng gaq nghù, zau tô é hkyô shí lé, nungmoq a sé dut rá lé, ngò a ô nau é nghut lhê: haù gi, túngbaù pé wang lo é laké byíng é hkún jé shoq, Israelaq byu pé ra-am gi, myit lhoq htân é huí é hkyô nghut lhê.

²⁶ Hau htâng sheq, Israelaq amyú ban-shoq bang hkyi yu é huí rá nghut lhê. Haù gi,

"Hkyi yú Sù gi, Zi-un bùm mai htoq lô rá nghut lhê;

Yhang gi, Garai lé nunghtáng tô pyám é hkyô lé, Yakup é awut ashún mai huí sêng pyám byi rá nghut lhê.

²⁷ Ngò, yhangmoq é yubak mara lé huí sêng pyám byi jáng,

haù gi, yhangmoq lé Ngò byí tô é Ngá é dangshikaq nghut lhê."[✧]

ga kâ tô é eq rajung za nghut ri.

²⁸ Haù gabú danglú eq séng luí ga jang, yhangmoq gi, nungmoq é matú gyê nghut akô; nghut kôlhang, hkyin htoq yú hkyô eq séng luí ga jang, yhangmoq gi, myíng hù é íchyí íwa pé é yanmai, chyitdap é huí akô nghut ri;

✧ 11:8 Tará Pun 29:4 ✧ 11:10 Hkya-on 69:22-23 * 11:17 Tsanlun akoq pé gi, Israelaq byu pé lé tai nau é nghut lhê.

† 11:17 Yosô tsanlun a-nyuq gi, túngbaù pé lé tai nau é nghut lhê. ✧ 11:27 Esai 59:20-21; 27:9

²⁹ Hkâsu mù gâ le, Garai Gasâng é chynghuq pé eq Yhang ji yu é hkyô lé gi, wó htaí lhik pyám é a nghut.

³⁰ Nungmoq gi, Garai Gasâng é jîno a gyô é bang radâm dut wú kô é nghut kôlhâng, yhangmoq jîno a gyô é yanmai, ahkuí kúm, shogyo nhikmyin hkyô wó hkam yù beko nghut é su,

³¹ ahkuí, yhangmoq gi, nungmoq wó hkam yu é Garai Gasâng é shogyo nhikmyin hkyo é yanmai, shogyo nhikmyin hkyô lé wó hkam yù kó sháng gaq ga, yhangmoq le, ahkuí, jîno a gyo bang dut beko nghut ri.

³² Hkâsu mù gâ le, Garai Gasang gi, byù lhunglhâng bang lé, shogyo nhikmyin hkyô wó tún shit shoq ga, lhunglhâng bang lé, jîno a gyo hkyo é shúm dut nhang to bê nghut ri.

Hkya-on Kungtôn Dang

³³ Ô! Garai Gasâng é agùn agó é sùt nghut é, hpaqchyí byéng-yá eq nyan hpaqchyí gi, hkâ-i yhang nik ri-nhung!

Yhâng é tarâ jéyáng hkyô gi, ung sê jung a nghut nhung!

Yhang kut é hkyô pé gi, hkâ-i yhang ho htoq wuí jung nghut ri-nhung!

³⁴ "Haù Yhumsing é myit lé, ó yuq wá ung sê lhê lúh? Yhâng é hpaqchyí byi sù gi, ó yuq wá dut wú é lúh?"[✧] gâ ri.

³⁵ "Garai Gasâng eq jeju dum tau byi râ dut shoq, ó yuq wá, Garai Gasang lé byi wú é lúh?"[✧] gâ ri.

³⁶ Hkâsu mù gâ le, joq mijog gi, Yhâng chyáng mai nghut mù, Yhang dông mai nghut lú,

Yhâng é matú chyat nghut ri. Haù hpungwup shingkang gi,

Yhâng chyáng ahtum abyuq ru joq nyí sháng gaq ô! Amen.

12

Dui É Hkungga Pé Dut Râ Hkyô

¹ Haù mù lú, gumang wui é, nungmoq é gungdu pé lé, Garai Gasang myit ngui ô nau é eq chyoiyung é, dui é hkungga dông nhông byi keq nghú, Garai Gasâng é shogyo nhikmyin hkyô mai, ngò, nungmoq lé wum byi kat lhê. Haù gi, woi-nyí hkyô dông nungmoq noqkuq dojaú é hkyô nghut lhê.

² Míngkan shí lhum é sâmlai dông a cháng lo é za, myit sik wó yù râ dông nungmoq é a-kyang lé htaí pyám byi nhâng keq. Haù hkún sheq, Garai Gasâng é ge é, myit ngui é eq gumjup é ô nau hkyô lé, nungmoq wó chyám, wó sê gám hkoq yù kó râ nghut lhê.

³ Hkâsu mù gâ le, ngo lé byi tô é jeju yanmai, nungmoq yuq hkangmó lé ngò tai kôlé: nungmoq gi, yhumsing gùng lé lai shoq

a nghutbùn é za, ó le ó lé, Garai Gasâng eq lumjing myit tsing gám byi to bê eq rajung za, myit yù gíng é i za myit yù keq.

⁴ Nga-nhung yuq hkangmó é gungdu ralhú má gi, gungdu showui showang pé myo myo bo é nghut lú, gungdu showui showang haù pé banshoq gi, jai chùng jang a pung é nghut lhê.

⁵ Haù eq rajung za, myo myo nghut é nga-nhung le, Hkrisduq má gungdu ralhú za dut lú, yuq hkangmó gi, rayuq eq rayuq gungsho sêng lhum é bang chyat nghut lhê.

⁶ Nga-nhung lé byi tô é jeju yanmai, nga-nhung wó é chyunghuq gi, gotú tù nghut lhê. Byù rayuq é chyunghuq gi, myiqhtoi htoí é nghut jáng, yhâng é lumjing hkyô eq rajung za htoi sháng gaq;

⁷ dojaú é nghut jáng, dojaú sháng gaq; mhoq kyô é nghut jáng, mhoq kyo sháng gaq;

⁸ myit wum byi é nghut jáng, myit wum byi sháng gaq; ra châ é bang lé garúm byi é nghut jáng, a ha bün é za byi sháng gaq; shuí u é nghut jáng, lumluq tung shuí u sháng gaq; shogyo nhikmyin hkyô shit é nghut jáng, gabú myit eq kut sháng gaq.

Chyitdap Myit

⁹ Chyitdap myit má gegùn labyoq a ge bò. Agè ashop dut é lé, nhik noq pyám keq; ge é lé, myit tuí nyi keq.

¹⁰ Rayuq eq rayuq, gumang chyitdap myit mai lhumzui lhum keq. Rayuq eq rayuq, yhumsing gùng htoq je hpautap lhum keq.

¹¹ Myit zuq hkyô má, hkâ-nhám le wum a lhoq shóm é za, nungmoq é woi-nyí hkyô má myit toq nyí mù, haù Yhumsing lé dojaú nyí keq.

¹² Myit myoqbyù hkyô má gabú keq; wuihke hkyô má hkam jan keq; kyúdung hkyô má lhumzui keq.

¹³ Ra châ tô é Garai Gasâng é byu pé lé gám byi keq. Bíng hkulum é lé rago kut keq.

¹⁴ Nungmoq lé zing-rí é bang lé shimân byi keq; shimân byi keq, hkâ-nhing kó.

¹⁵ Gabú é bang eq rahá bo gabú keq; yón é bang eq rahá bo yón keq.

¹⁶ Rayuq eq rayuq byin hpyé gohut huí nyi keq. A nghutbùn é za, nyí yap hkyô nyhúm bang eq zùm yap keq. Hpaqchyí bo é sù su hkâ-myt ngám kó.

¹⁷ Ó yuq lé le, agè ashop é yanmai, agè ashop é dông lató hkâhpúq kó. Yuq hkangmó é myoq hí má ge é lé kut râ rago myit keq.

¹⁸ Wó dut é nghut jáng, nungmoq wó dut é í, yuq hkangmó eq guingón shoq nyi keq.

¹⁹ Ngá é buinòm wui é, lató a hpúq é za, Garai Gasâng é nhikmo-yo hkyô lé sheq lánq nyí keq. Hkâsu mù gâ le, "Ngò sheq lató

hpuq râ sù nghut lhê; ngò lató hpuq râ."⁶ ga, hau Yhumsing tai ri ga kâ tô ri.

²⁰ Hau mù, "Nungmoq lé gyè kut sù zòmút é nghut le gi, byi tso keq; yhang wuhsit é nghut le gi, rajung jung byi huq keq.

Hau dông kut jáng, náng, yhang é ulhum htoq má gyúng é myigye bum to byi é nghut lhê."²⁰

ga le kâ tô ri.

²¹ Agè ashop é gi, nungmoq lé a ung pyám sháng gaq, ge é hkyo eq agè ashop é lé ung pyám keq.

13

Ahkáng Ayá Wó Bàng Ô Má Nyi Râ É Hkyô

¹ Yuq hkangmó gi, up é ahkáng ayá wó bàng é a-ô má nyi ra rá nghut lhê; hkâsu mù gà le, Garai Gasáng chyáng mai za a nghut le gi, up é ahkáng ayá joq é a nghut. Joq tô é ahkáng ayá pé gi, Garai Gasáng eq byi tô é chyat nghut lhê.

² Hau é yanmai, up é ahkáng ayá lé gum-lau toq é sù gi, Garai Gasang byi tô é up é ahkáng ayá lé gum-lau toq é sù nghut ri; hau su kut é bang gi, tará jéyáng é hui zo rá hkyô lé ho yù nyi é bang nghut akó.

³ Hkâsu mù gà le, uphkanq é bang gi, ge é hkyô kut bàng é matú gyuq nán hpo a dut é za, shut shai hkyô kut bàng é matú sheq dut é ru nghut lhê. Up é ahkáng wó sù lé gyuq é mai lut nau lhê a nghut lhi? Hau jáng, ge é hkyô kut aq, hau hkún, yhang, nang lé hkya-on rá nghut lhê.

⁴ Hkâsu mù gà le, yhang gi, náng é matú ge é akyú kut byi rá nghut é. Garai Gasáng é dui-nhâng zoshâng nghut lhê. Nghut kôlhang, náng, shut shai hkyô kut é nghut le gi, gyuq nán nyi aq; hai mù gà le, yhang gi, shâm lé ajè wun tô é a nghut. Yhang gi, Garai Gasáng é dui-nhâng zoshâng nghut mù, shut shai hkyô kut sù lé dam byi rá matú nhikmo-yo Su é gunglik nghut lhê.

⁵ Hau mù lui, dam byi rá lé chiq é yanmai za a nghut, yhumsing nhik bô rá é yanmai le, hau up é ahkáng ayá wó bàng é a-ô má nyi rá dut lhê.

⁶ Nungmoq hkansé kat rá é gi, hau é yanmai le nghut lhê; hkâsu mù gà le, hau up é ahkáng ayá wó bang gi, Garai Gasáng é dui-nhâng zoshâng wui nghut lhê mù, uphkanq é mù lé, ahkying bying shoq wùn waq nyi akó nghut ri.

⁷ Yuq hkangmó lé byi àng é eq rajung za byi keq; hkansé kat byi ang sù lé gi, hkansé kat byi keq; kang kat byi ang sù lé gi, kang kat byi keq; gyuq kyum ang sù lé gi, gyuq kyum keq; hkungga ang sù lé gi, hkungga keq.

Rayuq Eq Rayuq Chyitdap Lhum Râ Hkyô

⁸ Rayuq eq rayuq chyitdap lhum é chyin mai lai lui, hai chyin le hkâdap lhum kó; hkâsu mù gà le, góyuq lé chyitdap é sù gi, hau jep é tará lé lhoq dik bê sù nghut ri.

⁹ "Su-myi sulàng lú hkyô hkâkut," "Byù hkâsat," "Hkâhkau," "Hkâ-myoqnoq,"⁹ gà tô é hkunmó pé eq gotú hkunmó hai nghut nghut, "Náng gúng lé nang chyitdap é su, nang é chyangnâm mâ é bang lé le chyitdap aq."⁹ gà é tará má lo jup to bê nghut lhê.

¹⁰ Chyitdap myit gi, chyangnâm mâ é byù lé a ge é hai le a kut é nghut lhê. Hau mù lui, chyitdap myit gi, hau jep é tará lé lhoq dik é hkyô nghut ri.

¹¹ Hau mù, ahkuí lhê é ahkying yàm-yoq lé sê gyo lui, hau hkyô lé kut keq. Nungmoq yhup mui é mai bún gyng rá ahkying jé bê; hai mù gà le, nga-nhông é hkyi yù hkyô gi, lumjing hi é hkun lhê htoq má ahkuí je chyáng bê nghut ri.

¹² Hau myin ahkying gi, lai byuq ló rá za nghut bê; nyi ahkying gi, jé ló berá nghut lhê. Hau mù lui, mauchut é muzó lé tô pyám mù, maubó é gyehking lé wut to sháng.

¹³ Ye lhai é eq shuq wut é, ashop é dông gungsho zùm yap é eq shut é dông nyi zô lhum nau é myit bo é, mabyoq jishum htoq é eq manon é pé a kut é za, nyi-káng lhê su, ge é a-kyang dông nyi yap sháng.

¹⁴ Hau htoq agó, Yhumsing Yesuq Hkris-duq lé, mebu su wut to keq; yubak gungsho ô nau é dông lhoq dik rá matú hkâ-myit kó.

14

Gumang Wui Lé A Jéyáng Râ Hkyô

¹ Lumjing myit má wum nyhóm sù lé, mying myo nhô zá é hkyô pé lé a jéyáng byi é za hap yù keq.

² Byù rayuq é lumjing myit gi, jung hkangmó zô ri; nghut kôlhang, lumjing myit nyhóm sù gotú rayuq gi, mhan-haq hpo-qnoq za zô ri.

³ Jung hkangmó zo sù gi, a zo sù lé a ge wú tiq pyám; jung hkang jung mó a zo sù gi, zo sù lé mara a ge byi; hkâsu mù gà le, Garai Gasang gi, yhang lé hap yu to bê nghut ri.

⁴ Náng gi, ó yuq wá nghut mù, góyuq é dui-nhâng zoshâng lé jéyáng lhê lhu? Yhang, yap ging kôlhang, legbat kôlhang, yhang é yhumsing myit za nghut lhê. Yhang gi, wó yap ging rá nghut lhê; hkâsu mù gà le, hau Yhumsing gi, yhang lé wó yap ging nhâng Sù nghut lhê.

⁵ Rayuq myit é gi, buinyi ra-nyí gi, gó nyi htoq je ge lhê gà ri; dum rayuq myit é gi, nyi wui rajung za nghut lhê gà ri. Yuq hkangmó gi, yhumsing myit yu é lé a úng-àng nyi sháng gaq.

* 12:20 Sánhkyang 25:21-22

* 13:9 Htoq Ló 20:13-15

* 13:9 Nhung 19:18

⁶Buinyi ra-nyilé, ahkyak lhê ga myit yù sù gi, haù Yhumsing é matú kut é nghut ri. Zô é sù gi, Garai Gasang lé jeju hkyá-ôn é yanmai, haù Yhumsing lé bun luí zô nyi ri; a zo sù le, haù Yhumsing lé bun luí Garai Gasang lé jeju hkyá-ôn nyi ri.

⁷Hkâsu mù gà le, nga-nhúng ó yuq nghut kôle, yhumsing matú za asak dui é a nghut; ó yuq nghut kôle, yhumsing matú za shí é a nghut.

⁸Nga-nhúng asak dui nyi le gi, haù Yhumsing é matú dui é ru nghut lhê; nga-nhúng shí byuq le gi, haù Yhumsing é matú shí é ru nghut lhê. Haù mù, asak dui nyi kôlhang, shí byuq kôlhang, nga-nhúng gi, haù Yhumsing eq séng é bang nghut lhê.

⁹Haù su mù, Hkrisduq gi, shí byuq bang eq asak dui bâng é Yhumsing dut sháng gaq, shí hkám mù dum dui toq é nghut lhê.

¹⁰Haù mù, nàng gi, haù mù nàng é gumang hpó lé jéyáng nyi lhê lú? Haù mù nàng é gumang hpó lé wú tiq nyi lhê lú? Nga-nhúng lhunglhang bang gi, Garai Gasang é tará jéyáng tanghkuq hí má yap rá bang chyat nghut lhê.

¹¹Hkâsu mù gà le,

"Haù Yhumsing gi, 'Ngò rú dui nyi é eq rajung za, Ngá é hí má hkyihput hkangmó htuq rá nghut lhê;

Garai Gasang lé, shò hkangmó èq yín yú kó rá nghut lhê.' ga tai ri."^{*}

ga kâ tô ri.

¹²Haù mù luí, nga-nhúng yuq hkangmó gi, yhumsing kut lai lo é hkyô lé, Garai Gasang chyáng shít ra rá nghut lhê.

¹³Haù nghut mù, nga-nhúng gi, rayuq eq rayuq tará jéyáng lhùm é hkyô lé tò pyám sháng. Ó yuq nghut kôlhang, yhumsing é gumang é hkyowui má, myit leqbat jowò eq htung hté jowò a to byi rá matú, myit sidiq keq.

¹⁴Haù Yhumsing Yesuq má nghut nyi é sù ngò gi, haù jung zoshuq nghut kôlhang, yhang baù yhang a sanséng a dut é hkyô lé, hkyak wó sé luí, jing nyi lhê. Nghut kôlhang, ó yuq le, rajung jung lé a sanséng ga myit yu é nghut jang, yhang é matú, zè haù gi, a sanséng é nghut lhê.

¹⁵Nàng zô é zoshuq yanmai, nàng é gumang hpó myit a ngón é nghut le gi, nàng, chyitdap myit mai sô nyi é sù a nghut lo. Hkrisduq shí hkám byi bê sù nghut é, nàng é gumang hpó lé, nàng zoshuq é đông mai hkâlhoq hten pyám.

¹⁶Nàng, ge ri ngú myit yu é hkyô lé, agé ashop é đông hkâtai pyám nhâng.

¹⁷Hkâsu mù gà le, Garai Gasang é mingdán gi, zo zo shuq shuq kôlhang a nghut é za,

dingmán hkyô, nguingón hkyô eq Chy-oiyung Woi-nyí má gabú é hkyô ru nghut lhê.

¹⁸Haù mù gà le, shí hkyô đông mai Hkrisduq lé dojaú é sù gi, Garai Gasang ó nau é sù eq byu pé èq hkyá-ôn é hui sù nghut ri.

¹⁹Haù mù luí, nguingón hkyô má nyi rá eq, rayuq eq rayuq wum byi lhum rá hkyô lé, shikut nyi keq.

²⁰Zoshuq é yanmai, Garai Gasang é muzó lé hkâlhoq hten pyám. Zoshuq lhunglhang gi, sanséng é chyat nghut lhê; nghut kôlhang, góyuq lé myit leqbat nhang é jung lé zô é sù gi, shut é nghut lhê.

²¹Tsihyiq wing shuq é eq sho zô é hkyô má nghut kôlhang, gotú haù jung kut é nghut kôlhang, nàng é gumang hpó lé myit leqbat nhang é nghut le gi, a kut le je ge lhê.

²²Haù mù, haù pé eq séng luí, nàng lumjing é haù nghut kôle, nàng eq Garai Gasang gyoro má za joq nyi sháng gaq. Yhumsing ge lhê gà é eq, yhumsing gùng yhumsing mara byi jang a joq é sù gi, hkungso wó nyi ri.

²³Nghut kôlhang, úng-âng é myit èq zô é nghut le gi, mara byi é hui ri, haù mù gà le, yhang zô é gi, lumjing myit mai a nghut; lumjing myit mai a kut é haù nghut kôlhang, mara nghut ri.

15

Góyuq Lé Myit Ngón Nhâng Rá Hkyô

¹Lumjing hkyô má wum-o bo é nga-nhúng gi, yhumsing myit ngón rá hkyô lé a ho é za, wum-o a bò bâng é wum nyhóm hkyô lé, hkam jan byi nyi rá dut lhê.

²Nga-nhúng yuq hkangmó gi, yhumsing é chyangnám má é su é ge é hkyô dut rá matú, yhang wó kô myhang lò shoq, yhang lé lhoq ngón byi nyi sháng.

³Hkâsu mù gà le, Hkrisduq lhang gi, Yhàngyung yhang lhoq ngón é a nghut; haù gi, "Nàng lé rhoi bâng é dang gi, Ngá chyáng gyó ke bê nghut ri."^{*} ga, kâ tô é eq rajung za nghut ri.

⁴Hkâsu mù gà le, lai lò bê hkún kâ tô é lhunglhang gi, nga-nhúng lé mhoq byi rá matú chyat kâ tô é nghut lhê; haù gi, Chyúmdang má é hkam jan hkyô eq myit wum byi hkyô đông mai, nga-nhúng myit myoqbyù hkyô wó rá matú nghut lhê.

⁵Haù hkam jan hkyô eq myit wum byi hkyô lé byi é Garai Gasang gi, nungmoq, Hkrisduq Yesuq é htàng châng nyi é u lé, nungmoq yhangchang rading ralhum za dut é woi-nyí byi sháng gaq;

⁶haù jang sheq, nungmoq gi, i-myit rahkat eq nhut hté ralhum èq za, nga-nhúng é Yhumsing Yesuq Hkrisduq é Yhàngwa nghut

Sû, Garai Gasang lé, wó hkya-on kungtôn kó rá nghut lhê.

⁷ Haú mù luí, Hkrisduq gi, nungmoq lé hap yù bê é eq rajung za, Garai Gasang é hpungwup shingkang lé lhoq htoq shit rá matú, nungmoq le, rayuq eq rayuq hap yu lhum keq.

⁸ Hkásu mù gâ le, ngò, nungmoq lé tai kôlé, haú mying hú é íchyí iwâ pé lé byí tô é danggidig pé lé lhoq ging rá matú, Hkrisduq gi, Garai Gasang é tengmán hkya é malai, Yudaq byu pé é dui-nhâng zoshâng dut bê nghut ri.

⁹ Haú mù, Garai Gasang é shogyo nhik-myin hkya é yanmai, haú tungbaù pé, Garai Gasang lé wó hkya-on kungtôn kó rá nghut lhê. Haú hkyô gi,

"Haú mù luí, tungbaù pé chyáng má, Nang lé, ngò hkya-on rá nghut lhê;

Náng é mying lé, ngò hkya-on mahkôn rá nghut lhê."[✧]

ga kâ tô é eq rajung za nghut ri.

¹⁰ Dum,

"Tungbaù pé ê, Yhâng é byu pé eq rahá gabú nyí keq."[✧]

gâ tô ri.

¹¹ Dum,

"Nungmoq tungbaù pé lunglhâng bang ê, haú Yhumsing lé hkya-on keq, byú myú lunglhâng bang ê, Yhang lé hkya-on mahkôn hkôn keq."[✧]

gâ tô ashí nghut ri.

¹² Hau htoq agó, Esai-aq tai é gi,

"Yese é Amyit gi, yuq htoq lô luí, Yhang gi, byú myú chângiup é ahtoq má up rá sú nghut lhê;

tungbaù pé gi, Yhang má myit myoqbyù kó rá nghut lhê."[✧]

gâ ri.

¹³ Haú myit myoqbyù hkyô byí é Garai Gasang gi, Yhang lé lumhkau nyí é bang nungmoq lé, gabú hkyô banshoq eq ngu-ingón hkyô lhoq pying byi sháng gaq; haú jáng sheq, nungmoq gi, Chyoiyung Woi-nyí é wum-o a-tsâm eq, myit myoqbyù hkyô wó bying mui nyí kó rá nghut lhê.

A Gyuq A Wam É Za, Poluq Laiká Ká É Hkyô

¹⁴ Ngá é gumang wui ê, nungmoq gi, ge é hkyô bying jup é bang, hpaqchyí má gumjup é bang, rayuq eq rayuq mhoqshit lhúm é má kung é bang nghut é lé, ngá gung ngò yhang hkyak lumjing lhê.

¹⁵ Ngò gi, nungmoq lé dum lhoq pún é dng, ahkyak é pé ra-am lé a gyuq a wam ká kat bê nghut lhê.

¹⁶ Hkásu mù gâ le, tungbaù pé gi, Chyoiyung Woi-nyí dng mai lhoq sân-yung é hui luí, Garai Gasang eq hap yù ging é hkungga

wó dut kó sháng gaq ga, Garai Gasang é gabú danglù lé hkò rá hkyangjong é wò dng, tungbaù pé chyáng, Hkrisduq Yesuq é hpungmù wùn sú dut rá matú, Garai Gasang, ngo lé jeju byí é yanmai nghut lhê.

¹⁷ Haú mù luí, ngò gi, Garai Gasang lé dojaú é hkyô eq séng luí, Hkrisduq Yesuq má nghutbùn nyí lhê.

¹⁸ Ngò gi, ngò tai é eq zui sai é muzó dng le, haú Woi-nyí é a-tsam chùng mù, kumlhá pé eq laklai kumlhá pé dng le, tungbaù pé lé, Garai Gasang é jino gyo shoq shuí ù é má, ngo lé Hkrisduq nhang é muzó hkyô lé tai é mai lai luí, gotú hai lé le wam tai é a nghut.

¹⁹ Haú mù luí, ngò gi, Yerusalem wá mó mai Ilurikhkam mau jé shoq é hkyô awui ayám jam shoq, Hkrisduq é gabú danglù lé hko kyo bê nghut lhê.

²⁰ Ngò hkâ-nhám le myit tuí nyí é hkyô gi, góyuq hi tô é apún awang má dum a puq sai pyám é za, Hkrisduq lé a sé shí é jowò má gabú danglù hko kyo rá hkyô nghut lhê.

²¹ Haú gi,

"Yhâng é hkyô lé, tai kyô é a hui shí é bang, myàng kó rá nghut luí,

a wó gyo wú é bang, sê gyo kó rá nghut lhê."[✧]

ga kâ tô é eq rajung za nghut ri.

²² Haú mù luí, ngò, nungmoq chyáng lé jé rá lé, anum num hkyikyo luqlhum dut nyí é gi, muzó hau é yanmai nghut lhê.

Romaq Myuq Lé Lô Kum Râ Sôn É Hkyô

²³ Nghut kôlháng, ahkuí gi, shí mau pé má ngò zui sai rá jowò a joq lo é nghut mù, nungmoq lé myàng nau nyí é zanwut myo myo nghut bê eq rajung za,

²⁴ ngò, Sipin ming shut ló é hkún, nungmoq chyáng wàng rá sôn tô lhê. Ngò gi, lai ló é hkún, nungmoq lé lô sô kum mù, nungmoq eq rayoq zò zúm yap ngón é htàng má sheq, ngá é hkyowui matú, nungmoq haú mai htugbang kat rá lé, ngò myoqbyu tô lhê.

²⁵ Ahkuí, ngò kúm gi, Yerusalem wá mó má é sân-yung bang lé dojaú rá matú, haú wá shut e ló é hkyolat má nghut nyí lhê.

²⁶ Hkásu mù gâ le, Makedoni eq Ahkaia mau má é bang gi, Yerusalem wá mó má é sân-yung báng chyáng má é myung báng é matú, garúm chyunghuq hkyui tsing nau bùm bekô nghut ri.

²⁷ Yhangmoq gi, haú su kut nau bùm bekô nghut ri, gè gè ga jáng, haú gi, yhangmoq chyín dap tô é dng ru nghut lhê. Hkásu mù gâ le, haú Yudaq byu pé é woi-nyí eq séng é shimán jeju lé, tungbaù pé bo hkam yù bê nghut le gi, yhangmoq é sutzè shimán jeju lé, Yudaq byu pé eq chóm chùng rá chyín dap tô é dng nghut lhê.

²⁸ Haù mù luí, ngò gi, muzó shí lhum ban kut mù, garúm chyunghuq shí lé, yhangmoq wó hap yù bê lé hkyak sê é htàng má, Sipin ming shut ló rà nghut mù, lai ló uchyang, nungmoq chyáng lé sô kum rà nghut lhê.

²⁹ Ngò gi, nungmoq chyáng lé jé é hkùn, nungmoq é matú Hkrisduq é shimân jeju bying jup é eq jé lé rà nghut é lé, ngò sê lhê.

³⁰ Gumang wui ê, ngá é matú Garai Gasang chyáng kyúdung byí é dông, ngò wum kat yhang shikut é hkyô má nungmoq bo wàng lòm rà matú, nga-nhùng é Yhumsing Yesuq Hkrisduq eq Woi-nyí é chyitdap myit é yanmai, ngò, nungmoq lé wum taí tsuq kat lhê.

³¹ Yuda mau má é a lumjing băng chyáng mai, ngò hkyi yu é wó hui luí, Yerusalem wá mó má ngò wùn waq é muzó lé, haù má é sán-yúng bang hap yù ging é wó dut rà matú kyú bo dung byi keq.

³² Haù jang sheq, ngò gi, Garai Gasang ô nau é dông mai, gabú myit eq nungmoq chyáng wó jé lé mù, nungmoq eq rahá wum-o wó yú rà nghut lhê.

³³ Haù nguingón hkyo é Garai Gasang gi, nungmoq banshoq bang eq rahá rú nyi nyi sháng gaq ô. Amen.

16

Shi-kyám Dang

¹ Ngò gi, Kenhkrea noqkuq hpúng má é hpungtê, nga-nhùng é gu-nhá Hpobe lé, nungmoq chyáng shichyen byí kat lhê.

² Nungmoq gi, sán-yúng bang kut ging é eq rajung za, haù Yhumsing má yhang lé hap yù luí, yhang rà tô é hkyô haí nghut kôle, yhang lé htuqbang keq. Hkâsu mù gá le, yhang gi, byù myo myo lé le, ngo lé le, gyai yhang garúm lai bê sú nghut lhê.

³ Hkrisduq Yesuq má ngò eq mù wùn luzúm nhik nghut é, Priskila eq Akula lé bo shi-kyám byi keq.

⁴ Yhangnhik gi, ngá é asak é matú, yhangnhik é asak sum rà í yhang dut wú kô é nghut mù, ngò za a nghut, tungbau pé é noqkuq hpúng pé banshoq le, yhangnhik lé jeju bún lhê.

⁵ Yhangnhik é yhum má chôm hui zup é noqkuq hpúng lé le, bo shi-kyám byi keq.

Asia mau má, Hkrisduq lé sâng-hi lumjing wang lo é, ngò chyitdap é Epanetu lé bo shi-kyám byi keq.

⁶ Nungmoq é matú gyai yhang shikut wú bê sú nghut é Mariq lé bo shi-kyám byi keq.

⁷ Ngò eq rahá htóng lúng wú bê nghut é, ngá é buinùm, Androniku eq Yunia nhik lé bo shi-kyám byi keq. Yhangnhik gi, lagyô pé má myoqdong wó su nhik nghut é htoq agó, ngá é hí má, Hkrisduq má ngò a nyi shi le nyi bê sú nhik nghut akó.

⁸ Haù Yhumsing má, ngò chyitdap é sú, Ampliatu lé bo shi-kyám byi keq.

⁹ Hkrisduq má, ngamoq é mù zui luzúm nghut é Orban eq ngá é chyitdap luzúm Staku lé, bo shi-kyám byi keq.

¹⁰ Hkrisduq má chyam é hui mù, wó lùm bê sú, Apele lé bo shi-kyám byi keq.

Aristobulu eq sêng é yhumbyù wui lé bo shi-kyám byi keq.

¹¹ Ngá é buinùm Herudion lé bo shi-kyám byi keq.

Haù Yhumsing má nghut nyí bê bang, Narkiso é yhumbyù wui lé bo shi-kyám byi keq.

¹² Haù Yhumsing má mù zui shikut é myiwê nhik, Truhpena eq Truhposa lé bo shi-kyám byi keq.

Haù Yhumsing má mù zui gyai yhang shikut é myiwe góyuq, ngá é chyitdap luzúm Persi lé bo shi-kyám byi keq.

¹³ Haù Yhumsing má hkyin yu é hui bê sú, Ruhpu lé le, ngá nu dông nghut wú bê nghut é Ruhpú é yhangnu lé le, bo shi-kyám byi keq.

¹⁴ Asunkritu, Hpelegon, Herme, Patroba, Herma eq yhangmoq eq rahá nyi é gumang wui lé, bo shi-kyám byi keq.

¹⁵ Hpilologu, Yulia, Nerea eq yhâng é nhammó eq, Olumpa, yhangmoq eq rahá nyi é sán-yúng bang banshoq lé, bo shi-kyám byi keq.

¹⁶ Rayuq eq rayuq, chyoiyúng bopuq é eq shi-kyám lhum keq.

Hkrisduq é noqkuq hpúng pé banshoq gi, nungmoq lé shi-kyám dang sang kat akó nghut ri.

¹⁷ Gumang wui ê, nungmoq é lumjing hkyô má, nungmoq mhoq hkam yù bê nghut é mhoqshit hkyô eq shai lhum é, gam hkoq hkyô pé eq myit leqbat hkyô pé lhoq htoq é bang lé sidiq keq nghú, wum taí tsuq kat lhê. Yhangmoq lé koi pyám keq.

¹⁸ Hkâsu mù gá le, haù sú é bang gi, nga-nhùng é Yhumsing Hkrisduq lé dojaú é bang a nghut é za, yhumsing é wamdaù matú dojaú é bang nghut akó. Yhangmoq gi, myit nú-nhâm é bang lé, dang ngón dang nguí dông mhaù zô akó nghut ri.

¹⁹ Nungmoq, jino gyo kô é hkyô lé, yuq hkangmó wó gyo bê nghut ri; haù mù, ngò gi, nungmoq é matú gyai yhang gabú nyi lhê; nghut kôlhang, ge é hkyô eq sêng luí gi, nungmoq hpaqchyi bò mù, agé ashop hkyô eq sêng luí gi, nungmoq a bo lòm rà lé, ngò ô nau ri.

²⁰ Nguingón hkyo é Garai Gasang gi, a myáng má, nungmoq é hkyiwa ô má Tsadán lé nang pyeq pyám rà nghut lhê.

Nga-nhùng é Yhumsing Yesuq é jeju gi, nungmoq eq rahá nghut nyí sháng gaq ô.

²¹ Ngá é mù zui luzúm Timohti gi, nungmoq lé shi-kyám dang sang kat ri; haù eq rajung za, ngá é buinùm wui Luki, Yason eq

Sosipata pé le, shi-kyám dang sang kat akô nghut ri.

²² Laiká shî lé bo ká sù ngò Tertiu gi, haû Yhumsîng má nungmoq lé shi-kyám kat lhê.

²³ Ngo lé le, noqkuq hpúng gôn lé le, bíng hkulum é sù Ge-u gi, nungmoq lé shi-kyám dang sang kat ri.

Haû wa má é ngúnzui sù Erastu eq nganhûng é gumang hpó Kuartu gi, nungmoq lé shi-kyám dang sang kat akô.

²⁴ Nga-nhûng é Yhumsîng Yesuq Hkrisduq é jeju gi, nungmoq lhunglhâng bang eq rahá nghut nyí sháng gaq. Amen.*

²⁵ Byù myû chângjup bang lumjîng luî, Yhang é jîno gyo sháng gaq ga, a-nham pyat mai haq tô é hui kôlhâng,

²⁶ ahkuî, ahtum abyuq é Garai Gasâng é hkunmó é yanmai, myiqhtoi laiká pé dông hpông shit é eq sé nhâng bê nghut é, sê gyo wuî é hkyo é shing-rán má cháng luî, ngá é gabú danglù eq Yesuq Hkrisduq é hkyô tái pyo é dông, nungmoq lé wó lhoq ging túng byí é,

²⁷ rayuq za é hpaqchyí bo sù Garai Gasâng chyáng, Yesuq Hkrisduq dông mai, hpungwup shíngkang gi, ahtum abyuq ru joq nyí sháng gaq ô! Amen.

* 16:24 Chyúmding ra-am má chyúmbun 24 shî a bo é nghut lhê.

KORINHTUQ

Pê Chyáng Hî Dàm Hun Kat é Laiká (1 Corinthians)

¹ Garai Gasang ô nau é eq rajung za, Hkrisduq Yesuq é lagyo dut rá matú ji yù huí é sú ngò Poluq eq, ngamoq é gumang hpó Sositeni gi,

² jowò hkgangmó má nga-nhùng é Yhumsing Yesuq Hkrisduq é mying lé lãng é bang eq rahá, chyoiyúng bang dut rá matú ji yù huí é eq Hkrisduq Yesuq má lhoq sân-yúng é huí é bang nghut é, Korinhtuq myuq má é, Garai Gasang é noqkuq hpúng lé, dang kyô kat lhê; Hkrisduq gi, ngamoq é eq yhangmoq é Yhumsing nghut lhê.

³ Nga-nhùng é Íwa Garai Gasang eq Yhumsing Yesuq Hkrisduq chyáng má é jeju eq nguingón hkyô gi, nungmoq chyáng ru joq nyí sháng gaq ô.

Hkrisduq É Yanmai Wó É Jeju

⁴ Garai Gasang jeju lé Hkrisduq Yesuq đông mai nungmoq lé byi bê nghut mù luí, ngò gi, nungmoq é matú Garai Gasang lé ayang jeju hkya-ôn nyi lhê.

⁵ Hkásu mù gà le, nungmoq gi, Hkrisduq đông mai, nungmoq dang tái é hkyô ban-shoq eq nungmoq é sumsé hpaqchyí ban-shoq má je lhoq gumjup é huí beko nghut ri.

⁶ Hâu gi, Hkrisduq Yesuq eq séng luí, ngamoq saksé hkâm é hkyô têng é lé, nungmoq chyáng shit nyi é nghut lhê.

⁷ Hâu mù, nga-nhùng é Yhumsing Yesuq Hkrisduq dum htoq shit rá lé, nungmoq gyai myoqbyu lãng nyi é u má, nungmoq gi, woi-nyí hkyô eq séng é chyunghuq hai lé le langhpyut kó rá a nghut.

⁸ Nga-nhùng é Yhumsing Yesuq Hkrisduq é buinyi má, nungmoq lé mara hún rá hkyô a bò shoq, Hkrisduq gi, nungmoq lé, htáng shoq gingting nhang nyi rá nghut lhê.

⁹ Nga-nhùng é Yhumsing nghut é Yhang Zo Yesuq Hkrisduq eq rahá zùm yap rá matú, nungmoq lé ji yù bê sú Garai Gasang gi, lhumzui Sú nghut ri.

Noqkuq Hpúng Má Gam Hkoq Lhùm É Hkyô

¹⁰ Gumang wui ê, nungmoq hkaú má gam hkoq lhùm é hkyô pé a joq é za, nungmoq é myit eq myit sôn wú é hkyô má gumjup shoq rading ralhum za dut nyi sháng gaq, nungmoq lunglhang bang rayuq eq rayuq byin hpyé gohut huí nyi keq nghú, ngò, nungmoq lé, nga-nhùng é Yhumsing Yesuq Hkrisduq é mying mai dúng tóngbán kat lhê.

¹¹ Ngá é gumang wui ê, Hkloe é yhùm byù wui gi, nungmoq hkaú má mabyoq htoq hkyô joq é lé, ngo lé hkyáng lo shit akò.

¹² Ngò hau su nghú tái é gi, nungmoq má é rayuq yuq gi, "Ngò gi, Poluq htàng châng lhê." ga, góyúq gi, "Ngò gi, Apolo htàng châng lhê." ga, dum rayuq gi, "Ngò gi, Kehpa htàng châng lhê." ga, dum góyúq gi, "Ngò gi, Hkrisduq htàng châng lhê." ga, tái bùm kô é yanmai nghut lhê.

¹³ Hkrisduq gi, gam hkoq é huí bê lhú? Ngò Poluq gi, nungmoq é matú tapzing má jén sat é huí bê lhú? Nungmoq gi, ngá é mying mai wui-myhup hkâm yù kô é lhú?

¹⁴ Ngò gi, Krispu eq Ge-u nhik mai lai luí, nungmoq ó yuq lé le wui-myhup a hkâm byi wú é yanmai,

¹⁵ Nungmoq ó yuq le, ngá é mying mai wui-myhup hkâm yù bê nghú a wó tái é nghut mù, ngò, Garai lé jeju hkya-ôn lhê.

¹⁶ (Stephana é yhumbyù wui lé le, ngò wui-myhup hkâm byi é nghut lhê, hau lai lai luí gotú ó lé hkâm byi zàng ashí laq, ngò a myit bun lo nghut ri.)

¹⁷ Hkásu mù gà le, Hkrisduq, ngo lé nhang kat é gi, wui-myhup hkâm byi rá matú a nghut, gabú danglù hko kyo rá matú sheq nhang kat é ru nghut lhê; nghut kôlhang, waxàng zô wui é hpaqchyí byéng-yá dang đông hko kyô é a nghut mù, Hkrisduq é tapzing é a-tsam gi, akóm a dut byuq é nghut lhê.

Garai É A-tsam Eq Hpaqchyí Byéng-yá Gi, Hkrisduq

¹⁸ Hkásu mù gà le, tapzing má Yesuq shí hkâm é hkyô eq séng é danglù gi, htên byoq huí rá bãng é matú, danggang dut byuq ri; nghut kôlhang, hkyi yu é huí nyi bang nga-nhùng é matú gi, Garai Gasang é a-tsam nghut ri.

¹⁹ Hkásu mù gà le, Chyúmdang má ká tô é gi,

"Hpaqchyí bò bãng é hpaqchyí byéng-yá lé, Ngò lhoq htên pyám rá nghut lhê; nyan bò bãng é nyan lé, Ngò, ajè dut pyám nhâng rá nghut lhê."^{*}

ga ri.

²⁰ Hpaqchyí byéng-yá bò bang gi, hkámá lhú? Hpaqchyí laiká kung bang gi, hkámá lhú? Ipyat shi é dang tái kung bang gi, hkámá lhú? Garai Gasang gi, mingkân é hpaqchyí byéng-yá lé lhoq ngok pyám bê a nghut lhú?

²¹ Hkásu mù gà le, Garai Gasang é hpaqchyí byéng-yá mai ga jang, mingkan zo wui gi, yhumsing é hpaqchyí byéng-yá đông mai Garai Gasang lé a wó sé kô é yanmai, danggang gá pyám byi kô é mungdang lé hko kyô é đông lumjing bang lé hkyi yù rá matú, Garai Gasang myit hpyit é nghut lhê.

* 1:19 Esai 29:14

²² Yudaq byu pé gi, limik kumlhá pé lé dúng akò; Grik byu pé gi, hpaqchyí byéng-yá lé ho akò nghut ri.

²³ Nghut kôlhang, ngamoq gi, tapzîng má jén sat huí é Hkrisduq é hkyô lé hko kyô lhê. Haù gi, Yudaq byu pé é matú myit leqbat jowô eq tûngbaù pé é matú danggang dut byuq ri.

²⁴ Nghut kôlhang, Garai Gasâng eq ji yù huí é Yudaq byu pé eq Grik byu pé é matú, Hkrisduq gi, Garai Gasâng é a-tsam eq Garai Gasâng é hpaqchyí byéng-yá nghut ri.

²⁵ Hkâsu mù gà le, Garai Gasâng é ngok hkyô gà é lhang gi, byu é hpaqchyí byéng-yá htoq má je gyaù ri; Garai Gasâng é wum nyhóm hkyô gà é lhang gi, byu é wum-o htoq má je gyaù ri.

²⁶ Gumang wui é, Garai Gasang, nungmoq lé ji yu é hkûn, nungmoq hkâsu dut nyi é hkyô lé myit wú keq. Waxâng zô wui é nyi yap a-tsâng đông hpaqchyí byéng-yá bo é bang, ahkâng ayá wó é bang, zaugun suwún amyù mâ é bang a myô é nghut lhê.

²⁷ Nghut kôlhang, Garai Gasang gi, hpaqchyí byéng-yá bô bang lé hoq lhoq hpu rà matú, mingkan mâ é ngok bang gà é lé hkyin yu é nghut lhê; Garai Gasang gi, wum bô bang lé hoq lhoq hpu rà matú, mingkan mâ é wum nyhóm bang gà é lé hkyin yu é nghut lhê.

²⁸ Yhang gi, mingkân eq ahkyak tô é lé lhoq htên pyám rà matú, haí a nghut é lé le, mingkan mâ é aróng a bo é eq wú tiq pyám huí é lé le, hkyin yu é nghut lhê.

²⁹ Haù gi, ó yuq le, Yhâng é hí má a ge nghutbun rà matú nghut ri.

³⁰ Garai Gasâng é yanmai, nungmoq gi, Hkrisduq Yesuq má nghut nyi bekò nghut ri; Hkrisduq gi, nga-nhúng é matú, Garai Gasâng chyáng mâ é hpaqchyí byéng-yá dut bê nghut ri. Haù gi, nga-nhúng é dîngmán hkyô, chyoiyúng hkyô eq hkyi yù hkyô nghut ri.

³¹ Haù mù luí, "Gumrong é sù gi, haù Yhumsîng má gumrông sháng gaq."^o ga kâ tô é eq rajung za nghut ri.

2

Woi-nyí Mai Lo É Garai Gasâng É Hpaqchyí Byéng-yá

¹ Gumang wui é, ngò gi, Garai Gasang eq sêng é saksé hkyô lé nungmoq chyáng taí pyô rà matú jé lé é hkûn, dang taí kúng é eq hpaqchyí byéng-yá mó bo é đông lé é a nghut.

² Hkâsu mù gà le, ngò, nungmoq eq rahá nyi é u lé, Yesuq Hkrisduq eq Yhang tapzîng má jén sat huí é hkyô mai lai luí, jung hkangmó lé tô-myí pyám rà nghù myit hpyit yù bê nghut lhê.

³ Ngò gi, nungmoq chyáng jé lé é hkûn, wum nyhóm é eq gyai yhang gyuq nán é nghut lhê.

⁴ Ngá é danglù eq ngò hko kyô é hkyô gi, hpaqchyí bo é eq mhuí yu é dang pé đông a nghut é za, Woi-nyí é a-tsâm eq nungmoq lé shit é đông ru nghut mù,

⁵ nungmoq é lumjîng myit gi, byù é hpaqchyí byéng-yá má a nghut é za, Garai Gasâng é hpungwup a-tsam má nghut nyi lhê.

⁶ Nghut kôlhang, ngamoq gi, myit dîng bê bang lé hpaqchyí byéng-yá đông nyo lhê; shí pyat lhê é hpaqchyí byéng-yá eq htên byoq nyi huí é shí pyat má é zàu wui é hpaqchyí byéng-yá đông kúm a nghut.

⁷ Ngamoq taí é gi, haq tô é eq, ahkyîng nghu é lhang a joq shí mai nga-nhúng é hpungwup shîngkâng é matú Garai Gasang tô to byí é hpaqchyí byéng-yá nghut é, Garai Gasâng é zàu tô é hpaqchyí byéng-yá lé taí é ru nghut lhê.

⁸ Shí pyat lhê é zàu wui gi, hpaqchyí byéng-yá haù lé rayuq lhang a sê gyo kó nghut ri; yhangmoq sê gyo kô é ru nghut le gi, hpungwup shîngkang bo é Yhumsîng lé tapzîng má jén sat pyám kô rà a nghut.

⁹ Nghut kôlhang, Chyúmdang má, "Ó yuq eq le a myang wú, ó yuq eq le a wó gyo wú, ó yuq eq le a bún myit wú é hkyô lé, Garai Gasang gi, Yhang lé chyitdap bâng é matú lajang tô byi bê nghut ri."^o

ga kâ tô é eq rajung za nghut ri.

¹⁰ Nghut kôlhang, Garai Gasang gi, haù hkyô lé, Yhâng é Woi-nyí đông nga-nhúng lé hpông shit bê nghut ri.

Woi-nyí haù gi, jung hkangmó lé ho gôn wú é nghut luí, Garai Gasâng é zàu tô é hkyô lé lhang ho gôn wú é sù nghut ri.

¹¹ Byù má lúng é woi-nyí za a nghut jáng gi, byù rayuq myit é hkyô pé lé, ó yuq wá wó sê lhê lú? Haù eq rajung za, Garai Gasâng é Woi-nyí za a nghut jáng, Garai Gasang myit é hkyô lé, ó yuq le wó sê é a nghut.

¹² Nga-nhúng gi, mingkân é woi-nyí lé hap yu tô é a nghut é za, Garai Gasâng eq nga-nhúng lé byi tô bê jeju lé, ngamoq wó sê gyo rà matú, Garai Gasâng chyáng mâ é Woi-nyí lé sheq hap yu tô é ru nghut lhê.

¹³ Haù mù luí, ngamoq gi, waxâng zô wui é hpaqchyí byéng-yá eq mhoq byí é dang đông taí é a nghut, Garai é Woi-nyí eq mhoq byí é dang đông taí é sheq ru nghut mù, woi-nyí eq sêng é tengmán hkyô lé woi-nyí eq sêng é dang đông taí sân kyô é nghut lhê.

¹⁴ Haù Woi-nyí lé a wó é sù gi, Garai Gasâng é Woi-nyí mai lo é hkyô pé lé a hap yu é nghut lhê; haù mù gà le, haù pé gi, yhâng é matú ngok é hkyô nghut luí, woi-nyí hkyô

đông mai haù hkyô lé a wú é yanmai, yhang gi, haù pé lé a wó sê gyo nghut ri.

¹⁵ Woi-nyí eq sêng é byù gi, lhunglhang lé wó jéyáng lhê, nghut kôlhang, yhang lé kúm gi, ó yuq eq le wó jéyáng é a nghut.

¹⁶ Chyúmdang má,

"Hkâsu mù gà le, ó yuq wá, haù Yhumsing é myit lé sé mù, Yhang lé wó mhoqshit wú é lú?"^{*}

ga kâ tô ri. Nghut kôlhang, nga-nhúng gi, Hkrisduq é myit lé wó é bang nghut lhê.

3

Noqkuq Hpúng Má Gam Hkoq Lhúm É Hkyô

¹ Gumang wui ê, hí hkân, ngò gi, nungmoq lé, Woi-nyí eq sêng é bang lé đông wó tai é a nghut; mingkan eq sêng é bang đông nghut kômù, Hkrisduq má zonú su dut bang lé đông sheq tai wú é nghut lhê.

² Nungmoq gi, zoshuq apat lé a wó zo shí kó nghut é yanmai, ngò gi, nungmoq lé naù byi huq é nghut lhê.* Ahkuí lhang, nungmoq gi, zoshuq apat lé a wó zo shí kó nghut ri.

³ Nungmoq gi, mingkan eq sêng é bang ru nghut nyi ashí kó nghut ri. Hkâsu mù gà le, manôn hkyô eq byoq lhum hkyô gi, nungmoq chyáng joq nyi é yanmai, nungmoq gi, mingkan eq sêng é bang nghut lhê a nghut kó lúq? Mingkan zo wui su nyi yap bum lhê a nghut kó lúq?

⁴ Rayuq gi, "Ngò gi, Poluq htâng châng lhê." ga, góyuq gi, "Ngò gi, Apolo htâng châng lhê." ga tai nyi bum kó é nghut jáng, nungmoq gi, mingkan zo wui nghut nyi bum lhê a nghut kó lúq?

⁵ Apolo gi, ó wá nghut lhê? Poluq gi, ó wá nghut lhê? Nga-nhik gi, Garai é dui-nhâng zoshâng za nghut lui, ó le ó lé, haù Yhumsing eq hun tô é muzó eq rajung za wùn waq é nghut lui, nungmoq gi, nga-nhik đông mai wó lumjúng kó é ru nghut lhê.

⁶ Ngò gi, gabú danglù amyui lé hô kat, Apolo gi, wui hpyun byi, nghut kôlhang, yuq kó lò nhang é gi, Garai Gasang za ru nghut lhê.

⁷ Haù mù, amyui hô kat sù eq wui hpyun byi sù gi, ahkyak mó a nghut, yuq kó lò nhang é Garai Gasang za sheq ahkyak ru nghut lhê.

⁸ Amyui hô kat sù eq wui hpyun byi su nhik myoqbyu tô é hkyô gi, rajung za nghut ri; nghut kôlhang, yhumsing shikut é eq rajung za, ó le ô é shigyaú chyunghuq wó yú kó rá nghut lhê.

⁹ Hkâsu mù gà le, ngamoq gi, Garai Gasâng é mù zui luzúm wui nghut lhê; nungmoq

gi, Garai Gasâng é yò, Garai Gasâng é yhúm nghut nyi akò.

¹⁰ Garai Gasang, ngo lé byí to bê jeju eq rajung za, yhúm sai kung sù rayuq đông, ngò gi, yhúm apùn awang hí to bê nghut lhê; gotù byù gi, hau é ahtoq má sai toq jat nyi é nghut lhê. Nghut kôlhang, yuq hkangmó gi, yhumsing sai é má rago sidiqu rá lhê.

¹¹ Hkâsu mù gà le, hí to gù nghut é, Yesuq Hkrisduq nghu é yhúm apùn awang mai lai lui, ó yuq le, gotù yhúm apùn awang lé wó sai é a nghut.

¹² Yhúm apùn awang hau é ahtoq má, hìng, ngùn, hpaudap luggok pé, sik, mhan, hkowá pé lé chùng mù sai jat kò é nghut jáng,

¹³ yuq hkangmó é muzó hkâsu nghut é hkyô lé lhoq htoq shit é hui rá nghut lhê. Haù mù lui gà le, haù Yesuq é Buinyi gi, haù lé byu-myàng nhâng mù, haù buinyi lé gi, myí eq lhoq htoq shit rá nghut lhê. Haù myi gi, yuq hkangmó sai é muzó hkasú é nghut é lé chýám rá nghut lhê.

¹⁴ Rayuq yuq sai é yhúm gi, ru gíng nyi é nghut jáng, haù yuq gi, yhang é shigyaú chyunghuq wó yú rá nghut lhê.

¹⁵ Nghut kôlhang, yhúm haù nyé gyó byuq é nghut jáng, yhang gi, yhúm sùm byuq é hui zo rá nghut lhê; yhang gi, asak lut kôlhang, myishâm mai wó lut é byù su dut rá nghut lhê.

¹⁶ Nungmoq gi, Garai Gasâng é noqkuq yhúm nghut lui, Garai Gasâng é Woi-nyí gi, nungmoq má lúng nyi bê hkyô lé a sé kó lúq?

¹⁷ Rayuq yuq, Garai Gasâng é noqkuq yhúm lé lhoq htên é nghut jáng, Garai Gasang gi, haù yuq lé lhoq htên pyám rá nghut lhê. Hkâsu mù gà le, Garai Gasâng é noqkuq yhúm gi, choyiyúng lhê; nungmoq gi, noqkuq yhúm haù nghut akò.

¹⁸ Nungmoq gi, yhumsing gùng yhumsing hkálhoq ngoq kó. Nungmoq má é rayuq yuq, shí ipyat má é byù nyi a-tsáng đông hpaqchyí byéng-yá bò sù ga myit é nghut jáng, hpaqchyí byéng-yá akying bò sù wó dut sháng gaq, yhang gi, a-ngok sù dut rá lhê.

¹⁹ Hkâsu mù gà le, mingkan shí má é hpaqchyí byéng-yá gi, Garai Gasâng é hí má ngok é hkyô nghut ri. Haù gi, "Garai Gasang gi, hpaqchyí byéng-yá bò bang lé, yhangmoq é hpaqchyí má yhang myit to nhang ri."^{*} ga kâ tô é eq rajung za nghut ri.

²⁰ Hau htoq agó, "Haù Yhumsing gi, hpaqchyí byéng-yá bò bang myit é hkyô pé akóm nghut é lé sê lhê."^{*} ga le kâ tô ri.

²¹ Haù mù lui, ó yuq le, byù eq sêng é hkyô má gyáng é dang a tai kó sháng gaq! Lhunglhang gi, nungmoq é chyat nghut lhê.

²² Poluq le, Apolo le, Kehpa le, mingkan le, dui nyi é hkyô le, shí é hkyô le, ahkuí lhê

* 2:16 Esai 40:13

* 3:2 Nungmoq lé naù byi huq é, gà é gi, lui é hkyô pé lé hí mhoq byí é lé gà lhê.

* 3:19 Yob 5:13

* 3:20 Hkya-on 94:11

hkyô eq htângnùng mã é hkyô le, banshoq gi, nungmoq é chyat nghut ri.

²³ Nungmoq gi, Hkrisduq é nghut akô; Hkrisduq gi, Garai Gasâng é nghut ri.

4

Hkrisduq É Lagyô Pé

¹ Haù mù luí, byu pé gi, ngamoq lé, Hkrisduq é dui-nhâng zoshâng wui đông eq Garai Gasâng é záu tô é hkyô pé lé tai pyô rá matú ap byi tô é hui bang đông sôn yù rá lhê.

² Haù đông nghut jáng, ap byi tô é hui bang gi, yhumsing lhumzui hkyô lé saksé shit rá dut lhê.

³ Nungmoq eq nghut nghut, waxâng zô wui é tará rùng mai nghut nghut, ngo lé jéyâng kô le, ngá é matú atiq azo za nghut lhê; gè gè ga jáng, ngá gũng ngò lhang a jéyâng é nghut lhê.

⁴ Haù mù gá le, ngá gũng ngò mara a bò bũn é nghut kôlhang, haù gi, ngo lé wó lhoq sânyúng byi é a nghut. Ngo lé jéyâng é sũ gi, haù Yhumsing nghut lhê.

⁵ Haù mù, masat tô é ahkying a jé shimá haí lé le a jéyâng é za, haù Yhumsing jé lé shoq, láng nyi keq. Yhang gi, mauchut hkaù má haq tô é pé lé byu-myàng nhâng mù, byu pé é myit nhikhlum má lũng é hkyô lé lhoq htoq shit rá nghut lhê. Haù hkũn, yuq hkangmó gi, ó le ó wó gíng é hkya-ôn hkyô lé, Garai Gasâng chyáng mai wó yù rá nghut lhê.

⁶ Gumang wui ê, ngò gi, "Ká tô é gũ mai hkâlai." gá é sanghkyang é lichyũm lé, ngamoq chyáng mai nungmoq wó mhoq yũ sháng gaq nghũ, nungmoq é akyu é matú, ngò eq Apolo má haù pé lé yù mù dangtũ kut é nghut lhê. Haù hkũn, nungmoq gi, nghutbũn é đông, rayuq lé gi, wú ko, góyũq lé gi, wú shóm, a kut kó rá nghut lhê.

⁷ Ó yuq wá, nang lé, góyũq eq shaí shoq kut lhê lúh? Nang hap yu é a nghut le gi, wó rá lúh? Nang, hap yu é nghut le gi, a hap yu é đông haù mù nghutbũn nyi lhê lúh?

⁸ Nungmoq gi, rá é lhunglhang gumjup bang nghut bekô nhung! Nungmoq gi, wó bang dut gũ nghut bekô nhung! Ngamoq a lom é za, nungmoq gi, hkohkam pé dut bekô nhung! Ngamoq le, nungmoq eq rahá hkohkam pé wó dut sháng gaq, nungmoq gi, gè gè yhang hkohkam pé dut to bekô rá lé, ngò hká-í yhang ô nau nyi lhê ô!

⁹ Nghut kôlhang, sat rá matú doqdan huí é shum byú pé lé su, Garai Gasang gi, lagyô pé nghut é ngamoq lé de de kut htoq shit bê nghũ, ngò wó myit ri. Ngamoq gi, nyi mi-nyi, joq mijoq, maumang lagyô pé eq waxâng zô wui é hí má, wú kũn jung đông dut nhang é huí nyi gũ bê nghut lhê.

¹⁰ Ngamoq gi, Hkrisduq é yanmai ngok é bang đông sôn yu é hui kôlhang, nungmoq kũm gi, Hkrisduq má hpaqchyí gyaí bo é bang đông dut bekô nhung! Ngamoq gi, wum nyhôm é bang đông sôn yu é hui kôlhang, nungmoq kũm gi, wum bo é bang đông dut bekô nhung! Nungmoq gi, hkunggá é huí akô; ngamoq kũm gi, hkunggá é a hui nhung!

¹¹ Shí hkying shí u jé shoq, ngamoq gi, zòmut wuishit huí é, mebu ajeq amyhá dut huí é, nhuq bat huí é, yhumsing é nyi jowô a wó é bang nghut nyi lhê.

¹² Ngamoq gi, yhumsing loq eq yhang mù zui wum kat nyi lhê. Ngamoq gi, nhing pyâm é hui jáng, shimán byi, zing-ri é hui jáng, jân pyâm kut lhê.

¹³ Ngamoq gi, lumù gansang é hui jáng, dang ngón dang nguí tũ nyo lhê. Ngamoq gi, ahkuí jé shoq, myidàm htoq mã é hpoqkyuq hpoqpyang eq mingkân é buzaq pé đông sôn yu é huí nyi lhê.

¹⁴ Ngò gi, nungmoq lé hoq lhoq hpu rá matú haù pé lé ká é a nghut, ngá é chyitdap zo wui lé đông lhoq pũn kyíng rá matú ru nghut lhê.

¹⁵ Nungmoq gi, Hkrisduq má mhoqshit bang ra mun wó kô é nghut kôlhang, íwá pé myo shoq wó kô é a nghut; hkásu mù gá lé, ngò gi, haù gabú danglũ đông mai, Hkrisduq Yesuq má nungmoq é íwa dut é nghut lhê.

¹⁶ Haù mù luí, ngò kut é su cháng keq nghũ, ngò, nungmoq lé lung kat lhê.

¹⁷ Hau é yanmai, ngò gi, haù Yhumsing má lhumzui sũ nghut é, ngò chyitdap é ngá zo đông nghut sũ Timohti lé, nungmoq chyáng nhang kat é nghut lhê. Yhang gi, Hkrisduq Yesuq mã é ngá é asak dui hkyô lé, jowô hkangmó mã é noqkuq hpúng hkangmó lé ngò mhoq byi é eq rajung za, nungmoq lé lhoq pun byi rá nghut lhê.

¹⁸ Nungmoq mã é ra-am gi, nungmoq chyáng ngò a dum jé lé rá su ngam pyâm kômù, nghutbũn byuq bekô nghut ri.

¹⁹ Nghut kôlhang, haù Yhumsing gyô é nghut jáng, ngò gi, nungmoq chyáng hân za jé lé rá nghut lhê; haù hkũn, ngò gi, nghutbũn é byù haù bang haí tai é hkyô lé za a nghut, yhangmoq hai a-tsam wó é hkyô lé le gôn htoq rá nghut lhê.

²⁰ Hkásu mù gá le, Garai Gasâng é mingdán gi, tai é dang má bo é a nghut, a-tsam má sheq ru nghut lhê.

²¹ Nungmoq hká đông ô nau akô lúh? Ngò gi, nungmoq chyáng, nuichũm hkat eq, a nghut jáng, chyitdap é eq nú-nhâm é myit mai lé lô ra rá lúh?

5

Ashop É Đông Gungsho Zũm Yap É Hkyô Kut É Sũ Lé Lhoq Htoq Pyâm Rá Hkyô

¹ Nungmoq chyáng, ashop é dōng gungsho zùm yap é hkyô joq é lé, hkyak tai hù lò bekô; haù gi, a lumjǎng bāng chyáng lǎng a dut wú é hkyô nghut é, yuqgê rayuq gi, yǎngwâ é myiwe eq nyi zô lǎm nyi é hkyô nghut ri.

² Nghut kôle, nungmoq gi, nghutbùn nyi bum akô nhung! Haù dōng a nghut é za, nungmoq gi, yón é myit tũn shit mù, haù su kut é byù lé, nungmoq é hpúng mai lhoq htoq pyám le, a gè kô lǎh?

³ Ngò gi, ngá gungdu, nungmoq eq rahá a nyi to kôlhang, ngá é i-myt gi, nungmoq eq rahá nghut nyi lǎi, gungdu jé nyi tó é dōng mai, haù hkyô kut é sù lé jéyáng doqdan gũ nghut lhê.

⁴ Nungmoq gi, nga-nhũng é Yhumsǎng Yesuq é myǎng mai zup zǎng mù, ngá é i-myt gi, nungmoq eq rahá nghut nyi lǎi, nga-nhũng é Yhumsǎng Yesuq é a-tsam le, nungmoq eq rahá nghut nyi é hkũn,

⁵ byù haù yuq lé, Tsadán é loq má ap byi pyám keq.* Haù jǎng, Yhumsǎng é buinyi má, yǎng é woi-nyí gi, hkyi yu é hui rá matú, yǎng é yubak gungsho gi, lhoq htên pyám é hui rá nghut lhê.

⁶ Nungmoq é nghutbun hkyô gi, ge é a nghut. Mún† ra tsui zô gi, muk long gón lé wó lhoq daù nhang é lé, nungmoq a sé kô lǎh?

⁷ Nungmoq gi, múnchi a bo é bang nghut nyi kô é eq rajung za, múnchi a bo é muk htung asik su wó dut kô shǎng gaq, múnchi axau lé lhuí pyám keq. Hkâsu mù gâ le, nga-nhũng é Lhoqlhai Poi sauzo, Hkrisduq gi, hkungga nhong é hui bê nghut lhê.

⁸ Haù mù lǎi, nga-nhũng gi, agê agau hkyô eq hpuzo nhǎng hkyô nghut é múnchi axau bo é dōng a nghut é za, lhumzui hkyô eq tengmán hkyo é muk nghut é, múnchi a bo é muk eq, Poi haù lé kut nyi shǎng.

⁹ Ashop é dōng gungsho zùm yap é bang eq hkâzũm kô nghũ, ngò, nungmoq lé, ngá é laiká má kâ kat byi bê nghut lhê.

¹⁰ Nghut kôlhang, mingkan shi eq sêng é, ashop é dōng gungsho zùm yap é bang, myoqnoq é bang, mǎu zô é bang eq hparà noq é bang lé hkâzũm yap kô nghũ é gi, a nghut. Haù su ru nghut le gi, mingkan htoq shi mai nungmoq htoq ló byuq ra kô rá nghut lhê.

¹¹ Nghut kôlhang, yǎnggũng yhang gi, gumang ga kôle, ashop é dōng gungsho zùm yap é, myoqnoq é, hparà noq é, lumù gansang é, i shuq wut é, mǎu zô é sù ó yuq eq le a ge zùm yap kô rá nghut lhê nghũ, ahkuí, ngò, nungmoq lé kâ kat nau é nghut lhê. Haù sù é byù eq gi, rahá lǎng hkâzo kô.

¹² Haù noqkuq hpúng shinggan má é bang lé jéyáng rá gi, ngò eq hai sêng lhê lǎh?

Nghut kôlhang, hpúng akǎu má é bang lé nungmoq jéyáng rá dut lhê.

¹³ Hpúng shinggan má é bang lé gi, Garai Gasang jéyáng rá nghut lhê. Nghut kôlhang, "Haù agê agau é sù lé, nungmoq chyáng mai lhoq htoq pyám keq."* gâ tō ri.

6

Lumjǎng Bāng Hkǎu Má Jéyáng Lǎm É Hkyô

¹ Nungmoq má é rayuq yuq gi, gumang góyuq eq dang-rǎng lǎm tó é nghut jǎng, haù hkyô lé jéyáng nhǎng rá matú, haù sǎn-yúng bāng é hí má tai rá malai, Garai a wó bāng é hí má wám tai rá lǎh?

² Haù sǎn-yúng bang gi, mingkan lé jéyáng rá nghut é hkyô lé, nungmoq a sé kô lǎh? Nungmoq gi, mingkan lé jéyáng rá bang nghut kôle nhũng, tiq é mù pé lé wó jéyáng é bang a nghut kô lǎh?

³ Nga-nhũng gi, maumǎng pé lé jéyáng rá nghut é hkyô lé, nungmoq a sé kô lǎh? Haù mù, shi pyat má é hkyô pé lé, gè gè yhang wó jéyáng kô rá nghut lhê ô!

⁴ Haù mù lǎi, nungmoq gi, dang-rǎng lǎm é mù pé joq é nghut jǎng, noqkuq hpúng má ahkyak a nghut é bang lé tará agyi kut nhǎng kô rá lǎh?

⁵ Ngò, haù su nghũ tai é gi, nungmoq lé hoq phu nhǎng rá matú nghut lhê. Lumjǎng bāng chyáng dang-rǎng lǎm é hkyô lé wó jéyáng rá hpaqchyí luq shoq bo é byù, nungmoq chyáng rayuq lǎng a nyi dut kô rá lǎh?

⁶ Nghut kôlhang, nungmoq gi, gumang yhangchang rayuq eq rayuq, a lumjǎng bāng é hí má lǎng rǎng shok lhum akô nhung!

⁷ Nungmoq hkǎu má mù jéyáng lǎm é hkyô joq é nghut jǎng, nungmoq gi, sum lugù nghut bê. Góyuq eq shut le lǎng rǎ ge lhê a nghut kô lǎh? Mǎu zô é hui le lǎng rǎ ge lhê a nghut kô lǎh?

⁸ Nghut kôle, nungmoq yhang gi, mǎu zô kô é eq shut kô é nghut lǎi, haù gi, nungmoq é gumang wui lé kut é nghut lhê.

⁹ Agê agau é bang gi, Garai Gasang é mingdán má é shimán jeju a myang hkam yù kô rá nghut é hkyô lé, nungmoq a sé kô lǎh? Hkâ-nâ nyi kô. Ashop é dōng gungsho zùm yap é bang le, hparà noq é bang le, sumyi sulǎng lú é bang le, shiwa hpó kut é bang le, yuqgê yhangchang nyi zô lǎm é mara kut shut é bang le,

¹⁰ hkau bang le, myoqnoq bang le, i shuq wut bang le, lumù gansang é bang le, mǎu zô é bang le, Garai Gasang é mingdán má é shimán jeju lé myang hkam yù kô rá a nghut.

* 5:5 Tsadán é loq má ap byi pyám keq gâ é gi, hpúng byù wui eq a zùm yap nhǎng lo rá lé tai é nghut lhê. † 5:6 Mún gâ é gi, yubak mara lé tai nau é nghut lhê. Lhoqlhai Poi jé jǎng, Israelaq byu pé gi, yhangmoq wó é múnchi banshoq lé lhuí pyám mù, múnchi a bo é muk sai kô é nghut lhê. * 5:13 Tará Pun 17:7

¹¹ Nungmoq mâ é ra-am gi, haù su kut kô é bang nghut akô. Nghut kôlhang, nungmoq gi, nga-nhùng é Garai Gasâng é Woi-nyí eq Yhumsing Yesuq Hkrisduq é mying mai, mara hkyut san byí é, lhoq sân-yúng é eq chí sân pyám byí é hui bekô nghut ri.

Ashop É Đông Gungsho Zùm Yap É Hkyô

¹² "Jung hkgangmó kut rá ahkáng ngò wó lhê." Nghut kôlhang, jung hkgangmó gi, akyú byí é a nghut. "Jung hkgangmó kut rá ahkáng ngò wó lhê." Nghut kôlhang, hái júng eq le ngò lé wó sing pyám rá a nghut.

¹³ "Zoshuq gi, wamdaù é matú nghut mù, wamdau gi, zoshuq é matú nghut ri." ga nungmoq ra-am tai kó rá nghut lhê. Nghut kôlhang, Garai Gasang gi, haù í júng é lé lhoq htên pyám rá nghut lhê. Gungdu gi, ashop é đông gungsho zùm yap hkyo é matú a nghut é za, haù Yhumsing é matú nghut mù, haù Yhumsing gi, gungdu é matú nghut ri.

¹⁴ Garai Gasang gi, Yhâng é a-tsâm eq, haù Yhumsing lé, shí é mai lhoq dui toq yú bê nghut mù, nga-nhùng lé le lhoq dui toq yú rá nghut lhê.

¹⁵ Nungmoq é gungdu pé gi, Hkrisduq é gungsho showui showang pé yhang nghut é lé, nungmoq a sé kô lúh? Haù nghut le nhing, Hkrisduq é gungsho showui showang pé lé yù mù, shiwa myhi pé eq rading ralhum za kut pyám nhâng kô rá lúh? Hkâ-nhám le a ge dut nhâng!

¹⁶ Shiwa myhi eq gungsho zum é sù gi, yhang eq gungsho ralhum za dut bê hkyô lé, nungmoq a sé kô lúh? Hkâsu mù gà le, "Yhangnhik gi, gungsho ralhum za dut kô rá nghut lhê."^o ga tai tô ri.

¹⁷ Nghut kôlhang, haù Yhumsing eq rading ralhum za dut é sù gi, woi-nyí má Yhang eq ralhum za dut bekô nghut ri.

¹⁸ Ashop é đông gungsho zùm yap é hkyô lé koi pyám keq. Byù rayuq kut shut é gotú mara pé banshoq gi, yhâng é gungdu shing-gan má nghut lhê; nghut kôlhang, ashop é đông gungsho zùm yap é hkyô kut shut é sù gi, yhumsing gùng lé mara shut é sù nghut ri.

¹⁹ Nungmoq é gungdu gi, Garai Gasâng chyáng mai nungmoq wó yú bê nghut é, nungmoq má lúng nyí é Choyiyúng Woi-nyí é noquq yhum nghut é lé, nungmoq a sé kô lúh? Nungmoq gi, yhumsing gùng lé sing é bang a nghut.

²⁰ Hkâsu mù gà le, nungmoq gi, ahpau ralhum byi mù wui hpyit tô é hui bê bang nghut akô. Haù mù luí, nungmoq é gungdu eq, Garai Gasang lé, hkgunggá é hkyô shit nyí keq.

7

Myí Yu É Eq Sêng É Hkyô

¹ Ahkuí, nungmoq kâ kat é hkyô pé eq séng luí ga jang, yuqgè rayuq gi, myi a yu le gè ri.

² Nghut kôlhang, ashop é đông gungsho zùm yap é hkyô gyai myô é yanmai, yuqgè hkgangmó gi, yhumsing é myiwe wó rá lhê; myiwe hkgangmó gi, yhumsing é yuqgè wó rá lhê.

³ Haù yhumsing hpó gi, wò joq é eq rajung za, yhâng yhumsing myhi eq zùm sháng gaq; haù đông za, yhumsing myhi le, yhâng yhumsing hpó eq zùm sháng gaq.

⁴ Haù yhumsing myhi é gungdu gi, yhânggùng yhang za séng é a nghut, yhâng é yhumsing hpó eq le séng lhê. Haù eq rajung za, yhumsing hpó é gungdu gi, yhânggùng yhang za séng é a nghut, yhâng é yhumsing myhi eq le séng lhê.

⁵ Nungmoq myit hui lhum luí, kyúđung é má rago ap nong rá ahkying ayoq za a nghut jáng gi, rayuq eq rayuq hkâhe lhum kô. Nungmoq yhumsing gùng lé a wó hkgang é yanmai, Tsadán eq gungláu é a hui kô sháng gaq, ahkying ayoq haù lai jáng, rahá dum zùm keq.

⁶ Ngò, haù su ngù tai é gi, hkunmó hkyô é đông a nghut, ahkáng byí kat é đông ru nghut lhê.

⁷ Byù banshoq bang gi, ngò su nyí rá lé ô nau ri. Nghut kôlhang, yuq hkgangmó gi, ó le ô é chyunghuq lé Garai Gasâng chyáng mai wò bum akô nghut ri; rayuq gi, rajung chyunghuq, góyuq gi, gó jung chyunghuq wò bum akô.

⁸ Ahkuí, myiwe a yù lô é bang eq chuimó pé lé ngò tai kôlé, ngò su, haù đông jáng nyí pyám kô é nghut le, yhangmoq é matú ge é hkyô nghut ri.

⁹ Nghut kôlhang, yhumsing gùng lé a wó hkang kô é nghut le gi, yhangmoq, myi yú myi lô rá lhê; hkâsu mù gà le, myi su nyé luí ô nau nyí rá malaí, myi yu myi lô le je ge lhê.

¹⁰ Myi yú bê bang lé, ngò, hkunmó hkyô kôlé, shí gi, ngò đông hkyô é a nghut, Yhumsing chyáng má é ru nghut lhê: Yhumsing myhi gi, yhâng é yhumsing hpó chyáng mai a ge gang rá nghut lhê.

¹¹ Nghut kôlhang, yhang gâng é nghut jáng, myi a dum lô é za nyí rá lhê, haù a nghut jáng, yhâng é yhumsing hpó eq dum xoq yú rá lhê. Yhumsing hpó le, yhâng é yhumsing myhi lé a ge kâng pyám rá nghut lhê.

¹² Góbang lé ngò shí su ngù tai kôlé, shí gi, Yhumsing chyáng má é a nghut, ngò đông mai tai é ru nghut lhê. Gumang rayuq yuq gi, lumjing sù a nghut é yhumsing myhi wó é nghut le, myiwe haù, yhang eq rahá nyí nau é nghut jáng, yhang lé a ge kâng pyám rá nghut lhê.

¹³ Myiwe rayuq gi, lumjing sù a nghut é yhumsing hpó wó é nghut le, yuqgè haù,

yang eq rahá nyi nau é nggut jáng, yang eq a ge gang rá nggut lhê.

¹⁴ Hkásu mù gá le, haú a lumjúng sù yhumsing hpó gi, yhang yhumsing myhí đông mai lhoq sán-yúng é hui bê nggut mù, a lumjúng sù yhumsing myhí le, lumjúng sù nggut é yhang é yhumsing hpó đông mai lhoq san lhoq yúng é hui bê nggut ri. Haú a nggut jáng, nungmoq é zo wui gi, a sanséng dut kô rá nggut lhê; nggut kôlháng, yhang-moq gi, haú đông mai, chyoyúng bekô nggut ri.

¹⁵ Nggut kôlháng, haú a lumjúng sù gâng ló naú jáng gi, gâng ló sháng gaq. Lumjúng é yuggê nggut nggut, myiwe nggut nggut, haú sù é hkyô pé má gi, hkún zing tô é hkyô a joq é nggut lhê. Garai Gasang gi, nganhnúng lé, nguóngón shoq nyi sháng gaq ga ji yù bê nggut lhê.

¹⁶ Yhumsing myhí ê, náng é yhumsing hpó lé wó hkyi yù rá nggú, hkásu wó sé rá lúh? Yhumsing hpó ê, náng é yhumsing myhí lé wó hkyi yù rá nggú, hkásu wó sé rá lúh?

¹⁷ Hká đông nggut kôlháng, yuq hkgangmó gi, Garai Gasang, yang lé ji yu tô é hkún, haú Yhumsing mai yang lé nyi nhang tô é đông asak dui nyi rá lhê. Haú gi, noqkuq hpúng pé banshoq má ngò tô to bý é tará nggut lhê.

¹⁸ Byù rayuq gi, ji yu é huí é hkún, ahpyo-kuq hpyit hkam yu to gù bê nggut jáng, ahpyo-kuq hpyit a hkám sù đông a dut byuq sháng gaq. Byù rayuq gi, ji yu é huí é hkún, ahpyo-kuq hpyit a hkam yu to shí é nggut jáng, ahpyo-kuq hpyit a hkam yù sháng gaq.

¹⁹ Ahpyo-kuq hpyit hkám hkyô gi, haí ahkyak a nggut; ahpyo-kuq hpyit a hkám hkyô gi, haí ahkyak a nggut. Garai Gasang é hkunmó pé lé châng nyi é za sheq ahkyak nggut lhê.

²⁰ Yuq hkgangmó gi, yang lé Garai Gasang eq ji yu é hkún lhê su xoq nyi nyi rá lhê.

²¹ Nang gi, ji yù huí é hkún jùn dut nyi é lúh? Haú hkyô lé hká-myit chiq. Nggut kôlháng, nang gi, luthkyô wó yu é nggut jáng, haú đông nyi aq.

²² Hkásu mù gá le, haú Yhumsing eq ji yu é huí é hkún, jùn dut nyi é sù gi, haú Yhumsing eq lhoq lhut yu é byù nggut bê. Haú eq rajung za, ji yu é huí é hkún, luthkyô wó é sù gi, Hkrisduq é jùn nggut ri.

²³ Nungmoq gi, Garai Gasang eq ahpau bý mù wui hpyit yu é hui bê bang nggut akó. Haú mù, byu pé é jùn hkáduť kó.

²⁴ Gumang wui ê, yuq hkgangmó gi, yhumsing lé Garai Gasang eq ji yu é huí to bê đông, Yhang é hí má xoq nyi nyi rá lhê.

²⁵ Ahkuí, zomyi zorám wui é hkyô tai kôlé. Haú Yhumsing chyáng mã é hkunmó gi, ngò a wó; nggut kôlháng, Yhumsing é shogyo

nhikmyin é yanmai, lumgíng sù rayuq nggut nyi é đông, ngò, nungmoq lé hkyô shit rá nggut lhê.

²⁶ Ahkuí hui zô é wuihke hkyo é yanmai, nungmoq gi, yhumsing nyi to é su xoq nyi nyi le je ge ri nggú, ngò wó myit ri.

²⁷ Nang, myiháng bê a nggut lhi? Lhoq kang rá hkáda lo. Nang, myi a háng shi a nggut lhi? Myi hkáhô lo.

²⁸ Nggut kôlháng, nang, myiháng é nggut le gi, mara a nggut. Zomyi gi, myi ló é nggut jáng, mara a nggut. Nggut kôlháng, myiháng é bang gi, shi pyat mã wuihke hkyô pé myo myo hui kô rá nggut mù, ngò, nungmoq lé haú mai hkyi yù nau ri.

²⁹ Gumang wui ê, ngò tai nau é lichyúm gi, ahkying tot byuq bê nggut mù, ahkuí mai, myi wó é bang gi, a wó é bang đông nyi kó sháng gaq.*

³⁰ Yón ngau hui é bang gi, a hui é bang su; gabú é bang gi, a gabú é bang su; sutzé lé wui yu é bang gi, sutzé a wó é bang su;

³¹ haú mingkan zé pé lé chung é bang gi, haú pé lé a myit tú é bang su, nggut kó sháng gaq. Hkásu mù gá le, shí mingkân é ahkuí lhê é azong isám gi, lai ló nyi é nggut lhê.

³² Ngò gi, nungmoq lé a myit myo nhang naú. Myi a yù shí é sù gi, haú Yhumsing lé hkásu wó gabú nhang rá matú, haú Yhumsing é muzó lé myit chiq nyi ri.

³³ Nggut kôlháng, myi yù bê sù gi, yhang é yhumsing myhí lé hkásu wó gabú nhang rá matú, mingkan shi é muzó eq séng luí myit chiq nyi ri.

³⁴ Haú mù, yhang shirong é myit gi, byo myin nyi ri. Myi a ló é myiwe nggut nggut, zomyi gyíng nggut nggut gi, yhang é gungdu eq woi-nyi mã haú Yhumsing lé rago wó ap nong rá matú, Yhumsing é muzó pé eq séng luí myit chiq nyi ri. Nggut kôlháng, myi ló bê myiwe gi, yhang é yhumsing hpó lé hkásu wó gabú nhang rá matú, mingkan shi é muzó eq séng luí myit chiq nyi ri.

³⁵ Ngò, haú su nggú tai é gi, nungmoq é matú ge é hkyô nggut lhê; nungmoq lé tara eq zui zing é a nggut é za, myit a byò lo shoq Yhumsing lé wó ap nong rá matú, jô é đông asak wó dui kô sháng gaq nggu é hkyô ru nggut lhê.

³⁶ Nggut kôlháng, rayuq yuq gi, yang dúng to é zomyi gyíng lé a htuk é đông kut nyi é sù wó myit ngám jáng, myiwe haú asak kô lo nyi mù, hâng yù rá dut bê nggú myit é nggut le gi, yang ó nau é đông kut sháng gaq. Yhang mara kut é a nggut. Yhangnhik gi, hâng lhum rá lhê.

³⁷ Nggut kôlháng, yang gi, haú hkyô lé yhang é myit mai wó lhoq zím pyám é nggut

* 7:29 A wó é bang đông nyi kó sháng gaq gá é gi, Garai mù lé je myit zuq nyi sháng gá naú é nggut lhê.

mù, yut yut ô nàu hkyô é ahkaù má a nghut é za, yhumsing ô nàu é hkyô lé wó hkùm zing pyâm é sù nghut luí, haù zomyi gyíng lé a hâng yù rá matú wó myit hpyit bê sù nghut é nghut jáng, yhang gi, ge é hkyô kut bê nghut ri.

³⁸ Haù mù luí, zomyi gyíng haù lé hâng yu é sù gi, jô é hkyô kut bê nghut ri; nghut kôlhang, zomyi gyíng haù lé a hâng yu é sù gi, je ge é hkyô kut bê nghut ri.

³⁹ Myiwe rayuq gi, yhâng é yhumsing hpó rù dui nyi nyi, yhang eq xoq tô ashí nghut lhê. Nghut kôlhang, yhâng é yhumsing hpó shí byuq é nghut jáng, yhang gi, myi lô rá ahkáng dum wó bê nghut lhê, nghut kôle, haù yuq gi, Yhumsing eq sêng é sù dut rá lhê.

⁴⁰ Ngò jéyáng é đông ga jáng, myi a dum lô é wó nyi le gi, yhâng é matú je gabú hkyô dut rá nghut lhê. Ngò le, Garai Gasâng é Woi-nyi wó sù ngù wó myit ri.

8

Hparà Lhò Lé Ting Byí É Zoshuq

¹ Ahkuí, hparà lhò pé lé ting byí é zoshuq hkyô: nga-nhúng banshoq bang gi, haù hkyô eq séng luí sê lhê. Sê é hkyô gi, nghut-bun sê lhê; nghut kôlhang, chyitdap myit gi, lhoq kô myhang lhê.

² Byù rayuq yuq gi, rajung jung lé sé bún é nghut le, yhang sé âng é lé lhâng a sé shí nghut ri.

³ Nghut kôlhang, Garai Gasang lé chyitdap é sù gi, Garai Gasâng eq sé é sù nghut ri.

⁴ Haù mù luí, hparà lhò pé lé ting byí é zoshuq lé zô é eq séng luí gi: hparà lhò gi, mingkan má haí lhâng a nghut é hkyô lé le, Garai Gasang gi, Yhang rayuq mai lai luí gotú a nyi é lé le, nga-nhúng sê lhê.

⁵ Hkásu mù gà le, mauhkúng htoq má nghut nghut, myigùng htoq má nghut nghut, byù ra-am mai hparà pé ga bang nyi mù, "hparà pé" myo myo eq "yhumsing pé" myo myo nyi kôlhang

⁶ nga-nhúng é matú gi, Íwa nghut é Garai Gasang rayuq za nyi é nghut mù, lhunglhâng gi, Yhang mai hpan é nghut luí, nga-nhúng gi, Yhâng é matú asak dui nyi é nghut lhê. Yesuq Hkrisduq nghu é Yhumsing rayuq za nyi é nghut mù, lhunglhâng gi, Yhang đông mai hpan é nghut luí, nga-nhúng gi, Yhang đông mai asak dui nyi é nghut lhê.

⁷ Nghut kôlhang, yuq hkangmó gi, haù hkyô lé sé gam hkoq yu é a nghut. Ra-am gi, ahkuí jé shoq hparà lhò pé má mán byuq kô é yanmai, haù sù é zoshuq lé yhangmoq zô é hkùn, hparà lhò lé ting byí é zoshuq đông myit sôn yu akó. Yhangmoq myit sôn sê é hkyô wum nyhôm é yanmai, mara wó bún akó nghut ri.

⁸ Nghut kôlhang, zoshuq gi, nga-nhúng lé, Garai Gasâng shut shuí chyâng é é a nghut. Nga-nhúng a zô é nghut le gi, je sùm byuq lô é a nghut, zô é nghut le gi, je ge lo é a nghut.

⁹ Haù su ga kôlhang, nungmoq a htung a htê zô é hkyô gi, lumjing myit wum nyhôm bâng é matú myit leqbat jowó a dut shoq sidiq keq.

¹⁰ Hkásu mù gà le, sumpsé hpaqchyí wó é bang nungmoq gi, hparà lho é noqkuq yhùm má zô nyi kô é lé, haù myit sôn sê é hkyô má wum nyhôm é sù rayuq yuq myang é nghut jáng, hparà lhò pé lé ting byí é zoshuq lé, yhang wám zo rá lé wum byí é a dut kó rá lhú?

¹¹ Haù mù, Hkrisduq shí hkám byi bê nghut é, wum nyhôm é gumang hpó haù yuq gi, nungmoq é sumpsé hpaqchyí eq lhoq htên pyâm é hui berá nghut lhê.

¹² Nungmoq gi, haù hkyô đông mai, nungmoq é gumang wui lé mara kut shut é eq, yhangmoq é myit sôn sê é hkyô wum nyhôm é lé nô nhang é hkùn, Hkrisduq lé mara kut shut é nghut bekô.

¹³ Haù mù luí, ngò zô é gi, ngá é gumang hpó lé mara kut shut nhang é nghut jáng, yhang lé myit a leqbat nhâng sháng gaq, ngò, hkâ-nhám le, sho lé a zo lo rá nghut lhê.

9

Lagyo Rayuq É Ahko Ahkáng

¹ Ngò gi, lut sù a nghut lhú? Ngò gi, lagyo rayuq, a nghut lhú? Ngò gi, nga-nhúng é Yhumsing Yesuq lé myang wú bê sù, a nghut lhú? Nungmoq gi, haù Yhumsing má, ngò zui saí é muzó é ashí pé chyat, a nghut kô lhú?

² Ngò gi, góbâng chyáng lagyo a nghut kôlhang, nungmoq chyáng gè gè nghut lhê! Hkásu mù gà le, nungmoq gi, haù Yhumsing má, ngò lagyo nghut é hkyô saksé dizik nghut bum akó.

³ Ngá ahtoq má jéyáng bang lé, ngá gùng ngò tái hung kat kôle.

⁴ Ngamoq gi, zo rá shuq rá ahko ahkáng a wó é bang nghut lhê lhú?

⁵ Gotú lagyo pé eq Yesuq é yhanggu yuqzô pé eq Kehpa kut é su, lumjing sù nghut é yhumsing myhí shuí chúng rá, ngamoq, ahko ahkáng a wó é nghut lhê lhú?

⁶ Ngò eq Barnaba baù za, asak dui hkyô é matú mù zui ra rá lhú?

⁷ Ó yuq wá, yhumsing zoshuq wùn luí, gye mù wùn waq rá lhú? Ó yuq wá, tsibiyiq hkyâm saí mù, haù má é tsibiyiq shi a zo kut rá lhú? Ó yuq wá, sau rêm mù, sau nàu a shuq kut rá lhú?

⁸ Ngò gi, shí hkyô pé lé xângzo hkyam đông za tái é nghut lhê lhú? Haù tará má le, rajung za tái tô lhê, a nghut lhú?

⁹ Hkâsu mù gà le, haù Mosheq é tarâ má, "Guq nâng nyi é no lé nhuttsung hkâ-tsúng to byi."* ga kê tô ri. Garai Gasang gi, no eq séng luí za chiq é nghut lhê lúh?

¹⁰ Gè gè yhang, yhang gi, nga-nhùng é matú tai é a nghut kô lúh? Nghut lhê, haù gi, nga-nhùng é matú kê to byi é nghut lhê. Haí mù gà le, yò hpuq sù, yò hpuq é eq, guq bat sù, guq bat é gi, kyô chòm shù yù rá lé myoqbyù luí, kut kô é nghut lhê.

¹¹ Ngamoq gi, nungmoq chyáng woi-nyí amyui sán kat bê nghut mù, nungmoq chyáng má é mingkan zè lé shù yu é nghut jáng, lùm myô é dut byuq beko lúh?

¹² Góbang gi, nungmoq chyáng mai garúm é ahko ahkáng wó kô é nghut jáng, ngamoq gi, haù lé je wó rá lhê a nghut kô lúh?

Nghut kôlháng, ngamoq gi, ahko ahkáng haù lé a yu é nghut lhê. Haù yù rá malaí, Hkrisduq é gabú danglù gi, hkùm zing pyám é a hui rá matú sheq, jung hkangmó lé ngamoq hkam jân nyi lhê.

¹³ Haù noqkuq yhùm má mù zúí é bang gi, yhangmoq é zoshuq lé haù noqkuq yhùm mai wó é hkyô eq, hkungga gyap má dojaú é bang gi, hkungga gyap má nhông byí é ram lé myàng zô é hkyô lé, nungmoq a sé kô lúh?

¹⁴ Haù eq rajung za, gabú danglù hko kyô é bang gi, gabú danglù hkyô mai yhangmoq é asak baú rá lhê ga, haù Yhumsing hkunmó hkyô to bê nghut ri.

¹⁵ Nghut kôlháng, ngò gi, ahko ahkáng haù pé haí lé le a yu é nghut lhê. Nungmoq, ngo lé haù su hloh kut byi rá lé myoqbyù mù, ngò, shí hkyô lé kê é a nghut. Hkâsu mù gà le, ngò haù su gumrong é hkyô lé, rayuq yuq lhoq htên pyám byi rá htoq má, ngò shi byuq le hlang je ge ri.

¹⁶ Nghut kôlháng, gabú danglù lé ngò hko kyô é hkùn, ngò gumrông jang a joq; hkâsu mù gà le, haù gi, ngò a kut a ge é ngá wó nghut lhê. Haù gabú danglù lé ngò a hko kyô é nghut le gi, ngò dingnyé wó rá nghut lhê.

¹⁷ Yhumsing nau é myit mai ngò hko é nghut jáng, shigyau chyunghuq wó rá nghut lhê; yhumsing nau é myit mai a nghut jáng gi, ngo lé lùm luí ap tô é lé, agon za wùn waq nyi é dut rá nghut lhê.

¹⁸ Haù mù luí, ngá é shigyau chyunghuq gi, haí nghut lhê lúh ga jang, haù gabú danglù lé hko kyô é hkùn, ngò gi, ahpau a yu é za wó ap nóng luí, gabú danglù hko kyo hkyô má é ngá é ahko ahkáng pé lé ngò a yu é amyat nghut lhê.

¹⁹ Ngò gi, ó yuq é a-ò má le a nyi é za, lut sù nghut kôle, byù wó myô é myhó shuí lling yù rá matú, ngá gung ngò, yuq hkangmó é jùn kut nyi lhê.

²⁰ Ngò gi, Yudaq byu pé lé shuí lling yù rá matú, Yudaq byu pé chyáng nghut nyi é hkùn, Yudaq byù rayuq đông dut nyi lhê. Ngò gi, tarâ hkaù má nyi sù a nghut kôlháng, tarâ hkaù má é bang lé shuí lling yù rá matú, tarâ hkaù má nyi bâng chyáng nghut nyi é hkùn, tarâ hkaù má é byù rayuq đông dut nyi lhê.

²¹ Ngò gi, tarâ a wó bang lé shuí lling yù rá matú, tarâ a wó bâng chyáng nghut nyi é hkùn, tarâ a wó sù rayuq đông dut nyi lhê. Nghut kôlháng, gè gè ga jáng, Garai Gasang é tarâ mai a lut htoq é za, Hkrisduq é tarâ hkaù má nyi sù nghut lhê.

²² Ngò gi, wum nyhóm bang lé shuí lling yù rá matú, wum nyhóm bâng chyáng nghut nyi é hkùn, wum nyhóm sù rayuq đông dut nyi lhê. Ngò gi, wó dut é hkyô đông mai byù ra-am lé wó hkyí sháng gaq ngù, byù lhunglhang bâng chyáng, byù ajà jà đông nyi nyi lhê.

²³ Ngò gi, gabú danglù mai wó é shimân jeju pé lé wó chòm hkam yù sháng gaq ngù, gabú danglù é yanmai haù pé banshoq lé kut é nghut lhê.

²⁴ Din shingjóng poi má din rá bang banshoq din kôlháng, rayuq za shigyau chyunghuq wó é hkyô lé, nungmoq a sé kô lúh? Chyunghuq wó rá matú din keq.

²⁵ Sup poi má shingjóng lhum é bang yuq hkangmó gi, yhumsing gung yhumsing tarâ htan é đông lhoq mhán yù rá lhê. Yhangmoq gi, gíng nyi rá a nghut é janmaù wó rá matú, haù su kut é nghut akó; nghut kôlháng, nga-nhùng gi, ahtum abyuq gíngtíng nyi rá nghut é janmaù wó rá matú shikut é nghut lhê.

²⁶ Haù mù luí, ngò gi, jum đin đin é byù rayuq su đin é sù a nghut. Ngò gi, lai lé bat é byù rayuq su, akôm má bat é sù le a nghut.

²⁷ Ngò gi, góbang chyáng mungdang hko é htâng má, ngá gung ngò, shigyau chyunghuq eq a gíngdán sù a dut sháng gaq ngù, ngá gung lé gyai yhang lhoq mhán yù mù, ngá gung lé jùn kut yu nyi lhê.

10

Israelaq Pê É Labaù Mai Sidiq Byí É Hkyô

¹ Gumang wui é, ngò gi, dut lai lo é hkyô lé, nungmoq lé a sé a dut nhâng nau é nghut lhê; hí hkùn, nga-nhùng é íchyí iwa pé banshoq bang gi, mhutdùm ó má nyi mù, Nhông Nè mai wó lai byit kô é nghut lhê.*

² Yhangmoq banshoq bang gi, mhutdùm eq Nhông Nè má, Mosheq é chángzô pé đông baptisma hkam yu é bang chyat nghut beko.

³ Yhangmoq banshoq bang gi, rajung zâ é woi-nyí zang zo kô é eq.

⁴ rajung zâ é woi-nyí wui shuq kô é nghut lhê; hkâsu mù gà le, yhangmoq eq

* 9:9 Tarâ Pun 25:4

lé kê tô é nghut lhê.

* 10:1 Bun zo ralhüm mai raxê lhum gi, Htoq Ló Laiká má bo é Mosheq htâng cháng bâng é hkyô

rahá nghut nyi é woi-nyí eq sêng é luqbum mó mai, yhangmoq shuq kô é nghut lhê; luqbum mó hau gi, Hkrisduq nghut bê.

⁵ Nghut kôlhang, yhangmoq myo hpyang lé, Garai Gasang a nau é nghut mù, yhangmoq é gùng sôm lé yoso pé má myhín so san kut pyâm é hui bekô nghut ri.

⁶ Háu hkyô pé dut htoq é gi, agè ashop hkyô má yhangmoq myit tuí bùm é su, nga-nhúng a myit tuí nyi rá matú nga-nhúng é azông dut bê nghut ri.

⁷ "Byu pé gi, zùng mù, zo luí shuq luí, a lumjng bang kut é dng, toq mù, ye bum akô."^{*} ga ká tô é eq rajung za, yhangmoq má é ra-am hparà noq é bang dut byuq é su, nungmoq hkâdut kô.

⁸ Yhangmoq má é ra-am gi, ashop é dng gungsho zùm yap é hkyô shut kômù, ra-nyí má za í mún sum hkyng yuq shi byuq é su, ashop é dng gungsho zùm yap é hkyô le, nga-nhúng gi, a ge kut shut rá nghut lhê.

⁹ Yhangmoq má é ra-am gi, hau Yhumsing lé chyâm luí, lhangmuí pé eq hte sat é hui bùm kô é su, hau Yhumsing lé, nga-nhúng gi, a ge chyâm rá nghut lhê.

¹⁰ Yhangmoq má é ra-am gi, nhutluq shô-myo kôluí, lhoq htên é maumâng eq sat pyâm é hui kô é su, nungmoq gi, nhutluq shô-myo hkâkut kô.

¹¹ Yhangmoq chyáng wú yú rá azông dng hau pé dut htoq luí, ló htáng rá ipyat pé má nyi âng to bang nga-nhúng é matú sidiq byi rá dng ká to bê nghut ri.

¹² Háu mù luí, nungmoq gi, yap gng nyi bê su ngàm kô é nghut jáng, a leqbat rá matú sidiq nyi keq!

¹³ Byu chyáng htoq sê é gungláu hkyô za nungmoq hui rá nghut lhê. Garai Gasang gi, lhuzui sù nghut lhê mù, nungmoq a wó jân é gungláu hkyô lé hui nhâng rá a nghut. Nghut kôlhang, nungmoq gungláu hui é hkún, Yhang gi, hau lé nungmoq wó jan rá matú, hkyô htong byi rá nghut lhê.

Hparà Lhò Noq Hkyô Lé Koi Pyâm Râ Hkyô

¹⁴ Háu mù luí, ngò chiytdap é luzúm wui é, hparà lhò noq hkyô lé koi pyâm keq.

¹⁵ Nhik gyng bang lé ngò tai lhê; ngò hai tai nyi é hkyô lé nungmoq gùng myit sôn yú keq.

¹⁶ Nga-nhúng, jeju bún nyi é jeju góm lé shuq é hkún, Hkrisduq é sui má chôm zùm bê a nghut kô lhú? Nga-nhúng, myhik hpé é muk lé zô é hkún, Hkrisduq é gungdu má chôm zùm bê a nghut kô lhú?

¹⁷ Háu mù luí, muk htung ralhú za nghut mù, nga-nhúng gi, myo myo nghut kôle ragùng za nghut nyi lhê. Hkâsu mù gâ le, nga-nhúng banshoq bang gi, hau rahtung

zâ é muk lé chôm gàm zô é bang chyat nghut lhê.

¹⁸ Israelaq byu pé é hkyô lé myit wú keq. Háu hkungga lé zô é bang gi, hkungga gyap má chôm lom é bang nghut lhê, a nghut kô lhú?

¹⁹ Hparà lhò, a nghut jáng, hparà lhò lé tng byi é hkungga gi, rajung jung nghut lhê nghú, ngò tai é lhú?

²⁰ Háu su tai é a nghut, a lumjng bâng é hkungga gi, Garai Gasang lé nhông byi é a nghut, nat gâng pé lé tng byi é ru nghut lhê. Ngò gi, nungmoq, nat gâng pé eq chôm zùm nyi bang dut rá lé a ô nau é nghut lhê.

²¹ Nungmoq gi, hau Yhumsing é góm lé le, nat gâng pé é góm lé le, ge shuq rá a nghut; nungmoq gi, hau Yhumsing é zangbó má le, nat gâng pé é zangbó má le, rahá ge bo lom rá a nghut.

²² Nga-nhúng gi, hau Yhumsing lé manôn nhâng nau é bang dut rá a nghut kô lhú? Nga-nhúng gi, Yhâng htoq je wúm bo é bang nghut lhê lhú?

Lumjng Su É Luthkyô

²³ "Jung hkangmó kut rá ahkáng wó lhê." nghut kôlhang, jung hkangmó gi, akyú wó é a nghut. "Jung hkangmó kut rá ahkáng wó lhê." nghut kôlhang, jung hkangmó gi, byu lé wó kô làm nhang é a nghut.[†]

²⁴ Ó yuq le, yhumsing é gè hkyo matú ho é a nghut é za, góbâng é gè hkyo é matú hô rá dut lhê.

²⁵ Sho ùng gài má ùng é hai lé lé, ùng-âng é myit eq a myí gôn é za zo keq.

²⁶ Hkâsu mù gâ le, "Myidâm htoq eq hau má joq é jung hkangmó gi, Yhumsing é chyat nghut lhê."^{*} gâ tò ri.

²⁷ A lumjng bang ra-am, nungmoq lé zang zo jì mù, nungmoq é nau é nghut jáng, ùng-âng é myit eq a myí gôn é za, nungmoq hí má to byi é gú lé zo keq.

²⁸ Nghut kôlhang, rayuq yuq, nungmoq lé, "Shí gi, hparà lhò lé tng byi bê nghut lhê." ga tai kyô é nghut jáng, nungmoq lé tai kyo su é yanmai le, myit ùng-âng é yanmai le, hau lé hkâzo kô.

²⁹ Ùng-âng é myit hau gi, nungmoq é a nghut, góyúq é ùng-âng é myit lé tai nau é ru nghut lhê. Ngá é luthkyô lé, hai mù góyúq é ùng-âng é myit eq jéyáng é hui nhang lhê lhú?

³⁰ Ngò jeju bún é myit mai bo zo bo shuq yu é nghut jáng, Garai Gasang lé jeju hkyayon bê nghut é zoshuq hau é yanmai, hai mù lumu pyâm é ngò hui rá lhú?

³¹ Háu mù luí, nungmoq zo kôlhang, shuq kôlhang, hai kut kôlhang, Garai Gasang é hpungwup shingkâng é matú chyat kut keq.

³² Ngò gi, yuq hkangmó lé, hkyô hkangmó má shikut luí myit ngón nhang é eq rajung

^{*} 10:7 Htoq Lô 32:6 [†] 10:23 Bun zo 23 má é dangngho gi, Korinhtuq byu pé lhaq tai é dang nghut lhê. ^{*} 10:26 Hkya-on 24:1

za, nungmoq gi, Yudaq byu pé lé nghut nghut, Grik byu pé lé nghut nghut, Garai Gasâng é noqkuq hpúng má é byú lé nghut nghut, ó yuq lé le myit hkáleqbat nhâng kó.

³³ Hkâsu mù gâ le, ngò gi, yhangmoq hkyi yu é wó huì kó shâng gaq nghù, ngá é gè hkyô ho é a nghut é za, myo myô é matú gè hkyô ho nyi é ru nghut lhê.

11

¹ Ngò gi, Hkrisduq é alik châng é su, nungmoq gi, ngá é alik châng keq.

Noqkuq É Má Htap Htuk Râ Hkyô

² Nungmoq gi, hkyô hkangmó má ngo lé bûn nyi kô é yanmai le, nungmoq lé ngò lhai byi bê mhoqshit hkyô pé lé myhik zing nyi kô é yanmai le, ngò, nungmoq lé hkya-ôn lhê.

³ Ahkuí, ngò, nungmoq lé sê hkyâng nhâng nau é hkyô gi: yuqgè hkangmó é ulhum gi, Hkrisduq nghut ri; myiwe hkangmó é ulhum gi, yuqgè nghut ri; Hkrisduq é ulhum kúm gi, Garai Gasang nghut ri.

⁴ Yuqgè hkangmó gi, kyúdüng le nghut nghut, myiqhtoi htoi le nghut nghut, yhâng é ulhum lé nghop tô é nghut jâng, yhâng é ulhùm é aróng lé lhoq hpoi pyâm é nghut bê.

⁵ Myiwe hkangmó gi, kyúdüng le nghut nghut, myiqhtoi htoi le nghut nghut, yhâng é ulhum lé a nghop tô é nghut jâng, yhâng é ulhùm é aróng lé lhoq hpoi pyâm é nghut bê. Haú gi, yhâng é ulhum lé wuq pyâm é eq rajung za nghut ri.

⁶ Myiwe rayuq gi, yhâng é ulhum lé a nghop pyâm é nghut jâng, yhâng é xâm lé nyhâm pyâm ra rá nghut lhê. Nghut kôhang, xâm nyhâm pyâm é nghut nghut, xâm wuq pyâm é nghut nghut, myiwe rayuq é matú aróng hpoi lhê nghut jâng, yhang gi, yhâng é ulhum lé nghop to ra rá nghut lhê.

⁷ Yuqgè gi, Garai Gasâng é azông isâm eq hpungwup shing kang nghut é yanmai, yhâng é ulhum lé a nghop rá é nghut lhê. Myiwe kúm gi, yuqgè é hpungwup shing kang nghut ri.

⁸ Hkâsu mù gâ le, a-nham sâng-hi má, yuqgè gi, myiwe mai lo é a nghut, myiwe sheq yuqgè mai lo é ru nghut lhê.*

⁹ Hau htoq agó, yuqgè lé gi, myiwê é matú hpan tô é a nghut, myiwe lé sheq, yuqgè é matú hpan tô é ru nghut lhê.

¹⁰ Haú nghut é yanmai le, maumang lagyo pé é yanmai le, myiwe gi, ahko ahkang kumlhá đông yhâng é ulhum lé nghop rá dut lhê.

¹¹ Nghut kôhang, haú Yhumsing hí má, myiwe gi, yuqgè lé nghehkau é su, yuqgè le, myiwe lé nghehkau é nghut lhê.

¹² Hkâsu mù gâ le, myiwe gi, yuqgè mai lo é su, yuqgè le, myiwe mai hku lé é nghut

lhê. Nghut kôhang, jung hkangmó gi, Garai Gasang mai lo é nghut lhê.

¹³ Myiwe rayuq, ulhum a nghop é za Garai Gasang lé kyúdüng é gi, htuk kô rá lúhú? Nungmoq, yhumsing gung é matú doqdân yú keq.

¹⁴ Yuqgè xâm hîng tô é nghut jâng, yhâng é matú aróng hpoi é hkyô dut é nghut kôle,

¹⁵ myiwe xâm hîng tô é nghut jâng, yhâng é matú hpungwup shing kang nghut é hkyô lé, htúngli èq nungmoq lé mhoqshit lhê, a nghut kô lúhú? Hkâsu mù gâ le, xâm hîng tô é gi, nghop rá zè đông yhang lé byi tô é nghut lhê.

¹⁶ Rayuq yuq, haú hkyô lé tai dang-rhâng nau é nghut jâng, ngamoq chyáng le, Garai Gasâng é noqkuq hpúng pé chyáng le, gotú htúngli a joq é nghut lhê.

Yhumsing É Myinzang

¹⁷ Nungmoq é zuphpong pé gi, gè hkyô kut rá htoq má akyú a bo é hkyô je kut kô é yanmai, a-ô má hkyô shit tô é pé má, ngò, nungmoq lé hkya-ôn é a nghut.

¹⁸ Sâng-hi má, noqkuq hpúng rallhum đông nungmoq zup zîng é hkún, nungmoq hkaú má gam hkoq hkyô joq é lé wó gyô é nghut lui, têng é le bò rá nghù, ngò lumjing lhê.

¹⁹ Ô pé gi, Garai Gasang o é hkyam shut nghut é lé wó shit rá matú, nungmoq ahkaú má gam hkoq lhum hkyô joq rá dut lhê.

²⁰ Nungmoq ráhã zup zing kô é hkún, nungmoq gi, haú Yhumsing é myinzang zô é a nghut kô.

²¹ Hkâsu mù gâ le, nungmoq zô é hkún, góyuq lé le a lánng é za, ó le ó hí yú zô akò. Haú mù, rayuq gi, zo mut huí nyi, góyuq gi, shuq wut to dut akò nghut ri.

²² Nungmoq gi, zo jang shuq jang yhùm a wó bang nghut akò lúhú? Garai Gasâng é noqkuq hpúng lé wú tiq pyâm kô é eq, a wó bang lé hoq hpu nhâng kô é, nghut akò lúhú? Nungmoq lé ngò hkâsu nghù tai kó rá lúhú? Haú pé é yanmai, ngò, nungmoq lé hkya-on rá lúhú? Ratsuí lánng a wó dut!

²³ Hkâsu mù gâ le, haú Yhumsing chyáng mai ngò wó hap yu é gú lé, nungmoq lé lhai byi bê nghut lhê: Haú Yhumsing Yesuq gi, Yhang lé ap pyâm huí é myin má, muk lé yú mù,

²⁴ jeju hkya-ôn é htâng má, haú lé myhik hpé mù, tai é gi, "Shí gi, nungmoq é matú Ngá é gungsho nghut lhê; Ngo lé bûn nyi rá matú, shí su kut nyi keq." gâ ri.

²⁵ Haú eq rajung za, myinzang bàn zô é htâng má, Yhang gi, góm lé le yú mù, "Góm shí gi, Ngá é sui má é dangshikaq asik nghut lhê; hkâ-nhâm le, nungmoq shí shuq é hkún, Ngo lé bûn nyi rá matú shí su kut keq." gâ tai ri.

²⁶ Hkâsu mù gâ le, nungmoq gi, muk shí lé zo luí, góm shí lé shuq é hkangmó, haú Yhumsing shí hkâm é hkyô lé, Yhang jé lé shoq, shít kyô nyí rá lhê.

²⁷ Haú mù luí, ó yuq nghut kôle, a gingdán é dng Yhumsing é muk haú lé zo mù, góm haú lé shuq é nghut jáng, haú Yhumsing é gungdu eq sui lé shut é mara wó bê nghut lhê.

²⁸ Haú mù, ó yuq le, muk zo góm shuq rá hí má, yhumsing gùng yhumsing jep wú ra rá nghut lhê.

²⁹ Hkâsu mù gâ le, ó yuq nghut kôle, haú Yhumsing é gungdu eq sêng é hkyô lé a sê gyô é za muk zo góm shuq é nghut jáng, yhanggùng yhang mara zô bô shuq bo yu é nghut lhê.

³⁰ Haú nghut é yanmai, nungmoq má é byù myo myo gi, wum nyhôm é, nõhpyo huí é nghut bum akó. Ra-am gi, shí ló byuq bekó nghut ri.

³¹ Nghut kôlháng, nga-nhúng gi, yhumsing gùng yhumsing hí sôn sê yu é nghut jáng tará jéyáng é huí rá a nghut.

³² Nga-nhúng gi, mingkan eq rahá, mara byí é a huí zo sháng gaq ga, nga-nhúng lé haú Yhumsing eq jéyáng é hkûn, nga-nhúng gi, mhoqshít é huí nyí gù bê nghut lhê.

³³ Haú mù luí, ngá é gumang wui ê, nungmoq gi, zo rá nghú rahá zup zing é hkûn, rayuq eq rayuq láng lhum keq.

³⁴ Nungmoq rahá zup zing é hkûn, jéyáng é a huí zo kó sháng gaq, rayuq yuq zòmút é nghut jáng, yhùm má zô chùng rá lhê.

Gotú myít tó é hkyô pé gi, ngò jé lé é hkûn sheq shít kyo rá nghut lhê.

12

Woi-nyí Hkyô Eq Sêng É Chyunghuq Pé

¹ Gumang wui ê, woi-nyí hkyô eq sêng é chyunghuq pé lé, nungmoq a sê gyo rá lé ngò a ô nau é nghut lhê.

² Nungmoq gi, a lumjing bang nghut nyí kô é hkûn lé, dang a nyo é hpará lhô noq rá matú hkyô shuí ngoq é huí kô é hkyô lé, nungmoq sê lhê.

³ Haú mù luí, "Yesuq gi, nhing pyâm é huí sháng gaq." ga, Garai Gasâng é Woi-nyí mai taí é byù ó yuq le a nyí é eq, haú Chyoiyúng Woi-nyí mai za a nghut jáng, "Yesuq gi, Yhumsing nghut lhê." ga, ó yuq le a wó taí é nghut lhê nghú, ngò, nungmoq lé taí kyô é nghut lhê.

⁴ Woi-nyí hkyô eq sêng é chyunghuq ajung jung joq lhê; nghut kôlháng, Chyoiyúng Woi-nyí mai chyat nghut lhê.

⁵ Dojaú é hkyô ajung jung joq lhê; nghut kôlháng, Yhumsing rayuq lé za dojaú é nghut lhê.

⁶ Zui saí é hkyô ajung jung joq lhê, nghut kôlháng, Garai Gasang yhang za, byù

lunglhâng bang má, haú pé banshoq lé kut é nghut lhê.

⁷ Woi-nyí é hpông shít hkyô gi, byù pé é gè hkyô matú, yuq hkangmó lé byí bê nghut ri.

⁸ Rayuq lé gi, Woi-nyí haú mai, hpaqchyí byéng-yá byéng é danglù byí é nghut ri; góyuq lé gi, Woi-nyí hau eq za, sumpsé hpaqchyí byéng é danglù byí é nghut ri;

⁹ góyuq lé gi, Woi-nyí hau eq, lumjing myít byí é nghut ri; dum góyuq lé gi, Woi-nyí hau eq, nõ lhoq ge é chyunghuq byí é nghut ri;

¹⁰ dum, góyuq lé gi, hpungwup a-tsam pé; dum, góyuq lé gi, myiqhtoi htoi é ahkáng; dum, góyuq lé gi, woi-nyí pé lé sê gam hkoq é ahkáng; dum, góyuq lé gi, laklaí dang ahú hú ge taí é ahkáng; dum, góyuq lé gi, dang haú pé é lichyúm taí sân kyô é ahkáng, byí é nghut ri.

¹¹ Chyunghuq haú pé banshoq gi, Woi-nyí hau eq za kut é loqmú chyat nghut mù, Yhang myít hpyít é dng yuq hkangmó lé haú pé tsing gam byí é nghut ri.

Gungbun Myo Kôlháng, Ra Gùng Za

¹² Gungdu gi, gungsho showui showang pé myo myo lé pong tó é nghut kôlháng, ragùng za nghut ri; gungsho showui showang pé banshoq myo myo nghut kôlháng, gungdu ra gùng za dut tó é nghut ri. Haú eq rajung za, Hkrisduq eq le haú dng nghut ri.

¹³ Hkâsu mù gâ le, nga-nhúng banshoq bang gi, Yudaq byù nghut nghut, Grik byù nghut nghut, jùn nghut nghut, lut bang nghut nghut, gungdu ra lhum za dut rá matú, Woi-nyí rayuq mai za wui-myhup hkâm yù bê nghut luí, Woi-nyí rayuq lé za chôm shuq yù bê bang nghut lhê.

¹⁴ Haú gungdu gi, gungsho showui showang ra bun lé za kut tó é a nghut é za, myo myo lé pong tó é nghut lhê.

¹⁵ Haú hkyí gi, "Ngò, loq a nghut é yanmai, gungdu eq a sêng é nghut lhê." gâ é nghut jáng, hau é yanmai, gungdu eq a sêng wó dut é a nghut.

¹⁶ Dum, haú nohkyap gi, "Ngò, myoqjí a nghut é yanmai, gungdu eq a sêng é nghut lhê." gâ é nghut jáng, hau é yanmai, gungdu eq a sêng wó dut é a nghut.

¹⁷ Ragùng dù é gi, myoqjí za nghut é nghut jáng, gyô é hkyô gi, hkámá nghut rá lhú? Ragùng du é gi, nohkyap za nghut é nghut jáng, shôm nam é hkyô gi, hkámá nghut rá lhú?

¹⁸ Nghut kôlháng, Garai Gasang gi, gungsho showui showang hkangmó lé, Yhang dut nhâng nau é eq rajung za, gungdu má kut to bê nghut ri.

¹⁹ Gungsho showui showang gi, ra bun za nghut é nghut jáng, gungdu gi, hkámá nghut rá lhú?

²⁰ Hkyak ga jang, gungsho showui showang pé myo kôlhang, gungdu gi, ragùng za nghut ri.

²¹ Haũ myoqjĩ gi, loq lé, "Ngò, nang lé a ra!" nghũ a ge taĩ. Haũ ulhum gi, hkyĩ lé, "Ngò, nang lé a ra!" nghũ a ge taĩ.

²² Haũ za a nghut, gungdu mã é gungsho showui showang pé má wum je nyhôm é su dut é pé le, a bò a ge é chyat nghut lhê.

²³ Hau htoq agó, hpau a lúm tap rà su myit ngam é gungsho showui showang pé lé, nga-nhúng je hpautap rà lhê. Haũ a shit é jung gungsho pé lé, nga-nhúng hpautap é dõng rago nghop rà lhê.

²⁴ Nga-nhúng é wó shit é gungsho pé kúm gi, haũ hkyô a ra nghut ri. Nghut kôlhang, Garai Gasang gi, gungdũ é gungsho showui showang pé lé pong to mù, aróng nyhum é lé, je riyhang aróng byi bê nghut ri.

²⁵ Haũ mù, gungdu mã gamhkuĩ lhùm é hkyô a bo é za, gungsho showui showang pé ralhum eq ralhum, rajung za kut wó myit tẽ byĩ lum kó rà nghut lhê.

²⁶ Haũ gungsho showui showang ralhum jamjau huĩ é nghut jáng, lhum hkgangmó bo jamjau rà nghut lhê. Ralhum hpautap huĩ é nghut jáng, lhum hkgangmó bo gabũ é nghut lhê.

²⁷ Ahkuĩ, nungmoq gi, Hkrisduq é gungdu nghut kôlũ, nungmoq yuq hkgangmó gi, haũ é gungsho showui showang pé nghut akó.

²⁸ Garai Gasang gi, noqkuq hpúng má, sâng-hi lé, lagyô pé, í lhum nghũ rà má, myiqhtoi pé, sũm lhum nghũ rà má, mhoqshit bang, hau htàng má, laklai kumlhá pé kut rà bang, nõ wó lhoq gẽ rà chyunghuq wó é bang lé le, gõbang lé wó garũm é bang, shuĩ u rà chyunghuq wó é bang, laklai dang ahũ hũ ge taĩ é bang lé, masat to bê nghut ri.

²⁹ Banshoq bang gi, lagyô pé nghut lhê lhũ? Banshoq bang gi, myiqhtoi pé nghut lhê lhũ? Banshoq bang gi, mhoqshit bang nghut lhê lhũ? Banshoq bang gi, laklai kumlhá kut akó lhũ?

³⁰ Banshoq bang gi, nõ lhoq ge é chyunghuq wó é nghut lhê lhũ? Banshoq bang gi, laklai dang ahũ hũ ge taĩ lhê lhũ? Banshoq bang gi, dang haũ pé é lichyũm ge taĩ sãn kyô lhê lhũ?

³¹ Nghut kôlhang, nungmoq gi, je gyaũ é chyunghuq lé gyaĩ yhang ô nau nyi keq.

Chyitdap Myit

Hau htoq agó, ahkuĩ, ngò, nungmoq lé, je gyaũ dik é hkyô ralhum shit kólé.

13

¹ Ngò gi, byu pé é eq maumang lagyô pé é mying pé lé sê taĩ é nghut kôlhang, chyitdap myit a bo é nghut jáng, mying hung htẽ bo é ut eq mying tui htẽ bo é chapchéng su za dut byuq rà nghut lhê.

² Ngò gi, myiqhtoi htoi é chyunghuq, záu tõi é hkyô pé banshoq lé sê gyô é nyan, sũm sũ hpaqchyĩ banshoq lé wó é eq, bũm pé lé wó htot nhang é lumjĩng myit bo é nghut kôlhang, chyitdap myit a bo é nghut jáng, ngò haĩ a nghut sũ dut berã nghut lhê.

³ Ngò gi, wó é sutzẽ banshoq myũng bang lé byĩ pyãm é eq, ngá é gungdu lé nyhẽ pyãm rà matũ ap pyãm é nghut kôlhang, chyitdap myit a bo é nghut le gi, hai akyũ a bò nghut ri.

⁴ Chyitdap myit gi, myit hing lhê, nõ-nhãm lhê. Chyitdap myit gi, a manõn, gyáng dang a taĩ, a nghutbũm é nghut lhê.

⁵ Chyitdap myit gi, hpau a dap é hkyô a kut, yhumsing é akyũ baũ za a hõ, lui za nhikjum a yo, shut é mara a matsĩng é nghut lhê.

⁶ Chyitdap myit gi, agẽ ashop é má a gabũ é za, haũ tengmán hkyô má gabũ nyi ri.

⁷ Chyitdap myit gi, hkã-nhãm le wũ magum ri, hkã-nhãm le lumhkau ri, hkã-nhãm le myit myoqbyu ri, hkã-nhãm le hkam jãn ri.

⁸ Chyitdap myit gi, hkã-nhãm le htũm byuq é a nghut. Myiqhtoi htoi é hkyô pé gi, byuq byuq rà nghut lhê; laklai dang ahũ hũ ge taĩ é hkyô gi, zim byuq rà nghut lhê; sũm sũ hpaqchyĩ hkyô gi, laĩ ló byuq rà nghut lhê.

⁹ Hkãsu mù gã le, nga-nhúng sê é gi, ra-am rahtãng ru nghut lhê. Nga-nhúng myiqhtoi htoi é gi, ra-am rahtãng ru nghut lhê.

¹⁰ Nghut kôlhang, gumjup hkyô jé lé é hkũn, a gumjup hkyô gi, byuq byuq rà nghut lhê.

¹¹ Ngò, zoshâng nghut ashĩ hkũn gi, zoshâng dõng dang taĩ, zoshâng dõng myit, zoshâng dõng myit sũn wũ é nghut lhê. Ngò, suwũn nghut jáng gi, zoshâng nyi yap hkyô pé lé tõi pyãm bê nghut lhê.

¹² Ahkuĩ, nga-nhúng gi, myoqjãm hkaũ mã é rago a sãn é wupzo lé za myàng é nghut lhê; nghut kôlhang, htàng má, myoqdong hkyũm wó myàng rà nghut lhê. Ahkuĩ, ngò gi, ra-am rahtãng za sê é ru nghut lhê; nghut kôlhang, Garai Gasang gi, ngo lé gumjup shoq sê é su, ngò le, htàng má, gumjup shoq sê rà nghut lhê.

¹³ Ahkuĩ, lumjĩng myit, myit myoqbyũ hkyô, chyitdap myit shi sũm lhum myit tõi ri. Nghut kôlhang, haũ pé mã é kõi dik é gi, chyitdap myit nghut ri.

14

Myiqhtoi Htoi É Chyunghuq Pé Eq Laklai Dang Nyo É Chyunghuq Pé

¹ Chyitdap hkyô mã le cháng mù, woi-nyĩ hkyô eq sêng é chyunghuq lé le gyaĩ yhang myit o nyi keq. Myiqhtoi htoi é chyunghuq lé je riyhang myit o nyi keq.

² Hkâsu mù gâ le, laklai dang ahú hú nyo é sù ó yuq le, byú lé nyo é a nghut é za Garai Gasang lé nyo é ru nghut lhê. Yhang lé ó yuq eq le a sê gyo byi, záu tô é hkyô pé lé haú Woi-nyí eq nyo htoq é nghut ri.

³ Nghut kôlhang, myiqhtoi htoí é sù yuq hkangmó gi, byu pé lé wum byi dang eq nhik ting dang tai ri.

⁴ Laklai dang rahú nyo é sù gi, yhumsing gung lé htuqbang byí ri, nghut kôlhang, myiqhtoi htoí é sù gi, noqkuq hpúng lé htuqbang byí ri.

⁵ Ngò gi, nungmoq yuq hkangmó laklai dang ahú hú pé nyò rá lé ô nau ri, nghut kôlhang, nungmoq myiqhtoi htoi rá lé je ô nau é nghut lhê. Hkâsu mù gâ le, laklai dang ahú hú nyo é sù gi, haú noqkuq hpúng lé wó htuqbang rá matú, lichyúm lé tai sân kyô é za a nghut jang, myiqhtoi htoi sù gi, yhang htoq je gyaú é nghut lhê.

⁶ Ahkuí, gumang wui é, ngò gi, nungmoq chyáng lé je mù, laklai dang pé nyo é nghut kôle, shing-rán nghut nghut, sumsé hpaqchyí nghut nghut, myiqhtoi dang nghut nghut, mhoqshit dang nghut nghut, nungmoq lé a tai kyô é nghut le gi, nungmoq é matú ngò hai akyú htoq rá lhú?

⁷ Htê lhoq htoq é asak a bo jung zè pé má lháng gi, sampyi nghut nghut, ting nghut nghut, gam hkoq tô é htê a joq é nghut jang, mut myhíng bat myhíng é htê hai nghut é lé, hkâsu wó sê rá lhú?

⁸ Dum, tut htê le gam hkoq é đông a mut kyô é nghut jang, majan htoq rá ri ó yuq wá hên rá lhú?

⁹ Nungmoq chyáng le haú đông nghut lhê. Nang, laklai dang ahú hú nyo le, sê gyô é dangkhun mai nyo é za a nghut jang, nang hai tai nyi é lé ó yuq wá hkâsu wó sê rá lhú? Nungmoq gi, maulat má za tai hâng pyám nyi kó rá nghut lhê.

¹⁰ Míngkan má dang ahú hú yhang joq é nghut lhê, nghut kôle, dang lichyúm a htoq é dang gi, a joq é nghut lhê.

¹¹ Haú mù lui, rayuq yuq hai tai nyi é lichyúm lé ngò a dat chyup é nghut jang, ngò gi, haú dang tai su é matú maigan byú dut mù, yhang gi, ngá é matú maigan byú dut é nghut lhê.

¹² Nungmoq chyáng le haú đông nghut lhê. Nungmoq gi, woi-nyí hkyô eq sêng é chyunghuq pé lé gyaí yhang ô nau nyi bekó nghut mù, haú noqkuq hpúng lé kô myhâng nhang é chyunghuq pé lé je ho shikut nyi keq.

¹³ Haú nghut é yanmai, laklai dang ahú hú tai é sù ó yuq le, yhang haú tai é lichyúm wó tai sân kyo sháng gaq, kyúdung rá dut lhê.

¹⁴ Hkâsu mù gâ le, laklai dang ahú hú đông ngò kyúdung é nghut jang, ngá é woi-nyí

mai dúng é nghut lhê; nghut kôlhang, ngá é myitnyân é matú, hai akyú a wó nghut ri.

¹⁵ Haú mù, ngò hkâsu kut rá lhú? Ngò gi, ngá é woi-nyí mai le kyúdung rá, ngá é myitnyan mai le kyúdung rá nghut lhê; ngò gi, ngá é woi-nyí mai le mahkôn hkôn rá, ngá é myitnyan mai le mahkôn rá nghut lhê.

¹⁶ Nungmoq gi, nungmoq é woi-nyí mai za Garai Gasang lé hkya-on kô é nghut jang, a sê gyô é bang má é rayuq gi, nungmoq hai tai é lé a sê é nghut mù, nungmoq jeju hkya-ôn é hkún, "Amen" ga hkâsu wó tai rá lhú?

¹⁷ Nungmoq gi, ge dik shoq jeju hkya-on kô é abe, nghut kôlhang, góbang gi, htuqbang é a hui kó nghut ri.

¹⁸ Ngò gi, nungmoq banshoq bang htoq má laklai dang ahú hú je wó tai é yanmai, Garai Gasang lé jeju bûn ri.

¹⁹ Nghut kôlhang, noqkuq hpúng má, laklai dang rahú đông dangkhun ramun ngò tai rá htoq má, góbang lé mhoqshit rá akyú bo é dang ngo hkun tai rá lé ngò je ô nau ri.

²⁰ Gumang wui é, zoshâng wui su myit nyi é lé nô pyám keq. Agé ashop hkyô eq sêng é má gi, nyheqnú đông kut mù, nungmoq myit é hkyô má gi, ko bang đông kut keq.

²¹ Haú jep é tará má ká tô é gi, "A wó gyô wú é dang đông mai le, góming byu pé é nhutwuí đông mai le, byú shí bang lé ngò tai rá nghut lhê;

nghut kôlhang, yhangmoq gi, ngá dang gyo kó rá a nghut."

ga Yhumsing tai ri.*
gâ ri.

²² Haú mù, laklai dang ahú hú nyo é hkyô gi, lumjúng bang matú kumhá a nghut é za, a lumjúng bang matú sheq ru nghut lhê. Myiqhtoi dang kúm gi, a lumjúng bang matú a nghut é za, lumjúng bang matú sheq ru nghut lhê.

²³ Haú nghut mù, noqkuq hpúng gón chôm zing mù, yuq hkangmó laklai dang ahú hú nyò kô é nghut jang, a sê gyô é bang nghut nghut, a lumjúng é bang nghut nghut, wang lé kô é hkún, yhangmoq gi, nungmoq ná bùm bekó ga a tai kó rá nghut lhê lhú?

²⁴ Nghut kôlhang, yuq hkangmó, myiqhtoi dang tai nyi é u má, a lumjúng sù nghut nghut, a sê gyô é sù nghut nghut, wang lé é nghut jang, yhang gi, yubak dap sù rayuq nghut é lé, banshoq eq lhoq pún kyíng é hui rá eq, banshoq eq jéyáng é hui rá nghut é htoq agó,

²⁵ yhâng é i-myit má záu tô é hkyô pé lé de de lhoq htoq shit é hui rá nghut lhê. Haú mù, yhang gi, ngóm gop lui, Garai Gasang lé noqkuq mù, "Garai Gasang gi, gè gè yhang, nungmoq chyáng rahá nghut nyi ri!" ga tai pyo htoq kat rá nghut lhê.

Shuq Shuq Tap Tap Za Noqkuq Râ Hkyô

²⁶ Haù jáng, gumang wui ê, nga-nhúng haì tái rả lú? Nungmoq rahá lé chòm zing é hkún, yuq hkangmó gi, Garai hkyan mahkôn nghut nghut, mhoqshit é dang nghut nghut, shing-rán nghut nghut, laklai dang ahú hủ nyo é hkyô nghut nghut, tái sản kyô é nghut nghut pé lé, wó le ge ri. Haù pé banshoq gi, noqkuq hpúng lé wum-o byi rả matú chyat kut é dut rả lhê.

²⁷ Rayuq yuq, laklai dang ahú hủ nyo é nghut jáng, i yuq eq myô htum sum yuq mai a lai é za, rayuq htâng rayuq nyô rả dut é htoq agó, rayuq yuq haù lé tái sản kyo ra rả dut lhê.

²⁸ Tái sản kyô é sủ a nyi é nghut jáng, laklai dang ahú hủ nyo é sủ gi, noqkuq hpúng má zim za nyi rả dut mù, yhânggùng yhang eq Garai Gasang lé za nyo rả dut lhê.

²⁹ Myiqhtoi í yuq nghut nghut, sum yuq nghut nghut tái kyo rả dut lhê; góbang gi, haì tái é lé rago gyô chyam wủ rả dut lhê.

³⁰ Nghut kôlhang, zung tô é sủ rayuq yuq chyáng shing-rán jé é nghut jáng, hí tái nyi é sủ gi, nô byuq rả dut lhê.

³¹ Hkâsu mù gả le, yuq hkangmó gi, mhoqshit é eq myit wum byi é wó hui kó sháng gaq, nungmoq banshoq bang gi, rayuq htâng rayuq myiqhtoi wó htoi é nghut lhê.

³² Haù myiqhtoi pé é woi-nyi pé gi, myiqhtoi pé uphkan é a-ô má nghut nyi ri.

³³ Hkâsu mù gả le, Garai Gasang gi, atau ahú dut é Garai Gasang a nghut é za, nguingón hkyô é Garai Gasang ru nghut lhê.

Sân-yúng bâng zing tô é hpúng banshoq mã é eq rajung za,

³⁴ myiwe wui gi, noqkuq hpúng pé má zim za nyi rả dut lhê. Yhangmoq gi, dang tái ahkáng a wó é nghut mù, haù jep é tará má bo é eq rajung za a-ô má nyi kó sháng gaq.

³⁵ Yhangmoq gi, rajung jung sé haù kô é nghut jáng, yhùm má yhangmoq é yhumsing hpô pé chyáng myi kó sháng gaq; hkâsu mù gả le, myiwe rayuq noqkuq hpúng má dang tái é gi, ahoq ahí hkyô nghut ri.

³⁶ Haù Garai Gasang é mungdang gi, nungmoq chyáng mai htoq lo é nghut lhê lú? Haù gi, nungmoq chyáng za lé jé bê nghut lhê lú?

³⁷ Rayuq yuq, yhang gi, myiqhtoi, a nghut jáng, woi-nyi chyunghuq byi é hui sủ nghut lhê ga myit é nghut jáng, ngò, nungmoq lé ká byi é pé gi, haù Yhumsing é hkunmó nghut é lé, yhang sê yù sháng gaq.

³⁸ Yhang gi, haù lé haì su a ngàm kut é nghut jáng, yhânggùng le, haì su a ngàm kut é hui zo rả nghut lhê.

³⁹ Haù mù luí, ngá é gumang wui ê, myiqhtoi htoi rả lé ô nau nyi mù, laklai dang ahú hủ nyo é lé hkâhkùm pyám kó.

⁴⁰ Nghut kôlhang, jung hkangmó gi, htuk é đông eq shuq shuq tap tap zâ é hkyô đông kut é dut rả lhê.

15

Hkrisduq É Dui Toq Hkyô

¹ Gumang wui ê, ngò, nungmoq lé hko kyo bê nghut mù, nungmoq le hap yù luí, nungmoq yap ging tô é jowô nghut é gabú danglù hkyô lé, ahkuí, ngò, nungmoq lé lhoq pùn kat nau ri.

² Ngò, nungmoq lé hko kyo bê é mungdang lé, nungmoq ging ging myhik zing nyi kô é nghut jáng, nungmoq gi, gabú danglù hau é yanmai hkyi yù hui é nghut akô. Haù a nghut jáng, nungmoq lumjing é gi, akôm dut bê nghut lhê.

³ Ngò hap yu tô é pé lé, sâng-hi ahkyak é đông, ngò, nungmoq lé hai byi bê nghut lhê. Haù pé gi: Chyúmdang eq rajung za, Hkrisduq gi, nga-nhúng é yubak mará é matú shí hkám byi bê gả é nghut ri;

⁴ Yhang gi, myhup yhùm é hui luí, Chyúmdang eq rajung za sum nyi nghu é nyi má lhoq dui toq é hui bê nghut mù,

⁵ Petruq lé htoq shit luí, haù lagyo raxe í yuq lé le htoq shit ri.

⁶ Hau htâng, Yhang gi, ra-u má za, gumang wui ngo shô yuq chyân lé htoq shit ri. Haù bang mã é myo hpyang gi, ahkuí jé shoq asak dui nyi bum akô; ra-am kúm gi, shi lô byuq bekô nghut ri.

⁷ Hau htâng, Yhang gi, Yakuq lé htoq shit mù lagyo pé banshoq bang lé htoq shit ri.

⁸ Lô htâng mã, Yhang gi, hkú buinyi a jé shí é má hku é đông nghut sủ ngo lé le htoq shit bê nghut ri.

⁹ Hkâsu mù gả le, ngò gi, lagyo pé mã é tiq dik sủ nghut lhê. Haù Garai Gasang é noqkuq hpúng lé zing-ri sủ nghut é yanmai, ngò gi, lagyo rayuq nghủ rả lháng a gingdán é sủ nghut lhê.

¹⁰ Nghut kôlhang, ngò ahkuí ísu wó nghut nyi é gi, Garai Gasang jeju mai nghut lhê. Yhâng é jeju gi, ngá chyáng akôm a dut é za, ngò gi, yhangmoq banshoq bâng htoq mã je riyhang mù wùn waq shikut lhê. Haù gi, ngò kut é a nghut, ngò eq rahá nghut nyi é Garai Gasang jeju sheq ru nghut lhê.

¹¹ Haù mù luí, ngò nghut nghut, yhangmoq nghut nghut, ngamoq hko kyô é gi, haù hkyô chyat nghut luí, nungmoq lumjing é le, haù hkyô nghut ri.

Shi Byuq Bâng É Dui Toq Hkyô

¹² Nghut kôlhang, haù Hkrisduq shi é mai lhoq dui toq é hui bê hkyô lé hko kyô nyi bê nghut mù, nungmoq mã é ra-am gi, shi byuq bâng é dui toq hkyô a joq nghủ, hkâsu wó tái kó rả lú?

¹³ Shi byuq bâng é dui toq hkyô a joq é ru nghut le gi, Hkrisduq le lhoq dui toq é hui berá a nghut.

¹⁴ Hau htoq agó, Hkrisduq gi, lhoq dui toq é a hui é ru nghut le gi, ngamoq hko kyô é

hkyô eq, nungmoq é lumjîng hkyô gi, akôm dut byuq râ nghut lhê.

¹⁵ Hau htoq agô, Garai Gasang gi, haû Hkrisduq lé shi é mai lhoq dui toq bê hkyô lé, ngamoq saksé hkâm bê nghut é yanmai, ngamoq gi, Garai Gasang é hkyô má saksé apyoq pé dut byuq râ za nghut lhê. Nghut kôlhang, shi byuq bang lhoq dui toq huí é hkyak a joq é ru nghut le gi, Garai Gasang, Yhang lé lhoq dui toq kat râ a nghut.

¹⁶ Hkâsu mù gà le, haû shi byuq bang lhoq dui toq é a huí é nghut jáng, Hkrisduq le, lhoq dui toq é hui berâ a nghut.

¹⁷ Hkrisduq gi, lhoq dui toq é a huí é nghut jáng, nungmoq é lumjîng hkyô gi, akôm dut luí, nungmoq gi, nungmoq é yubak mara hkaû má ru nyi nyi shi kó râ nghut lhê.

¹⁸ Haû nghut jáng, Hkrisduq má shi lô byuq bê bang le, htên byoq byuq râ za nghut lhê.

¹⁹ Nga-nhúng gi, shi ipyat lhê é matú za, Hkrisduq má myit myoqbyû hkyô wó é nghut jáng, byû banshoq bâng htoq má shogyo rayhup dut é je hui zo bang dut kó râ nghut lhê.

²⁰ Nghut kôlhang, Hkrisduq gi, gè gè yhang shi é mai lhoq dui toq é hui bê nghut mù, shi lô byuq bâng é sâng-hi ashi dut bê nghut ri.

²¹ Hkâsu mù gà le, shi-nò hkyô gi, byû rayuq đông mai lô bê nghut é eq rajung za, shi byuq bâng é dui toq hkyô le, byû rayuq đông mai lô é nghut lhê.

²² Hkâsu mù gà le, lhunglhang bang gi, Adam é yanmai shi byuq é su, lhunglhang bang gi, Hkrisduq eq rading ralhûm za nghut é yanmai lhoq dui toq é hui râ nghut lhê.

²³ Nghut kôlhang, yuq hkgangmó gi, ó le ó âng é hkûn lhoq dui toq é hui râ nghut lhê: Hkrisduq gi, sâng-hi lhoq dui toq huí é sù nghut lhê. Hau htâng má, Yhang jé lé é hkûn, Yhang eq sêng é bang lhoq dui toq é hui râ nghut lhê.

²⁴ Hau htâng, jilhtûm jé râ nghut lhê; haû hkûn, Yhang gi, up é bang banshoq, ahkáng ayá eq a-tsam pé lé ban lhoq htên pyâm é htâng, haû Iwa nghut sù Garai Gasang lé mingdân ap byi râ nghut lhê.

²⁵ Hkâsu mù gà le, Yhang gi, Yhâng é gye pé banshoq lé, Yhâng é hkyí wang ô má tô pyâm é hkûn jé shoq up nyi ra râ nghut lhê.

²⁶ Haû lhoq htên pyâm é hui râ nghut é lô htâng é gye gi, shi-nò hkyô nghut ri.

²⁷ Hkâsu mù gà le, "Garai Gasang gi, jung hkgangmó lé, Yhâng é hkyí wang ô má tô pyâm bê nghut ri."* gâ Chyûmdang má kê tô ri. "Jung hkgangmó lé" Yhâng é a-ô má tô pyâm bê ga tai é hkûn, jung hkgangmó lé Hkrisduq é a-ô má tô pyâm bê sù Garai

Gasang yhang kúm a lom é hkyô, san za nghut nyi ri.

²⁸ Yhang gi, haû hkyô ban kut é htâng má, haû Zo yhang le, jung hkgangmó lé Yhâng é a-ô má to byi bê sù Garai Gasang é a-ô má nyi sù dut nhang é hui râ nghut mù, Garai Gasang gi, lhunglhang htoq má gyaû sù nghut luí, lhunglhang lé sîng sù nghut râ nghut lhê.

²⁹ Dui toq hkyô a joq é ru nghut le gi, shi byuq bê bâng é matú wui-myhup hkâm byi bùm kô é gi, hai akyû bò kó râ lúh? Haû shi byuq bang lhoq dui toq é a hui kô é ru nghut le gi, yhangmoq matú haû mù byu pé wui-myhup hkâm yû kó râ lúh?

³⁰ Ngamoq gi, ngamoq é matú, hkyîng hkgangmó haû mù chiq râ jowò má nyi râ lúh?

³¹ Gumang wui ê, ngò gi, nyí wui aluq shoí shoí shi é hui zô é nghut lhê. Haû su nghû é gi, nga-nhúng é Yhumsîng Hkrisduq Yesuq má, nungmoq é hkyô lé ngò hkyak wó gumrong é yanmai nghut lhê.

³² Ngò gi, xângzo hkyam đông mai za, Ehpesu myuq má tân jung dusak pé lé majan zân nyi é nghut jáng, ngá é matú hai akyû bò râ lúh? Shi byuq bang lhoq dui toq é a huí é ru nghut le gi,

"Nga-nhúng gi, napmá shi râ nghut é yanmai,

zo sháng, shuq sháng."*

ngû râ za nghut lhê.*

³³ "A ge é zùm yap luzúm wui gi, ge é nyi yap sâmlai lé hten nhang é nghut lhê." gâ é sanghkyang eq rajung za, hkyô shui nghoq é hkâhui zo kó!

³⁴ Nungmoq gi, tau bûn gyîng lò mù, mara hkâkut shut lo kó; hkâsu mù gà le, Garai Gasang lé a sê é byû ra-am nyi akò. Ngò haû su nghû tai é gi, nungmoq hoq bun râ matú nghut lhê.

Dui Toq É Gungdu

³⁵ Nghut kôlhang, rayuq yuq gi, "Haû shi byuq bê bang, hkâsu kut lhoq dui toq é hui kó râ lúh? Yhangmoq gi, hkasú é gungdu nghut kó râ lúh?" ga myi râ nghut lhê.

³⁶ Haû-í ngâ sù é! Nang hô hkyô kat é pé gi, shi byuq é za a nghut jáng, yuq htoq lò râ a nghut mhai.

³⁷ Nang, kyô hkyô é hkûn, yuq lò râ nghut é agâm lé hô hkat e a nghut é za, sungso amyui nghut nghut, gotú amyui rajung jung nghut nghut lé za hô kat é ru nghut lhê.

³⁸ Nghut kôlhang, Garai Gasang gi, Yhang myit hpyit to bê eq rajung za haû lé gungdu ralhûm byi mù, kyôshi myui hkgangmó lé, ó le ô é gungdu byi ri.

³⁹ Gungsho lhunglhang gi, rajung za a nghut. Byû pé é gungsho gi, rajung, dusak

* 15:27 Hkya-on 8:6

* 15:32 Esai 22:13

* 15:32 Dang ngho shi gi, a lumjîng bang tai é dang nghut lhê.

pê é gi, gó jung, nghoq pê é gi, gó jung, ngozo pê é gi, gó jung ru nghut lhê.

⁴⁰ Mauhkúng gùng pé le joq é nghut lui, myidam gùng pé le joq ri; nghut kôlháng, mauhkúng gùng pé é shing kang gi, rajung, myidam gùng pé é shing kang gi, gó jung ru nghut lhê.

⁴¹ Haú bui má bo é shing kang gi, rajung, lhamó má é gi, gó jung, kyí pé má é gi, gó jung ru nghut lhê; kyí racham eq rachâm é shing kang le gotú tú shai lhùm lhê.

⁴² Haú mù, shi byuq bê bâng é dui toq hkyô le, haú eq rajung za nghut ri. Haú hô hkyô kat é gungdu gi, htên byoq sê é nghut lui, lhoq dui toq lui é gungdu kúm gi, htên byoq a sê é nghut lhê.

⁴³ Hô hkyô kat é hkún gi, aróng a bò, lhoq dui toq lui é hkún gi, hpungwup shing kang bo ri. Hô hkyô kat é hkún gi, wum nyhóm mù, lhoq dui toq lui é hkún gi, a-tsam bo ri.

⁴⁴ Gungsho gungdu gi, hô hkyô é hui mù, woi-nyí gungdu gi, lhoq dui toq é lui ri.

Gungsho gungdu joq é nghut le gi, woi-nyí gungdu le joq é nghut lhê.

⁴⁵ Haú nghut mù, "Haú sâng-hi yuq byù Adam gi, asak dui é xângzo dut bê nghut ri."^{*} ga kâ tô ri. Haú lô htâng é Adam kúm gi, asak byí é woi-nyí nghut ri.[†]

⁴⁶ Haú woi-nyí eq sêng é hí lé joq é a nghut é za, gungsho eq sêng é hí lé joq é htâng má sheq, woi-nyí eq sêng é lé joq é ru nghut lhê.

⁴⁷ Haú sâng-hi yuq byù gi, myidam má é tseyùn lé saí é nghut mù, htang lí heq byù gi, mauhkúng htoq má é nghut ri.

⁴⁸ Haú myidam byù nghut sù su, myidam eq sêng é bang le nghut nyí akó; haú mauhkúng htoq má é byù nghut sù su, mauhkúng eq sêng é bang le nghut nyí akó.

⁴⁹ Nga-nhúng gi, myidam byù é gungghyâng isâm lé hkam yù bê nghut é su, mauhkúng htoq má é byu é gungghyâng isâm lé le myang hkam yù rá nghut lhê.

⁵⁰ Gumang wui ê, ngò, nungmoq lé shit kyo kôlé, gungsho eq sui gi, Garai Gasâng é mingdán é silí wunlí lé wó yù rá a nghut, htên byoq sê é le, htên byoq a sê é silí wunlí lé wó yù rá a nghut.

⁵¹ Gyo to keq, zaú tô é hkyô lé, ngò, nungmoq lé tái kyo kôlé: Nga-nhúng banshoq bang gi, shi byuq rá a nghut é za, htaí lhik é hui rá ru nghut lhê.

⁵² Haú gi, lô htâng é tut htê mying é hkún, ralhap za, myoqkuq ralap má dut rá nghut lhê. Hkâsu mù gâ le, tut htê mying rá nghut lhê, haú hkún, shi byuq bê bang gi, htên byoq a sê é shut lhoq dui toq yu é hui rá nghut mù, nga-nhúng gi, htaí lhik é hui rá nghut lhê.

⁵³ Hkâsu mù gâ le, htên byoq sê é gi, htên byoq a sê é lé htaí wut yù mù, shi byuq sê

é gi, shi byuq a sê é lé htaí wut yù rá dut é nghut lhê.

⁵⁴ Haú htên byoq sê é gi, htên byoq a sê é lé htaí wut yù mù, shi byuq sê é gi, shi byuq a sê é lé htaí wut yù é hkún sheq, "Shi-nò hkyô gi, ùng budâng eq myui pyâm é hui bê nghut ri."^{*} ga kâ tô é eq,

⁵⁵ "Shi-nò hkyô ê, náng é ùng budang gi, hkâmá lú? Shi-nò hkyô ê, náng é nyin gi, hkâmá lú?"^{*}

gâ tô é sangghyang gi, dik rá nghut lhê.

⁵⁶ Haú shi-nò hkyô é nyin gi, yubak mara nghut ri; yubak marâ é a-tsam gi, jep é tará nghut ri.

⁵⁷ Nghut kôlháng, Garai Gasang lé jeju hkyôn lhê! Yhang gi, nga-nhúng é Yhumsing Yesuq Hkrisduq đông mai, nga-nhúng lé ùng budang byí é nghut ri.

⁵⁸ Haú mù lui, ngá é chiyitdap gumang wui ê, yap gingtng nyí keq. Hai êq le, nungmoq lé hkálhoq dui nún nhâng kó. Nungmoq gi, haú Yhumsing má nungmoq wùn waq é muzó akóm a nghut é lé sê kô é nghut lhê yanmai, haú Yhumsing é muzó lé ayang wùn waq shikut nyí keq.

16

Yerusalem Wà Mó Má É Lumjng Bâng É Matú Alu Hkyuí Rá Hkyô

¹ Ahkuí, Garai Gasâng é byu pé é matú alu hkyuí rá hkyô eq séng lui gi, haú Galatiq mau má é noqkuq hpùng pé lé ngò kut nhang é su kut keq.

² Ngò jé lé é hkún, alu hkyuí rá hkyô a kut ra rá đông, bat hkangmó má é sâng-hi nyí má, yuq hkangmó gi, yhumsing wó ho é má cháng mù, gam tô to láng keq.

³ Ngò jé lé é hkún, ngò gi, nungmoq hkyin tô é byu pé lé, shit kyô é laiká pé byi mù, nungmoq é chyunghuq lé, Yerusalem wà mó má é dé nhâng rá nghut lhê.

⁴ Ngò le é ang rá dut é nghut jáng, yhangmoq gi, ngá é byinzùm kut rá nghut lhê.

Poluq Lum Kat É Hkyô Pé

⁵ Ngò gi, Makedoni mau lai byit é htâng, nungmoq chyáng jé lé rá nghut lhê. Hkâsu mù gâ le, ngò gi, Makedoni mau lai byit rá za nghut lhê.

⁶ Ngò hkâmá é kôlháng, ngá é hkyowui má nungmoq wó garúm kat kó rá matú, ngò gi, rayoq zo nghut nghut, gyoqmyô lhang lai shoq nghut nghut, nungmoq eq rahá nyí abe.

⁷ Ngò gi, lai lô uchyang za nungmoq lé lé kum rá nghut mù, ahkuí wó myâng rá le a nau é nghut lhê; ngò gi, haú Yhumsing đông é nghut jáng, nungmoq eq rahá rayoq nyí rá lé myit myoqbyu lhê.

* 15:45 Apún 2:7

† 15:45 Lô htâng é Adam gi, Yesuq lé tái nau é nghut lhê.

* 15:54 Esai 25:8

* 15:55 Hos 13:14

⁸ Nghut kôlhang, ngò gi, Penteko-ti poi buinyi jé shoq Ehpesu myuq má nyi rá nghut lhê.

⁹ Haí mù gà le, ngo lé htuoq htúng é bang myo myo nyi é nghut kôlhang, akyú htoq é muzó é matú hkum mó ngo lé hpông to byi é yanmai nghut lhê.

¹⁰ Timohti jé lé jáng, yhang, nungmoq eq rahá nyi é u má, gyuq é hkyô hai le a joq rá matú wú byi keq; hkâsu mù gà le, yhang gi, haú Yhumsing é muzó lé, ngò su wùn waq wún é sù nghut lhê.

¹¹ Haú mù, ó yuq le, yhang lé hkâwú shóm kó. Yhang gi, ngá chyáng wó dum taú jé sháng gaq, yhâng é hkyowui má nguingón é dông nhang kat keq. Haú gumang wui eq rahá lô kó rá lé, ngò myit láng nyi lhê.

¹² Ahkuí, nga-nhùng é gumang Apolo é hkyô eq séng luí ga jang: yhang gi, haú gumang wui eq rahá nungmoq chyáng lé rá lé, ngò, gyai yhang wum taí tsuq lhê. Yhang kúm gi, ahkuí lé nau é myit a dê bò shi, nghut kôlhang, yuqyo é ahkying wó jáng, yhang lé lô rá nghut lhê.

¹³ Machya nyi keq; lumjínq hkyô má ging ging títng títng yap nyi keq; gyuq kyum myit hkâbô kó; wum bo nyi keq.

¹⁴ Jung hkgangmó lé, chyitdap myit eq zui saí keq.

¹⁵ Stehpana eq yhâng é yhumbyù wui gi, Ahkaia ming má sâng-hi hpúng wâng bang nghut luí, yhangmoq gi, yhumsing gùng lé, haú sán-yúng bâng é dojaú hkyô má ap nóng bekô lé, nungmoq sê akô nghut ri. Gumang wui é, ngò, nungmoq lé wum taí tsuq kat kôlé,

¹⁶ haú sù é bâng é a-ô má le, haú muzó má bo wang lóm mù, mù zui shikut bang yuq hkgangmó é a-ô má le, nyi keq.

¹⁷ Ngò gi, Stehpana, Hportunatu eq Ahkaiku pé jé lo é hkún, gyai gabú é nghut lhê, haí mù gà le, yhangmoq gi, nungmoq a kut byi é hkyô lé, lhoq pying byi bekô nghut ri.

¹⁸ Hkâsu mù gà le, yhangmoq gi, ngá é woi-nyí eq nungmoq é woi-nyí lé lhoq ngón byi bekô nghut ri. Haú sù é bang lé, hpautap nyi keq.

Ló Htâng É Shi-kyám Dang

¹⁹ Asia mau mâ é noqkuq hpúng pé gi, nungmoq lé shi-kyâm kat akô. Akula eq Priskila nhik le, yhangnhik é yhùm má chòm huí é noqkuq hpúng lé, haú Yhumsing má nungmoq lé gyai yhang shi-kyâm kat akô.

²⁰ Shí má nyi é gumang wui banshoq bang gi, nungmoq lé shi-kyâm kat akô. Rayuq eq rayuq chyoiyúng é chyitpuq èq shi-kyâm lhum keq.

²¹ Ngò, Poluq gi, shi-kyám dang shí lé, ngá é loq èq yhang ká é nghut lhê.

²² Rayuq yuq, haú Yhumsing lé a chyitdap é nghut jáng, haú yuq gi, nhing pyâm é hui sháng gaq. Yhumsing é, jé lé aq hkoi!

²³ Haú Yhumsing Yesuq é jeju gi, nungmoq eq rahá nghut nyi sháng gaq.

²⁴ Ngá é chyitdap myit gi, Hkrisduq Yesuq má nungmoq banshoq bâng chyáng joq nyi sháng gaq. Amen.

KORINHTUQ

Pê Chyáng Htang Dàm Hun Kat

é Laiká

(2 Corinthians)

¹ Garai Gasang ô nau é eq rajung za, Hkrisduq Yesuq é lagyo rayuq dut sú ngò Poluq gi, nga-nhùng é gumang Timohti le kut, Korinhtuq myuq mã é, Garai Gasâng é noqkuq hpúng lé le, Ahkaia mau gón mã é sân-yúng bang banshoq chyáng le, dang kyô kat lhê:

² Nga-nhùng é Íwa nghut é Garai Gasang eq haù Yhumsing Yesuq Hkrisduq chyáng mã é jeju eq nguingón hkyô gi, nungmoq chyáng ru joq nyí sháng gaq.

Nhik ting hkyô banshoq é Garai Gasang

³ Nga-nhùng é Yhumsing Yesuq Hkrisduq é Yhangwa eq Garai Gasang, shogyo nhik-myin hkyô é Íwa eq nhik ting hkyô banshoq é Garai Gasang gi, hkya-on kungton é huí nyí sháng gaq.

⁴ Garai Gasâng chyáng mai nungmoq wó yù bê nghut é nhik ting hkyô eq, hkasú é wuìhke hkyô hui bang lé le nga-nhùng wó nhik ting byí sháng gaq ga, Yhang gi, nungmoq é wuìhke hkyô banshoq mã nhik ting byí ri.

⁵ Hkásu mù gà le, Hkrisduq hui zô é jam-jau hkyô myo myo lé nungmoq bo hui zô é su, Hkrisduq dòng mai, nungmoq é nhik ting hkyô le bying mui nyi é nghut lhê.

⁶ Nungmoq, myit myo uhkyí é huí é nghut jáng, nungmoq é nhik ting hkyô eq hkyi yù hkyô é matú nghut nyi ri; nungmoq, nhik ting é huí é nghut jáng, nungmoq é nhik ting hkyô é matú nghut lui, haù gi, nungmoq jamjau é eq rajung za nghut é jamjau hkyô lé, myit hing é dòng mai wó jân pyám rà a-tsam, nungmoq chyáng lhoq htoq byí é nghut lhê.

⁷ Haù mù, nungmoq é jamjau hkyô pé mã nungmoq bo lòm bekò nghut é su, nungmoq é nhik ting hkyô mã le nungmoq bo lòm bekò nghut é hkyô lé, nungmoq sê é yanmai, nungmoq lé nungmoq myit myoqbyu kat é hkyô gi, hkyak wó lum to bê nghut lhê.

⁸ Gumang wuì ê, Asia mau mã, wuìhke jamjau é nungmoq gyai yang hui zô é hkyô lé, nungmoq gi, nungmoq lé kyô kat nau ri. Nungmoq wó jân é a-tsam lhang htuom shoq hpuzò é nghut lui, nungmoq gi, asak dui lo rà lhang a myit myoqbyu lô é nghut lhê.

⁹ Gè gè yang, nungmoq gi, sat hui berá nghù, nungmoq é i-myt mã lumjing pyám é nghut lhê. Nghut kólhang, haù gi, nungmoq gung nungmoq a lumhkau é za, shí bê bang lé lhoq dui toq sú Garai Gasang lé lumhkaù rà matú dut é nghut lhê.

¹⁰ Garai Gasang gi, haù sú é shí rà hkyô mai hkyi yù bê nghut mù, nungmoq lé hkyi yù rà za nghut lhê. Yang gi, nungmoq é matú nungmoq kyúdung byí nyi é u mã, xoq lui nungmoq lé hkyi yù rà za nghut lhê nghù, nungmoq gi, Yang lé myit myoqbyu to bê nghut lui,

¹¹ myo myo kyúdung byí é lé gyo byí é mã nungmoq shimân jeju wó mù, byù myo myo gi, nungmoq wó é shimân jeju é yanmai Garai Gasang lé jeju hkya-on kó rà nghut lhê.

Poluq, Hen Tô É Muzó Htai Pyám É Lé Tai Hung É Hkyô

¹² Nungmoq nghutbùn é gi, Garai Gasâng chyáng mã é chyoyúng hkyô eq lhumzui hkyô mã, mingkan to wuì eq nungmoq asak dui bê hkyô lé le, je lui nungmoq eq zùm yap é hkyô lé le, nungmoq é myit sôn sê é hkyô eq, saksé hkám byí é hkyô nghut lhê. Nungmoq haù su kut é gi, mingkan hpaqchyí byéng-yá dòng mai kut é a nghut é za, Garai Gasâng é jeju dòng mai kut é ru nghut lhê.

¹³ Hkásu mù gà le, nungmoq gi, nungmoq a dat nghap é eq a sê gyô é haì le a ká byí kat é nghut lhê. Ngò, myit myoqbyu kat é gi,

¹⁴ nungmoq gi, nungmoq é hkyô ra-am lé wó sê gyô yù bê eq rajung za, haù Yhumsing Yesuq é buinyi mã nungmoq é hkyô lé nungmoq nghutbun rà nghut é su, nungmoq é hkyô lé nungmoq wó nghutbun rà matú, nungmoq, banshoq lé sê gyo kó rà nghut lhê.

¹⁵ Haù hkyô lé, ngò hkyak myit lum to bê nghut é yanmai, nungmoq gi, akyù í dam wó hkam yù kó sháng gaq nghù, ngò gi, nungmoq chyáng hí lé kum rà matú hen to bê nghut lhê.

¹⁶ Ngò gi, Makedoni mau shut e ló é hkyowuì mã nungmoq lé hí lé kum mù, Makedoni mau mai nungmoq chyáng dum taù lò lui, Yuda mau shut e é hkyowuì mã, nungmoq, ngò lé garúm kat kó rà lé myit lum to bê nghut lhê.

¹⁷ Ngò gi, haù hkyô hen é hkùn, agon za hen hkyut é nghut lhê lú? Haù a nghut jáng, ngò hen é pé gi, ra-u mã za, "Nghut lhê, nghut lhê." nghù é eq, "A nghut, a nghut." nghu é wó tai rà matú, mingkan myit dòng hen é nghut lhê lú?

¹⁸ Gè gè yang, Garai Gasang gi, lhumzui sú yang nghut é eq rajung za, nungmoq é danglù gi, nungmoq chyáng "Nghut lhê" lé, "A nghut" nghu é a nghut.

¹⁹ Hkásu mù gà le, ngò eq le, Sila eq le, Timohti eq le, nungmoq chyáng hko kyo bê nghut é sú, Garai Gasâng é Yhangzo Yesuq Hkrisduq gi, "Nghut lhê" nghu é eq "A nghut" nghu é sú a nghut é za, Yang mã gi, hká-nhám le "Nghut lhê" nghu é za joq lhê.

²⁰ Hkâsu mù gâ le, Garai Gasang gi, dang-gidiq hkâ-myhó to kôle, haú pé gi, Hkrisduq má "Nghut lhê" chyat nghut lhê. Haú mù, Garai Gasâng é hpungwup shingkâng é matú, Yhâng đông mai, nga-nhúng gi, "Amen" nghù tái é nghut lhê.

²¹ Ngamoq eq nungmoq lé Hkrisduq má yap gingtíng nhang é sù gi, Garai Gasang nghut ri. Yhang gi, nga-nhúng lé masat é xú but byi mù,

²² Yhang sing lhê gâ é dizik, nga-nhúng lé htùng tap byi lui, jé lô rã hkyô pé hkyak joq lhê nghu é masat zè đông, Yhâng é Woi-nyí lé nga-nhúng é i-myt unghkaú má kat byi bê nghut ri.

²³ Ngò gi, nungmoq hkyamsa rã matú, Korinhtuq myuq má a dum taú lé é hkyô têng é lé, ngá é saksé dut rã đông Garai Gasang lé wut dúng lhê.

²⁴ Haú gi, nungmoq é lumjíng hkyô lé ngamoq sing pyám byí é a nghut é za, nungmoq é gabú hkyô é matú, nungmoq eq rahá chóm zui saí é ru nghut lhê; haú mù gâ le, lumjíng myit mai za nungmoq wó yap gíng nyi bùm kô é ru nghut lhê.

2

¹ Haú mù lui, ngò gi, nungmoq lé myit nò nhâng é dut rã đông, lé dum kùm é a kut rã nghù, myit hpyit to bê nghut lhê.

² Hkâsu mù gâ le, nungmoq lé ngò yón kuq nhang é nghut le gi, ngò yón kuq nhâng bê bang nungmoq mai lai lui, ó yuq wá ngo lé wó gabú nhâng rã lú?

³ Ngò jé lé é hkùn, ngo lé gabú nhâng rã âng é bâng eq, ngo lé myit nò nhâng é a hui sháng gaq nghù, ngò gi, ngò kut é eq rajung za laiká ká kat bê nghut lhê. Ngá é gabú hkyô lé nungmoq banshoq bang wó bo gabú kó rã nghut lhê nghù, nungmoq banshoq bang lé ngò hkyak myit lum tó lhê.

⁴ Hkâsu mù gâ le, ngò gi, nungmoq lé laiká ká é hkùn, myit myo uhkýí mó eq le, myit má yón kuq é eq le, ngaubyi ngau-nhap é eq le, ká kat bê nghut lhê. Haú gi, nungmoq lé yón kuq é hui nhâng rã matú a nghut é za, nungmoq lé ngò hkâ-í chyitdap é hkyô lé sé nhâng rã matú ru nghut lhê.

Mara Hkyut Byi Lhum Rã Hkyô

⁵ Yón kuq hkyô lhoq htoq é sù gi, yhang, nungmoq banshoq bang lé ahkyô hkyô pé má yón kuq nhang é su, ngo lé gyai wá yón kuq nhang é a nghut. Haú hkyô eq séng lui, ngò gyai wá yhang zuq zuq a tái nau é nghut lhê.

⁶ Nungmoq myo hpyâng eq yhang lé mara dam byí é hkyô gi, yhâng é matú gé bê nghut ri.

⁷ Nghut kôlhang, ahkuí, nungmoq gi, yhang a wó jan loshoq myit yón é a hui zo

rã matú, yhang lé mara hkyut pyám byi mù, nhik tíng byi keq.

⁸ Haú mù lui, nungmoq é chyitdap myit gi, yhang é ahtoq má dum lhoq gíng shit nyi keq nghù, nungmoq lé ngò wum tái tsuq kat lhê.

⁹ Ngò, nungmoq lé haú mù laiká ká byí kat é hkyô gi, nungmoq chyam wú hui é hkyô lé wó jân é hkyô eq jung hkangmó má jino gyo hkyô bò a bo é lé, wó sé rã matú le nghut lhê.

¹⁰ Nungmoq, rayuq yuq lé mara hkyut byí é nghut le gi, ngò le, haú yuq lé mara hkyut byí lhê. Mara hkyut rã rajung jung joq é nghut jáng, ngò mara hkyut é gi, Tsadán eq nga-nhúng lé a wó úng rã matú, nungmoq é yanmai, Hkrisduq é myoq hí má ngò mara hkyut byi bê nghut lhê.

¹¹ Hkâsu mù gâ le, Tsadán hen é hkyô pé lé nga-nhúng a sé é a nghut.

Dangshikaq Asik Mâ É Hpungmù Wùn Bang

¹² Ngò gi, Hkrisduq é gabú danglù hko kyo rã matú, Troa myuq má é jé é hkùn, haú Yhumsíng gi, ngo lé hkum hpóng byí é lé, ngò myang ri.

¹³ Nghut kôlhang, ngò gi, ngá é gumang Tituq lé haú má a myang ho é yanmai, myit myo mù, yhangmoq lé shi-kyâm to lui, Makedoni mau shut xoq e ló é nghut lhê.

¹⁴ Nghut kôlhang, Hkrisduq má, ngamoq lé hkâ-nhâm le úng budang hkyô shut shuít ú yù mù, Hkrisduq lé sé é sumpsé hpaqchyí é nam ngón shôm lé, ngamoq đông mai jowò hkangmó má tái pyo é sù, Garai Gasang gi, jeju hkyá-ôn é hui nyi sháng gaq.

¹⁵ Hkâsu mù gâ le, ngamoq gi, hkyi yu é hui nyi bâng chyáng le, htên byoq ló é hui nyi bâng chyáng le, Garai Gasâng é matú Hkrisduq é nam ngón shôm nghut nyi lhê.

¹⁶ Ngamoq gi, htên byoq nyi bâng é matú shí-nò hkyo é shôm dut mù, hkyi yù hui nyi bâng é matú nghut jáng, asak hkyo é nam ngón shôm dut é nghut lhê. Haú mù, ó yuq wá muzó shí eq htuk rã lú?

¹⁷ Ngamoq gi, amyat wó rã matú Garai Gasâng é mungdang lé hkat ung zô é byu myo myo su a nghut é za, Garai Gasâng chyáng mai nhang é byu pé su, Garai Gasâng é hí má, Hkrisduq é byu pé đông lhumzui myit mai tái é nghut lhê.

3

¹ Ngamoq gi, yhumsing gùng yhumsing dum owaq hí ló é nghut lhê lú? Byù ra-am kut é su, nungmoq chyáng, ngamoq é matú htuqluq htuqbáng laiká ká byi kô é ngamoq ra rã luq, nungmoq yuq ngamoq é matú ká byi ra kó rã luq?

² Nungmoq gùng yhang gi, ngamoq é myit nhikhum má ká tó é, yuq hkangmó eq ngap lui sé yu é laiká gùng pé nghut akò.

³ Nungmoq gi, nungmoq chyáng ngamoq hpungmũ wùn waq é yanmai, Hkrisduq chyáng mã é laiká nghut kô é hkyô lé shit nyi akô. Haũ gi, kã jung chí èq kã tô é đông a nghut é za, rũ dui nyi é Garai Gasâng é Woi-nyí èq kã tô é nghut é htoq agó, luqlong pé mã kã tô é đông a nghut é za, xângzo byu é myit nhiklum long pé mã kã tô é ru nghut lhê.

⁴ Haũ su nghũ hkyak wó myit lum é hkyô gi, Garai Gasâng é hí mã, Hkrisduq đông mai ngamoq wó yu é nghut lhê.

⁵ Ngamoq gi, yhumsing gung haĩ lé le wó kut lhê ngu é a nghut, ngamoq é a-tsam gi, Garai Gasâng chyáng mai lo é nghut lhê.

⁶ Yhang gi, ngamoq lé, dangshikaq asik lé wó wùn waq rã a-tsam byi bê nghut ri. Dangshikaq asik haũ gi, tarã laiká mai lo é a nghut é za, Woi-nyí mai lo é ru nghut lhê. Hkãsu mù gã le, laiká gi, shĩ dãm byi lhê, Woi-nyí kũm gi, asak byi é nghut lhê.

Dangshikaq Asik É Hpungwup Shingkaq

⁷ Ahkuĩ, haũ Mosheq é myoqdong mã é hpungwup shingkaq é yanmai, haũ Israellaq byu pé gi, yhâng é myoqdong lé a wó wũ tsuq to kô nghut ri. Hpungwup shingkaq haũ shũm lo byuq sê é nghut kôlhãng, luq-long mã dok kã tô é, shĩ-nô hkyô lhoq htoq é tarã muzó gi, hpungwup shingkaq eq rahá jé lé é nghut lhê.

⁸ Haũ su nghut jãng, haũ Woi-nyí é muzó gi, hpungwup shingkaq je riyhang dut rã a nghut kó lhu?

⁹ Gè gè yhang, haũ byũ lé mara byi é tarã muzó lhãng, hpungwup shingkaq bo é nghut le gi, dingmãn nhang é hkyô sik gi, je riyhang hpungwup shingkaq bo é nghut lhê ô!

¹⁰ Hkãsu mù gã le, hpungwup shingkaq bo é tarã muzó gi, hpungwup shingkaq je bo é dangshikaq asik eq whui é hkũn, hpungwup shingkaq a bò lo dut byuq bê nghut ri.

¹¹ Shum byuq ló é tarã lhãng gi, hpungwup shingkaq eq rahá lé jé bê nghut le gi, ru gĩng nyi é dangshikaq asik é hpungwup shingkaq gi, je riyhang gyaũ rã nghut lhê ô!

¹² Haũ mù luĩ, ngamoq gi, haũ sũ é myoqbyũ hkyô wó é yanmai, gyuq kyum myit a bo é hkyô shit é nghut lhê.

¹³ Ngamoq gi, Mosheq su a nghut. Yhang gi, duqbang é hkyô shũm byuq ló é hkũn, haũ Israellaq byu pé haũ lé a wũ tsuq rã mattũ, yhâng é myoqdong lé myoqgo éq nghop pyãm é sũ nghut ri.

¹⁴ Nghut kôlhãng, yhangmoq é myit gi, lhoq chut byi é hui bekô nghut ri; hkãsu mù

gã le, hkũ-nyí jé shoq, dangshikaq axau lé nghap é hkũn, rajung zã é myoqgô gi, ru nghop to byi ashĩ nghut ri. Haũ gi, hui sêng pyãm é a hui shi, haĩ mù gã le, Hkrisduq đông za haũ lé wó yu pyãm é nghut lhê.

¹⁵ Hkũ-nyí jé shoq lhoq, Mosheq é laiká lé nghap é hkũn, yhangmoq é myit nhiklum mã myoqgô èq nghop tô é nghut ri.

¹⁶ Nghut kôlhãng, ó yuq le, Yhumsing chyáng hkã u lhĩng lò kôlhãng, haũ hkũn jãng, myoqgô gi, hí pyãm byi é hui rã nghut lhê.

¹⁷ Yhumsing gi, haũ Woi-nyí nghut mù, Yhumsing é Woi-nyí nyi é jowô mã, luthkyô le joq lhê.

¹⁸ Haũ Yhumsing é hpungwup shingkaq lé lhoq htoq shit é bang banshoq nghut é myoqdong mã myoqgô a nghop é bang nga-nhũng gi, ru myo jat nyi é hpungwup shingkaq lhoq htoq byi hkyô nghut é, Yhâng é isãm shut htaĩ lhik wang é hui nyi bê nghut lhê. Haũ hkyô gi, haũ Woi-nyí nghut sũ Yhumsing chyáng mai lo é nghut lhê.

4

Tseyam Pé Mã Bo É Sutzè

¹ Ngamoq gi, Garai Gasâng jeju mai muzó hkyô haũ wó é nghut mù, myit wum a gyuĩ é nghut lhê.

² Ngamoq gi, zaũ tô é eq hoq htoq é hkyô pé lé tô pyãm luĩ, mhaũ zô é hkyô le a kut, Garai Gasâng é mungdang lé le ahpuq alhik a kut é bang nghut lhê. Haũ su kut rã malaĩ, ngamoq gi, haũ tengmãn hkyô lé san za lhoq htoq shit é đông, Garai Gasâng é hí mã yuq hkangmó é myit sôn sê é hkyô mã, yhumsing gũng yhumsing htuk shoq nyi lhê.

³ Ngamoq é gabũ danglũ gi, myoqgo èq nghop pyãm é hui é nghut jãng, haũ gi, htên byoq nyi bãng chyáng za nghop pyãm hui é ru nghut lhê.

⁴ Haũ Garai Gasâng é azông isãm nghut sũ, Hkrisduq é hpungwup shingkaq bo é gabũ danglũ é maubó lé, a lumjing bang a wó myãng kó shãng gaq ga, ipyat shi é garai* gi, yhangmoq é myit lé lhoq chit byi bê nghut ri.

⁵ Haũ nghut é yanmai, ngamoq gi, yhum-sing gũng eq sêng luĩ hko kyô é a nghut é za, Yesuq Hkrisduq gi, Yhumsing nghut é hkyô lé le, Yesuq é matũ, ngamoq gũng yhang gi, nungmoq é jũn pé nghut é hkyô lé le, hko kyô é ru nghut lhê!

⁶ Hkãsu mù gã le, "Mauchut hkaũ mai maubó htoq lò shãng gaq."* ga taĩ é Garai Gasang gi, Yesuq Hkrisduq é myoqdong mã é Garai Gasâng é hpungwup shingkaq é maubó lé sê gyô é nyan lé, nga-nhũng lé byi é đông, Yhâng é maubó lé, nga-nhũng é i-myt unghkaũ mã duqbó nhãng bê nghut ri.

* 4:4 Ipyat shi é garai gã é gi. Tsadãn lê gã é nghut lhê. ✪ 4:6 Apũn 1:3 † 4:7 Tseyam pé gã é gi, nga-nhũng é wum nyhôm é gungdu lê gã é nghut lhê.

⁷ Nghut kôlhang, ngamoq gi, sutzè haù bo é tseyam pé^{*} nghut nyi lhê. Haù gi, gyaù dik é a-tsam mó gi, ngamoq chyáng má é a nghut é za Garai Gasâng chyáng má é nghut é hkyô lé tân shit râ matú nghut lhê.

⁸ Ngamoq gi, wuìhke hkyo eq lnhghkyuq mai gyai yhang nhê zik é hui kôlhang, a gyop byuq é nghut lhê; myit lhoq nhùng pyâm é hui kôlhang, myit a htùm byuq é nghut lhê;

⁹ zing-rí é hui kôlhang, kâng pyâm hui é a nghut; bat lhêng pyâm é hui kôlhang, htên byoq hui é a nghut.

¹⁰ Haù Yesuq é asak dui hkyô le, ngamoq é gungdu má lhoq htoq shit é hui sháng gaq nghũ, ngamoq gi, Yesuq shi é hkyô lé, hká-nhám le, ngamoq é gungdu má wùn waq wùn é nghut lhê.

¹¹ Hkâsu mù gâ le, Yesuq é asak dui hkyô gi, nga-nhúng é shí sê é gungdu má lhoq htoq shit é hui sháng gaq nghũ, asak dui nyi é bang ngamoq gi, Yesuq é matú é yanmai, hká-nhám le, shi byuq hkyô shut ap pyâm é hui nyi ri.

¹² Haù mù luí, shi byuq hkyô gi, ngamoq má mù zuí nyi ri; asak dui hkyô kúm gi, nungmoq má mù zuí nyi é nghut ri.

¹³ "Ngò gi, lumjng bê nghut lhê, haù mù, ngò tai é nghut lhê."^{*} ga kâ tô é eq rajung za, ngamoq le, lumjng hkyô hau eq yhang, lumjng bê nghut mù tai é nghut lhê.

¹⁴ Haù mù gâ le, haù Yhumsing Yesuq lé shi é mai lhoq dui toq é Sù gi, ngamoq lé le, Yesuq eq rahá lhoq dui toq mù, nungmoq eq rahá, ngamoq lé Yhâng é hí má shui jé rá nghut é lé, ngamoq sê lhê.

¹⁵ Haù jeju wó é byu pé gi, je riyhang myô jat lò mù, Garai Gasâng é hpungwup shingkang é matú, jeju hkya-on é hkyô gi, bying mù nyi sháng gaq ga, haù pé banshoq gi, nungmoq é akyu é matú nghut nyi ri.

¹⁶ Haù mù luí, ngamoq gi, myit wum a gyuí é nghut lhê. Ngamoq é shinggan gungdu gi, htên byoq lò nyi kôlhang, i-myit unghkaù gi, ra-nyí eq ra-nyí asik dut nhang é hui nyi ri.

¹⁷ Hkâsu mù gâ le, ngamoq é tiq é eq razup zâ é wuìhke hkyô pé gi, ngamoq é matú haù pé htoq gyai hkik é ahtum abyuq é hpungwup shingkang lé, wó yù nhang ri.

¹⁸ Haù mù, nga-nhúng é myoq gi, byu-myang é lé wú tsuq nyi é a nghut é za, a byu-myang é lé sheq wú tsuq nyi é ru nghut lhê. Hkâsu mù gâ le, byu-myang é gi, razup rahtâng zâ é nghut mù, a byu-myang é kúm gi, ahtum abyuq é nghut lhê.

5

Mauhkúng Htoq Mã É Yhùm

^{*} 4:13 Hkya-on 116:10 ^{*} 5:1 Mauhkúng htoq má joq é ahtum abyuq é yhùm gâ é gi, nga-nhúng, mauhkúng mingdán má jé é hkùn wó rá gungdu asik lé gâ é nghut lhê.

¹ Haù myidàm zúm nghut é nga-nhúng lúng nyi é gungdu gi, htên byoq sê é nghut kôlhang, byu loq eq sai é a nghut é za, mauhkúng htoq má joq é ahtum abyuq é yhùm^{*} nghut é, Garai Gasâng chyáng má é yhùm lé, nga-nhúng wó é hkyô lé, nga-nhúng sê lhê.

² Nghut kôlhang, ahkuí, nga-nhúng gi, nga-nhúng é mauhkúng yhùm lé tù hut byí é lé gyai yhang hui naù mù, nò-kying su kyíng nyi lhê.

³ Haù mù gâ le, nga-nhúng gi, hut byí é hui jáng, gungdu a bò bang a dut lo rá nghut lhê.

⁴ Hkâsu mù gâ le, nga-nhúng gi, zúm shí má lúng nyi é u lé, wòlai wùn mù, nò-kying su kyíng nyi lhê; haù gi, shí byuq sê é lé, asak dui é eq wó htaí lhik pyâm sháng gaq nghũ, nga-nhúng gi, a hut byí é hui rá le a ô nau é za, nga-nhúng é mauhkúng yhùm lé tù hut byí é hui rá lé ô nau é yanmai nghut lhê.

⁵ Ahkuí kúm, jeju haù hkam yù rá matú, nga-nhúng lé lajàng to byí é sù gi, Garai Gasang nghut mù, jé lò rá hkyô gi, hkyak joq lhê nghũ é masat zè đông, nga-nhúng lé haù Woi-nyí byi bê nghut ri.

⁶ Haù mù luí, ngamoq gi, hká-nhám le hkyak lum tô lhê. Gungdu shí má yhùm đông ru lúng nyi nyi gi, haù Yhumsing eq wê gâng nyi ashí nghut é lé ngamoq sê nyi lhê.

⁷ Ngamoq gi, byu-myang é đông mai a nghut é za, lumjng myit mai asak dui é ru nghut lhê.

⁸ Ngamoq gi, hkyak myit lum tô lhê nghũ, ngò tai lhê, haù mù, gungdu shí mai wê gang lui, haù Yhumsing eq rahá nyi rá lé ngamoq je riyhang ô nau é nghut lhê.

⁹ Haù mù, ngamoq gi, gungdu shí má yhùm đông lúng nyi é nghut nghut, haù mai wê gâng é nghut nghut, ngamoq myit myoqbyu tô é jowò gi, Yhang lé gabú nhang rá matú nghut lhê.

¹⁰ Hkâsu mù gâ le, yuq hkangmó gi, gungdu shí má yhùm đông lúng nyi é u lé, ge é nghut nghut, a ge é nghut nghut, kut é eq rajung za hkam yù rá matú, Hkrisduq é tará jéyáng tanghkuq hí má, nga-nhúng banshoq bang htoq shit ra rá nghut lhê.

Nguingón Hkyô Xoq É Muzó

¹¹ Haù mù, Yhumsing lé gyuq hkungga rá hkyô hai nghut é lé ngamoq sê é nghut lui, ngamoq gi, byu pé lé tai pùn kyíng shikut lhê. Ngamoq hai nghut é gi, Garai Gasâng chyáng san za nghut nyi mù, nungmoq é myit sôn sê é hkyô má le san za nghut rá lé, ngò myit lum lhê.

¹² Haù myit nhikhlum má bo é lé gumrông rá malaí, byu-myang é lé gumrông é bang lé,

nungmoq wó tú tái kó sháng gaq nghũ, ngamoq gi, nungmoq chyáng yhumsing gùng lé dum owaq shikut é a nghut é za, ngamoq é hkyô lé, nungmoq wó gumrông rá ahkáng, nungmoq lé byi é ru nghut lhê.

¹³ Ngamoq a gyíng é dông nghut le gi, Garai Gasâng é matú a gyíng é nghut lhê; ngamoq gyíng é dông nghut le gi, nungmoq é matú gyíng é nghut lhê.

¹⁴ Hkâsu mù gâ le, Hkrisduq é chytidap myit éq ngamoq lé kut nhang nyi é nghut lhê. Haú gi, banshoq bâng é matú rayuq shi hkám byi bê nghut mù, banshoq bang shi é dông nghut bê nghũ, ngamoq hkyak sê gyô é yanmai nghut lhê.

¹⁵ Yhang gi, asak dui nyi é bang, yhangmoq yhumsing gung é matú a dui lô é za, yhangmoq é matú shi hkám byi lui, lhoq dui toq é hui Su é matú dui kó sháng gaq ga, banshoq bâng é matú shi hkám byi bê nghut ri.

¹⁶ Haú mù, ngamoq gi, ahkuí mai, ó yuq eq séng lui le, mingkan hkyam dông mai a wú lô é nghut lhê. Ngamoq gi, hí hkũn Hkrisduq lé haú dông wú é nghut kôlháng, haú su hkânhám le a kut lô é nghut lhê.

¹⁷ Haú nghut mù lui, rayuq yuq gi, Hkrisduq má nghut nyi é nghut jáng, yhang gi, asik hpân hui sũ dut bê nghut ri; haú axau gi, byuq byuq mù, lhunglháng asik dut bunnhung!

¹⁸ Haú pé banshoq gi, Garai Gasâng chyáng mã é chyat nghut lhê. Yhang gi, Hkrisduq dông mai nga-nhung lé Yhânggùng eq nguínón hkyô xoq yú lui, nguínón hkyô xoq é muzó ngamoq lé byi bê nghut ri.

¹⁹ Haú gi, Garai Gasang gi, byu pé é mara lé a matsing byi é za, Hkrisduq dông mingkan lé Yhânggùng eq nguínón hkyô xoq yú bê nghut lui, Yhang gi, nguínón hkyô xoq yu é mungdang haú lé, ngamoq lé ap byi to bê nghũ nau é nghut lhê.

²⁰ Haú mù lui, ngamoq gi, Hkrisduq é gunglik pé nghut lhê mù, Garai Gasang gi, ngamoq dông mai nungmoq lé lhoq pũn kyíng nyi é nghut lhê. Garai Gasang eq nguínón hkyô xoq yú keq nghũ, ngamoq gi, Hkrisduq é gunglik dông nungmoq lé dũng tóngbân nyi lhê.

²¹ Nga-nhung gi, Hkrisduq dông mai Garai Gasâng é dũngmán bang wó dut kó sháng gaq ga, Garai Gasang gi, yubak mara a bò Sũ lé, nga-nhung é matú yubak mara hkungga dut nhâng bê nghut ri.

6

¹ Ngamoq gi, Garai Gasâng é mũ zui byinzùm wui nghut nyi é eq rajung za, Garai Gasâng jeju lé akyú a bo é dông hkâhap yú kó nghũ, nungmoq lé wum tái tsuq kat lhê.

² Hkâsu mù gâ le,

"Ngò ô nau é ahkyíng má, nang lé ngò gyo byi bê nghut mù, hkyi yú hui rá buinyi má, nang lé ngò garúm bê nghut lhê."^{*}

ga lui, Yhang tái ri. Ngò, nungmoq lé tái kyo kólé, ahkuí gi, Garai Gasang ô nau é ahkyíng, ahkuí gi, hkyi yu é buinyi nghut ri.

Poluq É Wuíhke Hkyô Pé

³ Ngamoq é hpungmũ gi, tái hpoi pyâm é a hui sháng gaq nghũ, ngamoq gi, ó yuq é hkyô má le, leqbat jung a to byi é nghut lhê.

⁴ Haú kut rá malai, ngamoq gi, Garai Gasâng é dui-nhâng zoshâng wui nghut é hkyô lé, hkyô hkangmó má yhumsing gùng yhumsing shit nyi lhê. Gyai hkam jân é hkyô má le, jamjau hkyô pé má le, wuihke hkyô pé má le, myit myo uhkyi hkyô pé má le shit nyi lhê.

⁵ Nhuq bat hui é pé má le, htóng lhúng hui é eq toq gabyông é má htim é hui é má le, mũ zui shikut é má le, a myang yhup é myín pé má le, zòmút hui é má le, shit nyi lhê.

⁶ Sân-yúng é má le, sê gyô é hkyô má le, myit hing é eq myit ge é má le, Chyoiyúng Woi-nyi eq chytidap myit akying má le,

⁷ tengmán é mungdang hko é má le, Garai Gasâng é a-tsam má le, loqyô loqpai má dũngmán hkyô nghũ é laknak pé dông le, shit nyi lhê.

⁸ Hpungwup shingkang byi é hui kô é dông eq a hkunggâ é hui kô é dông nghut kôle, a ge é luhkyang eq ge é luhkyang tái kôle, shit nyi lhê. Ngamoq gi, tengmán kôlháng, mhaú zo bang dông sôn yu akó nghut ri.

⁹ Ngamoq lé sé kôlháng, a sê é dông kut akó nghut ri; shi lô nyi kôlháng, rú dui nyi é bang nghut lhê; nhuq bat é hui kôlháng, sat pyâm é a hui shi é bang nghut lhê.

¹⁰ Yón hkyô byíng nhâng kôlháng, hkânhám le gabú nyi lhê; myúng kôlháng, byú myo myo lé wó sùt nhang nyi lhê; haú le a wó kôlháng, jung hkangmó lé sít é dông nghut lhê.

¹¹ Korinhtuq bang ê, ngamoq gi, nungmoq lé san za tái bê nghut lui, ngamoq é myit nhikhlum lé, nungmoq é matú làm shoq hpông to byi bê nghut lhê.

¹² Ngamoq gi, ngamoq é chytidap myit lé, nungmoq chyáng mai lãng taú yu nyi é a nghut, nungmoq sheq, ngamoq chyáng mai lãng taú yu nyi kô é ru nghut lhê.

¹³ Nungmoq le, myit nhikhlum lé làm shoq dum taú hpóng keq nghũ, ngò gi, ngá zô pé dũng tái lhê.

A Lumjítng Bang Eq A Nhungkut Râ Hkyô

¹⁴ A lumjítng bang eq rahá kandang hkâwaq kó. Hkâsu mù gâ le, dũngmán é hkyô eq agê ashop é hkyô gi, haú séng lhum lhê

* 6:2 Esai 49:8

lhú? Maubó eq mauchut gi, hkâsu wó zùm yap kó rá lhú?

¹⁵ Hkrisduq eq Beliala* gi, hkâsu kut myit wó huí lhum kó rá lhú? Lumjǐng sǔ rayuq eq a lumjǐng sǔ gi, hkâsu wó pung lhum kó rá lhú?

¹⁶ Garai Gasâng é noqkuq yhúm eq hparà lhô pé gi, hkâsu wó húm rá lhú? Hkâsu mù gà le, nga-nhúng gi, rǔ dui nyi é Garai Gasâng é noqkuq yhúm nghut lhê. Haù gi, "Ngò gi, yhangmoq eq rahá nyi mù, yhangmoq chyáng sô nyi rá nghut luí, Ngò gi, yhangmoq é Garai Gasang dut mù, yhangmoq gi, Ngá é byu pé dut kó rá nghut lhê."^o ga Garai Gasang tái tó é eq rajung za nghut ri.

¹⁷ "Haù mù luí, yhangmoq chyáng mai htoq lô mù, gotú san za nyi keq. A sansêng é zè lé hkázáng kó, haù hkún, Ngò, nungmoq lé lhom hap yù rá nghut lhê."^o

ga haù Yhumsing tái ri.

¹⁸ "Ngò gi, nungmoq é Íwa dut mù, nungmoq gi, Ngá é byizo yuqzò pé dut kó rá nghut lhê."^o

ga haù wum-o a-tsam dik shoq bò Sù Yhumsing tái ri.

7

¹ Chyitdap é luzúm wui ê, nga-nhúng gi, danggidiq haù pé lé wó tó é bang nghut é yanmai, gungdu eq woi-nyi lé agot a-ũ dut nhang é jung hkangmó mai, yhumsing gùng yhumsing lhoq sân-yúng yù luí, Garai Gasang lé gyuq hkunggá é myit èq chyoiyúng hkyô má lhoq gumjup yu nyi sháng.

Poluq É Gabú Hkyô

² Nungmoq é i-myt unghkaù má ngamoq lé jowó byi keq. Ngamoq gi, ó yuq lé le a shut wú, ó yuq lé le a lhoq htên wú, ó yuq lé le a mhaù zô wú é nghut lhê.

³ Ngò gi, nungmoq lé mara byi rá matú haù su tái é a nghut. Ngamoq gi, asak dui kôle, shí kôle, nungmoq eq rahá wó dut shoq, nungmoq gi, ngamoq é i-myt unghkaù má lúng nyi é nghut lhê nghú, hí hkún ngò tái wú bê nghut lhê.

⁴ Ngò gi, nungmoq lé, hkyak yhang myit lum to bê nghut lhê. Ngò gi, nungmoq é yanmai gyai yhang gumrong nyi lhê. Ngò gi, myit wum byi é gyai yhang huí ri; jamjau hkyô pé myo myo ngamoq hui kôhang, ngò, gyai yhang gabú nyi lhê.

⁵ Hkâsu mù gà le, ngamoq gi, Makedoni mau má jé é hkún, ngamoq é gungdu gi, zim za a myang nyi é htoq agó, hkyô hkangmó má ngamoq wuihke jamjau hui zô é nghut lhê. Shinggan má gi, mabyoq htoq, ahkaù má gi, gyuq kyum nyi é nghut lhê.

⁶ Nghut kôhang, nhik ngê bang lé nhik tǐng é Garai Gasang gi, Tituq lé jé lé nhang é dǒng mai, ngamoq lé nhik tǐng byi bê nghut ri.

⁷ Yhang jé lé é dǒng mai za a nghut, yhang lé nungmoq nhik tǐng byi é hkyô dǒng mai le nghut lhê. Ngá é gabú hkyô gi, gó nám lhê htoq má je myo sháng gaq ga, yhang gi, nungmoq ngo lé myit tuí nyi é hkyô, nungmoq gyai yhang shut bǔn é hkyô, ngá é matú nungmoq gyai myit chiq byi é hkyô pé lé, ngamoq lé tái kyo bê nghut ri.

⁸ Ngá é laiká èq, nungmoq lé yón nhang é nghut kôle, ngò gi, nungngam wó é a nghut. Sǎng-hi le, ngò nungngam wó é nghut kôhang, ngá é laiká gi, nungmoq lé rayoq zo za lhoq yón nhang é lé, ngò sê lhê.

⁹ Nghut kôhang, ngò gi, ahkuí gabú lhê; haù gi, nungmoq lé yón hui nhang é yanmai a nghut é za, nungmoq é yón hkyo èq, nungmoq lé myit lǐng nhang é yanmai ru nghut lhê. Nungmoq gi, Garai Gasang ô nau é dǒng yón hui é bang dut bekô nghut mù, nungmoq lé, ngamoq èq hai akyù le a lhoq yóm byi é nghut lhê.

¹⁰ Hkâsu mù gà le, Garai o é dǒng yón kuq hui é hkyô gi, nungngam wó hkyô a bo é za, hkyi yù hkyô wó shoq, myit lǐng nhang é nghut ri. Nghut kôhang, mingkǎn é yón kuq hkyô gi, shi é hkyô lhoq htoq é nghut ri.

¹¹ Garai o é dǒng, nungmoq chyáng akyù lhoq htoq byi é yón kuq hkyô lé wú wú keq! Haù gi, gyai yhang myit zuq é hkyô, yhumsing gùng mara a bo é lé tún shit rá lé myit ngui é hkyô, nhikmo-yo é hkyô, gyuq dan é hkyô, myit ô nau nyi é hkyô, myit chiq byi é hkyô, tengmán hkyô kut rá ri ri nghut é hkyô pé nghut lhê. Nungmoq gi, haù hkyô má mara a bo é lé hkat hkangmó má saksé tún shit bekô nghut ri.

¹² Haù mù luí, ngò, nungmoq lé kǎ kat é nghut kôhang, kut shut su é yanmai le a nghut, kut shut é hui zo su é yanmai le a nghut é za, ngamoq lé nungmoq hká-í ap nǒng byi é hkyô lé, Garai Gasâng hí má nungmoq gùng nungmoq wó myǎng rá matú kǎ kat é sheq ru nghut lhê.

¹³ Haù pé banshoq dǒng mai, ngamoq gi, myit wum byi é huí ri.

Ngamoq myit wum byi huí é htoq agó, Tituq hká-í yhang gabú é lé myàng mù, ngamoq gi, je riyhang myit gabú é nghut lhê. Haù mù yhang gabú é gǎ lé, nungmoq banshoq bǎng èq yhǎng é myit lé lhoq nguǐngón byi kô é yanmai nghut ri.

¹⁴ Ngò gi, nungmoq eq sêng é hkyô, yhang lé gumrong kyô é nghut kôle, nungmoq é yanmai hoq a hpú é nghut lhê. Nungmoq lé ngamoq tái é lunggháng gi, têng é eq rajung

* 6:15 Beliala gà é gi. Tsadán é myǐng rajá nghut lhê. ✧ 6:16 Nhung 26:12; Yer 32:38; Ezk 37:27 ✧ 6:17 Esai 52:11; Ezk 20:34,41 ✧ 6:18 2 Sam 7:14

za, Tituq hí má, nungmoq é hkyô lé ngamoq gumrong é le têng lhê.

¹⁵ Nungmoq banshoq bang jino gyo kômù, gyuq nân é myit mai yang lé lhom hap yù kô é lé, yang myitbùn é hkùn, yang nungmoq lé chyitdap é myit gi, je riyhang kô dik nyi ri.

¹⁶ Ngò gi, nungmoq lé banshoq wó lum to bê lé sê é yanmai, gabú nyi lhê.

8

Byi É Hkyô

¹ Gumang wui è, ahkuí, ngamoq gi, Make-doni mau má é noqkuq hpúng pé lé Garai Gasang byi é jeju eq sêng é hkyô, nungmoq lé sê nhâng nau ri.

² Yangmoq gi, wuihke jamjau hkyô myo myô eq chyam lik é huí é nghut kôlhang, yangmoq é a ung tai loshoq gabú é hkyô eq yangmoq é gyai yang myung é hkyô gi, agùn agó byi nau é myit bò nhang ri.

³ Hkâsu mù gâ le, yangmoq gi, yangmoq wó dut é myhó byi kô é htoq agó, yangmoq é a-tsam lai shoq lhâng byi kô é hkyô lé, ngò saksé hkám lhê. Yangmoq gi, yangmoq é myit hkaú mai yang haú su kut kô é nghut ri.

⁴ Yangmoq gi, haú sâ-n-yúng bang lé wó bo dojaú râ matú, ngamoq lé gyai yang ahkáng dung kô é nghut ri.

⁵ Yangmoq gi, ngamoq myit ngam tô é htoq má lhâng lai shoq, Garai Gasang ô nau é hkyô lé châng é dông, yangmoq gùng lé hí haú Yhumsing lé ap byi pyám kômù, hau htáng sheq ngamoq lé ap kô é nghut ri.

⁶ Haú mù luí, Tituq yang hí kut hi nyi bê nghut é yanmai, ngamoq gi, jeju haú lé nungmoq chyáng le shuí lhoq bying jup byi ri râ matú, yang lé wum byi bê nghut lhê.

⁷ Nungmoq gi, lumjing myit má, dang nyo é hkyô má le, sumsé hpaqchyí hkyô má le, myit zuq hkyô banshoq eq ngamoq lé nungmoq chyitdap é hkyô má le, jung hkangmó má agùn agó dut bekô eq rajung za, nungmoq gi, byi nau é jeju shí má le agùn agó dut râ lé, bún nyi keq.

⁸ Ngò gi, nungmoq lé hkunmó hkyô é a nghut, nghut kôlhang, góbang é myit zuq é hkyô eq whuí wú é dông, nungmoq é chyitdap myit jet é hkyô lé chyam wú naú luí sheq ru nghut lhê.

⁹ Hkâsu mù gâ le, nungmoq gi, nga-nhùng é Yhumsing Yesuq Hkrisduq é jeju lé sê akò nghut ri. Yang gi, Yhâng é myùng hkyô dông mai nungmoq wó bang dut kô sháng gaq ga, jung hkangmó wó sù nghut kôlhang, nungmoq é matú é yanmai, myùng sù dut bê nghut ri.

¹⁰ Shí hkyô eq sêng é má, nungmoq é matú ge dik é hkyô ngò hpaqchyí byi kôlé: A-nhik,

nungmoq gi, sâng-hi, byi hí kô é za a nghut, haú su kut nau é myit bo é bang le nghut akò.

¹¹ Nungmoq wó dut é eq rajung za, haú lé lhoq pân é dông nungmoq é gyai yang kâm kut é myit lé wó lhoq dik kô sháng gaq, ahkuí, muzò haú lhoq pân keq.

¹² Hkâsu mù gâ le, byi nau é myit bo é nghut jáng, chyunghuq haú gi, yang a wó é má cháng luí a nghut é za, yang wó é má cháng luí, hap yù gíng é nghut lhê.

¹³ Nungmoq é matú gi, wòlai dut, góbang gi, hkyamsâ nyi râ lé, ngamoq ô nau é a nghut, rawuí za wó dut kô râ lé sheq ô nau é ru nghut lhê.

¹⁴ Nungmoq haú râ tô é lé, yangmoq agùn agó wó é má é wó dum taú htuqbang byi kô sháng gaq, ahkuí lhê é ahkying má, yangmoq haú râ tô é lé, nungmoq agùn agó wó é má é htuqbang byi keq. Haú jáng sheq, wuí wuí za wó dut kô râ nghut lhê.

¹⁵ Haú gi, "Myo myo tsing yu é sù gi, lùm myo shoq wó é a nghut, shau za tsing yu é sù gi, lùm shau shoq wó é a nghut."* ga kâ tô é eq rajung za nghut ri.

Tituq Lé Korinhtuq Myuq Shut Nhang Kat É Hkyô

¹⁶ Nungmoq é matú ngò myit chiq byi é eq rajung zâ é myit lé, Tituq é i-myt má kat nyi é Garai Gasang lé, ngò jeju hkya-ôn lhê.

¹⁷ Hkâsu mù gâ le, Tituq gi, ngamoq dúng tôngbán é lé za lhom hap yu é a nghut, gyai yang myit toq mù, yhângyung yang myit hpyit yù luí, nungmoq chyáng lé lô gù za nghut ri.

¹⁸ Ngamoq gi, haú gabú danglù lé dojaú é má noqkuq hpúng pé banshoq eq hkya-on huí é gumang hpó haú lé le, yang eq rahá nhang kat lhê.

¹⁹ Hau htoq agó, ngamoq garúm râ myit bo nyi é hkyô lé tún shit mù, haú Yhumsing lé hkungga râ matú ngamoq wú gôn nyi hkyô nghut é, alu lé ngamoq yu chung é hkùn, ngamoq é byinzum kut râ matú, noqkuq hpúng pé eq hkyin yu é sù le yang nghut lhê.

²⁰ Ngamoq gi, myit lòm luí byi é chyunghuq shí lé ngamoq wú gôn nyi é hkyô má, ó yuq é le mara hô râ hkyô a htoq shoq sidiq nyi lhê.

²¹ Hkâsu mù gâ le, jô é hkyô kut râ matú ngamoq shikut nyi é gi, haú Yhumsing é myoq hí má za a nghut, byu pé é myoq hí má le nghut lhê.

²² Hau htoq agó, ngamoq gi, hkyô myo myo má shirong é myit bo é hkyô le anum num ngamoq chyáng saksé shit é sù, ngamoq é gotú gumang hpó lé le yangnhik eq rahá nhang kat lhê. Yang gi, ahkuí lhâng, nungmoq lé gyai yang myit lum tô é yanmai, shirông myit je riyhang bo nyi ri.

²³ Tituq é hkyô ga jáng, yhang gi, ngá é zùm yap luzúm eq ngò eq rahá nungmoq chyáng mù zui sù nghut ri. Nga-nhùng é gumâng nhik é hkyô ga jáng, yhangnhik gi, noqkuq hpùng pé é gunglik eq Hkrisduq é aróng nghut akò.

²⁴ Haù mù luí, haù noqkuq hpùng pé wó myâng kó sháng gaq, nungmoq má ngamoq haí mù gumrong é hkyô eq nungmoq é chyitdap myit é saksé lé, haù bang lé tún shit keq.

9

¹ Ngò gi, haù sãn-yúng bang lé htuqbang rá hkyô eq séng luí, nungmoq lé ká kat rá a ra nghut ri.

² Hkâsu mù gâ le, nungmoq gyai garúm nau é myit lé ngò sè lhê, haù mù, ngò gi, Makedoni mau bang lé, haù hkyô eq séng luí gumrong kyo mù, a-nhik mai yhang, Ahkaia mau má nungmoq byi rá rì ri nghut bê hkyô lé, yhangmoq lé tai kat é nghut lhê. Nungmoq é gyai yhang myit toq é hkyô gi, yhangmoq myo hpyang lé, htuqbang nau é myit nhaù toq byi bê nghut ri.

³ Nghut kôlhang, shí hkyô má nungmoq eq séng luí ngamoq gumrong é gi, hká dòng le dangsòm a dut byuq sháng gaq, ngò tai bê eq rajung za nungmoq rì ri wó hen to rá matú, ngò gi, gumang wui lé nhang kat é nghut lhê.

⁴ Hkâsu mù gâ le, Makedoni mau bang gi, ngò eq rahá lé mù, nungmoq rì ri a hen tô é lé, lé myang ang kô é nghut jáng, nungmoq za hoq hpu rá a nghut, ngamoq le, nungmoq lé lúm yhang lum pyâm é yanmai, hoq bo hpu rá nghut lhê.

⁵ Haù mù luí, nungmoq danggidiq byi to bê nghut é, chyunghuq lé rago wó lajâng pân to rá matú, gumang wui lé wum tai tsuq mù, nungmoq lé hí, lé kum nhâng rá gi, ra yhang rá lhê nghù ngò wó myit ri. Haù hkùn sheq, a nau é dòng byi é a nghut é za, byi nau é chyunghuq dòng hen tô é dut rá nghut lhê.

Agùn Agó Byi É Hkyô

⁶ Shau za sãn hkyô sù gi, shau za shù yù rá nghut mù, agùn agó sãn hkyô sù gi, agùn agó shù yù rá nghut lhê gâ é dang lé, myitbùn nyi keq.

⁷ Yuq hkanmó gi, a kâm byi é eq byi nhang é dòng a nghut é za, yhumsing myit má byi nau é myhó lé myit hpyit yù mù byi é dòng dut rá lhê. Hkâsu mù gâ le, Garai Gasang gi, gabú myit eq byi sù lé chyitdap ri.

⁸ Haù mù, ahkyíng hkanmó jung hkanmó má, nungmoq rá é banshoq wó mù, ge é muzó hkanmó lé nungmoq je myo wó kut kó sháng gaq ga, Garai Gasang gi, jeju lhunglhang lé, nungmoq lé wó byi é sù nghut lhê.

⁹ Haù gi,

"Yhang gi, a ha bún é za myùng bang lé yhâng é chyunghuq tsing gam byi bê nghut ri; Yhâng é dingmán hkyô gi, ahtum abyuq gíng nyi ri."⁹

ga ká to eq rajung za nghut ri.

¹⁰ Kyô hkyô sù lé kyôshi, zoshuq matú muk byi é Sù gi, nungmoq lé kyôshi byi mù, lhoq myó jat byi rá eq, nungmoq é dingmán hkyô é ashi lé myó lò nhâng rá nghut lhê.

¹¹ Nungmoq gi, ayoq abun hkanmó má agùn agó byi é bang wó dut kó rá matú, hkyô hkanmó má sùt wó é bang dut é hui kó rá nghut lhê. Nungmoq agùn agó byi é hkyô lé, ngamoq lhai byi mù, Garai Gasang lé jeju hkya-ôn é hkyô dut rá nghut lhê.

¹² Nungmoq dojaú é hkyô shí gi, Garai Gasâng é byu pé rá é hkyô lé lajang byi é za a nghut, Garai Gasang lé jeju bún é dang byíng mui nyi nhang é le nghut lhê.

¹³ Dojaú hkyô hau é yanmai, nungmoq lhumzui hkyô saksé tún shit bekò nghut mù, byu pé gi, Hkrisduq é gabú danglù lé nungmoq yin yù luí jìno gyo kô é yanmai le, yhangmoq eq yuq hkanmó lé, nungmoq é a ha bún é myit mai shuí gam chùng kô é yanmai le, Garai Gasang lé hkya-on kó rá nghut lhê.

¹⁴ Hau htoq agó, Garai Gasang gi, nungmoq lé jeju lai shoq byi tô é yanmai nungmoq é matú yhangmoq kyúdung byi é u má, yhangmoq é myit nhikhum gi, nungmoq chyáng htoq jé rá nghut lhê.

¹⁵ A ung htoq tai é Garai Gasâng é chyunghuq é yanmai, jeju hkya-on hkyô gi, Yhâng chyáng ru nghut nyi sháng gaq ó!

10

Poluq, Yhâng É Hpungmú Lé Tai Hung É Hkyô

¹ Nungmoq eq myoqdong hkyùm nghut é hkùn gi, gyuq kyùm myit bo ri ga, wé gâng é hkùn gi, a gyuq a wam dut ri ga kô é sù, ngò Poluq gi, Hkrisduq é nùm é hkyô eq nú-nhâm é hkyô dòng mai, nungmoq lé pying kat lhê.

² Shí mingkân é nyi yap a-tsang dòng ngamoq asak dui ri ga myit ngam é byù ra-am lé, ngò a gyuq a wam é myit lé shit rá dá tô lhê. Ngò jé lé é hkùn, nungmoq lé haù sù é myit a shit ra sháng gaq, ngò nungmoq lé dúng tóngbán kat lhê.

³ Hkâsu mù gâ le, nungmoq gi, mingkan shí má asak dui nyi kôlhang mingkan byu pé kut é dòng majan zân é a nghut.

⁴ Ngamoq majan zân é laknak gi, mingkan shi é laknak a nghut é za, shut shai é dòng dang-rháng hkyô nghut é, gíngtíng é gyedap pé lé lhoq htên pyâm rá matú Garai é a-tsam byíng é laknak ru nghut lhê.

⁵ Ngamoq gi, dang-rháng rhâng lhum é hkyô pé eq Garai Gasang lé sê é hkyô lé shut shaí shoq yhumsing gùng yhumsing lhoq myhang mhaú é hkyô hkangmó lé lhoq htên pyám mù, Hkrisduq é jino gyo rá matú, myit sôn é hkyô hkat hkangmó lé shúm kut yu é nghut lhê.

⁶ Nungmoq é jino gyo hkyô gi, gumjup é hkûn, jino a gyô é hkyô hkangmó lé ngamoq dam byi rá rì rì dut rá nghut lhê.

⁷ Nungmoq gi, ahtoq pyám lé za wú nyi é bang nghut akó. Rayuq yuq gi, Hkrisduq eq sêng é sú hkyak nghut lhê ga myit lum tô é nghut jáng, ngamoq le, yhang eq rajung za, Hkrisduq eq sêng é bang nghut é lé, yhang dum bún sê nyi sháng gaq.

⁸ Hkâsu mù gà le, nungmoq lé láng hkyô rá nó gi, nungmoq lé kô myhâng nhâng rá matú, ngamoq lé haú Yhumsing byí é ahko ahkáng lé gyai gumrong le lháng, ngò gi, hoq hpú é hui rá a nghut.

⁹ Ngò gi, ngá é laiká pê èq nungmoq lé kyo é su a dut nhâng nau é nghut lhê.

¹⁰ Hkâsu mù gà le, ra-am gi, "Yhâng é laiká pé gi, gàng bo é eq wum-o bo é nghut ri; nghut kôlháng, yhânggùng gi, byuwup a bo é nghut mù, yhang taí é dang pé gi, haí a nghut." ga taí akó.

¹¹ Ngamoq gi, wê gâng é hkûn, ngamoq é laiká pé má bo é eq rajung za nghut é hkyô eq, rahá nghut nyi é hkûn, ngamoq zui saí rá nghut é hkyô lé, haú sú é bang sê gyo rá dut lhê.

¹² Ngamoq gi, haú yhumsing gùng yhumsing owaq é bâng é hpúng má bo lom é hkyô nghut nghut, yhangmoq eq whuí é hkyô nghut nghut, a wám kut é nghut lhê. Yhangmoq gi, yhangmoq gùng yhangmoq chin lhum wú é eq yhangmoq gùng yhangmoq whuí lhum wú kô é hkûn, hpaqchyí a bo é bang dut bekô nghut ri.

¹³ Nghut kôlháng, ngamoq gi, âng é mai lai shoq gumrông rá a nghut é za, ngamoq lé Garai Gasang masat to byí é, nungmoq chyáng lháng hkyit jé shoq nghut é maukyo hkaú má za gumrông rá nghut lhê.

¹⁴ Ngamoq gi, nungmoq chyáng a jé lé wú é dòng mai, gyai yhang gumrong nyi rá a nghut; hkâsu mù gà le, ngamoq gi, Hkrisduq é gabú danglù chúng mù, nungmoq chyáng lháng lé jé bê nghut lhê.

¹⁵ Dum, ngamoq gi, góbang kut é muzó lé le, âng é mai lai lui gumrong lhái é a nghut. Ngamoq myoqbyu é hkyô gi, nungmoq é lumjúng myit kô myhang jat nyi jáng sheq, nungmoq chyáng ngamoq zui saí é jowò gyai wó lhoq lám rá nghut lhê.

¹⁶ Haú gi, nungmoq é mau lháng lai shoq, gabú danglù lé ngamoq wó hko kyo rá matú nghut lhê. Hkâsu mù gà le, ngamoq gi, góyuq

èq zui saí to bê loqzò eq séng lui, gumrông nau é a nghut.

¹⁷ Nghut kôlháng, "Gumrong é sú gi, haú Yhumsing má gumrông sháng gaq."* ga kô tô ri.

¹⁸ Hkâsu mù gà le, yhumsing gùng yhumsing owaq é sú gi, hap yù hui é a nghut é za, haú Yhumsing èq owaq byí é sú sheq, hap yù hui é ru nghut lhê.

11

Lagyô Apyoq Pé Eq Poluq

¹ Ngò gi, ngá é ratsui ngok é dang lé, nungmoq jân pyám byi rá lé myoqbyu é nghut lhê; gè gè yhang, nungmoq gi, haú su kut nyí gù nghut bekô.

² Hai mù gà le, ngò gi, Garai Gasang mai nungmoq lé magum é myit èq, nungmoq é matú magum byí lhê. Ngò gi, nungmoq lé, sân-yúng é zomyi gyíng lé su, Hkrisduq chyáng wó shit sháng gaq nghú, Hkrisduq nghut é yhumsing hpô chyáng za nungmoq lé byi zo rá nghú, danggidíq byí to bê nghut lhê.

³ Nghut kôlháng, Ewaq gi, lhangmui hpaqchyí dâ é èq mhaú zô é hui é su, nungmoq myit é hkyô pé gi, Hkrisduq chyáng nungmoq é lhumzui é eq sansêng é i-myt ap nóng é hkyô mai shuí ngoq ló byuq é hui rá lé, ngò myit chiq ri.

⁴ Hkâsu mù gà le, rayuq yuq gi, nungmoq chyáng lé jé mù, ngamoq hko kyô é Yesuq é hkyô eq shai é dòng hko kyô é nghut nghut, nungmoq hap yu to bê Woi-nyí eq a pung é woi-nyí lé nungmoq hap yu é nghut nghut, nungmoq lhom yu to bê gabú danglù eq a pung é danglù lé lhom yu é nghut nghut, nungmoq gi, haú lé lui lui za lhom hap yu é dut bekô nghut ri.

⁵ Nghut kôlháng, ngò gi, "Ahkyak-lagyô pé" ga bâng é htoq má ratsui lháng gyamgyi gyó sú a nghut nghú myit ngam é nghut lhê.

⁶ Ngò gi, dang taí hpaqchyí kung sú rayuq a nghut kôlháng, sumpsé hpaqchyí bò sú nghut lhê. Ngamoq gi, hkyô hkangmó má, nungmoq lé haú hkyô hkyáng shoq sé nhâng bê nghut lhê.

⁷ Ngò, nungmoq lé, Garai Gasang é gabú danglù lé ahpau a yu é za hko kyô é dòng, nungmoq lé waq toq rá matú, ngá gùng ngò lhoq nyhum é gi, ngá é mara dut byuq bé lhu?

⁸ Ngò, nungmoq lé dojaú rá matú, gotú noqkuq hpúng pé mai htuqbàng é lé hap yu é gi, haú bâng chyáng mai ngò zik lú yu é dòng dut bê nghut lhê.

⁹ Ngò gi, nungmoq eq rahá nyi mù, rajung jung rá é hkûn, ó yuq lé le wòlai a dut nhâng é nghut lhê; hkâsu mù gà le, Makedoni mau mai lé jé é gumang wui gi, ngò haí rá é lé

htuqbang byi kô é yanmai nghut lhê. Hkâ dông nghut kôlhang, ngò gi, ngá gùng lé, nungmoq é matú wôlai a dut nhâng shoq kut bê nghut mù, xoq lui le haú dông kut nyi rá nghut lhê.

¹⁰ Haú Hkrisduq é tengmán hkyô gi, ngò má hkyak yhang bo é nghut lhê mù, Ahkaia mau má é bang ó yuq lhang, ngò haú su gumrong é hkyô lé wô hkâm zing rá a nghut.

¹¹ Haí mù lhu? Ngò, nungmoq lé a chyitdap é yanmai nghut lhê lhu? Ngò, nungmoq lé chyitdap é hkyô lé, Garai Gasang sê lhê.

¹² Ngò gi, yhangmoq zui saí é lé gumrong é hkyô pé má ngamoq eq rawui za són byi rá ahko ahkáng ô nau é bang lé ahkáng a byi rá matú, ngò kut nyi é su xoq lui kut shi rá nghut lhê.

¹³ Hkâsu mù gâ le, haú sù é bang gi, lagyo apyoq pé, mhaú zô é mù zui bang, Hkrisduq é lagyo pé dông kut mhaú é bang nghut akô.

¹⁴ Haú gi, maú ra hkyô a joq, hkâsu mù gâ le, Tsadán lhang gi, maubó é maumang lagyo rayuq dông kut mhaú é sù nghut lhê.

¹⁵ Haú mù, Tsadán é dui-nhâng zoshâng wui gi, dingmán hkyô é dui-nhâng zoshâng wui dông kut mhaú é nghut jang, maú dân rá hkyô a joq é nghut lhê. Yhangmoq é ló htâng má gi, yhangmoq kut é eq rajung za hui zô kô rá nghut lhê.

Yhâng É Wuîhke Jamjau Hkyô Eq Séng Lui, Poluq Gumrong É Hkyô

¹⁶ Ngò puq tái kôlê, ó yuq le, ngo lé byù gò dông a són yù kô sháng gaq. Nghut kôlhang, nungmoq són yu é nghut jang, ngò ratsuí wô gumrong sháng gaq, byù gò lé nungmoq hap yu é su, ngo lé hap yù kô laq.

¹⁷ Ngò, haú su gumrong é hkyô gi, haú Yhumsing ó é dông ngò tái nyi é a nghut, byù gò rayuq dông tái nyi é ru nghut lhê.

¹⁸ Byù myo myo gi, mingkân é hkyô dông gumrong nyi bum lhê nghut mù, ngò le gumrong rá nghut lhê.

¹⁹ Nungmoq gi, hpaqchyí lùm bo kô é nghut mù, byù go pé lé gabú myit èq jân nyi akô nhung!

²⁰ Gê gè yhang, nungmoq gi, nungmoq lé jùn kut é sù lé le, nungmoq lé rhoi zô é sù lé le, nungmoq chyáng akyú hô zô yu é sù lé le, yhang gùng yhang owaq é sù lé le, nungmoq lé bo-pyuq pyuq é sù lé le, jân nyi akô nghut ri.

²¹ Ngamoq gi, nungmoq lé haú hkyô kut rá má wum gyai nyhôm lhê nghu yín yù rá lé, ngò, hoq ri!

Rayuq yuq, haí lé wám gumrong é nghut jang, ngò le, haú lé wám gumrong lhê nghu, byù gò rayuq dông ngò tái nyi é nghut lhê.

²² Yhangmoq gi, Hebre byu pé nghut akô lhu? Ngò le nghut lhê. Yhangmoq gi, Israelaq byu pé nghut akô lhu? Ngò le nghut

lhê. Yhangmoq gi, Abraham é awut ashin pé nghut akô lhu? Ngò le nghut lhê.

²³ Yhangmoq gi, Hkrisduq é dui-nhâng zoshâng wui nghut akô lhu? (Ngò gi, myit a gyíng é sù dông haú su tái é nghut lhê.) Ngò gi, je nghut lhê. Ngò gi, mù zui je shikut bê, htông anum num je lũng wú bê, je riyhang bat é huí wú bê, shi rá i é adàm dàm huí wú bê nghut lhê.

²⁴ Ngò gi, Yudaq byu pé nuichum èq bat é myi xê dàm byíng rá radàm ra ra dut é, ngo lhang hui zô wú é nghut lhê.

²⁵ Ngò gi, dumbáng èq nhuq huí é sum dàm, shi sháng gaq ga luqok èq dú huí é radàm, wui-sanghpo byoq huí é sum dàm, wuimau má myú byôm é ra-nyi ra-myìn hui zô wú bê nghut lhê.

²⁶ Ngò gi, xoq xoq hkyowui htoq e ló é hkùn, wui gú é gyuq chiq jung, danyaq huí é gyuq chiq jung, ngá é amyú wui chyáng má é gyuq chiq jung, tungbaú pé chyáng má é gyuq chiq jung, myuq hkaú pé má é gyuq chiq jung, yoso pé má é gyuq chiq jung, wuimau má é gyuq chiq jung eq gumang apyoq pé chyáng má é gyuq chiq jung pé hui zô wú bê nghut lhê.

²⁷ Ngò gi, mù lé zui ngu zui hkyik mù, anum num a myang yhup shoq dut wú bê nghut lhê. Ngò gi, zômút wui shit huí é eq zoshuq a wó é anum num huí lái lo wú bê nghut lhê. Ngò gi, gyoq hpú é eq gùngchín dut é huí wú bê nghut lhê.

²⁸ Haú pé lhunglhang htoq má, noqkuq hpúng pé banshoq é matú ngò myit chiq byí é hkyô gi, nyi wui ngò má wôlai dut nyi ri.

²⁹ Rayuq yuq wum nyhôm le, ngò le wum a nyhôm rá lhu? Rayuq yuq mara shuí kut shut é hui le, ngò myit a nyé rá lhu?

³⁰ Ngò gumrong rá dut é nghut le gi, ngò wum nyhôm é hkyô lé tũn shit é pé lé gumrong rá nghut lhê.

³¹ Ngò a mhaú nyi é hkyô lé pyat dedu hkya-on huí é sù, haú Yhumsing Yesuq é Iwa eq Garai Gasang sê lhê.

³² Damaskuq myuq má, Hkohlâm Areta é a-ô má é mauzau gi, ngo lé chyup rá matú, myuq lé zúng nhang é nghut lhê.

³³ Nghut kôlhang, ngò gi, manghkoq má lũng mù, myuq xêwâm má é khohot dong mai lhoq hkyô kat é hui lui, yhang é loq mai wó lut é nghut lhê.

12

Poluq É Myoqwup Shing-rán Pé

¹ Ngò gi, rù gumrong nyi rá za nghut lhê. Akyú wó rá a nghut kôlhang, haú Yhumsing chyáng mai lo é myoqwup shing-rán pé eq hpông shit é shing-rán pé lé gumrong rá nghut lhê.

² Ngò gi, lái lò bê raxe myi zân hkùn, mauhkung sum tsáng nghu é má shuí toq yu

huí é, Hkrisduq má é byù rayuq* é hkyô lé sê lhê. Yhang gi, gungdu eq nghut é luq, a nghut é luq, ngò a sé, nghut kôlhang, Garai Gasang gi, sê lhê.

³Yhang hparadisu má shuí toq yù huí é gi, ngò sê lhê. Yhang gi, gungdu eq nghut lhê luq, a nghut é luq, ngò a sé, nghut kôlhang, Garai Gasang gi, sê lhê.

⁴Yhang gi, byu pé tai kyô htoq râ ahkáng a wó é hkyô pé nghut é, a wó tai sân kyô é hkyô pé lé wó gyô ri.

⁵Ngò gi, haú yuq sù é byu é hkyô eq séng luí gumrông râ nghut lhê; nghut kôlhang, ngò gi, ngá é wum nyhóm hkyô eq séng luí, gumrong é mai lai luí, ngá gúng ngò gumrông râ a nghut.

⁶Ngò gi, gumrông hkyô lé hkyin yù râ dut é nghut jáng lhang, byù gò dut râ a nghut, hai mù gâ le, ngò gi, tengmán hkyô tai nyi râ nghut lhê. Nghut kôlhang, ó yuq le, ngò kut é eq ngò tai é mai myit lum to kô é htoq má, ngò lé, je a myit lo ko sháng gaq nghù, ngò a gumrông kut pyám nyi lhê.

⁷Haú laklai dik é dông ngo lé hpông shit é shing-rán mó pé é yanmai, ngò a nghutbún byuq sháng gaq ga, ngò lé gunjang râ matú, Tsadán é lagyo nghut é zu lé, ngá é gungsho má kat byi to bê nghut ri.

⁸Haú lé ngá chyáng mai yu pyám byi râ matú, ngò, Yhumsing lé sum dâm dúng tóngbán wú bê nghut lhê.

⁹Nghut kôlhang, Yhang gi, "Ngá é jeju gi, náng é matú luqđun é nghut lhê; hkâsu mù gâ le, Ngá é a-tsam gi, wum nyhóm é hkyô má lhoq gumjup é hui ri." ga luí, ngò lé tai ri. Haú mù luí, Hkrisduq é a-tsam gi, ngò má wó joq nyi sháng gaq nghù, ngò gi, ngá é wum nyhóm é hkyô pé eq séng luí, gabú myit mai je riyhang gumrông râ nghut lhê.

¹⁰Haú nghut mù luí, ngò gi, Hkrisduq é yanmai, wum nyhóm é hkyô pé má le, rhoi huí é hkyô pé má le, wuihke jamjau huí é hkyô pé má le, zing-ri huí é hkyô pé má le, awui ahke dut é hkyô pé má le, gabú nhik dik nyi lhê. Hkâsu mù gâ le, ngò wum nyhóm é hkûn sheq, ngò wúm bo é nghut lhê.

Poluq Chiq Byi É Hkyô

¹¹Ngò gi, ngá gúng ngò byù gò lhoq kut yù bê nghut ri, nghut kôlhang, haú gi, nungmoq kut nhang é nghut lhê. Ngò gi, nungmoq eq owaq é hui ang sù nghut lhê; hkâsu mù gâ le, ngò gi, haí a nghut kôlhang, "Ahkyak lagyo pé" ga bâng é htoq má ratsuí lhang gyamgyi gyô sù a nghut.

¹²Lagyo rayuq é masat kumlhá nghut é, kumlhá pé, mauhpo muzô pé eq laklai kumlhá pé lé, ngò gi, gyai yhang hkam jan mù nungmoq chyáng kut bê nghut lhê.

¹³Ngò gi, nungmoq é matú, hkâ-nhám le wôlai a dut é nhing, nungmoq gi, hkâsu mù, gotú noqkuq hpûng pé htoq má gyamgyi gyô nyi akò lhu? Ngò, haú hkyô má shut é nghut jáng, mara hkyut pyám byi kó laq!

¹⁴Ahkuí, ngò gi, nungmoq lé, sum lhang nghù râ dâm, lé kum râ rì rì nghut bê mù, nungmoq é matú wôlai gi, a dut râ nghut lhê. Hai mù gâ le, ngò gi, nungmoq é sutzè lé ô nau é a nghut, nungmoq lé sheq ru nghut lhê. Hkâ dông nghut kôle, zo wui gi, mó wui é matú sutzè hkong to byi râ dut é a nghut, mó wui sheq, zô wui é matú hkong to byi râ dut é nghut lhê.

¹⁵Haú mù luí, ngò gi, gyai yhang gabú é myit mai, ngò wó é jung hkangmó lé nungmoq é matú chung jai râ nghut mù, ngá gúng lé lhang chùng jai râ nghut lhê. Ngò, nungmoq lé myô chyitdap é yanmai, nungmoq gi, ngò lé shaú chyitdap kó râ lhu?

¹⁶Ngò gi, nungmoq chyáng wôlai a dut é hkyô têng lhê. Nghut kôlhang, ngò gi, hpaqchyí haq da sù dut mù, mhaú lhik é dông nungmoq lé chyup yù sù dut byuq bê ga nungmoq ra-am myit akò myhi-nhung!

¹⁷Ngò gi, nungmoq chyáng nhang kat byi é byù dông, nungmoq chyáng amyat kut zô yù bê nghut lhê lhu?

¹⁸Ngò gi, Tituq lé nungmoq chyáng lé râ matú wum tai tsuq mù, ngamoq é gumang lé, yhang eq rahá nhang kat bê nghut lhê. Tituq gi, nungmoq chyáng amyat kut zô é nghut lhê lhu? Nga-nhik gi, rajung zâ é myit dông chyat kut mù, rajung zâ é hkyô lé chyat châng é su nhik nghut lhê, a nghut kó lhu?

¹⁹Ngamoq gi, nungmoq hí má ngamoq gúng ngamoq tai hung yu nyi ri nghù, ahkuí jé shoq myit nyi akò lhu? Ngamoq gi, Hkrisduq má é byu pé dông, Garai Gasang hí má tai nyi é nghut lhê. Chyitdap é gumang wui é, ngamoq kut é jung hkangmó gi, nungmoq é akyu matú chyat nghut lhê.

²⁰Hkâsu mù gâ le, ngò lé jé é hkûn, ngò, nungmoq lé dut nhâng nau é su, nungmoq a wó dut kó râ eq, nungmoq, ngò lé dut nhâng nau é su, ngò a wó dut râ lé, ngò myit gyuq ri. Ngò gi, mabyoq jishûm htoq é, manon é, nhik-ùn buq é, byù hpûng gam é, gansang é, lumu é, gyai nghutbún é eq atau ahú dut é hkyô pé joq râ lé gyuq ri.

²¹Ngò dum lé jé é hkûn, ngá é Garai Gasang gi, nungmoq é hí má ngo lé myit nyhóm nhâng mù, yhangmoq ô nau é myit châng é má shut é dông nyi zô lhum nau é i-myit, gungsho zùm yap é yubak mara eq a sân-yúng é hkyô kut shut é mai myit a lhang bang myo myô é yanmai, yon kuq é hui zo râ lé, ngò myit chiq ri.

* 12:2 Hkrisduq má é byù rayuq gâ é gi, Poluq yhanggùng yhang lé tai nyi é nghut lhê.

13

Ló Htàng Má Sidiq Byi É Dang Pé

¹ Ahkuí, ngò, nungmoq chyáng lé kum rá gi, sum lhing nghú rá dàm nghut lhê. Haú gi, "Mara hun é hkyô hkgangmó lé, í yuq sum yuq saksé hkâm é èq lhoq teng ra rá nghut lhê."* ga kâ tô é eq rajung za nghut lhê.

² Ngò gi, í lhing nghú rá dàm nungmoq eq rahá nyi é hkún, nungmoq lé sidiq byi gú bê nghut lhê. Ahkuí le, nungmoq eq wê gâng tô é u lé, dum tái kôlé, ngò dum jé lé é hkún, noq mai mara shut tô é bang lé nghut nghut, góbang ó yuq lé nghut nghut, hkyamsa a byi lo rá nghut lhê.

³ Haú gi, ngò đông mai Hkrisduq dang tái nyi é hkyô saksé shit rá lé, nungmoq dưng nyi kômù nghut lhê. Yhang gi, nungmoq é hkyô lé hkâsu kut shui-û é hkyô má wum nyhôm é a nghut, nungmoq chyáng a-tsam mó shit sú sheq ru nghut ri.

⁴ Hkâsu mù gâ le, Yhang gi, wum nyhôm é má jén sat é hui bê nghut kôlhang, Garai Gasâng é a-tsâm èq dui nyi é gi, hkyak têng lhê. Haú eq rajung za, ngamoq gi, Yhang su wum nyhôm kôlhang, nungmoq lé dojau rá matú, Garai Gasâng é a-tsâm èq, Yhang eq rahá dui nyi rá nghut lhê.

⁵ Nungmoq gi, lumjینگ hkyô má nghut nyi lhê luq, yhumsing gung yhumsing myí wú keq. Yhumsing gung yhumsing chyam wú keq. Nungmoq gi, chyam é má sùm byuq é za a nghut jáng, nungmoq chyáng Hkrisduq Yesuq lúng nyi bê hkyô lé sé kó rá nghut lhê.

⁶ Ngamoq gi, chyam é má a sùm é hkyô lé, nungmoq wó sé kó rá nghut lhê nghú, ngò hkyak lum tô lhê.

⁷ Ahkuí, ngamoq gi, nungmoq shut é hkyô haí a kut kó rá matú, Garai Gasâng chyáng kyúdung byi lhê. Haú gi, ngamoq chyám hui lui wó lut é hkyô lé byu pé myàng kó rá matú a nghut é za, ngamoq sùm é su dut kôlhang, nungmoq ge é hkyô kut kó rá lé myàng rá matú nghut lhê.

⁸ Hkâsu mù gâ le, ngamoq gi, haú tengmán hkyô eq shaí é đông haí le a ge kut é za, tengmán hkyô é matú za kut rá dut é nghut lhê.

⁹ Ngamoq wum nyhôm kôlhang, nungmoq wúm bo é hkún, ngamoq gabú é nghut lhê; ngamoq kyúdung é gi, nungmoq gumjup rá matú nghut lhê.

¹⁰ Ngò gi, wê gâng tô é hkún, haú hkyô pé lé haí mù kâ é gâ le, ngò jé lé é hkún, ahkáng ayá lé ngò chung é má htân htân a kut rá matú nghut lhê. Ahkáng ayá haú gi, nungmoq lé lhoq htên pyám rá matú a nghut, nungmoq lé kô myhang lo nhâng rá matú, haú Yhumsing ngo lé byi é sheq ru nghut lhê.

Ló Htàng É Shi-kyám Dang

¹¹ Ló htàng má ngò tái nau é gi, gumang wui ê, nguingón yuqyo nyi keq. Gumjup hkyô shut sô nyi keq, ngò dưng tôngbán é dang lé gyo keq, myit rahkat za dut nyi keq, nguingón shoq asak dui nyi keq. Haú hkún, chyitdap hkyô eq nguingón hkyo é Garai Gasang gi, nungmoq eq rahá nyi nyi rá nghut lhê.

¹² Chyoiyúng é bopuq puq é èq, rayuq eq rayuq shi-kyám lhum keq.

¹³ Sân-yúng bang banshoq gi, nungmoq lé shi-kyám kat akó.

¹⁴ Haú Yhumsing Yesuq Hkrisduq é jeju, Garai Gasâng é chyitdap myit eq Chyoiyúng Woi-nyí é zùm yap hkyô gi, nungmoq banshoq bâng chyáng ru joq nyí sháng gaq ô.

GALATIQ

Mau Bâng Chyáng Hun Kat é Laiká (Galatians)

¹ Byu pê chyáng mai le a nghut, ó yuq éq nhang é le a nghut e za, haù Yesuq Hkrisduq lé shí bê mai dum lhoq dui toq yu é sú Íwa Garai Gasang eq Yesuq Hkrisduq chyáng mai nhang kat é lagyo rayuq nghut sú, ngò Poluq gi,

² ngò eq rahá nyi é gumang wui ban-shoq bang le mù, Galatiq mau má é noqkuq hpúng pê chyáng dang kyô kat lhê.

³ Nga-nhùng é Íwa Garai Gasang eq Yhumsing Yesuq Hkrisduq chyáng má é, jeju eq nguingón hkyô gi, nungmoq chyáng ru joq nyi sháng gaq ô.

⁴ Haù Hkrisduq gi, nga-nhùng é Íwa Garai Gasang ô nau é eq rajung za, agè ashop é ipyat shí mai, nga-nhùng lé xe yù rà ga, nga-nhùng é yubak mará é matú yhanggùng lé Yhang byi pyám bê nghut ri.

⁵ Haù hpungwup shingkang gi, Garai Gasang chyáng pyat dedu ahtum abyuq ru joq nyi sháng gaq ô. Amen.

Gotú Gabú Danglù A Joq É Hkyô

⁶ Ngò gi, haù Hkrisduq é jeju mai nungmoq lé ji yù Sù lé, nungmoq haù-í han kâng pyám to kôluí, shaí é gabú danglù shut lhing ló nyi kô é hkyô lé, gyai yhang maú nyi ri.

⁷ Danglù haù gi, gabú danglù ratsuí lháng a nghut. Byù ra-am mai nungmoq lé lhoq shuk byi luí, haù Hkrisduq é gabú danglù lé, shikut luí lhoq shai nhang pyám nyi kô é hkyô za nghut lhê.

⁸ Nghut kôlháng, nungmoq lé ngamoq hkô kyo bê gabú danglù mai lai luí, ngamoq nghut nghut, mauhkúng htoq má é mau-mang lagyo rayuq nghut nghut, shaí é gabú danglù, nungmoq lé hko kyô é nghut jáng, haù yuq gi, ahtum abyuq dam byi é hui zo sháng gaq ô!

⁹ Ngamoq tai wú bê eq rajung za, ahkuí le, ngò dum tai kôlé: rayuq yuq mai, nungmoq hap yu to bê é gabú danglù mai lai luí, gotú hko nyi e nghut jáng, haù yuq gi, ahtum abyuq dam byi é hui zo sháng gaq ô!

¹⁰ Haù su nghu tai é gi, ahkuí, ngò, byù é hí má myoqdong wó rà matú shikut nyi é nghut lhê lúh? Haù a nghut jáng, Garai Gasang é hí má myoqdong wó rà matú shikut nyi é nghut lhê lúh? Byù lé gabú nhâng rà matú, ngò shikut nyi é nghut lhê lúh? Ngò gi, byu pé lé za ru gabú nhâng nau nyi é nghut le gi, Hkrisduq é dui-nhâng zoshâng dut rà a nghut.

Poluq Lé, Garai Gasang Ji Yu É Hkyô

¹¹ Gumang wui è, ngò hko kyô é gabú danglù haù gi, byu èq kut htoq é hkyô a nghut é lé, ngò, nungmoq lé sé nhâng nau ri.

¹² Ngò gi, haù lé, byu chyáng mai wó yu é le a nghut, góyuq èq mhoq byi é le a nghut e za, Yesuq Hkrisduq èq shing-rán byi é dòng wó hap yu é ru nghut lhê.

¹³ Ngò, Yudaq noqkuq htùng má nghut nyi ashí hkùn, Garai Gasang é noqkuq hpúng lé ladu lai shoq hkâsu kut zing-ri luí, haù lé lhoq htên shikut wún é, ngá é hí hpyanglhê é asak dui hkyô lé, nungmoq wó gyô wú bekô rà nghut lhê.

¹⁴ Ngò gi, ngò eq ra-kyam zâ é Yudaq byu pé myo myô é htoq má, Yudaq noqkuq htùng lé je cháng sú nghut é htoq agó, ngá é íchyi íwa pé é htúngi lé ladu lai shoq myit zing zuq sú nghut lhê.

¹⁵ Nghut kôlháng, ngá nú é unghkaù mai yhang hkyin to luí, Yhang é jeju yanmai ngo lé ji yu é Garai Gasang gi,

¹⁶ haù Yhang Zô é hkyô gabú danglù lé, ngò mai tưngbaù pê chyáng hko kyo sháng gaq ga, Yhang Zo lé ngá chyáng htoq shit nhâng rà matú myit hpyit yu é hkùn, ngò gi, ó yuq eq le a hpyê yù,

¹⁷ Yerusalem wà mó má doq ló luí, ngá hí má lagyo kut é bang lé le a ló huí e za, radá dâm Arabiq mau shut é luí, Damaskuq myuq má dum tau ló bê nghut lhê.

¹⁸ Sum zân lai é htàng má, ngò gi, Yerusalem wà mó má doq ló mù, Petruq* lé ló hui luí, yhang eq raxe ngo nyi, ló nyi nyi é nghut lhê.

¹⁹ Haù má, Yhumsing é yhanggu Yakuq mai lai luí, lagyo góbang lé ngò a myàng nghut ri.

²⁰ Nungmoq lé ngò ká byi kat é má, mhaù é hkyô a bò nghù luí, Garai Gasang hí má, hkyak, ngò tai lhê.

²¹ Hau htàng má, ngò gi, Suriq mau eq Kiliki mau má é je é nghut lhê.

²² Haù hkùn, haù Hkrisduq má nghut é, Yuda mau má é noqkuq hpúng byù wui gi, ngo lé myoqno a shú kó nghut ri.

²³ Yhangmoq gi, "Hí hkùn, nga-nhùng lé zing-ri sú gi, yhang mai lhoq hten rà matú radám shikut wú é lumjing hkyô haù lé, ahkuí hko nyi ri." gá é hkyanglù lé wó gyô wú kôluí za,

²⁴ ngá é yanmai, Garai Gasang lé hkya-ôn bum akó nghut ri.

2

Poluq Lé Lagyô Pé Lhom Hap Yu É Hkyô

¹ Raxe myi zân lai é htàng má, ngò gi, Barnaba eq rahá Yerusalem wà mó má dum doq ló é hkùn, Tituq lé le shuí chung é nghut lhê.

* 1:18 Petruq lé Kehpa le gà lhê.

² Garai Gasang byi é shing-rán eq rajung za doq ló luí, ngò kut wú bê muzó eq ahkuí kut é muzó pé akòm a dut pyám sháng gaq nghú, tungbaù pè chyáng ngò hko kyò nyi é gabú danglù lé, haù suwún dut bâng é hí má za shap kyò é nghut lhê.

³ Nghut kôlhang, ngò eq rahá nghut é Tituq gi, Grik byù nghut kôle, yhang lé ahpyo-kuq a hpyit nhâng kó nghut ri.

⁴ Haù hkaù wang lo é mhaù é gumang wui gi, Hkrisduq Yesuq má ngamoq wó é luthkyò má jowú luí, nga-nhúng lé jùn dut nhâng rà dá kô é yanmai, haù hkyò gabyông htoq lo é nghut ri.*

⁵ Nghut kôlhang, haù gabú danglu é tengmán hkyò gi, nungmoq chyáng joq gíng nyi sháng gaq nghú, razup za lhang, yhangmoq é dang lé ngamoq gyo byi é a nghut.

⁶ Ahkyak é byù su dut é bang gi, yhangmoq hái jung kut kôlhang, ngò eq a séng nghut ri; Garai Gasang gi, du lé wú mù jéyáng é sù a nghut; byù haù bang gi, ngá é mungdang má hái le a jat kat e za,

⁷ Petruq gi, Yudaq byu pé[†] lé, haù gabú danglù hko kyo rà mù má lum tó é hui bê eq rajung za, ngò gi, tungbaù pé[‡] lé, haù gabú danglù hko kyo rà mù má lum tó é hui bê hkyò lé za, yhangmoq myang akò nghut ri.

⁸ Hkásu mù gà le, Yudaq byu pé é matú Petruq lé lagyo ayá dang byi é sù Garai Gasang gi, tungbaù pè matú ngo lé le lagyo ayá dang byi bê nghut lhê.

⁹ Haù hkungmó-zing su ahkyak é, Yakuq, Petruq eq Yohan pé gi, ngo lé byi tó é jeju lé myang sé kôjáng, ngò eq Barnaba lé, zùm yap hkyò gà é loqyo loq eq shi-kyâm yù kôluí, yhangmoq gi, Yudaq byu pé shut, ngá-nhik lé gi, tungbaù pè shut é rà lhê ga, myit hui bekò nghut ri.

¹⁰ Yhangmoq gi, ngá-nhik mai myùng bang lé ru bún nyi rà matú za pying kat akò; haù gi, ngò gyai yhang kut nau nyi é hkyò nghut lhê.

Petruq Lé Poluq Htuq Htìng É Hkyò

¹¹ Antioku wà mó má Petruq jé lé é hkùn, yhang lé mara hùn rà hkyò joq é yanmai, ngò gi, byu hí má yhang, yhang lé lhom htuq hting é nghut lhê.

¹² Hkásu mù gà le, Yakuq chyáng mai lé é bang a jé shí é u lé, yhang gi, tungbaù pé eq rahá chòm zo chòm shuq lhaq kut ri. Nghut kôlhang, haù bang jé é hkùn, yhang gi, ahpyo-kuq hpyit rà lhê gà é hpúng má lom é bang lé gyoq é yanmai, tungbaù pè chyáng mai htoq gang luí, yhang bau nyi tó ri.

¹³ Yhang, gegùn labyoq kut é hkyò má, gotú Yudaq byu pé le bo châng kut akò

nghut mù luí, Barnaba lhang yhangmoq kut é gegùn labyoq hkyò má bo châng ngoq ló bê nghut ri.

¹⁴ Haù gabú danglu é tengmán hkyò eq rajung za, yhangmoq a cháng kô é lé myàng jáng, ngò gi, yhangmoq banshoq bâng é hí má, Petruq lé, "Nàng gi, Yudaq byù nghut to mù luí, Yudaq byù rayuq đông a nyi e za, tungbaù rayuq đông nyi luí nhing, tungbaù pé lé Yudaq byu pé é htúngli hkásu kut wó cháng nhâng rà lúh?

¹⁵ Ngamoq gi, yubak dap bang gà é tungbaù pé a nghut e za, hkú é buiniy mai yhang, Yudaq byù nghut gô bê nghut lhê.

¹⁶ Byù gi, jep é tará lé cháng luí mara hkyut san byi hui é a nghut e za, Yesuq Hkrisduq lé lumjing é yanmai sheq mara hkyut san byi hui é hkyò lé, ngamoq sê lhê. Haù mù luí, ngamoq gi, jep é tará lé cháng luí a nghut e za, Yesuq Hkrisduq lé lumjing é yanmai, mara hkyut sân pyám byi é hui sháng gaq nghú, Yesuq Hkrisduq lé lumjing bê nghut lhê; hkásu mù gà le, ó yuq le, jep é tará lé châng é yanmai, mara hkyut san byi é hui rà a nghut.

¹⁷ Ngamoq gi, Hkrisduq má ngamoq é mara hkyut san byi é hui rà hkyò ho nyi é hkùn, yubak dap é bang ngamoq nghut é lé myang é nghut jáng, mara lé gi, Hkrisduq mai kut nhang é nghut lhê lúh? Ratsui lé a nghut.

¹⁸ Ngò gi, ngò hpyoq pyám bê hkyò lé dum sai kut é nghut jang, tará lu lai é byù ngò nghut é lé tìn shit ri.

¹⁹ Ngò gi, jep é tará eq sêng é má, jep é tará é yanmai shí jáng sheq, Garai Gasang é matú wó dui nyi rà nghut lhê.

²⁰ Ngò gi, Hkrisduq eq rahá jén sat é hui bê nghut mù luí, ngá gúng ngò dui nyi é a nghut lo, Hkrisduq sheq ngò má dui nyi é ru nghut lhê. Ahkuí, ngò gungsho má asak dui nyi é gi, ngo lé chyitdap luí, ngá é matú yhanggung lé Yhang byi pyám é, haù Garai Gasang é Yhangzo lé lumjing é yanmai ru nghut lhê.

²¹ Ngò gi, Garai Gasang é jeju lé tó pyám é a nghut, hkásu mù gà le, dingmán é hkyò lé, jep é tará đông wó yu é ru nghut le gi, Hkrisduq shí hkâm é gi, akòm dut byuq rà nghut lhê." nghú tai é nghut lhê.

3

Lumjing Myit Lúh? Jep É Tará Lúh?

¹ Galatiq mau mã é byùbâm pé ê! Yesuq Hkrisduq gi, tapzing má jén sat hui bê hkyò lé, nungmoq é myoq má bò nhang to bê le nhing, ó yuq eq wá nungmoq lé làng ngoq yù bekò lúh?

* 2:4 Yudaq byu pé ra-am gi, hpúng asik wang é bang lé Yudaq htùng tará cháng nhâng nau akò nghut ri. † 2:7 Grik má ahpyo-kuq hpyit hkam é bang ga bo tó ri. ‡ 2:7 Grik má ahpyo-kuq hpyit a hkam é bang ga bo tó ri.

² Nungmoq gi, haù Woi-nyí lé, jep é tará cháng luí wó yú kô é nghut lhê lúhú? A nghut jáng, nungmoq wó gyô yu é gabú danglù lé lumjúng luí wó yú kô é nghut lhê lúhú? Haù rahkat lé za, ngò sê yú nau ri.

³ Nungmoq gi, haù-í yhang bâm akò lúhú? Haù Woi-nyí lé lumhkaù mù kut hí kòluí nhing, ahkuí, gungsho wum-o lé lumhkaù mù, yhumsing myit tó é hkyô lé lhoq pán rà matú shikut nyi akò lúhú?

⁴ Nungmoq, myo myo hpuzò pyâm é gi, akôm nghut akò lúhú? Gè gè yhang, haù gi, akôm nghut byuq bekò lúhú?

⁵ Garai Gasang, nungmoq lé Yhâng é Woi-nyí byí é htoq agó, nungmoq chyáng laklai kumlhá kut é gi, jep é tará lé nungmoq châng é yanmai nghut akò lúhú? A nghut jáng, nungmoq wó gyô é gabú danglù lé, nungmoq lumjúng é yanmai nghut akò lúhú?

⁶ "Abraham gi, Garai Gasang lé lumjúng luí, yhang lé dingmán sù ga sôn yu é hui bê nghut ri."[☆] ga, Abraham eq séng luí tai tó é lé myit wú keq.

⁷ Haù mù luí, lumjúng myit bo é bang gi, Abraham é yhangzô pé^{*} yhang dut bê nghut é hkyô lé sé keq.

⁸ Lumjúng myit é yanmai, tungbaù pé lé Garai Gasang mara hkyut san byí rà nghut lhê ga, Chyúmdang mai hí byu-myang to bê nghut mù luí, Abraham lé hí shit kyô tó é gabú danglù gi, "Nang é yanmai, byuhú chângiup gi, shimân jeju wó yú kó rà nghut lhê."[☆] gâ ri.

⁹ Haù mù luí, lumjúng myit bo é bang gi, lumjúng myit bo é Abraham eq rahá, shimân jeju lé myang hkam yú kó rà nghut lhê.

¹⁰ Jep é tará châng é hkyô má ngè hkau é lhunglhang bang gi, nhing pyâm é hui bang chyat nghut lhê. Hkâsu mù gâ le, "Tarâ laiká má kâ tó é lhunglhang lé a xoq kut é sù, ó yuq nghut kòle, nhing pyâm é hui kó rà nghut lhê."[☆] ga luí, kâ tó ri.

¹¹ Hau htoq agó, "Haù dingmán sù gi, lumjúng myit mai asak duí rà nghut lhê."[☆] ga kâ tó é yanmai, ó yuq nghut kòle, Garai Gasâng é hí má jep é tará lé cháng luí, mara hkyut san byí é a hui é hkyô gi, san za nghut bê nghut ri.

¹² Haù jep é tará gi, lumjúng myit eq hai a séng é nghut luí, "Haù pé dng châng é sù gi, haù pé mai asak duí rà nghut lhê."[☆] ga kâ tó ri.

¹³ Haù Chyúmdang má, "Sik zing má jén lhang to hui é sù ó yuq nghut kòle, nhing pyâm é hui sù nghut ri."[☆] ga kâ tó é eq rajung za, Hkrisduq gi, nga-nhung é matú nhing pyâm é hui sù dut bê nghut é yanmai, jep

é tará má é nhing é hkyô mai nga-nhung lé hkyi yú bê nghut ri.

¹⁴ Haù Abraham lé byí tó é shimân jeju gi, Hkrisduq Yesuq é yanmai tungbaù pé chyáng le jé sháng gaq ga, Yhang nga-nhung lé hkyi yu é nghut ri; haù má, nga-nhung gi, danggidiq byí tó é Woi-nyí haù lé, lumjúng myit mai wó yú rà nghut lhê.

Jep E Tarâ Eq Danggidiq

¹⁵ Gumang wui é, nyi wui é asak duí hkyô má é lé dangtú yú mù, ngò nungmoq lé tai kòle, byù mai chòm tó tó é dangshikaq lé, ó yuq eq le wó lhoq hpyoq pyám rà a nghut, ó yuq eq le haù má wó jat kat rà a nghut.

¹⁶ Abraham eq yhâng é awut ashín lé byí tó é danggidiq le haù eq rajung za nghut ri. "Awut ashín pé lé" gâ é dang gi, byù myo myo lé gâ lhê; nghut kòlhang, haù Chyúmdang má, haù lé tai nau é a nghut e za, "náng é awut ashín lé"[☆] ga tai nau é ru nghut lhê, haù é lichyúm gi, byù rayuq lé za tai é nghut lhê, haù gi, Hkrisduq nghut ri;

¹⁷ haù mù luí, ngò tai nau é gi, Garai Gasang, dangshikaq tó tó é htâng, myí sho sum xê zàn má lé joq é tará gi, dangshikaq haù lé le wó lhoq hpyoq pyám rà a nghut, danggidiq lé le wó lhoq htên pyám rà a nghut.

¹⁸ Hkâsu mù gâ le, haù silí wunlí gi, jep é tará eq séng lhùm é nghut jáng, danggidiq eq gi, hai le a séng lhum lo nghut ri; nghut kòlhang, Garai Gasang gi, Yhâng é jeju yanmai, Abraham lé danggidiq dng silí wunlí haù byí to bê nghut ri.

¹⁹ Haù su nghut jáng, haù jep é tará gi, hai akyú bò rà lúhú? Haù gi, danggidiq dng lhoq âng tó é Awut ashín nghut é sù jé lé é hkún jé shoq, mara kut shut nyi bùm kô é yanmai, jat kat tó é nghut lhê; jep é tará haù gi, maumang lagyô pé mai gyoro sô xoq byi sù[†] é loq dng byí tó é ru nghut lhê.

²⁰ Gyoro sô xoq byi sù gi, rahkyam shut má é bang eq baù séng é a nghut, nghut kòlhang, Garai Gasang gi, rayuq za nghut lhê.

²¹ Haù mù luí, jep é tará gi, Garai Gasâng é danggidiq pé eq htuq htng lhùm lhê lúhú? Ratsui le a nghut. Hkâsu mù gâ le, duí é asak wó byí é jep é tará lé byi to bê nghut le gi, gè gè yhang, dingmán hkyô gi, jep é tará mai lò rà nghut lhê.

²² Nghut kòlhang, mingkan gón má é bang gi, yubak mará é htongbyu pé chyat nghut akò ga Chyúmdang má bo tó ri; haù mù luí, haù byí to bê danggidiq lé gi, Yesuq Hkrisduq lé lumjúng é bang lé byi rà nghut lhê.

²³ Lumjúng hkyô haù a jé shimá, nga-nhung gi, haù jep é tara eq htongbyú dng

[☆] 3:6 Apún 15:6 * 3:7 Abraham é yhangzô pé gâ é gi, Garai Gasâng é yhangzô pé lé gâ é nghut lhê. [☆] 3:8 Apún 12:3

[☆] 3:10 Tarâ Pun 27:26 [☆] 3:11 Hbk 2:4 [☆] 3:12 Nhung 18:5 [☆] 3:13 Tarâ Pun 21:23 [☆] 3:16 Apún 12:7; 13:15;

24:7 † 3:19 Gyoro so xoq byi sù gi, Mosheq nghut ri.

lhung tô é hui lui, lumjínq hkyô haù htoq shit é hkún jé shoq myhí lhung tô é hui wú bê nghut lhê.

²⁴ Haù mù lui, nga-nhung gi, lumjínq é yanmai mara hkyut san byí é hui sháng gaq ga, jep é tará gi, nga-nhung lé Hkrisduq chyáng shuí é rà matú, nga-nhung é hkyô-u shê sù dut bê nghut ri.

²⁵ Ahkuí kúm gi, haù lumjínq hkyô jé bê nghut é yanmai, nga-nhung gi, haù jep é tará mai hkyô-u shê é loq hkaù má a nghut lo.

Garai Gasang É Yhangzô Pé

²⁶ Nungmoq lhunglhâng bang gi, Hkrisduq Yesuq lé lumjínq é yanmai, Garai Gasang é yhangzô pé nghut bê;

²⁷ Hkrisduq má wui-myhup hkám bê é bang nungmoq banshoq gi, Hkrisduq lé mebu su wut to bekò nghut ri.

²⁸ Nungmoq lhunglhâng bang gi, Hkrisduq Yesuq má rading ralhum za nghut é yanmai, Yudaq byù nghú é eq Grik nghu é, jùn nghu é eq luthkyô nghu é, yuqgê nghu é eq myiwe nghu é, a gam hkoq lo nghut ri.

²⁹ Nungmoq gi, Hkrisduq eq séng bekò nghut jáng, Abraham é awut ashín pé le, haù danggidíq eq rajung za síl wunlí hkam yù bang le, nghut akò nghut ri.

4

¹ Ngò tái nau é lichyúm gi, haù amyú hkúng xoq dut rá sù gi, ikun sutzê banshoq lé síng ang sù nghut kôlhâng, yhang, zoshâng nghut ashí hkún gi, jùn hpó eq haí a shaí nghut ri.

² Yhang gi, yhâng wa masat tô é ahkyíng jé shoq, yhang lé zúng é sù eq yhúm lé up su é a-ô má ru lúng nyi ashí nghut ri.

³ Haù eq rajung za, nga-nhung le zoshâng* nghut é hkún gi, mingkan uphkáng tará ô má jùn dut nyi é bang nghut lhê.

⁴ Nghut kôlhâng, ahkyíng lo ngap jáng, zo dut rá ahkáng lé byíng shoq, nga-nhung wó yù sháng gaq ga, Garai Gasang gi, jep é tará hkaù má é byu pé lé hkyi yù rá matú,

⁵ jep é tará hkaù má, myiwe mai hku kat nhang é Yhang Zo lé, nhang kat byi bê nghut ri.

⁶ Hkásu mù gá le, nungmoq le, zo wuí nghut bê yanmai, "Aba, Áwa ê." ga dat wut é, Yhang Zô é Woi-nyí lé, Garai Gasang gi, nga-nhung é i-myt unghkaù má kat byi bê nghut ri.

⁷ Haù mù lui, nàng gi, jùn a nghut lô e za, zo rayuq nghut bê nghut ri; nàng gi, zo rayuq nghut é yanmai, Garai Gasang gi, nang lé Yhâng é amyú hkúng xoq dut nhâng bê nghut ri.

Galatiq Mau Bang Lé Poluq Myit Chiq Byí É Hkyô

⁸ Hí hkún, Garai Gasang lé nungmoq a sé shí é u lé, nungmoq gi, nat hpará lháng a nghut bâng é a-ô má jùn dut é bang nghut ri.

⁹ Ahkuí kúm, Garai Gasang lé nungmoq sé bê nghu é htoq agó, Garai Gasang gi, nungmoq lé sé bê nghut le nhíng, nungmoq gi, hkásu mù, haù wum nyhôm é eq akyú a byí é, mingkan uphkáng é tará shut dum lhing taù ló nyi akò lú? Nungmoq gi, haù pé eq jùn zô é dum hui zó nau akò lú?

¹⁰ Nungmoq gi, buinyi wú, lhohkyap wú, ahkyíng yam-yoq wú, zanwut wú é hkyô pé lé, ahkyak kut nyi ashí kó nhung!

¹¹ Nungmoq chyáng ngò wum kat pyâm é hkyô gi, akóm dut bê abe nghú, nungmoq é matú ngò myit chiq nyi ri.

¹² Gumang wui é, ngò gi, nungmoq su dut bê nghut é yanmai, nungmoq le ngò su dut keq† nghú, nungmoq lé dùng tóngbán kat lhê. Nungmoq gi, ngo lé haí le a kut shut wú kó é nghut lhê.

¹³ Sâng-hí dàm ngò nungmoq lé gabú danglù hko kyo é hkyô gi, nungmoq sê é eq rajung za, ngò nòhpyo huí é yanmai nghut lhê.

¹⁴ Ngá é nòhpyo gi, nungmoq é matú wuíhke hkyô dut kôlhâng, nungmoq gi, ngo lé a wú tiq pyám kó é htoq agó, a wú chaq pyám kó e za, Garai Gasang é maumang rayuq lé su le, Hkrisduq Yesuq lé su yhang le, ngo lé lhom hap yù kó é nghut lhê.

¹⁵ Haù sù é nhíng, nungmoq é gabú hkyô banshoq gi, haù dut byuq bekò lú? Nungmoq gi, ru wó dut é nghut jáng, nungmoq é myoqjí lé choq yù mù, ngo lé wám byí pyám kó rá í dut lai lò bê hkyô lé, ngò saksé wó hkám lhê.

¹⁶ Ahkuí, ngò gi, nungmoq lé haù tengmán hkyô tái kyô é yanmai, nungmoq é gyê dut to bê nghut lhê lú?

¹⁷ Haù byù góbang gi, nungmoq lé gyai shirong é hkyô tún shit ri; nghut kôlhâng, ge é hkyô haí a bò; yhangmoq ô nau é hkyô gi, yhangmoq lé nungmoq taù shirông kó abe ga, nungmoq lé ngamoq chyáng mai lhoq káng yù rá matú ru nghut lhê.

¹⁸ Ge é hkyô lé shirong é gi, ge lhê; ngò eq rahá nyi é hkún za a nghut, hká-nhám le haù su shirong le ge lhê.

¹⁹ Ngò chyitdap é zo wuí ê, Hkrisduq é a-kyang nungmoq má gumjup lo é jé shoq, ngò gi, zo hkú nò no é su radàm dum hkám zó nyi lui,

²⁰ nungmoq é hkyô lé myit wuíhke tô é yanmai, ahkuí, nungmoq eq rahá myang nyi mù, ngò tái é danghté wó htai rá matú, gyai yhang myoqbyu nyi lhê ô.

* 4:3 Bun zo shí má, zoshâng gá é lichyúm gi, Yesuq lé a lumjínq shí é bang lé gá lhê. † 4:12 Ngò su dut keq gá é lichyúm gi, nungmoq le ngò su jep é tará mai lut htoq keq gá nau é nghut lhê.

Hagara eq Sarah Nhik É Hkyô

²¹ Haù jep é tará ô má nyi nau é bang ê, nungmoq gi, jep é tará má tai é hkyô lé a sé gyo kô é nghut lhê lúh? Ngó lé tai kyô wú kó laq.

²² Hkâsu mù gâ le, Abraham gi, yuqzo í yuq wó ri; rayuq gi, jùn myhí é yhangzo, rayuq gi, jùn myhí a nghut su é yhangzo, ga kâ tô ri.

²³ Haù jùn myhí é yhangzo gi, gungsho dông hku lé é sú nghut kôlhang, jùn myhí a nghut su é yhangzo kúm gi, danggidiq eq rajung za hku lé é sú ru nghut lhê.

²⁴ Haù hkyô pé gi, dangtú ru nghut lhê, myiwe haù í yuq gi, dangshikaq í lum eq wú lhê; dangshikaq ralhú gi, Sinaq Bùm má é[‡] nghut luí, jùn dut rá nghut é zo wú lé hku kat é Hagara lé tai nau é nghut ri.

²⁵ Hagara haù gi, Arabiq mau má é Sinaq Bùm lé tai nau é nghut luí, ahkuí lhê é Yerusalem eq wú nyi ri. Hkâsu mù gâ le, Yerusalem haù gi, yhang zô pé eq rahá, jep é tara é jùn dut nyi kô é yammai nghut lhê.

²⁶ Nghut kôlhang, ahtoq má é Yerusalem gi, jùn myhí a nghut sú nghut luí, nga-nhúng é ínu nghut ri.

²⁷ Hkâsu mù gâ le, "Zoshâng a hku é baùdung myhí ê, gabú nyi aq. Zo hkú nò a no wú shí é myiwe gi, gabú luí, gabú garú nyi aq; hkâsu mù gâ le, haù chamchyuyi dut é myiwe myhí gi, làng wó é myiwê htoq má zo wú je myô wó bê nghut ri." ga kâ tô ri.[✱]

²⁸ Gumang wú ê, ahkuí, nungmoq gi, Isak su, danggidiq byí tô é zo wú nghut bê nghut ri.

²⁹ Haù hkún lé, haù gungsho dông hku lé lo é sú gi, Woi-nyí wum-o dông hku lé lo é sú lé zing-rí ri. Haù eq rajung za, ahkuí le dut nyi ri.

³⁰ Nghut kôlhang, Chyúmdang má hkâsu ga kâ tô ri lúh gâ le, "Haù jùn myhí eq yhangzo yuqzo lé hkat htoq pyám aq; hkâsu mù gâ le, haù jùn myhí é yhangzo yuqzo gi, jùn myhí a nghut su é yhangzo yuqzo eq rahá, silí wunlí lé wó chòm hkam yú rá a nghut."[✱] gâ ri.

³¹ Haù mù luí, gumang wú ê, nga-nhúng gi, jùn myhí é yhangzô pé a nghut e za, jùn myhí a nghut su é yhangzô pé ru nghut lhê.

5

Hkrisduq Má É Luthkyô

¹ Nga-nhúng luthkyô wó rá matú, Hkrisduq gi, nga-nhúng lé lhoq lhut kat bê nghut ri. Haù mù luí, haù má ru gíng nyi mù,

yhumsing gùng lé jun é wòlai hkaù má hkâtaù bainaí nyi kó.

² Ngá dang lé matsing yú keq! Ngò Poluq, nungmoq lé tai kyo kôlé, nungmoq ahyo-kuq hpyit hkam yú kô é nghut jáng, Hkrisduq gi, nungmoq é matú hai akyú le bò kó rá a nghut.

³ Hau htoq agó, ahyo-kuq hpyit hkam yu é sú ó yuq lé nghut kôle, ahyo-kuq hpyit é sú gi, jep é tará lunglhang lé châng kut rá lhê ngù, ngò kyô kat lhê.

⁴ Jep é tará châng shikut é dông mara hkyut san byí é huí nau bang, nungmoq gi, Hkrisduq eq gâng lhum to bekó nghut luí, haù Garaí jeju mai le byit gyó byuq bekó nghut ri.

⁵ Ngamoq kúm gi, myit myoqbyu tô é dingmán hkyô lé, haù Woi-nyí é yammai lumjing myit eq gyai yhang láng nyi é bang nghut lhê.

⁶ Hkâsu mù gâ le, Hkrisduq Yesuq má gi, ahyo-kuq hpyit é nghut nghut, ahyo-kuq a hpyit é nghut nghut, hai akyú a bò nghut ri; chyitdap myit mai htoq lo é lumjing myit za sheq, akyú bo lhê.

⁷ Nungmoq gi, rago din wú bekó* nghut é wá, haù tengmán hkyô lé a châng sháng gaq ga, nungmoq lé ó yuq éq hkúm zing pyám kô é lúh?

⁸ Haù su kut mhoq hpyoq yu é hkyô gi, nungmoq lé ji yú Su chyáng mai htoq lo é a nghut.

⁹ "Mún ratsuí zo gi, muk long gón lé wó lhoq daù lhê."[†] gâ é dang joq lhê.

¹⁰ Nghut kôlhang, nungmoq gi, gotú hkyô dông a lhom yú kó rá nghut lhê ngù, Hkrisduq má hkyak ngò myit lum nyi lhê. Nungmoq lé lhoq byok byí é sú, ó yuq nghut kôle, yhumsing é mara eq rajung za dam byí é huí zo rá nghut lhê.

¹¹ Gumang wú ê, ahyo-kuq hpyit é hkyô lé, ngò rú hko nyi ashí nghut le gi, hai mù luí, zing-rí é lé ngò huí zô nyi rá lúh? Haù su kut é nghut jáng, haù tapzing eq séng luí, manghkáng joq rá a nghut lo.

¹² Nungmoq lé lhoq byok nyi é bang gi, hau htoq chyàn luí, yhumsing gùng yhumsing banshoq hpyit pyám kô sháng gaq ngù, ngò wó myit ri.

¹³ Gumang wú ê, nungmoq gi, luthkyô wó rá matú ji yú huí é bang nghut akó; nghut kôlhang, nungmoq é luthkyô ahkáng lé, yubak gungsho má hkáchang nhâng kó, chyitdap myit mai kúm gi, rayuq eq rayuq doaju lhum nyi keq.

¹⁴ Hkâsu mù gâ le, "Náng gùng lé nàng chyitdap é su, náng é chyangnâm má é bang

[‡] 4:24 Sinaq Bùm má é dangshikaq gi, jep é tará eq séng é dangshikaq nghut lhê. [✱] 4:27 Esai 54:1 [✱] 4:30 Apún

21:10 ^{*} 5:7 Rago din wú bekô gâ é gi, woi-nyí hkyô má kó myhang lai lò bê lé tai nau é nghut lhê. [†] 5:9 Shut é dông mhoqshit é hkyô ratsuí gi, muk long gón lé mún eq wó lhoq daù é su, nungmoq banshoq lé wó lhoq ngoq yu pyám lhê.

[✱] 5:14 Nhong 19:18

lé le chyyitdap aq."* gâ é hkunmó má za, jep é tarâ banshoq lo bo to bê nghut lhê.

¹⁵ Nungmoq, rayuq eq rayuq ngat lhum myui lhùm nyi kô é nghut le gi, rayuq eq rayuq lhoq htên pyâm lhum kô rà nghut é lé, sidiq nyi keq.

Woi-nyí Êq Asak Dui Râ Hkyô

¹⁶ Nghut kôhang, ngò tái kôlé, Woi-nyí shuí ù é đông asap dui nyi keq; haú hkûn, nungmoq gi, yubak gungsho ô nau é hkyô châng kô rà a nghut.

¹⁷ Hkâsu mù gâ le, yubak gungsho ô nau hkyô gi, Woi-nyí eq shai lhùm nyi; Woi-nyí gi, yubak gungsho ô nau hkyô eq shai lhùm nyi, dut ri. Haú í lhum gi, gyê dut lhùm ri; haú mù, nungmoq gi, yhumsing ô nau é đông hkâkut kô.

¹⁸ Nghut kôhang, nungmoq lé Woi-nyí eq hkyô hí é nghut jâng, nungmoq gi, jep é tarâ ô má a nghut lo nghut ri.

¹⁹ Yubak gungsho é muzó gi, de de yhang nghut lhê; haú pé gi, ashop é đông gungsho zùm yap é hkyô, a sân-yúng é hkyô, shut é đông nyi zô lhùm nau é myit,

²⁰ hparà noq hkyô, myoqheq mù kut é hkyô, a jú é hkyô, byoq lhùm é hkyô, manon é hkyô, nhiksoq sup é hkyô, yhumsing wuizat é hkyô, gâng lhum sê é hkyô, hpúng gam é hkyô,

²¹ ningsú é hkyô, í shuq wut é hkyô, zo yê shuq yê mù achâq achyut kut é hkyô pé eq haú pé su kut é gotú hkyô pé nghut ri; haú su kut nyi yap é bang gi, Garai Gasâng mingdán é silí wunlí lé wó hkam yù rà a nghut nghú, ngò, hí hkûn nungmoq lé tái wú bê eq rajung za, ahkúi lé, nungmoq lé ngò sidiq byí nyi lhê.

²² Nghut kôhang, Woi-nyí é ashi gi, chyyitdap hkyô, gabú hkyô, nguingón hkyô, myit hng hkyô, nhik-u nú é hkyô, ge é hkyô, lhumzui hkyô,

²³ nùm é hkyô, yhumsing gùng lé wó hkgang é hkyô pé nghut ri. Haú hkyô pé lé hkùm zing pyâm rà tarâ hai le a joq nghut ri.

²⁴ Hkrisduq Yesuq eq séng bê bang kùm gi, yubak gungsho ô nau hkyô lé le, hau é yut yut ô nau myit eq shirong é hkyô pé lé le, tapzing má jén sat pyâm beko nghut ri.

²⁵ Nga-nhúng gi, Woi-nyí mai asap dui bê nghut mù, haú Woi-nyí htâng châng nyi sháng.

²⁶ Nga-nhúng gi, akôm gyáng dang tái lui, rayuq eq rayuq jeq ho lhùm é eq manon lhùm é bang, a dut nyi sháng gaq.

6

Lhunglhang Bang Lé, Ge É Hkyô Kut Byi Râ Hkyô

¹ Gumang wui ê, rayuq yuq gi, mara záng kut shut é nghut jâng, Woi-nyí wum-o bò bê bang nungmoq gi, nùm é myit eq haú yuq lé

lhoq pun lhoq kyíng yù keq. Nghut kôhang, nàng gi, gunglaú é a hui sháng gaq, sidiq nyi aq.

² Rayuq eq rayuq é wôlai lét tê byi lhùm nyi keq; haú đông mai, nungmoq gi, Hkrisduq é tarâ lé wó lhoq dik kô rà nghut lhê.

³ Rayuq yuq gi, yhumsing gùng hai le a nghut é wá, ahkyak su ngam é nghut jâng, haú yuq gi, yhumsing gùng lé mhaú pyâm é sù nghut ri.

⁴ Yuq hkgangmó gi, yhumsing nyi yap é hkyô lé tái myit wú keq; haú hkûn, yhumsing gùng lé góbang eq whuí nó a rà e za, yhumsing gùng má aróng wó yù rà nghut lhê.

⁵ Hkâsu mù gâ le, yuq hkgangmó gi, ó le ô wò lét wùn waq ra rà dut lhê.

⁶ Haú mungdang lé mhoq yu é sù gi, mhoqshit byi sù lé, ge é zè banshoq gàm byi sháng gaq.

⁷ Garai Gasang lé gi, wó rhoi rà a nghut, yhumsing gùng yhumsing mhaúz é hkâhui nhâng kô; byú gi, hô kat é eq rajung za, shú yù rà nghut lhê.

⁸ Haú yhumsing é yubak gungsho lé lhoq ngón rà matú hô kat é sù gi, myit haú mai htên byoq é hkyô lé myang hkam yù rà nghut lhê; haú Woi-nyí lé lhoq ngón rà matú hô kat é sù kùm gi, Woi-nyí haú mai ahtum abyuq é asap lé myang hkam yù rà nghut lhê.

⁹ Nga-nhúng gi, ge é hkyô kut é má ngu byuq é bang a dut sháng gaq, hkâsu mù gâ le, haú lé nga-nhúng a tô pyâm é nghut jâng, ahkýing yam-yoq jé é hkûn, nga-nhúng gi, akyú myang hkam yù rà nghut lhê.

¹⁰ Haú mù lui, nga-nhúng gi, kut rà ahkýing wó tô é u lé, byú lhunglhang bang lé ge é hkyô kut byi sháng, haú lumjáng hkyô eq séng é ikun byu pé lé, je riyhang kut byi sháng.

Ahpyo-kuq Hpyit É Hkyô A Nghut E Za, Byú Sik Hpân Hui É Hkyô

¹¹ Ngò, nungmoq lé, ngá é loq èq hkâ-í kô é laiká cham ká kat byí é lé, wú wú keq!

¹² Ahtoq pyâm za ge é hkyô lé kut shit nau é bang gi, ahpyo-kuq hpyit kô sháng gaq ga, nungmoq lé zik shikut nyi é bang nghut akò; yhangmoq haú su kut é hkyô gi, Hkrisduq é tapzing é yanmai zing-ri hui é hkyô lé, koi pyâm rà matú za nghut ri.

¹³ Hkâsu mù gâ le, haú ahpyo-kuq hpyit é bang lhang jep é tarâ lé a châng kô nghut ri; nghut kôhang, yhangmoq gi, nungmoq é gungsho eq séng lui wó gumrông kô sháng gaq ga, nungmoq lé ahpyo-kuq hpyit nhâng nau akò nghut ri.

¹⁴ Ngò kùm gi, nga-nhúng é Yhumsing Yesuq Hkrisduq é tapzing eq séng lui gumrông é mai lai lui, hai má le a gumrông sháng gaq; Yhang é yanmai, mingkan gi, ngá é

matú jén sat é hui bê; ngò gi, mingkân é matú jén sat é hui bê nghut lhê.

¹⁵ Ahpyo-kuq hpyit é hkyô nghut nghut, a hpyit é nghut nghut, hai akyû a bò; byù sik hpân hui é hkyô za sheq, ahkyak é nghut lhê.

¹⁶ Tarâ haû lé châng é lhunglhâng bâng é ahtoq má le, haû Garai Gasâng é Israelaq byu pé* é ahtoq má le, nuingón hkyô eq shogyo nhikmyin hkyô gi, ru joq nyi sháng gaq ô.

¹⁷ Ahkuí mai gi, ó yuq le ngo lé jamjau a lhoq htoq byi lo sháng gaq; hkâsu mù gâ le, ngò gi, Hkrisduq é dui-nhâng zoshâng nghut é saksé damhkô lé wun wún lhê.

¹⁸ Gumang wui ê, nga-nhûng é Yhumsing Yesuq Hkrisduq é jeju gi, nungmoq é woi-nyi eq ru joq nyi sháng gaq. Amen.

* **6:16** Bun zo shí lhum mã é *Israelaq byu pé gâ* é gi, hpúng byù wui banshoq lé tai nau é nghut lhê.

EHPESU Pê Chyáng Hun Kat é Laiká (Ephesians)

¹ Garai Gasang ô nau é eq rajung za, Hkrisduq Yesuq é lagyo nghut sù, ngò Poluq gi, Ehpesu myuq má nyi é, Hkrisduq Yesuq má lhumzui bang nghut é, haù sân-yúng bang chyáng nguingón dang shit kyô kat lhê.

² Nga-nhúng é Íwa Garai Gasang eq Yhumsing Yesuq Hkrisduq chyáng má é, jeju eq nguingón hkyô gi, nungmoq chyáng ru joq nyi sháng gaq ô!

Hkrisduq Má É, Woi-nyí Hkyô Shimân Jeju Pé

³ Mauhkúng htoq tsáng myhâng má, woi-nyí hkyô eq sêng é shimân jeju jung hkangmó lé, Hkrisduq má nga-nhúng lé shimân byi sù, nga-nhúng é Yhumsing Yesuq Hkrisduq é Yhângwa, Garai Gasang gi, hkungsó wó nyi sháng gaq.

⁴ Hkâsu mù gà le, nga-nhúng gi, Garai Gasâng é hí má, chyoiyúng é bang eq mara a bo é bang dut rá matú, Garai Gasang gi, mingkan lé a hpân shi mai, Hkrisduq Yesuq má nga-nhúng lé hkyin yu to bê nghut ri.

⁵ Hau htoq agó, Yhang, nga-nhúng lé chyitdap é yanmai, Yhang myit ngui ô nau é eq rajung za, Yesuq Hkrisduq mai yhangzô pé kut yu rá matú, hí mai nga-nhúng lé masat to bê nghut ri.

⁶ Haù mù, Yhang chyitdap é Sù* má, nga-nhúng lé láí láí byi bê nghut é, hpungwup shingkan bo é jeju chyunghuq lé, chòm hkya-on sháng.

⁷ Garai Gasâng é agùn agó é jeju yanmai, nga-nhúng mara hkyut byi é hui luí, Yhang Zô é sui đông mai, nga-nhúng gi, Yhang má hkyi yu hkyô wó yu é nghut lhê.

⁸ Jeju haù lé gi, hpaqchyí byéng-yá eq sê gyô é nyan banshoq le kut, Yhang, nga-nhúng lé agùn agó byi bê nghut lhê.

⁹ Garai Gasang gi, Yhang myit ngui é eq rajung za, Hkrisduq đông mai kut rá matú hen to bê nghut é, Yhâng é záu tô é hkyô lé, nga-nhúng lé shit bê nghut ri.

¹⁰ Sê gyo wuí é hkyô haù gi, lhoq dik rá ahkying jé jáng, mauhkúng htoq eq myigùng htoq má é lunglhang lé, Hkrisduq má rad-ing ralhüm za kut rá nghut é hkyô nghut lhê.

¹¹ Hkrisduq má sân-hi myit myoqbyù bang nghut é nga-nhúng gi, Yhâng é hpung-wup shingkan lé hkya-on kungtôn sháng gaq ga.

¹² Garai Gasang gi, Yhang myit sôn tô é lunglhang lé ban kut mù, Yhâng ô nau é đông, hí mai myit hpyit doqdân to bê eq

rajung za, nga-nhúng lé le, Hkrisduq má hkyin yu to bê nghut ri.

¹³ Hau htoq agó, nungmoq le, nungmoq é hkyi yu hkyô é gabú danglù gà é tengmán mungdang lé wó gyo kô é hkùn, Hkrisduq eq sêng é bang dut bekò nghut ri. Nungmoq gi, Hkrisduq lé lumjing bekò nghut é yanmai, haù gidiq byi tô é Chyoiyúng Woi-nyí dizik htung tap byi é hui bekò nghut ri.

¹⁴ Garai Gasâng é hpungwup shingkan lé hkya-on rá matú, Yhang eq sêng é byu pé hkyi xe yu hui é hkying jé shoq, Chyoiyúng Woi-nyí haù gi, nga-nhúng é muizè lé hkyak wó yu rá nghu é masat nghut ri.

Poluq Kyúdung Byi É Hkyô

¹⁵ Haù mù luí, Yhumsing Yesuq lé nungmoq lumjing é hkyô eq sân-yúng bang lunglhang lé nungmoq chyitdap é hkyô lé, ngò wó gyô é yanmai,

¹⁶ ngò gi, ngá é kyúdung dang má nungmoq lé myit bun uchyang, anum yhang, nungmoq é matú jeju hkya-on nyi lhê.

¹⁷ Nga-nhúng é Yhumsing Yesuq Hkrisduq é Garai Gasang nghut é, hpungwup shingkan bò sù haù Íwa gi, Yhang lé nungmoq je sé rá matú, hpaqchyí byéng-yá wó byi é eq san za wó sé nhang é Woi-nyí, nungmoq lé byi sháng gaq nghù, ngò, Yhâng chyáng dúng nyi lhê.

¹⁸ Hau htoq agó, Yhang, nungmoq lé ji yu é myit myoqbyù hkyô, hkasú é nghut é lé le, Yhâng é hpungwup shingkan bo é muizè gi, sân-yúng bang chyáng agùn agó joq nyi é hkyô lé le, Yhâng é kô dik é a-tsam mó gi, lumjing bang nga-nhúng é matú nghut é lé le,

¹⁹ nungmoq wó sé rá matú, nungmoq é myit myoqji lhoq gyeng byi é hui sháng gaq nghù, ngò kyúdung byi nyi lhê. A-tsam mó haù gi, Garai Gasang, Hkrisduq lé shi é mai lhoq dui toq yu mù,

²⁰ mauhkúng htoq tsáng myhâng má, Yhâng é loqyô hkyaon shut zùng nhang é hkùn, chung é wum-o a-tsam mó eq rajung za nghut ri.

²¹ Hkrisduq gi, uphkan é, ahkáng ayá wó é, a-tsam bo é eq up zô é bang banshoq htoq má le, ahkuí pyat eq htang pyat má myhâng é mying lunglhang é htoq má le, je gyaú é sù nghut lhê.

²² Hau htoq agó, Garai Gasang gi, lunglhang lé Yhâng é hkyiwa ô má tô to luí, haù noqkuq hpung é matú, Yhang lé, jung hkangmó é ushuq dut rá đông masat to bê nghut ri.

²³ Noqkuq hpung haù gi, Hkrisduq é gungdu nghut luí, hkyô hkangmó má jung hkangmó lhoq bying jup é Hkrisduq bying nyi é nghut ri.

* 1:6 Yhang chyitdap é Sù gà é gi, Yesuq lé tai nau é nghut lhê.

2

Hkrisduq Má Asak Dui É Hkyô

¹ Lai lô bê hkûn, nungmoq gi, tarâ lu lai é eq mara kut shut é hkyô pé é yanmai, shi tô é bang dut kô é nghut lhê.

² Haú hkûn, nungmoq gi, mingkan ngón hkyô pé má lhaq châng nyi kô é htoq agó, haú tarâ a châng bâng é myit má ahkuí mù zui nyi é sobyô nghut é, maulat lé up sù htâng châng nyi kô é bang nghut lhê.

³ Nga-nhúng banshoq bang le, yhangmoq su kut nyi lai lo é bang chyat nghut mù, yubak mara byíng é suissho ô nau gadaú hkyô má nyi é bang nghut é htoq agó, gungsho ô nau é hkyô pé eq myit é hkyô pé đông za châng wú é bang nghut lhê. Haú mù, góbang eq rajung za, nga-nhúng gi, Garai Gasâng é nhikmo-yo hkyô eq gingdán wú é bang chyat nghut lhê.

⁴ Nghut kôlhang, shogyo nhikmyin myit gyaí bo é Garai Gasang gi, nga-nhúng, tarâ lu lai lui shi byuq bê bang dut kôlhang, Yhâng é chyitdap myit mó èq, nga-nhúng lé chyitdap lui, Hkrisduq eq rahá asak dui nhâng bê nghut ri.

⁵ Haú mù, nungmoq gi, Garaí jêú èq za hkyi yu é hui bekô nghut ri.

⁶ Garai Gasang gi, Hkrisduq Yesuq má, nga-nhúng lé, Yhâng é ge é hkyô shit bê nghut mù, a unq tai é Yhâng é jêú lé, htang pyat má wó shit sháng gaq ga,

⁷ nga-nhúng lé, Hkrisduq eq rahá lhoq dui toq yù mù, mauhkûng htoq tsáng myhâng má, Yhang eq rahá zùng nhang to bê nghut ri.

⁸ Hkâsu mù gà le, nungmoq gi, lumjîng é đông mai Garaí jêú èq za hkyi yu é hui bekô nghut ri. Haú gi, nungmoq chyáng má é a nghut, Garai Gasâng jêú chyunghuq za ru nghut lhê.

⁹ Haú gi, yhumsing é muzó mai wó é a nghut é yanmai, ó yuq le nghutbun rá hkyô a joq.

¹⁰ Hkâsu mù gà le, nga-nhúng gi, Garai Gasâng é loqmú pé nghut mù, nga-nhúng zui sai rá matú, hí hí mai, Garai Gasang hen lajâng tô é ge é muzó pé lé zui sai rá matú, Hkrisduq Yesuq má hpan to hui bê bang nghut lhê.

Hkrisduq Má Rading Ralhum

¹¹ Haú mù lui, nungmoq gi, hí hkûn, hku lé lo é mai yhang tungbaú pé nghut é hkyô lé le, byu loq èq za gungsho má kut é, "ahpyo-kuq hpyit hkâm bang" gà é bang mai, nungmoq lé, "ahpyo-kuq hpyit a hkâm bang" ga byi kô é hkyô lé le, myitbun keq.

¹² Haú u lé, nungmoq gi, Hkrisduq eq gâng lhúm tô é bang; Israelaq mingbyú a nghut

é bang; danggidiq eq sêng é dangshikaq pé má gó ming byù nghut é bang; mingkan htoq má, myoqbyù jowô a joq é eq Garaí a wó é bang nghut é lé, myitbun keq.

¹³ Nungmoq gi, hí hkûn wê gâng nyi é bang nghut kôlhang, ahkuí kúm, Hkrisduq é sui đông mai Hkrisduq Yesuq má shuí chyâng hteq é hui bekô nghut ri.

¹⁴ Hkâsu mù gà le, Yhânggùng yhang gi, nga-nhúng é nguingón hkyô nghut ri. Yhang gi, gyoro má kyo tô é madin nghut é a nau a wom hkyô lé hpyoq hpyi pyám byi lui, haú í myú* dut nyi é lé, rahú za dut nhâng bê nghut ri.

¹⁵ Haú hkunmó pé eq hkgang tô é tarâ pé bo é jep é tarâ lé, Yhâng é gungsho má lhoq htùm pyám bê nghut ri. Haú mù, Yhang ô nau é hkyô gi, haú í myú dut tô é lé, Yhânggùng má yhang, byù sik ra-myú za hpan to rá matú nghut ri; haú đông, simsaq hkyô kut byi bê nghut ri.

¹⁶ Yhang gi, a nau a wôm lhúm é hkyô lé, haú tapzîng má lhoq htùm pyám byi mù, haú tapzîng dông mai, byu myu í myu é lé ragùng za kut lui, Garaí Gasang eq xoq byi bê nghut ri.

¹⁷ Yhang gi, wê gâng nyi é bang† nungmoq lé le, chyâng hteq nyi é bang‡ lé le, simsaq hkyo é danglù lé hko kyo bê nghut ri.

¹⁸ Hkâsu mù gà le, nga-nhúng í myú gi, Yhang dông mai, Woi-nyí ralhumm zâ èq, haú íwá chyáng wàng rá hkyô dong bê nghut ri.

¹⁹ Hau é yanmai, nungmoq gi, tungbaú pé eq byù bíng pé a nghut lô é za, Garaí é byu pé eq rahá, mingbyù wui eq yhumbyù wui chyat nghut bekô nghut lui,

²⁰ haú lagyô pé eq myiqtoí pé, hí tô é apùn awang htoq má xuq tô é bang chyat nghut akô; Hkrisduq Yesuq yhang, haú má é ahkyak é htungchyùn luqgok dut bê nghut ri.

²¹ Yhang má, wahpang lhum gón xoq lhúm bùm é nghut mù, haú Yhumsing má chyoyíung noqkuq yhúm ralhumm dut lò bê nghut ri.

²² Woi-nyí dông mai, Garaí Gasang nyi rá jang dut rá matú, nungmoq le, Yhang má, wahpang su tsuq é chôm hui nyi bùm bekô nghut ri.

3

Poluq, Tungbaú Pé É Tarâ Hkô Sará

¹ Haú su nghut mù, Hkrisduq Yesuq é hkyô lé, nungmoq tungbaú pé chyáng hko kyô é yanmai, htongbyù dut sù, ngò Poluq gi, nungmoq é matú kyúdung byi lhê.

* 2:14 I myú gà é gi, Israelaq byu pé eq tungbaú pé lé gà lhê.

† 2:17 Wê gâng nyi é bang gà é gi, tungbaú pé lé gà lhê.

‡ 2:17 Chyâng hteq nyi é bang gà é gi, Israelaq byu pé lé gà lhê.

² Nungmoq lé dojaú rã é matú, ngo lé byí tã é Garai Gasâng jeju ayá shí lé, nungmoq gè gè wó gyô wú bekô rã nghut lhê.

³ Haú gi, hí hkún, ngò, tot é dông kê tô wú bê eq rajung za, haú záu tô é hkyô lé, shing-rân dông ngo lé sé nhang é nghut ri.

⁴ Haú hkyô lé, nungmoq nghap wú é hkún, Hkrisduq eq sêng é záu tô é hkyô, ngò rago sê é lé, nungmoq wó sé kó rã nghut lhê.

⁵ Haú lé, lai lò bê ipyat pé mã é byu pé lé a sé nhang é nghut kôhang, ahkuí gi, Garai Gasâng é chyoiyúng é, lagyô pé eq myihtoí pé lé, haú Woi-nyí eq hpông shit bê nghut ri.

⁶ Záu tô é hkyô haú gi, gabú danglù dông mai, Hkrisduq Yesuq má, Israelaq byu pé eq rahá, tûngbaù pé le, hkúng xoq bang wó dut lui, gungdu ralhùm é gungsho showui showang pé chyat dut é eq, danggidíq byí tô é lé wó chòm hkam yu é bang dut é hkyô nghut ri.

⁷ Yhâng é hpungwup a-tsam mai, ngo lé byí tô é Garai Gasâng jeju chyunghuq é yan-mai, ngò gi, gabú danglù shí tái rã dui-nhâng zoshâng dut é nghut lhê.

⁸ Ngò gi, haú Garai Gasâng é byu pé mã é tiq dik sú htoq má lhâng je tiq sú nghut kôhang, haú Hkrisduq é a ung htoq tái é wó sùt hkyô lé, tûngbaù pé chyâng hko kyo rã matú le,

⁹ haú lhungháng lé hpan é Garai Gasang má, lai lò bê ipyat pé mã záu tô é, záu tô é hkyô haú lé hkásu kut tô é lé, yuq hkgangmó lé tái sân kyo rã matú le, jeju shí, ngo lé byí bê nghut ri.

¹⁰ Haú gi, nga-nhúng é Yhumsing Hkrisduq Yesuq má lhoq pán bê nghut é, Yhang ahtum abyuq myit hpyit tô bê eq rajung za,

¹¹ haú Garai Gasâng é hpaqchyí mó góng lé, noqkuq hpúng dông mauhkúng htoq tsáng myhâng mã é uphkáng bang eq ahkáng ayá wó bang lé, ahkuí sé nhâng rã matú nghut lhê.

¹² Nga-nhúng gi, nga-nhúng é Yhumsing Hkrisduq Yesuq eq rading ralhùm za nghut é yanmai le, Yhang lé lumjúng é yanmai le, Garai Gasang chyâng, wám é myit eq a gyuq a wám é myit eq wó htep é é nghut lhê.

¹³ Haú mù lui, ngò, nungmoq lé dúng tôngbán nau é gi, nungmoq é matú, ngò wuihke jamjau hui zô é yanmai, nungmoq i-myt hkâgyui kó; haú gi, nungmoq é matú akyú bò rã hkyô nghut lhê.

Ehpesu Myuq Byu Pé Lé Kyúdung Byí É Hkyô

¹⁴ Haú pé é yanmai, ngò gi, haú Íwã é hí má hkyihput htuq lui kyúdung é nghut lhê.

¹⁵ Mauhkúng eq myigùng htoq mã é Yhâng é ikun byú lhungháng gi, Yhâng chyâng mai mying wó yu é chyat nghut lhê.

¹⁶ Nungmoq é lumjúng myit mai, nungmoq é i-myt unghkaú má Hkrisduq wó nyi nyi sháng gaq nghú,

¹⁷ Yhang é hpungwup shingkang bo é agùn agó wó sùt é mai, nungmoq é i-myt unghkaú mã é sù lé, Yhâng é Woi-nyí dông, hpungwup a-tsâm eq wum-o lhoq kíng byí rã matú, ngò kyúdung byí lhê. Hau htoq agó, nungmoq gi, chyitdap myit má amyit chin to lui, awang hi to mù,

¹⁸ sân-yúng bang eq rahá, hau é apyí, a-tsúng, myhâng, nik, hkâ-í nghut é lé, rago wó sé kólui,

¹⁹ Garai Gasâng é gumjup é hkyô lhunghâng eq wó lhoq gumjup yù kó sháng gaq nghú, sê é nyan htoq mã gyaú é Hkrisduq é chyitdap hkyô lé, nungmoq wó sé rã matú, ngò kyúdung byí lhê.

²⁰ Ahkuí, nga-nhúng é hkaú mã mù zui nyi é, Yhâng é wum-o a-tsâm é yanmai, nga-nhúng dúng é banshoq eq myit é hkyô lhungháng htoq je wó kut byí é Su chyáng,

²¹ haú noqkuq hpúng é yanmai le, Hkrisduq Yesuq é yanmai le, pyat pyat tái tái, ahtum abyuq, hpungwup shingkang rù bo nyi sháng gaq ô! Amen.

4

Hkrisduq É Gungdu Má Rading Ralhùm Za

¹ Haú mù lui, nungmoq gi, nungmoq lé wut yù bê nghut mù, wut yu é hkyô eq gingdán é dông asak duì keq nghú, haú Yhumsing é yanmai, htóng lúng sú ngò Poluq gi, nungmoq lé lhoq pun lhoq kyíng kat lhê.

² Hkyô hkat hkgangmó mã i-myt lhoq nyum é eq i-myt nú-nhâm nyi keq; myit hing é eq chyitdap myit mai rayuq eq rayuq hkam jân lhum nyi keq.

³ Haú Woi-nyí eq byí é myit hui hkyô lé, nguínón hkyô dông mai châng nyi rã matú, wó dut é í shikut nyi keq.

⁴ Nungmoq gi, wut yù hui kô é hkún, myit myoqbyú hkyô rashut za wut yù hui bekô nghut é eq rajung za, gungdu ralhùm eq Woi-nyí ralhùm za nghut nyi ri.

⁵ Yhumsing rayuq za, lumjúng hkyô rahkat za, baptilma ralhùm za nghut nyi ri.

⁶ Banshoq bâng é Íwa nghut sú Garai Gasang le, rayuq za nghut nyi ri; Yhang gi, banshoq bâng é ahtuq mã nghut lui, lhungháng dông mai mù kut é eq lhungháng é ahkaú mã lúng nyí sú nghut ri.

⁷ Nghut kôhang, nga-nhúng yuq hkgangmó gi, jeju chyunghuq lé, Hkrisduq mai ké byí é dông wó yu é nghut lhê.

⁸ Hau é yanmai,

"Yhang gi, myhang é jowò shut doq ló é hkûn, shúm zung é bang lé gi, shuí chûng mù, byu pé lé gi, chyunghuq tsing gam byí ri."⁸

ga, Chyúmdang má tai tó é nghut lhê.

⁹ Haù "doq ló" gâ é lichyúm gi, myigùng é a-o tsáng má le, Yhang gyó jé bê nghut lhê, gá naù é a nghut lhi?

¹⁰ Haù gyó lé é Sù gi, junghkang jungmó lé lhoq bying Jup rà matú, mauhkûng banshoq é ahtoq má doq ló é Sù yhang nghut lhê.

¹¹ Yhang gi, ra-am lé, lagyô pé, ra-am lé, myiqtôi pé, ra-am lé, gabú danglù hko kyo rà bang, ra-am lé, hpùng-up pé eq sará pé kut tsing byí to bê nghut ri.

¹² Haù bang gi, Garai Gasâng é byu pé lé wùn waq âng é muzó pê é matú, hen lajàng é bang nghut ri. Haù hkûn sheq, Hkrisduq é gungdu gi,

¹³ haù lumjúng hkyô eq Garai Gasâng é Yhangzô lé sê é hkyô mã, nga-nhúng banshoq bang rading ralhum za wó dut mù, kô ðing bang dut lui, Hkrisduq é gumjup é isâm banshoq lé wó yu é hkûn jé shoq, wó kô jat nyí rà nghut lhê.

¹⁴ Haù mù, nga-nhúng gi, wuibaù pé eq hí shut htâng shut bat myhù é su dut é eq, byu pé é agè ashop é eq haq dâ é mhoq hpyoq hpaqchyí pé eq mhoqshit hkyô laidun hkangmó èq, shí shut hé shut mut tâng é su dut é lé lui zô é zoshâng wui su a nghut lô é za,

¹⁵ chyitdap myit mai tengmán é dang lé tai nyí jáng, Hkrisduq nghu é ulhum má hkyô hkangmó kô myhang lò rà nghut lhê.

¹⁶ Yhang ðong mai, gungdu gón gi, ralhú eq ralhú htugbâng é gungsho showui showang pé lé xoq byí to bê nghut mù, gungsho showui showang haù pé gi, yhumsing é muzó lé zui sai nyí é nghut jáng, gungdu haù gi, chyitdap myit má, yhanggùng yhang kô lò myhang lò rà nghut lhê.

Byù Sik ðong Asak Dui Rà Hkyô

¹⁷ Haù mù lui, haù Yhumsing é ahko ahkáng mai ngò nungmoq lé tai nau é hkyô gi, haù túngbaù pé gi, akyú a bo é lé myit mù, asak dui kô é su, nungmoq gi, hkákut kó.

¹⁸ Yhangmoq gi, sé gyô é nyan chut byuq bekò nghut é eq yhangmoq myit htan nyí kô é nghut mù, haì le a sé kô é yanmai, Garai Gasang byí é asak eq wê gâng byuq bekò nghut ri.

¹⁹ Yhangmoq gi, gyuq hoq hkyô a bo byuq lo kô é yanmai, myoqnoq myit ðong a sansêng é hkyô jung hkangmó lé je wó kut xoq nyí shoq ga, yhumsing gunglé, gungsho ô nau gadaù é hkyô má ap pyám bekò nghut ri.

²⁰ Nungmoq kúm gi, Hkrisduq é hkyô lé haù ðong mhoq yu kô é a nghut.

²¹ Nungmoq gi, Yesuq chyáng mã é tengmán hkyô ðong, Yhâng é hkyô lé wó gyô wú é eq mhoq yu wú bekò nghut lhê.

²² Haù mù, nungmoq gi, hí hpyang lhê é nungmoq é nyí yap sâmlai nghut é, ô nau gadaù lui, yhumsing gung yhumsing mhaù pyám é ðong htên byoq ló nyí é nungmoq é byù xau lé tò pyám rà matú mhoq yu bê eq rajung za,

²³ nungmoq é i-myt lé asik htaì pyám nhâng keq;

²⁴ hau htoq agó, nungmoq gi, tengmán é eq sêng é ðingmán hkyô eq chyoiyúng hkyô mã, Garai Gasang eq dù shoq hpan to hui bê nghut é byù sik lé, yu wut to keq.

²⁵ Haù mù, nga-nhúng banshoq bang gi, gungdu ralhú é gungsho showui showang pé chyat nghut é yanmai, nungmoq yuq hkangmó gi, mhaù é hkyô lé tò pyám lui, yhumsing é chyangnâm mã é sù lé, tengmán é dang tai ra rà nghut lhê.

²⁶ "Nungmoq nhikjum yô é hkûn, mara hkákut kó."²⁷ nungmoq gi, bui wàng shoq nhikjum hkâyò nyí kó.

²⁷ Nat Tsadán lé le, jowò hkâbyi kó.

²⁸ Hkau sù gi, a dum hkau lo sháng gaq; rà nyí é bang lé, rajung jung wó gam byi shoq, yhumsing é loq èq akyú bo é hkyô pé lé kut nyí lui, muzó zui shikut ra rà nghut lhê.

²⁹ Nungmoq é nhut mai agè agaù é dang haì le hkâhtoq nhâng kô; wó gyô é bang akyú bò shoq, yhangmoq rà tò é má cháng lui, haù bang kô lam lò rà dang za tai keq.

³⁰ Haù hkyi yù rà buinyi é matú, dizik ðong nungmoq lé rap to byí é Garai Gasâng é Chyoiyúng Woi-nyí lé hkâlhoq yón kó.

³¹ Haù myit tot é, nhikjum yô é, nhik-yô é, byoq lhum byoq cheq é eq lumù gansang é, agè agaù é hkyô pé banshoq lé, nungmoq tò pyám keq.

³² Nungmoq gi, rayuq eq rayuq, ge é hkyô eq shogyo nhikmyin é hkyô tún shit lhum lui, Garai Gasang gi, Hkrisduq má, nungmoq lé mara hkyut byí é su, nungmoq yhangchang le mara hkyut byí lhum nyí keq.

5

¹ Haù mù, nungmoq gi, chyitdap dik é zoshâng wui nghut é yanmai, Garai Gasang lé alik yu é bang kut keq.

² Hkrisduq gi, Yhânggùng lé namngón jung hkungga eq shigu hkungga ðong, nga-nhúng é matú Garai Gasâng chyáng Yhânggùng yhang ap byí pyám shoq, nga-nhúng lé chyitdap é su, nungmoq le chyitdap myit èq asak dui nyí keq.

³ Hau htoq agó, ashop é ðong gungsho zùm yap é hkyô, a sansêng é hkyô hkangmó eq myoqnoq é hkyô pé lé, nungmoq tai lhang

hkâtaî kó; hkâsu mù gà le, nungmoq gi, Garai Gasâng é chyoiyúng byu pé nghut lhê.

⁴ Haù eq rajung za, a tai gíng é, ahoq ahî dang, dangsôm eq hkunchôq dông gyâ é dang pé lé a tai é za, jeju hkya-on dang za tai nyi keq.

⁵ Hkâsu mù gà le, ashop é dông gungsho zùm yap é hkyô kut shut sù, a sansêng é sù eq hparà noq é sù nghut é myoqnoq sù ó yuq nghut kôlhang, Hkrisduq eq Garai Gasâng é mingdán má muizè a wó é hkyô lé, nungmoq sê nyi keq.

⁶ Ó yuq nghut kôle, dangsôm* dông mai nungmoq lé a wó mhaù kó sháng gaq; hkâsu mù gà le, haù hkyô pé é yanmai, Garai Gasâng é nhikmo-yo hkyô gi, haù jìno a gyo bâng é ahtoq má jé rà nghut lhê.

⁷ Haù mù luí, haù bâng chyáng hkâbo wang lòm kó.

⁸ Hkâsu mù gà le, nungmoq gi, hí hpyang mauchut tuq dut é bang nghut lhê; nghut kôlhang, ahkuí gi, haù Yhumsing má maubó pé nghut bekó nghut ri.

⁹ Haù Yhumsing ô nau é hkyô hai nghut é lé ho htoq yú mù, maubó é yhangzò pé dông asak dui keq.

¹⁰ Hkâsu mù gà le, haù maubó é ashí gi, ge é hkyô banshoq, dingmán é hkyô eq tengmán hkyô chyat nghut ri.

¹¹ Haù ashí a zuí é mauchut tuq muzó má a bo wang lom é za, yhangmoq é mara lé tún shit keq.

¹² Hkâsu mù gà le, haù jìno a gyo bang haq zaú kut é hkyô lé gi, tai htoq le lháng hoq hpo nghut ri.

¹³ Nghut kôlhang, junghkang jungmó lé, haù maubó eq tún shit jáng gi, wó byu-myang é chyat dut rà nghut lhê.

¹⁴ Hkâsu mù gà le, junghkang jungmó lé byu-myang nhang é gi, maubó nghut ri. Hau é yanmai,

"Yhup ngón nyí sù ê, toq aq, haù shí é mai dui toq aq hko; haù jáng, Hkrisduq gi, nang lé duqbó byi rà nghut lhê."[†]
ga luí tai tò é nghut lhê.

¹⁵ Haù mù luí, nungmoq hkâsu kut asak dui é hkyô má gyai sidiq nyi keq; hpaqchyí a bò bang su a nghut é za, hpaqchyí bò bang su kut nyi keq.

¹⁶ Buinyi ahkyíng shí pé gi, agè ashop é yanmai, wó é ahko ahkáng banshoq lé ge dik é dông chung jai keq.

¹⁷ Hau é yanmai, byù ngok pé a dut é za, haù Yhumsing ô nau é hkyô gi, hai nghut é lé, sê gyô yu nyi keq.

¹⁸ Haù achaq achyut é yubak hkyô lhoq htoq é î lé hkâshuq wut kó; Woi-nyí lé kúm byíng nhang nyi keq.

¹⁹ Nungmoq gi, hkya-on kungtôn dang dông le, hkya-on mahkôn dang dông le, woi-nyí eq sêng é mahkôn dông le, rayuq eq rayuq dang nyo lhum luí, nungmoq é i-myt hkôn mù, lhoq ngón nyi keq.

²⁰ Nga-nhúng é Yhumsing Yesuq Hkrisduq é myíng lé lang luí, jung hkangmó é matú, haù Íwa Garai Gasang lé, hkâ-nhám le jeju hkya-ôn nyi keq.

²¹ Hkrisduq lé hkungga hpautap é myit eq, rayuq eq rayuq hpautap lhum nyi keq.

Myi Eq Làng

²² Ikun myhí pé ê, haù Yhumsing uphkanq é dông châng é su, nungmoq é ikun hpò pé uphkanq é dông châng nyi keq.

²³ Hkâsu mù gà le, Hkrisduq gi, haù noqkuq hpúng é ulhum nghut é su, haù ikun hpó gi, ikun myhí é ulhum nghut nyi ri; Hkrisduq gi, haù Yhâng gungdu nghut é noqkuq hpúng lé hkyi yú Sù nghut ri.

²⁴ Haù noqkuq hpúng gi, Hkrisduq uphkanq é dông châng é su, ikun myhí pé le, hkyô hkat hkangmó má, yhangmoq é ikun hpò pé uphkanq é dông châng nyi rà lhê.

²⁵ Ikun hpò pé ê, Hkrisduq gi, haù noqkuq hpúng lé chyitdap luí, hau é matú Yhânggùng lé Yhang ap pyâm é su, nungmoq é ikun myhí pé lé chyitdap nyi keq.

²⁶ Yhang haù su kut é gi, haù noqkuq hpúng lé, mungdang dông wui má chí pyám luí, lhoq sân-yúng yú rà eq.

²⁷ Haù noqkuq hpúng gi, agè agáu é eq a-ká akóng é hkyô hai le a bo é za, mara hùn rà hkyô a bo é eq chyoiyúng é, hpung-wup shíngkang bo é noqkuq hpúng dông, Yhânggùng lé wó ap byi rà matú nghut lhê.

²⁸ Haù eq rajung za, ikun hpò pé gi, yhangmoq é ikun myhí pé lé, yhumsing gungdu lé su chyitdap rà dut lhê. Yhumsing é ikun myhí lé chyitdap é sù gi, yhumsing gùng lé le, chyitdap é sù nghut bê.

²⁹ Ó yuq le, yhumsing gùng lé a chyitdap a kut é za, Hkrisduq gi, haù noqkuq hpúng lé kut byí nyi é su, yhumsing gùng lé byi tso byi huq luí, rago wú zúng nyi é nghut lhê.

³⁰ Hkâsu mù gà le, nga-nhúng gi, Yhâng é gungdú é gungsho showui showang pé chyat nghut lhê.

³¹ Haù mù, "Hau é yanmai, yuqgè gi, ínu íwa eq gang luí, yhangmyi eq zùm-yap mù, yhangnhik í yuq gi, gungsho ralhum za dut kó rà nghut lhê."[†] gâ tò ri.

³² Haù hkyô gi, gyai yhang zaú tò é hkyô nghut ri. Nghut kôlhang, ngò gi, haù Hkrisduq é hkyô eq noqkuq hpúng é hkyô lé tai nyi é nghut lhê.

* 5:6 Dang sôm gá é gi, Garai Gasâng é nhikmo-yo hkyô a jé rà ga tai é dang nghut lhê. † 5:14 Dang ngho shí gi, hí lhê é noqkuq hpúng pé tai gyô lo é dang nghut lhê. ✪ 5:31 Apùn 2:24

³³ Haù mù, nungmoq yuq hkangmó gi, yhumsing gùng lé chyttdap é su, yhumsing é ikun myhí lé le chyttdap rà dut lhê; haù ikun myhí le, yhâng é ikun hpó lé hkungga rà dut lhê.

6

Zo Wuí Eq Mó Wuí É Hkyô

¹ Zoshâng wuí ê, haù Yhumsing má, nungmoq é mó wuí é jìno gyo keq; hkâsu mù gà le, haù gi, kut gíng é hkyô nghut ri.

² "Náng é ìnu ìwa lé hkungga aq.

³ Haù jáng, nàng, nyi ngón yuqyò mù, myidàm htoq má náng é asak chyungxe hing nyi rà nghut lhê."^o gà é dang gi, danggidiq lom é sâng-hí lhum hkunmó nghut ri.

⁴ Ìwa pé ê, nungmoq é zo wuí lé nhikjum a lhoq yô é za, haù Yhumsing é mhoq kyo hkyô eq mhoqshít lhoq pun hkyô dông yhangmoq lé baù kô nyi keq.

Jùn Pé Eq Junsing Pé É Hkyô

⁵ Jùn pé ê, nungmoq gi, Hkrisduq é jìno gyo é su, gyuq hkunggá é eq lhumzuí é myit mai, nungmoq é myidàm htoq mà é junsing pé é jìno gyo keq.

⁶ Nungmoq gi, yhangmoq é hí má za, myoqdong ho é dông kut é a nghut é za, Hkrisduq é jùn pé su, Garai Gasang ô nau é hkyô lé, nungmoq é i-myyit unghkaù mai châng kut nyi keq.

⁷ Byù lé za dojaù é dông a nghut é za, haù Yhumsing lé dojaù nyi é dông le, shirông myit eq dojaù nyi keq.

⁸ Hkâsu mù gà le, jùn nghut nghut, luthkyô wó sù nghut nghut, ge é hkyô kut nyi é nghut jáng, haù Yhumsing gi, yuq hkangmó lé shigyaù rà nghut é lé, nungmoq sê nyi lhê.

⁹ Junsing pé ê, nungmoq le, nungmoq é jùn pé lé haù eq rajung za kut byi nyi keq. Yhangmoq lé hkâkyuq zo kó; nungmoq sé é eq rajung za, yhangmoq eq nungmoq é Yhumsing hpó gi, mauhkung htoq má nyi é nghut luí, Yhang gi, myoqdong hkyin é hkyô a bo é sù nghut lhê.

Garai Gasâng É Gyê Hking

¹⁰ Ló htâng má, tái nau é hkyô gi, haù Yhumsing eq Yhâng é hpungwup a-tsam mó má wum-o bo nyi keq.

¹¹ Haù nat Tsadán wá dâ é hpaqchyí pé lé, nungmoq wó he-ngik pyám kó sháng gaq, haù Garai Gasâng é gyê hking banshoq lé wut to keq.

¹² Hkâsu mù gà le, nga-nhúng gi, gungsho eq sui lé htuq htíng é bang a nghut é za, haù uphkâng bang, ahkáng ayá wó bang, mauchut tuq dut é mingkan shi é a-tsam pé eq mauhkung htoq tsáng myhâng mà é agè ashop é byò eq sêng é wum-o pé lé, htuq htíng é bang ru nghut lhê.

¹³ Haù mù luí, Garai Gasâng é gyê hking banshoq lé wut to keq; haù hkùn sheq, nungmoq gi, agè ashop hkyô jé é buinyi má, yhumsing jowó má wó yap gíng to mù, hkyô hkat hkangmó lé ban kut jáng, wó yap gíng títng nyi kô rà nghut lhê.

¹⁴ Haù mù, nungmoq é hpyidum má tengmán hkyô hpyihit hit mù, dingmán hkyô wànggò-long lé gò luí,

¹⁵ nungmoq é hkyi má gi, haù simsaq hkyô byi é gabú danglù hkô rà ri ri kut to mù, gíng gíng yap nyi keq.

¹⁶ Hau htoq agó, haù agè ashop su é myiduk é myoshi lhunglhang lé wó sat ung pyám rà matú, lumjíng hkyô nghu é golong lé chung to keq.

¹⁷ Hkyi yù hkyô shamtoq muq lé tsùng to luí, Garai Gasâng é mungdang nghut é, haù Woi-nyi é shâm lé wun chùng keq.

¹⁸ Ahkyíng hkangmó má, kyúdung dang eq dúng tóngbán é dang ajung jùng eq, haù Woi-nyi má kyúdung nyi luí, machya nyi uchyang, sân-yúng bang banshoq é matú, hkâ-nhám le, xoq xoq kyúdung byi nyi keq.

¹⁹ Haù gabú danglu é yanmai, shamtoq-tui hut huí é lagyo rayuq ngò nghut nyi kôlhang, haù gabú danglù nghut é zaù tó é hkyô lé, a gyuq a wàm wó tái kyo luí,

²⁰ ngò tái rà dut é lé, a gyuq a wàm wó tái sân kyo shoq, ngá nhut hpóng hkangmó, ngò tái rà mungdang pé lé byi sháng gaq, ngá é matú le, kyú bo dung byi nyi keq.

Shi-kyám Dang

²¹ Haù Yhumsing má, chyttdap é gumang eq lhumzuí é dui-nhâng zoshâng nghut sù, Tuhkiku gi, nungmoq lé jung hkangmó tái kyo rà nghut luí, ngò hkâsu nghut nyi é hkyô eq haù kut nyi é hkyô lé, nungmoq wó sé kô rà nghut lhê.

²² Ngamoq hkâsu nghut nyi é hkyô lé, nungmoq wó sé rà eq, yhang, nungmoq lé myit wum wó byi rà matú za myit myoqbyù luí, yhang lé, ngò, nungmoq chyáng nhang kat é nghut lhê.

²³ Ìwa Garai Gasang eq Yhumsing Yesuq Hkrisduq chyáng mà é lumjíng hkyô má bo é chyttdap myit eq nguigón hkyô gi, haù gumang wui chyáng ru joq nyi sháng gaq ô!

²⁴ A dat htúm é chyttdap myit mai, nga-nhúng é Yhumsing Yesuq Hkrisduq lé chyttdap é lhunglhang bang chyáng, Garaí jeju gi, ru joq nyi sháng gaq ô!

^o 6:3 Htoq Ló 20:12

HPILIPÍ Pê Chyáng Hun Kat é Laiká (Philippians)

¹ Hkrisduq Yesuq é jùn nhik, Poluq eq Timohti gi, Hpilipi wà mó má nyi é, Yesuq Hkrisduq má sân-yúng bang lhunglhang eq, hpung-up, hpungte pé lé, dang kyô kat lhê.

² Nga-nhúng é Iwa Garai Gasang eq Yhumsing Yesuq Hkrisduq chyáng má é jeju eq nguingón hkyô gi, nungmoq chyáng ru joq nyi sháng gaq ô.

Jeju Hkya-ôn É Hkyô

³ Ngò gi, nungmoq lé myit bün kat hkangmó, ngá é Garai Gasang lé jeju hkya-ôn nyi lhê.

⁴ Ngò gi, kyúdung hkangmó, hkâ-nhám le nungmoq banshoq bâng é matú gabú myit éq dung byí nyi lhê.

⁵ Hkásu mù gà le, nungmoq gi, sâng-hí nyi mai ahkuí jé shoq, gabú danglù má ngò eq chòm zùm yap nyi é yanmai nghut lhê.

⁶ Haù nungmoq má ge é muzó kut hí é sù Garai Gasang gi, Yesuq Hkrisduq é buinyi jé shoq muzó haù lé lhoq pán rá nghut lhê nghù, ngò hkyak myit lum tô lhê.

⁷ Nungmoq banshoq bang gi, ngá é i-myit má bo to bê bang nghut é yanmai, nungmoq banshoq bang eq séng luí, ngò shí dông myit nyi é gi, gíng lhê; hkásu mù gà le, ngò kyum hut huí tô é u lé le, haù gabú danglù hkyô lé taí húng luí, lhoq gíng é u lé le, nungmoq gi, ngò eq rahá Garai Gasang jeju chòm hkám yu é bang nghut lhê.

⁸ Hkrisduq Yesuq é chyitdap myit dông, nungmoq banshoq bang lé, ngò hkâ-í myit chyit nyi é hkyô lé, Garai Gasang gi, ngá é saksé nghut lhê.

⁹ Hau htoq agó, nungmoq gi, je ge é hkyô lé dat gam hkoq mù, Hkrisduq é buinyi má sanséng luí mara a bo é za,

¹⁰ Garai Gasang é hpungwup shingkanq eq hkya-on kungtón hkyo é matú, Yesuq Hkrisduq é yanmai lo é dingmán hkyo é ashí wó byíng nyí sháng gaq nghù le;

¹¹ nungmoq é chyitdap myit gi, tengmán é hpaqchyí eq wó sê é nyan banshoq má je riyhang kó jat lò sháng gaq nghù le, ngò kyúdung nyi lhê.

Dui Nyi Le Gi, Hkrisduq É Matú

¹² Gumang wui é, ahkuí ngò nungmoq lé sé nháng nau é hkyô gi, ngò má hai dut lai lò bê hkyô pé gi, gè gè yhang gabú danglù ríng jat lò rá matú dut lò bê nghut ri.

¹³ Hau é yanmai, haù hkohkâm-wàng zúng é lhunglhang bang eq gotú banshoq bâng é hí má, Hkrisduq é yanmai ngò kyum hut huí é hkyô, de de dut htoq bê nghut ri.

¹⁴ Hau htoq agó, ngò htóng lúng é yanmai, haù Yhumsing Yesuq má gumang wui nghut é myo mi-myó gi, myit wum wó yú kómù, Garai Gasang é mungdang lé, je riyhang a gyuq a kyum wám hko kyo bekó nghut ri.

¹⁵ Gè gè yhang byú ra-am gi, Hkrisduq é hkyô lé manon é myit eq lú lhum bat zik é myit mai hko kyô nyi bum akó. Nghut kólhang, byú ra-am gi, ge é myit mai hko kyô bum akó nghut ri.

¹⁶ Ge é myit mai hko é bang gi, gabú danglù lé húng rá matú ngo lé hkyin é hkyô lé, yhangmoq sé kómù, chyitdap myit éq hko kyô é bang nghut akó.

¹⁷ Haù góbang chyaú gi, sanséng é i-myit eq a nghut é za, ngò kyum wut é hkyô má wuihke jamjau jat byi rá matú, myit nyi büm kô é nghut mù luí, Hkrisduq é hkyô lé yhumsing é wuizat é dông za, hko taí nyi bum akó nghut ri.

¹⁸ Nghut kólhang, haù gi, hai rá ri lú? Yhumsing wuizat é dông hko é nghut nghut, tengmán é dông hko é nghut nghut, hkyô hkat hkangmó má Hkrisduq é hkyô lé hko pyo kat é nghut mù luí, ngò gi, hau é yanmai, gabú nyi lhê.

Gè gè yhang, ru gabú nyi shirá nghut lhê.

¹⁹ Hkásu mù gà le, nungmoq kyúdung byí é eq Yesuq Hkrisduq é Woi-nyí garám é yanmai, ngò má dut lai lò bê hkyô gi, ngò wó luthkyô dut rá nghut é lé ngò sê lhê.

²⁰ Ngò myit láng tô é eq myit myoqbyú tô é má, ngò gi, hoq nó hai a rá é za, hí hkun lhê su, ahkuí le, dui nyi kólhang, shí byuq kólhang, gyuq kyum myit a bo é hkyô lé wó yú mù luí, Hkrisduq gi, ngá gúng má hkya-on waq toq é hui rá nghut lhê.

²¹ Hkásu mù gà le, ngò, asak dui nyi le gi, Hkrisduq é matú, shí jáng gi, ngá e amyat nghut ri.

²² Nghut kólhang, ngò gi, gungsho má rú dui nyi mù, ngò kut é muzó má ashí zui lo é nghut le gi, hká lhum lé sheq hkyin yu le gè rá lú?

²³ Ngò gi, hkyô í hkat gyoro má hká hpyang le a hkap dut tô ri; shí lò luí Hkrisduq eq rahá nyi rá lé gi, ngò ô nau ri, hkásu mù gà le, haù gi, je ge é hkyô nghut ri.

²⁴ Nghut kólhang, ngò gungsho má dui nyi le gi, nungmoq é matú akyú je bò rá nghut lhê.

²⁵ Haù mù, ngò gi, shí hkyô lé hkyak myit lum to luí, lumjáng hkyô má nungmoq kó jat lo é eq gabú nyi rá matú, nyi gyó luí, nungmoq lhunglhang bang eq nyi nyi rá hkyô lé, ngò sê lhê.

²⁶ Haù mù luí, ngò nungmoq chyáng dum jé lé é hkùn, ngá é yanmai, Hkrisduq Yesuq má nungmoq é gabú hkyô gi, je riyhang jat lò rá nghut lhê.

²⁷ Hai wà dut kólhang, nungmoq gi, Hkrisduq é gabú danglù eq gingdán é dông nyiyap

keq. Haù jáng, ngò, nungmoq chyáng jé mù huí lhùm é hkùn nghut nghut, we gang lhum tó é hkùn nghut nghut, nungmoq gi, woi-nyí ralhúm má za yap gíng tò mù, haù gabú danglù lé lumjǐng hkyô má, i-myt rahkat zá éq shikut nyí kô é hkyô lé le;

²⁸ nungmoq gi, hká hkyô má nghut kôlháng, gye pè éq kyuq zô é lé a gyuq lò kô é hkyô lé le, ngò sé rá nghut lhê. Haù gi, yhangmoq é matú htên byoq hui rá kumlhá dut lò bê nghut lhê; nghut kôlháng, nungmoq gi, hkyi yù hui rá nghut lhê. Haù gi, Garai Gasang kut é nghut lhê.

²⁹ Hkásu mù gà le, Hkrisduq má wó lumjǐng rá é jeju za a nghut, Yhang é matú wuìhke jamjau hui rá jeju le, nungmoq hkam yù bekô nghut ri.

³⁰ Haù gi, hí hpyang nungmoq ngò má myang wú é eq, ahkuí nungmoq ngá é hkyô lé wó gyô wú é, ngò hui zô é jamjau hkyô eq rajung za nghut nyi ri.

2

Yesuq, Myit Lhoq Nyhum É Hkyô

¹ Hkrisduq eq radíng ralhúm za nghut nyi é yanmai, myit wum byí é hkyô, Yhàng é chyitdap myit mai nhik tǐng é hkyô, Woi-nyí eq zùm yap é hkyô, nù-nhâm é myit eq shogyo nhikmýin é hkyô rajung jung lé, nungmoq wó yu é nghut le gi,

² nungmoq gi, haù i-myt hui é hkyô rahkat za, chyitdap myit rajung za, myit nhikhúm eq myit é hkyô má ralhúm za kut nyi é dǒng, ngá é gabú hkyô lé, byíng jup nháng keq.

³ Yhumsing é wuizat é dǒng le, akóm gyáng pyám é dǒng le, haì le a kut é za, myit lhoq nyhum nyi mù, góbang gi, nungmoq htoq má je gyaù lhê nghú myit yu nyí keq.

⁴ Nungmoq yuq hkangmó gi, yhumsing eq sǐng é lé za a nghut, góbang eq sǐng é lé le, myit byi rá lhê.

⁵ Hkrisduq Yesuq má bo é myit yhang, nungmoq chyáng bò rá dut lhê.

⁶ Yhang gi, Garai Gasang su roq za nghut nyi kôlháng, Garai Gasang eq rawuí za nghut é hkyô lé lú zing nyi rá matú a myit é za,

⁷ Yhànggùng lé Lhoq góm pyám luí, dui-nháng zôshang é gunghkyáng lé yu chùng mù, xángzo byù gùng roq lé dut bê nghut ri.

⁸ Xángzo byù rayuq dǒng nghut nyi é hkùn, Yhànggùng lé Yhang lhoq nyhum pyám luí,

haù tapzǐng htoq má lháng tap sat pyám é hui shoq jǐno gyô ri.

⁹ Haù mù luí, Garai Gasang gi, Yesuq é myíng lé mauhkúng htoq má é hkyihput,

myidám htoq má é hkyihput eq mom-íng má é hkyihput hkangmó htuq pai luí,

¹⁰ haù Íwa Garai Gasâng é hpungwup shingkâng é matú, Yesuq Hkrisduq gi, Yhumsing nghut lhê nghú,

nhut shò hkangmó yín yù sháng gaq ga,

¹¹ myhang htàng é jowó má Yhang lé lhoq toq tò é eq, myíng lunglháng é htoq má gyaù é myíng huí,

Yhang lé byi tò bê nghut ri.

Kyi Pé Su Duqbo Nyí Rá Hkyô

¹² Haù mù luí, ngò chyitdap é luzúm wuí é, nungmoq gi, hká-nhám le jǐno gyô nyi é eq rajung za, ngò, nungmoq eq rahá nyi é u lé su za a nghut, ngò eq wé gáng tò é hkùn le, nungmoq hkyi yù hui bê hkyô lé, gyaì gyuq hkunggá é myit eq je riyhang lhoq htoq nyí keq.

¹³ Hkásu mù gà le, Garai Gasang gi, Yhang ô nau é hkyô lé, kut nau rá myit éq wó kut rá hkyô lé nungmoq má lhoq htoq byí nyi é sù nghut lhê.

¹⁴ Haì kut kôlháng, taí put lhùm é dǒng, haù a nghut jáng, dang jet jet lhùm é dǒng hkákut kó.

¹⁵ Haù jáng sheq, myit goí é, agè ashop é pyat hkaù má, nungmoq gi, mara a bo é, sán-yúng é, shut hkyô a bo é, Garai Gasâng é yhangzô pé dut kó rá nghut lhê.

¹⁶ Hau htoq agó, nungmoq gi, asak mung-dang lé chung htoq uchyang, mauhkúng má é kyí pé su, yhangmoq chyáng wó duqbo nyí kó rá nghut lhê. Haù hkùn, ngò gi, ajè a dín pyám é, a nghut jáng, muzó lé akóm a zui pyám é yanmai, Hkrisduq é buinyi má gumrǒng jowó wó berá nghut lhê.

¹⁷ Nghut kôlháng, ngò gi, shuq jung hkungga* ralhúm su, nungmoq é lumjǐng myit mai nhongjaù byí é shigu hkungga ahtoq má hut gyùn pyám é hui le lháng, gabú luí, nungmoq banshoq bang eq rahá chòm gabú nyi lhê.

¹⁸ Haù eq rajung za, nungmoq le gabú luí, ngò eq rahá chòm gabú nyi rá dut lhê.

Timohti Eq Epahprodi Nhik Lé Nhang Kat Rá Gà É Hkyô

¹⁹ Ngò gi, nungmoq chyáng Timohti lé hân za wó nhang kat rá lé, haù Yhumsing Yesuq má myit myoqbyu nyi lhê; haù hkùn sheq, nungmoq eq sǐng é ludang lé ngò wó sé jáng, ngò myit ngón rá nghut lhê.

²⁰ Nungmoq é hkyô lé, yhang su hkyak za ge myit chiq byí é byù gotú rayuq le ngò a wó.

²¹ Hkásu mù gà le, yuq du jup gi, Yesuq Hkrisduq eq sǐng é hkyô lé a nghut é za, ó le

* **2:17** *Shuq jung hkungga* gá é gi, tsibiyiq wíng ragóm lé myí htoq má hut pyám é dǒng Garai lé gyuq hkunggá é hkyô lé tǎn shít é nghut lhê. Bun zo shí má shí hkám é hkyô lé taí nau é nghut lhê.

ó eq séng é hkyô lé za ho nyi bum akô nghut ri.

²² Yhang kúm gi, zo rayuq mai îwa lé htuqbang é su, haù gabú danglù hkyô má ngò eq rahá dojaú é yanmai, yhang lumluq é hkyô tún shit é lé, nungmoq sê nyi lhê.

²³ Haù mù luí, ngò gi, ngò má hkâsu dut rá lé sê é hkún yhang, yhang lé nhang kat rá matú ngò myit myoqbyu nyi lhê.

²⁴ Hau htoq agó, hkâ-myhâng a myáng má, ngò yhang le nungmoq chyáng wó jé nhâng rá nghut lhê nghú, haù Yhumsing má hkyak lum nyi lhê.

²⁵ Nghut kôhang, ngò gi, ngá é gumang hpó le nghut mù, mù zui luzúm eq sarhé luzúm nghut é, ngò rá é hkyô má wú gon byi rá matú nungmoq nhang kat é, nungmoq é gunglik le nghut é sù, Epahprodi lé nungmoq chyáng dum nhang taú kat byi rá lhê nghú, ngò myit hpyit to bê nghut lhê.

²⁶ Hkâsu mù gà le, yhang gi, nungmoq lhunglhâng bang lé myàng nau nyi é za a nghut, yhang no é hkyô lé nungmoq wó gyo bekô nghut é yanmai, gyai yhang myit myo myit chiq nyi ri.

²⁷ Gè gè yhang, yhang gi, aluq shoí shí shoq no pyám é nghut lhê. Nghut kôhang, Garai Gasang gi, yhang lé shogyo nhikmyin yu ri; yhang lé baú a nghut, ngò yón htoq yón a dut nyi rá matú, ngo lé le shogyo nhikmyin yu ri.

²⁸ Haù mù luí, yhang lé nungmoq lhom dum myàng jáng, nungmoq myang gabú rá matú le, ngò yón é hkyô yom ló byuq rá matú le, yhang lé ngò hân hân nhang kat byi nau ri.

²⁹ Nungmoq gi, gyai yhang gabú é myit èq, haù Yhumsing má yhang lé lhom hkúlum yù mù, yhang su dut é bang lé hkungga keq.

³⁰ Hkâsu mù gà le, yhang gi, ngo lé nungmoq a wó garúm é hkyô lé garúm rá matú, yhâng é asak lé lhâng a ha loshoq kut mù, haù Hkrisduq é muzó é yanmai, aluq shoí shoí shí é hui zô ri.

3

Gungsho Má Lumhkaú Râ Hkyô A Joq

¹ Hau htoq agó, ngá é gumang wui è, haù Yhumsing má gabú nyi keq! Rajung zá é hkyô lé, nungmoq é matú dum puq ká byi rá gi, ngò má wui é hkyô hái a joq, nungmoq é matú akyú dut rá matú sheq ru nghut lhê.

² Haù, hkuí pé lé le; agé ashop é muzó jizó kut é bang lé le; gungsho yâm é bang lé le; sidiq nyi keq.*

³ Hkâsu mù gà le, Garai Gasâng é Woi-nyí èq noqkuq é bang, Hkrisduq Yesuq má gabú gumrong nyi é bang, gungsho má a

lumhkaú é bang, nga-nhúng gi, ahpyo-kuq hpyit hkam yu é bang akying† nghut lhê.

⁴ Ngò kúm gi, gungsho má lumhkaú rá hkyô wó ang sù nghut lhê.

⁵ Góbang rayuq yuq, haù gungsho má lumhkaú rá hkyô wó âng lhê ga myit é nghut le gi, ngò gi, je riyhang wó sù nghut lhê.

⁶ Ngò gi, hkú lé é htâng shit nyi nghú rá nyi má ahpyo-kuq hpyit bê sù; Israelaq amyú má é, Ben-yamín é awut ashín nghut sù, Hebre byú má é Hebre rayuq nghut lhê; jep é tarâ dông ga jang, ngò gi, Hparishe rayuq nghut lhê;

⁷ shirong é hkyô eq séng luí ga jang, ngò gi, haù noqkuq hpúng lé zing-rí wú bê nghut lhê; jep é tarâ má é dingmán hkyô eq séng luí ga jang, ngò gi, shut é hkyô a bo wú sù nghut lhê.

⁸ Nghut kôhang, ngá é amyat nghu é pé lhunglhâng gi, ahkuí, Hkrisduq é yanmai sùm byuq é chyat nghut bê nghú myit yù bê nghut lhê.

⁹ Hau htoq agó, ngò gi, ngá é Yhumsing Hkrisduq Yesuq lé wó sê é ko dik é jeju lé sôn kat jáng, jung hkangmó lé buzaq dông myit yù bê. Hkâsu mù gà le, lhunglhâng lé ngò tô pyám é gi, Yhang é yanmai nghut lhê.

¹⁰ Ngò gi, Hkrisduq lé wó yù rá eq, Yhang eq rahá wó nghut nyi rá matú, haù jung hkangmó lé buzaq nghú myit yu pyám bê. Garai Gasâng chyáng mai lo é dingmán hkyô lé ngò jep é tarâ dông wó ho yu é a nghut, Hkrisduq lé lumjing é yanmai za wó yu é ru nghut lhê; haù gi, lumjing myit mai wó é nghut lhê.

¹¹ Ngò gi, Hkrisduq lé le, Yhang dui toq hkyo é hpungwup a-tsam lé le, Yhang hpuzó é hkyô má wó zúm yap rá lé le, Yhang shí hkâm é hkyô lé wó cháng rá lé le, sê nau ri.

¹² Haù jáng gi, ngò le, shi byuq bê mai dum dui toq é hkyô lé wó myoqbyu rá nghut lhê.

Myit Myoqbyu Tô É Jowò Shut Din Nyi Râ Hkyô

¹² Ngò gi, haù pé banshoq lé wó gú bê le a nghú nau, ngò gumjup gú bê le a nghú nau. Nghut kôhang, Hkrisduq Yesuq gi, ngo lé lhom yù bê eq rajung za, ngò gi, haù lé wó lhom yù sháng gaq nghú, châng hkat nyi lhê.

¹³ Gumang wui è, ngò yhang ngò gi, haù lé wó hap yù bê nghú a myit; nghut kôhang, ngò kut é muzó ralhúm gi, nunghtáng má é lé tô-myí pyám mù, myoq hí má é lé wó yù shoq nghú shikut lui,

¹⁴ Hkrisduq Yesuq má Garai Gasâng èq ngo lé ahtoq shut jì yu é chyunhuq lé wó yù rá matú, myoqbyu tô é jowò shut châng hkat din nyi lhê.

* 3:2 Bun zo shi lhum gi, ahpyo-kuq hpyit hkyô má noqzuq nyi é bang lé taí nau é nghut lhê. † 3:3 Ahpyo-kuq hpyit hkam yu é bang akying gà é gi, Garai Gasâng é yhangzo hkyak nghut bê bang lé gà lhê.

¹⁵ Gumjup bê bang nga-nhúng lhunglhang gi, haù sù é myit bò rà lhê. Rajung jung má nungmoq myit é hkyô shai nyi kô é nghut le gi, haù lé le, Garai Gasang gi, nungmoq lé san za tân shit rà nghut lhê.

¹⁶ Hkâ dong nghut kôlhang, nga-nhúng gi, ahkuí jé shoq châng nyi bê hkyô eq rajung za châng kut nyi shâng.

¹⁷ Gumang wui ê, nungmoq gi, ngò kut é dong chôm kut nyi keq, ngamoq mai nungmoq lé kut shit é alik eq rajung za châng é bang lé wú yú keq.

¹⁸ Hkâsu mù gâ le, hí hkún ngò, nungmoq lé anum num tai kyô wú lui, ahkuí lhang, ngau byi eq dum tai kyô é eq rajung za, Hkrisduq é tapzîng lé gyè kut é bang myo myo nyi bum akô nghut ri.

¹⁹ Yhangmoq é jîhtúm gi, htên byoq hkyô nghut ri; yhangmoq é garai gi, yhangmoq é wamdau nghut ri; yhangmoq é aróng gi, yhangmoq hoq hpu hkyô nghut ri. Yhangmoq é i-myit gi, mingkan zè htoq má za nghut ri.

²⁰ Nghut kôlhang, nga-nhúng é yhummau gi, mauhkúng mingdán má nghut lhê. Nga-nhúng gi, haù má é Yhumsing Yesuq Hkrisduq gâ é hkyi yù Sù lé, myoqbyu láng nyi é bang nghut lhê.

²¹ Yhang gi, jung hkangmó lé, Yhang uphkan é a-ô má wò kut tô é Yhâng é a-tsâm eq nga-nhúng é htên byoq sé é gungdu lé htai lhik pyám byi lui, Yhâng é hpungwup bo é gungdu su dut nhâng rà nghut lhê.

4

¹ Haù mù lui, chiyitdap é luzúm wui le nghut mù, ngò chiyitdap bûn nghâm nyi é, ngá é gabú jowò eq janmaù nghut nyi é, ngá é gumang wui ê, haù gi, Yhumsing má nungmoq hkâsu kut yap gîng nyi rà hkyô nghut lhê.

Lhoq Pun Lhoq Kyîng É Hkyô

² Ngò gi, Uodia eq Suntuki nhik lé, haù Yhumsing má rayuq eq rayuq myit hui lhúm nyi rà matú, gyai yhang pyîng kat lhê.

³ Ngá é mù wùn luzúm kyîng ê, ngò gi, myiwe shí nhik lé garúm yù laq nghú, nang lé le dúng tôngbán kat lhê; yhangnhik gi, Klemen eq le, asak jihpán laiká buk má myîng bo é, ngá é mù wùn luzúm wui gôbang eq le, haù gabú danglù hkyô má ngò eq rahá gyai shikut wú bê sù nhik nghut lhê.

⁴ Haù Yhumsing má hkâ-nhâm le gabú nyi keq! Ngò dum tai lhê, gabú nyi keq!

⁵ Nungmoq nú-nhâm é hkyô, byù banshoq bang lé sé nhâng keq. Haù Yhumsing gi, chyáng bê nghut ri.

⁶ Hai eq séng lui le, myit hkâ-myô hkâchiq kó; hkyô hkangmó má jeju hkya-on uchyang, kyúđúng é eq dúng tôngbán é dong,

nungmoq dúng é hkyô pé lé, Garai Gasang chyáng shit kyô nyi keq.

⁷ Haù hkún, sé gyô é nyan banshoq htoq má gyaù é, Garai Gasang é nguingón hkyô gi, nungmoq é myit nhiklum eq nungmoq myit é hkyô lé, Hkrisduq Yesuq má upzúng byi nyi rà nghut lhê.

⁸ Jîhtúm má, gumang wui ê, tengmán é, hpautap gîng é, dingmán é, sansêng é, wó chiyitdap é, hkungga gîng é, hai má nghut kôlhang, aróng wó dik é hkyô rajung jung, a nghut jâng, hkya-on gîng é hkyô rajung jung bo é nghut le gi, haù sù é hkyô pé lé myit nyi keq.

⁹ Nungmoq gi, ngá chyáng mai wó mhoq hkam yù bê hkyô pé, wó gyo wó myang yù bê hkyô pé, hai lé le châng kut nyi keq. Haù hkún, nguingón hkyô byi é Garai Gasang gi, nungmoq eq rahá nyi nyi rà nghut lhê.

Jeju Bún É Hkyô

¹⁰ Ahkuí kúm gi, ngá é hkyô lé nungmoq dum myit chiq byi kô é yanmai, ngò gi, haù Yhumsing má gyai yhang gabú nyi lhê; gè gè yhang, nungmoq myit chiq byi nyi kôlhang, haù lé tân shit rà ahkáng a wó kô nghut ri.

¹¹ Ngò ísu nghú tai nyi é gi, ngò má rá é hkyô bo tô é yanmai tai é a nghut, hkâsu mù gâ le, ngò gi, ngò hui mihui má, nhik dik nyi rà matú mhoq yù bê nghut lhê.

¹² Ra châ tô u lé, hkâsu kut rà ngò sê lhê; agùn agó wó u lé, hkâsu kut rà ngò sê lhê; hkyô hkangmó eq dut tô é ahkyo lhum jup má, wam gyi kôlhang, zòmut kôlhang, agùn agó wó tô nyi kôlhang, ra châ to kôlhang, myit dik nyi rà hpaqchyí lé ngò wó mhoq yù bê nghut lhê.

¹³ Ngò gi, ngò lé wum-o a-tsam byi sù Hkrisduq é yanmai, hkyô hkat hkangmó wó kut lhê.

¹⁴ Nghut kôlhang, ngò wuihke jamjau hui nyi é hkún, nungmoq garúm yù kô é gi, ge é hkyô kut bekô nghut ri.

¹⁵ Hau htoq agó, Hpilipi byu pé nungmoq sé é eq rajung za, haù gabú danglù lé, ngò hkò mù nungmoq wó gyô yu hí é buinyi pé má, ngò Makedoni mau mai htoq ló rà hkún, haù byi é hkyô eq lhom yu é hkyô má, nungmoq mai lai lui, noqkuq hpúng gotú ralhúm lhang, ngò lé garúm kat é hkyô a bo é nghut lhê.

¹⁶ Ngò Htesaloni wá mó má nyi tô é hkún lé lhang, nungmoq gi, ngò ra châ é hkyô lé adam dâm hún byi bekô nghut ri.

¹⁷ Ngò gi, chyunghuq chyunghtâng lé ho nyi é a nghut, nungmoq mai ashi je myo zúí jat rà matú lé za sheq ho nyi é nghut lhê.

¹⁸ Ngò gi, hai le gúm shoq myang yu é htoq agó, chyân shoq lhang nghut bê. Ahkuí, haù nungmoq hun kat é chyunghuq lé, Epah-prodi chyáng mai ngò lhom myang yù lui, ngò má agùn agó nghut nyi bê. Haù pé gi,

namngón jung hkungga su, Garai Gasang lé gabú nhang é, hap yù gíng é hkungga ralhum nghut ri.

¹⁹ Ngá é Garai Gasang gi, Yhang agùn agó wó sùt nyi é eq rajung za, nungmoq rá é hkyô banshoq lé, Hkrisduq Yesuq má lhoq gúm lhoq jup byi rá nghut lhê.

²⁰ Hpungwup shíngkang gi, nga-nhùng é Îwa Garai Gasang chyáng pyat dedu ahtum abyuq ru joq nyí sháng gaq ô! Amen.

Shi-kyám Dang

²¹ Hkrisduq Yesuq má sân-yúng bê bang banshoq lé bo shi-kyám byi keq. Ngò eq rahá nyi é gumang wui gi, nungmoq lé shi-kyâm kat akô nghut ri.

²² Sân-yúng bang banshoq gi, nungmoq lé shi-kyâm kat akô; Kehtaq é yhùm má é sân-yúng bang gi, je riyhang shi-kyâm kat akô nghut ri.

²³ Yhumsíng Yesuq Hkrisduq é jeju gi, nungmoq banshoq bang eq rahá ru joq nyí sháng gaq ô!

KOLOSE Pê Chyáng Hun Kat é Laiká (Colossians)

¹ Garai Gasâng eq hkyin yù mù, Hkrisduq Yesuq é lagyo dut sù, ngò Poluq eq nga-nhùng é gumang Timohti gi,

² Kolose wà mó má nyi bang nghut é, Hkrisduq má chyoiyúng bang nghut é, lhumzuí é gumang wui chyáng dang kyô kat lhê. Nga-nhùng é Íwa Garai Gasâng chyáng má é jeju eq nguigón hkyô gi, nungmoq chyáng ru joq nyi shàng gaq.

Jeju Hkya-ôn É Eq Kyúdung É Dang

³ Ngamoq gi, nungmoq é matú kyúdung byí é hkún, nga-nhùng é Yhumsing Yesuq Hkrisduq é Íwa nghut é Garai Gasang lé ayang jeju hkya-ôn lhê.

⁴ Hái mù gâ le, Hkrisduq Yesuq má nungmoq lumjǐng hkyô eq Yhâng é sâ-n-yúng bang banshoq lé nungmoq chyitdap é hkyô lé, ngamoq wó gyô é yanmai nghut lhê.

⁵ Lumjǐng myit eq chyitdap myit haú gi, nungmoq é matú mauhkúng htoq má hkong to byí é myit myoqbyù hkyô* mai lo é nghut lhê. Myit myoqbyù hkyô haú lé gi, nungmoq chyáng jé to bê gabú danglù nghut é tengmán mungdang mai, nungmoq wó gyô to gũ nghut lhê.

⁶ Nungmoq gi, gabú danglù haú lé wó gyô luí, Garai Gasâng jeju eq sêng é tengmán hkyô lé sê hkyang é buinyi mai, nungmoq chyáng ashi zuí é eq kô myhang nyi bê nghut é eq rajung za, gabú danglù haú gi, mingkan gón má ge é ashi zuí nyi é eq kô myhang nyi bê nghut ri.

⁷ Nungmoq gi, haú hkyô lé, ngamoq é chyitdap byinzùm Epahpra chyáng mai mhoq yu é nghut lhê. Yhang gi, ngamoq é gunglik dông, Hkrisduq é lhumzuí é hpúng mù wùn sù nghut lhê.

⁸ Yhang gi, haú Woi-nyí eq nungmoq lé byi tó é chyitdap hkyô lé, ngamoq lé tai kyo sù le nghut ri.

⁹ Haú nghut é yanmai, ngamoq gi, nungmoq eq sêng é hkyô lé wó gyô é nyi mai, nungmoq é matú ayang kyúdung byí nyi lhê. Garai Gasang ô nau é hkyô lé sé rá hpaqchyí lé, woi-nyí eq sêng é hpaqchyí byéng-yá eq sê gyô é nyan banshoq dông mai nungmoq chyáng lhoq pyíng byi shàng gaq ngú, Yhâng chyáng kyúdung byi nyi lhê.

¹⁰ Haú su kut kyúdung byí é gi, haú Yhumsing ô nau é hkyô eq gingdán é dông nungmoq asak wó dú luí, hkyô hkangmó má Yhang lé wó gabú nhâng rá matú nghut lhê. Hau dông mai, nungmoq gi, ge é muzó

hkangmó má ashi zuí nyi luí, Garai Gasang lé sê é hpaqchyí má kô myhang nyi kô rá nghut lhê.

¹¹ Hau htoq agó, nungmoq gi, Yhâng é hpungwup a-tsam dông mai a-tsam banshoq eq wum-o lhoq kǐng byí é hui nyi kô rá nghut lhê. Haú mù, nungmoq gi, gyaí hkam jân é hkyô eq myit hing é hkyô lé, gabú myit mai wó yù kô rá nghut lhê.

¹² Maubó é mingdán má, sâ-n-yúng bang eq sêng é muizè lé wó bo hkam yù rá matú, nungmoq lé gingdán nhang é sù haú Íwa lé le, jeju wó hkya-on kô rá nghut lhê.

¹³ Hkâsu mù gâ le, Íwa haú gi, nga-nhùng lé, mauchut eq up é hkaú mai hkyi htoq yù luí, Yhang chyitdap é Yhang Zô é mingdán má shuí hâng é Sù nghut lhê.

¹⁴ Nga-nhùng gi, haú Yhang Zo dông mai, hkyi xe yu é hui mù, yubak mara hkyut pyám byí é hui bê nghut lhê.

Jung Hkangmó É Ushuq, Hkrisduq

¹⁵ Hkrisduq gi, myoq eq a byu-myàng é Garai Gasâng é gungghyâng isâm nghut luí, zomún dông hpan tó é lhunglhâng htoq má gyaú é sù nghut ri.

¹⁶ Hkâsu mù gâ le, mauhkúng eq myigùng htoq má joq é azǐng zê pé, myoq eq byu-myang é eq a byu-myang é pé nghut kôle, hkohkâm ayá pé, a-tsam pé, uphkang bang, ahkáng ayá wó bang nghut kôle, lhunglháng gi, Yhâng eq hpan to hui é chyat nghut lhê. Lhunglháng gi, Yhâng é matú, Yhâng eq hpan to hui é chyat nghut ri.

¹⁷ Yhang gi, lhunglhâng é hí má é nghut mù, lhunglháng gi, Yhâng é yanmai joq gǐng bum é chyat nghut lhê.

¹⁸ Yhang gi, noqkuq hpúng nghu é gungdú é ulhum nghut ri; Yhang gi, jung hkangmó má gyaú dik é ushuq dut shàng gaq ga, sâng-hi awang nghut sù eq shi é bang má é hí dui toq é zomún dut sù nghut ri.

¹⁹ Hkâsu mù gâ le, Garai Gasang gi, Yhâng é byíng jup hkyô banshoq, Yhang Zo má joq nyi rá lé myit nguí ô nau é nghut mù,

²⁰ haú tapzǐng má htoq byí é Yhang Zô é sui dông mai nguigón hkyô kut byí é eq, myigùng htoq má é azǐng zê nghut nghut, mauhkúng má é azǐng zê nghut nghut, lhunglháng lé, Yhang Zo dông mai, Yhang eq nguigón simsaq hkyô xoq yù bê nghut ri.

²¹ Nungmoq gi, Garai Gasang eq wê gǎng é bang dut wú kôluí, nungmoq é agé ashop nyi yap sǎmlái é yanmai, nungmoq i-myit má, Yhâng é gyè dut wú bekó nghut lhê.

²² Nghut kólhang, ahkuí, Garai Gasang gi, nungmoq lé, rá é hkyô a bo é eq mara hùn rá hkyô a bo é za, chyoiyúng é dông Yhâng é hí má shit rá matú, Hkrisduq é gungsho

* 1:5 Bun zo shí má bo é myit myoqbyù hkyô gi, Yesuq lé tai é nghut lhê.

gungdu shí hkâm é dông, nungmoq eq ngu-
ingón simsaq hkyô xoq yú bê nghut ri.

²³ Haù gi, gabú danglù mai wó yu tô é
myoqbyù hkyô mai a htot byuq é za, kô
myhang nyi é eq gingting nyi mù, nungmoq
é lumjing hkyô má xoq nyi nyi é nghut jang
sheq dut rà nghut lhê. Gabú danglù shí gi,
nungmoq wó gyô wú bê nghut é htoq agó,
mauhkûng ô má hpan tô é jung hkangmó
lé hko kyô nyi bê nghut lhê. Ngô, Poluq le,
gabú danglù hau é dui-nhâng zoshâng dut é
nghut lhê.

*Noqkuq Hpúng É Matú Poluq Wùn Waq É
Hkyô*

²⁴ Ahkuí, ngò gi, nungmoq é matú jamjau
huí é má gabú lhê; hau htoq agó, Hkrisduq
é gungdu nghut é, noqkuq hpúng é matú, rà
tô ashí nghut é, Yhang hpuzô é hkyô lé, ngá
é gùng má ngò lhoq gumjup yu nyi lhê.

²⁵ Ngô gi, Garai Gasâng é mungdang lé,
nungmoq chyáng gumjup shoq hko kyo rà
matú, Garai Gasang, ngo lé hun tô é wò mai,
noqkuq hpúng hau é mù wùn sù dut é nghut
lhê.

²⁶ Mungdang haù gi, gohkûn mai apyat
pyat haq tô gyó lo é záu tô é hkyô nghut
kôlhâng, ahkuí gi, haù sân-yúng bang lé
hpông shit bê nghut ri.

²⁷ Garai Gasang, haù su kut é gi, záu tô é
hkyô hau é agùn agó hpungwup shinggang,
túngbaù pê chyáng hkâsu nghut é hkyô,
yhangmoq lé sé nhâng rà matú nghut lhê.
Záu tô é hkyô haù gi, hpungwup shinggang
lé myoqbyù é hkyô nghut é, nungmoq má
Hkrisduq dui nyi bê hkyô lé gá é nghut lhê.

²⁸ Hkrisduq má gumjup é dông, byù yuq
hkangmó lé wó shuí jé sháng gaq nghù, ng-
amoq gi, Hkrisduq é hkyô lé tai pyô lui, yuq
hkangmó lé, hpaqchyí byéng-yá banshoq èq
taí pun taí kyíng é eq mhoqshit nyi é nghut
lhê.

²⁹ Ngô, haù-i yhang wó wùn waq shikut é
gi, ngò má wum-o a-tsam byíng byíng mù zúí
nyi Su é wum-o banshoq èq wùn waq shikut
nyi é ru nghut lhê.

2

¹ Ngô gi, nungmoq é matú le, Ladoki wà
mó bâng é matú le, ngò eq myoqdong hkyûm
a huí wú shí é bang banshoq é matú le,
hkâ-i yhang awui ahke shikut nyi é hkyô lé,
nungmoq lé sé nhâng nau ri.

² Haù su awui ahke shikut é hkyô gi,
yhangmoq, myit má wum-o byí é hui rà eq
chytap myit má rading ralhun za wó dut
rà matú nghut lhê. Haù hkûn, yhangmoq
gi, Garai Gasâng é záu tô é hkyô nghut é,
Hkrisduq lé wó sé rà matú, sê gyô é nyan
lunglhang é isut byíng shoq lé wó yú kó rà
nghut lhê.

³ Haù Hkrisduq má kúm gi, hpaqchyí
byéng-yá eq sumsé hpaqchyí gá é sutzé
lunglhang lé tsíng tô ri.

⁴ Nungmoq lé ngò haù hkyô taí kyô é gi, ó
yuq le, dang ngón dang ngui èq mhoq hpyoq
é dông, nungmoq lé a wó mhaù zo rà matú
nghut lhê.

⁵ Hkâsu mù gá le, ngá gungdu nungmoq eq
rahá a nyi kôlhâng, ngá é myit gi, nungmoq
eq rahá nghut nyi lui, nungmoq shoq shoq
tap tap za nghut nyi kô é eq Hkrisduq lé
lumjing é má hkâ-i gingting nyi kô é lé myàng
mù, ngò gabú nyi lhê.

*Hkrisduq Dông Mai Wó É Gumjup É Asak
Dui Hkyô*

⁶ Haù mù lui, nungmoq gi, Hkrisduq
Yesuq lé Yhumsing nghù hap yú bekô nghut
é eq rajung za, Yhang má asak xoq dui nyi
keq.

⁷ Yhang má apùn amyit chín gíng nyi mù,
kô myhang lò lui, nungmoq mhoq yú bê
eq rajung za, lumjing hkyô má wum-o lhoq
king mù, jeju hkya-ôn é hkyô byíng zan nyi
keq.

⁸ Hkrisduq chyáng má é a nghut é za,
mingkan shí má é uphkâng tará pé eq xângzo
wui é htúngli cháng lui, mhaù zô é myit sôn
hpaqchyí eq akyù a bo é dang dông, ó yuq èq
le, nungmoq lé a wó shuí ngoq yú kó sháng
gaq, sidiq nyi keq.

⁹ Hkâsu mù gá le, Garai Gasâng é gumjup
hkyô banshoq gi, Hkrisduq é gungdu
hkyangmân má lúng nyi mù,

¹⁰ nungmoq gi, a-tsam bo é banshoq eq
ahkáng ayá wó é banshoq é ushuq nghut
é Hkrisduq eq sêng é bang nghut kômù,
gumjup é bang dut bekô nghut ri.

¹¹ Yhang má, nungmoq gi, byu loq èq kut
é ahpyo-kuq hpyit hkyô dông a nghut é za,
ahpyo-kuq hpyit é su, Hkrisduq èq yubak
gungsho mara lé hkyut sêng pyâm é hkyô lé
hkam yú bekô nghut ri.

¹² Nungmoq gi, wui-myhup hkâm é hkûn
Hkrisduq eq rahá myhup yhùm é hui bekô
nghut mù, Yhang lé shí é mai lhoq dui toq
yu é, Garai Gasâng é a-tsam lé nungmoq
lumjing kô é yanmai, Yhang eq rahá lhoq
dui toq yu é hui bekô nghut ri.

¹³ Nungmoq é yubak mara pé é yanmai le,
nungmoq é yubak gungsho mara lé lui sêng
pyâm é a hkam yu é yanmai le, nungmoq
shí tô é hkûn, Garai Gasang gi, nungmoq
lé, Hkrisduq eq rahá asak dui nhâng bê
nghut ri. Yhang gi, nga-nhúng é yubak mara
lunglhang lé hkyut pyâm byi lui,

¹⁴ nga-nhúng eq shai lhum mù, nga-nhúng
lé htuq htíng é, tará pé bo é jéyáng rà jilpán
lé lui sêng pyâm byi bê nghut ri. Yhang gi,

haù lé tapzìng htoq má dok tap pyám é dōng yu pyám byi bê nghut lhê.*

¹⁵ Haù dōng mai, a-tsam bò bang eq ahkáng ayá wó bāng a-tsam lé lang hkyut hkyô pyám mù, Yhang gi, tapzìng eq yhang-moq lé ung pyám é dōng, byù pè é hí má yhangmoq lé de de kut to bê nghut ri.

¹⁶ Haù mù luí, nàng hái zo hái shuq é yan-mai le, noqkuq htùng eq sēng é poi buinyi, Lhoxan Lhosik poi, Bánno buinyi eq sēng luí le, nungmoq lé, ó yuq eq le a wó jéyáng kó sháng gaq.

¹⁷ Haù pé gi, dut lò rá hkyô pè é wupzo chyat nghut lhê; haù gùng gyíng gi, Hkrisduq yhang nghut nyi ri.

¹⁸ Myit lhoq nyhum mhaù é eq maumang lagyô pé lé noqkuq é lé myit ngui é sù ó yuq eq le, nungmoq lé, chyunghuq eq a gingdán rá dōng hkákut nhāng kó. Haù su é yuq gi, yhumsing byu-myang é lé† za taí shikut mù, yhumsing é gungsho myit mai, akôm yhang nghut é lé gyáng dang taí é sù nghut ri.

¹⁹ Yhang gi, Garai Gasang kô myhāng nhang é su, gungdu gón é gungsho showui showang pé eq shogyi pé lé htuqbang byi mù rahá lāng tsing tô é haù ulhum nghut é Hkrisduq eq xoq é hkyô lé byoq ló nhāng bê nghut ri.

²⁰⁻²¹ Nungmoq gi, Hkrisduq eq rahá, mingkan shí má é tará pé eq shí gang bekô nghut le nhing, hái mù, haù eq sēng lhum nyi ashí kó lhú? "Hkâzui, hkâchyām, hkâzāng." gá é tará ô má nyi nyi ashí kó lhú?

²² Haù pé gi, waxāng zô wui é hkunmó pé eq mhoqshít hkyô pé nghut é yanmai, jai chung é hkûn, htên byuq rá chyat nghut lhê.

²³ Haù sù é tará pé gi, yhumsing yhang noqkuq shikut é, myit lhoq nyhum mhaù é eq gungdu lé gunjāng é pé nghut luí, hpaqchyí byéng-yá bo é su dut kôlhang, gungshô é agè ashop yut yut ô nau hkyô lé wó hkûm zing pyám rá má, hai akyú a bò nghut ri.

3

Choyoyúng É Dōng Asak Dui Rá Hkyô

¹ Haù mù luí, nungmoq gi, Hkrisduq eq rahá lhoq dui toq é huí bekô nghut jāng, Garai Gasāng é loqyo hkyam* má zung tô é Hkrisduq é jowô má joq é, ahtoq má é azíng zè pé lé myit ô nau nyi keq.

² Nungmoq gi, myidām htoq má é azíng zè lé myit tuí é a nghut é za, ahtoq má é azíng zè lé myit tuí nyi keq.

³ Hkâsu mù gâ le, nungmoq gi, shí bekô nghut luí, ahkuí, nungmoq é asak gi, Hkrisduq eq rahá, Garai Gasang má haq tô é huí bekô nghut ri.

⁴ Nungmoq é asak nghut sù, Hkrisduq htoq shit é hkûn, nungmoq le, Yhang eq rahá, hpungwup shing kang hkaù má htoq shit kó rá nghut lhê.

⁵ Haù mù luí, nungmoq é mingkan hkyô eq sēng é, ashop é dōng gungsho zùm yap é hkyô, agot a-ù nyi zô lhùm é hkyô, ye lhai nau é hkyô, agè ashop yut yut ô nau é hkyô eq, hpará noq hkyô nghut é myoqnoq hkyô pé hái lé le sat pyám keq.

⁶ Haù hkyô pé é yanmai, Garai Gasāng é nhikmo-yo hkyô gi, jino a gyo bāng é ahtoq má† jé rá za nghut lhê.

⁷ Lai lò bê hkûn, nungmoq le, haù hkyô pé dōng sô wú kô é nghut lhê.

⁸ Nghut kôlhang, ahkuí, nungmoq gi, nhikjum yô é, nhikmo-yô é, agè ashop é dōng nò shoq kut é, lumú gansang é eq, nungmoq é nhutwui mai hkunchaq taí é hkyô shí pé banshoq lé, yhumsing gùng yhumsing tô pyám rá dut lhê.

⁹ Rayuq eq rayuq hkâ-mhaù lhum kó; hkâsu mù gâ le, nungmoq gi, nungmoq é byù xau eq byù xau é nyi yap hkyô lé hkyut pyám mù,

¹⁰ byù sik lé tú wut yú kô é nghut lhê; byù sik haù gi, sumsé hpaqchyí dōng mai, yhang lé hpân Su é gungdu isām má asik jat lò nhang é huí nyi ri.

¹¹ Byù sik má gi, Grik eq Yudaq byù nghu é, ahyo-kuq hpyit hkām bang eq a hkām bang nghu é, byù bíng eq byù jum nghu é, jùn eq jùn a nghut sù nghu é a nyi lô é za, Hkrisduq gi, banshoq nghut mù, banshoq má nyi nyi ri.

¹² Haù mù luí, Garai Gasāng eq hkyin yù huí é bang, Yhāng eq gyai yhang chyitdap é huí é choyoyúng bang dōng, shogyo myit, gè hkyô shit é myit, lhoq nyhum é myit, nú nhām é myit eq myit hing é hkyô pé lé, yhumsing gùng yhumsing mebu su wut to keq.

¹³ Nungmoq yhangchang mara kut shut é hkyô joq é nghut jāng, hkam jan byí lhum luí, rayuq eq rayuq mara hkyut byí lhum keq. Haù Yhumsing gi, nungmoq é mara hkyut pyám byí é su, nungmoq le mara hkyut byi keq.

¹⁴ Haù ge é sām lai banshoq wó é htoq agó, gumjup é rading ralhūm za dut é hkyô má, banshoq lé rahá wó tuí zing tô é chyitdap myit lé puq wut to keq.

* **2:14** Yhang gi, haù lé tapzìng htoq má dok tap pyám é dōng yu pyám byi bê nghut lhê gá é gi, Hkrisduq tapzìng má shí hkām byí é hkûn, nga-nhūng é yubak mara banshoq lé, Garai Gasāng eq hkyut pyám byí é lé taí nau é nghut lhê. † **2:18**

Byu-myang é lé gá é gi, yhang myit htoq é shing-rán lé gá lhê. * **3:1** Loqyo hkyam ngū é gi, ahko ahkáng wó é jowô lé gá é nghut lhê. † **3:6** Jino a gyo bāng é ahtoq má, gá é dang, chyúmding ra-am má a bò nghut lhê.

¹⁵ Nungmoq gi, nuingón hkyô wó rã matú ji yu é hui bekô nghut mù, gungdu ralhùm mã é bang chyat nghut bekô yanmai, Hkrisduq é nuingón hkyô lé, nungmoq é myit mã up nhang nyi keq. Haù mù, jeju hkyá-ôn nyi keq.

¹⁶ Nungmoq, rayuq eq rayuq, hpaqchyí byéng-yá banshoq eq mhoqshit é eq lhoq pun lhoq kyíng lhum é hkún le, Garai Gasang lé nungmoq jeju bún é myit mai, jihkyang dang, hkyá-on mahkôn, woi-nyí eq séng é mahkôn pé hkon é hkún le, haù Hkrisduq é mungdang lé, nungmoq é myit nhikhlum mã agùn agó bò nhang nyi keq.

¹⁷ Nungmoq haí wá kut kut, dang dông nghut nghut, zui saí é dông nghut nghut, banshoq lé Yhumsing Yesuq é mying mai kut é hkún, haù Iwa nghut é Garai Gasang lé Yhang dông mai jeju hkyá-on keq.

Hkristan Ikun Byu Pé Nyi Yap Rã Hkyô

¹⁸ Ikun myhí pé é, ikun hpó pé uphkanq é akhaù mã nyi keq. Haù gi, Yhumsing é hí mã kut gíng é hkyô nghut lhê.

¹⁹ Ikun hpó pé é, ikun myhí pé lé chyitdap nyi keq. Yhangmoq lé dang htân hkâ-nyô kó.

²⁰ Zo wuá é, jung hkanqmó mã nungmoq é mó wuá é jino gyo keq; hkâsu mù gà le, haù gi, Yhumsing ô nau é hkyô nghut lhê.

²¹ Iwá pé é, nungmoq é zo wuá lé myit hkâ-nô nhâng kó, nô nhâng jáng gi, yhangmoq, myit wum gyú byuq kó rá nghut lhê.

²² Jùn pé é, hkyô hkanqmó mã nungmoq é myidám htoq mã é jùn síng bang uphkanq é akhaù mã nyi nyi keq; yhangmoq é myoq hí mã za zui saí luí, myoqdong ho é dông a nghut é za, haù Yhumsing lé gyuq hkunggá é eq lhumzui é myit mai zui saí nyi keq.

²³ Nungmoq haí wá kut kôle, byu é matú kut é a nghut, haù Yhumsing é matú kut nyi é dông, nungmoq é myit nhikhlum banshoq eq zui saí nyi keq.

²⁴ Haí mù gà le, nungmoq gi, haù Yhumsing chyáng mai, muizé lé chyunghuq dông wó yú kó rá nghut é lé, sé kó é yanmai nghut lhê. Nungmoq dojaù nyi é sú gi, Yhumsing Hkrisduq ru nghut lhê.

²⁵ Kut shut sú gi, yhang kut shut é marâ matú dam byí é hui zo rá nghut lhê, haí mù gà le, Garai Gasang gi, myoqdong hkyin é hkyô a joq.

4

¹ Jùn síng bang é, nungmoq é jùn pé lé, tengmán é eq gíng áng é dông lajang byí nyi keq; haí mù gà le, nungmoq le, mauhkung htoq mã Yhumsing rayuq wó é lé sé kó é yanmai nghut lhê.

Xoq Lui Pying Kat É Hkyô

² Nungmoq gi, kyúdung é mã myit zing zuq nyi mù, machyá luí, jeju hkyá-ôn nyi keq.

³ Ngò, shamtoq-tui hut hui nyi shoq dut é, Hkrisduq é záu tô é hkyô lé ngamoq wó taí pyô sháng gaq, Garai Gasang gi, mungdang lé ngamoq taí rá hkyô hkum hpóng byi rá matú kyú bo dung byi kó laq.

⁴ Haù Hkrisduq é záu tô é hkyô lé, ngò taí áng é dông san za wó taí pyô sháng gaq, kyú bo dung byi kó laq.

⁵ Nungmoq gi, a lumjing bang eq zùm yap é hkún hpaqchyí bo nyi keq; wó yu é ahkying hkanqmó lé rago yhang chung jai keq.

⁶ Nungmoq gi, yuq hkanqmó lé hkâsu tú taí rá hkyô wó sé kó shoq, dang nyo é má, xô eq nghám nhang é su, hkâ-nhám le jeju bying é dang bo nyi sháng gaq.

Ló Htâng É Shi-kyám Dang

⁷ Tuhkiku gi, ngá hkyô eq séng é dang-lù banshoq, nungmoq lé taí kyo rá nghut lhê. Yhang gi, ngá é chyitdap gumang, haù Yhumsing mã, lhumzui é hpúng mù wún sú eq byinzum nghut lhê.

⁸ Ngò, yhang lé nungmoq chyáng nhang kat é hkyô gi, ngamoq chyáng dut nyi é hkyô lé nungmoq wó sé rá eq, nungmoq lé myit wum wó byi rá matú nghut lhê.

⁹ Yhang gi, nungmoq chyáng mã é nghut é, ngamoq é lhumzui chyitdap é gumang Onesimu eq rahá lé lo é nghut lhê. Yhang-nhik gi, shí mã dut nyi é hkyô jung hkanqmó lé taí kyo kó rá nghut lhê.

¹⁰ Ngò eq rahá htông lúng sú Aristakuq gi, nungmoq lé shi-kyám kat ri. Barnaba é yhâng za-aù Markuq lé, nungmoq lé shi-kyám kat ri. (Markuq eq séng luí pying kat é hkyô lé nungmoq wó yú to bê nghut mù, nungmoq chyáng, yhang jé lé é nghut jáng, lhom hkúlum yú keq.)

¹¹ Yustu le gà é Yesuq le, nungmoq lé shi-kyám kat ri. Garai Gasang é mingdán matú ngá é byinzum mù zui bang mã, haù bang za Yudaq byu pé nghut kômù, yhangmoq gi, ngo lé nhik ting byí é bang nghut akó.

¹² Nungmoq chyáng mã é byù nghut sú eq Hkrisduq Yesuq é mù wún sú, Epahpra gi, nungmoq lé shi-kyám kat ri. Nungmoq gi, Garai Gasang ô nau é hkyô lunglhang mã hkyak lùm to mù, gumjup luí wó gíngting nyi sháng gaq ga, Yhang gi, ayang nungmoq é matú kyúdung shikut byí nyi ri.

¹³ Nungmoq é matú le, Ladoki wá mó eq Herapoli wá mó bâng é matú le, yhang gi, gyai yhang mù zui shikut byí é hkyô lé, yhang é matú ngò saksé hkâm lhê.

¹⁴ Ngamoq é chyitdap chí sará Lukaq eq Demaq gi, nungmoq lé shi-kyám kat akó nghut ri.

¹⁵ Ladoki wá mó mã é gumang wui lé le, Numhpa eq yhâng yhùm mã é noqkuq hpúng lé le, bo shi-kyám byi keq.

¹⁶ Laiká shí lé, nungmoq lé nghap kyô é htâng mã, Ladoki byu pé é noqkuq hpúng

má le nghap nhâng mù, Ladoki wà bâng chyáng hũn kat é laiká lé le, nungmoq nghap wũ keq.

¹⁷ "Hàu Yhumsing chyáng mai nàng hap yù to bê é muzó lé rago za lhoq pán pyám aq." nghũ, Arhkipò lé tai kyo keq.

¹⁸ Ngò, Poluq gi, ngá é loq èq yhang shi-kyám dang shí lé kê kat é nghut lhê. Ngò, shamtoq-tui wut tô é lé bũn nyi keq. Jeju gi, nungmoq chyáng ru joq nyi sháng gaq ô.

HTESALONI

Pê Chyang Hî Dàm Hun Kat é

Laiká

(1 Thessalonians)

¹ Ngò Poluq, Sila* eq Timohti pé gi, Iwa Garai Gasang eq Yhumsing Yesuq Hkrisduq má nghut nyí bê bang, haù Htesaloni wà mó byu pé é noqkuq hpúng lé dang kyô kat lhê. Garai jeju eq nguingón hkyô gi, nungmoq chyáng ru joq nyí sháng gaq.

Jeju Hkya-ôn É Hkyô

² Nungmoq gi, hkâ-nhám le, nungmoq ban-shoq bâng é matú, Garai Gasang lé jeju hkya-on luí, ngamoq é kyúdung dang má nungmoq lé bo dúng lhóm nyí lhê.

³ Nungmoq é lumjng myit mai zui saí é nungmoq é muzó lé le; chyitdap myit é yanmai, nungmoq shikut é hkyô lé le; nga-nhung é Yhumsing Yesuq Hkrisduq má myit myoqbyu tô é yanmai, nungmoq hkam jân é hkyô lé le, nga-nhung é Iwa Garai Gasang é hí má, ngamoq ru bûn nyí lhê.

⁴ Garai Gasang chyitdap é gumang wui é, Yhang nungmoq lé hkyin yù bê lé, ngamoq sé lhê.

⁵ Hkâsu mù gâ le, ngamoq é gabú danglù gi, nhutdang đông za nungmoq chyáng jé é a nghut, wum-o a-tsam đông le, Chyoiyúng Woi-nyí đông le, tengmán hkyô bying jup é đông le, jé bê nghut é yanmai nghut lhê. Ngamoq, nungmoq eq rahá nyi é hkún, nungmoq é matú hkâsu kut lai lo é hkyô lé, nungmoq sé gù nghut lhê.

⁶ Nungmoq gi, wuihke jamjau myo myo hui zo kôlhang, Chyoiyúng Woi-nyí byí é gabú myit mai, danglù haù lé lhom yù kôluí, ngamoq lé le, haù Yhumsing lé le, alik kut yu é bang dut bekô nghut ri.

⁷ Haù mù, Makedoni mau eq Ahkaia mau mâ é lumjng bang ban-shoq é alik, nungmoq dut bekô nghut ri.

⁸ Nungmoq chyáng mai, Makedoni mau eq Ahkaia mau má, haù Yhumsing é mungdang hù htoq ló e za a nghut, Garai Gasang má nungmoq lumjng hkyô gi, jowó hkangmó jam ló bê nghut luí, ngamoq gi, haí le tái nó a ra lo nghut ri.

⁹ Hkâsu mù gâ le, ngamoq lé nungmoq hká đông lhom hkulum yu é hkyô lé, yhangmoq yhang, ngamoq lé shit kyo akô. Nungmoq gi, hparà lhô pé lé tô pyám luí, Garai Gasang shut hkâsu kut lhing lò mù, rû dui nyi é eq tengmán é Garai Gasang lé dojaú nyi é hkyô lé le;

¹⁰ mauhkúng má é haù Yhang Zo lé lánng nyi é hkyô lé le, yhangmoq tái kyô akô. Yhangzo haù gi, Yhang eq shi é mai lhoq dui

toq yu é hui luí, jé lô râ nhikmó yo hkyô mai nga-nhung lé hkyi yù sù, Yesuq nghut ri.

2

Poluq, Htesaloni Wà Mó Má Garai Mù Wùn Waq É Hkyô

¹ Gumang wui é, nungmoq chyáng ngamoq lé kùm é hkyô gi, akôm a nghut é lé, nungmoq yhang sé lhê.

² Nungmoq sé é eq rajung za, ngamoq gi, hí hkún, Hpilipi wà mó má wuihke jamjau eq rhoi é hui wù bê nghut lhê; nghut kôlhang, nga-nhung é Garai Gasang garúm é yanmai, gyai lhom htoq htng é hui kôle, Garai Gasang é gabú danglù lé, a gyuq a kyum nungmoq lé wám tái kyô é nghut lhê.

³ Hkâsu mù gâ le, ngamoq lhoq pun lhoq kyíng é hkyô gi, shut é, a nghut jáng, a sanséng é i-myt đông eq nungmoq lé mhaú zô é đông a nghut e za,

⁴ haù gabú danglù lé chùng gíng é bang ga, Garai Gasang chyáng mai ahkáng wó é đông za, ngamoq tái é nghut lhê. Ngamoq gi, byu pé lé gabú nhâng rá matú a nghut, ngamoq é myit lé chyam wú nyi é Garai Gasang lé, gabú nhâng rá matú shikut é ru nghut lhê.

⁵ Hkâsu mù gâ le, nungmoq sé é eq rajung za, ngamoq gi, lhoq ngón mhaú é dang le hkâ-nhám a chùng wú, nghop tô é myoqnoq myit le hkâ-nhám a bò, Garai Gasang gi, ngamoq é saksé nghut lhê.

⁶ Ngamoq gi, byu pé mai le, nungmoq mai le, gotú ó yuq mai le hkya-on rá lé ho nyi é a nghut, Hkrisduq é lagyô pé nghut é eq rajung za, nungmoq lé wôlai hûn naù jáng wó hun lhê; nghut kôlhang,

⁷ Ìnu rayuq, yhang é zoshàng zô pé lé hku baú é su, nungmoq chyáng nú-nhám é đông nyi lai lò bê nghut lhê.

⁸ Ngamoq gi, nungmoq lé gyai yhang chyitdap luí, Garai Gasang é gabú danglù za a nghut, ngamoq é asak pé nungmoq lé byí pyám le lhang nhik dik lhê; hkâsu mù gâ le, nungmoq gi, ngamoq chyitdap dik é bang dut bekô nghut é yanmai nghut lhê.

⁹ Gumang wui é, nungmoq gi, ngamoq gyai yhang mù zui shikut é hkyô lé, gè gè bun kó rá nghut lhê; Garai Gasang é gabú danglù lé, nungmoq chyáng ngamoq hko kyô é u lé, ó yuq lé le, ngamoq mai wôlai a byi sháng gaq nghù, ngamoq gi, nyí lé, myín lé, mù zui é nghut lhê.

¹⁰ Ngamoq gi, lumjng bê bang nungmoq é hí má, hkâsu chyoiyúng é eq dingmán é, mara hûn rá a bo é bang dut lai lo é hkyô lé, nungmoq le, Garai Gasang le, saksé nghut lhê.

¹¹ Hkâsu mù gâ le, ngamoq gi, iwa rayuq mai yhumsing yhangzô pé lé kut byí é su, nungmoq yuq hkangmó lé, myit wum byí

* 1:1 Sila lé gi, Salwanu le gâ lhê.

nyi é hkyô lé le, nhik taí títng nyi é hkyô lé le,

¹² Yhang é mingdán eq hpungwup shing kang má, nungmoq lé wut yu é Garai Gasang eq gingdán é dōng, nungmoq asak wó ùi nyi sháng gaq nghũ, nungmoq lé wum byi nyi é hkyô lé le, nungmoq yhang sê nyi lhê.

¹³ Ngamoq gi, ngamoq chyáng mai nungmoq wó gyô yu é Garai Gasâng é mungdang lé, nungmoq lhom yu é hkũn, byu é dang lé lhom yu é dōng a nghut e za, lumjĩng é bang nungmoq má mũ zũ nyi é, haũ Garai Gasâng é mungdang lé yhang, lhom yũ kô é yanmai, Garai Gasang lé xoq xoq jeju hkya-ôn nyi lhê.

¹⁴ Gumang wui ê, nungmoq gi, Hkrisduq Yesuq má nghut nyi é, Yuda mau má joq é Garai Gasâng é noqkuq hpũng pé lé, alik kut yu é bang dut bekô nghut ri. Noqkuq hpũng haũ pé gi, Yudaq byu pé zing-ri é lé hui zô é su, nungmoq le, yhumsing mau má é byu pé zing-ri é lé hui zô akô nghut ri.

¹⁵ Yudaq byu pé gi, haũ Yhumsĩng Yesuq eq myightoi pé lé sat pyám kôluí, ngamoq lé le hkat htoq akô. Yhangmoq gi, Garai Gasang a ô nau é hkyô kut é bang, byũ lhunglhang eq gyê dut é bang nghut akô.

¹⁶ Tũngbaũ pé hkyi yũ hui rá matú, ngamoq hko kyô é hkyô lé, yhangmoq hkũm akô; yhangmoq gi, hkâ-nhám le, yhumsing é mara lé dik shoq haũ dōng lhoq jat myô yũ akô nghut ri. Haũ mù, Garai Gasâng é nhikmo-yô é hkyô gi, yhangmoq ahtoq má jé bê nghut ri.

Htesaloni Byu Pé Lé Poluq Hui Nau Nyi É Hkyô

¹⁷ Gumang wui ê, ngamoq gi, rayoq zo nungmoq eq myoqdong byam gâng to kôle, myit gi, a gâng é nghut lhê; nungmoq lé gyai bun-nghâm nyi luí, wó myang hui shoq nghũ, ngamoq gyai yhang shikut nyi lhê.

¹⁸ Nungmoq chyáng ngamoq jé lé nau mù luí, ngò Poluq yhang, adàm dàm shikut wú bê; nghut kôlhang, Tsadán gi, ngamoq lé hkũm tang pyám ri.

¹⁹ Hkâsu mù gâ le, nga-nhũng é Yhumsĩng Yesuq Hkrisduq é hí má, Yhang jé lé é hkũn, ngamoq é myit myoqbyũ hkyô, gabú hkyô eq gumrông rá janmaũ gi, haĩ jung wá nghut lhê gâ le, nungmoq yhang nghut nyi lhê a nghut kó lúh?

²⁰ Gè gè yhang, nungmoq gi, ngamoq é gumrông jowó eq gabú hkyô nghut nyi ri.

3

¹ Haũ mù luí, ngamoq gi, haũ lé a wó jân nyi lo jáng, Ahten myuq má ngamoq baũ nyi gyô le je gè rá nghut lhê nghũ, myit hpyit yũ mù,

² wũhke jamjau shí pê é yanmai, ó yuq le, myit a hten kó sháng gaq nghũ, nungmoq é lumjĩng hkyô má, nungmoq lé wum-o byi rá eq myit wum byi rá matú,

³ Hkrisduq é gabú danglũ lé hko kyô é hkyô má, ngamoq é gumang eq Garai Gasâng é mù wũn luzũm nghut é Timohti lé, nhang kat é nghut lhê. Nga-nhũng gi, wũhke jamjau pé hui zo rá matú, hkyin to hui é bang nghut é lé, nungmoq yhang rago sê nyi lhê.

⁴ Nga-nhũng gi, zing-ri hui zo rá nghut lhê nghũ, ngamoq, nungmoq eq rahá nghut nyi é hkũn, noq má nungmoq lé ngamoq taĩ kyô nyi gũ nghut bê. Nungmoq rago sê é eq rajung za, haũ dōng dut bê nghut ri.

⁵ Hau é yanmai, ngò a wó jân nyi lo jáng, haũ gunglaũ sũ mai nungmoq lé gunglaũ yũ luí, ngamoq wũn waq bê muzo gi, akôm dut byuq rá lé, myit chiq mù, nungmoq é lumjĩng hkyô lé wó sé rá matú, yhang lé ngò nhang kat é nghut lhê. Gunglaũ sũ gi, nat Tsadán nghut lhê.

Timohti Lo Shit Kyô É Wum Byi Dang

⁶ Ahkuí kúm, Timohti gi, nungmoq é lumjĩng hkyô eq chyitdap myit eq sêng é gabú danglũ pé lé, nungmoq chyáng mai ngamoq chyáng wun jé lô byi bê nghut ri. Nungmoq, hkâ-nhám le, ngamoq lé rago bũn nyi é hkyô lé le; ngamoq, nungmoq lé myàng nau nyi é eq rajung za, nungmoq, ngamoq lé myàng nau nyi é hkyô lé le, yhang lo taĩ kyo bê nghut ri.

⁷ Haũ mù luí, gumang wui ê, ngamoq myit myo uhkyí é hkyô eq zing-ri hui é hkyô pé banshoq má, nungmoq é lumjĩng hkyo é yanmai, nungmoq eq sêng luí myit wum byi é hkyô lé ngamoq wó yũ bê nghut lhê.

⁸ Ahkuí, ngamoq gi, haũ Yhumsĩng má nungmoq yap gĩng nyi kô é yanmai, gè gè nyi ngón bê nghut lhê.

⁹ Nga-nhũng é Garai Gasâng hí má, nungmoq é yanmai, ngamoq myang hkam yu é gabú hkyô banshoq lé myit kat wú jáng, ngamoq gi, nungmoq é matú Garai Gasang lé hkâsu kut jeju ũng hkya-on rá lúh?

¹⁰ Ngamoq gi, nungmoq lé dum myàng rá matú eq, nungmoq é lumjĩng myit má langhpyut é hkyô lé wó lhoq hkũm byi rá matú, nyi, myĩn, gyai yhang lhumzui luí kyúđũng nyi lhê.

¹¹ Nungmoq chyáng ngamoq lé rá matú, nga-nhũng é Yhumsĩng Yesuq eq nga-nhũng é Iwa Garai Gasang yhang ngamoq lé hkyô hpóng byi sháng gaq.

¹² Nungmoq lé ngamoq chyitdap nyi é su, haũ Yhumsĩng gi, nungmoq é chyitdap myit lé, rayuq eq rayuq é ahtoq má le, yuq hkangmó é ahtoq má le, lhoq kô jat, lhoq pyĩng byi sháng gaq.

¹³ Nga-nhúng é Yhumsing Yesuq gi, Yhàng é chyoiyúng bang banshoq eq rahá lé é hkún, nga-nhúng é Íwa Garai Gasang é hí má, nungmoq gi, mara hún jowò a joq é eq chyoiyúng é bang dut rá matú, nungmoq é myit nhikhhum má, haù Yhumsing mai wum-o lhoq kúng byí nyi sháng gaq. Yhàng é chyoiyúng bang gá é gi, byù lé, a nghut jáng, maumang lagyò pé lé, tai záng lhê.

4

Garai Gasang Ô Nau É Đông Asak Dui Râ Hkyô

¹ Xoq lui tai nau é gi, gumang wui ê, ngamoq gi, ahkuí nungmoq cháng nyi é eq rajung za, nungmoq hká đông nyi yap lui, Garai Gasang lé gabú nhâng rá hkyô nungmoq lé mhoqshit byi bê nghut lhê. Ahkuí le, ngamoq gi, shí hkyô lé nungmoq hau htoq je wó châng jat rá matú, Yhumsing Yesuq má nungmoq lé dúng tôngbán lui, myit wum byi kat lhê.

² Hkásu mù gá le, nungmoq gi, haù Yhumsing Yesuq é ahko ahkáng đông, ngamoq mai, nungmoq lé mhoqshit to byí é hkyô pé lé, sê akò nghut ri.

³ Garai Gasang ô nau é hkyô gi, haù nungmoq sân-yúng é hui rá matú le, ashop é đông gungsho zùm yap é hkyô lé koi pyám rá matú le;

⁴ nungmoq yuq hkangmó gi, haù Garai Gasang lé a sê é, a lumjing bang kut é su, gungsho yut yut ô nau é hkyô a châng e za,

⁵ haù chyoiyúng é eq hkungga ging é sù wó dut shoq, yhumsing gung lé wó hkang é hkyô mhoq yú rá matú le;

⁶ shí hkyô eq séng lui, ó yuq le, yhumsing é gumang lé, a ge shut, a ge lhúngzo rá matú le nghut lhê. Ngamoq, nungmoq lé tai kyo mù, lhoq pun lhoq kyng gù nghut bê eq rajung za, haù Yhumsing gi, haù hkyô shut é banshoq lé, dam byi rá nghut lhê.

⁷ Hkásu mù gá le, Garai Gasang gi, nga-nhúng lé a sân-yúng é bang dut rá matú wut yu é a nghut, chyoiyúng é đông asak dui nyi rá matú sheq wut yu é ru nghut lhê.

⁸ Haù mù lui, mhoqshit hkyô shí lé he-ngik pyám é sù gi, byù lé he-ngik é a nghut, haù nungmoq lé, Yhàng é Chyoiyúng Woi-nyí byí tô é sù, Garai Gasang lé he-ngik pyám é sheq ru nghut lhê.

⁹ Rayuq eq rayuq chytidap lhum rá matú, nungmoq yhang, Garai Gasang eq mhoqshit é hui bekò nghut é yanmai, gumang yhangchang chytidap lhum é hkyô eq séng lui, ngamoq gi, nungmoq chyáng ká kat byi a ra lo nghut ri.

¹⁰ Haù eq rajung za, nungmoq gi, Make-doni mau gón má é gumang wui banshoq lé chytidap nyi akò nghut ri. Nghut kôhang,

gumang wui ê, haù su je myo kut rá matú nungmoq lé ngamoq wum byí lhê.

¹¹⁻¹² Nungmoq é nyi wui lhê é asak dui hkyô má, gotú byu pé eq hkunggá é wó yú lui, ó yuq lé le, lumhkaú a ra wó dut sháng gaq, hí hkún nungmoq lé ngamoq tai kyô tô é eq rajung za, num num byù zè rá hkyô lé le, yhumsing eq a séng é hkyô a kut wún rá lé le, yhumsing loq eq zui sai mù nyi rá lé le, nungmoq é myit myoqbyù jowò kut yú keq.

Haù Yhumsing Gyó Lé Râ Hkyô

¹³ Gumang wui ê, myit myoqbyù hkyô a wó é byù góbang su, nungmoq, iyon ningsáng a dut kó sháng gaq, haù yhup ngón byuq é bang eq séng lui, nungmoq a sé rá lé, ngamoq a ô nau é nghut lhê. Yhup ngón byuq é bang gá é gi, lumjing lui shi ló byuq é bang lé gá é nghut lhê.

¹⁴ Hkásu mù gá le, Yesuq shí lui, dum dui toq bê hkyô lé nga-nhúng lumjing é yanmai, Garai Gasang gi, Yesuq má yhup ngón byuq é bang lé, Yesuq eq rahá shuí lé rá nghut lhê nghú, nga-nhúng lumjing é nghut lhê.

¹⁵ Haù Yhumsing tai é dang eq rajung za, nungmoq lé ngamoq tai kyo kôlé, haù Yhumsing dum lé é hkún, asak dui nyi é eq myit gyo tô é bang nga-nhúng gi, yhup ngón byuq bê bang htoq ratsui le wó hí rá a nghut.

¹⁶ Hkásu mù gá le, haù Yhumsing yhang gi, hté mó hkunmó eq le, maumang lagyo mó é hte eq le, Garai Gasang é tutmó mut hte eq le, mauhkung mai gyó lé lô lui, haù Hkrisduq má shi ló bê bang hí dui toq rá nghut lhê.

¹⁷ Hau htang, asak dui nyi é eq myit gyo tô é bang nga-nhúng gi, yhangmoq eq rahá mhut htoq má shuí toq yu é hui lui, maulat má haù Yhumsing eq hui rá nghut lhê. Haù hkún, nga-nhúng gi, haù Yhumsing eq ah-tum abyuq nyi nyi berá nghut lhê.

¹⁸ Haù mù lui, nungmoq gi, dang shí pé mai rayuq eq rayuq myit wum byí lhum nyi keq.

5

¹ Nghut kôhang, gumang wui ê, ahkying buinyi eq séng lui, nungmoq lé ngamoq ká hún byi a ra lo nghut ri.

² Hkásu mù gá le, haù Yhumsing é buinyi gi, myín lé hkau sù wang é su je rá nghut é hkyô lé, nungmoq rago za sê akò nghut ri. Yhumsing é buinyi gi, Yesuq dum jé lé rá buinyi lé tai nau é nghut lhê.

³ Byu pé gi, 'Nguingón yuqyo ri.' ga tai nyi bùm kô é u lé, gung lai é myiwe rayuq zohkú-nò no lo é su, htén byoq hkyô gi, byodàn tung yhangmoq chyáng jé lui, hká đông lé yhangmoq wó hpang lut kó rá a nghut.

⁴ Nghut kôhang, gumang wui ê, nungmoq gi, mauchut hkaú má nyi é bang a nghut é yanmai, buinyi haù gi, hkau sù lé é su, nungmoq é matú byodàn tung dut rá a nghut.

⁵ Nungmoq lhunglhang bang gi, maubó é yhangzô pé eq nyí é yhangzô pé nghut lhê. Nga-nhung gi, myín eq mauchut hkaû eq sêng é bang a nghut.

⁶ Haû mù luí, nga-nhung gi, byù góbang su a yhup nyi e za, machyâ luí, gyíng gyíng kut nyí sháng.

⁷ Hkâsu mù gà le, yhup é bang gi, myín lé yhup akô; ì shuq wut é bang le, myín lé shuq wut akô.

⁸ Nghut kôlháng, nga-nhung gi, nyí eq sêng lhê nghut é yanmai, gyíng gyíng kut nyí luí, lumjing myít eq chyít-dap myít lé gi, wànggô-long lé su gò to, hkyi yù hui rá lé myít myoqbyù tó é hkyô lé gi, shamtoq-muq lé su tsung to, kut sháng.

⁹ Hkâsu mù gà le, Garai Gasang gi, Yhang nhikmo-yô é hkyô lé hkâm zo rá matú, nga-nhung lé hkyin tó é a nghut e za, nga-nhung é Yhumsing Yesuq Hkrisduq mai, hkyi yù hkyô lé nga-nhung wó yù rá matú hkyin to bê nghut lhê.

¹⁰ Yesuq gi, nga-nhung yhup bûn nyi kôlháng, yhup ngón to kôlháng, Yhang eq rahá wó nyi nyi sháng gaq ga, nga-nhung é matú shí hkâm byi bê nghut ri.

¹¹ Haû mù luí, nungmoq gi, ahkuí, nungmoq kut nyi é eq rajung za, rayuq eq rayuq myít wum byi lhum mù, htuqluq htuqbang kut lhum nyi keq.

Ló Htàng Lhé É Mhoqshit Hkyô

¹² Gumang wui ê, nungmoq mâ é muzó shikut luí, haû Yhumsing má nungmoq lé up nyi é eq lhoq pun lhoq kyíng nyi é bang lé, nungmoq hkungga rá matú le;

¹³ yhangmoq zui saí é muzó jizó é yanmai, yhangmoq lé chyít-dap myít dông gyai yhang hkungga rá matú le, nungmoq lé ngamoq sang kat lhê. Nungmoq le, rayuq eq rayuq nguóngón lhum nyi keq.

¹⁴ Gumang wui ê, nungmoq lé ngamoq wum byi kat nau é gi, lagón é bang lé lhoq pun lhoq kyíng keq; nhiknge é bang lé myít wum byi keq; wum nyhôm é bang lé htuqluq htuqbang kut keq; yuq hkgangmó lé, i-myít hng byi nyi keq;

¹⁵ ó yuq lé nghut kôlháng, a ge é hkyo é yanmai, a ge é dông a taû kut rá lé lhoq pun lhoq kyíng nyi keq; nungmoq rayuq eq rayuq le, góbang banshoq eq le, shikut luí, hkâ-nhám le, ge é hkyô kut byi lhum nyi keq.

¹⁶ Hkâ-nhám le, ru gabú nyi keq;

¹⁷ abyít alan kyúdtung nyi keq;

¹⁸ hkyô hkat hkgangmó má jeju hkya-ôn nyi keq, hkâsu mù gà le, haû pé gi, Hkrisduq Yesuq má, nungmoq é matú Garai Gasang ó nau é hkyô pé nghut lhê.

¹⁹ Haû Woi-nyí lé hkâlhoq jôm pyám kó; ²⁰ myiqhtoi htoi é lé, haí su a ngàm hkâkut kó.

²¹ Jung hkgangmó lé, chyam wú luí, ge é hkyô lé zui zing nyi mù,

²² agè ashop é hkyô hkgangmó lé, koi pyám keq.

²³ Nguóngón hkyo é apûn awang nghut é Garai Gasang yhang, nungmoq lé, lhunglhang lhoq sân-yúng pyám byi sháng gaq; nga-nhung é Yhumsing Yesuq Hkrisduq dum lé é hkûn, nungmoq é woi-nyí, myít nhikhlum, gungdu gi, mara hûn rá hkyô a bò sháng gaq.

²⁴ Nungmoq lé ji yu é Sû gi, lhumzui é Sû nghut lhê mù, Yhang, shí hkyô lé kut rá nghut lhê.

²⁵ Gumang wui ê, ngamoq é matú kyú bo dung byi kó laq.

²⁶ Gumang wui banshoq bang lé, chyoiyung é chyít-puq puq é dông bo shí-kyám byi kó laq.

²⁷ Gumang wui banshoq bang lé, hun kat é laiká shí nghap kyo rá matú, haû Yhumsing é myíng mai, ngò, nungmoq lé pyíng kat lhê.

²⁸ Nga-nhung é Yhumsing Yesuq Hkrisduq é jeju gi, nungmoq chyáng ru joq nyi sháng gaq ó!

HTESALONI Pê Chyáng Htang Dàm Hun Kat é Laiká (2 Thessalonians)

¹ Ngò Poluq eq Sila, Timohti pé gi, nga-nhùng é Iwa Garai Gasang eq Yhumsing Yesuq Hkrisduq má nghut nyí bê bang, haù Htesaloni wà mó byu pé é noqkuq hpung lé dang kyò kat lhê.

² Haù Iwa Garai Gasang eq Yhumsing Yesuq Hkrisduq chyáng mã é jeju eq ngu-ingón hkyô gi, nungmoq chyáng ru joq nyí shàng gaq ô!

Jeju Hkya-on É Eq Kyúdung É Hkyô

³ Gumang wui ê, ngamoq gi, hkâ-nhám le, nungmoq é matú Garai Gasang lé jeju hkya-on rá dut ri; haù gi, gíng lhê; hkâsu mù gà le, nungmoq é lumjúng myit gi, je je kô jat lo nyí lui, nungmoq yuq hkangmó é chyitdap myit le, rayuq eq rayuq é ahtoq má je myô jat lo nyí é yanmai nghut lhê.

⁴ Haù mù lui, ngamoq gi, nungmoq zing-ri hui é hkyô pé eq wuihke jamjau hui é hkyô pé banshoq lé, nungmoq wó jân nyí kô é yanmai, nungmoq é hkam jan hkyô eq lumjúng hkyô lé, Garai Gasang é noqkuq hpung pé é hí má gumrong nyí lhê.

⁵ Shí hkyô banshoq gi, haù Garai Gasang dingmán é dòng jéyáng é hkyô lé saksé tûn shit é nghut lhê; haù mù lui, nungmoq gi, Garai Gasang é mingdán é matú wuihke jamjau hui zo bekò nghut é yanmai, mingdán haù eq gíngdán é bang gà é hui kó rá nghut lhê;

⁶ Garai Gasang gi, tengmán Sù nghut lhê; haù mù, nungmoq lé jamjau byí é bang lé, Yhang mai jamjau byí rá eq,

⁷ jamjau hui nyí é bang nungmoq lé le, ngamoq lé le lhoq lhut byi rá nghut lhê. Shí hkyô gi, haù Garai Gasang lé a sê é bang eq nga-nhùng é Yhumsing Yesuq eq séng é gabú danglù lé a gyo a châng é bang lé, jéyáng rá matú,

⁸ haù Yhumsing Yesuq, wum-o a-tsam byíng é Yhâng é maumang lagyô pé eq rahá, myishâm eq mauhkung mai htoq shit é hkûn, dut rá nghut lhê.

⁹ Yesuq jé lé lô mù, Yhâng é chyoiyúng bang má hpungwup shinggang wó yu é eq lumjúng bang banshoq mai mauhong é hui é buinyi mã, yhangmoq gi, htên byoq hkyô lé ahtum abyuq jéyáng é hui zo kó rá nghut lhê.

¹⁰ Hau htoq agó, haù Yhumsing é hí mai le, Yhâng é a-tsam kô làm é mai le, lhoq kâng pyám é hui kó rá nghut lhê. Ngamoq é saksé dang lé nungmoq lumjúng bekò nghut

é yanmai, haù lumjúng bang má nungmoq lé lóm bekò nghut lhê.

¹¹ Haù mù lui, nga-nhùng é Garai Gasang gi, nungmoq lé, Yhang ji yu é hkyô eq gíngdán ri ga rá le, haù Yhang é wum-o a-tsam mai, nungmoq myit tô é ge é hkyô hkangmó eq nungmoq é lumjúng myit eq séng é muzó lhumjup lé, lhoq dik byi shàng gaq nghù le, nungmoq é matú, hkâ-nhám le, ngamoq kyúdung byí nyí lhê.

¹² Ngamoq haù su dung byí nyí é hkyô gi, nga-nhùng é Garai Gasang eq Yhumsing Yesuq Hkrisduq é jeju yanmai, haù nga-nhùng é Yhumsing Yesuq é myíng gi, nungmoq má hkya-on waq toq é wó hui mù, nungmoq gi, Yhang má hkya-on waq toq é wó hui kó rá matú nghut lhê.

2

A Tara É Sù

¹ Gumang wui ê, haù nga-nhùng é Yhumsing Yesuq Hkrisduq dum lé rá hkyô, Yhang eq nga-nhùng rahá zup nyi to rá hkyô eq séng lui, nungmoq lé ngamoq pyíng kat nau é gi,

² haù Yhumsing é buinyi gi, jé to gù nghut bê gà é myíqhtoi dang, luhkyang, laiká pé rajung jung, ngamoq chyáng mã é nghut lhê ga nungmoq chyáng jé é nghut jáng, nungmoq é myit lui za hkâdui kó, hkâgyuq dân kó.

³ Hkâsu mù gà le, haù htên byoq é yhangzo nghut é a tará Sù htoq shit lui, haù gumlau toq é hkyô hí a htoq htoq gi, buinyi haù jé rá a nghut, haù mù lui, nungmoq lé, ó yuq eq, hká dòng mai mhaù kôlháng hkájing kó.

⁴ Haù yuq gi, Garai ga noqkuq hui é zè lhunglháng lé htuq htíng lui, haù pé banshoq é htoq má yhânggùng yhang lhoq gyaú yú rá nghut lhê; haù mù lui, Garai Gasang é noqkuq yhùm má zung to lui, yhânggùng yhang Garai Gasang nghut lhê ga tai rá nghut lhê.

⁵ Ngò gi, nungmoq eq rahá nyi tô é hkûn, shí hkyô pé lé lhaq tai kyo kyo kut é hkyô lé, nungmoq a bun lo kó lú?

⁶ Haù yuq gi, ahkyíng yam-yoq jé jáng sheq htoq shit shàng gaq ga, ahkuí, yhang lé hai eq hkûm zing tô é hkyô lé, nungmoq sê lhê.

⁷ Haù a tara é hkyô é haq dà é a-tsam gi, mù zui nyí gù nghut bê; nghut kôlháng, haù lé hkûm zing nyi sù gi, hui htot pyám hui é hkûn jé shoq, haù lé hkûm zing nyi shirá nghut lhê.

⁸ Haù hui htot pyám hui é hkûn, a tará Sù htoq shit rá nghut lhê; haù Yhumsing Yesuq kúm gi, Yhâng nhut mã é soq eq yhang lé sat pyám rá eq, Yhang gyó lo u lhê é hpungwup mó eq, yhang lé lhoq htên pyám rá nghut lhê.

⁹ Haù a tará Sù lé lo é gi, Tsadán a-tsam dòng laklai kumlhá pé, kumlhá pé, mauhong muzó pé ajung jung kut mhaù é eq,

¹⁰ htên byoq hui nyi é bang lé mhaú zo rá agé ashop é hkyô jung hkgangmó lé tûn shit rá nghut lhê. Yhangmoq htên byoq é gi, haú tengmán hkyô lé chyitdap luí hkyi yù hui rá nghut é hkyô lé he-ngik pyám kô é yanmai nghut ri.

¹¹ Hau é yanmai, Garai Gasang gi, haú tengmán hkyô lé a lumjing e za agé ashop hkyô má ô nau é lhunglhang bang mara byi é hui kó sháng gaq ga,

¹² mhaú é dang lé jing kó rá matú, a-tsam mó bo é lum shut rá hkyô lé, yhangmoq chyáng nhâng byi bê nghut ri.

Mhoqshit é hkyô má ging nyi rá hkyô

¹³ Nghut kôlhang, haú Yhumsing chyitdap é gumang wui ê, ngamoq gi, hkâ-nhám le, nungmoq é matú Garai Gasang lé jeju hkyon rá dut ri. Hkâsu mù gâ le, haú Woi-nyí eq lhoq sân-yung nyi é muzó đông le, tengmán hkyô lé lumjing é đông le, hkyi yù hui rá matú, Garai Gasang gi, nungmoq lé, sâng-hi mai hkyin yù bê nghut ri.

¹⁴ Yhang gi, nga-nhung é Yhumsing Yesuq Hkrisduq é hpungwup shinggang má, nungmoq wó bo lóm shoq ga, ngamoq é gabú danglú đông nungmoq lé shí hkyô má ji yù bê nghut lhê.

¹⁵ Haú mù luí, gumang wui ê, nhutdang đông nghut nghut, laiká đông nghut nghut, nungmoq lé ngamoq hai byi é mhoqshit hkyô lé zui ging nyi luí, ging ging yap nyi keq.

¹⁶ Yhâng é jeju yanmai, nga-nhung lé, ahtum abyuq é myit wum byi hkyô eq ge é myit myoqbyu hkyô lé byi é, nga-nhung lé chyitdap é, nga-nhung é Iwa Garai Gasang eq nga-nhung é Yhumsing Yesuq Hkrisduq gi,

¹⁷ nungmoq é i-myt má wum byi luí, ge é muzó eq ge é nhutdang lhumjup má, nungmoq lé wum-o lhoq kóng byi sháng gaq ô!

3

Kyú Dung Byi Rá Matú Lung Kat É Hkyô

¹ Gumang wui ê, je htang má ping kat nau é hkyô gi, nungmoq chyáng dut wú bê eq rajung za, haú Yhumsing é mungdang gi, hân hân byo myín ló mù, lhoq gyaú é hui sháng gaq, ngamoq é matú kyú bo dung byi kó laq.

² Yuq hkgangmó gi, lumjing myit bo é a nghut é yanmai, haú achag achyut agé ashop é byu pè chyáng mai ngamoq wó lut rá matú le, kyú bo dung byi kó laq.

³ Nghut kôlhang, haú Yhumsing gi, lhumzui é sù nghut é yanmai, Yhang nungmoq lé wum-o lhoq kóng byi mù, haú agé ashop su chyáng mai nungmoq lé hung yù rá nghut lhê.

⁴ Nungmoq gi, ngamoq ping tô é dang pé lé kut nyi mù, xoq luí le kut nyi rá nghut

lhê nghut, haú Yhumsing má ngamoq hkyak myit lum tô lhê.

⁵ Haú Yhumsing gi, nungmoq lé Garai Gasang é chyitdap hkyô eq Hkrisduq é hkam ján é hkyô má, shui wàng sháng gaq ô!

Mù Zui Shikut Rá É Hkyô

⁶ Gumang wui ê, ngamoq gi, ngamoq chyáng mai nungmoq hap yù bê ngamoq mhoqshit é hkyô đông a nyi yap é eq lagôn é gumang ó yuq eq le, we we nyi keq nghut, haú Yhumsing Yesuq Hkrisduq é mying mai nungmoq lé hkunmó hkyô kat lhê.

⁷ Hkâsu mù gâ le, ngamoq kut é alik lé hká đông cháng rá dut é gi, nungmoq yhang sé lhê. Ngamoq gi, nungmoq eq rahá nyi tô é hkûn, lagôn é hkyô a bo wú é htoq agó,

⁸ ó yuq é zoshuq lé le, ngùn a byi é a zo wú é nghut lhê. Nungmoq má ó yuq lé le wôlai a byi sháng gaq nghut, ngamoq gi, muzó shikut hkyô eq wuítke hkyô má, nyi lé, myín lé, zui saí é nghut lhê.

⁹ Ngamoq gi, nungmoq lé garúm nhâng rá ahkáng a wó é a nghut, yhumsing gung lé nungmoq cháng rá matú alik dut sháng gaq nghut sheq, haú su kut é ru nghut lhê.

¹⁰ Hkâsu mù gâ le, ngamoq, nungmoq eq rahá nyi é hkûn, "Mù a kâm zui sù gi, a zo sháng gaq." nghut, nungmoq lé ngamoq mai sang tô bê nghut lhê.

¹¹ Hkâsu mù gâ le, nungmoq chyáng má é byu ra-am lagon luí, hai mù le a zui e za, mù châng lhoq gô byi wún akô gâ é hkyô lé, ngamoq wó gô é yanmai nghut lhê.

¹² Ngamoq gi, haú su kut é bang lé, zim za nyi mù zui saí luí, yhumsing é zoshuq ho nyi kó sháng gaq nghut, haú Yhumsing Yesuq Hkrisduq é mying lé lang luí, hkunmó hkyô kat mù, wum byi kat lhê.

¹³ Gumang wui ê, nungmoq kúm gi, ge é muzó kut é hkyô má, hkâ-nhám le, hkâ-ngú byuq bùm kó.

¹⁴ Byù rayuq yuq gi, laiká shí má ngamoq mhoqshit é hkyô lé, a châng é nghut jáng, haú yuq lé rago chôm matsing yù mù, yhang hoq bun sháng gaq, yhang eq hkâzùm yap kó.

¹⁵ Nghut kôlhang, yhang lé gyê rayuq đông a sôn e za, gumang rayuq đông lhoq pun lhoq kyíng nyi keq.

Ló Htàng Lhê É Shi-kyám Dang

¹⁶ Haú nguóngon hkyo é Yhumsing yhang gi, ahkying hkgangmó eq hkyô hkat hkgangmó má, nungmoq lé nguóngon hkyô byi nyi sháng gaq. Haú Yhumsing gi, nungmoq banshoq bang eq ru nyi nyi sháng gaq.

¹⁷ Ngó, Poluq gi, ngá é loq mai yhang shi-kyám dang shí lé ká kat lhê; shí gi, ngó ká é laiká banshoq má kumlhá nghut lhê. Ngó ká é gi, shí đông chyat nghut lhê.

¹⁸ Nga-nhông é Yhumsîng Yesuq Hkrisduq
é jeju gi, nungmoq banshoq bâng chyáng ru
joq nyi sháng gaq ô!

TIMOHTI

Chyáng Hí Dàm Hun Kat é

Laiká

(1 Timothy)

¹ Nga-nhùng é hkyi yù Sù Garai Gasang eq nga-nhùng é myit myoqbyù jang nghut é Hkrisduq Yesuq é hkunmó eq rajung za, Hkrisduq Yesuq é lagyo nghut sù, ngò Poluq gi,

² haù lumjìng hkyô má ngá zo sîng nghut sù, Timohti lé dang kyô kat lâh; haù İwa Garai Gasang eq nga-nhùng é Yhumsîng Hkrisduq Yesuq chyáng mâ é, jeju eq shogyo nhikmyin hkyô, nguingón hkyô gi, náng chyáng ru joq nyí sháng gaq ô.

Sará Pyoq Pé Lé Sidiq Râ Hkyô

³ Ngò, Makedoni mau má jé wang ló é hkùn, pying to hkô é eq rajung za, Ehpesu myuq má nyi to shi aq; haù hkùn sheq, nàng gi, shut shai é mhoqshit hkyô lé mhoqshit é bang a mhoq xoq lo rá matú le,

⁴ myit htoq mhô-myi dang eq a dat htùm é byù xik labau má yangmoq a ap nóng rá matú le, haù bang lé hkunmó wó hkyô rá nghut lâh. Haù hkyô pé gi, lumjìng myit mai kut htoq é Garai Gasâng é muzó lé lhoq htoq rá malaí, mabyoq jishùm za sheq lhoq htoq nyi é nghut lâh.

⁵ Haù hkunmó hkyô lui myit myoqbyu tô é hkyô gi, chyyitdap myit yang nghut ri; chyyitdap myit haù gi, sansêng é i-myt, mara a bò bún é myit eq lumjìng myit akying mai lo é nghut lâh.

⁶ Byù ra-am gi, haù hkyô pé mai htoq ló kôluí, dangsóm tai é hkyô shut lhing ló byuq bekô nghut ri.

⁷ Haù bang gi, jep é tarâ sará pé dut naù kôlhàng, yangmoq hai tai nyi é hkyô lé le, hkyak, hai lé mhoqshit é hkyô lé le, a sé kô nghut ri.

⁸ Rayuq yuq, jep é tarâ lé rago chung é nghut jáng, jep é tarâ gi, ge é hkyô nghut é lé, nga-nhùng sê lâh.

⁹ Haù jep é tarâ gi, dingmán bâng é matú tô tô é a nghut e za, tarâ lu lai é bang eq gumlau toq bâng é matú, tarâ a hkunggá é bang eq mara kut bâng é matú, a chyoiyúng é bang eq lumjìng hkyô a cháng bâng é matú, yangmoq é yhangwa lé nghut nghut, yhangnu lé nghut nghut, sat pyám bâng é matú, byù sat bâng é matú,

¹⁰ ashop é đông gungsho zùm yap é bang eq yugé yangchang nyi zo lhum bâng é matú, jùn đông byù ung zo bang, mhaù é bang eq dakam mhaù bâng é matú, tengmán mhoqshit hkyô eq shai lhum é lhunglhang bâng é matú sheq, jep é tarâ tô tô é nghut é lé, nga-nhùng sê lâh.

¹¹ Tengmán mhoqshit hkyô haù gi, hkungso wó é Garai Gasâng eq ngo lé ap byi bê nghut é, Yhâng é hpungwup bo é gabú danglù eq rajung za nghut ri.

Poluq Chyáng Yhumsîng É Jeju Joq Nyi É Hkyô

¹² Ngò gi, ngo lé wum-o byi é, nga-nhùng é Yhumsîng Hkrisduq Yesuq lé jeju hkyô-ôn lâh; hkâsu mù gâ le, Yhang gi, ngo lé lhumzui sù rayuq đông sôn yù lui, Yhâng é muzó jizó má hkyin kat yu é yanmai nghut lâh.

¹³ Hí hkùn, ngò gi, Garai Gasang lé tai hpoi sù, zing-ri sù eq byù rhoi sù nghut wú kôlhàng, a sé shi mù lumjìng myit a bo e za kut é yanmai, shogyo nhikmyin yu é hkyô lé ngò wó yu é nghut lâh.

¹⁴ Nga-nhùng é Yhumsîng é jeju lé le, Hkrisduq Yesuq eq sêng é lumjìng myit eq chyyitdap myit lé le, ngá chyáng agùn agó hut hkyô kat byi bê nghut ri.

¹⁵ Yubak dap bang lé hkyi yù rá matú, Hkrisduq Yesuq gi, mingkan má jé lé bê gâ é dang gi, lumjìng é mungdang nghut lui, gè gè yang lhom yù gîng é dang nghut lâh. Haù yubak dap bang má, ngò gi, yubak je kô sù nghut é nghut lâh.

¹⁶ Nghut kôlhàng, Hkrisduq Yesuq gi, Yhang lé lumjìng lui ahtum abyuq é asak lé wó yù rá bâng é alik dut rá matú, yubak dap bang má yubak je kô sù nghut é, ngá é ahtôq má, Yhâng é hkam jan hkyô lhunglhang wó tûn shit sháng gaq ga, Garai Gasang gi, ngo lé shogyo nhikmyin yu ri.

¹⁷ Haù mù, haù arông eq hpungwup shingkan gi, ahtum abyuq é, a dat htên byoq é, myoq eq a byu-myang é Hkohlâm nghut sù, rayuq zâ é Garai Gasâng chyáng pyat dedu ahtum abyuq ru joq nyí sháng gaq ô! Amen.

¹⁸ Ngá zo Timohti é, nàng eq séng lui my-igtoi dang joq wú é eq rajung za, ngò gi, nang lé haù đông mhoqshit kat lâh; haù mù, nàng gi, haù pé lé chung nyi lui, ge é majan zan mù,

¹⁹ lumjìng myit eq mara a bò bún é myit bo nyi sháng gaq. Byù ra-am gi, haù hkyô pé lé he-ngik pyám kô é nghut lui, yangmoq é lumjìng myit gi, wui-sanghpo htên byoq ló é su htên byoq byuq bekô nghut ri.

²⁰ Haù bang má, Humenu eq Alesander le bò kômù, Garai Gasang lé tai hpoi é dang a tai rá matú mhoq yù kô sháng gaq nghù, ngò, yangnhik lé Tsadán é loq má ap pyám bê nghut lâh.

2

Noqkuq Hkyô Eq Séng Lui Mhoqshit Byi É Hkyô

¹ Haù mù lui, ngò, hí pying kat nau é gi, tarâ hkunggá é eq hkungga gîng é hkyô ban-shoq má, nga-nhùng wó nguingón yuqyo nyi

sháng gaq, hkohkâm pé eq ahkáng ayá wó bang banshoq é matú le,

² yuq hkangmó é matú le, dùng tôngbán byi, kyúdung byi, dùng xoq byi, jeju hkya-on byi, kut aq ngúu nau ri.

³ Haú gi, ge é hkyô nghut mù, nga-nhùng é hkyi yù Sù Garai Gasang ô nau é hkyô nghut ri.

⁴ Yhang gi, byù lhunglhang bang hkyi yu é hui mù, tengmán é mungdang lé sê gyo rá lé, ô nau nyi ri.

⁵ Hkâsu mù gâ le, Garai Gasang gi, rayuq za nghut lui, Garai Gasang eq byu é gyoro má sô xoq byi sù le rayuq za nghut lhê; haú yuq gi, xângzo byù nghut é Hkrisduq Yesuq nghut ri.

⁶ Yhang gi, byù lhunglhang bâng é matú shíntai gunglik hkungga đông Yhânggùng lé byi pyâm bê nghut ri; haú gi, ahkyíng yam-yoq jé é hkùn, saksé htoq shit bê nghut lhê.

⁷ Ngò gi, tưngbaù pé lé, tengmán é lumjíng hkyô mhoqshit rá matú, hkkó kyo sù rayuq eq lagyo rayuq đông hkyin tô é hui sù nghut lhê. Ngò, haú su tai é gi, mhaù tai é a nghut, têng é hkyô lé za tai nyi é ru nghut lhê.

⁸ Yuqgê wui gi, nhikjum yô é hkyô eq dang hting hting lhum é hkyô a bo e za, jowò hkangmó má chyoiyung é loq tú mù kyúdung rá lé, ngò ô nau ri.

⁹ Myiwe wui gi, xâm nik nik é, hing zè, palhé, hpaù jung mebù èq a mhôn chung e za, siri bo é mebu wut chùng mù, tap tap za, shuq shuq za kut lui,

¹⁰ Garai Gasang lé noqkuq é myiwe wui eq gíng shoq, ge é muzó èq yhumsing gùng lé mhôn nyi rá lé le, ngò ô nau ri.

¹¹ Myiwe gi, uphkanng tô é đông châng nyi mù, zim za mhoq yù kó sháng gaq.

¹² Myiwe gi, yuqgê lé mhoqshit rá hkyô lé le, yuqgê lé uphkàng rá hkyô lé le, ngò ahkáng a byi; myiwe gi, zim za kut nyi ra rá nghut lhê.

¹³ Hkâsu mù gâ le, Adam lé hí hpan to mù, Ewaq lé hpan é ru nghut lhê.

¹⁴ Hau htoq agó, Adam gi, mhaù é hui zo sù a nghut; haú myiwe sheq mhaù é hui zo lui, mara kut shut é ru nghut lhê.

¹⁵ Nghut kôlhang, myiwe wui gi, lumjíng myit, chyitdap myit eq chyoiyung hkyô má, shuq shuq za kut mù, yhangmoq xoq châng nyi kô é nghut jáng, zoshâng hku é đông mai hkyi yu é hui kó rá nghut lhê.*

3

Hpúng-up Eq Hpungtê Kut Râ Bâng É Hkyô

¹ Rayuq yuq, hpúng-up ayá lé ô nau nyi é nghut jáng, haú yuq gi, aróng wó é muzó lé ô nau nyi ri gâ é dang gi, lumgíng é dang nghut nyi ri.

² Haú mù lui, hpúng-up rayuq gi, mara hùn rá hkyô a bo é sù, myiwe rayuq za wó é sù, dat sidiq é sù, yhumsing gùng lé wó hkang é sù, hkungga gíng é sù, byù bíng lé dat hkulum é sù, dat mhoqshit é sù,

³ íhpê é jùn a dut é sù, byoq lhum byoq cheq a kut e za nùm é sù, mabyoq jishùm a lhoq htoq é sù, ngunzè lé a chyitdap é sù, nghut rá lhê.

⁴ Yhang gi, yhang é ikun lé rago dat uphkàng lui, yhang zó pé mai hkungga myit bo é èq yhang dang lé gyo byi é sù le, nghut rá lhê.

⁵ Rayuq yuq, yhumsing é ikun lé lhang a dat uphkang é nghut le gi, Garai Gasang é noqkuq hpúng lé gi, hkâsu kut wó wú gon rá lhu?

⁶ Chángzo dut é a myáng shi é sù gi, hpúng-up wó kut rá a nghut, kut é nghut jáng, yhang gi, nghutbùn lò lui, jéyáng é hkyô lé nat Tsadán hui zô é su hui zo abe.

⁷ Hpúng-up rayuq gi, tưngbaù pé hí má ge é myíng wó é sù le dut rá lhê; haú jáng, yhang gi, tai hpoi pyâm é lé le a hui, nat Tsadán é tuihkyô má le a myi, dut rá nghut lhê.

⁸ Haú eq rajung za, hpungtê pé gi, hkungga gíng é bang, shô-kó a xân é bang, íhpê é jùn a dut é bang, a tengmán é amyat lé a ho é bang, nghut rá lhê.

⁹ Yhangmoq gi, lumjíng hkyô má é nik é mauhpo tengmán hkyô pé lé, sansêng é i-myt èq châng nyi ra rá nghut lhê.

¹⁰ Yhangmoq gi, chyam é lé hí huí wú kó sháng gaq, hau htâng, yhangmoq lé mara hùn rá hkyô hai a bò lo jáng, hpungtê mù lé wùn kó sháng gaq.

¹¹ Haú eq rajung za, yhangmoq é yhumsing myhí pé le, myit no nhang é dang a tai e za, dat sidiq é eq hkyô hkangmó má lumgíng lui, hkungga gíng é myiwe wui, nghut ra rá dut lhê.

¹² Hpungtê rayuq gi, myiwe rayuq za wó é sù, yhangzô pé eq yhang ikun lé rago za dat wùn waq é sù, dut ra rá nghut lhê.

¹³ Hpungtê mù lé rago za wùn waq bê bang gi, yhumsing é matú aróng lé le, Hkrisduq Yesuq lé yhangmoq lumjíng hkyô má, gyuq kyum é hkyô a bo é myit mó lé le, hkyak wó yu akó nghut ri.

¹⁴ Ngò gi, hkâ-myháng a myáng má nang chyáng lé jé rá matú, myit myoqbyu to kôlhang, ahkyíng du myáng pyâm le,

¹⁵ Garai Gasang é ikun hkaù má, byu pé hká đông nyi yap rá é hkyô lé, nàng sé sháng gaq ngúu, pying kat é dang shi pé lé ká byi kat lhê; ikun haú gi, rú dui nyi é Garai Gasang é noqkuq hpúng nghut lui, tengmán hkyô é hkungmó-zíng eq apùn awang nghut ri.

¹⁶Tarâ hkungga hkyô é zaú tô é hkyô gi, ko dik é nghut é lé, ó yuq le wó he-ngik pyâm é a nghut;

haú gi, Yhang, byú gungsho má htoq shit mù, haú Woi-nyí mai Yhang lé saksé hkám byi luí, maumang lagyô pé gi, Yhang lé myàng bê nghut ri;

byuhú ahú hú má Yhâng é hkyô lé hko kyo mù, Yhang lé mingkan byu pé lumjǐng luí, hpungwup shǐngkang eq Yhang lé mauhkúng shut suí toq yú bê nghut ri.

4

Timohiti Lé Mhoqshit É Hkyô

¹Jihtúm buinyi pé má, byú ra-am gi, lumjǐng hkyô mai htak htoq ló luí, mhaú zó é woi-nyí pé htàng cháng kó rà eq nat gang mai lo é mhoqshit hkyô pé lé gyo byi kó rà nghut lhê ga, haú Woi-nyí gi, san za taí ri.

²Haú sú é mhoqshit hkyô pé gi, gegún labyoq kut é byú-mhaú pé chyáng mai lo é nghut lhê; haú bâng é myit nhikhlum gi, nyhê nhe tô é shamtoq eq nyhê man tô é su dut byuq bê nghut ri.

³Haú bang gi, hâng lhúm é hkyô lé hkúm tang é hkyô lé le, haú lumjǐng luí tengmán hkyô lé sé é bang mai jeju hkya-on mù hap yú ge é, Garai Gasang hpan to byí é zoshuq lé koi pyám nhang é le, kut akó nghut ri.

⁴Garai Gasang hpan tô é lhunglháng gi, ge é chyat nghut ri; Garai Gasang é mungdang eq kyúdúng é dang dōng haú pé lé lhoq sân-yúng nyi é nghut é yanmai,

⁵jeju hkya-on luí hap yu é nghut le gi, haí jung lé lháng he-ngik pyám rà hkyô a bō nghut ri.

⁶Haú gumang wui lé, nàng haú hkyô pé lhoq pun lhoq kyǐng é nghut le gi, nàng gi, haú nàng cháng bê ge é mhoqshit hkyô eq lumjǐng hkyô má é tengmán hkyô má, kó myhâng sú nàng nghut rà htoq agó, Hkris-duq Yesuq é ge é hpungmú wùn sú le dut rà nghut lhê.

⁷Garai a bo é myit htoq mhō-myi dang eq hpō-myí mǎng pé é mhō-myi dangsôm lé koi pyám luí, tarâ hkunggá é hkyô má yhumsing hing lé lhoq kúng yú aq.

⁸Hkásu mù gá le, gungsho lé lhoq kúng é hkyô gi, akyú shau za htoq é nghut lhê; nghut kólhang, tarâ hkunggá é hkyô kúm gi, jung hkangmó é matú akyú bō lhê nghut mù luí, shí ipyat má le, htang pyat má le, akyú bō nyi ri.

⁹Haú gi, banshoq hap yú gǐng é, lumgǐng é mungdang nghut lhê.

¹⁰Haú mù luí, xángzo byú banshoq bâng é hkyi yú Sú nghut é, je riyhang, lumjǐng bâng é hkyi yú Sú nghut é, rú dui nyi é Garai Gasang má, nga-nhúng, myit myoqbyu to bê

nghut é yanmai, nga-nhúng gi, gyai yhang shikut nyi lhê.

¹¹Haú pé lé, hkunmó hkyô luí mhoqshit byí nyi aq.

¹²Nàng é zorâm pyat lé, ó yuq eq le a wú tiq pyám sháng gaq, dang taí é má le, nyi yap é hkyô má le, chyitdap é hkyô má le, lumjǐng hkyô má le, sansêng é hkyô má le, lumjǐng bâng é matú alik kut shit nyi aq.

¹³Nàng chyáng ngò jé lé é buinyi jé shoq, nàng gi, Chyúmdang ngap kyô é má le, hko kyô é má le, mhoqshit é má le, ap nóng nyi aq.

¹⁴Nàng gi, hpúng suwún wui náng é ahtoq má loq ke byí é hkún, myiqhtoi dang dōng nang lé Garai Gasang byí to bê nghut é, woi-nyí hkyô eq sêng é chyunghuq lé, haí su a ngám hkákut pyám.

¹⁵Haú hkyô pé lé, myit zǐng zuq luí zui saí nyi aq; nàng kō myhang lo é hkyô lé, yuq hkangmó byu-myàng kó sháng gaq, nàng gǐng banshoq haú pé má ap nóng nyi aq.

¹⁶Nàng é asak dui hkyô má le, nàng mhoqshit é hkyô má le, rago sidiq nyi aq. Haú pé má ru gǐng nyi aq, hkásu mù gá le, nàng haú su kut é nghut jǎng, náng é asak lé le, náng chyáng mai gyo yu é bang lé le, nàng wó hkyi yú rà nghut lhê.

5

Suwún Wui, Chuimó Pé, Jùn Pé Eq Séng Luí Hpaqchyí Byí É Hkyô

¹Asak ko sú lé dang htân a tân e za, yhum-sing é iwa lé su, yhang lé lhoq pun lhoq kyǐng aq. Zorâm wui lé gi, gumang wui lé su,

²asak kō é myiwe wui lé gi, ínù pé lé su zùm yap luí, zomyi wui lé gi, nhammó wui lé su sansêng é i-myt banshoq eq zùm yap nyi aq.

³Gè gè yhang garúm rà dut é chuimó myí pé lé, hkunggá nyi keq.

⁴Nghut kólhang, chuimó myí rayuq yuq gi, zosháng nghut nghut, gashu nghut nghut, wó é nghut jǎng, haú bang gi, yhumsing é ikun lé wú gon luí, ínù iwa eq íchyí íwhoí pé lé jeju taú é dōng, yhangmoq é lumjǐng hkyô lé, zui saí é má lhoq mhán nhâng rà lé hí mhoq yú ra rà nghut lhê; hkásu mù gá le, haú gi, Garai Gasang ô nau é hkyô nghut ri.

⁵Haú lùm rà ó yuq le a wó mù, gè gè yhang rà tô é chuimó myí gi, Garai Gasang chyáng myit myoqbyu nyi luí, nyi, myín xoq xoq kyúdung mù, Garai Gasang garúm rà hkyô lé dǔng nyi ri.

⁶Nghut kólhang, ngón hkyô za cháng luí asak dui é chuimó myí gi, asak dui nyi kólhang, shí gù nghut bê nghut ri.

⁷Yhangmoq lé, ó yuq eq le mara a hùn kó sháng gaq, haú hkyô pé lé le mhoqshit byí nyi aq.

⁸ Rayuq yuq, yhang é buinùm ji-myi wui lé a baú é htoq agó, je luí yhumsing é ikun byú lé a baú é nghut le gi, haú lumjǐng hkyô lé he-ngik pyám bê nghut luí, a lumjǐng su htoq má je ashop é sũ dut bê nghut ri.

⁹ Hkyuq xê zàn byǐng bê é chuimó myhí za a nghut jáng, chuimó jihpán má wó kat rá a nghut; hau htoq agó, yhang gi, yuqgè rayuq za wó wú é sũ;

¹⁰ zoshàng wui lé hku baú é sũ, bíng lé rago dat hkulum é sũ, sãn-yúng bê bang é hkyí lé chi byí é sũ, wuihke huí tó é bang lé garúm luí, ge é muzó jungkháng jungmó má yhumsing gùng yhang ap nóng nyi ri ga, yhang kut é ge é muzó má myǐng hũ é sũ le, nghut rá lhê.

¹¹ Asak tiq é chuimó myhí pé lé, jihpán hau má hkákat. Hkásu mù gá le, gungsho ô nau é hkyo èq Hkrisduq chyáng yhangmoq ap nóng tó é hkyô lé ung pyám é hkún, yhangmoq gi, myi ló nau kó rá nghut lhê.

¹² Haú mù, yhangmoq gi, sâng-hi lé yhangmoq tó tó é danggidiq lé lhoq hpyoq pyám kó é yanmai, tará dará é hui zo kó rá nghut lhê.

¹³ Hau htoq agó, yhangmoq gi, rayhùm htàng rayhùm châng wang wún kômù, lagón mán byuq kó rá nghut lhê. Lagón é bang za dut kó rá a nghut, lumù gansang é bang eq yhangmoq taí a ge é pé lé taí kômù, yhumsing eq a sêng é mù má châng wang nyo wún é bang le, dut kó rá nghut lhê.

¹⁴ Haú mù luí, gyè pé mai lumù gansang dang a wó taí pyám kó sháng gaq, asak tiq é chuimó myhí pé gi, myi ló mù, zoshàng hkú luí, yhangmoq é ikun lé gón lajang rá matú, ngò, yhangmoq lé hpaqchyl byí kat lhê.

¹⁵ Hkásu mù gá le, ra-am gi, lhing taú ló kôluí, Tsadán é htàng châng nyi lugù nghut bekó nghut ri.

¹⁶ Lumjǐng é myiwe rayuq yuq gi, yhang é ikun má chuimó myhí wó é nghut le, hau yuq é matú noqkuq hpúng lé wólai a hun e za, yhang mai garúm yú ra rá nghut lhê; hau hkún sheq, noqkuq hpúng gi, gè gè yhang rá tó é chuimó myhí pé lé wó garúm rá nghut lhê.

¹⁷ Haú noqkuq hpúng lé rago za shuí ú é hpúng suwún wui gi, akyú í tú hkam yú gǐng lhê; hau mungdang hko é hkyô eq mhoqshit é hkyô má shikut é suwún wui gi, je riyhang hkam yú gǐng lhê.

¹⁸ Hkásu mù gá le, "Guq nǎng nyi é no lé, nhuttsung hkâ-tsung tó byí."[✱] ga le, "Mú zui sũ gi, yhang é zuihpau wó yú gǐng lhê."[✱] ga le, Chyúmdang má taí tó ri.

¹⁹ Hpúng suwún rayuq lé mara hun é hkyô lé, í yuq sum yuq mai saksé hkâm e za a nghut le gi, hkálhom yú.

²⁰ Nghut kôlháng, lhoq pun lhoq kyǐng é hkyô lé góbang wó yú kó sháng gaq, mara kut shut é bang lé, shiwa byu pé hí má tân mhoqshit aq.

²¹ Pying kat é dang shi pé lé, gamhkui myit a bo e za châng nyi rá eq, myoqdong hkyín luí haí le a kut rá matú, Garai Gasang eq Hkrisduq Yesuq é hí má le, hkyin yú huí é maumang lagyô pé é hí má le, ngò, nang lé pying kat lhê.

²² Ó yuq é ahtoq má le loq ke* byi rá lé hkâhân; góbang é mara hkaú má le hkâbo lóm. Yhumsing yhang yhumsing sãn-yúng shoq kut nyi aq.

²³ Nǎng é wamdaou ra luí, anum num no lò lò dut é yanmai, nǎng gi, wui za shuq é hkyô lé nó pyám luí, tsibiýiq wing le ratsuí tsuí shuq byi aq.

²⁴ Byú ra-ám é mara pé gi, de de dut é nghut mù luí, tará jéyáng é jang má hí ló jé ri; ra-ám é mara kúm gi, hau é htàng má châng byóng htoq lo ri.

²⁵ Haú eq rajung za, ge é muzó pé gi, de de nghut nyi luí, hau su de de a nghut é pé lé le, wó zaú to rá a nghut.

6

¹ Jùn dut é wólai hkaú má nyi é lhunglháng bang gi, yhangmoq é yhumsing wui lé gyai yhang hkungga gǐng lhê ngù, myit yú rá dut lhê; hau hkún sheq, Garai Gasang é myǐng eq nga-nhúng é mhoqshit hkyô gi, lumù gansang é a hui rá nghut lhê.

² Lumjǐng é yhumsing wui é jùn gi, gumang wui nghut é yanmai, yhangmoq lé a wú myuq é za, yhangmoq dojaú luí akyú myang hkâm zó é bang gi, lumjǐng bang eq chyitdap gǐng é bang nghut é yanmai, yhangmoq lé je ge é dōng dojaú rá lhê. Shí hkyô pé lé, nǎng gi, yhangmoq lé mhoq byí nyi é eq lhoq pun lhoq kyǐng byí nyi aq.

Ngùn Lé Chyitdap É Hkyô

³ Rayuq yuq gi, shut é lumjǐng hkyô lé mhoqshit luí, nga-nhúng é Yhumsing Yesuq Hkrisduq é tengmán mhoqshit hkyô eq tará hkunggá é mhoqshit hkyô lé a myit huí é nghut jáng,

⁴ hau yuq gi, nghutbùn é sũ eq haí lé le a sê gyô é sũ nghut ri. Yhang gi, htoq htǐng lhùm é hkyô pé lé ô nau é, a ge é myit bò luí, dang eq séng mù mabyoq lhoq htoq ri; hau mai, manon é hkyô, byoq lum byoq cheq é hkyô, lumù gansang é hkyô, agé ashop é dōng myit ngam pyám é hkyô eq.

⁵ hau tengmán hkyô lé lhoq hpyuq pyám mù, tará hkungga hkyô gi, ngùn zé wó hkyô za nghut ri ga myit yu é, i-myit lhoq htên pyám bê bǎng é gyoro má, byin a huí é hkyô pé lé, lhoq htoq kat ri.

✱ 5:18 Tará Pun 25:4 ✱ 5:18 Luk 10:7 ✱ 5:22 Haú hkun lhê bang gi, hpúng suwún kut rá matú hkyin to bê bang lé, loq ke kyúdung byí é nghut lhê.

⁶ Nghut kôlhang, tarâ hkunggâ hkyô má nhik dik é hkyô bo é nghut le gi, amyat mó nghut nyi ri.

⁷ Hkâsu mù gâ le, nga-nhúng gi, mingkan htoq má hái jung le a yu wang lé, haù mai le hái wó yu htoq ló rá a nghut.

⁸ Haù mù lui, nga-nhúng gi, wutbu wutmè eq zoshuq wó é nghut jáng, hau eq nhik dik nyi sháng.

⁹ Wó naù sùt nau é byu pé gi, gunglaù hkyô eq tuihkyô má le, haù byoq yeq hkyô eq hên byoq hkyô má, byu pé lé myup shí nhang é, ngha é hkyô myo myo eq myit nò nhâng nau é hkyô má le, byit gyó wâng kó rá nghut lhê.

¹⁰ Hkâsu mù gâ le, ngùn lé chytidap é hkyô gi, agè ashop hkyô ajung júng é apùn awang nghut nyi ri. Byù ra-am gi, ngùn lé ô nau lui, haù lumjúng hkyô mai sô nghoq ló mù, yhumsing gùng lé yhumsing, haù yón kuq hkyo eq htaù rot pyám bekô nghut ri.

Timohti Lé Pying Kat É Dang

¹¹ Nghut kôlhang, Garai Gasâng é byù nàng gi, haù pé banshoq lé koi pyám lui, dimgán hkyô, tarâ hkungga hkyô, lumjúng hkyô, chyitdap hkyô, hkam jan hkyô eq nú-nhâm é hkyô pé lé châng hkat nyi aq.

¹² Lumjúng hkyô eq sêng é ge é majan le zân nyi aq. Hap yù lumjúng bê ga, saksé myo myó pê é hí má, ge é đông nàng yín yu é hkùn, wut yu é hui lui wó é ahtum abyuq é asak lé, zú zing nyi aq.

¹³ Haù lhunglhang lé asak byí é Garai Gasâng é hí má le, Pontu Pilat chyáng saksé hkâm nyi é hkùn, ge é đông yín yu é Hkrisduq Yesuq é hí má le, ngò, nang lé pying kat lhê.

¹⁴ Yhâng é ahkyíng yam-yoq jé jáng, Garai Gasang htoq shit nhâng rá nghut é sù, nga-nhúng é Yhumsing Yesuq Hkrisduq htoq shit é buinyi jé shoq.

¹⁵ nàng gi, agot a-u é hkyô eq mara hùn rá hkyô a bo e za, hkunmó shí lé châng nyi aq. Garai Gasang gi, hkungsô wó sù, Yhang za up sù, hkohkam pê é Hkohkâm, yhumsing pê é Yhumsing,

¹⁶ Yhang za ahtum abyuq dui nyi sù, a ge chyâng htep e é maubó má dui nyi sù, ó yuq eq le a myang wú é, a wó myang é sù nghut nyi ri. Aróng eq hpungwup a-tsam gi, Yhâng chyáng ahtum abyuq ru joq nyi sháng gaq ô! Amen.

¹⁷ Shí ipyat má wó sùt é bang gi, a gumrông rá eq a gíng é sutzè má yhangmoq é myit myoqbyù hkyô a tô e za, nga-nhúng nguínón yuqyo nyi rá matú jungkháng jungmó lé agùn agó byí é sù, Garai Gasâng chyáng za, yhangmoq myit myoqbyu nyi rá matú, hkunmó hkyó aq.

¹⁸ Ge é hkyô kut lui, ge é muzó má wó sùt nyi mù, a chum e za, gam chùng nau é myit bò rá matú, yhangmoq lé hkunmó hkyó aq.

¹⁹ Haù đông mai, yhangmoq gi, jé lô rá ipyat é matú gíng é apùn awang đông, yhangmoq é matú sutzè wó tsíng to kó rá nghut lhê; haù hkùn sheq, yhangmoq gi, asak kyíng nghut é asak haù le wó zú zing to kó rá nghut lhê.

²⁰ Timohti ê, nang lé ap to bê hkyô lé, zúng nyi aq. Tarâ a hkunggâ é po-ming ming bâng eq hpaqchyí nghut lhê ga myhíng shut é htuq htíng lhum lhum kut é hkyô lé, koi pyám aq.

²¹ Byù ra-am gi, haù lé hpaqchyí nghut lhê ga yín yù kôlui, haù lumjúng hkyô mai sô nghoq htoq ló byuq bekô nghut ri.

Jeju gi, nungmoq chyáng ru joq nyi sháng gaq ô.

TIMOHTI

Chyáng Htang Dàm Hun Kat é Laiká (2 Timothy)

¹ Hkrisduq Yesuq chyáng mã é asak byi rá gâ é danggidiq eq rajung za, Garai Gasang ô nau é đông, Hkrisduq Yesuq é lagyo nghut sù, ngò, Poluq gi, ngò chyttdap é ngá zo Timohti lé, dang kyô kat lhê.

² Haù Íwa Garai Gasang eq nga-nhùng é Yhumsing Hkrisduq Yesuq chyáng mã é jeju eq shogyo nhikmyin hkyô, nguingón hkyô gi, ru joq nyí sháng gaq ô!

Lumlug Râ Matú Myit Wum Byí É Hkyô

³ Ngò gi, ngá é kyúdung dang má, nyí, myín, abyit alan nang lé bunn nyi uchyang, sâ-n-yúng é i-myt mai, ngá é íchyí iwâ pé dojaú é su, ngò dojaú nyi é Garai Gasang lé, jeju hkya-ôn nyi lhê.

⁴ Ngò gi, ngò mã gabú hkyô bying jup sháng gaq nghú, náng é ngaubyi lé myit bunn nyi mù, nang lé gyai yang myàng nau nyi ri.

⁵ Ngò gi, nang é gyíng é lumjing myit lé lhoq pún yù mù, náng whoi Lu-i eq náng nu U-ni nhik chyáng mã hí bo é lumjing myit, ahkuí, náng chyáng le bo ri nghú, hkyak myit lum nyi lhê.

⁶ Hau é yanmai, ngò loq ke byí é đông, náng mã bo tô é Garai Gasang é chyunghuq lé, gyúng nhang nyi rá matú, nang lé ngò lhoq pún kat lhê.

⁷ Hkásu mù gâ le, Garai Gasang gi, gyuq sé é myit nga-nhùng lé a kat byí e za, a-tsam bo é myit, chyttdap sé é myit, yhumsing gúng lé dat hkang é myit sheq kat byí tô é ru nghut lhê.

⁸ Haù mù luí, náng gi, nga-nhùng é Yhumsing eq séng luí saksé hkâm é hkyô mã le, Yhâng é yanmai htóng byú dut to sù ngá é hkyô mã le, hoq myit a bo é za, Garai Gasang é wum-o mai, haù gabú danglu é matú, ngò eq ráh wuìhke jamjau chòm hui goq.

⁹ Garai Gasang gi, nga-nhùng zui saí é muzô đông a nghut e za, Yhànggung yang myit sôn tô é hkyô eq Yhâng é jeju yanmai za, nga-nhùng lé, hkyi yù luí chyoiyung é asak dui hkyô mã ji yù bê nghut ri. Ahkying nghu é lhang a joq shi mai yang, jeju hau gi, Hkrisduq Yesuq mã nga-nhùng lé byi to gù nghut bê.

¹⁰ Nghut kôhlang, nga-nhùng é hkyi yù Sù, Hkrisduq Yesuq pò htoq é đông, ahkuí, haù lé lhoq htoq shit bê nghut ri. Yang gi, shí-nò hkyô lé lhoq htên pyám luí, haù gabú danglù đông mai, asak lé le, a dat htên byoq é hkyô lé le, lhoq htoq shit bê nghut ri.

¹¹ Ngò gi, gabú danglu é matú hko kyo sù, lagyo eq mhoqshit sù đông, hkyin tô é hui sù nghut lhê.

¹² Hau é yanmai, ngò gi, wuìhke jamjau shí lé hui nyi é nghut lhê. Nghut kôhlang, ngò gi, ó yuq lé lumjing bê nghut é hkyô lé, sê é htoq agó, Yang lé ngò ap tô é pé lé, haù buinyi jé shoq, Yang wó zúng rá nghut lhê nghú hkyak myit lum tô é yanmai, ngò a hoq.

¹³ Nang gi, ngá chyáng mai wó gyô yu é tengmán dang pé lé, Hkrisduq Yesuq mã, lumjing myit eq chyttdap myit mai alik kut yu nyi aq.

¹⁴ Nang lé ap byí to bê, haù ge é mungdang lé, nga-nhùng chyáng bo tô é Chyoiyung Woi-nyí é wum-o mai zúng nyi aq.

¹⁵ Asia mau mã é bang yuq hkangmó gi, ngo lé pyám to kô é hkyô lé, náng sê lhê; haù bang mã, Hpugelu eq Heramoge nhik le bo akô nghut ri.

¹⁶ Haù Yhumsing gi, Onesihpurú é yhum-byù lé shogyo nhikmyin é hkyô tún shit sháng gaq; hkásu mù gâ le, yang gi, ngo lé anum num myit lhoq ngón é htoq agó, ngò wut é shamtoq-tuí é yanmai, a hoq e za,

¹⁷ yang, Romaq myuq mã jé nyi é hkún, ngo lé myang hui shoq, ho shikut é sù nghut ri.

¹⁸ Haù Yhumsing gi, haù buinyi mã, yang lé haù Yhumsing é shogyo nhikmyin hkyô byi sháng gaq! Ehpesu myuq mã, yang ngo lé hká-myhó garúm bê nghut é gi, náng rago yang sé lhê.

2

¹ Haù mù, ngá zo ê, náng gi, Hkrisduq Yesuq mã é jeju hkaù mã, wum bo nyi aq.

² Nang gi, saksé myo myô é hí mã ngá chyáng mai wó gyô yù bê hkyô pé lé, góbang lé dat mhoqshit é, wó lum é bang lé ap byi aq.

³ Hkrisduq Yesuq é ge é gyezo rayuq su, wuìhke hkyô lé chòm jan nyi sháng.

⁴ Gyezo rayuq đông gyê mù wùn waq nyi é sù, ó yuq nghut kôle, gotú muzô mã a bo lom é za, yang lé hkunmó hkyô nyi é gyezau lé, gabú nhâng nau é chyat nghut lhê.

⁵ Haù eq rajung za, shingjóng é sù rayuq le, shingjóng lhum poi wang é hkún, tô tô é tarâ đông a châng e nghut le gi, ung é aróng chyunghuq lé wó yù rá a nghut.

⁶ Yo-mù zui shikut é sù gi, kyôshi lé sâng-hi myang hkam yù rá sù nghut lhê.

⁷ Haù Yhumsing gi, shí pé banshoq lé wó sé é nyan nang lé byi rá nghut é yanmai, ngò taí é hkyô pé lé myit wú aq;

⁸ Haù Dawiq é awut ashín nghut sù, Yesuq Hkrisduq gi, shi é mai dum dui toq bê hkyô lé myit bun aq; hau gi, ngá é gabú danglù nghut lhê.

⁹ Gabú danglù hau é yanmai, mara bò sù rayuq lé su, ngò gi, kyum hut é hui luí, hpuzô

nyí é nghut lhê. Nghut kôlhang, Garai Gasâng é mungdang gi, kyum hut huí é a nghut.

¹⁰ Haú mù luí, ngò gi, Hkrisduq Yesuq chyang má é hkyi yù hkyô eq ahtum abyuq é hpungwup shing kang lé wó yù kó sháng gaq ngù, haú hkyin yù hui bâng é matú, jung hkangmó lé hkam jân nyi lhê.

¹¹ A-ô má é dang gi, lumgíng é dang nghut lhê:

Nga-nhúng gi, Yhang eq rahá shí bê nghut jáng, Yhang eq rahá duí rá nghut lhê.

¹² Nga-nhúng gi, hkam jân é nghut jáng, Yhang eq rahá up rá nghut lhê.

Nga-nhúng gi, Yhang lé he-ngik pyâm é nghut jáng, Yhang le, nga-nhúng lé he-ngik pyâm rá nghut lhê.

¹³ Nga-nhúng gi, lhumzui myit a bò kôlhang, Yhang gi, lhumzui nyi rá nghut lhê. Hkâsu mù gâ le, Yhang gi, yhânggùng yhang wó he-ngik pyâm é a nghut.

Garai Gasâng Hí Má Myoqdong Wó É Mù Zui Sú

¹⁴ Nang gi, yhangmoq lé, shí hkyô pé xoq luí lhoq pún nyi aq. Dang pé eq séng luí, a byoq lhum nyi kó sháng gaq, Garai Gasâng hí má yhangmoq lé sidiq byi aq. Haú gi, akyú a bo é htoq agó, wó gyô é bang lé htên byoq nhang é hkyô za nghut lhê.

¹⁵ Nang gi, haú tengmán é mungdang lé jo shoq chung jai é eq, hoq nó a rá é mù zui sú rayuq đông Garai Gasâng hí má myoqdong wó shoq, wó dut é myhó shikut aq.

¹⁶ Tarâ a hkunggâ é po-ming ming bang lé koi pyâm aq. Hkâsu mù gâ le, haú su kut é bang gi, tarâ a hkunggâ é hkyô má je riyhang wang nân ló byuq é bang dut kó rá nghut lhê.

¹⁷ Yhangmoq é mhoqshit hkyô gi, mong ana su byo myín ló rá nghut lhê; haú bang má Humenu eq Hpilitu nhik le bò kôluí,

¹⁸ haú tengmán hkyô mai sô nghoq ló byuq akô. Yhangnhik gi, haú dum duí toq hkyô dut lai bê ga tai kômù, ra-âm é lumjíng hkyô lé lhoq htên pyâm byí akô nghut ri.

¹⁹ Nghut kôlhang, "Haú Yhumsing gi, Yhang eq séng é bang lé sê lhê."^o ga luí le, "Haú Yhumsing é mying lé yín yu é bang yuq hkangmó gi, agê ashop hkyô mai lhing tau ra kó rá nghut lhê." ga luí le, dizik haú htung tap tô é, Garai Gasâng é ging títg é apún awang gi, gíng nyi ri.

²⁰ Yhùm mó ralhùm má gi, hìng auhkoq zè, ngùn auhkoq zè baú za joq é a nghut, sik auhkoq zè, tse auhkoq zè le joq lhê; ra-am gi, aróng hkyo é matú, ra-am gi, aróng hkyo é matú a nghut.

²¹ Haú mù luí, haú pé mai yhumsing gùng lé lhoq sansêng pyâm é sú gi, chyoiyúng luí, haú Yhumsing chung jai gíng é sú, ge é muzó hkangmó kut rá hen tô é sú nghut é yanmai,

aróng hkyo é matú chungzè dut rá nghut lhê.

²² Zoram é agê ashop é ô naú hkyô lé koi pyâm mù, haú sán-yúng é myit mai, Yhumsing lé wut dúng é bang eq rahá, dingmán hkyô, lhumzui hkyô, chyitdap hkyô, nguóngón hkyô pé lé, châng hkat nyi aq.

²³ Go é eq ngok é đông dang jet jet lhum é hkyô gi, mabyoq lhoq htoq é hkyô nghut é lé, nang sê lhê nghut é yanmai, haú hkyô lé koi pyâm aq.

²⁴ Haú Yhumsing é dui-nhang zoshâng gi, mabyoq a lhoq htoq é za, yuq hkangmó lé dat myit tê byí é, wó mhoqshit é, a dat nhik-yô é su dut rá rá nghut lhê.

²⁵ Yhang gi, yhang lé htuq htíng é bang lé, nú-nhâm é đông mhoqshit byi rá rá nghut lhê; haú hkún, Garai Gasang gi, yhangmoq lé myit lhing hkyô byi mù, tengmán hkyô lé sê gyo nhâng luí,

²⁶ yhangmoq gi, bún gyíng lò mù, nat Tsadán ô nau é hkyô lé kut byi rá matú, chyup yù huí é, nat Tsadán é tuihkyô mai wó hpang lut ló kó abe ngù, myit lum kat lhê.

3

Jihtùm Buinyi Pé Má Dut Lò Rá Hkyô

¹ Jihtùm buinyi pé má, wuìhkê é ahkyíng pé joq lò rá nghut é lé, nang matsíng to aq.

² Hkâsu mù gâ le, haú u lé, byu pé gi, yhumsing gùng lé za chyitdap é bang, ngùn lé myoqnoq é bang, gumrong é bang, nghutbún é bang, góbang lé tai hpoi é bang, ìnu ìwa nyo é lé a gyô é bang, jeju a dat bún é bang, a chyoiyúng é bang,

³ chyitdap myit a bo é bang, mara hkyut byi a sê é bang, lumù gansang é bang, yhumsing gùng lé hkâng a sê é bang, byuwui pé, ge é hkyô lé a nguí é bang,

⁴ haq gumlaú é bang, a bun a so dut wún é bang, yhumsing gùng lé za hkik bún é bang, Garai Gasang lé chyitdap é bang dut rá malaí ngón kún hkyô lé za chyitdap é bang, dut bùm kó rá nghut lhê.

⁵ Yhangmoq gi, tarâ hkunggâ é bang su dut kôlhang, haú pé é a-tsam lé he-ngik pyâm akô nghut ri; haú sú é bang lé, nang koi pyâm nyi aq.

⁶ Yhangmoq gi, hpaqchyí da mù yhùm pé má wàng kôluí, mara wòlai lé wun é, agê ashop é ô naú hkyô ajung jung má sô nghoq ló byuq é,

⁷ hkâ-nhâm le mhoq yu nyi kôlhang, haú tengmán hkyô lé a sê gyô é, myit nyhôm é myiwe wui lé wó llang nghoq yu é bang nghut akô.

⁸ Yanne eq Yambre nhik gi, Mosheq lé htuq htíng é su, haú bang le, haú tengmán hkyô lé htuq htíng akô nghut ri; yhangmoq

gi, myit é hkyô htên byuq kôluí, haú lumjǎng hkyô má lhum a zuí é bang nghut akô.

⁹ Nghut kôlhang, haú nhik é hkyô byông htoq lo é su, yuq hkangmó é hí má, yhangmoq ngok é hkyô byông htoq lô rá nghut mù, haú mai lai lui yhangmoq wó kut jat kó rá a nghut.

Timohti Lé Pying Kat É Dang

¹⁰ Nang kúm gi, ngá é mhoqshit hkyô, ngá é nyiyap hkyô, ngò myit myoqbyu tó é hkyô, ngá é lumjǎng hkyô, myit hǎng hkyô, chyitdap hkyô, hkam jan hkyô,

¹¹ zing-ri huí é hkyô eq wuǎhke jamjau hkyô pé lé le, Antioku wà mó, Ikoni wà mó eq Lustra wà mó pé má ngò hui zó é, zing-ri hkyô pé lé, ngò hkam jan bê hkyô lé le, nang rago sê lhê. Nghut kôle, haú Yhumsǎng gi, haú pé banshoq mai ngo lé xe yù bê nghut ri.

¹² Gè gè yhang, agè ashop é byu pé eq mhaú kut é bang gi, mhaú zó nyi bum é eq mhaú zó é huí nyi bùm kôluí, a ge é hkyô shut je riyhang myô jat lò kô é hkún,

¹³ Hkrisduq Yesuq má tará hkunggá é asak đông nyiyap nau é bang yuq hkangmó gi, zing-ri é hui kó rá nghut lhê.

¹⁴ Nghut kôlhang, nang gi, ô pê chyáng mai nang mhoq yù bê hkyô lé le, Hkrisduq Yesuq lé lumjǎng jǎng hkyi yu é hui shoq,

¹⁵ nang lé hpaqchyí byéng-yá wó byí é chyoiyúng Chyúmdang pé lé, zoshǎng hkún mai nang sê to bê hkyô lé le, nang sê é yanmai, nang mhoq yu to bê hkyô eq hkyak lumjǎng to bê hkyô má, xoq kut nyí aq.

¹⁶ Chyúmdang hkangmó gi, Garai Gasǎng é soq hǎng tô é pé chyat nghut é yanmai, mhoqshit é hkyô, tân mhoq é hkyô, htoq jo byí é hkyô eq dǎngmán hkyô lé tân shit byí é hkyô pé é matú, akyú bo ri;

¹⁷ haú mù lui, haú Garai Gasǎng é byú gi, ge é muzó jizó hkangmó lé kut rá matú, wó gumjup rá nghut lhê.

4

¹ Garai Gasǎng é hí má le, dui nyi bang eq shi byuq bang lé tará dara rá sù Hkrisduq Yesuq é hí má le, Yhang htoq shit rá hkyô eq Yhǎng mingdán é yanmai, ngò, nang lé pying kat é gi,

² haú mungdang lé hko kyo aq; ahkyíng yam-yoq ang kôlhang, a ang kôlhang, rì rì hen to aq; myit gyaí hǎng é eq rago za mhoqshit é đông, htoq jo byi, tân mhoqshit é eq myit wum byi kut nyí aq.

³ Hkásu mù gǎ le, byu pé gi, tengmán mhoqshit hkyô lé a kǎm gyô é ahkyíng jé mù, yhangmoq ô nau yut yut é hkyô chǎng lui, yhangmoq é no yu bui nau é nohkyap gyô nau é hkyô tái nhǎng rá matú, sará pé

rajùm rayò lé lhǎnghkyuq má lhoq tsing to kó rá nghut lhê.

⁴ Yhangmoq gi, haú tengmán hkyô mai yhangmoq é nohkyap lé lhǎng pyám mù, myit htoq mhô-myi dang shut lhǎng lô kó rá nghut lhê.

⁵ Nghut kôlhang, nang gi, dut tô é hkyô banshoq má rago sidiq nyi aq; wuǎhke jamjau hkyô lé hkam jǎn nyi aq; gabú danglù hko kyô é muzó kut nyi aq; nang é hpungmù banshoq lé wùn waq nyi aq.

⁶ Hkásu mù gǎ le, ngò gi, shuq jung hkungga ralhum đông hut pyám é huí nyi gù nghut mù lui, mingkan mai ngò htoq lô rá ahkyíng jé bê nghut ri.

⁷ Ngò gi, haú ge é majan le zan bê; din shǎngjóng lhùm é hkyô le bàn bê; haú lumjǎng hkyô le chang bê nghut lhê.

⁸ Ahkuí, haú tengmán é tará Agyí nghut sù, Yhumsǎng gi, haú buinyi má ngo lé ap byi rá nghut é, haú dǎngmán hkyô é janmaú lé, ngá matú tô to byi bê nghut lhê. Haú gi, ngá é matú za a nghut, Yhang htoq shit rá hkyô lé myit lǎng nyi é bang banshoq é matú le nghut lhê.

Timohti Lé Ji Kat É Hkyô

⁹ Nang gi, ngá chyáng wó dut é í hân hân lé lô aq.

¹⁰ Hkásu mù gǎ le, Demaq gi, mingkan shí lé chyitdap é yanmai, ngo lé pyám to lui, Htesaloni wà mó shut; Krezen gi, Galatiq mau shut; Tituq gi, Dalamati mau shut, é lô byuq bekô nghut é yanmai nghut lhê.

¹¹ Lukaq za ngò eq rahá nghut nyi lhê. Markuq lé, nang eq rahá shuí lé lò aq; yhang gi, ngá é hpungmù má wó htuqbǎng rá sù nghut lhê.

¹² Ngò gi, Tuhkiku lé Ehpesu myuq shut nhang kat bê nghut lhê.

¹³ Nang gi, lé lo é hkún, Troa myuq má, Karpu chyáng ngò tô tô é buhǎng haú lé le, ngá é chyúmdǎng lé le, je lui eq haú shokuq chyúmdǎng pé lé le, yù lé lô byi aq.

¹⁴ Haú ningdup hpó Alesander gi, ngo lé a ge é myo myo kut bê nghut ri; haú Yhumsǎng gi, yhang kut é eq rajung za, yhang lé dam byi rá nghut lhê.

¹⁵ Yhang gi, ngamoq é danglù lé wum kat htuq hǎng bê sù nghut é yanmai, nang le, yhang lé sidiq rá rá nghut lhê.

¹⁶ Sǎng-hí dǎm, ngá gǔng lé ngò tái hung é hkún, yuq hkangmó gi, ngá é hkyam shut a bo lom e za, ngo lé pyám tô akô. Nghut kôlhang, haú gi, yhangmoq ahtaq má mara a dut shǎng gaq.

¹⁷ Nghut kôlhang, ngò đông mai danglù haú lé rago wó hko pyo kat lui, tǔngbaù pé banshoq bang wó gyo kó shǎng gaq ga, haú Yhumsǎng gi, ngá hkyam shut yap to mù, ngo

* 4:17 Haú hkún lé, Romaq byu pé, byú sat lé gi, hkanghkyi lé tsô pyám lhê.

lé wum-o byí é nghut lhê. Hau htoq agó, ngò gi, hkanghkyí é nhut mai le hkyi yù hui bê nghut lhê.*

¹⁸ Haù Yhumsing gi, ngo lé agè ashop é hkyô hkanmó mai hkyi yù lui, Yhang é mauhkung mingdán má ngón za shuí jé rá nghut lhê. Hpungwup shingkang gi, Yhâng chyáng ahtum abyuq ru joq nyí sháng gaq ô. Amen.

Shi-kyâm Dang

¹⁹ Priskila eq Akula nhik lé le, Onesihpuru yhumbyù wui lé le, bo shi-kyâm byi laq.

²⁰ Erastu gi, Korinhtuq myuq má nyí gyó to bê; Trohpimu lé gi, nô lui, Melitu wà mó má ngò nyí pyâm to bê nghut lhê.

²¹ Nang gi, wó dut é í, gyoqmyò a wàng shi lé, shi má jé lé lò aq. Ubulu gi, nang lé shi-kyâm kat ri; haù eq rajung za, Pudén, Linu, Klodia eq gumang wui banshoq bang gi, nang lé shi-kyâm kat akô nghut ri.

²² Haù Yhumsing gi, náng é woi-nyí eq rahá nghut nyí sháng gaq. Jeju gi, nungmoq chyáng ru joq nyí sháng gaq ô.

TITUQ Chyáng Hun Kat é Laiká (Titus)

¹ Garai Gasâng é dui-nhâng zoshâng eq Yesuq Hkrisduq é lagyo nghut é sù, ngò Poluq gi, haù ahtum abyuq é asak lé chòm myit myoqbyu é yanmai, Garai Gasang hkyin yu to bâng é lumjǐng hkyô jat rà eq, tengmán hkyô lé wó sé mù, tarâ hkungga sé nhâng rà matú, hkyin yu huí é sù nghut lhê.

² Haù ahtum abyuq é asak hkyô lé, mhaù a sê é Garai Gasang gi, ahkyǐng nghu é lhâng a joq shi mai danggidiq byi to mù, Yhang masat tô é ahkyǐng yam-yoq má sheq mung-dang hko kyô é dǒng lhoq htoq shit luí,

³ nga-nhúng é hkyi yù Sù, Garai Gasang hkunmó hkyô tô é eq rajung za, haù mung-dang hko é hkyô lé ngá é loq má ap byi bê nghut ri.

⁴ Nga-nhúng chòm lumjǐng é hkyô dǒng mai, ngá zo sǐng nghut é Tituq lé laiká kâ kat lhê. Íwa Garai Gasang eq nga-nhúng é hkyi yù Sù Hkrisduq Yesuq chyáng mà é jeju eq nguǐngón hkyô gi, náng chyáng ru joq nyí sháng gaq ô.

Kreti Zinlóng Má, Tituq Wùn Waq Râ Muzó

⁵ Ngò, nang lé Kreti zinlóng má nyhi hkyô tô é gi, ngò, nang lé pying tô é eq rajung za, ngó a ban zui saí é loqzô pé lé lhoq pán rà matú eq, wà hkangmó má hpúng suwún ayá dang to byi rà matú nghut lhê.

⁶ Haù hpúng suwún kut rà sù gi, mara hún rà hkyô a bo é sù; yhangmyi rayuq za wó é sù; yhang zô pé le, agê ashop é eq jino a gyô é ga, mara hún rà jowó a joq é lumjǐng bang nghut é sù, nghut rà lhê.

⁷ Hkâsu mù gâ le, hpúng-up rayuq gi, Garai Gasâng é sùt zum sù rayuq dǒng nghut lhê mù, mara hún rà hkyô a bo é sù nghut rà lhê; yhang gi, yhumsing myit a cháng; i-miyit a lúm tot; íhpê é jùn a dut; mabyoq jishúm a kut; a sansêng é ngùn hǐng lé a myit ô nau é sù nghut rà lhê.

⁸ Yhang gi, byù bíng lé dat hkulúm sù; ge é hkyô lé chyitdap sù; nǐm é sù, dǐngmán sù; chyoiyúng sù; yhumsing gǔng lé wó hkang é sù;

⁹ mhoq yu to bê hkyô eq rajung za, lumjǐng é mungdang lé gǐng gǐng zui zing nyi é sù nghut rà lhê. Haù hkùn sheq, yhang gi, góbang lé tengmán é mhoqshit hkyô dǒng myit wum wó býi é eq, haù eq shai lhum é bang lé, shut é hkyô wó tǔn shit rà nghut lhê.

¹⁰ Hkâsu mù gâ le, gumlau kut é bang, dangsóm taí é bang eq mhaù zô é bang myo myo nyi ri. Ahpyo-kup hpyit é hpúng bang je riyhang myo akô.

¹¹ Haù bâng é nhut shô lé gi, xaù pyâm byi rà lhê. Hkâsu mù gâ le, yhangmoq gi, a tengmán é dǒng sutzê lé wó yù shoq ga luí, mhoqshit a gǐng é hkyô pé lé mhoqshit mù, rayhum bang bang lé lhoq hpyoq lhoq htên nyi akô nghut ri.

¹² Kreti byu mà é myiqhtoi rayuq lháng gi, "Kreti byu pé gi, ayang mhaù é bang, tân jung yosô dusak pé, lagón é zo myoqnoq bang nghut akô," ga taí wù ri.

¹³ Saksé shǐ gi, tǐng ri. Haù mù luí, yhangmoq gi, Yudaq byu pé é myit htoq mhô-myi dang lé le; tengmán hkyô lé he-ngik pyâm é bang pying tô é dang pé lé le, a gyô kô é za,

¹⁴ haù lumjǐng hkyô má gǐng tǐng nyi kó sháng gaq, yhangmoq lé htân htân tân mhoqshit byí nyi aq.

¹⁵ Sân-yúng bâng é matú gi, azǐng zê lunglháng sân-yúng ri; a sân-yúng bang eq a lumjǐng bâng é matú kúm gi, haí le a sân-yúng é chyat nghut nyi ri; hkâsu mù gâ le, yhangmoq é myit nhikhlum eq myit sǒn sé é hkyô pé gi, gè gè yhang, a sân-yúng dut byuq bekô nghut ri.

¹⁶ Yhangmoq gi, Garai Gasang lé sê lhê ga kólhang, yhumsing zui saí é loq zô dǒng, Yhang lé he-ngik pyâm é bang nghut akô. Yhangmoq gi, achaq achyut é bang, jino a gyô é bang eq, ge é mù joq mijoq eq a htuk é bang nghut akô nghut ri.

2

Hká Dǒng Nyi Yap Râ Hkyô

¹ Nang kúm gi, tengmán é mhoqshit hkyô eq wuí é dǒng mhoqshit nyi rà dut lhê.

² Hpô-mâng pé lé gi, i-miyit shirâm sé rà hkyô; hkungga gǐng é byu dut rà hkyô; yhumsing gǔng lé wó hkàng rà hkyô eq, lumjǐng myit gǐng rà, chyitdap myit gǐng rà, hkam jan hkyô gǐng nyi rà hkyô pé lé, mhoqshit byí nyi aq.

³ Haù eq rajung za, hpô-myí mâng pé lé gi, hkungga gǐng é a-kyang bo nyi rà hkyô; lumù gansâng dang a taí rà hkyô; íhpê é jùn a dut rà hkyô eq ge é hkyô lé za dat mhoqshit é bang wó dut rà matú mhoqshit byi aq.

⁴ Haù hkùn, Garai Gasâng é mungdang gi, lumu pyâm é a hui sháng gaq, yhangmoq gi, hpô-myí zô pé lé, yhumsing yhanglǎng eq, yhangzô pé lé chyitdap é,

⁵ yhumsing gǔng lé wó hkang é, siri bo é, ikun lé dat wùn waq é, ge é myit wó tǔn shit é, yhumsing é yhanglǎng uphkang é dǒng dat châng é bang dut rà matú, ge mhoqshit é hpô-myí mâng pé dut rà nghut lhê.

⁶ Haù eq rajung za, zorâm wui lé le, yhumsing gǔng lé wó hkang nyi kó sháng gaq, lhoq pun lhoq kyǐng nyi aq.

⁷ Hkyô hkat hkangmó má, yhangmoq lé nang yhang ge é muzó alik tǔn shit nyi aq.

⁸ Nang lé lhom htuq htîng é bang gi, nga-nhúng é hkyô má mara a wó hún kômù hoq hpû nyi kó sháng gaq, nang mhoqshit é hkyô má, taí pyám rà hkyô a bò shoq, têng é, siri bo é, eq sansêng é dang taí nyi aq.

⁹⁻¹⁰ Nga-nhúng é hkyi yù Sû Garai Gasang eq sêng é mhoqshit é hkyô pé hkat hkangmó yúng nyi sháng gaq, hkyô hkat hkangmó má, jun pé lé, yhangmoq é yhumsing wui pé é a-ô má nyi mù, yhumsing wui é i-myt ngón shoq dang a tu rà; a hkau rà; wó lum tó é bang dut rà hkyô pé lé, mhoqshit byi aq.

¹¹ Hkâsu mù gâ le, hkungsô wó é myit myoqbyù hkyô ga é, nga-nhúng é kô myhang Garai Gasang eq hkyi yù Sû, Yesuq Hkrisduq gi, hpungwup shingkang eq htoq shit rà hkyô lé láng nyi é hkûn,

¹² tarâ a hkunggâ é myit eq mingkan myit ô nau é hkyô koi pyám luí, shí ipyat má yhumsing gùng lé wó hkáng rà, dingmán rà eq, tarâ hkunggâ é hkyô wó cháng shoq,

¹³ nga-nhúng lé mhoqshit byi rà matú, Garai Gasâng jeju chyunghuq gi, htoq shit bê nghut mù luí, byù lhunglhâng bang lé hkyi yù hkyô hpóng byi bê nghut ri.

¹⁴ Haù Yesuq Hkrisduq gi, agè ashop é hkyô banshoq mai nga-nhúng lé hkyi yù mù, ge é muzó hkangmó lé châng kut nau é, Yhânggùng yhang sing é byuhú rahú dut rà matú wó lhoq sân-yúng yù shoq ga, nga-nhúng é matú Yhânggùng lé ap byí pyám bê nghut ri.

¹⁵ Nang lé ó yuq èq le, a wú shôm pyám kó sháng gaq; nang gi, ahko ahkáng banshoq eq, yhangmoq lé shí hkyô pé mhoqshit nyi aq; lhoq wum byí é eq, tân mhoqshit é hkyô lé le kut nyi aq.

3

Ge É Muzo Zui Saí Râ Hkyô

¹ Nang gi, lumjîng bang lé, zau wui eq ahko ahkáng wó bâng é a-ô má nyi mù, jîno gyô nyi rà eq, hkâ-nhám le ge é muzó hkangmó zui saí rà lé hen nyi uchyang,

² ó yuq lé le lù a mù rà; nguingón hkyô hô rà; myit tê byí é hkyô tûn shit rà eq; byù banshoq lé nûm é i-myt tûn shit nyi kó sháng gaq, lhoq pun lhoq kyîng nyi aq.

³ Hkâsu mù gâ le, nga-nhúng le, hí hpyang gi, byù ngok pé, jîno a gyô é bang, mhaù zo huí é bang eq, gungsho ô nau é hkyô eq mingkan ngón hkyô ajung jûng èq jùn kut é hui bang, dut mù luí, agè ashop é eq manon lhùm é hkyô kut nyi mù, rayuq eq rayuq a jú lhùm é đông nyi laí lò bê nghut lhê.

⁴ Nghut kôlhâng, nga-nhúng é hkyi yù Sû Garai Gasâng jeju eq chyitdap myit htoq shit é hkûn,

⁵ nga-nhúng yhang kut é dingmán é muzó èq a nghut é za, Yhâng é shogyo nhikmyîn

é jeju yanmai sheq, Garai Gasang gi, nga-nhúng lé hkyi yù bê nghut ri.

⁶ Yhang gi, nga-nhúng é hkyi yù Sû Yesuq Hkrisduq é yanmai, nga-nhúng é ahtoq má agùn agó hut hkyô byí é Chyoiyúng Woi-nyí èq nga-nhúng lé chí san chí sêng pyám byi mù, woi-nyí má dum hku é hui nhâng luí, myit sik htaí byí é hkyô đông nga-nhúng lé hkyi yù bê nghut ri.

⁷ Haù mù luí, Yhâng é jeju mai mara hkyut san byí é hui bê nghut é yanmai, ahtum abyuq é asak lé myit myoqbyu nyi é eq rajung za, nga-nhúng gi, silí wunlí wó hkam yu é bang dut lò rà nghut lhê.

⁸ Dang shí pé gi, lumjîng é dang nghut lhê mù luí, Garai Gasang lé lumjîng é bang gi, ge é muzó lé myit lòm luí rago zui saí nyi kó sháng gaq, haù hkyô pé lé nang wum zuq tung mhoqshit byi rà lé, ngò ô nau nyi lhê. Shí pé gi, byù lhunglhâng bâng é matú ge é eq, akyù bo é hkyô nghut lhê.

⁹ Nghut kôlhâng, ana ápá ga luí taí htîng lhùm é hkyô lé le; byùxik labaù gôn é hkyô lé le; nyo byoq lhùm é hkyô lé le; jep é tarâ eq sêng mù byoq lhùm é hkyô pé lé le koi pyám nyi aq, hkâsu mù gâ le, haù pé gi, akyù a bo é hkyô eq chûng a ge é hkyô pé nghut ri.

¹⁰ Gam hkuí é myit bò sù lé gi, í dâm mhoqshit wú mù, a wó jáng, yhang lé baù tó pyám aq.

¹¹ Haù su kut sù gi, yhang kut é muzó má mara wó tó bê nghut mù, yhumsing gùng lé yhumsing mara hun é sù nghut é lé, nang sê to lo aq.

Je Htâng Má Pying É Dang

¹² Ngò gi, Nikopoli wà má gyoqmyô lhoq lhái rà đông myit hpyit tó é yanmai, Artima lé, a nghut jáng Tuhkiku lé, náng chyáng nhang kat byi rà, jé eq yhang, nang gi, shikut luí, haù wà shut ngá chyáng lé lò aq.

¹³ Nang gi, tarâ sê é sù Zena eq Apolo nhik lé, yhangnhik é hkyowui má rà é hkyô banshoq, shikut luí garúm kat aq.

¹⁴ Nga-nhúng é byu pé gi, nyí wui rà é hkyô lé wó htuq é eq ashí zuí é bang dut kó sháng gaq, ge é muzó lé myit lòm mù zui saí nyi rà hkyô lé mhoq yù rà lhê.

¹⁵ Ngò eq rahá nyi é bang yuq hkangmó gi, nang lé shi-kyâm kat akò. Lumjîng hkyô má ngamoq lé chyitdap é bang lé, bo shi-kyâm byi aq.

Garai é jeju gi, nungmoq eq rahá joq nyi sháng gaq ô!

HPILEMON

Chyáng Hun Kat é Laiká (Philemon)

¹ Hpilemon ê, Hkrisduq Yesuq é yanmai htóng lúng nyi sù, ngò Poluq eq nga-nhùng é gumang Timohti nhik gi, ngá-nhik chyitdap é mù wùn luzúm nghut é sù nang lé le,

² ngá-nhik é gu-nhá Ahpiaq lé le, ngá-nhik é sarhé luzúm Arhkipò lé le, náng é yhùm má huí lhum lhum kut é noqkuq hpúng lé le, dang kyô kat lhê.

³ Nga-nhùng é Íwa Garai Gasang eq Yhumsing Yesuq Hkrisduq chyáng má é, jeju eq nguigón hkyô gi, nungmoq chyáng ru joq nyi sháng gaq ô!

Jeju Hkya-ôn É Hkyô Eq Kyúdung Dang

⁴⁻⁵ Ngò gi, Yhumsing Yesuq lé náng lumjing é hkyô lé le, sân-yúng bang banshoq lé náng chyitdap é hkyô lé le, wó gyô é yanmai, ngò kyúdung é hkùn, nang lé myit bìn nyi luí, hká-nhám le ngá é Garai Gasang lé jeju hkya-ôn nyi lhê.

⁶ Ngò gi, Hkrisduq é matú nga-nhùng chyáng bo tô é ge é mù lhumjup lé sê gyô é hkyô lé, náng wó yù sháng gaq ngù, náng é lumjing hkyô lé, náng saksé hkâm é má akyú htoq rá matú, kyúdung byí nyi lhê.

⁷ Náng é chyitdap myit gi, ngo lé gyai gabú nhang é eq wum-o wó yù nhang ri; hkâsu mù gâ le, gumang hpó ê, náng é yanmai, sân-yúng bâng é i-myt má nguigón yuqyo é hkyô wó yù bekò nghut ri.

Onesimu É Matú Tôngbán Byí É Hkyô

⁸ Haù su mù, náng kut gíng é muzò hkyô, ngò, nang lé pying kat lhê. Hkrisduq má, ngò gi, a gyuq a kyum é za nang lé haù wó kut nhang lhê nghut kôlháng, chyitdap myit đông za nang lé pying kat lhê.

⁹ Ngò, Poluq gi, mang bê htoq agó, ahkuí Hkrisduq Yesuq é yanmai htóng lúng sù le nghut luí,

¹⁰ ngò kyum hut huí nyi é u lé ngá zo dut lo é Onesimu é matú nang lé ngò dùng tôngbán kat lhê.

¹¹ Yhang gi, hí hpyang náng é matú akyú a bo é nghut kôlháng, ahkuí gi, náng é matú le, ngá é matú le, akyú bò bê nghut ri.

¹² Ngò nhik htùng é Onesimu lé náng chyáng dum taù nhang kat lhê.

¹³ Haù gabú danglu é yanmai, ngò htóng lúng nyi é má náng é malaí ngo lé garúm rá matú, yhang lé ngò shuí nyi to naù kôlháng,

¹⁴ ngò gi, náng myit a huí le haí le a kâm kut. Hau é yanmai, ngò, nang lé kut nhang é đông a nghut e za, náng ô nau é đông kut é san za nghut sháng gaq.

¹⁵ Hkâsu mù gâ le, náng chyáng mai yhang rayoq rabun zo gâng nyi é gi, yhang dum taù

lò mù hká-nhám le nàng eq rahá dum wó nyi nyi rá matú nghut lhê abe.

¹⁶ Yhang gi, htàng hpyang, jùn rayuq đông a nghut e za, jùn htoq má je ge é chyitdap gumang hpó dut rá nghut bê; ngá matú, yhang gi, ngò chyitdap dik é sù nghut lhê; náng matú kúm gi, byù rayuq đông le, Yhumsing Yesuq má gumang hpó rayuq đông le, je riyhang chyitdap rá sù dut bê nghut ri.

¹⁷ Haù mù luí, náng, ngo lé luzúm rayuq sù ngam é nghut le gi, ngo lé hap yu é su, Onesimu lé le lom hap yù aq.

¹⁸ Yhang, nang lé rájung jung shut pyâm é nghut le le, chyín dap tô é nghut le le, haù gi, ngá chyáng dap é chyín ngù sôn yù aq.

¹⁹ Ngò, Poluq gi, chyín haù xap rá ngù luí, ngá loq eq yhang kâ kat kôlháng, náng yhang lhang, ngo lé asak chyín xap rá sù nghut é lé bìn nham aq.

²⁰ Nghut bê, gumang hpó ê, nang é yanmai, haù Yhumsing má ngò gabú é hkyô wó yu nyi sháng gaq, Hkrisduq má ngá é i-myt lé lhoq ngui lhoq ngón byí é đông, shí, ngò pying kat é dang lé gyo byi laq.

²¹ Náng gi, ngò tai kat é htoq má je lhom kut rá nghut é lé, hkyak za sé luí, ngò kâ kat é nghut lhê.

²² Hau htoq agó, ngá é matú nyi rá gok lajang lánq aq. Hkâsu mù gâ le, nungmoq kyúdung byí é yanmai, ngò gi, nungmoq chyáng dum wó jé rá lé myit myoqbyu nyi lhê.

²³ Hkrisduq Yesuq é yanmai, ngá é htóng lúng luzúm nghut é sù Epahpra gi, nang lé shi-kyâm kat ri.

²⁴ Ngá é htuq luq htuq bang nghut é Markuq, Aristakuq, Demaq, Lukaq pé le, náng lé shi-kyâm kat akò.

²⁵ Yhumsing Yesuq Hkrisduq é jeju gi, nungmoq é woi-nyí eq rahá za ru joq nyi sháng gaq ô!

HEBRE Pê Chyang Hun Kat é Laiká (Hebrews)

Garai Yhangzo Gi, Maumang Lagyô Pé Htoq Je Gyaú É Hkyô

¹ Lai lô bê ipyat pé má, Garai Gasang gi, nga-nhung é ichyí iwá pé lé myiqhtoí pé dông alhng lhg eq adông dông mai dáng nyo wú bê nghut lhê.

² Nghut kôlhang, lô htâng é buinyi shí pé má, Yhang gi, Yhâng Zo dông mai nga-nhung lé dang nyô bê nghut ri; Yhang gi, lhunglhang lé sng sù dut rá matú haú Zo lé masat to mù, Zo dông mai, nyi mi-nyi, joq mijoq lé hpan to bê nghut ri.

³ Haú Zo gi, Garai Gasang é hpung-wup shingkang duqbó é hkyô eq Yhâng é gungkyang isâm roq nghut nyi mù, lhunglhang lé Yhâng é a-tsam bying é dang eq zui zing tô ri. Yhang gi, yubak mara lé lhoq sân-yung é hkyô lé ban kut é htâng, mauhkung htoq má Hkikhkam dik Sù Garai Gasang é loqyo hkyam má zung to bê nghut ri.

⁴ Haú mù luí, Yhang gi, maumang lagyô pé é mying htoq gyaú é mying lé wó sng yù bê nghut é eq rajung za, yhangmoq htoq je riyhang gyaú sù dut bê nghut ri.

⁵ Hkâsu mù gâ le, Garai Gasang gi, "Nàng gi, Ngá Zo nghut ri. Hkú-nyí, Ngò gi, Náng Wa dut bê nghut lhê."^{*}

ga le, dum,

"Ngò gi, Yhâng Wa dut rá nghut mù, Yhang gi, Ngá Zo dut rá nghut lhê."^{*}

ga le, maumang lagyo hká yuq lé hkâ-nhám wá tái wú é nghut lhê lú?

⁶ Dum, Garai Gasang gi, Yhâng é zomún lé mingkan shut nhang hâng kat é hkún,

"Ngá é maumang lagyô pé banshoq gi, Yhang lé noqkuq kó sháng gaq."^{*}

ga tái ri.

⁷ Maumang pé eq séng luí Garai Gasang tái é má,

"Yhang gi, Yhâng é maumang lagyô pé lé lai su dut nhang mù, Yhâng é dui-nhang zoshâng wui lé, myishâm pé su dut nhang é nghut ri."^{*}

gâ ri.

⁸ Nghut kôlhang, haú Zo eq séng luí, Yhang gi, "Garai Gasang é, Náng é hkohkâm-tanghkuq gi, pyat dedu ahtum abyuq gng nyi mù,

Náng é dingmán hkyô gi, Náng é mingdán lé uphgang é hkyô dut rá nghut lhê.

⁹ Nàng gi, dingmán hkyô lé chyitdap bê nghut mù, agé ashop é hkyô lé a ngui byuq lô é nghut lhê.

Haú mù luí, Garai Gasang, náng é Garai Gasang gi, Nang lé, gabú nhang é xú but byí é dông, Náng é luzúm wui htoq je lhoq gyaú to bê nghut ri."^{*}

ga tái ri.

¹⁰ Hau htoq agó, Yhang gi,

"Yhumsing é, Nàng gi, a-nham sâng-hi má myidám é apùn awang lé hi tô é nghut mù,

mauhkung pé gi, Náng é loqmú chyat nghut ri.

¹¹ Haú pé gi, htên byoq byuq rá nghut lhê; nghut kôlhang, nàng gi, ru gng nyi rá nghut lhê; haú pé banshoq gi, mebu su xau byuq rá nghut lhê.

¹² Nàng gi, haú pé lé, bumó lé su ding yup rá nghut lhê; Nàng gi, haú pé lé, mebu su htái pyám rá nghut lhê.

Nghut kôlhang, Nàng gi, rajung za ru gng nyi rá nghut mù, Náng é zanwut pé gi, hkâ-nhám le htúm rá a nghut."^{*}

ga le tái ri.

¹³ Garai Gasang gi,

"Ngò, náng é gye pé lé, náng é hkyí nang tanghkuq kut pyám byí é hkying je shoq,

Ngá é loqyo hkyam shut zung nyi shi aq."^{*} ga maumang lagyo hká yuq lé hkâ-nhám wá tái wú é lú?

¹⁴ Maumang pé banshoq gi, hkyi yù hkyô lé hkam yù rá nghut é bang lé dojaú rá matú, nhang kat huí é mù wún woi-nyí pé chyat za nghut akó, a nghut kó lú?

2

Sadiq Byí É Hkyô

¹ Haú mù luí, nga-nhung gi, châng nghoq lô byuq é a hui zo sháng gaq, haú nga-nhung wó gyô yu to bê hkyô lé je riyhang rago châng nyi rá dut lhê.

² Hkâsu mù gâ le, maumang lagyô pé eq tái bê mungdang gi, gng nyi mù, shut shaí lu lai é hkyô eq jino a gyô é hkyô hkangmó kut é sù gi, yhumsing eq gng é mara dam byí é hui zo kô é nghut le gi,

³ nga-nhung gi, haú-í yhang gyaú é hkyi yù hkyô lé hai su a ngam kut é nghut jáng, nga-nhung hkâsu wó hpang lut rá lú? Hkyi yù hkyô haú gi, haú Yhumsing eq hí tái pyo htoq é nghut mù, Yhâng chyang mai wó gyô yu é bang gi, haú hkyô téng é lé, ngamoq chyang saksé shit bekô nghut ri.

⁴ Garai Gasang le, kumlhá pé, mauhpo muzó pé, laklai kumlhá myo myo eq, Yhang ô nau é eq rajung za Chyoiyung Woi-nyi

* 1:5 Hkya-on 2:7 * 1:5:2 Sam 7:14 * 1:6 Tará Pun 32:43 * 1:7 Hkya-on 104:4 * 1:9 Hkya-on 45:6-7 * 1:12 Hkya-on 102:25-27 * 1:13 Hkya-on 110:1

chyunghuq pé lé gàm byí é dông mai, hau hkyô lé saksé shit bê nghut ri.

Hkyi Yù Hkyô Hpông Byi Sù

⁵ Garai Gasang gi, maumang lagyô pé lé, ngamoq tai nyi é jé lô râ mingkan lé, uphkàng nhâng râ a nghut.

⁶ Rayuq yuq mai, rawò má saksé hkâm tô é gi,

"Byù gi, hai wá nghut mù, Nàng, yhang lé bũn nyi lhê lhu?

Byu Yhangzo gi, hai wá nghut mù, Nàng, yhang lé wú gón nyi lhê lhu?

⁷ Nàng gi, yhang lé, maumang lagyô pé htoq ratsui lhoq nyhum to bê nghut ri.

Nàng gi, yhang lé, hpungwup shingkan eq aróng bò nhâng mù,

⁸ jung hkanmó lé, yhang é hkyiwa ô má tô bê nghut ri."^{*}

gâ ri. Jung hkanmó lé yhang é a-ô má tô to bê gâ é gi, Garai Gasang, hai lhang a myhit to loshoq yhang uphkàng é a-ô má tô to bê nghut é lé gâ lhê. Nghut kôlhang, yhang é a-ô má tô tô é jung hkanmó lé, ahkuí, nga-nhúng a myàng shí é za nghut lhê.

⁹ Nghut kôlhang, nga-nhúng gi, maumang lagyô pé htoq ratsui to lhoq nyhum huí é sù Yesuq lé myang é nghut lhê. Yhang gi, Garai Gasang jeju mai, yuq hkanmó é matú shí hkâm byí é hui to shàng gaq ga, shí-nò jamjau hkyô lé hkâm zo bê nghut é yanmai, ahkuí, Yhang lé hpungwup shingkan eq aróng bò nhâng bê nghut ri.

¹⁰ Zo wuí myo myo lé hpungwup shingkan wó hkam yù nhâng shàng gaq ga, jung hkanmó lé Yhang é matú chyat eq Yhang dông mai chyat joq nyi nhang é Garai Gasang gi, wuítke jamjau hui nhang é dông, yhangmoq é hkyi yù Sù lé lhoq gumjup byi rá matú htuk àng nyi ri.

¹¹ Hau byu pé lé chyoiyúng nhang é Sù eq lhoq chyoiyúng huí é bang gi, ikun ralhũm za mã é bang chyat nghut lhê. Hau mù, Yesuq gi, yhangmoq lé, gumang wui nghũ râ lé a hoq é nghut lhê.

¹² "Ngò gi, Náng mying lé, Ngá gumang wui chyáng tai pyô râ nghut lhê;

Ngò gi, shiwa hpông é myoq hí má, Nang lé hkya-on mahkôn hkôn râ nghut lhê."^{*}

ga, Yhang tai ri.

¹³ Yhang gi,

"Ngò gi, Yhang lé lumhkau nyi râ nghut lhê."^{*}

ga le dum tai ri. Hau htoq agó,

"Ngò gi, Garai Gasang ngo lé byí é zoshàng wui eq shí má nyi nyi lhê."^{*}

ga, Yhang dum tai ri.

¹⁴ Hau zoshàng wui gi, sui sho eq nghut é yanmai, Yhang le, yhangmoq é xàngzo gùng bo hkam yù bê nghut ri. Hau é yanmai, Yhang gi, Yhang é shí-nò hkyô dông mai, shí-nò hkyô é a-tsam lé zui zing é sù nghut é nat Tsadán lé wó lhoq htên pyám râ eq,

¹⁵ yhangmoq é shí-nò hkyô lé gyuq é eq, yhangmoq é asak gón lé jùn dông zui zing to huí é bang lé, wó lhoq lhut râ nghut lhê.

¹⁶ Gè gè yhang, Yhang gi, maumang lagyô pé lé garúm é a nghut é za, Abraham é awut ashín pé lé garúm é sheq ru nghut lhê.

¹⁷ Hau nghut é yanmai, Yhang gi, Garai Gasang lé dojaú é má shogyo nhikmyín é eq lhumzui é hkyangjong mó wó dut râ eq, byu pé é yubak mará é matú shítai gunglik hkungga wó kut râ matú, hkyô hkanmó má Yhang é gumang wui eq dù shoq kut é hui rá dut é nghut lhê.

¹⁸ Yhang gi, gungláu huí é hkũn, Yhànggùng yhang jamjau hui zo bê nghut é yanmai, gungláu huí nyi é bang lé wó garúm yu é nghut lhê.

3

Yesuq Gi, Mosheq Htoq Gyaú É Hkyô

¹ Hau mù luí, mauhkũng mai wut yù huí é, chyoiyúng é gumang wui é, lagyo eq hkyangjong mó nghũ nga-nhúng yin yu é Yesuq é hkyô lé rago myit wú keq.

² Mosheq, Garai Gasang é yhum gón má lhumzui é su, Yesuq le, Yhang lé masat yù sù Garai Gasang chyáng lhumzui sù dut bê nghut ri.*

³ Yhum kut sù gi, yhum htoq je gyaú é aróng lé wó é su, Mosheq htoq, Yesuq gi, je gyaú é aróng lé wó gíng é lé myàng ri.

⁴ Hkâsu mù gâ le, yhum hkanmó gi, rayuq yuq eq sai é chyat nghut ri. Nghut kôlhang, Garai Gasang gi, jung hkanmó lé sai é sù nghut lhê.

⁵ Mosheq gi, Garai Gasang é yhum gón má dui-nhâng zoshàng rayuq dông lhumzui mù, Garai Gasang tai râ nghut é lé saksé hkâm bê nghut ri.

⁶ Nghut kôlhang, Hkrisduq gi, lhumzui é zo rayuq dông Garai Gasang é yhum lé up ri. Nga-nhúng kũm gi, nga-nhúng lé wám é myit bò nhang é hkyô eq nga-nhúng gumrong nyi é myoqbyù hkyô lé myhik zing nyi é nghut jáng, Yhàng é yhum nghut nyi bê.

A Lumjng Bang Lé Sidiq Byi É Hkyô

⁷ Hau mù luí, hau Chyoiyúng Woi-nyi tai é eq rajung za,

"Hkũ-nyi, nungmoq gi, Yhàng é dangtê lé wó gyo kô é nghut jáng,

⁸ yoso má Yhang lé chyám kô é u lé,

* 2:8 Hkya-on 8:4-6 * 2:12 Hkya-on 22:22 * 2:13 Esai 8:17 * 2:13 Esai 8:18 * 3:2 Bun zo shí eq bun zo 5, 6 lhum mã é Garai Gasang é yhum gâ é gi, Garai Gasang é byu pé lé gâ é nghut lhê.

gumlau toq é hkún nungmoq é íchyí iwâ pé kut kô é su, nungmoq é i-myt lé hkâlhoq htan to kô.

⁹ Nungmoq é íchyí iwâ pé gi, myi xê zàn yhang Ngò kut é muzó lé myàng kôle, yoso haù má Ngo lé chyam lik bekò nghut ri.

¹⁰ Haù nghut é yanmai, Ngò gi, ipyat haù lé nhikjum yo mù,

'Yhangmoq é myit nhiklhum gi, hkâ-nhâm le hkyô nghoq byuq akò;

yhangmoq gi, ngá é hkyô pé lé a sé kômù nghut ri.' nghũ tai é nghut lhê.

¹¹ Haù mù, 'Ngá é bánno jowò má yhangmoq hkâ-nhâm le wó wàng kó rà a nghut.' nghũ, Ngò, nhikjum yô é eq dakâm dang tai bê nghut lhê."^{*}

gâ ri.

¹² Gumang wui ê, nungmoq má é ó yuq le, haù rù dui nyi é Garai Gasâng chyáng mai, lhing taù ló byuq sê é, yubak mara byíng é, a lumjíng é i-myt a bò sháng gaq, sidiq nyi keq.

¹³ Nungmoq gi, ó yuq le, yubak marâ é nhaù zô é hkyo eq i-myt lhoq htan pyâm é a hui kó sháng gaq, "hkũ-nyí" nghũ ru wó tai nyi nyi gi, nyi wui, rayuq eq rayuq myit wum byí lhum nyi keq.

¹⁴ Nga-nhúng gi, sâng-hi mai wó to bê myit lùm hkyô lé, ló htáng shoq zuí gíng nyi é nghut jáng, Hkrisduq eq chòm zùm yap nyi é bang dut bê nghut ri.

¹⁵ Haù gi,

"Hkũ-nyí, nungmoq, Yhâng é danghtê lé wó gyô é nghut jáng, gumlau toq é hkún, nungmoq é íchyí iwâ pé kut kô é su, nungmoq é i-myt lé hkâlhoq htan to kô."^{*}

ga tai é eq rajung za nghut ri.

¹⁶ Wó gyô yù mù, gumlau toq é bang gi, ô pé nghut akò lúh? Haù bang banshoq gi, Egotuq ming mai Mosheq eq shuí htoq lo é bang nghut bum lhê, a nghut kó lúh?

¹⁷ Myi xê zàn yhang Garai Gasang lé nhikjum yó nhang é bang gi, ô pé nghut akò lúh? Haù bang gi, mara kut shut mù, yoso má shi leq byuq é bang nghut bum lhê, a nghut kó lúh?

¹⁸ Jìno a gyô bùm kô é nghut jáng, Yhâng é bánno jowò má yhangmoq hkâ-nhâm le wó wàng kó rà a nghut ga, Garai Gasâng eq dakam é bang gi, ô pé nghut akò lúh?

¹⁹ Haù mù, yhangmoq a lumjíng kô é yanmai, a wó wàng kô é lé, nga-nhúng myang é nghut lhê.

4

Garai Gasâng É Byu Pé É Matú Bánno Buinyi Đông Nghut É Bánno Jowò

* 3:11 Hkya-on 95:7-11 * 3:15 Hkya-on 95:7-8 * 4:3 Hkya-on 95:11 * 4:4 Apùn 2:2 * 4:5 Hkya-on 95:11

* 4:7 Hkya-on 95:7-8

¹ Haù nghut mù luí, Garai Gasâng é bánno jowò má wàng rà danggidiq ru gíng nyi ashí nghut é yanmai, nungmoq má é ó yuq le, haù má a hkyit hkap é a dut rà matú, nga-nhúng sidiq nyi sháng.

² Hkâsu mù gâ le, yhangmoq lé gabú danglù haù hko kyo bê su, ngamoq lé le hko kyo bê nghut lhê; nghut kôlhang, yhangmoq wó gyô é mungdang gi, yhangmoq é matú akyú a bò, haù mù gâ le, haù wó gyô é bang gi, lumjíng myit mai a lhom hap yù kô é yanmai nghut ri.

³ Nga-nhúng lumjíng bê bang za, bánno jowò haù má wó wang é nghut lhê. Haù hkyô gi,

"Haù mù, 'Ngá é bánno jowò má yhangmoq hkâ-nhâm le wó wàng ko rà a nghut.' nghũ, Ngò, nhikjum yô é eq dakâm dang tai bê nghut lhê."^{*}

ga Garai Gasang tai bê eq rajung za dut é nghut ri. Nghut kôlhang, Yhâng é muzó gi, mau htoq xáng hkun mai ban kut to bê nghut lhê.

⁴ Hkâsu mù gâ le, "Garai Gasang gi, nyhit nyi nghũ rà buinyi má Yhâng é muzó banshoq mai bánno bê nghut ri."^{*} gâ é dang pé má, haù nyhit nyi nghũ rà buinyi eq séng é hkyô lé rawò má Yhang tai tò ri.

⁵ Bánno jowò joq é eq séng luí, Yhang dum tai tô é gi, "Ngá é bánno jowò má yhangmoq hkâ-nhâm le wó wàng kó rà a nghut."^{*} gâ ri.

⁶ Bánno jowò haù má wàng rà bang ra-am nyi é danggidiq joq tò ashí nghut ri; hí hkún, gabú danglù haù wó gyô wú bê bang kúm gi, yhangmoq jìno a gyo kô é yanmai, a wàng kô é nghut lhê.

⁷ Haù mù luí,

"Hkũ-nyí, nungmoq, Yhâng é danghtê lé wó gyo kô é nghut jáng, nungmoq é i-myt lé hkâlhoq htan kô."^{*}

gâ é lé, ngò hí lé tai bê eq rajung za, Garai Gasang gi, gyai myáng é htàng má Dawiq dòng mai tai é hkún, "Hkũ-nyí" gâ é buinyi ra-nyí dum masat to bê nghut ri.

⁸ Hkâsu mù gâ le, yhangmoq lé, Yoshuq eq bánno jowò byi bê ru nghut le gi, Garai Gasang gi, htàng má, gotù buinyi eq séng luí tai rà a nghut lo.

⁹ Haù mù luí, Garai Gasâng é byu pé é matú gi, Bánno buinyi dòng nghut é bánno jowò ru joq tò ashí nghut lhê.

¹⁰ Hkâsu mù gâ le, Garai Gasang gi, Yhâng é muzó mai bannô é su, Garai Gasâng é bánno jowò má wàng é sù gi, yhumsing é muzó mai bánno rà nghut lhê.

¹¹ Haù nghut mù, yhangmoq é jìno a gyo hkyo é alik lé cháng mù leqbat é, ó yuq le a bò sháng gaq, nga-nhúng gi, bánno jowò

haù má wó wãng shoq, a-tsam bo é í shikut sháng.

¹² Hkâsu mù gà le, Garai Gasâng é mung-dang gi, rù dui nyi é eq a-tsam bo é nghut lhê. Haù gi, shamsó íshut dap é sham htoq má je htoq é nghut mù, myit nhiklum eq woi-nyí lé le, wuimyoq pé eq wui-nyún lé le, wó gam hkoq hkyang rot é nghut lhê; haù gi, nga-nhúng myit é hkyô pé eq myit sôn é hkyô pé lé wó jéyáng é nghut lhê.

¹³ Hpan tô é lhungháng gi, Garai Gasâng é hí mai wó haq pyâm é haí le a joq é nghut lhê. Jung hkangmó gi, nga-nhúng, jìhpán shit ra rá Su é myoq hí má a wó nghop tô é hkyô, de de dut é nghut lhê.

Je Gyaú É Hkyangjong Mó Yesuq

¹⁴ Haù mù luí, nga-nhúng gi, Garai Gasâng é Yhangzo Yesuq nghut sù, mauhkúng pé shut hkyang doq ló bê nghut é gyaú é hkyangjong mó lé wó é nghut é yanmai, nga-nhúng yín yu to bê lumjìng hkyô lé ging ging myhik zing nyi sháng.

¹⁵ Hkâsu mù gà le, nga-nhúng gi, nga-nhúng wum nyhôm é hkyô pé lé a sê gyo byí é hkyangjong mó wó é a nghut é za, nga-nhúng su hkyô hkangmó má gunglaú é huí wú kôlháng mara a bo é sù hkyangjong mó lé sheq wó é ru nghut lhê.

¹⁶ Haù mù luí, nga-nhúng gi, shogyo nhik-myín é hkyô wó yú rà eq, nga-nhúng ra châ é u má nga-nhúng le wó garúm rà jeju lé myang hô sháng gaq, hkyak lum é myit mai Garai jeju tanghkuq shut chyâng htep é sháng.

5

¹ Hkyangjong mó yuq hkangmó gi, byu pé chyáng mai hkyin htoq yú huí é nghut mù, mara pé é matú, chyunghuq pé eq hkungga pé nhông byi hkyô nghut é, Garai Gasang eq sêng é muzó pé má, yhangmoq é gunglik dông, hkyin masat to huí é bang nghut akô.

² Yhânggùng yhang gi, wum nyhôm hkyo é a-ô má nghut nyi é yanmai, yhang gi, bun a bóng é eq hkyô nghoq ló é bang lé nú-nhâm é dông wó shuí-ù é nghut lhê.

³ Wum nyhôm é yanmai, yhang gi, byu pé é mará é matú le, yhânggùng yhâng é mará é matú le, hkungga nhông byi rà dut é nghut lhê.

⁴ Ó yuq le, yhumsing gùng yhumsing aróng haù lé wó yu é a nghut; Arun lé su, Garai Gasâng eq wut yu é huí jáng sheq wó é nghut lhê.

⁵ Haù eq rajung za, Hkrisduq le, hkyangjong mó dut lo é hpungwup shìngkang lé, Yhânggùng yhang kut yu é a nghut. Garai Gasang sheq, Yhang lé, "Nàng gi, Ngá Zo nghut ri; Ngò, hkù-nyí Náng Wa dut bê nghut lhê."[✠]

ga taí é nghut lhê.

⁶ Hau htoq agó,

"Nàng gi, Melahkizedek wó é hkyangjong ayá hkyô dông mai ahtum abyuq hkyangjong rayuq nghut nyi ri."[✠]
ga, gó wó má le, Yhang taí to ashí nghut ri.

⁷ Yesuq gi, myidàm htoq má asak dui nyi é buinyi pé má, Yhang lé, shí é mai wó hkyi yú Su chyáng, ngaubyi ngau-nhap eq wut garú é eq, kyùdung é eq dung tôngbân bê nghut mù, Yhâng é hkungga ging é ap nóng hkyo é yanmai, gyo byí é hui bê nghut ri.

⁸ Yhang gi, Zo rayuq nghut to kôle, Yhang hui zô é wuìhke jamjau hkyô mai jìno gyo hkyô wó mhoq yú bê nghut ri.

⁹ Yhang gi, lhoq gumjup huí é hkùn, Yhang é jìno gyo bang banshoq é matú, ahtum abyuq é hkyi yú hkyo é awang dut byuq bê nghut é eq,

¹⁰ Melahkizedek wó é hkyangjong ayá hkyô dông mai hkyangjong mó dut rà matú, Garai Gasâng eq hkyin masat é hui bê sù nghut ri.

Woi-nyí Má Wáng Ra Bê Hkyô

¹¹ Ngamoq gi, shí hkyô eq séng luí taí rá gyai joq lhê; nghut kôlháng, nungmoq gi, ra luí za a sê gyô é bang nghut kô é yanmai, taí sán kyo wuí ri.

¹² Gè gè ga jáng, ahkui lhê ahkyíng má, nungmoq gi, sará dut ging bê bang nghut lhê; nghut kôlháng, Garai Gasâng é mung-dang má é tengmán hkyo é awang lé, rayuq yuq eq nungmoq lé dum taù mhoq byi rá ru dut nyi akô nghut ri. Nungmoq gi, htan é zoshuq rà é bang a nghut, naú wíng rà é bang ru nghut nyi ashí kó myhi-nhung!

¹³ Naú wíng shuq rà é sù ó yuq le, zonú nghut nyi ashí mù, ðingmán é hkyô lé mhoqshít é má a mán shi nghut ri.

¹⁴ Nghut kôlháng, htan é zoshuq gi, ge é hkyô eq agé ashop é hkyô lé wó sê gam hkoq yú shoq, hkâ-nhám le yhumsing gùng yhumsing lhoq mhân yu nyi é, kô ðing bê bâng é matú ru nghut lhê.

6

¹ Haù mù luí, nga-nhúng gi, Hkrisduq eq séng é mhoqshít hkyô awang lé tô to mù, myit kô ðing é hkyô shut xoq só é sháng. Nga-nhúng gi, shí-nò hkyô shut shuí jé é muzó mai myit lhing hkyo é, Garai Gasang lé lumjìng hkyo é,

² bapisma pé, loq ke byi hkyô, shi é mai dum dui toq hkyô eq ahtum abyuq jéyáng hkyô eq séng é mhoqshít hkyo é, apún awang dum hí nó a ra lô é nghut lhê.

³ Garai Gasang gyô é nghut jáng, nga-nhúng gi, myit kô ðing hkyô shut xoq so rá nghut lhê.

⁴ Myoq lhoq bǒng é radàm hui bê bang, mauhkúng chyungthuq lé myang hap yù bê bang, haù Chyoyúng Woi-nyí lé chòm hkam yù bê bang,

⁵ Garai Gasâng é mungdâng é gè hkyô eq jé lo nyí é ipyat é a-tsam pé lé myang chyam wú bê bang,

⁶ yhangmoq hpuq lhik ló byuq é nghut le gi, hká dǒng lé myit lhing dum ge wó rà a nghut lo, haù mù gâ le, yhangmoq gi, Garai Gasâng é Yhangzo lé dum jén sat pyâm é dut mù, Yhang lé de de rhoi pyâm kô é nghut lhê.

⁷ Yhâng ahtoq má wo gyùn é mau wui lé shuq yù mù, yò mù sai bâng é matú akyù bo é hǒwa nuqhyí lhoq htoq byí é maumyí gi, Garai Gasâng é shimân jeju myang hap yu é nghut ri.

⁸ Nghut kǒlhang, zu gâm eq myoq gâm yuq htoq nhang é maumyí gi, akyù a bò mù, nhing pyâm é hui zo rà lé chiq rà ri. Haù gi, ló htàng má nyhê hkyô pyâm é hui rà nghut lhê.

⁹ Nghut kǒlhang, chiyitdap é gumang wui ê, ngamoq gi, haù su nghũ tái é nghut kǒlhang, nungmoq é hkyi yù hkyô eq sêng é je ge é jung pé, nungmoq wó bekô rà nghũ hkyak myit lum tô lhê.

¹⁰ Garai Gasang gi, a tara é sù a nghut. Yhang gi, nungmoq é muzó lé le, Yhâng é byu pé lé nungmoq garúm bê eq xoq luí garúm nyí é dǒng, Yhang lé nungmoq chyitdap é myit shit kô é hkyô lé le, a tô-myí rà nghut lhê.

¹¹ Ngamoq gi, nungmoq é i-myyit myoqbyù hkyô wó bying jup rà matú, nungmoq yuq hkangmó ipyat htum shoq xoq shikut nyí kó rà lé gyaí ô nau ri.

¹² Ngamoq gi, nungmoq lagon bang dut byuq rà lé a ô nau é za, Garai danggididq byí to bê é lé, lumjing myit eq myit hing hkyô dǒng mai hkam yu é bang su châng kut kó rà lé ô nau é ru nghut lhê.

Garai Gasâng É Danggididq Gĩng Nyí É Hkyô

¹³ Garai Gasang gi, Abraham lé danggididq tô é hkùn, Yhâng htoq gyaú é dakám mying lang rà rayuq lháng a nyí é nghut mù, Yhânggung lé Yhang lang luí dakam é gi,

¹⁴ "Ngò gi, nang lé teng yhang shimân byí mù, nang lé awut ashin myo myo byí rà nghut lhê."^{*} gâ ri.

¹⁵ Haù mù, Abraham gi, myit hing hing lǎng yu é htàng má, byí tô é danggididq lé wó yù bê nghut ri.

¹⁶ Byu pé gi, yhangmoq htoq gyaú su é mying lé lang luí, dakám kô é eq, yhangmoq dakam é dang lé saksé kut mù, dang-rháng é hkyô pé banshoq lé lhoq pân pyâm akó nghut ri.

¹⁷ Garai Gasang gi, Yhang myit hpyit tô é hkâ-nhám le a htaí lhik é hkyô lé, danggididq byí tô é lé hkam yù rà bâng chyáng san za shit nau ri; haù mù luí, dakám dang eq lhoq gĩng to bê nghut ri.

¹⁸ Garai Gasang gi, mhaù a ge é yanmai, hkâ-nhám le a htaí lhik é hkyô í hkat nghut é danggididq eq dakám dang joq é nghut mù, Yhang haù su kut é gi, nga-nhùng hí má tô to byí é myit myoqbyù hkyô lé myhik zing rà matú gaù é jowò shut h pang wàng bê bang nga-nhùng lé wum mó byí é dut rà matú nghut lhê.

¹⁹ Nga-nhùng gi, myit nhikhùm é sham-toq goknghe dǒng myit myoqbyù hkyô haù lé wó é nghut mù, haù gi, gĩngting é eq gaù é hkyô nghut ri. Myit myoqbyù hkyô haù gi, mauhkúng noqkuq yhùm má é pán-gyang ahkaù má é sǎn-yúng gok má jé wang é nghut ri.

²⁰ Jowò haù gi, nga-nhùng é akyu é matú, nga-nhùng é hí má wàng byí é sù Yesuq wang jé é jowò nghut ri. Yhang gi, Melahkizedek wó é hkyangjong ayá hkyô dǒng mai, ahtum abyuq é hkyangjong mó dut bê nghut ri.

7

Hkyangjong Melahkizedek É Hkyô

¹ Melahkizedek gi, Salem myuq é hkohkám eq Myhang Htàng é Garai Gasâng é hkyangjong nghut ri. Yhang gi, hkohkám pé lé sat ùng pyâm luí dum taù lo é Abraham lé hui mù, shimân byi bê nghut ri.

² Haù mù, Abraham gi, wó lo é jung hkangmó má é, xê gambùm má é ragambùm, yhang lé byi bê nghut ri. Sǎng-hi lhê é Melahkizedek é mying lichyúm gi, "dingmán hkyo é hkohkám" gâ é nghut mù, htàng lhê é "Salem é hkohkám" gâ é gi, "nguigón hkyo é hkohkám" gâ é nghut lhê.

³ Yhâng é ìnu ìwa é hkyô eq byùxik labaù le, hí é buinyi eq asak htùm é hkyô le a kâ to nghut ri. Yhang gi, Garai Gasâng é Yhangzo su, ahtum abyuq hkyangjong ru nghut nyi ri.

⁴ Yhang hkâ-í hkik lhê nghũ é lé, myit wú keq. Haù ìchyí ìwa Abraham lháng gi, wó lo é má é xê gambùm má é ragambùm, yhang lé byi ri-nhung!

⁵ Hkyangjong dut bang Lewiq é awut ashin pé gi, yhangmoq é gumang wui, Abraham mai nyí gyó lo é bang nghut kôle, tará má bo é eq rajung za, haù bâng chyáng mai xê gambùm má é ragambùm lé hkyui yù rà dut é bang nghut akó.

⁶ Nghut kǒlhang, Melahkizedek gi, Lewiq mai gyó lo é amyù a nghut kôle, danggididq pé wó to sù nghut é Abraham chyáng mai xê gambùm má é ragambùm hap yù mù, shimân byí ri.

* 6:14 Apùn 22:17

⁷ Shimân byi sù gi, shimân byi é lé hkam yu sù htoq je gyaú sù nghut é lé, ó yuq le úng-áng rá hkyô a joq é nghut lhê.

⁸ Hkyangjông pé eq séng luí ga jang, shi byuq sé é byu eq, xê gambùm mã é ragambùm lé hkyui yu é nghut lhê; nghut kôlhang, Melahkizedek eq séng luí nghut jáng, asak dui nyi é ga tai pyô byi é huí su eq hkyui yu é nghut lhê.

⁹ Xê gambùm mã é ragambùm hkyui yu sù, Lewiq lháng gi, Abraham dông mai xê gambùm mã é ragambùm byi bê nghú wó tai ri.

¹⁰ Haí mù gâ le, Melahkizedek gi, Abraham lé huí é hkûn, Lewiq gi, yhâng é íchyi íkê é gungdu hkaú má ru bo tó ashí nghut ri.

Melahkizedek Eq Dù É Yesuq

¹¹ Haú Lewiq hkyangjong amyú pé é ipyat má, byu pé gi, jep é tarâ lé wó yu bùm kô é nghut mù, hkyangjong ayá haú mai gumjup hkyô wó yú kô é nghut le gi, haí mù luí, Arun wó é hkyangjong ayá hkyo dông a nghut é za, Melahkizedek wó é hkyangjong ayá hkyo dông lo é sù gotú hkyangjong rayuq ra shirâ lhú?

¹² Hkâsu mù gâ le, hkyangjong amyú htaí é hkûn gi, tarâ le htaí yang htaí rá dut é nghut lhê.

¹³ Haú su nghú tai é hkyô pé eq séng é Sù gi, gotú byuhú mã é sù nghut mù, byuhú haú mai gi, ó yuq le hkungga gyap má dojaú wú é a nghut.

¹⁴ Hkâsu mù gâ le, nga-nhúng é Yhumsing gi, Yudaq byuhú mai gyô lo é awut ashín nghut é hkyô, san za nghut nyi ri. Mosheq kúm gi, byuhú haú eq séng é hkyô mã, hkyangjong pé eq séng luí haí lé a tai é nghut lhê.

¹⁵ Melahkizedek eq dù é gotú hkyangjong rayuq pô htoq bê nghú, ngamoq tai bê hkyô gi, je riyhang san za dut bê nghut ri.

¹⁶ Yhang gi, iwa rayuq é awut ashín pé nghut rá lhê gâ é tarâ dông hkyangjong rayuq lé dut é a nghut é za, a wó lhoq htên é asak é a-tsam eq rajung za lé dut é ru nghut lhê.

¹⁷ Hkâsu mù gâ le,
"Nàng gi, Melahkizedek wó é hkyangjong ayá hkyô dông mai, ahtum abyuq hkyangjong rayuq nghut nyi ri."^{*}
ga Yhang eq séng luí tai pyo tó é nghut lhê.

¹⁸ Haú hí lhê é cháng rá tarâ gi, wum nyhôm é eq akyú a bo é yanmai, tó pyám bê nghut lhê.

¹⁹ Hkâsu mù gâ le, haú jep é tarâ gi, gumjup hkyô haí a wó kut byi é nghut lhê. Haú mù, je ge é myit myoqbyù hkyô la-jang byi é nghut luí, nga-nhúng gi, myit myoqbyù hkyô haú mai Garai Gasâng chyáng wó chyáng htep é é nghut lhê.

²⁰ Myit myoqbyù hkyô haú gi, dakâm hkyô a bo é a nghut myhi-nhung! Góbang gi, dakâm hkyô a bo é za hkyangjông pé wó dut bekô nghut ri.

²¹ Nghut kôlhang, Yesuq kúm gi,
"Nàng gi, ahtum abyuq hkyangjong rayuq nghut lhê."

ga haú Yhumsing dakâm bê nghut mù, Yhang myit é hkyô htaí rá a nghut."^{*}
ga, Yhang eq séng luí Garai Gasang tai é hkûn, dakâm dang haú mai hkyangjong rayuq dut bê nghut ri.

²² Dakâm dang hau é yanmai, Yesuq gi, je ge é dangshikaq é pahkám wò yu sù dut bê nghut ri.

²³ Hkyangjông pé myo myo nyi rá dut é gi, yangmoq é muzó a wó xoq zui shoq shi byuq hkyô eq hkûm zing pyám kô é yanmai nghut ri.

²⁴ Nghut kôlhang, Yesuq gi, ahtum abyuq dui nyi sù nghut é yanmai, Yhang gi, hkyangjong mù ayang ru zui nyi rá nghut lhê.

²⁵ Haú mù luí, Yhang gi, Yhang dông mai Garai Gasâng chyáng lé jé é bang lé, hkânham le wó hkyi yu é nghut lhê; haí mù gâ le, Yhang gi, yangmoq é matú dúng tóngbân byi nyi rá matú, rú dui nyi é sù nghut lhê.

²⁶ Yesuq gi, chyoiyúng é sù, mara hún rá hkyô a bo é sù, sân-yúng é sù, yubak dap bang eq rahá a nghut shoq gotú san kut huí é sù, mauhkúng pé ahtoq má lhoq toq lhoq gyaú yu huí é sù nghut ri. Haú sù é hkyangjong mó gi, nga-nhúng rá é lé lajang byi rá htuk ang ri.

²⁷ Nyi nyi bui bui, yhumsing é mará é matú hí hkungga nhông byi mù, byu pé é mara matú le hkungga nhông byi é gotú hkyangjong mó pé su, Yhang gi, a kut rá é sù nghut lhê. Yhang gi, Yhânggùng lé Yhang nhông byi é hkûn, yangmoq é yubak mará é matú banshoq radâm za hkungga nhông byi pyám bê nghut ri.

²⁸ Hkâsu mù gâ le, haú jep é tarâ gi, wum nyhôm é byu pé lé hkyangjong mó pé dông masat é nghut ri. Nghut kôlhang, Garai Gasang gi, haú jep é tarâ é htâng mã lé jé é dakâm dang eq, Yhâng é Yuqzo lé masat to bê nghut mù, Yhang gi, ahtum abyuq lhoq gumjup hui bê nghut ri.

8

Dangshikaq Asik É Hkyangjong Mó Yesuq

¹ Ngamoq tai nyi é dangkàng gi, shí dông nghut lhê: Nga-nhúng gi, haú sù é hkyangjong mó lé wó é bang nghut lhê. Yhang gi, mauhkúng htoq mã, Hkikhkam dik Sù Garai é hkoikhâm-tanghkuq é loqyô hkyam shut zúng to mù,

² byu eq sai é a nghut é za, haù Yhumsing eq sai é saksé zúm akying hkaù mã é, sân-yúng dik gok mã dojaù é sù nghut ri.

³ Hkyangjong mó hkangmó gi, chynghuq pé eq hkungga pé lé không byi rà matù wò hun to huí é chyat nghut lhê. Haù mù luá, hkyangjong mó shí yuq le, rajung jung không byi ra rà nghut lhê.

⁴ Yhang gi, mینگkan htoq mã nyi tô é ru nghut le gi, hkyangjong dut rà a nghut; hkâsu mù gà le, jep é tarâ đông ga jang, chynghuq không jaù é byu pé nyi to gù bê nghut lhê.

⁵ Yhangmoq, sân-yúng dik gok mã dojaù é hkyô gi, mauhkúng htoq mã joq é azông eq wupzo đông nghut ri. Haù nghut é yanmai, Mosheq gi, saksé zúm sai rà nghut é hkûn, "Nang lé, bùm mã tûn shit é azông eq rajung za jung hkangmó wó sai shoq kut aq."[☆] ga sidiq byi huí é nghut lhê.

⁶ Nghut kôlhang, Yesuq, gyoro sô xoq byi é dangshikaq gi, axaù lhùm htoq mã je gyaù é eq rajung za Yhang hap yu tô é dojaù hkyô gi, yhangmoq é dojaù hkyo htoq mã je gyaù é nghut lhê. Haù mù, dangshikaq haù gi, je ge é danggidiq pé htoq mã awang hi tô é nghut lhê.

⁷ Hkâsu mù gà le, sâng-hi lhê é dangshikaq mã rà é hkyô haí a bo é ru nghut le gi, gotú rà rà a nghut lo.

⁸ Nghut kôlhang, Garai Gasang gi, byu pé chyáng mara bo é myàng mù, tai é gi, "Haù Israelaq é yhumbyù wui eq le, Yudaq é yhumbyù wui eq le,

Ngò, dangshikaq asik to rà ahkyíng jé lo nyi ri ga haù Yhumsing tai pyo ri.

⁹ Haù gi, Ngò, yhangmoq é íchyí iwâ pé lé loq eq zui mù, Egutuq ming mai shuí htoq lo é hkûn,

yhangmoq eq tô tô é dangshikaq su dut rà a nghut.

Haí mù gà le, yhangmoq gi, Ngá é dangshikaq lé a xoq cháng kô é nghut mù,

Ngò gi, yhangmoq chyáng mai lhing ló byuq é nghut lhê ga haù Yhumsing tai pyo ri.

¹⁰ Shí gi, ahkyíng haù lai é htàng mã, Israelaq é yhumbyù wui eq Ngò to rà nghut é dangshikaq nghut lhê ga haù Yhumsing tai pyo ri.

Ngò gi, Ngá é tarâ pé lé, yhangmoq é i-myiit mã kat byi mù, yhangmoq é myit nhiklhum mã kê to byi rà nghut lhê.

Ngò gi, yhangmoq é Garai Gasang nghut mù, yhangmoq gi, Ngá é byu pé dut kô rà nghut lhê.

¹¹ 'Haù Yhumsing lé sé keq.' ga, yhang é gumang hpó lé nghut nghut,

yhang é chyangnâm mã é sù lé nghut nghut, mhoqshit é byù nyi rà a nghut lo,

haí mù gà le, yhangmoq lhunglhang bang gi, tiq htàng sù mai kô htàng sù jé shoq Ngo lé sé kô rà nghut lhê.

¹² Hkâsu mù gà le, Ngò gi, yhangmoq é agè ashop hkyô lé mara hkyut pyám byi mù, yhangmoq é mara pé lé dum a bun byi lo rà nghut lhê."[☆]

gà ri.

¹³ Dangshikaq haù lé, Yhang "asik" gà é gi, sâng-hi lhum lé, axau kut pyám é nghut ri; xau ló byuq é haí le, hkâ-myháng a myáng mã byuq ló byuq rà nghut lhê.

9

Myidàm Saksé Zúm Mã Noqkuq É Hkyô

¹ Sâng-hi lhê é dangshikaq gi, noqkuq rà htúngtarâ pé eq noqkuq rà myidàm sân-yúng dik gok bo é nghut ri.

² Sai tô é saksé zúm é sâng-hi gok mã gi, haù myibung tsúng jang, siboí eq haù không byi é muk joq mù, haù gok lé gi, Chyoiyúng Jowò ga myhng ri.

³ Í dang nghù rà gok pán-gyang é ahkaù mã é gok lé gi, Chyoiyúng Htàng é Jowò gà é nghut lhê.

⁴ Gok haù mã gi, namngón jung nyhê é hng hkungga gyap eq hng shup dangshikaq sidek joq ri. Dangshikaq sidek haù mã gi, mannaq muk bo é hng yam, ahaq nyún tô é, Arun é dumbáng eq, dangshikaq luqlong pé bo tô ri.

⁵ Dangshikaq sidek é ahtoq mã gi, shíhtai gunglik hkungga byi jang htoq mã wup tô é, Hpungwup shingkang bò Sù é hkerubim* pé joq tô ri. Nghut kôlhang, ngamoq gi, ahkuí haù pé lé jikhúm nuquq a wó tai san kyo é nghut lhê.

⁶ Haù đông jung hkangmó ban lajang tô é hkûn, hkyangjông pé gi, ayang sâng-hi gok mã wàng mù, yhangmoq é dojaù muzó lé wùn waq bekò nghut ri.

⁷ Nghut kôlhang, ahkaù gok mã gi, hkyangjong mó za, yhanggùng é matù le, a sê é za byu pé kut shut é mará é matù le, không byi rà sui chùng mù, razàn mã radàm za wang é nghut lhê.

⁸ Haù Chyoiyúng Woi-nyí gi, haù pé đông mai, sâng-hi é saksé zúm ru joq nyi nyi, haù Chyoiyúng Htàng é Jowò wàng hkyô a hpông shit shí é lé, tûn shit nyi ri.

⁹ Haù gi, ipyat shi é matù tûn shit é azông nghut mù, không byi é chynghuq pé eq shigu hkungga pé gi, dojaù sù é i-myiit lé a wó lhoq sân-yúng byi é hkyô lé tai nau é nghut lhê.

☆ 8:5 Htoq Ló 25:40 ☆ 8:12 Yer 31:31-34 * 9:5 Hkerubim gà é gi, byù su su, dusak su su dut é, dùng dap é maumang lagyo rahù nghut lhê.

¹⁰ Hâu pé gi, zojung, shuqjung eq chí san chí séng hking ahú hú eq za séng é nghut mù, htúngli asik, lé joq é ahkyíng jé shoq za tô tô é gungsho eq séng é tarâ pé nghut ri.

Hkrisduq É Sui

¹¹ Hkrisduq gi, shí má joq to gù nghut é gè hkyô pé é hkyangjong mó đông lé jé é hkùn, hpan tô é má a lom nghú nau é, byu eq saí é a nghut é, je kô é eq je gumjup é saksé zúm mai wang lai bê nghut lhê.

¹² Yhang gi, Choyoiýung Htâng é Jowò má wang é hkùn, bainám eq nojúng zo pé é sui lé chúng mù wang é a nghut é za, Yhâng é sui eq yhang banshoq é matú radàm za ahtum abyuq é hkyi yù hkyô wó yù bê nghut ri.

¹³ Htúngli đông agot a-ù dut é bang lé lhoq sân-yúng rá matú, bainám eq nohtô zo pé é sui eq no-pyâ é myi-mhop lé, yhangmoq é ahtôq má hpyun gyun é hkùn, yhangmoq gi, ahtôq gungsho pyâm wó lhoq sanséng é hui kô é nghut lhê.

¹⁴ Hâu nghut jáng, Garai Gasâng é hí má ra a bo é Yhânggùng lé, ahtum abyuq é Woi-nyí đông mai không byí é Hkrisduq é sui gi, rú dui nyi é Garai Gasang lé nga-nhúng wó dojaú sháng gaq ga, shí é hkyô shut shuí jé é nyi yap sâmlai mai nga-nhúng é myit sôn sê é hkyô lé, je riyhang wó lhoq sanséng yu ri-nhung mhaí!

¹⁵ Hâu nghut é yanmai, Hkrisduq gi, dang-gidiq byi tô é ahtum abyuq é muizê lé, ji yù hui é bang wó hap yù kô sháng gaq ga, dangshikaq asik é gyo-ro sô xoq byi sú nghut nyi ri. Hâu su wó kut é gi, sâng-hi lhê é dangshikaq ahkaú má mara kut shut é bang lé lhoq lhut yù rá matú, yubak chyín xap zé ralhúm đông, Yhang shí hkám byi yanmai nghut ri.

¹⁶ Madat dang eq séng lui ga jang, madat dang tái sú hâu shí bê hkyô saksé shít rá lhê.

¹⁷ Hái mù gâ le, madat dang gi, rayuq yuq shí jáng za sheq lichyúm htoq é nghut lhê. Madat dang tái sú rú dui nyi nyi, hâu gi, hkâ-nhám le lichyúm htoq rá a nghut.

¹⁸ Hâu nghut é yanmai, sâng-hi lhê é dangshikaq lháng gi, sui a bo lóm jáng lichyúm a htoq é nghut lhê.

¹⁹ Mosheq gi, hâu jep é tarâ má bo é hkunmó hkangmó lé, shiwa byù banshoq bang lé ban tái pyo é hkùn, zam zam ne é saumaú eq jam kyâng lé yù mù, nojúng zô é sui eq bainám sui eq wui nyhò tô é lé, chyúmding má le, shiwa byù banshoq bang lé le, hpyun gyún é nghut ri.

²⁰ Yhang gi, "Sui shí gi, nungmoq cháng rá matú, Garai Gasang, hkunmó hkyô to bê nghut é, dangshikaq tô tô é sui nghut lhê."^{*} ga tái ri.

²¹ Yhang gi, saksé zúm eq dojaú é má chung é zè pé má le, hâu eq rajung za sui hâu hpyún gyún ri.

²² Gè gè gi, hâu jep é tarâ má bo é đông ga jang, azing zè aluq banshoq gi, sui eq lhoq sân-yúng é hui rá dut é nghut mù, sui htoq hkyô a joq jáng, mara hkyut byi hkyô le joq é a nghut.

²³ Hâu mù, mauhkúng zè pé é azòng pé gi, hkungga hâu pé eq lhoq sân-yúng é hui rá é nghut lhê. Nghut kôlhàng, mauhkúng zè pé yhang gi, hâu pé htoq je ge é hkungga pé eq lhoq sân-yúng é hui rá dut é nghut lhê.

²⁴ Hkâsu mù gâ le, akying lhum é azòng za nghut é, byu eq saí é choyoiýung dik é jowò má Hkrisduq wang é a nghut é za, Yhang gi, mauhkúng má yhang wang é nghut mù, ahkuí gi, nga-nhúng é matú Garai Gasâng é hí má bo yap byí nyi é nghut lhê.

²⁵ Yhang gi, hâu hkyangjong mó mai yhumsing é sui a nghut é sui lé chúng mù, Choyoiýung Htâng é Jowò má zàn wui wàng lui kut é su, yhânggùng lé dum không byi byi kut rá matú mauhkúng má wang é le a nghut.

²⁶ Hâu đông ru nghut le gi, Hkrisduq gi, mau htoq xâng hkùn mai shí hkâm é adàm myo myo nghut berâ nghut lhê. Nghut kôlhàng, ahkuí, Yhang gi, yubak mara hui séng pyâm byi rá matú, yhânggùng lé hkungga không byi rá ga ipyat pé lô htâng lô nyi é má, banshoq é matú radàm za htoq shít bê nghut ri.

²⁷ Byù gi, radá za shí rá nghut mù, hau htâng má tarâ jéyáng é hui rá nghut é eq rajung za,

²⁸ Hkrisduq gi, byù myo myô é yubak mara lé yu pyâm byi rá matú, radá za hkungga không é hui bê nghut ri. Hâu mù, Yhang gi, yubak mara wun pyâm byi rá a nghut lo é za, Yhang lé láng nyi é bang lé hkyi yù hkyô yu lé byi rá matú, htâng má í dâm nghú rá dâm htoq shít rá nghut lhê.

10

Hkrisduq É Gùng Lé, Banshoq É Matú Radàm Za Không Byí É Hkyô

¹ Hâu jep é tarâ gi, jé lô rá nghut é gè hkyô pé é akying a nghut é za, wupzo za nghut ri. Hâu nghut é yanmai, jep é tarâ gi, zàn wui ru không byi byi kut nyi é eq rajung zâ é shigu hkungga pé đông mai, nojúng rá matú chyâng lé é bang lé hkâ-nhám lé wó lhoq gumjup é a nghut.

² Tarâ hâu wó lhoq gumjup byí é ru nghut le gi, yhangmoq không byí é hkyô nô pyâm kô rá a nghut lí? Hkâsu mù gâ le, hâu noqkuq é bang gi, banshoq é matú radàm za lhoq sanséng hui é nghut jáng, yhangmoq é

yubak marâ é matú, hkâ-nhâm le mara a bô bun lo kó rá nghut lhê.

³ Nghut kôlhang, shigu hkungga haú pé gi, zàn wui yubak mara pé lé lhoq pun byí é zê nghut ri.

⁴ Haí mù gà le, nohtó pé eq bainám pê é sui gi, yubak mara lé huí sêng pyâm é hkyô wó dut é a nghut.

⁵ Haú mù luí, Hkrisduq, mingkan má lé jé é hkûn, Yhang tai é gi,

"Shigu hkungga eq hkungga lé Nàng a o é nghut mù,

Nàng kúm gi, Ngá é matú gungdu hen to byi bê nghut ri.

⁶ Myi nyhé hkungga pé eq mara hkyut hkungga pé gi, Nang lé gabú nhang é a nghut.

⁷ Hau htâng, Ngò gi, 'Garai Gasang ê, Ngò eq sêng luí chyúmding má kâ tô é eq rajung za,

Nàng ô nau é hkyô kut rá matú, Ngò, shí má nyi lhê.' nghũ tai é."^{*}

gâ ri.

⁸ Sâng-hi má, Yhang gi, "Shigu hkungga eq hkungga pé, myi nyhé hkungga eq mara hkyut hkungga pé lé, Nàng a o é htoq agó, haú pé lé Nàng a gabú é nghut lhê." ga tai ri. Haú jep é tará đông haú pé lé kut rá dut kôlhang tai é nghut ri.

⁹ Hau htâng má, Yhang gi, "Nàng ô nau é hkyô kut rá matú, Ngò, shí má nyi lhê." ga tai ri. Haú gi, Yhang, htang lhum dangshikaq lé htaí masat to rá matú, sâng-hi lhum lé tô pyâm é nghut ri.

¹⁰ Myit ô nau hkyô hau é yanmai, Yesuq Hkrisduq, Yhâng é gungdu lé hkungga đông banshoq é matú radám za nhông byí é đông mai, nga-nhúng gi, lhoq chyoiyúng é hui bê nghut ri.

¹¹ Hkyangjong hkangmó gi, nyí nyí bui bui, yap mù, yhâng é hkyangjong muzó lé zui sai é nghut lhê. Yhang gi, yubak mara lé hkâ-nhâm lhâng a wó huí sêng pyâm byí é, rajung zâ é shigu hkungga lé, dum nhông byi byi kut é nghut lhê.

¹² Nghut kôlhang, hkyangjong mó nghut é Hkrisduq gi, yubak mara hkyut byi rá hkungga ralhum lé za, ahkyíng banshoq é matú ban nhông byí é hkûn jáng, Garai Gasâng é loqyo hkyam shut zung to bê nghut ri.

¹³ Haú hkûn mai, Yhang gi, Yhâng é gye pé lé, Yhâng é hkyí nang jang kut byi rá lé láng nyi é nghut ri.

¹⁴ Haí mù gà le, Yhang gi, lhoq chyoiyúng é huí nyi bang lé, hkungga ralhum eq za, pyat dedú é matú lhoq gumjup byi bê nghut ri.

¹⁵ Haú Chyoiyúng Woi-nyí le, haú hkyô eq sêng luí nga-nhúng lé saksé hkâm kyô ri. Sâng-hi má, Yhang tai é gi,

¹⁶ "Haú Yhumsíng tai ri, shí gi, ahkyíng haú lai htâng má, Ngò, yhangmoq eq to rá dangshikaq nghut lhê.

Ngò gi, Ngá é tará pé lé, yhangmoq é myit nhiklhum hkaú má kat byi mù, yhangmoq é i-myt má kâ to byi rá nghut lhê."^{*}

gâ ri.

¹⁷ Hau htâng, Yhang tai jat é gi,

"Ngò gi, yhangmoq é yubak mara pé eq tará a chung é muzó pé lé, bûn lô rá a nghut."^{*}

gâ ri.

¹⁸ Haú mù, mara haú pé lé hkyut pyâm byi bê nghut jáng, yubak marâ é matú hai hkungga le a ra lo nghut ri.

Hkam Jan Râ Hkyô

¹⁹ Haú mù luí, gumang wui ê, nga-nhúng gi, Yesuq é suí eq, haú Chyoiyúng Htâng é Jowò má wàng rá matú hkyak wó lum to bê nghut lhê.

²⁰ Haú gi, Yesuq é gungdu nghut é pán-gyang đông mai, nga-nhúng é matú hpóng byi bê nghut é asik eq rú dui nyi é hkyô nghut lhê.

²¹ Haú nghut é yanmai le, Garai Gasâng é yhũm lé up é gyaú é hkyangjong lé nga-nhúng wó é yanmai le,

²² nga-nhúng gi, gingtíng é lumjúng hkyô mai sansêng é i-myt eq, Garai Gasâng chyáng é mù, mara bô bûn é myit sôn sê é hkyô mai, nga-nhúng lé lhoq sanséng rá matú nga-nhúng é i-myt lé hpyun gyún é hui nhâng luí, nga-nhúng é gungdu gi, sân-yúng wui eq chi byí é hui yú sháng.

²³ Nga-nhúng gi, nga-nhúng yín yu é myit myoqbyù hkyô lé zui gingtíng nyi sháng; hkâsu mù gà le, danggidíq byí to bê Sũ gi, lhumzui Sũ nghut lhê.

²⁴ Chyitdap hkyô eq ge é muzó pé má, nga-nhúng gi, rayuq eq rayuq hkâsu kut myit nhaú toq byí lhum rá hkyô lé, dat myit nyi sháng.

²⁵ Chôm huí zup lhum nyi é hkyô lé, ra-am lhaq tô pyâm nyi kô é su, nga-nhúng gi, a tô pyâm é za, haú Buinyi chyâng lò bê nghut é lé nungmoq sê é eq rajung za, rayuq eq rayuq je riyhang myit wum byí lhum nyi sháng.

²⁶ Nga-nhúng gi, tengmán hkyô lé sê yu é htâng má, shi-ngé ngé mara dum kut shut kut é nghut jáng, mara hkyut byi rá hkungga a joq lo.

²⁷ Tará jéyáng hkyô eq Garai Gasâng é gye pé lé nyhé hkyô pyâm rá nghut é nhikmo-yô é myi lé za, gyuq chiq myit mai láng nyí rá dut bê nghut lhê.

²⁸ Mosheq é tará lé he-ngik é sù ó yuq le, saksé í sum yuq é dâng é yanmai, shogyo nhikmyin a huí é za sat pyâm é hui bê nghut lhê.

29 Haù jáng, Garai Gasâng é Yhangzo lé hkyiwa ô má nâng pyeq bê sù, yhumsing lé lhoq sân-yúng byi bê nghut é dangshikaq é sui lé a chyoiyúng é zè dòng kut pyám bê sù eq, jeju byi é Woi-nyí lé rhoi é sù gi, hkâ-í yhang gyaú é mara dam byi é hui gíng rá nghut lhê nghû, nungmoq wó myit akô lúú?

30 Hkâsu mù gà le, "Lató hpuq rá gi, Ngò ru nghut lhê; Ngò lató hpuq rá."* ga le, "Haù Yhumsing gi, Yhâng é byu pé lé tará jéyáng rá nghut lhê."** ga le, táí é Sù lé, nga-nhúng sé lhê.

31 Haù rú dui nyi sù Garai Gasâng é loq hkaù má byit gyó wang é gi, gyuq chiq jung yhang nghut ri.

32 Nungmoq, haù maubó lé hap yu é* htâng, wuîhke jamjau huí é má gyaí yhang shikut kôluí wó jân pyám bê nghut é, hí lhê buinyi pé lé myit bun keq.

33 Ra-u u má, nungmoq gi, byu pé hí má de de rhoi shit é eq zing-rí é hui zo bekô nghut ri; ra-u u má, nungmoq gi, haù su hui zo bang eq rahá bo hui zo bekô nghut ri.

34 Nungmoq yhang, je ge é eq ru gíng nyi é zè pé wó é lé sé kô é yanmai, nungmoq gi, htông lúng bang lé shogyo nhikmyin bekô eq, nungmoq é sutzè pé lé sing yu pyám byi é bang lé, gabú myit eq jân pyám bekô nghut ri.

35 Haù mù luí, nungmoq é hkyak myit lum tô é hkyô lé hkâdú pyám kó; agùn agó chyunghuq shigyaú é hui kó rá nghut lhê.

36 Nungmoq gi, Garai Gasâng é ô nau hkyô lé kut é hkún, Yhâng danggidiq byi tô é lé wó hap yù rá matú, nungmoq hkam jan rá dut é nghut lhê.

37 Hkâsu mù gà le, razup zo nghut jáng, "Haù lé lô rá Sù gi, jé lé rá nghut mù, ahkyíng lhoq myáng rá a nghut.

38 Nghut kôlhang, Ngá é dingmán sù gi, lumjúng myit mai asak dui rá nghut lhê.

Yhang nungzut zut é nghut le gi, Ngò, Yhang lé myit ngui rá a nghut."** ga tô ri.

39 Nghut kôlhang, nga-nhúng gi, nungzut zut mù htên byoq huí é bang a nghut é za, lumjúng mù hkyi yù huí é bang ru nghut lhê.

11

Lumjúng Myit Mai

1 Lumjúng myit nghu é gi, nga-nhúng myit myoqbyu tô é lé hkyak wó rá nghu é eq nga-nhúng a myáng shí é lé joq lhê nghû hkyak sé é hkyô nghut lhê.

2 A-nham lhê bang gi, lumjúng myit haù mai Garai éq owaq é hui kô é nghut lhê.

3 Lumjúng myit mai, nga-nhúng gi, nyi mi-nyí, joq mijoq lhunglhang lé Garai Gasâng é

hkunmó éq hpan tô é hkyô sé gyô é nghut lhê. Haù mù, myoq éq wó myang é pé gi, byu-myang é pé mai saí htoq tô é a nghut.

4 Lumjúng myit mai, Abelaq gi, Ka-in kut é htoq je ge é hkungga, Garai Gasang lé nhông byi é nghut ri. Lumjúng myit mai, yhang gi, yhâng é hkungga eq séng luí Garai Gasang hkyá-ôn é hkún, dingmán sù rayuq dòng owaq é hui bê nghut ri. Haù mù, lumjúng myit mai, yhang gi, shi byuq bê nghut kôlhang, dang rú nyo nyi ashí nghut lhê.

5 Lumjúng myit mai, Enuq gi, shi é a hui zo shoq, asak shí mai mauhkúng shut shuí yu é hui bê. Yhang lé, Garai Gasang shuí ló byuq bê nghut é yanmai, yhang lé a wó myáng lo nghut ri. Hkâsu mù gà le, yhang gi, shuí yu é a hui shí é hí má, Garai Gasang lé ngui nhâng sù rayuq dòng owaq é hui sù nghut ri.

6 Lumjúng myit a bo é nghut le gi, Garai Gasang lé a wó ngui nhang é nghut lhê. Haí mù gà le, Yhâng chyáng shikut luí lé jé é sù gi, Yhang nyi é hkyô lé le, lhumzui myit mai Yhang lé hô bang lé, Yhâng éq shigyaú é lé le, lumjúng rá dut é nghut lhê.

7 Lumjúng myit mai, Noaq gi, a myang wú shí é hkyô pé eq séng luí sidiq byi huí é hkún, yhâng é yhumbyu wui lé hkyí rá matú, gyuq hkunggá é dòng mai wui-sanghpo saí bê nghut ri. Yhâng é lumjúng myit mai, mingkan lé mara byi é nghut mù, lumjúng myit mai lo é dingmán hkyo é jeju lé hkam yù sù dut bê nghut ri.

8 Lumjúng myit mai, Abraham gi, yhâng é muizè dòng, htâng má yhang hap yù rá nghut é, Garai Gasang byi é jowó shut e ló rá matú ji yu é huí é hkún, jino gyo mù, yhang hká shut e ló é a sé kôlhang, é bê nghut ri.

9 Lumjúng myit mai, yhang gi, gó ming má nyi é byu bíng rayuq su, danggidiq byi tô é mau má nyi bê nghut ri. Yhang gi, zúm pé má lúng é nghut mù, rajung zá é danggidiq é muizè lé hkam yu é Isak eq Yakup le, zúm pé má lúng bekô nghut ri.

10 Hkâsu mù gà le, Abraham gi, Garai Gasâng éq azông hên mù sai tô é, gíng é apùn awang pé eq mu é myuq lé myit myoqbyu nyi é nghut ri.

11 Lumjúng myit mai, Abraham gi, yhâng é asak ipyat lai ló byuq é eq, Sarah le baùdung nghut to kôlhang, haù danggidiq byi Sù, lhumzui sù nghut lhê ga myit sôn yu é yanmai, iwa rayuq wó dut é hui bê nghut ri.

12 Haù mù luí, yhang gi, shí gùng dòng nghut kôle, yhang rayuq mai lo é awut ashin pé gi, mauhkúng mã é kyí pé eq wuimau yàm mã é a ung ngwap é semui myhó myô lô bê nghut ri.

* 10:30 Tará Pun 32:35 * 10:30 Tará Pun 32:36 * 10:32 Haù maubó lé hap yu é gà é gi, gabú danglù lé sâng-hi wó hap yu é lé gà lhê. * 10:38 Hbk 2:3-4

¹³ Byù háu bang banshoq gi, yhangmoq shí é hkún jé shoq lumjínq myit mai asak dui nyi kô é nghut lhê. Yhangmoq gi, danggidiq byi tô é pé lé a hap yù kó nghut ri; nghut kôlháng, háu pé lé myàng za myàng kômù, we mai te yu akô. Yhangmoq gi, myidám htoq má gó ming byu pé eq byù bíng pé nghut é lé yín yù bekô nghut ri.

¹⁴ Háu su yín yu é byu pé gi, yhangmoq yhum síng é ming lé hó nyi é bang nghut é lé tún shit é nghut akô.

¹⁵ Yhangmoq htoq lo é ming lé, yhangmoq myit tui nyi kô é ru nghut le gi, dum tau ló rá ahkáng wó kó rá nghut lhê.

¹⁶ Ahkuí kúm, yhangmoq gi, je ge é ming nghut é, mauhkúng mingdán lé myit tui nyi akô nghut ri. Háu mù lui, Garai Gasang gi, yhangmoq é Garai Gasang ngu é hui rá lé a hoq é nghut lhê. Hkâsu mù gâ le, Yhang gi, yhangmoq é matú myuq ralhúm lajáng to byi bê yanmai nghut ri.

¹⁷ Lumjínq myit mai, Abraham gi, Garai Gasâng eq yhang lé chyang é hkún, Isak lé hkungga ralhúm đông nhông byi bê nghut ri. Háu gi, danggidiq pé lé hap yu to bê sú gi, yhang é yuqzo zote lé nhông byi rá dá é nghut lhê.

¹⁸ Garai Gasang gi, "Isak đông mai lo é lé, náng é awut ashín nghú són byi rá nghut lhê."* ga yhang lé danggidiq byi to bê nghut kôle, yhang háu su kut é nghut ri.

¹⁹ Abraham gi, shi é mai Garai Gasang wó lhoq dui toq lhê ga myit yu ri. Táí sháng ga jáng, Isak lé, shi byuq bê mai, yhang dum wó hap yu é nghut ri.

²⁰ Lumjínq myit mai, Isak gi, Yakup eq Eso nhik é htàngnùng lhê é matú, shimân byi bê nghut ri.

²¹ Lumjínq myit mai, Yakup gi, yhang shi ló rá u má, Yosep é yhangzô nhik lé shimân byi mù, yhang é dumbáng-u má ngê lui, noqkuq bê nghut ri.

²² Lumjínq myit mai, Yosep gi, yhang asak htâm ló rá u lé, Israelaq byu pé Egutúq ming mai htoq lò rá eq séng lui táí mù, yhang é showui pé eq séng lui hkâsu kut rá hkyô lé pying to bê nghut ri.

²³ Lumjínq myit mai, Mosheq é yhangnu eq yhangwâ nhik gi, yhang hku lé é htàng má, yhang lé lhamó sum hkyap haq to bekô nghut ri. Háí mù gâ le, yhangnhik gi, zoshâng háu yúng é myàng kômù, hkohkam é mungdang lé a gyuq kó nghut ri.*

²⁴ Lumjínq myit mai, Mosheq gi, yhang kô lo é hkún, Hpara-uq é byizô é yhangzo ga rá lé he-ngik pyâm ri.

²⁵ Yhang gi, yubak mará é ngón hkyô má rayoq zo ngón kún rá malaí Garai Gasâng é

byu pé eq rahá hpuzô é hui rá lé sheq hkyin yù bê nghut ri.

²⁶ Yhang gi, háu Hkrisduq é matú rhoí hui é lé, Egutúq ming má é sutzê htoq má je riyhang hpaudap lhê ga myit són yu ri. Háí mù gâ le, yhang gi, yhang é shigyau chyunghuq lé myit myoqbyu nyi sú nghut ri.

²⁷ Lumjínq myit mai, yhang gi, hkohkâm hpó nhikjum yô é lé a gyuq é za, Egutúq ming mai htoq ló byuq bê nghut ri. Yhang gi, myoq eq a wó myàng é sú Garai lé wó myàng é sú đông, hkam jân é nghut ri.

²⁸ Lumjínq myit mai, yhang gi, háu zomún lé sat é maumang lagyô eq Israelaq byu pé é zomún lé a wó záng sháng gaq ga, Lhoqlhai Poí eq sui hpyún é hkyô le kut hí bê nghut ri.

²⁹ Lumjínq myit mai, háu shiwa byu pé gi, Nhông Nè lé kyuq hui é myigùng htoq mai su lai byit bekô nghut ri; nghut kôlháng, Egutúq byu pé le, háu đông lai shikut wú kô é hkún, yhangmoq gi, myup shi byuq bekô nghut ri.

³⁰ Lumjínq myit mai, shiwa byu pé, Yeriho myuq xêwâm lé nyhit nyi sô lhing é htàng má, xêwâm háu leq gyop byuq bê nghut ri.

³¹ Lumjínq myit mai, shiwa myhí Rahap gi, háu Israelaq jó wú bang lé nguóngón é eq lhom hkulum yu é yanmai, jino a gyo bang eq rahá sat pyâm é a hui é nghut lhê.

³² Háu htoq lai lui, ngò háí tai jat ra shirá lhu? Gidon, Barak, Samson, Yephta, Dawiq, Samuelaq pé eq myiqhtoí pé é hkyô lé táí rá ahkying ngò a wó.

³³ Háu bang gi, lumjínq myit mai mingdán pé lé wó zán ung yù bekô, tengmán hkyô lé chung jai bekô, danggidiq byi to bê lé wó hap yù bekô, hkanghkyi pé é nhut lé wó myhí pyâm bekô,

³⁴ myiduq myishâm lé wó sat pyâm bekô, shamsó mai le wó hpang lut bekô nghut ri. Yhangmoq é wum nyhóm hkyô gi, wum taú bo byuq é dut bekô nghut ri. Yhangmoq gi, majan má a-tsam mó bò bang dut mù, maigan gyê pé lé wó ung pyâm kô é nghut lhê.

³⁵ Myiwe wui gi, yhangmoq eq séng é shi byuq bê bang asak dum lhoq tai hui é lé, wó yù bekô nghut ri. Góbang gi, je ge é dui toq hkyô wó yù kó sháng gaq ga, lhoq lhut é hui rá lé he-ngik pyâm kômù, zing-rí é gyai yhang hui zo bekô nghut ri.

³⁶ Ra-am gi, wuizui kut pyâm byi é eq nhuq bat é hui bekô, góbang gi, shamtoq kyum hut hui é eq htóng lhung é hui bekô nghut ri.

³⁷ Yhangmoq gi, luqqok eq dú sat é, í tím dut shoq yik hpyit é, sham eq sat pyâm é hui bekô nghut ri. Yhangmoq gi, sau-kuq eq bainám-kuq wut mù, htot lhing wún lui,

* 11:18 Apún 21:12 * 11:23 Háu-u lé, hkohkâm hpó gi, Israelaq pé é yuqzo zonú wui lé sat pyâm rá hkunmó hkyô tô é nghut lhê.

myung kyuq é, zing-rí é eq rhoi pyâm é hui bekô nghut ri.

³⁸ Yhangmoq lhumzuí nyi kô é yanmai, mingkan gi, yhangmoq eq a gingdán nghut ri. Yhangmoq eq, yoso pé má, bùm pé má, luqhkýung pé eq myidong pé má nyi lhing wún bekô nghut ri.

³⁹ Haú bang banshoq gi, yhangmoq é lumjing myit é yanmai, owaq é hui bê nghut kôle, yhangmoq ó yuq le, danggidiq byi tô é lé a myang hkam yú kô nghut ri.

⁴⁰ Haí mù gâ le, nga-nhúng eq rahá za nghut jáng sheq, yhangmoq lhoq gumjup é wó hui kô sháng gaq ga, Garai Gasang gi, nga-nhúng é matú je ge é hkyô lajáng to byi bê nghut ri.

12

Garai Gasang, Zo Wuí Lé Mhoqshit É Hkyô

¹ Haú mù luí, nga-nhúng gi, haú myhó é saksé pé mhutdúm su nga-nhúng é lhingkyuq má joq to bê nghut é yanmai, nga-nhúng lé hkâm tang é hkyô pé jung hkangmó eq, lui za lhoq nhúng byi é yubak mara lé dú pyâm mù, nga-nhúng đin rá matú tô tô é hkyô lé, hkam jan lui đin e ló sháng.

² Nga-nhúng gi, nga-nhúng é lumjing hkyo é apún awang lé hí sũ eq lhoq gumjup byi sũ nghut é Yesuq lé wú tsuq nyi sháng. Yhang gi, Yhâng é hí má joq tô é gabú hkyo é yanmai, hoq hpú é hkyô lé haí su a ngam é za, tapzing má shí hkâm é hkyô lé jân pyâm lui, Garai Gasâng é hkôhkâm-tanghkuq é loqyo hkyam shut zung to bê nghut ri.

³ Nungmoq gi, a ngu byuq rá eq myit wum a gyuí byuq kô sháng gaq, yubak dap bâng chyáng mai haú su htuq htíng é hkyô lé jân pyâm é Yesuq chyáng mai myit wum yú keq.

⁴ Nungmoq gi, yubak mara lé htuq htíng shikut é hkyô má, nungmoq é sui shun pyâm shoq yhang a kut shi kô nghut ri.

⁵ Hau htoq agó, nungmoq gi, zo wuí lé đông Garai Gasang nungmoq lé wum byi é dang lé tô-myhí pyâm bekô lú? Wum byi dang haú gi,

"Ngá zo ê, haú Yhumsing mhoqshit é hkyô lé agya alhá hkákut pyâm,

Yhang, nang lé tân é hkún, myit wum hkágyui,

⁶ haí mù gâ le, haú Yhumsing gi, Yhang chyitdap é bang lé mhoqshit mù, zo rayuq lé đông,

Yhang hap yu é bang yuq hkangmó lé dam byi é nghut lhê."^{*}

gâ é nghut ri.

⁷ Mhoqshit huí é hkyô má, wuĩhkê é lé hkam jan keq. Garai Gasang gi, nungmoq lé, zo wuí lé đông kut é ru nghut lhê. Hkásu mù

gâ le, yhumsing é yhângwâ eq a mhoq é zo gi, ó wá nyi lhê lú?

⁸ Nungmoq gi, yuq hkangmó huí lai é mhoqshit hkyô lé, a hui kô é nghut jáng, dezô pé đông nghut byuq mù, zo sîng wui a nghut lo kô.

⁹ Nga-nhúng banshoq bang gi, nga-nhúng lé mhoqshit é xângzo iwâ pé wó é bang chyat nghut mù, yhangmoq lé hkunggâ é nghut lhê. Haú nghut jáng, je riyhang, nga-nhúng é woi-nyí eq sêng é Iwâ é a-ó má nyi mù, asak đui rá dut ri myhi-nhung!

¹⁰ Nga-nhúng é xângzo iwâ pé gi, yhangmoq je ge dik bũn é lé, nga-nhúng lé rayoq zo mhoqshit é nghut ri. Nghut kôlhang, Garai Gasang gi, Yhâng é chyoiyung hkyô má nga-nhúng wó bo lòm shoq, nga-nhúng é gè hkyô é matú, nga-nhúng lé mhoqshit ri.

¹¹ Mhoqshit é hkyô hkangmó gi, mhoqshit u lé ngón hkyô a nghut é za, nò hkâm hkyô nghut nyi ri. Nghut kôle, mhoqshit hkyô haú lé hkam yú bê bâng é matú gi, htâng má, nguingón hkyô eq dingmán hkyo é ashi lhoq htoq byi ri.

¹² Haú mù luí, myung byuq é nungmoq é loq pé eq wum nyhôm byuq é nungmoq é hkyi hput pé lé wum-o lhoq kîng keq.

¹³ Hkyí hten bang a wó sô é a dut shoq, lhoq gè byi é wó hui kô sháng gaq, nungmoq so rá matú, hkyô lhoq nyhang nyi keq.

Garai Lé He-ngik Bang Dàm Byi Hui Râ Hkyô

¹⁴ Byù banshoq bang eq nguingón shoq nyi rá eq chyoiyung rá matú wó dut é í shikut keq. Hkásu mù gâ le, ó yuq le, chyoiyung hkyô a bo é gi, haú Yhumsing lé myàng rá a nghut.

¹⁵ Ó yuq le, Garai Gasang jeju lé a tô pyâm rá matú, sidiq keq. Haú, yuq htoq lô mù, wuĩhkê hkyô lhoq htoq é eq byù myo myo lé agot a-ù dut nhang é nui hko su, ó yuq lé le hkádut nhâng kô.

¹⁶ Ó yuq le, ashop é đông gungsho zùm yap é hkyô nghut nghut, zang radún é matú, yhang wó tô é yuqzo zomún muizê ahko ahkáng lé ung zô pyâm é, Garai a lom é Eso su nghut nghut, a kut rá matú sidiq keq.

¹⁷ Nungmoq sê é eq rajung za, Eso gi, htâng má, shimân jeju haú lé hkam yú nau é hkún, he-ngik pyâm é hui bê. Yhang gi, shimân jeju haú lé ngaubyi ngau-nhap eq hô kôlhang, yhang kut é hkyô lé a wó htaí byi lo nghut ri.

¹⁸ Nungmoq gi, wó záng é eq myi duq nyi é Sinaq Bùm má le, mauchut tuq é, noq-singkyí dut é eq laidun lo é má le,

¹⁹ tut htê mying é eq, dang tái htê mying é má le, a jé é kô nghut ri. Dang htê haú lé wó

gyô é bang gi, yhangmoq lé, dang a taí jat lo rá matú dung tôngbán akô nghut ri.

²⁰ Haí mù gà le, yhangmoq gi, "Bùm haú má dusak pé záng jáng lháng, luqgok eq dú sat rá dut lhê."^o ga Garai Gasang hkyô tô é hkunmó lé a wó hkâm kô é yanmai nghut ri.

²¹ Haú byu-myàng hkyô gi, lùm wú gyuq hpo dut é yanmai, Mosheq lháng gi, "Ngò, gyuq nán ri."^o ga taí é nghut ri.

²² Nghut kôlhang, nungmoq gi, Zi-un Bùm eq rú dui nyi é Garai Gasâng é myuq nghut é mauhkúng Yerusalem má, maumang lagyô pé ajùm ayò gabú ratung zup zing é jang eq,

²³ mauhkúng htoq má myiêng kâ to huí é, zomún pé é noqkuq hpúng joq jang má, jé lé bekô nghut ri. Haú mù, nungmoq gi, byù banshoq é tará agyí nghut sù Garai Gasâng chyáng le, lhoq gumjup huí é dingmán bâng é woi-nyí pé chyáng le,

²⁴ dangshikaq asik é gyoro so sù Yesuq chyáng le, Abelaq é sui htoq má je ge é danglù taí é, hpyùn gyùn é sui má le, jé lé é nghut bekô.*

²⁵ Nungmoq gi, dang nyô Sù lé a gyo a kut rá matú, sidíq keq. Myidám htoq má sidíq byí é sù lé he-ngik pyám é bang, a lut kô é nghut lhê. Haú mù, mauhkúng mai nga-nhúng lé sidíq byí é Su chyáng mai, nga-nhúng lhing ló byuq é ru nghut le gi, je riyhang nga-nhúng a wó lut rá a nghut kó lhi?

²⁶ Haú Garai dang taí é u má, Yhâng é hté gi, mingkan lé lhoq nhùn kat ri, ahkuí kúm gi, "Ngò, mingkan lé za a nghut, mauhkúng pé lé le radám dum lhoq nhún rá nghut lhê."^o ga Yhang danggidíq byí to bê nghut ri.

²⁷ "Radám dum" gà é dang gi, haú a wó lhoq nhùn é pé wó myit to sháng gaq ga, hpan to huí é zè pé nghut é, wó lhoq nhùn é pé lé huí sêng pyám rá lé gà é nghut lhê.

²⁸ Haú mù luí, nga-nhúng gi, a wó lhoq nhùn é mingdán lé hap yu to bê nghut mù, jeju bun luí, hpautap é eq gyuq hkunggá é myit mai Garai Gasang hap yù gíng é đông noqkuq sháng.

²⁹ Hkâsu mù gà le, nga-nhúng é "Garai Gasang gi, nyhê jôm é myi nghut ri".^o

13

Ló Htáng Má Lhoq Pun Kyiêng É Hkyô

¹ Rayuq eq rayuq, gumang yhangchang đông chyitdap lhùm nyi keq.

² Byù bíng pé lé hkulúm rá hkâtô-myí kó, hkâsu mù gà le, ra-am gi, haú su kut nyí kô é yanmai, a sê é za maumang lagyô pé lé hkulum záng bekô nghut ri.

³ Nungmoq gi, htóng lúng bang eq rahá htóng lúng luzúm wui đông, htóng lúng bang lé le, nungmoq yhang jamjau hui zô nyi é đông, hpuzô é bang lé le, myit bun keq.

⁴ Myiháng hkyô gi, lunglhâng bâng eq hpautap é hui rá dut é nghut mù, myiháng yphupú gi, sân-yúng rá dut lhê. Hkâsu mù gà le, Garai Gasang gi, su-myi sulàng lú é bang eq ashop é đông gungsho zùm yap é bang banshoq lé jéyáng rá nghut lhê.

⁵ Nungmoq é asak dui hkyô má, ngùn lé chyitdap é myit tô pyám mù, nungmoq wó é lé nhik dik nyi keq, haí mù gà le, Garai Gasang gi,

"Hkâ-nhám le, Ngò, nàng eq a gang rá; hkâ-nhám le, Ngò, nang lé a tô pyám rá."^o ga taí é nghut lhê.

⁶ Haú mù, nga-nhúng gi, hkyak lum é myit mai,

"Haú Yhumsîng gi, ngo lé garúm sù nghut lhê yanmai, ngò, gyuq rá a nghut. Ó yuq wá, ngo lé hai wó kut rá lhu?"^o nghut taí é nghut lhê.

⁷ Nungmoq lé Garai Gasâng é mungdang taí kyô é, nungmoq é hkyô-u shê bang lé, myit bun keq. Yhangmoq asak htum shoq nyi lai lo é sâmlai lé myit wú mù, yhangmoq é lumjîng myit lé alik kut yù keq.

⁸ Yesuq Hkrisduq gi, a-nyí nap, hkû-nyí, htângngùn pyat dedu rajung za nghut nyi ri.

⁹ Maú nhô zâ é mhoqshit hkyô ajung jung mai eq shuí nghoq huí é bang hkâdut kó. Zo bang lé hai akýu á byí é, htúngli zoshuq eq a nghut é za, Garai jejú eq nga-nhúng é myit nhikhlum lé wum-o lhoq kîng yu é gi, gè hkyô nghut lhê.

¹⁰ Nga-nhúng gi, saksé zúm má dojaú é hkyangjong pé zo rá ahkáng a wó é hkungga gyp ralhum wó é nghut lhê.

¹¹ Haú hkyangjong mó gi, dusak pé é sui lé, yubak mara hkungga đông Chyoiyúng Htáng é Jowò má yu wang ri; nghut kôlhang, gungsho pé lé gi, byù nyi jowò shinggan má nyhê hkyô pyám ri.

¹² Haú eq rajung za, Yesuq le, Yhâng é sui đông mai byu pé lé wó lhoq chyoiyúng rá matú, myuq hkum shinggan má jamjau hpuzo mù shí hkâm bê nghut ri.

¹³ Haú mù luí, nga-nhúng gi, byù nyi jowò shinggan má Yhâng chyáng é mù, Yhang hui zô é rhoi hkyô lé é bo hui zo sháng.

¹⁴ Hkâsu mù gà le, nga-nhúng gi, mingkan shí má ru gíng nyi é myuq wó bang a nghut é za, jé lé lô rá myuq lé ho nyi é bang ru nghut lhê.

¹⁵ Haú mù luí, nga-nhúng gi, Garai Gasâng é myiêng lé yín yu é nhutwui é ashi nghut é,

^o 12:20 Htoq Ló 19:12-13 ^o 12:21 Tará Pun 9:19 * 12:24 Abelaq lé gi, yhangmang Ka-in eq sat é nghut luí, yhâng é sui gi, latô-hpuq rá matú nghut ri; nghut kôlhang, Hkrisduq é sui kúm gi, hkyi yù hkyô lajang byí ri. ^o 12:26 Hagi 2:6
^o 12:29 Tará Pun 4:24 ^o 13:5 Tará Pun 31:6 ^o 13:6 Hkya-on 118:6-7

hkyá-on hkungga lé, Yesuq đông mai, Garai Gasâng chyáng xoq xoq nhông byí nyi sháng.

¹⁶ Ge é hkyô kut râ eq góbang lé shuí gam chúng râ hkyô lé, hkâtô-myhí kó; hkâsu mù gâ le, Garai Gasang gi, haú sũ é hkungga pé lé ô ngui nyi ri.

¹⁷ Nungmoq é hkyô-u shê bâng é jìno gyo mù, yhangmoq é ahko ahkáng ô má nyi keq. Yhangmoq gi, jihpán shit râ dut é bang đông mai nungmoq lé upzúng nyi é nghut lhê. Yhangmoq é muzó pé gi, nungmoq é matú akyû a bo é wôlai a dut é za, gabú hkyô ralhum wó dut sháng gaq, yhangmoq é jìno gyô nyi keq.

¹⁸ Ngamoq é matú kyûdung byi kó laq. Ngamoq gi, sân-yúng é myit sôn sê é hkyô wó mù, hkyô hkangmó má ge é đông asak duì râ lé ô nau lhê nghũ, hkyak wó myit ri.

¹⁹ Ngò gi, nungmoq chyáng hân za wó dum jé sháng gaq, hau é matú je riyhang kyûdung byi keq nghũ wum taí tsuq kat lhê.

²⁰ Sau hpúng pé é sau zúng Sũ mó nghut é, nga-nhúng é Yhumsing Yesuq lé, haú ahtum abyuq é dangshikaq é sui đông, shí bê mai dum lhoq duì toq é sũ, nguingón hkyo é Garai Gasang gi.

²¹ Yhang ô nau é hkyô kut râ matú ge é hkyô jung hkangmó nungmoq lé lhoq gumjup byi mù, Yesuq Hkrisduq đông mai Yhang lé gabú nhang é hkyô lé, nga-nhúng chyáng kut nyí sháng gaq. Hpungwup shing kang gi, Yesuq Hkrisduq chyáng pyat dedu ahtum abyuq ru joq nyí sháng gaq. Amen.

²² Gumang wui ê, ngò lhoq pùn kyîng é dang lé nungmoq wó hkam jan kó sháng gaq nghũ, wum taí tsuq kat lhê; hkâsu mù gâ le, ngò gi, nungmoq lé, laiká ratot za kâ kat é nghut lhê.

²³ Ngò gi, nga-nhúng é gumang Timohti lhoq lhut kat é hui bê hkyô lé, nungmoq lé sé nhâng nau ri. Yhang shí má myap jé lé é nghut le gi, ngò, yhang eq rahá nungmoq lé, lé hui râ nghut lhê.

²⁴ Nungmoq lé shuí-u bang banshoq eq Garai Gasâng é byu pé banshoq lé bo shi-kyám byi keq. Itali mîng mâ é gumang wui gi, nungmoq lé shi-kyám kat akò nghut ri.

²⁵ Jeju gi, nungmoq banshoq bâng chyáng ru joq nyí sháng gaq ô.

YAKUQ Hun Kat é Laiká (James)

¹ Garai Gasang eq Yhumsing Yesuq Hkrisduq é jùn, ngò Yakuq gi, byo myin tò é Israelaq raxe í myù lé, nguingón dang shit kyô kat lhê.

Lumjng Myit Lé Chyam É Hkyô Eq Hpaqchyí Byéng-yá

² Ngá gumang wui ê, nungmoq é lumjng myit lé chyam wú é hui jáng, shikut shiráng sê é myit jat nyi é lé, nungmoq sê nyi lhê nggut mù,

³ wuìhke jamjau ajung jung lé htung hui é hkùn, gaù jowò mó nggut nyi lhê nghù lui myit yù keq.

⁴ Hau htoq agò, nungmoq banshoq gúm gumjup jup dut mù lui, hai le a langhpyut shoq, shikut shirang é myit gi, yhumsing kut nyi é muzó lé wó lhoq gumjup nyi sháng gaq.

⁵ Nungmoq má rayuq yuq hpaqchyí byéng-yá langhpyut tò é nggut le gi, haù banshoq bang lé, mara a hun é za, agùn agò byí nyi é Garai Gasang chyáng dúng nyi sháng gaq, haù jáng, Garai gi, yhang lé byi rá nggut lhê.

⁶ Nggut kôhang, lum shut é myit a bo é za, lumjng é myit eq dúng nyi sháng gaq, hkâsu mù gà le, lum shut é sù gi, laidùn eq hik lui toq lo é nhông má é wuìhêng eq wui nyi ri.

⁷ Haù yuq gi, Yhumsing Garai chyáng má é hai le wó yù rá su a ngam nyi sháng gaq.

⁸ Yhang gi, myit-kó xan sù nggut lui, yhang é hkyô hkat hkangmó má, mù htàng a nyang é sù nggut nyi ri.

Myung Sù Eq Wó Sù

⁹ Myung é gumang hpó gi, waq toq hui é má, wó sù gi, lhoq nyhùm hui é má, gabù gumrong nyi sháng gaq.

¹⁰ Hkâsu mù gà le, wó sù gi, wàhu banbò su woi byuq ló rá nggut lhê.

¹¹ Bui gi, nyé é lai eq toq ló jáng, haù wàhu nyhuí byuq ló mù, abó le yoq gyó byuq é eq, hau é yung sàm pé gi, htên byuq é su; wó sù le haù eq rajung za, yhang kut nyi é muzó má woi byuq ló rá nggut lhê.

Gunglaú É Hkyô

¹² Wuìhke jamjau hui le, wó shikut shirang nyi sù gi, hkungsô wó nyi ri; hkâsu mù gà le, chyam wú é ban hui jáng, yhang gi, Garai Gasang lé chyitdap é bang lé, byí tò é danggidiq asak janmaù lé, wó yù rá nggut lhê.

¹³ Gunglaú hui é sù ó yuq nggut kôhang, gunglaú hui é hkùn lé, "Garai Gasang, ngo lé gunglaú nyi ri." nghù lui, a tai sháng gaq,

hkâsu mù gà le, agè ashop é hkyô gi, Garai Gasang lé wó gunglaú é a nggut, ó yuq lé le Garai Gasang gunglaú rá a nggut.

¹⁴ Nggut kôhang, ó yuq nggut le le, yhumsing é gungsho ô nau é dông, shui láng nghoq ló é nggut le gi, agung alaù hui bê.

¹⁵ Gungsho ô nau é hkyô kúm gi, zogung dut jáng, mara lé hku htoq lo ri. Mara kò dúng jáng, shi é má jé rá nggut lhê.

¹⁶ Ngò chyitdap é gumang wui ê, i-myit hkyô nghoq hkâ-nghoq nyi kó.

¹⁷ Gè réng é eq bying jup é chyunghuq lunglhang gi, ahtoq shut má é nggut mù lui, maubó gung pè* é Yhângwa Garai chyáng mai gyó lo é nggut ri. Yhang gi, ahpuq alik atau ahù dut é buishùm su dut rá a nggut.

¹⁸ Yhang hpan tò é amyù pé má, nganhung gi, sâng-hi myhing é ashi pé dut lo sháng gaq ga, Yhang gi, Yhang ô nau é hkyô cháng lui, haù tengmán é mungdang mai, nga-nhung lé hkù to bê nggut ri.

Gyo Yu É Eq Cháng Kut É Hkyô

¹⁹ Ngò chyitdap é gumang wui ê, shí hkyô lé nungmoq sê nyi akò. Byù ó yuq nggut kôhang, gyó yù rá lé han nyi sháng; dang tai rá lé a hân sháng gaq; nhik-yo rá lé le hkâhân kó.

²⁰ Hkâsu mù gà le, byù nhik-yô é hkyô gi, Garai Gasang ô nau é dingmán é dông asak dui hkyô wó lhoq htoq rá a nggut.

²¹ Haù mù lui, acaq achyut é banshoq eq ladu lai agè ashop é pé lé lhoq san lhoq sêng pyám lui, nungmoq é i-myit lé wó hkyi yù rá matù, i-myit unghkau má Garai Gasang hô tò é mungdang lé, nú-nhâm é myit eq hkam yu nyi keq.

²² Nungmoq gi, yhumsing gùng lé a mhaù pyám sháng gaq, haù mungdang lé wó gyó yu é bang za a nggut, haù dông châng kut é bang le nggut nyi sháng gaq.

²³ Mungdang haù lé wó gyó yù mù, a châng kut é sù ó yuq le, yhumsing é gungdu lé myoqjám má wú sù eq wui ri.

²⁴ Yhang gi, yhang é gungdu lé wú yù mù, myoqdong lhik é eq, yhumsing gungdu hkâsu dut é lé tò-myhí pyám ri.

²⁵ Nga-nhung lé wó lhoq lhut yu é gumjup é tará má, rago za wú tsuq nyi sù kúm gi, wó gyó yù mù tò-myhí pyám é sù a nggut, muzó eq tún shit é sù nggut é yanmai, haù yuq gi, yhang châng kut é muzó má shimán jeju wó rá nggut lhê.

²⁶ Byù rayuq yuq, "Ngò gi, noqkuq htung lé lhoq dik sù nggut lhê." ga lui, myit to kôhang, yhumsing nhut shô lé a wó hkang mù, yhumsing myit lé mhaù pyám é nggut le gi, haù yuq é noqkuq htung gi, akôm za nggut nyi ri.

* 1:17 Maubó gung pé gà é gi, bui, kyí, lhamó lé gà lhê.

²⁷ Íwa Garai Gasâng é hí má sansêng é eq, rá é hkyô a bo é noqkuq htùng gi, wuĩhke jamjau huĩ é chuimô chuiuzô pé lé, châng wú garúm é hkyô eq, mingkan htoq mã é achaq achyut é hkyô lé koi pyâm é hkyô nghut ri.

2

Myoqdong A Wó Hkyin Lhum

¹ Ngá é gumang wuĩ ê, hpungwup shingkan bo é nga-nhùng é Yhumsing Yesuq Hkrisduq lé lumjǐng hkyô mã, byu é myoqdong lé hkâhkyin lhum kó.

² Dangké, hǐng loqchyop chyop luĩ, réng é mebu wut é sũ rayuq eq ajeq amyha é mebu wut é asho awuĩ é sũ rayuq gi, nungmoq é tarajong má wang lò kô é nghut le,

³ haũ réng é mebu wut é sũ lé, nungmoq lhom wú mù je hkunggá é èq, "Shĩ arǒng wó é jowó má zùng aq." dum, haũ asho awuĩ é sũ lé nghut jǎng gi, "Mhó má yap to aq." haũ su a nghut jǎng, "Ngá é hkyĩ htǎng má zùng aq." ga tai kô é nghut le gi,

⁴ nungmoq rayuq eq rayuq gamhkuĩ lhum luĩ, a ge é i-miyit eq doqđân é bang dut lò bekô a nghut kó lúh?

⁵ Ngò chyitdap é gumang wuĩ ê, gyô yù keq, lumjǐng hkyô mã wó sùt nyi luĩ, gidig tǒ tǒ é mingđân é silĩ wunli lé, Yhang lé chyitdap bang wó hkam yù shǎng gaq ga, Garai Gasang gi, myigǔng htoq mã é asho awuĩ é bang lé hkyin yù bê a nghut kó lúh?

⁶ Nungmoq kúm gi, asho awuĩ é sũ lé a hpau a yùm kut pyâm bekô nhung; wó bang sùt bang kúm gi, nungmoq lé zik zo mù luĩ, yhumsing é loq èq yhang, tarǎ tingnyǎng shut she hkyut lò bekô, a nghut kó lúh?

⁷ Nungmoq eq sêng é kô dik é myǐng lé lǎng, yhangmoq yhang rhoĩ dang tai bum akô, a nghut kó lúh?

⁸ Haũ mù luĩ, Chyũmdang mã, "Nǎng gũng lé nǎng chyitdap é su, nǎng é chyangnǎm mã é bang lé le chyitdap aq."[✧] ga luĩ, tai tǒ é hkohkam tarǎ lé, nungmoq tsuq za chǎng é nghut le gi, nungmoq ge é hkyô lé kut nyi bê.

⁹ Nghut kǒlhang, byu é myoqdong lé nungmoq hkyin nyi kô é nghut le gi, nungmoq mara kut nyi gũ nghut bê yanmai, haũ tarǎ lé shut é bang lé su tarǎ jéyǎng é huĩ nyi bekô rá nghut lhê.

¹⁰ Byù ó yuq nghut le le tarǎ banshoq lé chǎng kǒlhang, haũ mã é ralhum lhum lé shut pyâm jǎng gi, tarǎ banshoq lé shut pyâm sũ dut byuq rá nghut lhê.

¹¹ Hkâsu mù gǎ le, "Su-myi sulǎng hkǎlũ."[✧] ga luĩ, hkang tǒ é sũ gi, "Byù lé hkâsat."[✧] ga luĩ le, tai tǒ ashĩ. Nǎng su-myi sulǎng a lú kǒlhang, byu sat é sũ nghut le gi, tarǎ lé shut é sũ nghut bê.

¹² Haũ su mù luĩ, nungmoq lé lhoq lhut kat é tarǎ đǒng jéyǎng doqđân é huĩ rá bang su, ru tai nyi keq; ru chǎng kut nyi keq.

¹³ Hkâsu mù gǎ le, shogyo myit a bò sũ gi, a shogyô é đǒng jéyǎng doqđân é huĩ rá nghut lhê. Nungmoq nhikmyĩn é hkyô kúm gi, jéyǎng doqđân é hkyô lé wó ǒng lut rá nghut lhê.

Lumjǐng Myit Eq Zui Sai É Hkyô

¹⁴ Ngá gumang wuĩ ê, byù rayuq yuq, "Ngò gi, lumjǐng myit bo lhê." ga tai nyi kǒlhang, muzó a bo lom é nghut le gi, hai akyũ bò rá lúh? Lumjǐng myit haũ gi, yhang lé wó hkyi yù rá lúh?

¹⁵ Gumang, gu-nhá rayuq yuq a chĩn dut nyi é eq, nyi wuĩ é zoshuq langhpyut tǒ é nghut le,

¹⁶ nungmoq chyǎng mã é rayuq yuq gi, yhangmoq é gungsho mã rá é hkyô hai le a byĩ é za, yhangmoq lé, "Nungmoq wut é gũng lúm shǎng gaq, zô é ùng gyi shǎng gaq, ngui ngui ngǒn ngǒn lò keq." ga tai é nghut le gi, hai akyũ bò kó rá lúh?

¹⁷ Haũ eq rajung za, lumjǐng myit mã muzó a bo é nghut le gi, shi é eq rajung za nghut nyi ri.

¹⁸ Dum rahkyô gi, "Nǎng gi, lumjǐng myit bo ri, ngò gi, muzo bo lhê. Muzó a bo é nǎng é lumjǐng myit ngo lé tũn shit wú aq, haũ hkũn, ngá muzó èq ngá lumjǐng myit lé, nǎng lé ngò tũn shit rá nghut lhê." ga luĩ, rayuq yuq tai rá nghut lhê.

¹⁹ Garai Gasang rayuq za nghut é lé nǎng lumjǐng ri-nhung! Nghut bê, haũ gi, jô é hkyô nghut nyi ri, nat gǎng pé le haũ su yhang lumjǐng mù gyuq nǎn nyi akô nghut ri.

²⁰ Kyoq a bo é byù bam ê, lumjǐng myit mã muzó a bo le akôm za nghut é hkyô lé, nǎng sé nau lhê a nghut lúh?

²¹ Nga-nhùng é Íwa Abraham gi, hkungga gyap htoq mã yhang zo, zui sai é muzó mai hkungga kut é hkũn lé, zui sai é muzó mai dingmán é sũ gǎ é lé wó yũ bê a nghut lúh?

²² Haũ mù luĩ, yhǎng é lumjǐng myit gi, yhǎng é muzó eq rahá za e ló é yanmai, lumjǐng myit gi, jup byǐng lo é lé, nǎng wó myǎng bê nghut ri.

²³ Haũ su mù, "Abraham gi, Garai Gasang lé lumjǐng é nghut mù luĩ, yhang lé dingmán sũ ga sǒn byi bê."[✧] ga luĩ, kǎ tǒ é Chyũmdang gi, dik to bê. Dum, yhang lé Garai Gasang é buinũm hpó ga luĩ le myhǐng byi bê.

²⁴ Haũ mù luĩ, zui sai é muzó èq mara hkyut san byi huĩ é lé, nungmoq bũn sé nyi akô.

²⁵ Haũ eq rajung za, Rahap gǎ é shiwa myhĩ gi, jowú su nhik lé lhom te yù mù luĩ, hkyô gó hkat đǒng nhang kat pyâm é hkũn

le, yhang zui saí é muzó mai dingmán é sú gâ é wó yú bê a nghut lúhú?

²⁶ Haú su mù, gungdu má woi-nyí a bo le gi, shí é eq rajung za, haú lumjing myit má muzó jizó a bo le gi, shí gú nghut bê nghut ri.

3

Mhé Wuí É Shô

¹ Ngá é gumang wuí ê, byù myo myo sará hkâkut naú kó. Hkâsu mù gâ le, ngamoq sê é eq rajung za, sará pé gi, je riyhang htan é dòng jéyáng doqđân é hui zo rá nghut lhê.

² Nga-nhúng banshoq bang gi, hkyô myo myo má myit lingbat é bang chyat nghut ri. Byù rayuq yuq dâng èq a lingbat é nghut le gi, yhang gi, jup byíng sú eq yhumsing é gùng lé wó hkang é sú nghut ri.

³ Nga-nhúng myang lé nhutkyáng kyáng byi jáng, myang hau é gungdu gón lé, nga-nhúng ô nau é dòng wó cháng nhang lhê.

⁴ Haú mai gotú, wuí-sanghpo pé lé wú wú keq, haú-í kó é sanghpo lé htan é laidün èq mut é hui kôlháng, sanghpo hkâng sú gi, gyai tiq é sanghpo shap eq za, yhang ô nau é dòng, haú pé lé wó hkang yu ri.

⁵ Haú eq rajung za, shô gi, tiq é gungsho za nghut kôlháng, gyai gumrông nghutbün nyi ri; wú keq, tiq dik é myizik zo gi, yoso mhanpúng mó lé wó nyé gyó nhang ri-nhung.

⁶ Shô haú gi, myi eq wuí nyi ri. Nga-nhúng é gungsho má, shô haú gi, agè ashop é mingkan dut lò mù, nga-nhúng é gungsho asak lé achaoq achyut dut nhâng lui, gungsho asak lé nyhê tuq kat ri. Haú gi, ngaraí myí èq nyhê tuq kat é nghut bê.

⁷ Dusak ajung jung, nghoq ahú hú, myi má yé é jung eq wui hkaú má nyi jung banshoq gi, wó mhê yu é jung chyat nghut mù, byu pé gi, haú pé lé mhê yu nyi akó.

⁸ Nghut kôlháng, shô lé kúm gi, byù ó le a wó mhê yù kó nghut ri. Haú gi, apyí abat, agè ashop, uphkâng a wó é eq, shí é jung duq eq byíng tô é jung nghut nyi ri.

⁹ Nga-nhúng gi, shô hau éq nga-nhúng é Yhumsing eq Iwa Garai lé hkyá-on nyi lhê; hau èq za, Garai Gasâng é gunglhô dòng hpan tô é waxâng zo wuí lé le nhúng pyám nyi ri.

¹⁰ Nhut ralhú za mai, hkyá-ôn é dang eq nhîng é dang htoq lo ri. Ngá é gumang wuí ê, haú su kut é gi, a gè.

¹¹ Wuíbúm radong za mai, chuí nghâm é wui eq hkó é wui wó htoq rá lúhú?

¹² Ngá gumang wuí ê, maihpáng gâm mai tsanlun shí, tsibiyiq nú mai maihpáng shí, wó zui rá lúhú? Haú eq rajung za, xô ngam é wui gi, chuí nghâm é wui lé wó lhoq htoq byi rá a nghut.

Ahtoq Mai Lo É Hpaqchyí

¹³ Nungmoq má, hpaqchyí byéng-yá bo é sú eq sê é dat é sú, ó nghut lhê lúhú? Haú yuq gi, yhang hpaqchyí bo é hkyô lé, hpaqchyí mai wó yu é, myit lhoq nyhum é hkyo èq, yhumsing zui saí é ge é muzó dòng tún shit nyi sháng gaq.

¹⁴ Nghut kôlháng, nungmoq é myit má ladu lai é manon é i-myt eq, lú lhum bat zik é i-myt bo é nghut le gi, hkâ-nghutbun kó, haú tengmán hkyô lé le hkâ-mhaú pyám kó.

¹⁵ Haú sú é hpaqchyí byéng-yá kúm gi, mauhkúng htoq mai gyó lo é hpaqchyí byéng-yá a nghut, haú gi, myigùng htoq mâ é, gungsho ô nau é eq, nat é hpaqchyí byéng-yá chyat nghut nyi ri.

¹⁶ Hkâsu mù gâ le, manon é eq lú lhum bat zik é dut nyi le gi, ruk ruk rak rak é hkyô eq agè ashop é mù ajung jung jup hkâm nyi ri.

¹⁷ Mauhkúng htoq mâ é hpaqchyí byéng-yá kúm gi, sâng-hi awang má sansêng nyi ri; hau htâng má gi, nguínón hkyô lé ô nau é, myit nùm é, jino gyó é, shogyo nhikmyin sê é eq ge é ashí zui nyi mù lui, gamhkui a bò, ahpuq alik a dut é eq, kut mhaú a sê é hpaqchyí byéng-yá nghut nyi ri.

¹⁸ Hau htoq agó, nguínón é hkyô dat sô xoq é bang gi, nguínón é shiji lé sân kat é bang nghut mù, ge é ashí wó yú kó rá nghut lhê.

4

Yhumsing Gùng Lé, Garai Gasâng Chyáng Ap To Rá Hkyô

¹ Nungmoq má gyè dut lhúm é eq mabyoq jishúm gi, hkâmai htoq lo é lúhú? Nungmoq ahkaú má gungsho ô nau é hkyô pé ngón hkyô hô mù, majan zân lhúm é yanmai, dut htoq lo é a nghut kó lúhú?

² Nungmoq yut yut myit ô nau nyi kôlháng, haí le a wó yú kó. Nungmoq sat nyi é eq manon nyi kôlháng, a wó yú kó. Nungmoq byoq lhúm nyi é eq majan htoq lhúm nyi kôlháng, haí le a wó yú kó; hkâsu mù gâ le, nungmoq, Garai Gasâng lé a dung kó é yanmai nghut ri.

³ Nungmoq dung kôlháng, a myang yù kó nghut ri; hkâsu mù gâ le, nungmoq é ngón kún hkyô má jai chùng langsa pyám rá matú, shut é dòng dúng nyi kó é yanmai nghut ri.

⁴ Su-myi sulàng lú é bang su gidíq a gîng é bang é, mingkan ô nau é hkyô lé buinùm du é myit gi, Garai lé a ngui é myit nghut é hkyô lé, nungmoq a sé kó lúhú? Haú mù lui, mingkan ô nau é hkyô eq buinùm dù naú sú ó nghut kôlháng, Garai Gasâng é gyè nghut nyi ri.

⁵ Dum ralhú, nga-nhúng má Garai Gasâng kat lhúng tô é woi-nyí gi, manon é myit lúng nyi ri ga lui, Chyúmdang má taí é gi, akôm nghut ri nghú, nungmoq myit ngam nyi akó lúhú?

⁶ Nghut kôlhang, Yhang gi, je kô é jeju ru byi nyi lhê. Haû eq rajung za, Chyúmdang má,

"Garai Gasang gi, nghutbûn é bang lé hkûm zing pyám kôlhang, myit lhoq nyhum é bang lé jeju byi ri."⁶

ga tai tô ri.

⁷ Haû mù, Garai uphkan é a-ô má ru nyi nyi keq; Nat Tsadán lé hkûm tang pyám keq; haû hkûn, yhang nungmoq chyáng mai hpang byuq rá nghut lhê.

⁸ Garai Gasang chyáng huí ê keq, haû hkûn, Yhang, nungmoq chyáng huí lé lô rá nghut lhê. Yubak kut é bang ê, nungmoq é loq pé lé chí san chí sêng pyám keq. Myit koq xân é bang ê, nungmoq é myit nhikhum lé lhoq chyoi lhoq yung to keq. Yudaq htung dông loq lé chí san chí sêng pyám keq gâ é lichyúm gi, i-myt, gungdu lé lhoq san lhoq sêng pyám é lé gâ lhê.

⁹ Nungmoq gi, myit yón é, iyon yón é eq ngaubyi ngau-nhap é kut nyi keq. Nungmoq é wuihâ é hkyô lé gi, iyon dông, nungmoq é gabú é hkyô lé gi, yón kuq é dông htaí pyám keq.

¹⁰ Haû Yhumsing Garai é hí má i-myt lhoq nyhum nyi keq, haû hkûn, Yhang gi, nungmoq lé lhoq toq rá nghut lhê.

¹¹ Gumang wui ê, nungmoq yhangchang a ge é dông hkâtaí hpoi lhum kó. Yhumsing é yhanggu yhangmang lé a ge é dông tai hpoi nyi é sù, haû a nghut jáng, jéyáng é sù gi, haû tará lé a ge é dông tai hpoi nyi mù luí, jéyáng é sù nghut nyi ri. Haû tará lé hâng jéyáng nyi é nghut le gi, tará lé châng é sù a nghut é za, tará jéyáng sù nang dut nyi ri.

¹² Garai Gasang za tará byi tô é eq tará dara sù, wó hkyi yu é sù eq, wó lhoq htên é sù nghut nyi lhê. Hau é yanmai, nang é yhumkyo hpó lé jéyáng é sù nang gi, ó yuq wa nghut lhê lú?

Gyáng Dang A Tai Râ Hkyô

¹³ "Ngamoq, hkû-nyí napmá ra-nyí nyí, wà rawá wà shut é mù, haû má razàn kô é nyi luí, hpugá wuiloq gá mù amyat wó myang yu rá." ga tai nyi é bang ê, gyô wú keq.

¹⁴ Napmá hai dut lô rá lé háng, nungmoq gi, a sé ko. Nungmoq é asak gi, hai nghut nyi lhê lú? Haû gi, razup rahtáng za htoq shit lui dum byuq byuq lô mù é, nghansoq eq rajung za nghut nyi ri.

¹⁵ Haû mù luí, nungmoq haû su ga tai nyi rá malaí gi, "Yhumsing Garai dông é nghut le gi, ngamoq le ru wó dui nyi mù, shí le, mhô le, wó kut rá nghut lhê." nguí luí, wó tai rá nghut lhê.

¹⁶ Ahkuí kúm gi, nungmoq é gyáng é dang dông gumrong nyi akó; haû su gumrong é

hkyô banshoq gi, agè ashop é jung chyat nghut nyi ri.

¹⁷ Haû mù luí, ge é mù sê kut to luí, a kut é sù gi, mara kut sù dut bê nghut ri.

5

Sùt Wó Bang Lé Sidiq Byi É Dang

¹ Sùt wó é bang ê, gyo keq, nungmoq chyáng jé lé lô rá é wuihke jamjau hkyo é yanmai, ngau garú nyi keq.

² Nungmoq é sutzê gi, htên bup byuq bê nghut ri; nungmoq é wutbu wutmé le manot èq zô pyám bê nghut ri.

³ Nungmoq é hing eq ngùn má háng, jogyik zui byuq mù luí, haû jogyik gi, nungmoq é mara hkyam shut saksé dut byi é eq, nungmoq é gungsho lé myi su zô pyám rá nghut lhê. Nungmoq gi, jiytúm buinyi shí pé má, sutzê lé za hkong to bekô nhung!

⁴ Wú keq, nungmoq é yohtung dùng yò yam nhâng mù luí, ahpau a byi é za, nungmoq mhaú zô tô é ahpau pé garú nyi é htê pé eq, mù zui bang garú é htê pé lé gi, haû a-tsam dik shoq bo é Garai wó gyo byi bê nghut ri.

⁵ Nungmoq gi, myigùng htoq má hkik hkik hkâm hkâm wó nyi é eq, i-myt ô nau é dông ngón hkyô chyat châng nyi bum akô. Nungmoq gi, sat rá buinyi matú yhumsing é gùng lé tsó myum to bekô nghut ri.

⁶ Haû dingmán é sù* lé, nungmoq mara hùn mù, sat pyám bekô. Yhang kúm gi, nungmoq lé a lhom hkûm zing nghut ri.

Myit Hing Hing Hkam Jan Ra Râ Hkyô

⁷ Haû mù luí, gumang wui ê, haû Yhumsing dum jé lé é buinyi jé shoq myit hing é èq láng nyi keq ô! Hkyâm sai sù lé wú wú keq, yhang gi, myihpún mai ahpau dán é ashi lé wó yú shoq ga mau mún eq wò htáng htáng é mau wó gyún é jé shoq myit hing hing láng nyi ri.

⁸ Haû eq rajung za, nungmoq le, Yhumsing Yesuq dum jé lé rá gi, chyáng lo nyi bê nghut é yanmai, myit hing é èq, i-myt lé lhoq ging lhoq ting to keq.

⁹ Gumang wui ê, nungmoq jéyáng a hui sháng gaq, nungmoq yhangchang hkânyung nyâng lhùm nyi ko. Wú keq, Tará agyi gi, hkúmdong má jé nyi to bê nghut ri.

¹⁰ Gumang wui ê, haû Yhumsing Garai é mying eq hko kyô é myiqhtoí pé wuihke jamjau huí é hkûn, jân pyám é myit lé, nungmoq gi, ge é alik agân kut yú keq.

¹¹ Wú keq, shikut shirang é bang lé, nganhung gi, hkungsó wó é bang ngu é nghut lhê. Yobaq hkâm jân é yanmai, Yhumsing Garai gi, yhang lé htâng má myo myo dum shimân byi é hkyô lé, nungmoq wó gyô wú bê nghut lhê. Hai mù gâ le, haû Yhumsing

* 4:6 Sânghkyang 3:34

* 5:6 Dingmán é sù gâ é danghkun lé, Chyúmlaiká ra-am má gi, dingmán é bang gâ ri.

Garai gi, gyai shogyo nhikmyîn é sũ nghut nyi ri.

¹² Ngá é gumang wui ê, banshoq má ahkyak dik é gi, hai le le hkâdakâm kó. Mauhkûng lé a nghut jáng, myigùng lé lang lui le hkâdakâm kó. Dakam é dang gotû lé le hkâtaî nyi kó. Nungmoq doqđân é a hui sháng gaq, nungmoq gi, nghut é le gi, "nghut lhê", a nghut é le gi, "a nghut", nghũ za, tai keq.

Lumjîng Myit Eq Kyûdung Râ Hkyô

¹³ Nungmoq má rayuq yuq wuihke jamjau hui é nghut le gi, kyûdung nyi sháng gaq; rayuq yuq myit ngôn nyi é nghut le gi, hkyaton mahkôn hkon nyi sháng gaq.

¹⁴ Nungmoq má rayuq yuq nõhpyo hui é nghut le gi, nõqkuq hpúng mã é nhik bô suwún wui lé ji yù mù, haù bang gi, Yhumsîng Yesuq é myîng mai yhang lé xú but byi lui, kyûdung byi kó sháng gaq.

¹⁵ Haù su mù, lumjîng myit eq kyûdung é dang gi, haù nõ sũ lé lhoq gê lui, Yhumsîng Garai gi, haù yuq lé lhoq toq yù rá nghut lhê. Yhang gi, yubak mara kut shut é nghut kôlhâng, hkyut pyám byi é hui rá nghut lhê.

¹⁶ Haù mù lui, nungmoq lhoq ge é hui kó sháng gaq, nungmoq é yubak mara lé rayuq eq rayuq yin lhum mù, kyûdung byi lhûm nyi keq. Dingmán su é kyûdung dang gi, wó dut nhâng rá a-tsam wum-o myo myo bo nyi ri.

¹⁷ Eliyaq gi, nga-nhúng su i-myt unghkaù bo é xângzo byù za nghut lhê. Nghut kôlhâng, yhang gi, mau a wò sháng gaq ga, wum kat o kat kyûdung jáng, sùm zan eq lhamó hkyuq hkyap tup myigùng htoq má mau a wò shoq dut byuq é nghut lhê.

¹⁸ Kyû dum dúng kat jáng, mauhkûng gi, maú wo hkyô kat byi mù, myigùng gi, yhâng é kyô shi mui shi lé lhoq htoq byi wú bê nghut lhê.

¹⁹ Ngá é gumang wui ê, nungmoq chyáng mã é rayuq yuq, haù tengmán hkyô mai nghoq ló byuq é hkûn, rayuq yuq gi, yhang lé tengmán hkyô shut dum wó shui taù lo é nghut le kúm gi.

²⁰ haù shui taù yù sũ gi, yubak mara kut é sũ lé, shut shai é hkyô mai tengmán hkyô shut shui taù yù mù, myit woi-nyi lé shi é mai hkyi yù bê nghut é yanmai, yubak mara myo myo lé shui nghop pyám byi é sũ dut berâ lé, bûn nyi keq ô!

PETRUQ

Hî Dàm Hun Kat é Laiká (1 Peter)

¹ Yesuq Hkrisduq é lagyo nghut sù, ngò Petruq gi, Pontuq, Galatiq, Kapadokia, Asia eq Bihtuni mau pé má byo myín tò bum é, Yesuq Hkrisduq é jino gyo rà matú le, Yhâng é suí eq hpyûn gyûn é hui* rà matú le, haù Woi-nyí é lhoq sân-yúng nyi é muzó đông mai, Íwa Garai Gasâng é hî te sê tò é hpaqchyí má cháng luí, hkyin yù huí é bang nghut é,

² Garai Gasâng eq hkyin htoq yù luí, mingkân é byùbing dut bâng chyáng dang kyô kat lhê. Jeju eq nguingón hkyô gi, nungmoq chyáng agùn agó joq nyi sháng gaq.

Dui Nyi É Myit Myoqbyù Hkyô

³ Hkya-on kungtôn hkyô gi, nga-nhúng é Yhumsing Yesuq Hkrisduq é Yhângwa nghut sù Garai Gasang chyáng nghut nyi sháng gaq! Yhang gi, Yesuq Hkrisduq, shi é mai dum dui toq é hkyô đông, Yhâng é gyai shogyo nhikmyin é yanmai, nga-nhúng lé, asik hku é dum hui nhâng mù, rú dui nyi é myit myoqbyù hkyô lé wó nhang é htoq agó,

⁴ nungmoq é matú mauhkung htoq má tò to byi bê nghut é, hkâ-nhám le, a hten a byoq é, agot a-ù a dut é, a hpoí byuq é muí lé le wó nhang é nghut lhê.

⁵ Nungmoq gi, lumjng kô é yanmai, ló htâng é ahkying má lhoq htoq shit rà rì rì nghut é hkyi yù hkyô jé shoq, Garai é hpungwup a-tsâm eq upzúng é hui bang nghut akó.

⁶ Haù mù, nungmoq gi, ahkuí razup zo, wuìke hkyô jungkhang jungmó má yón hpuzô é hui kó rà nghut kôlhàng, gyai yhang gabú nyi keq.

⁷ Wuìke hkyô haù pé mai, nungmoq é lumjng myit gi, jet é hkyô lé wó chyan htoq mù, myi mai jên yù kôlhàng htên byoq sê é hng htoq je gyaú luí. Yesuq Hkrisduq htoq shit é hkùn, hkya-on kungtôn hkyô, hpungwup shingkhàng eq aróng sitang lé, nungmoq wó kó rà nghut lhê.

⁸ Nungmoq gi, Yesuq lé a myang wú kôlhàng, Yhang lé chyitdap bum akó; Ahkuí, nungmoq, Yhang lé a myàng kôlhàng, Yhang lé lumjng kô é nghut mù, a ung htoq tai é eq hpungwup bo é gabú hkyô gi, nungmoq chyáng bying jup nyi ri.

⁹ Hkâsu mù gâ le, nungmoq gi, nungmoq é asak woi-nyí lé hkyi yù hkyô nghu é, nungmoq é lumjng myit é akýú lé wó yu nyi kô é nghut ri.

¹⁰ Hkyi yù hkyô haù eq séng luí, nungmoq chyáng jé bê nghut é jeju hkyô lé tai é myiqh-toí pé gi, gyai yhang sídiq myit éq jí jí chyun chyun ho gon wú bekô nghut ri.

¹¹ Yhangmoq gi, Hkrisduq wuìke jamjau hui luí, hpungwup shingkhàng wó rà nghut é hkyô lé, yhangmoq má lúng nyi é, Hkrisduq é Woi-nyí mai te tai é hkùn, hkâ-nhám nghut rà eq hkasú é u má nghut rà hkyô lé ho gôn wú bekô nghut ri.

¹² Mauhkung mai nhang kat é Chyoiyúng Woi-nyí eq, nungmoq lé gabú danglù hko kyo bê bang mai, ahkuí nungmoq lé tai kyo bê nghut é hkyô pé lé, yhangmoq tai kô é gi, yhumsing matú dojaú é a nghut é za, nungmoq matú nghut é hkyô lé, yhangmoq gi, htoq shit sé nhang é hui bekô nghut ri. Maumang lagyo pé lháng gi, haù hkyô pé lé gyai wú nau bum akó nghut ri.

Chyoiyúng Nyi Râ Hkyô

¹³ Haù mù luí, zui sai rà matú nungmoq é i-myt lé hen to keq; yhumsing gung yhumsing hkang nyi keq; Yesuq Hkrisduq htoq shit é hkùn, nungmoq lé byi rà nghut é jeju lé, hkyak za myit myoqbyu nyi keq.

¹⁴ Jino gyô é zoshàng wui su, myoq a búng shi é pyat má nungmoq nyi tò é hkùn, nungmoq é agé ashop ô nau hkyô lé a châng kut é za,

¹⁵ haù nungmoq lé ji yu é Sù gi, chyoiyúng é su, nungmoq zui sai é hkyô banshoq má chyoiyúng nyi keq.

¹⁶ Hkâsu mù gâ le, "Ngò gi, chyoiyúng Sù nghut é yanmai, nungmoq le chyoiyúng nyi keq."* ga kâ tô ri.

¹⁷ Byù yuq hkhàngmó é muzó lé, myoqdong a hkyin é za tará jéyáng é sù Íwa lé, nungmoq wut dung kô é yanmai, byùbing đông shi má nyi é u lé, Garai lé gyuq khunggá é myit mai asak dui keq.

¹⁸ Hkâsu mù gâ le, nungmoq gi, nungmoq é íchýí íwá pé chyáng mai bo gyô lo é hpau a dap é asak dui hkyô mai, htên byoq sê é ngùn, hing eq hkyi yù huí é a nghut é za,

¹⁹ gumjup é eq mara a bo é sauzo nghut sù, Hkrisduq é hpaú dik é suí eq sheq hkyi yù huí é ru nghut é lé, nungmoq sê lhê.

²⁰ Yhang gi, mau htoq xâng hkun mai hkyin yu é hui bê nghut kôlhàng, jihtùm ahkying shí pé má sheq, nungmoq é matú htoq shit nhang é hui bê nghut ri.

²¹ Yhang lé, shi é mai lhoq dui toq yù mù, hpungwup shingkhàng bò nhang é Garai Gasang lé, nungmoq gi, Hkrisduq đông mai lumjng kô é nghut luí, nungmoq é lumjng myit eq myit myoqbyù hkyô gi, Garai Gasang chyáng nghut nyi bekô nghut ri.

* 1:1 Yhâng é suí eq hpyûn gyûn é hui gâ é gi, Yhâng é suí eq mara chì sân pyám byí é lé gâ lhê. * 1:16 Nhong 11:44-45; 19:2; 20:7

²² Ahkuí kúm, nungmoq gi, haù tengmán hkyô lé châng é dông mai, yhumsing gùng yhumsing lhoq sân-yúng yú bekô nghut mù, nungmoq é gumang wui lé, lhumzui é dông chytidap bekô nghut lui, myit nhikhlum mai, rayuq eq rayuq gyai yhang chytidap lhum keq.

²³ Hkâsu mù gâ le, nungmoq gi, htên byoq sê é amyui mai dum hku huí é a nghut é za, Garai Gasâng é, rû dui nyi é eq rû gíng nyi é mungdang dông, htên byoq a sê é amyui mai dum hku é hui bang ru nghut lhê.

²⁴ Hkâsu mù gâ le,

"Byù lhunglhang bang gi, wàhu mhan eq pung ri, yhangmoq banshoq bâng é hpungwup shíngkang gi, yò mã é banbó pé eq pung ri;

wàhu mhan gi, nyuhí kyuaq byuq lui, banbó pé gi, yoq gyó byuq lhê;

²⁵ nghut kôlhang, haù Yhumsing é mungdang gi, ahtum abyuq gíng nyi lhê."[✠] gâ tô ri. Haù gi, nungmoq lé hko kyo bê mungdang nghut lhê.

2

¹ Haù mù lui, i-myi dù é hkyô banshoq eq mhaù zô é hkyô banshoq, gegùn labyoq kut é hkyô, manon é hkyô eq lumú gansang é hkyô jung hkangmó pé lé tô pyám keq.

² Asik hku é zonú pé naú lé ô naù gadaù é su, woi-nyí eq sêng é jet é naú* lé ô naù gadaù nyí keq, haù jáng, nungmoq gi, hau é yanmai, nungmoq é hkyi yù hkyô má wó kô myhâng kó rà nghut lhê.

³ Hkâsu mù gâ le, haù Yhumsing gi, gè sù nghut é lé, nungmoq chayam wú bekô nghut ri.

Rû Dui Nyi É Luqgok Eq Hkyin Yù Hui É Byù Myù

⁴ Byu pé mai hkyin htoq pyám kôlhang, Garai Gasâng é matú hpaudap lui, Yhâng eq hkyin yù huí é, rû dui nyi é Luqgok nghut sù, haù Yhumsing chyáng nungmoq jé lé é hkûn,

⁵ nungmoq le, rû dui nyi é luqgok pé su, woi-nyí eq sêng é yhúm† saí nyi é hui lui, Yesuq Hkrisduq dông mai, Garai eq hap yù gíng é, woi-nyí eq sêng é hkungga nhông byi rà matú, chyoiyúng é hkyangjong amyú dut bekô nghut ri.

⁶ Hkâsu mù gâ le, Chyúmdang má, "Wú keq, hkyin yù huí é eq hpaudap é htungchyún luqgok racham lé, Zi-un bùm má ngò lhez tô é nghut lhê;

Yhang lé lumhkau é sù gi, hkâ-nhám le hoq hpú é hui rà a nghut."[✠]

ga tai tô ri.

⁷ Haù mù, lumjíng bang nungmoq é matú gi, luqgok haù hpaudap é nghut lhê. Nghut kôlhang, a lumjíng bâng é matú gi,

"Haù yhúm saí bang hkyin htoq pyám é luqgok gi, htungchyún mã é ahkyak dik é luqgok[‡] dut bê nghut ri."[✠]

ga le,

⁸ "Byu pé lé, htùng leng rà luqgok eq myit leqbat nhâng rà luq mó cham dut bê nghut ri."[✠]

ga le, tai tô ri. Yhangmoq gi, mungdang lé a châng kô é yanmai, myit leqbat kô é nghut lhê. Haù dut rà lé, yhangmoq é matú masat tô gú nghut bê nghut ri.

⁹ Nghut kôlhang, nungmoq gi, mauchut hkaù mai Yhâng é mauhpo maubó shut nungmoq lé wut htoq yú Su é mauhpo muzó lé wó tai pyó kó sháng gaq ga, hkyin yù huí é byuhú, hkohkâm hkyangjong amyú, chyoiyúng é byù myú, Garai Gasang eq sêng é byu pé nghut akô nghut ri.

¹⁰ Nungmoq gi, hí lé byù ra-myú a nghut wú kôlhang, ahkuí gi, Garai Gasâng é byù myú nghut bekô nghut ri; nungmoq gi, hí lé shogyo nhikmyin hkyô lé a wó yu wú kôlhang, ahkuí gi, shogyo nhikmyin hkyô lé wó yú bekô nghut ri.

¹¹ Chytidap é luzúm wui é, nungmoq é asak woi-nyí lé majan zân nyi é, yubak mara byíng jup é ô naù gadaù hkyô lé koi pyám keq ngú, gó mîng byu pé eq byúbíng pé dông mingkan htoq má nyi é bang nungmoq lé, ngò, wum tai tsuq kat lhê.

¹² Haù a lumjíng shí é byu pé gi, nungmoq shut nyi ri ga, nungmoq lé mara hun bùm kôle, nungmoq é ge é muzó lé myàng kômú, nga-nhúng lé Garai Gasâng eq lé kúm é buinyi má Garai lé shigyaù kó sháng gaq, a lumjíng shí é byu pé é ahkaù má hau su ge é asak dui hkyô dông nyi yap keq.

Uphkâng Bang Eq Yhumsing Wui É A-ô Má Nyi Râ Hkyô

¹³ Haù Yhumsing é yanmai, byu pé mã é ahko ahkáng wó bang banshoq é a-ô mã nyi keq; kô dik é ahkáng ayá wó é hkosêng é a-ô mã nghut kôle,

¹⁴ shut é hkyô kut bang lé dam byi rà matú eq jô é hkyô kut bang lé shigyaù rà matú, hkosêng eq nhang tô é mauzaù pé é a-ô mã nghut kôle, nyi nyi keq.

¹⁵ Hkâsu mù gâ le, ge é hkyô kut é dông, byù nâ pé é a sé a dat é dang lé nungmoq lhoq zím pyám é gi, Garai Gasang ô nau é hkyô nghut lhê.

¹⁶ Lut bê bang dông nyi keq, nghut kôlhang, agè ashop é hkyô lé nghop pyám rà matú nungmoq é luthkyô lé hkâchúng kó; Garai

✠ 1:25 Esai 40:6-8 * 2:2 Woi-nyí eq sêng é jet é naú gâ é gi, Garai Gasâng é mungdang lé tai é nghut lhê. † 2:5 Woi-nyí eq sêng é yhúm gâ é gi, noqkuq hpúng lé tai nau é nghut lhê. ✠ 2:6 Esai 28:16 ‡ 2:7 Ahkyak é luqgok gâ é gi, Hkrisduq lé tai é nghut lhê. ✠ 2:7 Hkya-on 118:22 ✠ 2:8 Esai 8:14

Gasâng é dui-nhâng zoshâng wui dông nyi keq.

¹⁷ Yuq hkangmó lé rago za hkunggâ é hkyô shit keq; lumjing é gumang wui lé chyitdap keq; Garai Gasang lé gyuq hkunggâ nyi keq; hkoséng lé hkungga keq.

¹⁸ Dui-nhâng zoshâng wui é, hkungga myit banshoq eq, nungmoq é yhumsing wui é a-ô má nyi keq; ge é eq nú-nhâm bang é a-ô má za a nghut, byuwui pé é a-ô má lé nyi keq.

¹⁹ Hkâsu mù gà le, byu rayuq gi, Garai Gasang lé bûn nyi sù nghut é yanmai, mara dông a nghut kôhang, wuihke jamjau huí é hkyô lé hpuzó é lé, jân pyâm é nghut le gi, hkya-on gíng é sù nghut lhê.

²⁰ Nghut kôhang, nungmoq gi, mara kut shut é yanmai, nhuq bat é hkâm zo luí, haú lé jân nyi é nghut le gi, hai aróng wó kó rá lúhú? Nghut kôhang, nungmoq gi, ge é hkyô kut luí, wuihke huí zô é lé jân pyâm é nghut jáng, haú gi, Garai Gasâng hí má hkya-on gíng é hkyô nghut lhê.

²¹ Nungmoq gi, haú hkyo é matú ji yù huí é nghut lhê; haí mù gà le, Hkrisduq gi, nungmoq é matú wuihke hkyô huí é má, nungmoq lé alik dông tó to byi bê nghut mù, nungmoq gi, Yhâng é hkyi-kâm pé lé châng rà dut lhê.

²² "Yhang gi, hai mara le a kut shut, Yhâng é nhut mai mhaú é lé a myàng."²

²³ Yhang gi, rhoi é huí é hkûn, yhangmoq lé a dum tau rhoi; wuihke hkyô huí é hkûn, kyuq é dang a taí. Haú kut rá malaí, tengmán é dông jéyáng é Su chyáng, Yhânggùng lé ap pyâm ri.

²⁴ Nga-nhúng gi, yubak mara eq wó shi gang mù, dingmán hkyo é matú asak wó đủ kó sháng gaq ga, Yhang gi, sik zing má, Yhânggùng eq yhang, nga-nhúng é yubak mara lé Yhânggùng má wun pyâm byi bê nghut ri; Yhâng é ðam pé é yanmai, nungmoq gi, lhoq gè byí é hui bekô nghut ri.

²⁵ Hkâsu mù gà le, nungmoq gi, hkyô nghoq byuq é sau pé su dut wú kôhang, ahkuí, nungmoq gi, haú sau zúng Sù eq nungmoq é asak woi-nyí lé upzúng Su chyáng lhing tau lò bekô nghut ri.

3

Ikun Myhi Pé Eq Ikun Hpó Pé

¹ Ikun myhi pé é, haú eq rajung za, yhum-sing é ikun hpó uphkan é a-ô má nyi keq; haú hkûn, yhangmoq má é rayuq yuq, haú mungdang lé a lumjing kôhang,

² yhumsing é asak ðui hkyô má é sansêng é hkyô eq hkunggâ é hkyô lé myàng kôjáng, dang dông a nghut é za, yhâng é yhumsing myhi é nyi yap é sâmlai dông mai yhang lé wó lhoq lhiq yù rá nghut lhê.

³ Nungmoq yúng é hkyô gi, ahtoq pyâm za nghut é, xâmban nik é dông, hing zè mhôn chung é eq réng é mebu wut é dông mai lo é a ge nghut.

⁴ Hau é malaí, haú gi, Garai Gasâng é hí má gu bo é, nú-nhâm é eq zim za dut é woi-nyí, a dat hpoí é yúng hkyô nghut é nungmoq é i-myit unghkaú má é su é yúng hkyô sheq dut rá lhê.

⁵ Hkâsu mù gà le, gó hkûn, Garai Gasâng chyáng myit myoqbyù bang nghut é, chyoiyúng é myiwe wui gi, yhangmoq gùng lé haú dông mhôn yù yù kut kô é nghut lhê.

⁶ Sarah gi, Abraham é jino gyo luí, yhang lé yhâng é yhumsing ga wut é su, yhangmoq gi, ó le ô é yhumsing é ikun hpó uphkan é a-ô má nyi akô nghut ri. Nungmoq gi, jô é hkyô lé kut mù, gyuq é hkyô a bo é nghut jáng, Sarah é byizô pé nghut bê.

⁷ Ikun hpó pé é, haú eq rajung za, yhum-sing é ikun myhi eq rahá nyi yap e ló é hkûn, sê gyo byi mù, nungmoq htoq wum nyhôm é bang eq, nungmoq eq rahá asak jeju chyunghuq wunlí wó é bang dông, yhangmoq lé hkungga keq. Haú hkûn, nungmoq é kyúdung dang lé a he-ngik pyâm byi rá nghut lhê.

Ge É Kut Luí, Jamjau Hkam É Hkyô

⁸ Dang htâng sat é má, nungmoq banshoq bang gi, rayuq eq rayuq myit huí lhum nyi keq; myit wú nô mù, gumang nhiktang wui su chyitdap lhum nyi keq; shogyo nhikmyin myit bò luí, i-myit nyhum nyi keq.

⁹ Agè ashop é lé, agè ashop é dông lató a hpuq é eq rhoi é lé rhoi é dông lató a hpuq é za, shimân byi keq; haí mù gà le, nungmoq gi, haú pé é matú, shimân jeju muí wó hkam yù kó sháng gaq ga, ji yu é hui kô é ru nghut lhê.

¹⁰ Hkâsu mù gà le, "Asak ðui rá lé chyitdap é eq ge é buinyi pé lé myàng nau é sù ó yuq lé, yhâng é shô lé, agè ashop é mai, yhâng é nhutwui lé, mhaú dang taí é mai, lhoq kâng pyâm ra rá nghut lhê.

¹¹ Yhang gi, agè ashop hkyô mai lhing tau mù, ge é kut ra rá nghut lhê; yhang gi, nguingón simsaq hkyô lé hò mù, châng hkat nyi ra rá nghut lhê.

¹² Hkâsu mù gà le, haú Yhumsing é myoqjí gi, dingmán bang lé wú nyi é nghut luí, yhangmoq é kyúdung dang lé, Yhâng é nohkyap eq gyo byí ri;

nghut kôhang, haú Yhumsing é myoqdong gi, agè ashop hkyô kut bang lé gye dông myang pyâm ri."³

gâ tó ri.
¹³ Ge é hkyô lé, nungmoq gyai yhang kut nau nyi é nghut le gi, ó yuq wá nungmoq lé wó gunjang rá lúhú?

¹⁴ Nghut kôhlang, dîngmán hkyô é matú, nungmoq wuîhke jamjau huî le lháng, nungmoq gi, hkungsô wó nyi ri. "Yhangmoq gyuq é hkyô lé hkâgyuq kó; hkâgyuq dân kó."¹⁴

¹⁵ Nungmoq kúm gi, myit nhikhlum má, Hkrisduq lé, Yhumsing đông jowò byi keq. Nang wó é myit myoqbyu hkyô lé myí é sù yuq hkangmó lé, haî mù wó é hkyô tû tai kyo râ matú, ayang hen to aq. Nghut kôhlang, nú-nhâm é eq hkunggá é đông haû lé kut nyi aq;

¹⁶ nungmoq é unghkaû myit san za dut nyi keq, haû hkûn, Hkrisduq đông mai nungmoq wó é ge é a-kyang lé rhoi dang tai é bang gi, yhangmoq lumù gansang é yanmai hoq hpù é huî kó râ nghut lhê.

¹⁷ Garai Gasang ô nau é nghut le gi, agè ashop kut luî jamjau hkâm râ htoq má, ge é kut luî jamjau hkam le gi, je ge é nghut lhê.

¹⁸ Hkâsù mù gâ le, nungmoq lé Garai Gasang chyáng shuí jé shoq, Hkrisduq gi, byu pé é yubak marâ é yanmai, radâm za shí hkâm pyâm bê nghut ri; haû gi, dîngmán Sù, a dîngmán bâng é matú shí hkâm byí é nghut lhê. Yhang gi, gungdu hê bê nghut kôhlang, haû Woi-nyí má lhoq dui é huî bê nghut ri.

¹⁹ Yhang gi, Woi-nyí đông, htóng lúng tô é woi-nyí pé lé ê hko kyô ri.

²⁰ Woi-nyí haû pé gi, a-nham lé, Noaq é ipyat má wuî-sanghpo lé Noaq tsuq nyí é hkûn Garai Gasang myit hîng hîng láng nyí é u lé, jìno a gyô é bang nghut akô. Wuî-sanghpo má wàng mù, wuî mai hkyi yù huí é byù shau luí, shit yuq za nghut akô.

²¹ Wuî haû gi, ahkuî nungmoq lé le hkyi yu é nghut é baptisma é azông nghut ri; haû gi, gungdu má é agot a-ù lé huî sêng pyâm byí é a nghut é za, sansêng é unghkaû myit mai Garai Gasang é hí má gidìq tô é ru nghut lhê. Yesuq Hkrisduq é dum dui toq hkyô đông, nungmoq gi, baptisma hkâm yù luí, hkyi yu é huî kó é nghut lhê.

²² Yesuq Hkrisduq gi, mauhkung má doq ló luí, Garai Gasang é loqyò hkyam má nyi tô é nghut mù, maumang lagyò pé, ahkáng ayá pé eq a-tsam pé gi, Yhâng uphkang é a-ô má nghut nyi bum akô.

4

Garai Gasang É Matú Asak Dui Râ Hkyô

¹ Haû mù luí, Hkrisduq gi, Yhâng é gungdu má hpuzo bê nghut é yanmai, nungmoq le, Yhang i-myyit sâmlai hau eq yhumsing gung má gyehking đông wut to keq, haî mù gâ le, yhâng é gungdu má hpuzo bê sù gi, mara eq gang bê nghut ri.

² Haû nghut é yanmai, yhang gi, yhang nyi tùm tô é mingkan asak dui hkyô má, agè ashop é xângzo byù ô nau é đông a nghut é

za, Garai Gasang ô nau é đông asak dui é ru nghut lhê.

³ Hkâsù mù gâ le, nungmoq gi, lai lò bê ahkying má, a lumjing shí é byu pé hkyin kut nau é hkyô nghut é, shut é đông nyi zô lhum nau é i-myyit, agè ashop é yut yut ô nau é hkyô, î shuq wut é hkyô, zo yê shuq yê mù achag achyut kut é hkyô, ye lhai râ wut jung zoshuq lé yut yut ô nau é hkyô, achag achyut é hparâ noq hkyô pé má, ahkying luq shoq nyi lai lò bê bang nghut akô.

⁴ Nungmoq gi, ladu lai shoq achag achyut kut é hkyô má, yhangmoq eq rahá a bo châng kut wún lo kó é nghut mù, yhangmoq gi, maú byuq luí, nungmoq lé lumù gansang pyâm akô nghut ri.

⁵ Nghut kôhlang, yhangmoq gi, dui nyi é bang eq shí bê bang lé tará jéyáng râ ri ri nghut to Sù lé jihpán shit kyo ra kó râ nghut lhê.

⁶ Hau é yanmai, ahkuî shi byuq bê bang lé lháng gabú danglù hko kyô é huî bekô nghut lhê; haû gi, gungdu eq séng luí ga jang, yhangmoq gi, byù đông mai tará jéyáng é huî râ eq, woi-nyí eq séng luí ga jang, Garai Gasang đông mai asak wó dui râ matú nghut lhê.

⁷ Lhunglhang htum râ ahkying gi, chyáng bê nghut ri. Haû mù luí, nungmoq kyú wó dung kó sháng gaq, bûn gying luí, yhumsing gung yhumsing hkang nyi keq.

⁸ Banshoq htoq má ahkyak é gi, rayuq eq rayuq gyai yhang chyitdap lhum é hkyô nghut lhê, haî mù gâ le, chyitdap myit gi, yubak mara myo myo lé wó nghop pyâm é nghut lhê.

⁹ Rayuq eq rayuq, tai nyung nyâng é hkyô a bo é za, rago hkulum lum keq.

¹⁰ Yuq hkangmó gi, yhumsing wó hkam yù bê chyunghuq eq rajung za, góbang lé dojaú râ lhê; Garai Gasang jeju chyunghuq ajung jung lé, lhumzui é eq rago chung jai râ lhê.

¹¹ Rayuq yuq tai é nghut jáng, Garai Gasang é mungdang haû eq yhang rajung za tai ra râ nghut lhê. Garai Gasang gi, lhunglhang má Yesuq Hkrisduq é yanmai hkya-ôn é huî sháng gaq, rayuq yuq dojaú é nghut jáng, Garai Gasang byí é wum-ô eq dojaú ra râ nghut lhê. Haû hpung-wup shinggang eq a-tsam gi, Yesuq Hkrisduq chyáng pyat dedu ahtum abyuq joq nyi sháng gaq ô. Amen.

Hkristan Dut É Yanmai Jamjau Huî É Hkyô

¹² Chyitdap é luzúm wuî ê, wuîhke hkyô đông chyam é lé nungmoq hkâm zô nyi é hkûn, nungmoq chyáng maú nhô zâ é hkyô dut htoq bê đông, hkâgyuq dân kó.

¹³ Hkrisduq é jamjau hkyô pé lé bo huî zô é yanmai kúm gi, nungmoq gabú keq, haû

hkûn sheq, Yhang é hpungwup shing kang eq rahá Yhang htoq shit é hkûn, nungmoq gi, gabú dik é hui kó rá nghut lhê.

¹⁴ Hkrisduq é mying yanmai, nungmoq gi, rhoi é hui zô é nghut jáng, hkungso wó nyi ri; hkâsu mù gà le, hpungwup shing kang bo é Woi-nyí ngu é, Garai Gasang é Woi-nyí gi, nungmoq chyáng nyi nyi ri.

¹⁵ Nungmoq mã é rayuq yuq jamjau huí é nghut le gi, byu sat sù, hkau sù, gotú agê ashop kut sù, góbâng é mù má cháng gunjang sù đông jamjau huí é a dut sháng gaq.

¹⁶ Nghut kôhang, Hkristan rayuq đông nungmoq jamjau huí é nghut le gi, hkâhoq nyí kó, Garai Gasang lé kúm gi, mying hau é yanmai hkya-ôn nyi keq.

¹⁷ Hkâsu mù gà le, tará jéyáng rá ahkýing gi, jé bê nghut luí, Garai Gasang é ikon byu pé mai hí rá nghut lhê; haú gi, nga-nhúng mai hí é nghut jáng, Garai Gasang é gabú danglú lé a châng é bang gi, hkâsu wá dut lò rá nghut lhê lhú?

¹⁸ "Haú dingmán sù, hkyi yù hui rá wuí é nghut le gi, tará a hkunggá é eq yubak dap é sù gi, hkâsu wá dut rá nghut lhê lhú?"^{*}

gâ tô ri.

¹⁹ Haú nghut mù luí, Garai Gasang ô nau é đông jamjau huí é bang gi, yhumsing gùng lé, lhumzuí é Hpân Su chyáng ap byi mù, ge é lé xoq kut nyi rá rá nghut lhê.

5

Suwún Wuí Éq Zorâm Wuí

¹ Nungmoq mã é hpúng suwún wuí lé, ngò, nungmoq é byinzum suwún, Hkrisduq é jamjau hkyô pê é saksé nghut sù eq lhoq htoq shit rá nghut é Yhâng é hpungwup shing kang lé bo hkâm rá nghut sù đông mai sang kat kôlé:

² Nungmoq lé ap to bê nghut é Garai Gasang é sau hpúng* lé zúng rém bang dut mù, shuí u bang đông dojaú nyi keq; zúng rém é hkûn, a kut a ge luí kut é a nghut é za, Garai Gasang, nungmoq lé dut nhâng nau é su, yhumsing kâm é myit mai kut é nghut rá lhê; ngunzê lé a myoqnoq é za, shirông myit mai dojaú rá lhê.

³ Nungmoq é loq má ap byí to bê bang lé a up zô é za, yhangmoq é hí má alik dut nyi keq.

⁴ Haú jáng, Sau zúng Agyi mó[†] htoq shit é hkûn, nungmoq gi, hpungwup shing kang bo é, hkâ-nhâm le a shum a byuq é janmaú lé myang hap yù kó rá nghut lhê.

⁵ Zorâm wuí é, nungmoq le, nungmoq htoq ipyat ko bâng é a-ô má nyi keq. Nungmoq lhunglhâng bang gi, myit lhoq nyhum é

hkyô lé mebu su wut to mù, rayuq eq rayuq dojaú nyi keq, hkâsu mù gà le, "Garai Gasang gi, nghuthùn é bang lé hkûm zing pyám kôhang, myit lhoq nyhum é bang lé jeju byí ri."^{*}

ga tô ri.

⁶ Haú mù luí, ahkýing jé jáng Garai Gasang nungmoq lé waq toq sháng gaq, nungmoq gi, Yhâng é hpungwup a-tsam mó bo é loq hkaú má, yhumsing myit lé yhumsing lhoq nyhum nyi keq.

⁷ Nungmoq é myit chiq hkyô banshoq lé, Yhâng htoq má dú kê pyám to keq, haí mù gà le, Yhang gi, nungmoq é matú chiq byí nyi sù nghut lhê.

⁸ Yhumsing gùng lé yhumsing hkâng mù, machya nyi keq. Nungmoq é gye nghut é nat Tsadán hpó gi, rayuq yuq lé wó zô myui pyám shoq ga, mying wún é hkanghkyi su hkat gadaú jón wún ri.

⁹ Yhang lé htúq htíng pyám mù, lumjing myit má gingtíng nyi keq, haí mù gà le, mingkan gón mã é nungmoq é gumang wuí le, rajung zâ é jamjau hkyô pé hui zô nyi kô é lé, nungmoq sê lhê.

¹⁰ Haú mù, jeju banshoq é Garai Gasang gi, Hkrisduq má ahtum abyuq joq nyi é Yhâng é hpungwup shing kang matú nungmoq lé ji yù bê nghut luí, nungmoq razup zo jamjau huí é htâng má, Yhang yhang nungmoq lé gumjup nhâng mù, wum bô nhâng luí, ging ging tíng tíng dut nhâng rá nghut lhê.

¹¹ Haú hpungwup a-tsam banshoq gi, Yhâng chyáng pyat dedu ahtum abyuq rú joq nyí sháng gaq. Amen.

Ló Htâng É Shi-kyâm Dang

¹² Lhumzuí é gumang nghú ngò sôn yu é Sila eq garúm luí, ngò gi, nungmoq lé myit wum byi dang eq, myit wum byi dang haú pé gi, Garai Gasang é tengmán é jeju nghut é lé saksé hkâm é dang pé lé, tot za kâ kat é nghut lhê. Tengmán é jeju haú má yap ging nyi keq.

¹³ Babelon má nyi é, nungmoq eq rahá hkyin yù huí é Hpúng gi, nungmoq lé shi-kyâm kat ri; ngá zo đông nghut sù Markuq le, nungmoq lé shi-kyâm kat ri.

¹⁴ Rayuq eq rayuq, chyitdap bopuq puq é eq shi-kyâm lhum keq.

Nguingón hkyô gi, Hkrisduq má nghut nyi é nungmoq banshoq bâng chyáng ru joq nyí sháng gaq ô.

* 4:18 Sânghkyang 11:31 * 5:2 Sau hpúng gà é gi, lumjing bang lé gà lhê. † 5:4 Sau zúng Agyi mó gà é gi, Hkrisduq lé gà é nghut lhê. * 5:5 Sânghkyang 3:34

PETRUQ

Htang Dàm Hun Kat é Laiká (2 Peter)

¹ Yesuq Hkrisduq é dui-nhâng zoshâng eq lagyo nghut sù, ngò Simun Petruq gi, nga-nhùng é Garai Gasang eq hkyi yù Sù nghut é Yesuq Hkrisduq é ðingmân hkyô ðông, ngamoq su, hpaù dik é lumjing hkyô lé hap yù bê bâng chyáng dang kyô kat lhê.

² Garai Gasang eq nga-nhùng é Yhumsing Yesuq lé, nungmoq sê jat nyi é hkyô má, jeju eq nguôngón hkyô gi, nungmoq chyáng agùn agò ru joq nyi sháng gaq.

Ji Yu É Eq Hkyin Yu É Hkyô Lé Lhoq Ging Lhoq Ting Râ Hkyô

³ Yhâng é hpungwup shingkang eq ge é hkyô ðông nga-nhùng lé ji yù Sù lé nga-nhùng sê é ðông mai, Garai Gasang é hpungwup a-tsam gi, asak ðui hkyô eq tarâ hkungga hkyô é matú nga-nhùng rá é jung hkangmó lé byi bê nghut ri.

⁴ Háu pé ðông mai, Yhang gi, Yhâng é kô dik, hpaù dik é danggidíq pé nga-nhùng lé byi bê nghut ri; hau hkùn, nungmoq gi, hau danggidíq pé ðông mai, Garai é myit sâmlai lé wó bo hkam yù rá eq agê ashop hkyô lé yut yut ô nau é yanmai htoq lo é, mingkan má joq é htên byoq hkyô mai wó lut kô rá nghut lhê.

⁵ Háu é yanmai yhang, nungmoq gyai yhang shikut lui, nungmoq é lumjing hkyô má ge é hkyô lé jat yù keq; ge é hkyô má samsé hpaqchyí lé,

⁶ samsé hpaqchyí má yhumsing gùng yhumsing hkang é hkyô lé, yhumsing gùng yhumsing hkang é hkyô má jân shirang é hkyô lé, jân shirang é hkyô má tarâ hkunggá é hkyô lé,

⁷ tarâ hkunggá é hkyô má gumang chyitkâng myit lé, gumang chyitkâng myit má chyitdap myit lé, jat yù keq.

⁸ Hkâsu mù gâ le, hau pé lé nungmoq wó sing myô jat lo é nghut jáng, hau pé gi, nga-nhùng é Yhumsing Yesuq Hkrisduq lé nungmoq sê é hkyô má, nungmoq lé akôm a dut nhang é htoq agó, ashi a zui le dut nhâng rá a nghut.

⁹ Nghut kôlhâng, rayuq yuq gi, hau pé lé a wó é nghut jáng, chyâng é lé za myang é eq myoqjit é sù nghut lui, lai lò bê yhâng é yubak mara pé mai lhoq sanséng byi é lui bê hkyô lé, tô-myhí pyâm bê sù nghut ri.

¹⁰ Háu mù lui, ngá é gumang wui é, nungmoq lé ji yù é hkyô eq hkyin yu é hkyô lé, je riyhang lhoq gingting nyi keq. Hkâsu mù gâ le, hau hkyô pé lé nungmoq kut nyi é nghut

jáng, hkâ-nhám le nungmoq myit leqbat kô rá a nghut;

¹¹ hau htoq agó, nga-nhùng é Yhumsing eq hkyi yù Sù nghut é Yesuq Hkrisduq é ahtum abyuq é mingdân má agùn agó lhom pang yu é lé, nungmoq myang hap yù kô rá nghut lhê.

Chyúmdang Mã É Myiqhtoi Dang

¹² Háu mù lui, nungmoq gi, hau pé lé sé kô é htoq agó, nungmoq wó tô é tengmân hkyô má gingting nyi kô é nghut kôlhâng, ngò, nungmoq lé hkâ-nhám le hau pé lé ru lhoq pùn nyi rá nghut lhê.

¹³ Shí gungdu má ngò rù ðui nyi nyi gi, nungmoq lé lhoq pùn kying byi le ge ri nghù, ngò wó myit ri;

¹⁴ hau mù gâ le, nga-nhùng é Yhumsing Yesuq Hkrisduq gi, ngo lé san za sé nhâng bê eq rajung za, hkâ-myhâng a myang má, ngò gi, gungdu shi lé tô pyâm to rá nghut é lé sé lhê.

¹⁵ Ngò htoq ló byuq é htâng má, nungmoq, hkâ-nhám le hau pé lé ru wó bân nyi rá lé myang naù mù, ngò, wó dut é í shikut nyi rá nghut lhê.

¹⁶ Nga-nhùng é Yhumsing Yesuq Hkrisduq é a-tsam eq lé lo é hkyô eq séng lui, nungmoq lé ngamoq tai kyô wú é hkùn, ngamoq gi, kut htoq yu é labyoq mhô-myi lé a châng é za, Yhâng é kô làm hkikkhâm hkyô lé myoq eq myang é saksé pé nghut lhê.

¹⁷ Hkâsu mù gâ le, hau Kô Làm Hkikkhâm Hkyô é Hpungwup Shingkang mai, "Shí yuq gi, Ngò chyitdap é Ngá zo nghut lhê; Yhang má Ngò nhik dik nyi lhê."^{*} ga tai é htê, Yhâng chyáng jé é hkùn, hau Íwa Garai Gasang chyáng mã é aróng eq hpungwup shingkang lé Yhang wó hap yù bê nghut ri.

¹⁸ Ngamoq yhang, chyoiyung bùm má Yhang eq rahá nyi tô é hkùn, htê hau mauhkung mai htoq lo é lé wó gyô é nghut lhê.

¹⁹ Háu mù lui, myiqhtoi pé dang lé je lhoq ging bê hkyô, ngamoq wó é nghut lhê; hau mù, maubó lô lui, nungmoq é myit má bó-myhú htoq lo é hkùn jé shoq, mauchut tuq dut é jowò má duq nyi é myibung lé su, myiqhtoi dang hau lé, nungmoq gyo mù rago châng kut rá dut lhê.

²⁰ Banshoq htoq má, Chyúmdang mã é myiqhtoi dang gi, hau myiqhtoi pé mai ó le ó lichyúm lhoq htoq yu é ðông a nghut é lé, nungmoq sê tô rá dut lhê.

²¹ Hkâsu mù gâ le, myiqhtoi dang gi, byù ô nau é ðông hkâ-nhám lé a htoq wú é za, hau Chyoiyung Woi-nyi eq shui u huí é bang mai, Garai Gasang chyáng mã é dang tai é ru nghut lhê.

* 1:17 Mht 17:5; Mrk 9:7; Luk 9:35

2

Sará Apyoq Pé É Hkyô

1 Nghut kôlhang, myiqhtoi pyoq pé gi, Israellaq byù háu bâng é ahkaú má nyi wú bê nghut lhê, háu eq rajung za, nungmoq é ahkaú má lê sará apyoq pé nyi rá za nghut lhê. Yhangmoq gi, htên byoq hkyô nghut é byoq gang rá mhoqshit hkyô pé lé, haq lhoq pyo é htoq agó, yhangmoq lé wui yu é, Yhumsing lé lhang he-ngik pyám kó rá nghut lhê. Háu mù, yhangmoq gi, yhumsing gùng yhumsing byòdàn tung htên byoq hkyô je nhâng bekô rá nghut lhê.

2 Byù myo myo gi, háu bâng é ahoq ahí hkyô má cháng kó rá eq, tengmán hkyô lé tai hpói pyám nhâng kó rá nghut lhê.

3 Sará apyoq háu bang gi, yhangmoq myoqnoq é hkyô má, yhangmoq kut htoq tô é mhô-myi đông nungmoq lé mhaú zo kó rá nghut lhê. Yhangmoq lé mara dam byi hkyô gi, gohkún mai yhangmoq ahtoq má lhang to gù bê nghut é htoq agó, yhangmoq é htên byoq hkyô gi, yhup myhi tô nyi é a nghut.

4 Hkâsu mù gá le, Garai Gasang gi, mara kut shut é maumâng pé lé lhang a ha bún é za, ngarai ming má hkyô pyám luí, tará jéyáng é hui rá hkún je shoq, yhangmoq lé tuq tuq chut é dong hkaú má kat tô é nghut lhê.

5 Yhang gi, tará a hkunggá é byu pé lé dowuí ting é hkún, gohkun lhê é mingkan lé a ha bun nghut ri, nghut kôlhang, dingmán é hkyô lé hko kyô é sú Noaq eq gotú nyhit yuq lé hung yu é nghut ri;

6 Yhang gi, Sodom eq Gomoraq myuq lé, myi-mhop dut shoq nyhê hkyô pyám é đông mara dam byi luí, tará a hkungga bâng chyáng dut lò rá hkyô é azòng kut tô é nghut ri;

7 nghut kôlhang, tará a chùng bâng é ahaq achyut asak dui hkyo é yanmai myit wui myit hke hui é, háu dingmán sù Lot lé hkyi htoq yu é nghut ri;

8 (hkâsu mù gá le, dingmán sù háu gi, nyi hkangmó yhangmoq ahkaú má nyi nyi é nghut luí, tará a chùng é muzó hkyô lé, yhang wó myâng wó gyô é yanmai, yhang é dingmán myit má gunjâng é hui sù nghut ri.)

9 Háu su nghut é nghut jáng, Yhumsing gi, tará hkunggá é byu pé lé, wuihke hkyô mai hkâsu kut hkyi htoq yu rá eq, a dingmán é bang lé, tará jéyáng é buinyi je shoq, dam byi é hkyô lé xoq kut nyi é u má hkâsu kut zui zing to rá lé sê lhê.

10 Háu yubak gungshô é htên byoq sê é yut yut ô nau hkyô cháng é eq ahko ahkáng lé wú tiq bâng chyáng, háu hkyô hkyak dut rá nghut lhê.

Byù háu bang gi, ngegáng-htu é eq nghutbún é bang nghut kôluí, mauhkung

bang lé lumù gansâng rá lé a gyuq kó nghut ri;

11 nghut kôlhang, maumang lagyô pé lhang gi, wum je bo é eq a-tsam je bo é nghut kôle, háu Yhumsing é hí má, háu mauhkung bang lé mara hun é đông lumù gansâng hkyô a wám kut kó nghut ri.

12 Nghut kôlhang, háu sará apyoq pé gi, yhumsing a sê gyô é hkyô pé lé rhoi dang tai akô. Yhangmoq gi, háu yut yu é hui luí, lhoq htên pyám é hui rá matú za hku lé lo é, nhik a bo é tân jung dusak đông nghut akô; dusak háu pé su, yhangmoq le, htên byoq byuq kó rá nghut lhê.

13 Yhangmoq gi, nò shoq kut bekô nghut é yanmai, nò shoq kut é hui zo kó rá nghut lhê. Yhangmoq é ngón kún nau é myit gi, nyi mó káng lé lhang gungsho yut yut ô nau hkyô lhoq dik rá matú nghut ri. Yhangmoq gi, nungmoq eq rahá zoshuq pói kut kô é hkún, mhaú é lé yhangmoq é ngón hkyô kut kômù, agé agaú é eq ahaq achyut é bang nghut akô.

14 Yhangmoq é myoqjí pé má gi, su-myi sulàng lú hkyô bying zan to kômù, mara kut é hkyô lé hkâ-nhám le a hkying kó nghut ri; yhangmoq gi, a gingting é bang lé mhoq hpyoq yu akô; yhangmoq gi, myoqnoq é hkyô má kung é bang nghut kômù, nhing pyám é hui bang nghut akô.

15 Yhangmoq gi, háu dítg é hkyô lé tô pyám to kômù, Beora é yhangzo nghut é, agé ashop hkyo é ahpau lé chyitdap sù Balam é hkyô má châng yông wún bekô nghut ri.

16 Nghut kôlhang, Balam gi, yhang kut shut é hkyo é yanmai, logúng eq tân mhoqshit é hui ri; dang a dat nyo é logúng háu gi, byu é htê đông dang tai lò mù, myiqhtoi hpó a gyíng é hkyô lé hkúm tang pyám ri.

17 Byù hau bang gi, wui a bo é wuihtung eq, laidún eq mut tâng ló é ngansoq eq púng kômù, yhangmoq é matú gi, tuq tuq chut é mauchut hkaú lé lajang to bê nghut ri.

18 Hkâsu mù gá le, yhangmoq gi, asôm gyáng dang lé tai mù, yubak gungshô é yut yut ô nau é hkyô đông mai, háu shut shai é hkyô má asak dui nyi é mai asik za hpang htoq lo é bang lé, mhoq hpyoq yu akô nghut ri.

19 Yhangmoq gi, háu bang lé luthkyô byi rá gidiq byi kô é nghut kôle, yhangmoq gùng gi, htên byoq hkyô lhoq htoq é gungsho yut yut ô nau hkyo é jùn dut nyi akô; hai mù gá le, byù rayuq gi, yhumsing lé hai eq up sing le, hai é jùn nghut lhê.

20 Byu pé gi, nga-nhùng é Yhumsing eq hkyi yù Sù nghut é Yesuq Hkrisduq lé sê é đông mai, mingkân é agé ashop hkyô mai wó hpang lut htoq bê nghut kôle, yhangmoq lé hau eq tuí yup tô é dum hui luí, ung pyám é hui kô é nghut jáng, yhangmoq é matú, hí lhê htoq má je wui byuq kó rá nghut lhê.

²¹ Haú dingmán é hkyô lé yhangmoq sé luí, yhangmoq lé ap byí to bê nghut é chyoyúng hkunmó lé tô pyâm to mù lhang taú ló byuq kô é htoq má, haú hkyô lé a sé é gi, yhangmoq é matú je gô rá nghut lhê.

²² "Hkuí gi, yhang hpat tô é lé dum taú zô lhê." gâ é eq, "Waq gi, chí pyám byí é htâng, yhâng é galhu htum má dum taú lhú lhê."^{*} gâ é sanghkyang gi, yhangmoq chyáng dik bê nghut ri.

3

Haú Yhumsing Jé Lé Râ Buinyi

¹ Chyitdap é luzúm wuí é, shí gi, nungmoq lé ngò í dá nghú rá dâm ká byí kat é laiká nghut lhê. Laiká shí í lhum má, nungmoq é sanséng é i-myt lé lhoq toq rá matú tai pún kat é laiká nghut lhê.

² Haú gi, chyoyúng myiqhtoí pé mai lai lô bê hkún tai tô é dang pé eq, nga-nhúng é Yhumsing eq hkyi yú Sú mai, nungmoq é lagyô pé dng byí to bê nghut é hkunmó lé, ngò, nungmoq lé bun nhâng nau luí nghut lhê.

³ Sâng-hi má, ló htâng é buinyi pé má yhumsing é agé ashop ô nau hkyô má cháng luí tai hpoi bang htoq lô rá nghut é lé, nungmoq sé gyô to ra rá nghut lhê.

⁴ Haú bang gi, "'Dum jé lé rá' ga Yhang gidíq byí é gi, hkámá lhú? Nga-nhúng é ichyí iwá pé gi, shí byuq ló bekô nghut mù, junghkang jungmó gi, mau htoq xâng hkun mai dut é su roq dut nyi ri." ga tai kó rá nghut lhê.

⁵ Nghut kôlhang, yhangmoq gi, a-nham lé, Garai Gasâng é hkunmó mai, mauhkúng pé joq é eq, myigùng gi, wuí mai dut htoq nhâng mù, wuí dng hpan tô é hkyô lé, a sé gún kut pyâm akô nghut ri.

⁶ Wuí hau eq sheq, haú hkun lhê é mingkan lé dowuí tng mù, lhoq htên pyâm é nghut lhê.

⁷ Ahkui lhê é mauhkúng pé eq myigùng lé gi, tará a hkungga bang htên byoq hui rá nghut é, tará jéyáng é buinyi jé shoq, myi má nyhê rá matú, hkunmó hau eq Yhang hkong to bê nghut ri.

⁸ Nghut kôlhang, chyitdap é luzúm wuí é, haú Yhumsing é hí má, ra-nyí gi, zanwut rahkyng dng, zanwut rahkyng gi, ra-nyí dng nghut é hkyô shí lé, hkátô-myí kó.

⁹ Haú Yhumsing gi, Yhâng é danggidíq lé hân a lhoq dik ga byú ra-am myit ngam pyâm é su, nyhâm é Sú a nghut. Yhang gi, ó yuq le htên byoq byuq rá lé a ô nau é yanmai, yuq hkangmó myit lhang rá lé za ô nau mù, nungmoq lé myit hng byí nyi é nghut lhê.

¹⁰ Nghut kôlhang, haú Yhumsing é buinyi gi, hkau sú su a bñn nùng má jé rá nghut

lhê. Haú buinyi má, mauhkúng pé gi, mying hum htê eq byuq byuq rá nghut lhê; duqbó-gùng pé gi, myí eq lhoq htên pyâm é hui luí, myigùng eq haú má é joq mijoq gi, nyé gyô byuq rá nghut lhê.

¹¹⁻¹² Joq mijoq gi, haú hkyô dng lhoq htên pyâm é hui rá nghut é yanmai, nungmoq gi, hkású é byu pé dut ra rá lhú? Nungmoq gi, haú Garai Gasâng é buinyi lé ho nyi é eq buinyi hau hân za jé rá lé ô nau nyi é hkún, chyoyúng é eq tará hkunggâ é asak dui hkyô dng nyi ra rá nghut lhê. Buinyi hau gi, mauhkúng pé lé, myí eq lhoq htên pyâm luí, duqbó-gùng pé le, lúm nyé luí, nyé yui pyâm é buinyi dut rá nghut lhê.

¹³ Nghut kôlhang, nga-nhúng gi, Garai é danggidíq nghut é, dingmán hkyô é yhúm, mauhkúng asik eq myigùng asik lé, myoqbyu nyi é bang nghut lhê.

¹⁴ Haú nghut mù luí, chyitdap é luzúm wuí é, nungmoq gi, haú hkyô lé myoqbyu é bang nghut kô é yanmai, Yhang é hí má achag achyt a dut é eq mara hùn rá hkyô a bo é za, Yhang eq nguínón nyí rá hkyô lé gyai yhang shikut nyi keq.

¹⁵ Nga-nhúng é chyitdap gumang Poluq gi, yhang lé, Garai Gasang byí tô é hpaqchyí byéng-yá eq, nungmoq chyáng ká byi bê eq rajung za, nga-nhúng é Yhumsing é myit hng hkyô gi, hkyi yú hkyô nghut é lé matsing to keq.

¹⁶ Poluq gi, yhang ká é laiká pé banshoq má, haú hkyô pé eq séng luí rajung za ká shit tô ri. Yhang é laiká hkaú pé má, ram gi, sé gyo wuí é hkyô pé bo é yanmai, a mhoq wú é bang eq a gingtng é bang gi, gotú Chyúmdang pé lé lichyúm htaí lhik pyám kô é su, yhangmoq lichyúm htaí lhik pyám kômù, yhumsing htên byoq hkyô kut yu nyi akô nghut ri.

¹⁷ Haú mù luí, chyitdap é luzúm wuí é, nungmoq gi, shí hkyô lé sê to gù nghut é yanmai, tará a chùng bâng é shut shai hkyo eq nungmoq lé a wó shuí nghoq yú rá eq, nungmoq é gaú é jowò mai a wó byit gyô byuq sháng gaq, yhumsing gùng yhumsing upzúng nyí keq.

¹⁸ Nga-nhúng é Yhumsing eq hkyi yú Sú nghut é Yesuq Hkrisduq é jeju eq hpaqchyí hkyô má, nungmoq kô myhang lò kó sháng gaq. Hpungwup shngkang gi, Yesuq Hkrisduq chyáng, ahkuí le, ahtum abyuq le, ru joq nyí sháng gaq ô! Amen.

* 2:22 Sânghkyang 26:11

2

YOHAN Hĩ Dàm Hun Kat é Laiká (1 John)

Asak Mungdang

¹ Ngò gi, haù sâng-hi mai joq nyi mù, ngamoq wó gyô wú bê é, ngamoq é myoq eq myang wú bê é, ngamoq rago za wú wú bê é, ngamoq é loq eq záng wú bê é, asak mungdang eq sêng é hkyô lé, nungmoq lé tai kyô kat lhê.

² Asak haù gi, htoq shit bê nghut mù, ngamoq gi, haù lé myang wú luí, saksé hkám bê; haù Iwa eq rahá nyi wú é, ngamoq chyáng htoq shit bê nghut é ahtum abyuq é asak haù lé nungmoq lé tai kyô lhê.

³ Ngamoq eq zùm yap é hkyô lé, nungmoq le wó sháng gaq nghũ, ngamoq gi, myang wú bê eq wó gyô wú bê hkyô lé, nungmoq lé tai kyô lhê. Ngamoq gi, haù Iwa eq le, Yhâng zo Yesuq Hkrisduq eq le, zùm yap nyi é bang nghut lhê.

⁴ Ngamoq é gabú hkyô byíng Jup sháng gaq nghũ, ngamoq gi, nungmoq lé shí hkyô ká byí kat lhê.

Maubó Hkaù Má Sô Nyi Râ Hkyô

⁵ Garai Gasang gi, maubó nghut lhê; Yhâng chyáng mauchut ratsuí lháng a bò nghut ri. Shí hkyô gi, Yhangzô chyáng mai ngamoq wó gyô yù luí, nungmoq lé tai kyô é danglũ nghut lhê.

⁶ Nga-nhúng gi, Yhang eq zùm yap nyi lhê nghũ tai kólhang, mauchut hkaù má ru sô nyi bum é nghut jáng, nga-nhúng gi, mhaù é bang dut mù, haù tengmán hkyô đông asak a duí é bang nghut ri.

⁷ Nghut kólhang, Yhang gi, maubó má nghut nyi é eq rajung za, nga-nhúng le haù maubó má sô nyi é nghut le gi, nga-nhúng rayuq eq rayuq zùm yap nyi bê nghut luí, Yhang zo Yesuq é sui gi, nga-nhúng é mara banshoq lé lhoq sân-yúng pyám byi rá nghut lhê.

⁸ Mara a bò nghũ nga-nhúng tai é nghut le gi, yhumsing gũng yhumsing mhaù pyám luí, haù tengmán hkyô gi, nga-nhúng chyáng a bò nghut ri.

⁹ Nghut kólhang, nga-nhúng gi, yhumsing é mara lé yin yu é nghut jáng, Yhang gi, wó lum é sù eq tengmán é sù nghut é yanmai, nga-nhúng é mara lé hkyut pyám byi luí, a dǐng a mǎn é hkyô banshoq mai le, nga-nhúng lé lhoq sân-yúng byi rá nghut lhê.

¹⁰ Nga-nhúng gi, mara a kut shut nghũ tai é nghut jáng, nga-nhúng mai Yhang lé mhaù sũ nghũ chyô pyám é nghut luí, Yhâng é mungdang gi, nga-nhúng má a bò nghut ri.

Hkrisduq Gi, Nga-nhúng Lé Garúm Sũ

¹ Ngò chyitdap é zo wuê ê, ngò gi, nungmoq mara a kut shut kó sháng gaq nghũ, nungmoq lé shí hkyô ká byí kat lhê. Nghut kólhang, rayuq yuq mara kut shut é nghut le gi, nga-nhúng é matú haù Iwâ chyáng bo tai xoq byí é, Yesuq Hkrisduq gá é Dingmán Sũ lé, nga-nhúng wó lhê.

² Yhang gi, nga-nhúng é yubak mará é matú, shíhtai gunglik hkungga nghut nyi ri. Nga-nhúng é yubak mará é matú baù za a nghut, mingkan gón mã é byu pè é yubak mará é matú le nghut nyi ri.

³ Nga-nhúng gi, Yhang hkyô tô é hkunmó pé lé châng kut é nghut jáng, Yhang lé nga-nhúng rago sé bê nghut é hkyô lé, wó sé bê nghut ri.

⁴ Byù rayuq yuq mai, "Ngò gi, Yhang lé rago sê lhê." ga tai kólhang, Yhang hkyô tô é hkunmó lé a châng kut é nghut jáng, haù yuq gi, byù mhaù nghut luí, tengmán hkyô gi, yhang má a bò nghut ri.

⁵ Ó yuq nghut kólhang, Garai Gasâng é mungdang lé châng kut nyi é nghut jáng, Yhang lé chyitdap é myit gi, haù yuq má gè gè byíng Jup bê nghut ri.

⁶ Yhang má asak duí nyi lhê ga tai é sũ ó yuq nghut kólhang, Yesuq kut bê eq rajung za, châng kut rá lhê. Haù hkũn sheq, nga-nhúng gi, Yhang má nghut nyi bê hkyô lé, wó sê lhê.

Hkunmó Asik

⁷ Chyitdap é luzùm wuê ê, ngò gi, nungmoq lé hkunmó asik ká byí kat é a nghut é za, haù sâng-hi mai nungmoq wó to bê hkunmó axau sheq ru nghut lhê. Hkunmó axau shí gi, nungmoq wó gyô wú bê mungdang nghut nyi ri.

⁸ Nghut kólhang, ngò gi, nungmoq lé hkunmó asik ká byí kat lhê; hau é tengmán hkyô lé, Yhang má le, nungmoq má le, byu myàng ri; hkâsu mù gâ le, haù mauchut gi, lai ló byuq luí, haù tengmán é maubó gi, duq nyi gũ bê nghut ri.

⁹ Ngò gi, maubó hkaù má nghut nyi lhê ga luí, yhumsing é gumang lé a jú é sũ ó yuq nghut kólhang, haù mauchut hkaù má ru nghut nyi ashí.

¹⁰ Yhumsing é gumang lé chyitdap é sũ ó yuq nghut kólhang, haù maubó má asak duí nyi é nghut mù luí, yhang má myit leqbat nháng rá hkyô hai le a bò nghut ri.

¹¹ Nghut kólhang, yhumsing é gumang lé a jú é sũ kúm gi, haù mauchut hkaù má nghut nyi luí, haù má sô lhing jon wuq ri; haù mauchut gi, yhang lé myoq lhoq chit to byí é yanmai, yhang gi, hká shut e ló nyi é hkyô lé a sé nghut ri.

¹² Chyitdap é zo wuê ê, Yhâng mying é yanmai, nungmoq é mara pé hkyut pyám

byi hui bekô nghut lui, nungmoq lé ngò kâ kat é nghut lhê.

13 Íwâ pé é, nungmoq gi, haù sâng-hi mai nyi é Sù lé sé bekô nghut é yanmai, nungmoq lé ngò kâ kat é nghut lhê.

Zorâm wui ê, nungmoq gi, haù agê ashop sù lé ùng pyám bekô nghut é yanmai, nungmoq lé ngò kâ kat é nghut lhê.

Chyitdap é zo wui ê, nungmoq gi, haù Íwâ lé sé bekô nghut é yanmai, nungmoq lé ngò kâ kat é nghut lhê.

14 Íwâ pé é, nungmoq gi, haù sâng-hi mai nyi é sù lé sé bekô nghut é yanmai, nungmoq lé ngò kâ kat é nghut lhê.

Zorâm wui ê, nungmoq gi, wum-o bo é eq, haù Garai Gasâng é mungdang nungmoq chyáng dui nyi é nghut mù, haù agê ashop sù lé ung pyám bekô nghut é yanmai, nungmoq lé ngò kâ kat é nghut lhê.

Mingkan Lé A Chyitdap Râ Hkyô

15 Mingkan eq mingkan htoq mã é haì le lé, hkáchyitdap kó. Byù rayuq yuq, mingkan lé chyitdap é nghut le gi, haù Íwâ lé chyitdap é myit, yhâng chyáng a bò nghut ri.

16 Hkâsu mù gâ le, mingkan htoq mã joq é lhunglhang gi, gungsho ô nau é hkyô, myoqjí yut yut ô nau é hkyô, yhumsing wó é eq kut é hkyô lé gumrong é pé chyat nghut ri. Haù gi, Íwâ chyáng mai htoq lo é a nghut, haù mingkan mai htoq lo é ru nghut lhê.

17 Mingkan eq mingkan ô nau hkyô pé gi, lai ló byuq râ nghut lhê; nghut kôlhang, haù Garai Gasang ô nau é hkyô lé kut é sù gi, ahtum abyuq dui nyi râ nghut lhê.

Hkrisduq É Gye Pé

18 Chyitdap é zo wui ê, shí gi, ló htâng é ahkyíng nghut bê; haù anti-hkrisduq* gi, lé lo nyi ri gâ é lé, nungmoq wó gyô wú bê eq rajung za, ahkuí lhâng, anti-hkrisduq myo myo gi, jé lé bekô nghut ri. Hau é yanmai, nga-nhúng gi, ló htâng é ahkyíng nghut bê hkyô lé wó sé bê nghut ri.

19 Yhangmoq gi, nga-nhúng é hpúng mai htoq ló byuq bê bang nghut kôle, gè gè ga jang, nga-nhúng eq a sêng é bang nghut akó. Hkâsu mù gâ le, nga-nhúng eq sêng é nghut jáng, yhangmoq gi, nga-nhúng eq nyi to râ nghut lhê, nghut kôlhang, yhangmoq htoq ló byuq bekô nghut é yanmai, yhangmoq rayuq lhâng nga-nhúng eq a sêng é hkyô lé tún shit bê nghut ri.

20 Nghut kôlhang, nungmoq gi, haù Chyoiyúng Sù mai xù but byí é hui[†] bekô nghut mù lui, nungmoq banshoq bang haù tengmán hkyô lé sé akó nghut ri.

21 Haù tengmán hkyô lé nungmoq a sé kôlui, nungmoq lé ngò kâ kat é a nghut; haù hkyô lé nungmoq sé gù nghut lui le, haù mhaù é hkyô gi, tengmán hkyô mai lo é a nghut é lé nungmoq sé gù nghut lui le, nungmoq lé ngò kâ kat é nghut lhê.

22 Mhaù é sù gi, ó yuq nghut lhê lhu? Haù Yesuq gi, Hkrisduq a nghut ga he pyám é sù nghut ri. Haù Íwâ eq Yhangzo lé he-ngik é sù gi, anti-hkrisduq yhang nghut nyi ri.

23 Haù Yhangzo lé he-ngik sù ó yuq nghut kôle, haù Íwâ lé sé sù a nghut. Haù Yhangzo lé hap yu é sù kúm gi, haù Íwâ lé le sé bê sù nghut lhê.

24 Haù sâng-hi mai nungmoq wó gyô wú bê é hkyô pé lé, nungmoq i-myt má ru bo nyi keq. Haù nghut jáng, nungmoq gi, haù Yhangzo eq Íwâ chyáng nyi nyi râ nghut lhê.

25 Haù gi, nga-nhúng lé Yhang byí tô é ahtum abyuq é asak wó yù râ gâ é danggidiq nghut ri.

26 Ngò gi, nungmoq lé hkyô shuí nghoq shikut nyi bâng é hkyô eq sêng lui, nungmoq lé shí gù kâ kat é nghut lhê.

27 Nungmoq chyáng kúm gi, Yhâng chyáng mai xù but jeju lé nungmoq wó yù bekô nghut mù lui, mhoqshit râ góyúq a ra lo nghut ri. Nghut kôlhang, haù Yhâng é xù but jeju gi, hkyô hkangmó mã nungmoq lé mhoqshit byi mù, haù gi, tengmán nyi é nghut lui, mhaù é hkyô haì le a bo é za, nungmoq lé mhoqshit byi nyi é eq rajung za, Yhâng chyáng nungmoq nyi nyi keq.

28 Chyitdap é zo wui ê, nga-nhúng gi, Yhang jé lé mù htoq shit é hkùn, Yhâng é hí má a gyuq a kyum é, hoq a hpu é, wó dut râ matú Yhâng chyáng ru nyi nyi keq.

29 Yhang gi, dingmán sù nghut é lé, nungmoq sé bê yanmai, dingmán hkyô lé kut é sù ó yuq nghut kôle, Garai Gasang mai hkù kat é sù nghut é hkyô lé, nungmoq sé akó nghut ri.

3

Garai Gasâng É Yhangzô Pé

1 Nga-nhúng gi, haù Garai Gasâng é yhangzô pé ga wut râ hui bê nghut é yanmai, haù Íwâ é chyitdap myit gi, nga-nhúng ahtoq mã hkâ-í yhang ko nyi ri myhi-nhung! Nga-nhúng gi, yhangzô pé yhang nghut bu-nhung! Mingkan gi, Yhang lé a sé é yanmai, nga-nhúng lé le a sé nghut ri.

2 Chyitdap é luzúm wui ê, ahkuí, nga-nhúng gi, Garai Gasâng é yhangzô pé nghut nyi to kôlhang, nga-nhúng hkâsu dut râ hkyô lé, a tún shit shí nghut ri. Nghut kôlhang, Hkrisduq htoq shit é hkùn, nga-nhúng gi, Yhang su dut râ nghut é hkyô lé, nga-nhúng

* 2:18 Anti-hkrisduq ngù é lichyúm gi, Hkrisduq lé gye kut é sù lé gâ lhê

† 2:20 Xù but byí é hui gâ é lichyúm gi, Hkrisduq chyáng mai, Chyoiyúng Woi-nyí lé myang hap yu é lé gâ lhê.

sê lhê; hkâsu mù gà le, Yhang hkâsu nghut é hkyô lé roq yhang, nga-nhúng myàng rà nghut lhê.

³ Myit myoqbyù hkyô shì lé, Yhâng chyáng má wó tô é bang ó yuq nghut kôle, Yhang sán-yúng é eq rajung za, yhumsing gùng lé lhoq san lhoq yúng nyi ri.

⁴ Mara kut é sù ó yuq nghut kôle, tarâ lu lai é sù nghut ri; gè gè ga jang, mara gi, tarâ lu lai é hkyô nghut nyi ri.

⁵ Nghut kôlhang, Yhang gi, nga-nhúng é yubak mara lé hkyut pyám byi rà matú, pô htoq bê hkyô lé nungmoq sé akò; Yhâng chyáng mara a bò nghut ri.

⁶ Yhang má dui nyi é sù ó yuq nghut kôle, mara a xoq kut nyi nghut ri; mara xoq kut nyi sù ó yuq nghut kôle, Yhang lé a myàng, a sé shi nghut ri.

⁷ Chyitdap é zo wui ê, nungmoq lé ó yuq eq le hkyô a shuí ngoq kó sháng gaq; Yhang gi, dingmán é eq rajung za, dingmán é hkyô lé kut é sù ó yuq nghut kôle, dingmán nyi ri.

⁸ Mara kut nyi é sù gi, nat Tsadán chyáng mã é nghut nyi ri; hkâsu mù gà le, Tsadán haù gi, sâng-hi mai yhang mara kut nyi bê nghut ri. Haù Garai Gasâng é Yhangzo gi, Tsadán é muzó lé lhoq hpyoq lhoq hten rà matú pô htoq le é nghut lhê.

⁹ Garai Gasâng chyáng mai hku kat é sù ó yuq nghut kôle, Yhâng é amyui bo to é nghut é yanmai, mara a xoq kut lo nghut ri; haù yuq gi, Garai Gasang chyáng mai hku kat é hui bê nghut é yanmai, mara wó xoq kut lo rà a nghut.

¹⁰ Ó yuq nghut kôle, dingmán é hkyô a kut é eq, yhâng gumang lé a chyitdap é sù gi, Garai Gasâng yhangzo a nghut. Hau é yanmai, ó pé gi, Garai Gasâng é yhangzô pé nghut é, ó pé gi, nat Tsadán é yhangzô pé nghut é hkyô lé, san za nga-nhúng wó sé yu ri.

Rayuq Eq Rayuq Chyitdap Lhum Râ Hkyô

¹¹ Nga-nhúng rayuq eq rayuq chyitdap lhum rà lhê gà é hkyô haù gi, sâng-hi mai nungmoq wó gyô yù bê danglù nghut ri.

¹² Haù agè ashop sù eq le sêng é, yhanggu lé sat pyám é Ka-in su a ge kut. Yhang gi, haù mù luí yhanggu lé sat pyám lhê lhú ga le, yhâng é muzó pé gi, agè ashop hkyô, yhanggu é muzó pé gi, dingmán é hkyô nghut é yanmai nghut ri. *

¹³ Ngá é gumang wui ê, nungmoq lé mingkân eq a ngui a jú kut kôlhang, hkâmaù kó.

¹⁴ Nga-nhúng gi, nga-nhúng é gumang wui lé chyitdap é yanmai, shi byuq é mai wó lut luí asak dui é hkyô lé, wó sé é nghut lhê. Chyitdap myit a bò sù gi, shi é hkyô má lúng tô ashí nghut ri.

¹⁵ Yhâng é gumang lé a ngui a jú é sù gi, byù sat sù dut rà nghut lhê; byù sat sù ó yuq chyáng nghut kôle, ahtum abyuq é asak a bo é hkyô lé, nungmoq sé nyi akò.

¹⁶ Yesuq Hkrisduq gi, nga-nhúng é matú Yhâng é asak byi pyám bê lé wó jáng, chyitdap myit hkasù é nghut é hkyô lé, nga-nhúng wó sé ri. Nga-nhúng le, gumang wui é matú, nga-nhúng é asak lé byi pyám gíng ri.

¹⁷ Ó yuq nghut kôlhang, mingkan sutzé wó to luí, yhâng gumang hpò asho awui dut nyi é lé myàng kôlhang, a shogyô yu é nghut jáng, haù Garai Gasâng é chyitdap myit gi, yhâng chyáng hkâsu wó bò rà hui?

¹⁸ Chyitdap é zo wui ê, nga-nhúng gi, dang nhut shô mai za a nghut, muzó eq tengmán é đồng le chyitdap nyi sháng.

¹⁹ Haù hkùn, nga-nhúng gi, tengmán hkyô eq sêng bê bang nghut é lé wó sé é eq, nga-nhúng é i-myt mai nga-nhúng lé mara hun lò hkgangmó, Garai Gasâng é hí má nga-nhúng i-myt wó ngon nyi bê nghut ri.

²⁰ Hkâsu mù gà le, Garai Gasang gi, nga-nhúng myit é htoq má je kô é sù nghut mù, jung hkgangmó lé sé nyi ri.

²¹ Chyitdap é luzúm wui ê, nga-nhúng é i-myt mai nga-nhúng lé mara a hun é nghut le gi, Garai Gasâng hí má nga-nhúng gyuq kyúm rà hkyô a joq lo nghut ri.

²² Nga-nhúng gi, Yhang hkyô tô é hkunmó pé lé châng kut é eq Yhang lé gabú nhang é hkyô hai lé le kut é yanmai, nga-nhúng đùng é hkyô lhunglhang lé, Yhâng chyáng mai wó yù rà nghut lhê.

²³ Yhang hkunmó hkyô tô é eq rajung za, Yhâng zo Yesuq Hkrisduq é mying má lumjíng é eq, rayuq eq rayuq chyitdap lhum é hkyô gi, Yhang hkyô tô é hkunmó yhang nghut bê.

²⁴ Yhang hkyô tô é hkunmó pé lé, châng kut é bang gi, Yhang má dui nyi bê nghut mù, Yhang le haù bang chyáng dui nyi bê nghut ri. Yhang nga-nhúng chyáng dui nyi bê hkyô lé, nga-nhúng lé Yhang byi tô é Woi-nyí đồng nga-nhúng wó sé yu é nghut lhê.

4

Woi-nyí Pé Lé Gôn Wú Râ Hkyô

¹ Chyitdap é luzúm wui ê, woi-nyí hkgangmó lé hkâlumjíng kó, woi-nyí haù pé gi, Garai Gasâng chyáng mã é nghut é, a nghut e lé gôn wú keg; hkâsu mù gà le, myiqhtoi pyoq pé myo myo gi, mingkan htoq má jón wún bekò nghut ri.

² Garai Gasâng é Woi-nyí lé nungmoq wó sé yù rà hkyô gi, shí đồng nghut lhê: haù Yesuq Hkrisduq gi, gungsho đồng jé lé bê ga, yin yu é woi-nyí hkgangmó gi, Garai Gasâng chyáng mã é nghut lhê.

³ Nghut kôlhang, Yesuq Hkrisduq lé a yín yu é woi-nyí hkangmó gi, Garai Gasâng chyáng má é a nghut. Woi-nyí haù gi, lé lo nyi ri ga nungmoq wó gyô wú bê; ahkuí lhang mingkan htoq má nyi to gù nghut é anti-hkrisduq é woi-nyí nghut ri.

⁴ Chyitdap é zo wui ê, nungmoq gi, Garai Gasâng chyáng má é nghut mù luí, yhangmoq lé ung pyám bekô nghut ri. Hkâsu mù gâ le, nungmoq má lúng to Sù gi, mingkan má nyi to su htoq je kô ri.

⁵ Yhangmoq gi, mingkan eq sêng é bang nghut lhê mù luí, mingkan hkyam đông tai bum akô; mingkan to wui le yhangmoq é dang lé gyo byí akô nghut ri.

⁶ Nga-nhúng gi, Garai Gasâng eq sêng é bang nghut lhê; Garai Gasâng lé sê é sù ó yuq nghut kôle, nga-nhúng é dang lé gyô ri; nghut kôlhang, Garai Gasâng eq a sêng é sù gi, ngamoq é dang lé a gyo nghut ri. Shí hkyô lé wú jáng, tengmán hkyô é Woi-nyí eq hkyô shuí ngoq é woi-nyí lé, nga-nhúng sê gam hkoq yú bê nghut ri.

Garai Gasâng Gi, Chyitdap Myit

⁷ Chyitdap é luzúm wui ê, nga-nhúng gi, rayuq eq rayuq chyitdap lhùm nyi sháng; hkâsu mù gâ le, chyitdap myit gi, Garai Gasâng chyáng má é nghut ri. Chyitdap myit bò sù ó yuq nghut kôle, Garai Gasâng chyáng mai hku kat é hui bê sù nghut lui, Garai Gasâng lé sê sù nghut ri.

⁸ Chyitdap myit a bo é sù ó yuq nghut kôle, Garai Gasâng lé a sé sù nghut ri; hkâsu mù gâ le, Garai Gasâng gi, chyitdap myit nghut lhê.

⁹ Garai Gasâng gi, Yhang Zô é yanmai nga-nhúng asak wó dui sháng gaq ga, Yhang Zo zote lé mingkan htoq má nhang kat byí bê nghut ri. Haù gi, Garai Gasâng mai nga-nhúng lé, Yhâng é chyitdap myit tân shit é hkyô nghut ri.

¹⁰ Nga-nhúng gi, Garai Gasâng lé chyitdap é a nghut, Garai Gasâng sheq nga-nhúng lé chyitdap lui, nga-nhúng é yubak marâ é matú, shíhtái gunglik hkungga dut sháng gaq ga, Yhang Zo lé nhang kat byí é nghut ri; haù gi, chyitdap myit yhang nghut bê.

¹¹ Chyitdap é luzúm wui ê, Garai Gasâng gi, nga-nhúng lé haù-í yhang chyitdap é nghut jáng, nga-nhúng le rayuq eq rayuq chyitdap lhùm rá dut lhê.

¹² Garai Gasâng lé ó yuq eq le, hkâ-nhám lhang myang wú é a nghut; nghut kôlhang, nga-nhúng rayuq eq rayuq chyitdap lhùm nyi é nghut jáng, Garai Gasâng gi, nga-nhúng má nyi nyi bê nghut lui, Yhâng é chyitdap myit gi, nga-nhúng má gumjup rá nghut lhê.

¹³ Garai Gasâng gi, nga-nhúng lé, Yhâng é Woi-nyí byí to bê nghut é yanmai, Yhâng chyáng nga-nhúng dui nyi bê hkyô lé le,

Yhang nga-nhúng má nyi nyi bê hkyô lé le, nga-nhúng sé bê nghut ri.

¹⁴ Haù Iwa gi, Yhang Zo lé mingkân é hkyi yù Sù dut sháng gaq ga nhang kat é hkyô lé, ngamoq myàng lui, saksé hkâm lhê.

¹⁵ Ó yuq nghut kôlhang, Yesuq gi, Garai Gasâng é Yhangzo nghut ri ga yín yu é nghut le gi, yhang má Garai Gasâng nyi nyi bê nghut lui, yhang le Garai Gasâng chyáng dui nyi bê nghut ri.

¹⁶ Nga-nhúng gi, Garai Gasâng eq nga-nhúng lé chyitdap é hkyô lé, sé lui lumjng nyi lhê; Garai Gasâng gi, chyitdap myit nghut lhê; chyitdap myit má nyi nyi é sù ó yuq nghut kôle, Garai Gasâng chyáng dui nyi bê nghut lui, Garai Gasâng le haù yuq má nyi nyi bê nghut ri.

¹⁷ Haù đông mai, chyitdap myit gi, nga-nhúng chyáng gumjup bê nghut lui, nga-nhúng gi, tarâ jéyáng é buinyi má a gyuq a kyum é myit wó yú rá nghut lhê; hkâsu mù gâ le, nga-nhúng gi, mingkan shí má Yhang su dut nyi bê nghut ri.

¹⁸ Chyitdap myit má gyuq é hkyô a bò nghut ri; gyuq é hkyô gi, mara dam byí é hkyô eq sêng é nghut mù lui, gumjup é chyitdap myit gi, gyuq é hkyô lé hkat htoq pyám ri. Haù gyuq é myit bò sù gi, chyitdap myit má gumjup sù a nghut.

¹⁹ Yhang hí nga-nhúng lé chyitdap bê nghut é yanmai, nga-nhúng le chyitdap nyi lhê.

²⁰ Byù rayuq yuq gi, "Ngò, Garai Gasâng lé chyitdap lhê." ga tái kôlhang, yhâng é gumang lé a jú é nghut jáng, haù yuq gi, byù mhaù rayuq nghut ri; hkâsu mù gâ le, yhumsing byu-myang é gumang lé lhang a chyitdap é sù gi, a byu-myang é Garai Gasâng lé wó chyitdap rá a nghut.

²¹ Garai Gasâng lé chyitdap é sù ó yuq le, yhumsing gumang lé le chyitdap rá lhê gâ é dang haù gi, nga-nhúng é matú, Yhang mai hkyô tô é hkunmó nghut lhê.

5

Garai Gasâng É Yhangzo Lé Lumjng Hkyô

¹ Yesuq gi, haù Hkrisduq nghut ri ga lumjng é sù ó yuq nghut kôle, Garai Gasâng chyáng mai hku kat bê sù nghut ri; Iwa lé chyitdap é sù ó yuq nghut kôle, yhang zo lé le chyitdap é nghut bê.

² Garai Gasâng lé chyitdap nyi mù, Yhang hkyô tô é hkunmó pé lé châng kut nyi é nghut le gi, Garai Gasâng é yhangzô pé lé le, chyitdap nyi é hkyô lé, nga-nhúng wó sé yu é yanmai,

³ Garai Gasâng hkyô tô é hkunmó pé lé châng kut é gi, Yhang lé chyitdap é hkyô nghut ri. Yhang hkyô tô é hkunmó pé gi, wôlai mó a nghut.

⁴Hkâsu mù gâ le, Garai Gasâng chyáng mai hku kat bê sù ó yuq nghut kôle, mingkan lé ung pyám bê nghut ri. Nga-nhúng é lumjǐng myit gi, mingkan lé nga-nhúng ung pyám é onđang hkyô nghut ri.

⁵Yesuq gi, Garai Gasâng é Yhangzo nghut é lé lumjǐng é sù mai lai luí, mingkan lé wó ung pyám é sù gi, ó yuq wá nghut lhê lúh?

⁶Haú yuq gi, wui eq sui* mai lé é sù, Yesuq Hkrisduq yhang nghut nyi ri. Yhang gi, wui mai za lé é a nghut, wui mai le, sui mai le, lé é sù nghut lhê. Woi-nyí gi, tengmán hkyô nghut é yanmai, shí hkyô lé saksé hkám byí ri.

⁷Hkâsu mù gâ le, Woi-nyí le, wui le, sui le, haú sùm lhùm é saksé hkám akô nghut ri;

⁸haú sùm lhum gi, rajung za nghut akô.

⁹Nga-nhúng gi, byu é saksé lé lhom yu lhê; nghut kôlhang, Garai Gasâng é saksé gi, haú htoq je kô nyi ri. Hkâsu mù gâ le, Garai Gasang gi, Yhang Zo eq sêng é hkyô lé saksé byí é yanmai nghut ri.

¹⁰Garai Gasâng é Yhangzo lé lumjǐng é sù gi, saksé haú lé yhâng é i-myt má wó bê nghut ri; Garai Gasang lé a lumjǐng é sù kúm gi, Yhang lé byù mhaú rayuq ga chyô pyám bê nghut ri; hkâsu mù gâ le, Garai Gasang mai Yhang Zo eq sêng é hkyô saksé hkám é lé, yhang a lumjǐng é yanmai nghut ri.

¹¹Nga-nhúng lé, Garai Gasang byí é ahtum abyuq é asak gi, saksé haú nghut nyi ri. Asak haú gi, Yhang Zô chyáng bo ri.

¹²Garai Gasâng é Yhangzo lé wó sù gi, asak haú lé wó bê; Yhang Zo lé a wó sù gi, asak haú lé le a wó nghut ri.

Ahtum Abyuq Asak

¹³Garai Gasang é Yhangzô é mying lé lumjǐng é bang nungmoq gi, ahtum abyuq é asak wó bê hkyô lé, nungmoq sé kó sháng gaq nghú, shí hkyô pé lé ngò ká byí kat é nghut lhê.

¹⁴Nga-nhúng hai dúng le le, Garai Gasang ô nau é đông nghut jáng gi, Yhang gyo byi rá nghut lhê; haú gi, Yhâng é hí má nga-nhúng a gyuq a kyum wó wâng rá matú nghut ri.

¹⁵Haú mù, nga-nhúng hai dúng kôlhang, Yhang gyo byí é lé nga-nhúng sé é nghut le gi, Yhâng chyáng nga-nhúng dúng é hkyô lé, nga-nhúng wó yu é lé, nga-nhúng sé lhê.

¹⁶Ó yuq nghut kôle, yhumsing é gumang hpó mai shí a gǐng é mara kut shut é lé, myang é nghut le gi, haú yuq é matú kyúdung byi rá lhê. Haú hkún, Garai Gasang gi, haú yuq lé asak byi rá nghut lhê. Haú gi, shí a gǐng é mara wó bâng é matú tai é nghut lhê. Shí gǐng é mara le joq lhê; nghut kôlhang, hau é matú dúng rá lhê nghú, ngò tai nyi é a nghut.

¹⁷A đingmán é hkyô lhunglhang gi, mara nghut lhê; nghut kôlhang, shí a gǐng é mara le joq lhê.

¹⁸Garai Gasâng chyáng mai hku kat bê sù ó yuq nghut kôle, mara a xoq kut lô é hkyô lé nga-nhúng sé lhê; hkâsu mù gâ le, haú Garai Gasâng é Yhangzo gi, haú yuq lé wú zúng nyi é nghut mù luí, haú agè ashop sù gi, haú yuq lé wó záng htung rá a nghut.

¹⁹Nga-nhúng gi, Garai Gasâng é yhangzô pé nghut é lé le, mingkan gón lé haú agè ashop su eq up tô é hkyô lé le, sé lhê.

²⁰Hau htoq agó, Garai Gasâng é Yhangzo jé lé luí, haú tengmán Sù lé sé sháng gaq ga, nga-nhúng lé sê gyô é nyan byi bê hkyô lé le, nga-nhúng sé lhê. Nga-nhúng gi, Yhang Zo Yesuq Hkrisduq má nghut nyi bê eq rajung za, haú tengmán Sù má le nyi nyi bê nghut lhê. Yhang gi, haú tengmán é Garai Gasang eq ahtum abyuq é asak nghut nyi lhê.

²¹Chyitdap é zo wui é, hparà l hó pé lé koi pyám nyi keq.

* 5:6 Wui eq sui nghu é gi, Yesuq baptisma hkam yu é hkyô eq shí hkám é hkyô lé tai nau é nghut ri.

YOHAN
Htang Dàm Hun Kat é Laiká
(2 John)

¹ Ngò suwún hpó gi, tengmán hkyô má ngò chytidap é, hkyin yù huí é náng hpô-myhí eq nung zô pé lé, dang kyô kat lhê; ngò baú za a nghut, haú nga-nhúng chyáng lúng to luí,

² nga-nhúng eq ahtum abyuq ru joq nyí rá nghut é tengmán hkyô é yanmai, haú tengmán hkyô lé sê é lhunglhang bang le, nungmoq lé chytidap nyi lhê.

³ Haú Íwa Garai Gasang eq Íwâ é Yhangzo Yesuq Hkrisduq chyáng má é jeju, shogyo nhikmyin hkyô eq nguingón hkyô gi, haú tengmán hkyô eq chytidap hkyô má, nga-nhúng eq rahá joq nyí sháng gaq.

⁴ Haú Íwa mai nga-nhúng lé hkunmó hkyô tô é eq rajung za, nung zô pé ra-am gi, haú tengmán hkyô má châng nyi é hkyô lé, ngò wó sê é yanmai, gyai yhang gabú nyi lhê.

⁵ Chytidap é hpô-myhí ê, nga-nhúng rayuq eq rayuq chytidap lhum sháng nghù, ahkuí, ngò, nang lé dúng kat lhê; shí gi, sâng-hi mai nga-nhúng wó gyô yù bê hkunmó lé sheq, nang lé ngò ká byí kat é nghut lhê; hkunmó sik ralhuma nghut.

⁶ Yhang hkyô tô é hkunmó eq rajung za, nga-nhúng cháng kut é nghut jáng gi, chytidap é hkyô nghut bê. Sâng-hi mai nungmoq wó gyô yù bê eq rajung za, Yhang hkyô tô é hkunmó gi, nungmoq chytidap myit bo nyi rá matú nghut lhê.

⁷ Hkâsu mù gâ le, Yesuq Hkrisduq gi, gungsho đông jé lé é hkyô lé a yín yu é, mhaú zô é byù myo myo gi, mingkan htoq má jón wún bekô nghut ri; haú sù é byù gi, haú mhaú zô sù eq anti-hkrisduq dut rá nghut lhê.

⁸ Nungmoq zui saí bê muzó é akyû lé a lhoq hpyuq é za, gumjup é shígyaú chyunghuq lé, nungmoq wó hkam yù kó sháng gaq, yhumsing gùng sidiq nyi keq.

⁹ Hkrisduq mhoqshit é dang lé a châng é za, laí chyan é sù ó yuq nghut kôle, Garai Gasang lé a wó é sù nghut ri; haú mhoqshit é dang lé ru châng nyi é sù kúm gi, haú Íwa lé le, Yhangzo lé le, wó bê sù nghut ri.

¹⁰ Mhoqshit é dang haú lé a wun é byù rayuq yuq, nungmoq chyáng jé lé é nghut le gi, haú yuq lé nungmoq é yhúmhaú má hkâwâng nhâng kó; yhang lé hkálhom xoq yù kó.

¹¹ Hkâsu mù gâ le, haú yuq lé lhom xoq yu é sù gi, yhang é agè ashop é muzó má lòm bê sù nghut ri.

¹² Ngò gi, nungmoq lé ká byí kat rá hkyô myo myo joq kôlhang, laiká hkyap eq kajung-chi lé a kâm chùng naù. Nga-nhúng é gabú hkyô wó gumjup sháng gaq, ngò,

nungmoq chyáng tsuq za lé jé mù, nungmoq eq myoqdong hkyûm kut nyo lhum rá lé myit myoqbyu nyi lhê.

¹³ Hkyin yù huí é náng nhâ é yhangzô pé gi, nang lé shi-kyâm kat akò nghut ri.

YOHAN
Súm Dam Dám Hun Kat é
Laiká
(3 John)

¹ Ngò suwún hpó gi, haù tengmán hkyô má ngò chyitdap é, ngá é chyitdap luzúm Ge-u lé dang kyô kat lhê.

² Chyitdap é luzúm hpó ê, ngò gi, haù náng é asak woi-nyí nyi-ngón yuqyo nyi é eq rajung za, nàng nguingón wángzán rá eq hkyô hkat hkangmó má, nyi-ngón yuqyo nyi sháng gaq nghú, kyûdung byí kat lhê.

³ Hkâsu mù gâ le, ngò gi, gumang wui ram, ngá chyáng lé jé mù, haù tengmán hkyô má nàng lhumzui é hkyô lé le, haù tengmán hkyô má nàng hkâsu kut xoq châng nyi é hkyô lé le, lé tai kyo kô é hkûn, gyaí yhang gabú é yanmai nghut lhê.

⁴ Haù tengmán hkyô má, ngá zô pé châng nyi é hkyô lé, ngò wó gyô é hkûn gabú é í, gotú gabú hkyô a wó lo nghut ri.

⁵ Chyitdap é luzúm hpó ê, haù gumang wui gi, mau we bíng pé nghut to kôlháng, nàng yhangmoq lé lhom garúm yu é hkyô má, nàng gi, lhumzui nyi ri.

⁶ Yhangmoq gi, haù noqkuq hpúng má é bang lé, náng é chyitdap myit eq séng luí tai kyo bekô nghut ri. Nàng gi, Garai Gasâng hí má gingdán é dòng, yhangmoq é hkyowui matú garúm luí, dé kat é nghut jáng, ge é muzó jizó kut é nghut bê.

⁷ Hkâsu mù gâ le, yhangmoq gi, Hkrisduq é myíng hau é matú htoq ló kôluí, a lumjíng bâng chyáng mai hai lháng a hap yù kó nghut ri.

⁸ Haù mù luí, nga-nhúng gi, haù tengmán hkyô é matú rahá za wó chôm zui sai sháng gaq, haù sú é byu pé lé lhom hkúlum yù rá lhê.

⁹ Ngò gi, haù noqkuq hpúng lé laiká ká byí kat bê nghut lhê; nghut kôlháng, haù ushuq kut nau é sú Diotrehpi gi, ngamoq lé a lhom hap yù nghut ri.

¹⁰ Haù mù luí, ngò lé jé jáng gi, ngamoq lé a jo a âng é dang tai é eq lumù gansang é, yhang kut é muzó lé, tai hpyí kyo rá nghut lhê; yhang gi, haù hkyô lé myit a dik shí é nghut mù luí, yhang yhang le gumang wui lé a lhom hkúlum yù, lhom hkúlum yù nau bang lé le, yhang mai hkûm zing pyám luí, yhangmoq lé haù noqkuq hpúng mai hkat htoq pyâm ri.

¹¹ Chyitdap é luzúm hpó ê, agè ashop hkyô lé alik a yu é za, ge é hkyô lé yù aq; ge é hkyô kut é sú gi, Garai Gasâng chyáng má é nghut bê; agè ashop é hkyô kut é sú gi, Garai Gasang lé a myàng shí é sú nghut ri.

¹² Demetri ge é hkyô lé, yuq hkangmó mai le, haù tengmán hkyô eq le, saksé hkám byí

akô nghut ri; ngamoq le, yhang ge é hkyô lé saksé hkám byí lhê; haù ngamoq hkám é saksé gi, têng é hkyô nghut é lé, nàng sê lhê.

¹³ Ngò gi, nang lé kâ kat ra hkyô myo myo joq kôlháng, kâjung eq kâjung-chi dòng a kâ kat nau lo.

¹⁴ Ngò gi, a myàng má, nàng eq myang hui lhum rá lé myit myoqbyu tô lhê. Haù hkûn sheq, ngá-nhik myoqdong hkyûm myang nyo lhum rá nghut lhê.

¹⁵ Nàng nguingón yuqyo nyi sháng gaq; shí má é luzúm wui gi, nang lé shi-kyâm kat akô nghut ri. Nàng le, haù má é luzúm wui lé, myíng du htau luí bo shi-kyâm byi laq.

YUDE Hun Kat é Laiká (Jude)

¹ Yesuq Hkrisduq é dui-nhâng zoshâng nghut sù eq Yakuq é yhanggu, ngò Yude gi, haù Iwa Garai Gasâng eq ji yù mù, chytidap é hui luí, Yesuq Hkrisduq eq upzúng é hui bâng chyáng dang kyô kat lhê.

² Shogyo nhikmyin hkyô, nguingón hkyô eq chytidap hkyô gi, nungmoq chyáng agùn agò joq nyí sháng gaq ó!

Garai A Wó Bâng É Yubak Mara

³ Chytidap é luzum wui é, ngò gi, nga-nhúng chôm wó é hkyi yù hkyô haù eq séng luí, nungmoq lé gyai yhang kâ kat byí nau é nghut lhê wá, haù sân-yúng bang lé, radá dâm jâng ap byí to bê nghut é lumjing hkyo é matú nungmoq htuq htíng rá dut é lé, myit wum byí rá hkyô ká rá dut é lé, ngò byu-myang ri.

⁴ Hkâsu mù gâ le, haù mara dam byí é hui zo rá hkyô lé, a-nham pyat mai kâ matsíng tô é hui bê bang ra-am gi, nungmoq chyáng hkaù wang lò bekò nghut ri. Yhangmoq gi, Garai a wó é bang nghut luí, haù nga-nhúng é Garai Gasâng jeju lé, mingkan ngón hkyo éq htaí lhik pyám kô é htoq agó, Yhang za nga-nhúng é Yhumsing nghut sù eq Ahko ahkáng lhunglháng wó sù, Yesuq Hkrisduq lé he-ngik pyám akò nghut ri.

⁵ Nungmoq kúm gi, shí pé banshoq lé sê to gù nghut kólhang, ngò mai nungmoq lé tai pún nau é hkyô gi, a-ô mã é pé nghut lhê: Haù gi, Yhumsing Garai mai, Yhâng é byu pé lé, Egotuq ming mai hkyi htoq yù kólhang, a lumjing é bang lé gi, htâng má dum lhoq htên pyám é nghut lhê.

⁶ Hau htoq agó, haù yhumsing é ayá lé tô pyám luí, yhumsing é nyi jowò lé pyám tô é maumâng pé lé, Yhang gi, haù tará jéyáng é hui rá Buinyi mó jé shoq, ahtum abyuq é tojjang tui eq tui luí, mauchut hkaù má lhúng tô é nghut lhê.

⁷ Haù eq rajung za, Sodom eq Gomoraq myuq eq hau é awui ayám mã é wá pé mã é bang gi, ashop é dông gungsho zùm yap é hkyô shut é eq myiwe yhangchang yuqgè yhangchang nyi zô lhùm é hkyô kut kô é nghut mù, yhangmoq gi, ahtum abyuq é myi má dam byí é hpuzò bâng é alik dut bekò nghut ri.

⁸ Haù eq rajung za yhang, yhupmoq moq é byù shí bang gi, yhumsing é gungsho lé

agot a-ù kut kômù, ahkáng ayá wó sù lé he-ngik pyám kôluí, mauhkúng bang lé lumù gansang akò nghut ri.

⁹ Nghut kólhang, haù maumang lagyo agyi Mihkaelaq lháng gi, Mosheq é gùng eq séng luí, haù nat zau eq dang rhâng lhùm é hkùn, yhang lé rhoi é dông mara hùn dang a wám tai é za, "Nang lé, haù Yhumsing nhik-yo sháng gaq!" ga za tai ri.

¹⁰ Nghut kólhang, byù haù bang gi, yhangmoq a sê gyô é hkyô pé lé rhoi dang tai pyám akò nghut ri; yhangmoq gi, haù myit woi-nyi a bo é dusak pé su, yhumsing myit mai sê gyô é hkyô pé má lháng, yhumsing gùng lé lhoq htên yu akò nghut ri.

¹¹ Yhangmoq gi, dingnyé wó rá! Hkâsu mù gâ le, yhangmoq gi, Ka-in* kut é agè ashop é hkyô dông cháng kô é yanmai le, akyú wó rá matú, Balam† shut é dông bo shut kô é yanmai le, Kora‡ é gumlau toq hkyô kut kômù, yhang su htên byoq byuq é hui kô é yanmai le nghut ri.

¹² Yhangmoq gi, nungmoq é chytidap zoshuq poi má nungmoq lé agot a-ù wó dut nhang é bang nghut mù, gyuq hoq a bo é za, nungmoq eq rahá chôm zoshuq kô é hkùn, yhumsing gùng lé za yhumsing lhoq gyi yu é sau zúng bang nghut akò; yhangmoq gi, lai eq mut tâng wún é, mau a bo é mhut pé su nghut é htoq agó, ashi a zui mù, amyit eq roq hpùn pyám luí, í dâm shi é, xung nám lhê é síkgâm pé su nghut akò.

¹³ Yhangmoq gi, yhumsing é hoq jung lé, tsú-myup su htoq nhang é, haù wuimau mã é kô é wuilhêng pé eq, tuq tuq chut é mauchut hkaù má tará jéyáng hui rá matú, ahtum abyuq to to huí é, yông wún é kyí pé su nghut akò.

¹⁴ Byù haù bang eq séng luí, Adam mai byuxik nyhit xik má nyi é Enuq, myiqhtoi htoi tô é gi, "Wú keq, haù Yhumsing gi, Yhâng é chyoiyúng bang mun mun sen sen eq rahá gyó lé lo nyi bê nghut ri.

¹⁵ Yhang gyó lé lo é gi, yuq hkangmó lé tará jéyáng rá matú eq, haù tará a hkunggá é lhunglháng bang, tará a hkunggá é dông kut é muzò pé banshoq lé le, tará a hkunggá é yubak byu pé, Yhang lé tai shut é dang htân pé banshoq lé le, mara byi rá matú nghut lhê." gâ ri.

¹⁶ Byù haù bang gi, put dang tai é bang eq mara hùn dang tai é bang nghut akò; yhangmoq gi, yhumsing ô nau é agè ashop hkyô cháng kô é htoq agó, yhumsing gùng yhumsing nghutbùn é dang tai é eq yhum-sing maiwáng zat é dông, góbang lé owaq é bang nghut akò.

* **1:11** Ka-in gi, yhanggu lé sat sù nghut lhê. Apùn 4:1-8
lé myoqnoq mù, Garai lé shut sù nghut lhê. Gyung So 22:1-35
lé gumlau toq é hkyangjong nghut lhê. Gyung So 16:1-33

† **1:11** Balam gi, myiqhtoi nghut lhê, nghut kólhang, ngunzè
‡ **1:11** Kora gi, Garai byù nghut é hkyô-u shê sù Mosheq

Hkam Jân Râ Hkyô

¹⁷ Nghut kôlhang, ngò chyitdap é luzúm wuî ê, nungmoq gi, haù nga-nhông é Yhumsing Yesuq Hkrisduq é lagyô pé mai te taí tô é dang lé, bûn nyi keq.

¹⁸ Hkâsu mù gâ le, yhangmoq gi, "Haù ló htâng é ahkying pé má, tarâ a hkunggâ é yhumsing ô nau é hkyô đông châng é, rhoijap-dap dang taí é byu pé nyi to râ nghut lhê." ga, nungmoq lé taí wú kô é nghut lhê.

¹⁹ Byù haù bang gi, nungmoq lé gam hkoq é bang, mingkan hkyô lé baù za châng é bang, haù Woi-nyí a bo é bang nghut akô.

²⁰ Nghut kôlhang, ngò chyitdap é luzúm wuî ê, nungmoq gi, haù Chyoiyúng Woi-nyí má kyúđung é đông, nungmoq é chyoiyúng é lumjing hkyô má, yhumsing gùng yhumsing lhoq kô yu nyi keq.

²¹ Ahtum abyuq é asak lé wó yù râ matú, haù nga-nhông é Yhumsing Yesuq Hkrisduq é shogyo nhikmyin hkyô lé lánq uchyang, nungmoq gi, Garai Gasâng é chyitdap myit má, yhumsing gùng yhumsing nyi nyi keq.

²² Lumjing hkyô má úng-âng é bang lé, shogyo nhikmyin nyi keq;

²³ góbang lé gi, myi mai she htoq yù mù, hkyi yù keq; dum, góbang lé gi, sidiq myit éq shogyo nhikmyin hkyô tûn shit mù, haù gungshô é achay achyut dap é yhangmoq é mebu lé chaq nyí keq.

Hkya-on Kungtôn Dang

²⁴⁻²⁵ Nungmoq lé, a lingbat shoq wó upzúng lui, nungmoq lé, mara hûn râ hkyô a bo é za, gabú dik é đông mai Yhang é hpungwup shingkan bo é myoq hí má wó shuí shit é, nga-nhông é hkyi yù Sû, rayuq za nghut é Garai Gasâng chyáng, hpungwup shingkan, hkikhkam hkyô, hpungwup a-tsam eq ahkáng ayá gi, nga-nhông é Yhumsing Yesuq Hkrisduq đông mai, lai lò bê ipyat pé má le, ahkuí pyat má le, pyat dedu ahtum abyuq má le, rujoq nyí sháng gaq ô! Amen.

YOHAN É SHING-RÁN Laiká (Revelation)

Dang-hi Hpóng

¹ Yesuq Hkrisduq é shing-rán shí gi, adé myáng má dut lò rà hkyô pé lé, Yhâng é dui-nhâng zoshâng wui lé tún shit nhâng rà matú, Garai Gasâng eq Yesuq Hkrisduq Yhang lé byí tò é nghut lhê. Yhang gi, Yhâng é maumang lagyo lé nhang kat lui, Yhâng é dui-nhâng zoshâng Yohan lé, shing-rán haú sé nhang ri.

² Yohan gi, Garai Gasâng é mungdang eq Yesuq Hkrisduq é saksé lé, yhang myang é gú banshoq eq rajung za saksé hkâm kyô é nghut ri.

³ Haú ahkying gi, chyâng lò bê nghut é yanmai, myiqhtoi dang shí pé lé, nghap kyô é sù eq, gyô yù lui, haú má kâ tò é gú lé châng kut é bang gi, hkungsô wó nyi akó.

Noqkuq Hpúng Nyhit Lhum Lé Dang Kyô Kat É Hkyô

⁴ Ngò Yohan gi, Asia mau má é noqkuq hpúng nyhit lhum lé dang kyô kat lhê. Ahkui pyat le, a-nham pyat le, htang pyat má le rù nyi nyi é Su chyáng mai le, Yhâng é hkohkâm-tanghkuq hí má é nyhit woi-nyí chyáng mai le,

⁵ lhumzuí é saksé nghut sù, shi byuq é mai sâng-hi dui toq é zomún dut sù, myidàm htoq má é hkohkam pé lé up sù, Yesuq Hkrisduq chyáng mai le, jeju eq nguigon hkyô gi, nungmoq chyáng joq nyí sháng gaq.

Nga-nhúng lé chyitdap lui, Yhâng é sui eq, nga-nhúng lé, nga-nhúng é mara pé mai lhoq lhut byí é eq,

⁶ Yhâng é Garai Gasang eq Iwa lé dojaú rà matú, nga-nhúng lé, mingdán byu pé eq hkyangjông pé* dut nhang é Su chyáng, duqwup shingkang eq hpungwup a-tsam gi, pyat dedu ahtum abyuq ru joq nyí sháng gaq ô! Amen.

⁷ Wú keq, Yhang gi, mhut mai lé lo nyi é nghut lui, myoqjí hkangmó gi, Yhang lé myàng kó rà nghut lhê;

haú Yhang lé htaú rot bang† lháng, myàng kó rà nghut lhê;

haú myidàm htoq má é byù lunglhang bang gi, Yhâng é yanmai, yón ngau é hui zo kó rà nghut lhê.

Haú dòng nghut sháng gaq! Amen.

⁸ "Ngò gi, Alhpa eq Omega‡ nghut lhê. Ahkui pyat le, a-nham pyat le, htang pyat

má le rù nyi nyi é, wum-o a-tsam dik shoq bò Sù nghut lhê." ga, haú Yhumsing Garai Gasang tai ri.

Byu Yhangzo Su Dut Su É Hkyô

⁹ Yesuq é, wuihke jamjau hkyô má le, mingdán má le, jân shirang é hkyô má le, nungmoq é byinzùm nghut sù, ngò nungmoq é gumang hpó, Yohan gi, Garai Gasâng é mungdang eq Yesuq é saksé é yanmai, Patmo zinlóng má nyi nyi é nghut lhê.

¹⁰ Haú Yhumsing é Buinyi§ má, ngò gi, Woi-nyí eq shui moq byuq ló é nghut mù, "Nàng myang é eq rajung za, chyúmding ralhum má ká lui, Ehpesu, Samurna, Pergamu, Htuatira, Sardi, Hpiladehpi eq Ladoki wà pé má joq é,

¹¹ noqkuq hpúng nyhit lhum chyáng hun kat aq." ga, tut htê su gá é htê mò, ngá é nunghtang má mying é lé, ngò wó gyô ri.

¹² Haú ngo lé nyo nyi é htê yhumsing lé wú rà matú, ngò, gùng lhing kat é nghut lhê. Ngò gi, gùng lhing kat é hkùn, hìng myi-kok tsungjang nyhit lhum lé le,

¹³ myi-kok tsungjang haú pé é agùng má, byu yhangzo su dut é Sù rayuq nyi tò é lé le, myang kat ri; haú yuq gi, hkyigoq htoq jé é buhng wat to lui, wànggàng má hìng wànggò le wut tò ri.

¹⁴ Yhâng é ulhum eq xâm gi, sau hpyú máu eq gyo su hpyu zan tò ri; Yhâng é myoqjí gi, myishâm su duq nyi ri.

¹⁵ Yhâng é hkyí gi, myi bungghkyung má jên yu é jet é gyi su dut ri; Yhâng é htê gi, wui myo myo mying hùm é htê su gá ri.

¹⁶ Yhâng é loqyo loq má gi, kyí nyhit cham chung tò ri; Yhâng é nhut mai gi, shamsó í shut dap é shâm htoq lo ri. Yhâng é myoq-dong gi, htan dik é nyí gùng bùi su tso nyi ri.

¹⁷ Yhang lé myang é hkùn, ngò gi, shí gùng su, Yhâng é hkyí wang má lèng leq tò é nghut lhê. Haú hkùn, Yhang gi, Yhâng é loqyo loq ngá ahtoq má ke byi mù, tai é gi, "Hkâgyuq, Ngò gi, Sâng-hi eq Jihtùm nghut lhê.

¹⁸ Ngò gi, dui nyi Sù le nghut lhê; Ngò gi, shí bê nghut kôle, wú keq, pyat dedu ahtum abyuq dui nyi é nghut lhê! Hau htoq agó, Ngò gi, shí hkyô eq moming é zoqshi pé lé chùng Su nghut lhê.

¹⁹ Haú mù, nàng myang é lé le, ahkui dut é hkyô eq htàngnùng le dut lò rà hkyô lé le, ká to aq.

²⁰ Nàng myang é, Ngá é loqyo loq má é kyí nyhit cham eq hìng myi-kok tsungjang nyhit lhum é záu tò é hkyo é lichyúm gi, isu nghut lhê. Kyí nyhit cham gi, noqkuq hpúng nyhit lhum é maumang lagyo nyhit yuq nghut ri;

* 1:6 Htoq Ló 19:6 † 1:7 Htaú rot bang gá é gi, Yesuq tapzing má jén to hui é hkùn, Yhâng é namcham má lham eq htaú é bang lé gá lhê. ‡ 1:8 Alhpa eq Omega gi, Grik laiká myí má é sâng-hi cham eq ló htàng cham nghut lhê; haú tai nau é gi, rù dui nyi sù gá é nghut lhê. § 1:10 Yhumsing é Buinyi gá é gi, yuban nyi lé gá lhê.

myi-kok tsungjang nyhit lhum gi, noqkuq hpúng nyhit lhum nyhit ri.

2

Ehpesu Myuq Mã É Noqkuq Hpúng Lé Ká Kat É Laiká

¹ Ehpesu myuq mã é noqkuq hpúng é mau-mang lagyo lé isu nghú ká kat aq:

Haù yhâng é loqyo loq mã kyí nyhit cham chùng lui, hng myi-kok tsungjang nyhit lhum é gyoro mã sô nyi Su é dang gi,

² Ngò gi, náng é a-kyang, náng shikut é hkyô, náng hkam jân é hkyô pé lé, sê lhê. Agè ashop é byu pé lé, náng a jân pyâm é hkyô lé le, haù lagyo a nghut kôlháng, lagyo pé nghut lhê gá é bang lé, náng chyam wú mù, yhangmoq lagyo apyoq pé nghut é lé wó sê yù kô é hkyô lé le, Ngò sê lhê.

³ Náng gi, shikut sharîng bê nghut é htoq agó, Ngá mying é yanmai, wuihke hkyô lé hkam jan bê nghut kôle, nú byuq é hkyô a bò nghut ri.

⁴ Nghut kôlháng, náng gi, náng é sâng-hi lhê é chyitdap myit lé tô pyâm é yanmai, ngò, nang lé mara hùn rá hkyô joq ri.

⁵ Náng hká mai byit gyó é lé, myit bun aq! Myit hng lui, sâng-hi náng kut é muzó pé lé, kut aq. Náng myit a hng é nghut jáng, ngò, náng chyáng lé jé mù, náng é myi-kok tsungjang lé, hau é jowò mai huí pyám byi rá nghut lhê.

⁶ Nghut kôlháng, Ngò a jú é, Nikola é chángzô pé kut é hkyô lé, náng le a jú kut é yanmai, náng chyáng ge é hkyô ralhng bo ashí nghut ri.

⁷ Gyo rá nohkyap dap sù gi, haù Woi-nyí mai noqkuq hpúng pé lé tai é hkyô lé, gyô yù sháng gaq. Wó ung é sù lé gi, haù Garai Gasâng é hparadisú mã joq é asak siggâm mã é ashí zo rá ahkáng, Ngò byi rá nghut lhê.' gá ri.

Samurna Myuq Mã É Noqkuq Hpúng Lé Ká Kat É Laiká

⁸ Samurna myuq mã é noqkuq hpúng é mau-mang lagyo lé isu nghú ká kat aq:

Haù Sâng-hi eq Jihtùm nghut é eq, shi byuq lui, asak dum dui Su é dang gi,

⁹ Náng hui zô é wuihke jamjau hkyô eq náng myung é hkyô lé, Ngò sê lhê; nghut kôlháng, náng gi, wó sù nghut ri! Tsadán é tarajong bang nghut to lui, Yudaq byu pé a nghut kôlháng, Yudaq byu nghut lhê gá é bang tai hpoi é hkyô lé le, Ngò sê lhê.

¹⁰ Náng hui zo rá nghut é wuihke hkyô lé, hkágyuq. Ngò, nungmoq lé tai kyo kôlé, haù nat Tsadán gi, nungmoq lé chyam wú é dông, nungmoq chyáng mã é ra-am lé, htóng mã hkyô pyám rá nghut lhê; hau htàng, nungmoq gi, raxê nyi tup zing-rí é hui zo

kó rá nghut lhê. Shí shoq lhumzui nyi aq, haù hkùn, Ngò, nang lé, asak janmaù byi rá nghut lhê.

¹¹ Gyo rá nohkyap dap sù gi, haù Woi-nyí mai noqkuq hpúng pé lé tai é hkyô lé, gyô yù sháng gaq. Í dâm nghú rá shi é hkyô* gi, wó ung é sù lé, wó záng htung rá a nghut.' gá ri.

Pergamu Myuq Mã É Noqkuq Hpúng Lé Ká Kat É Laiká

¹² Pergamu myuq mã é noqkuq hpúng é mau-mang lagyo lé isu nghú ká kat aq:

Haù shamsó í shut dap é shâm wó Su é dang gi,

¹³ 'Náng nyi é jowò lé, Ngò sê lhê; haù gi, Tsadán é hkohkâm-tanghkuq joq é jang nghut ri. Nghut kôlháng, náng gi, Ngá mying mã lumhkau nyi é nghut lui. Tsadán nyi é jang nghut é nungmoq é myuq mã, Ngá é lhumzui é saksé hpó Lumtipa sat huí é hkùn lháng, náng Ngo lé lumjng é hkyô lé, a hengik pyám nghut ri.

¹⁴ Nghut kôlháng, Ngò, nang lé mara hùn rá hkyô ratsui joq ashí; hkásu mù gá le, hparà lhò pé lé tng byí é zoshuq zô é eq, ashop é dông gungsho zùm yap é mara kut shut rá matú, Israelaq byu pé lé mhoq hpyoq rá hpaqchyí, Balak lé mhoq byí é Balam é mhoqshit hkyô lé myhik zing é byu pé, náng chyáng nyi ri.

¹⁵ Haù eq rajung za, haù Nikola é chángzô pé mhoqshit é hkyô lé myhik zing é byu pé le, náng chyáng nyi ri.

¹⁶ Haù mù lui, myit hng aq! Haù a nghut jáng, Ngò gi, náng chyáng hân jé lé mù, haù Ngá nhut mai htoq é sham eq yhangmoq lé zan rá nghut lhê.

¹⁷ Gyo rá nohkyap dap sù gi, haù Woi-nyí mai noqkuq hpúng pé lé tai é hkyô lé, gyô yù sháng gaq. Wó ung é sù lé gi, haq tô é mannaq muk lé le, mying asik ká tô é luqgok hpyú racham lé le, Ngò byi rá nghut lhê, lhom hap yu é sù za sheq, mying haù lé sé rá nghut lhê.' gá ri.

Htuatira Myuq Mã É Noqkuq Hpúng Lé Ká Kat É Laiká

¹⁸ Htuatira myuq mã é noqkuq hpúng é mau-mang lagyo lé isu nghú ká kat aq:

Haù myishâm su duq nyi é myoqji eq jet é gyi su dut é hkyí dap é Sù, Garai Gasâng é Yhangzô é dang gi,

¹⁹ 'Náng é a-kyang, chyitdap myit, lumjng myit, dojaú é hkyô, hkam jân é hkyô pé lé le, náng gi, hí lhê htoq mã ahkuí je myó zui sai é hkyô lé le, Ngò sê lhê.

²⁰ Nghut kôlháng, yhumsing gùng yhumsing myiqhtoi myhi nghut lhê gá é myiwe Yezebulaq lé, náng nyi nhang tô

* 2:11 Í dâm nghú rá shi é hkyô gá é gi, ngarai ming wang é lé gá lhê.

é yanmai, Ngò, nang lé mara hùn rã hkyô joq ri. Yhang gi, Ngá é dui-nhâng zoshâng wù lé, ashop é đông gungsho zùm yap rã eq hparà lhô pé lé tìng byi é zoshuq zo rã hkyô lé mhoqshít luí, yhangmoq lé hkyô shuí nghoq ri.

²¹ Ngò gi, yhang lé, ashop é đông gungsho zùm yap é hkyô mai myit lình rã ahkýing byi kôlhang, yhang gi, a myit lình nàu nghut ri.

²² Haú mù, Ngò gi, yhang lé, jamjau hui rã yhupchong má dù lhez pyám rã nghut é htoq agó, yhang eq su-myi sulàng lú hkyô kut é bang, yhangmoq kut é hkyô lé myit lình kô é za a nghut jáng, wuìhke jamjau mó hui zo nhâng rã nghut lhê.

²³ Ngò gi, yhang zô pé lé sat pyám rã nghut lhê; haú hkún, Ngò gi, myit nhikhum eq myit é hkyô lé sé Sù nghut é lé le, nungmoq kut é muzó eq rajung za, nungmoq yuq hkangmó lé, Ngò tau byi rã nghut é lé le, haú noqkuq hpúng pé banshoq wó sé kó rã nghut lhê.

²⁴ Mhoqshít hkyô haú lé a châng é eq Tsadán é nìk é hkyô lhaq gã é lé a mhoq yu é, Htuatira myuq má myit gyó tô é bang nungmoq lé, Ngò tai kôlé, nungmoq lé gotù wôlai Ngò jat byi rã a nghut.

²⁵ Ngò jé lé é jé shoq, nungmoq wó tô é lé za myhik zing nyi keq.

²⁶⁻²⁷ Wó ung é eq Ngò ô nau é hkyô lé jìhtùm jé shoq châng é sú lé gi,

"Yhang gi, yhangmoq lé, shamtoq dumbáng eq up† rã nghut lhê;

Yhang gi, tso-au hkoq pé lé su, yhangmoq lé bat hkyop pyám rã nghut lhê.*

gã tô é eq rajung za, Ngò, Ngá Wã chyáng mai ahko ahkáng wó yu é su, mingdán pé lé up rã ahko ahkáng, Ngò byi rã nghut lhê.

²⁸ Ngò gi, yhang lé, haú bó-myhù byi rã nghut lhê.

²⁹ Gyo rã nohkyap dap sù gi, haú Woi-nyí mai noqkuq hpúng pé lé tai é hkyô lé, gyó yù sháng gaq.' gã ri.

3

Sardi Myuq Mã É Noqkuq Hpúng Lé Kã Kat É Laiká

¹ Sardi myuq mã é noqkuq hpúng é maumang lagyo lé isu nghù kã kat aq:

Haú Garai Gasâng é woi-nyí nyhit woi-nyí eq kyí nyhit cham lé chùng Su é dang gi, 'Ngò gi, náng é a-kyang lé sê lhê; nàng gi, asak ùi nyi sù ga kôlhang, shi byuq sù nghut ri.

² Gyíng lò aq! Myit gyó tô é, shi byuq rã za nghut é pé lé, wum-o lhoq kítg yù aq; hkásu mù gã le, Ngá é Garai Gasâng é hí

má, náng é a-kyang a gumjup é hkyô lé, Ngò myang ri.

³ Haú mù, nàng hkásu kut wó hap yu é eq wó gyô yu é hkyô lé, myit bun aq; haú đông châng luí, myit lình aq. Nàng a bìn gyíng é nghut le gi, Ngò hkau sù su lé rã nghut luí, nàng gi, Ngò hká u lé rá lé, sé rã a nghut.

⁴ Nghut kôlhang, Sardi myuq mã, yhum-sing é mebu lé agot a-ù a kut é byù ra-am nyi akò. Haú bang gi, hpyu é mebu wut luí, Ngò eq rahá sô wún kó rã nghut lhê; hkásu mù gã le, yhangmoq gi, gíngdán é bang nghut akò.

⁵ Wó ung é sù gi, haú bang su, hpyu é mebu myang wut rã nghut lhê. Ngò gi, haú yuq é myíng lé, hkã-nhám le, asak jìhpán laiká buk mai yu pyám rá a nghut; hau htoq agó, Ngá Wã é hí má le, Yhâng é maumang lagyo pé é hí má le, haú yuq é myíng lé, Ngò yin yù rã nghut lhê.

⁶ Gyo rã nohkyap dap sù gi, haú Woi-nyí mai noqkuq hpúng pé lé tai é hkyô lé, gyó yù sháng gaq.' gã ri.

Hpiladehpi Myuq Mã É Noqkuq Hpúng Lé Kã Kat É Laiká

⁷ Hpiladehpi myuq mã é noqkuq hpúng é maumang lagyo lé isu nghù kã kat aq:

Haú chyoiyúng é eq tengmán é, Dawiq hkohkam é zoqshi chung é, ó yuq le a wó myhí loshoq hpóng é eq, ó yuq le a wó hpóng loshoq myhí é Su é dang gi,

⁸ 'Nàng kut é muzó pé lé, Ngò sê lhê. Wú aq, ó yuq le a wó myhí é hkum ralhum, Ngò náng hí má hpóng to byi lhê. Nàng gi, wum-o ratsuí za bò kôlhang, Ngá é dang gyo luí, Ngá é myíng lé a he-ngik pyám é hkyô lé, Ngò sê lhê.

⁹ Haú tarajong má noqkuq kôlhang, Tsadán lé dojaú bang nghut é, Yudaq byù a nghut kôlhang, nghut lhê gã é byù mhaú pé lé, Ngò, náng é hkyí wang má, lé paí gop nhâng luí, Ngò, nàng lé chyitdap é hkyô, yhangmoq lé sé nhâng rã nghut lhê.

¹⁰ Nàng gi, myit hìng hìng hkam jan rá é Ngá é hkunmó lé châng nyi bê nghut é yan-mai, myidám htoq mã nyi é bang lé chyam lik wú rá matù, mینگan gón má jé rã nghut é wuìhke jamjau ahkýing mai, Ngò, nang lé lhoq lhut yù rã nghut lhê.

¹¹ Ngò gi, a myáng má jé lé lô rã nghut lhê. Náng é janmaú lé, ó yuq eq le a wó yu pyám byi sháng gaq, nàng wó tô é pé lé myhik zing nyi aq.

¹² Wó ung é sú lé gi, Ngá é Garai Gasâng é noqkuq yhùm mã é hkungzing mó dut nhâng rã nghut lhê. Haú yuq gi, hkã-nhám le haú mai dum htoq ló rá a nghut. Ngò gi, Ngá é Garai Gasâng é myíng lé le, Ngá é Garai

† 2:26-27 Shamtoq dumbáng eq up gã é gi, ahko ahkáng banshoq wó luí, up é lé gã lhê. * 2:26-27 Hkya-on 2:9

Gasâng chyáng mai htoq luí, mauhkûng mai gyó lé lo é, Yerusalem wà mó Asik ga é, Ngá é Garai Gasâng é myuq myíng lé le, Ngá é myíng sik lé le, yhâng chyáng kâ tap byi rá nghut lhê.

¹³ Gyo rá nohkyap dap sù gi, haù Woi-nyí mai noqkuq hpúng pé lé tai é hkyô lé, gyô yù sháng gaq.' gâ ri.

Ladoki Myuq Mã É Noqkuq Hpúng Lé Kâ Kat É Laiká

¹⁴ Ladoki wà mó mã é noqkuq hpúng é mau-mang lagyo lé isu nghú kâ kat aq:

Haù lhumzuí é eq tengmán é saksé nghut é, Garai Gasang hpan tô é lé up é, Amen gá Su é dang gi,

¹⁵ 'Ngò gi, nàng kut é muzó lé sê lhê; nàng gi, gú le a nghut, nye le a nghut dut ri. Nàng gi, gú jáng jàng gú, nye jáng jàng nye dut rá lé, Ngò ô nau ri.

¹⁶ Nghut kôlháng, nàng gi, gú le a nghut, nye lé a nghut, lumnye nghut é yanmai, Ngò gi, nang lé, Ngá é nhut mai byé htoq pyám rá za nghut bê.

¹⁷ "Ngò gi, wó sù nghut lhê; ngò gi, sutzè gyaí wó bê nghut luí, haí lháng a ra lo." ga nàng tai ri. Nghut kôlháng, nàng gi, wuñke jamjau hui sù, asho awui dut sù, myùng sù, myoqjit sù eq achín dut sù nghut é lé, nàng a sé myhi-nhung.

¹⁸ Haù mù luí, nàng gi, wó sù sùt sù wó dut sháng gaq, myi má jên yu é hng lé le, nàng achín dut é hoq hpu hkyô lé, wó nghop pyám sháng gaq, wut rá matú, mebu hpyú lé le, nàng myoq wó myáng sháng gaq, nàng é myoqjí má kat rá matú, myoq chí lé le, nàng, Ngá chyáng mai wù yù rá matú, Ngò, nang lé hpaqchyí byí lhê.

¹⁹ Ngò chyitdap é bang lé gi, tan luí, mhogshit lhê. Haù mù, nàng gi, hân bún gying luí, myit lhng aq.

²⁰ Wú aq! Ngò gi, hkum yâm má yap to luí, hkum lé kok nyi lhê. Rayuq yuq, Ngá é htê lé wó gyo luí, hkum hpóng byí é nghut jáng, Ngò gi, wàng mù, haù yuq eq rahá zo shuq rá nghut lhê; haù yuq le, Ngò eq rahá zo shuq rá nghut lhê.

²¹ Ngò gi, ùng luí, Ngá Wa eq rahá Yhâng é hkohkâm-tanghkuq má zung é eq rajung za, wó ùng é sù lé gi, Ngò eq rahá Ngá é hkohkâm-tanghkuq má zùng rá ahkáng, Ngò byi rá nghut lhê.

²² Gyo rá nohkyap dap é sù gi, haù Woi-nyí mai noqkuq hpúng pé lé tai é hkyô lé, gyô yù sháng gaq.' gâ é nghut ri." gâ ri.

4

Mauhkûng Htoq Mã Hkohkâm-tanghkuq Joq É Hkyô

¹ Hau htâng má, ngò wú kat le, mauhkûng má hkum ralhum búng tô é lé myang ri. Ngò

sâng-hí dàm wó gyô é tut htê su gâ é danghtê ngo lé tai é gi, "Shí má doq lò aq, htângnung má dut lò rá hkyô pé lé, Ngò, nang lé tún shit bá." gâ ri.

² Haù hkûn jáng yhang, ngò gi, Woi-nyí má moq byuq ló luí, mauhkûng htoq má hkohkâm-tanghkuq ralhum joq é lé myàng ri; tanghkuq haù má, byù rayuq zung tô ri.

³ Haù má zung to Su é isâm gi, huhpé eq ne yúng lungsgng su dut ri. Huí nyui lungsgng su dut é woggan síng-yang gi, haù hkohkâm-tanghkuq má hkông lhng tô ri.

⁴ Hkohkâm-tanghkuq hau é lhinghkyuq má, hkohkâm-tanghkuq gotú í xe myi lhum le joq to luí, hpyu é mebu wut mù, ulhum má hng janmaù tsùng tô é suwún í xe myi yuq gi, haù má zung tô bum akò.

⁵ Haù hkohkâm-tanghkuq mai, lhap hpyat é, myíng hùm é eq maugum gùm é pé dut htoq lo ri. Haù hkohkâm-tanghkuq hí má, myi-kok nyhit lhum le duq tô ri; haù pé gi, Garai Gasâng é woi-nyí nyhit woi-nyí nghut ri.

⁶ Hau htoq agó, san zâ é myoqjàm su dut mã é wui-nhông le, haù hkohkâm-tanghkuq hí má dng tô ri.

Haù hkohkâm-tanghkuq agùng má le, lhinghkyuq má le, hí-u nunghtàng lhinghkyuq myoqjí dap é dui é dusak myí du nyi tô ri.

⁷ Dui é dusak sâng-hí du gi, hkanghkyi su dut ri; í du nghú rá du gi, nohtó su dut ri; sùm du nghú rá dù é myoqdong gi, byu myoqdong su dut ri; myí du nghú rá du gi, dng wún é zung su dut ri.

⁸ Dui é dusak myí du haù gi, du hkangmó dng hkyuq lhum lhum dap é htoq agó, lhinghkyuq má myoqjí kóm dap luí, dng hkaù má lháng dap ri. Yhangmoq, nyí myín hkâ-nhám a no loshoq tai nyi kò é gi.

"A-nham pyat le, ahkuí pyat le, htang pyat má le, rú nyi nyi é, haù wum-o a-tsam dik shoq bó Sù Yhumsing Garai Gasang gi,

chyoiyúng, chyoiyúng, chyoiyúng nyi ri." gâ akò.

⁹ Haù dui é dusak myí du gi, hkohkâm-tanghkuq má zung é, pyat dedu ahtum abyuq dui nyi Su chyáng, hpungwup shingkang, aróng eq jeju bun hkyô byí é hkangmó,

¹⁰ haù suwún í xe myi yuq gi, hkohkâm-tanghkuq má zung é, pyat dedu ahtum abyuq dui nyi Su é hí má, ngóm gop luí, Yhang lé noqkuq akò. Yhangmoq gi, yhangmoq é hkohkâm-janmaù lé, haù hkohkâm-tanghkuq hí má hkyut to mù, tai kò é gi,

¹¹ "Ngamoq é Yhumsing eq Garai Gasang é, nyi mi-nyí, joq mijoq lé, Nàng hpan to bê nghut luí,

haù pé gi, Nàng ô nau é dng hpan tô é hui bê nghut mù, nyi to joq tô bùm bê nghut é yanmai,

Nàng gi, hpungwup shing kang, aróng eq
hpungwup a-tsam lé, hap yù gíng Sú
nghut ri."
gâ akô.

5

Chyúmding Eq Sauzo

¹ Hau htàng, ngò gi, hkohkâm-tanghkuq má zung to Su é loqyo loq má, í shut é laiká kâ to é, dizik nyhit lhum tap tô é chyúmding le myang ri.

² Hau htoq agó, a-tsam mó bo é maumang lagyo rayuq gi, "Hau dizik pé lé hí pyám rá eq chyúmding lé hpóng rá gi, ó yuq wá gingdán lhê lhu?" ga lui, htê mó eq wut tai nyi é lé le, ngò myang ri.

³ Nghut kôlhang, mauhkûng htoq má le, myigùng htoq má le, myigùng ô má le, hau chyúmding lé wó hpóng rá eq ahkaú má wó wú rá byù rayuq lháng a nyi nghut ri.

⁴ Hau chyúmding lé hpóng mù, ahkaú má wú rá gingdán é byù rayuq hkâlháng a nyi é yanmai, ngò gyai yhang ngau pyám é nghut lhê.

⁵ Hau hkûn, hau suwún wui má é rayuq, ngo lé tai é gi, "Hkâ-ngaú! Wú aq, hau Yudaq byuhú má é Hkanghkyi nghu é, hau Dawiq é Amyit nghut Sú gi, ùng bê nghut lui, hau chyúmding eq hau má é dizik nyhit lhum lé wó hpóng lhê." gâ ri.

⁶ Hau htàng, hau dui é dusak myi du eq suwún wui é agùng má é, hkohkâm-tanghkuq agùng má, sat hui bê su dut é Sauzo radu yap tô é lé, ngò myang ri. Sauzo hau gi, hkyuí nyhit lhum eq myoqjí nyhit lhum dap ri. Myoqjí hau nyhit lhum gi, myidàm htoq gón má nhang htoq kat é, Garai Gasâng é woi-nyí nyhit woi-nyí nghut ri.

⁷ Hau Sauzo gi, lé mù, hkohkâm-tanghkuq má zung to Su é loqyò má é chyúmding lé yu ri.

⁸ Hau chyúmding lé yu é hkûn jáng, hau dui é dusak myi du eq suwún í xe myi yuq gi, Sauzo é hí má ngóm gop akô. Yhangmoq yuq hkangmó gi, ting eq sân-yùng bâng é kyúdung dang gâ é namngón jung byíng mui tô é hîng góm pé le chung bum akô nghut ri.

⁹ Yhangmoq gi,
"Nàng gi, hau chyúmding lé yù rá eq hau é dizik pé lé hpóng rá gingdán Sú nghut ri.

Hai mù gâ le, Nàng gi, sat hui bê nghut lui, byuhú hkangmó mai le, myíng hkangmó mai le,

byù myú hkangmó mai le, mingdán hkangmó mai le, Garai Gasâng é matú,

Náng é sui eq byù pé lé wui hpyit yù bê nghut ri.

¹⁰ Nga-nhùng é Garai Gasang lé dojaú rá matú, Nàng gi, yhangmoq lé, mingdán

byu pé eq hkyangjông pé dut nhâng bê nghut lui,
yhangmoq gi, myidàm htoq má up kó rá nghut lhê."

ga lui, mahkôn sik ralhumm hkon akô nghut ri.

¹¹ Hau hkûn, ngò wú kat le, hau hkohkâm-tanghkuq lhíngkyuq má le, dui é dusak pé eq suwún wui é lhíngkyuq má le, nyi tô bum é maumang lagyo ajùm ayò mun mun sen sen é htê lé wó gyò ri.

¹² Yhangmoq gi,
"Hau sat hui bê Sauzo gi, hpungwup a-tsam, sutzê, hpaqchyí byéng-yá, wum-o, aróng sitang,

hpungwup shing kang eq hkya-on kungtôn hkyô lé, hap yù gíng ri."
ga lui, htê mó eq ton bum akô nghut ri.

¹³ Hau htoq agó, mauhkûng htoq má nyi é, myigùng htoq má nyi é, myigùng ô má nyi é, wuiming má nyi é, hpan to hui é lhunglháng gí,

"Hkya-on kungtôn hkyô, aróng sitang, hpungwup shing kang eq hpungwup a-tsam gi,

hau hkohkâm-tanghkuq má zung tô é Sú eq Sauzo chyáng,

pyat dedu ahtum abyuq ru joq nyí sháng gaq ô!"
ga lui, ton nyi bùm kô é lé, ngò wó gyò ri.

¹⁴ Hau dui é dusak myi du gi, "Amen" ga tai jang, hau suwún wui gi, ngóm gop lui noqkuq akô nghut ri.

6

Dizik Nyhit Lhúm É Hkyô

¹ Hau Sauzo gi, dizik nyhit lhum má é sâng-hí lhum lé hpóng kat é hkûn, ngò myang é nghut lhê. Hau htàng, hau dui é dusak myi du má é radu gi, maugum su gâ é htê mó eq, "Lé aq." gâ é lé, ngò wó gyò ri.

² Ngò wú kat é hkûn, ngá é myoq hí má myang hpyú radu nyi tô é lé myang ri! Hau má jí to sú gi, lai rahpu chung tô é htoq agó, yhang lé, janmaú ralhumm tsùng to byí lui, ùng budang wó rá matú ùng sú rayuq dòng htoq ló ri.

³ Hau Sauzo gi, í lhum nghú rá dizik lé hpóng kat é hkûn, hau í du nghú rá dui é dusak gi, "Lé aq." ga tai é lé, ngò wó gyò ri.

⁴ Hau htàng, myang nè radu htoq lo ri; hau má jí tô é sú gi, myidàm htoq má é nguóngón simsaq hkyô lé wup yù rá eq, byù yhangchang rayuq eq rayuq sat lhum nhâng rá a-tsam byí é hui sú nghut lui, yhang lé shâm mó rahkyam le byi to bê nghut ri.

⁵ Hau Sauzo gi, sùm lhum nghú rá dizik lé hpóng kat é hkûn, hau sùm du nghú rá dui é dusak gi, "Lé aq." ga tai é lé, ngò wó gyò ri. Ngò wú kat le, myang noq radu ngá myoq hí

má nyi tô é lé myang ri! Haú má jî tô é sù gi, yhang é loq má jàng rahpu chung to ri.

⁶ Haú hkûn, "Ra-nyí é zuihpau gi, sungso rabyé, ra-nyí é zuihpau gi, muk-yo guq sum byé nghut lhê; haú tsanlun xû eq tsibiyiq wing lé kúm gi, hkâlhoq hten kó." gá é htê, haú dui é dusak myí du hkaú mai htoq ló é su gá é lé, ngò wó gyô ri.

⁷ Haú Sauzo gi, myí lhum nghû râ dizik lé hpông kat é hkûn, haú myí du nghû râ dui é dusak gi, "Lé aq." ga tai é lé, ngò wó gyô ri.

⁸ Ngò wú kat é hkûn, ngá é myoq hí má, myang muí radu nyi tô é lé myang ri! Haú má jî to su é mying gi, Shí hkyô gá ri; Moming le, yhang é htang má châng tô ri; yhangnhik gi, sham eq, mutmó gyó é eq, wúm gyó é eq, tân é yosô-ze eq, myidám htoq myí tú mâ é ratú má nyi é bang lé sat pyám râ ahkáng wó yu to bekó nghut ri.

⁹ Sauzo gi, ngo lhum nghû râ dizik lé hpông kat é hkûn, Garai Gasâng é mungdâng é yanmai le, yhumsing hkâm é saksê é yanmai le, sat hui bâng é sobyô pé gi, hkungga gyap a-ô má nyi tô bùm kô é lé, ngò myang ri.

¹⁰ Yhangmoq gi, "Chyoiyúng é eq tengmán é, ahko ahkáng lhunglhang wó é Yhumsing é, myidám htoq má nyi é byu pé lé, ngamoq é sui manglat dam a byí é eq tarâ a jéyáng é za, hkâ-myháng jé shoq nyi nyi râ lúhú?" ga, htê mó eq garu bum akó.

¹¹ Haú hkûn, yhangmoq yuq hkgangmó gi, bu hpyú hing radung dung hut é hui lui, yhangmoq su sat hui râ bang, yhangmoq é byinzùm dui-nhâng zoshâng wui nghut é gumang wui sat hui ngap é hkûn jé shoq, razup zim za nyi shi keq ga tai é lé wó gyô akó nghut ri.

¹² Hkyuq lhum nghû râ dizik lé, Yhang hpông kat é hkûn, ngò myang ri; haú u lé, layàng mó le nún lo ri; haú bui gi, saumaú noq eq woq é pán su noq byuq ri; haú lhamó lhum gón gi, sui su ne byuq ri;

¹³ maihpáng gâm lé, lai mó eq lo mut nhùn kat é hkûn, a mying shí é maihpáng-shi yoq gyó é su, mauhkung má é kyí pé gi, myidám htoq má byit gyó lo bum ri.

¹⁴ Haú mauhkung gi, laiká lé ding lhûm é su htot pyám é hui lui, bùm hkgang bùm mó eq zinlóng lhumjup pé gi, yhang é jowó mai hui pyám é hui ri.

¹⁵ Haú hkûn, haú myidám htoq má é hkohkam pé, uphkang bang, gyezaú pé, sut wó bang, wum-o a-tsam bô bang, jun pé eq luthkyô wó é lhunglhang bang gi, bùm dong pé eq bùm pé má é luqgok gyoro pé má haq tô bùm uchyang,

¹⁶ haú bùm pé eq luqgok pé lé, "Ngamoq é gùng htoq má gyó ke kó laq! Haú hkohkâm-tanghkuq má zung to Su é myoq hí mai le, haú Sauzô é nhikmo-yô é hkyô mai le, ngamoq lé haq pyám kó laq.

¹⁷ Hkâsu mù gá le, haú Yhangnhik nhikmo-yô é buinyi mó gi, jé bê nghut ri; ó yuq wá wó jân yap nyi râ lúhú?" ga garú tai bum akó nghut ri.

7

144,000 Yuq Masat Lhô Tap Hui Kô É Hkyô

¹ Hau htâng má, maumang lagyo myi yuq gi, maumyí myi chyûn má yap to mù, myigùng htoq má le, wui ming htoq má le, siggâm pé má le, lai a hik sháng gaq ga, myi shut má é lai lé zui zing to kô é lé, ngò myang ri.

² Haú hkûn, haú dui nyi é Garai Gasâng é masat lhô chung é maumang lagyo gotú rayuq gi, buihtoq hkyam mai htoq lé lo é lé, ngò dum myang ri. Yhang gi, haú myigùng eq wui ming lé lhoq hten râ ahkáng wó to é maumang lagyo myi yuq haú lé,

³ "Nga-nhûng é Garai Gasâng dui-nhâng zoshâng wui é ngelang má, ngamoq mai masat lhô a tap byi byi gi, haú myigùng, wui ming eq siggâm pé lé hkâlhoq hten shi kó." ga htê mó eq wut tai kat ri.

⁴ Haú hkûn, masat lhô tap hui é bang byù hkâ-myhó yuq nghut é lé, ngò wó gyô ri. Israelaq byuhú banshoq má é 144,000 yuq nghut ri.

⁵ Masat lhô tap hui yu é,
Yudaq up má é bang gi, 12,000 yuq,
Rubin up má é bang gi, 12,000 yuq,
Gat up má é bang gi, 12,000 yuq,
⁶ Ashe up má é bang gi, 12,000 yuq,
Nahtali up má é bang gi, 12,000 yuq,
Manase up má é bang gi, 12,000 yuq,
⁷ Simeon up má é bang gi, 12,000 yuq,
Lewiq up má é bang gi, 12,000 yuq,
Yishahka up má é bang gi, 12,000 yuq,
⁸ Zebulun up má é bang gi, 12,000 yuq,
Yosep up má é bang gi, 12,000 yuq,
Ben-yamýin up má é bang gi, 12,000 yuq,
nghut bum akó.

Bu Hpyú Hing Wut Bâng É Hkyô

⁹ Hau htâng, ngò wú kat é hkûn, mingdán hkgangmó mai le, byuhú hkgangmó mai le, mying chângjup mai le, lé é bang, ó yuq lhang a ung nghap é byù moq mó gi, haú hkohkâm-tanghkuq é hí má le, Sauzô é hí má le, yap nyi bùm kô é lé myang ri; yhangmoq gi, bu hpyú hing wut lui, yhangmoq é loq má byùm-haq chung tô bùm kômú,

¹⁰ "Hkyi yù hkyô gi, haú hkohkâm-tanghkuq má zung tô é nga-nhûng é Garai Gasang eq Sauzo chyáng má é nghut ri ô!"

ga lui, htê mó eq garú bum akó nghut ri.

¹¹ Haú maumang lagyo lhunglhang bang gi, haú hkohkâm-tanghkuq é lhinghkyuq má le, suwún wui eq dui é dusak myí du

é hlinghkyuq má le, yap tô akô nghut ri. Yhangmoq gi, hkohkâm-tanghkuq hí má myoqdong ngóm gop mù, Garai Gasang lé noqkuq uchyang,

¹²"Amen! Hkya-on kungton hkyô eq hpungwup shinghang,

hpaqchyí byéng-yá eq jeju bun hkyô, aróng, hpungwup a-tsam eq wum-o gi, nga-nhùng é Garai Gasâng chyáng pyat dedu ahtum abyuq ru joq nyí sháng gaq ô! Amen!"

ga tai bum akô.

¹³Hau hkûn, suwún wui mâ é rayuq gi, "Shí bu hpyú hng wut é bang gi, ô pé lú? Yhangmoq gi, hkâmai lé é bang nghut akô lú?" ga ngo lé myí ri.

¹⁴Ngò gi, "Suwún hpô é, nàng sê lhê." nghú tú tai jáng, yhang gi, "Shí bang gi, hau wuihke jamjau mó mai wó lut htoq lô lui, yhangmoq é bu hng lé, hau Sauzô é sui má chí hpyú yù bê bang nghut akô.

¹⁵Hau mù, yhangmoq gi, Garai Gasâng é hkohkâm-tanghkuq hí má nyí mù, Yhâng é noqkuq yhùm má, nyí, myín Yhang lé dojaú nyí kô é nghut lhê; hau hkohkâm-tanghkuq má zúng Sù gi, Yhâng é jonghpang lé, yhangmoq é ahtoq má nghop byi rá* nghut lhê.

¹⁶Yhangmoq gi, hkâ-nhám le, zòmut wuishit hui rá a nghut lo; bui lhap é le, hkyíng hkyíng nyé é le, yhangmoq lé wó záng rá a nghut.

¹⁷Hkâsu mù gâ le, hau hkohkâm-tanghkuq agùng má é Sauzo gi, yhangmoq é sau-rém sú dut rá nghut lui, Yhang gi, yhangmoq lé, asak wuibúm jé shoq shuí é rá nghut lhê. Hau htoq agó, Garai Gasang gi, yhangmoq é ngaubyi sháng shoq sut pyám byi rá nghut lhê." ga tai ri.

8

Nyhit Lhum Nghú Râ Dizik Eq Namgón Jung Nyhê É Hng Góm

¹Hau Sauzo gi, nyhit lhum nghú rá dizik lé hpông kat é hkûn, mauhkúng htoq má hkyíng hkum rawuí kô zím byuq ri.

²Hau hkûn, Garai Gasâng é hí má yap tô é maumang lagyo nyhit yuq lé, ngò myang ri; yhangmoq lé, tut nyhit lhum byí tô ri.

³Namgón jung nyhê é hng góm chung é maumang lagyo gotú rayuq gi, hau hkungga gyap yàm má lé yap tô ri. Hau hkohkâm-tanghkuq hí má é hng hkungga gyap má, sân-yúng bang banshoq é kyúdung dang eq rahá nhông byi rá matú, namgón jung gyai myo shoq, yhang lé byí tô ri.

⁴Hau namgón júng é myihkau gi, sân-yúng bâng é kyúdung danghtê eq rahá, maumang lagyo hau yuq é loq mai Garai Gasâng chyáng hkyang rot lô bê nghut ri.

* 7:15 Yhâng é jonghpang lé, yhangmoq é ahtoq má nghop byi rá, gâ é gi, yhangmoq eq rahá nyí mù, yhangmoq lé upzúng nyí rá gâ é nghut lhê.

⁵Hau htâng, maumang lagyo hau yuq gi, góm lé yù mù, hkungga gyap má é myí lhoq pyíng yù lui, myidàm htoq má dú hkyô kat é hkûn, maugum mó gúm é, mying hùm é, lhap hpyat é eq layàng nún é pé dut htoq lo ri.

Tut Mut É Hkyô

⁶Hau htâng, tut nyhit lhum wó é maumang lagyo nyhit yuq gi, tut mut rá hen akô nghut ri.

⁷Sâng-hí yuq nghú rá maumang lagyo gi, yhâng é tut lé mut kat ri; hau hkûn, sui nyó é likwò eq myí htoq lô mù, hau lé myidàm htoq má lhoq hkyô kat jáng, maumyí sum tú má é ratú eq siggâm sum tú má é ratú nyé gyó byuq é htoq agó, wàhu mhanzo banshoq le nyé gyó byuq bê nghut ri.

⁸Í yuq nghú rá maumang lagyo gi, yhâng é tut lé mut kat ri; hau hkûn, myí dap tô é bùm mó su é lé, wuishuq lung-aú má dú hkyô kat ri. Wuishuq lung-aú sum tú má é ratú gi, sui dut byuq bê nghut ri;

⁹wuishuq lung-aú má é dui jung sum tú má é ratú gi, shi byuq lui, wui-sanghpo pé sum tú má é ratú gi, htên byuq bê nghut ri.

¹⁰Sum yuq nghú rá maumang lagyo gi, yhâng é tut lé mut kat ri; hau hkûn, myihu dùm su dut é kyí mó racham gi, mauhkúng mai byit gyó lô mù, wuilàng sum tú má é ratú eq wuibúm pé htoq má lo gyó záng ri.

¹¹Kyí hau é myíng gi, Kyí Kyí Hko gâ é nghut ri. Wuilàng sum tú má é ratú hkô byuq lui, wui hau hkô byuq é yanmai byù myo myo shi byuq bekô nghut ri.

¹²Myí yuq nghú rá maumang lagyo gi, yhâng é tut lé mut kat ri; hau hkûn, bui sum tú ratú, lhamó sum tú ratú, kyí sum tú ratú gi, hten lui, hau pé é sum tú ratú gi, mauchut byuq bê nghut ri. Hau htoq agó, nyí sum tú má é ratú le, myín sum tú má é ratú le, maubó a joq dut byuq ri.

¹³Ngò wú nyi le, zunbung radu gi, maulat má dang wún mù, "Gotú maumang lagyo sum yuq eq mut rá nghut é, tut hte é yanmai, myidàm htoq má nyí bâng é matú, dingnyé, dingnyé, dingnyé nghut ri." ga lui, htê mó eq garú tai ri.

9

¹Ngo yuq nghú rá maumang lagyo gi, yhâng é tut mut kat é hkûn, mauhkúng mai myidàm htoq má byit gyó tô é kyí racham lé, ngò myang ri. Hau nik dik htúm é Lasang-dông é zoqshi gi, kyí hau lé byí tô ri.

²Kyí hau gi, nik dik htúm é Lasang-dong lé hpông kat é hkûn, myí bunghkýung mó mai htoq lo é myihkau dùm sú é myihkau gi, dong hau mai htoq lo ri. Nik dik htúm é Lasang-dong hau má é myihkau dum é

yanmai, bui eq maulat gi, mauchut byuq bê nghut ri.

³ Myihkau dùm haù mai dinggám pé htoq lô mù, myidàm htoq má gyó lé akò; myidàm htoq má é gogok é a-tsam sù é a-tsam le, yhangmoq lé byi tò bê nghut ri.

⁴ Myidàm htoq má é wàhu pé lé le, mhan-haq hpoqnoq pé lé le, siggám pé lé le a lhoq htên é za, yhumsing é ngelang má Garai Gasâng é masat lhò a dap é byu pé lé baù zing-ri rà matú, yhangmoq lé tai tò ri.

⁵ Nghut kôlhang, haù bang lé sat pyám rà ahkáng kúm gi, yhangmoq a wó e za, lhamó ngo hkyap tup haù bang lé zing-ri rà ahkáng za ru wó akò nghut ri. Haù bang hui zô é shí-nò jamjau gi, gogok eq pat hkún no hpù é su yhang nghut ri.

⁶ Haù buinyi pé má, byu pé gi, shí hkyô hô kôlhang, myàng kó rà a nghut; shí nau dik kôlhang, haù shí hkyô gi, yhangmoq chyáng mai hpang byuq rà nghut lhê.

⁷ Dinggám haù pé gi, majan zan rà matú bui tò é myang pé su dut akò. Yhangmoq é ulhum má gi, hìng janmaù sù é tsúng tò é htoq agó, yhangmoq é myoqdong gi, byu myoqdong su dut bum akò nghut ri.

⁸ Yhangmoq é xam gi, myiwe wui é xam su dut lui, yhangmoq é zui gi, hkanghkyi zui su dut ri.

⁹ Yhangmoq é wànggò-long gi, joqtoq wànggò-long su dut ri; yhangmoq é dùng mying é htê gi, majan pá shut òn yán wang ló é myang jùm eq myanglhêng pé mying hùm é htê su gà ri.

¹⁰ Yhangmoq é sho-myi gi, nyin dap é gogok é sho-myi su dut ri; yhangmoq é sho-myi má, lhamó ngo hkyap tup byu pé lé zing-ri rà a-tsam bo ri.

¹¹ Yhangmoq é hkohkâm gi, nik dik htùm é Lasang-dong má é maumang nghut ri; haù é mying gi, Hebre mying dong Abadon ga, Grik mying dong Apolion* gà ri.

¹² Sâng-hí lhum dingnyé gi, lai ló byuq bê nghut ri; nghut kôlhang, dingnyé í lhum jé lô shirà nghut lhê.

¹³ Haù hkyuq yuq ngù rà maumang lagyo gi, yhang é tut mut kat ri. Haù hkún, Garai Gasâng é hí má joq é hìng hkungga gyp é hkyuú myi lhum mai htê htoq lo é gi,

¹⁴ "Uhprat wui mó llang má tuí lhung tò é maumang myi yuq lé, nhang pyám aq." ga tut chung tò é hkyuq yuq ngù rà maumang lagyo lé tai é lé, ngò wó gyô ri.

¹⁵ Haù hkún, xângzo byu sum tú má é ratú lé sat pyám rà matú, ahkying, buinyi, lhôhkyap, zanwut lé, rì rì hen to bê nghut é haù maumang myi yuq lé nhang kat bê nghut ri.

¹⁶ Myang ji jì é gyé jum gi, byu du sen í hkying bo é hkyô lé, ngò wó gyô ri.

¹⁷ Ngò, shing-rán myang é má, myang jùm eq haù pé má ji bâng é wànggò-long pé gi, myi su ne é, shing shing nyui é eq hang su hui é nghut ri. Myáng jum é ulhum gi, hkanghkyi pé é ulhum su dut lui, yhangmoq é nhut mai, myi, myihkau eq hang pé htoq lo ri.

¹⁸ Haù yhangmoq é nhut mai htoq lo é myi, myihkau eq hang gà é wùm ihkyp sùm jùng é yanmai, xângzo byu sum tú ratú gi, sat hui bekò nghut ri.

¹⁹ Myang haù jum é sho-myi gi, lhangmùi su dut lui, ulhum dap mù, hte sé é yanmai, yhangmoq é a-tsam gi, nhut eq sho-myi pé má nghut ri.

²⁰ Wùm ihkyp haù sùm jung mai wó lut lui, myit gyó tò é xângzo byu pé gi, yhangmoq é loq pé eq zui sai é muzó mai, myit a lhung shi kò é htoq agó, nat gâng pé lé le, a wó myàng, a wó gyo, a wó sò é, hìng, ngùn, gyi, luqgok, sik pé é alhò lé le, noqkuq é hkyô lé a tò pyám shi kò nghut ri.

²¹ Hau htoq agó, yhangmoq gi, byu sat é mù mai le, myoqheq hpaqchyí mù mai le, ashop é òng gungsho zùm yap é hkyô mai le, hkaù é mai le, myit a lhung shi kò nghut ri.

10

Maumang Eq Laiká Ding É Hkyô

¹ Hau htâng, ngò gi, wum-o bo é maumang lagyo gotù rayuq, mauhkùng mai gyó lé lo é lé myang é nghut lhê. Yhang lé gi, mhut eq htup yup to lui, yhang é u htoq má woggan síng-yang gyán tò ri; yhang é myoqdong gi, bui su dut lui, yhang é hkyi gi, myi zing su dut ri.

² Yhang é loq má gi, hpông tò é laiká ding zo ralhum chung tò ri; yhang é loqyo hkyi gi, wuishuq lung-aù má nang, yhang é loqpaí hkyi gi, myigùng htoq má nang to lui,

³ hkanghkyi mying é htê su ga, htê mó eq garú kat ri. Yhang garu kat jáng, maugum htê nyhit lhum tú gùm kat ri.

⁴ Haù maugum htê nyhit lhum tú gùm kat é hkún, ngò ká rà da jáng, "Haù maugum htê nyhit lhum tú gùm é hkyô lé zaù pyám aq; haù pé lé hkákà to." ga, mauhkùng mai danghtê htoq lo é lé ngò wó gyô kat ri.

⁵ Haù hkún, wuishuq lung-aù eq myigùng htoq má nang yap tò é lé, ngò myang é maumang lagyo haù gi, yhang é loqyo loq lé mauhkùng shut tu toq kat ri.

⁶ Haù mù, yhang gi, mauhkùng eq haù má nyi é lhunglhang lé le, myidàm htoq eq haù má nyi é lhunglhang lé le, wuishuq lung-aù eq haù má nyi é lhunglhang lé le, hpan tò é, pyat dedu ahtum abyuq dui nyi Su é mying lé lang lui, dakam é gi, "Ahkying ratsuí le, lhoq myáng nyi lo rà a nghut!

* 9:11 Apolion gà é lichyám gi, lhoq hten lhoq hpyoq sù gà é nghut ri.

⁷ Nghut kôlhang, Garai Gasang mai Yhâng é dui-nhâng zoshâng wui nghut é myiqhtoi pé lé tai to bê é danglú eq rajung za, Yhâng é zaú tò é hkyô gi, nyhit yuq nghù rá mau-mang lagyô eq yhâng é tut lé mut myihng é buinyi pé má, shit rá nghut lhê." gâ ri.

⁸ Hau htoq agó, ngò wó gyô wú bê mauhkúng mã é htê, ngo lé dum tai é gi, "Hau wuishuq lung-au eq myidàm htoq má nâng yap tô é maumang lagyô loq má hpông tô é laiká ding lé, ê yù aq." gâ ri.

⁹ Hau mù, ngò gi, ê lui, laiká ding zo hau, ngo lé byi rá matú maumang lagyo hau lé é dung le, yang gi, "Shí lé yù mù, zo kat aq. Nâng é wam má hko rá nghut lhê; nghut kôle, nâng é nhut má gi, byo-i su yang chui rá nghut lhê." gâ ri.

¹⁰ Hau mù, ngò gi, laiká ding zo hau lé, maumang lagyô é loq mai yù mù, zô é nghut lhê; hau hkûn, ngá é nhut má gi, byo-i su yang chui nghâm ri; nghut kôle, bàn zô kat é hkûn, ngá é wam hkaú má hkô bê nghut ri.

¹¹ Hau hkûn, "Nâng gi, byù myú myo myo eq séng lui lé, mingdán myo myo eq séng lui le, mying ahú hú eq séng lui lé, hkohkam pé myo myo eq séng lui lé, myiqhtoi dum htoi ra rá nghut lhê." ga, ngo lé tai kyô ri.

11

Saksé Í Yuq É Hkyô

¹ Ké rá jung dumbáng su dut é jàm-yang rahkat ngo lé byi lui, ngo lé tai é gi, "É mù, hau Garai Gasâng é noqkuq yhâm lé le, hkungga gyap lé le, kê wú lui, hau má noqkuq é bang lé nghap wú aq.

² Nghut kôlhang, shinggan mã é wâng lé gi, a kê é za lhai pyâm to aq; hkâsu mù gâ le, hau gi, tûngbau pé lé byi to bê nghut lhê. Yhangmoq gi, hau chyoiyúng myuq lé, lhamó myixe í hkyap tup chôm nang kó rá nghut lhê.

³ Hau htoq agó, ngò gi, ngá é saksé í yuq lé a-tsam byi rá nghut lui, yangnhik gi, ji mebu wut* mù, buinyi 1260 nyi tup myiqhtoi htoi kó rá nghut lhê." gâ ri.

⁴ Yangnhik gi, hau myidàm Yhumsing é hí má yuq tô é tsanlun gâm í gâm eq myi-bung tsungjang í lhum nghut ri.

⁵ Byù rayuq yuq, yangnhik lé zing-ri nau é nghut jâng, yangnhik é nhut mai myi htoq lô mù, yangnhik é gye pé lé nyhê hkyô pyâm rá nghut lhê. Yangnhik lé kâm zing-ri é sú gi, hau su kut sat pyâm é hui zo rá nghut lhê.

⁶ Yangnhik gi, yangnhik myiqhtoi htoi nyi é buinyi pé má mau a wò rá matú, mauhkúng lé myhi pyâm rá a-tsam wó akò; hau htoq agó, wui pé lé sui dut nhâng rá eq, nau é hkûn, wúm ajung jùng eq myidàm

htoq lé ihkyup hkyô byi rá a-tsam le, wó akò nghut ri.

⁷ Yangnhik gi, saksé ban hkâm é hkûn, hau nik dik htùm é Lasang-dong mai htoq lo é tân jung dusak gi, yangnhik lé htím mù, úng lui, sat pyâm rá nghut lhê.

⁸ Yangnhik é mâng lé gi, danglhung dông Sodom eq Egotuq gâ é, yangnhik é Yhumsing lé le, tapzing má jén sat pyâm é myuq mó é hkyô gùng má, leq to rá nghut lhê.

⁹ Hau hkûn, byù myú hkangmó mã é bang, byuhú hkangmó mã é bang, mying hkangmó mã é bang, mingdán hkangmó mã é bang gi, yangnhik é mâng lé myhup pyâm rá matú a gyo kô é za, sum nyi eq rahkyuí tup chôm wú nyi kó rá nghut lhê.

¹⁰ Myidàm htoq má nyi é bang gi, yangnhik shi byuq é yanmai gabú nguingón lui, rayuq eq rayuq chyunhuq byi lhâm é dông ngón poi kut kó rá nghut lhê. Hkâsu mù gâ le, myiqhtoi hau nhik gi, myidàm htoq má nyi nyi é bang lé, wuñke jamjau byi lai bê su nhik nghut akò.

¹¹ Nghut kôlhang, sum nyi eq rahkyuí tup lai é htâng má, Garai Gasâng chyáng mã é asak soq gi, yangnhik chyáng wàng mù, yangnhik gi, toq yap tô kô é nghut lui, yangnhik lé myang é bang gi, gyai yang yuq nán bùm bekô nghut ri.

¹² Hau hkûn, "Shí má doq lò keq." ga, mauhkúng mai yangnhik lé wut é htê mó lé wó gyo kômù, yangnhik é gye pé wú tô é u lé, mhut ji mù mauhkúng shut doq lò bekô nghut ri.

¹³ Hau u lé yang, layàng mó nún lô lui, myuq hkaú raxê tú mã é ratú gi, htên gyop byuq bê nghut ri. Hau htoq agó, byù nyhit hkying yuq shi byuq bê nghut lui, myit gyó tô é bang gi, gyai yang gyuq nán bùm kômù, mauhkúng mã é Garai Gasang lé hkya-on shigyau bum akò nghut ri.

¹⁴ Í lhum nghù rá dingnyé gi, lai byuq bê nghut ri; sùm lhum nghù rá dingnyé gi, jé rá za nghut bê.

Nyhit Lhum Nghù Rá Tut Mut É Hkyô

¹⁵ Nyhit yuq nghù rá maumang lagyo gi, yhâng é tut mut kat ri; hau hkûn, mauhkúng htoq má htê mó pé htoq lo é gi,

"Mingkan htoq mã é mingdán gi, nga-nhùng é Yhumsing eq Yhâng é Hkrisduq é mingdán dut bê nghut lui,

Yhang gi, pyat dedu ahtum abyuq up nyi rá nghut lhê."

gâ ri.

¹⁶ Hau hkûn, yhumsing é hkohkâm-tanghkuq má zùng mù, Garai Gasâng é hí má nyi tô é

* 11:3 Ji mebu wut gâ é gi, iyon yôn é lé gâ lhê.

suwún í xe myi yuq gi, yhangmoq é myoq-dong ngóm gop mù, Garai Gasang lé noqkuq uchyang tai kô é gi,

17 "Ahkuí pyat, a-nham pyat rû dui nyi é, wum-o a-tsam dik shoq bò Sú Yhumsing Garai Gasang é!

Nàng gi, hpungwup a-tsam mó chûng mù, up nyi bê nghut é yanmai, ngamoq, Nang lé jeju hkyá-on lhê.

18 Byù myù pé gi, nhikjum yo bùm kôluí, Náng é nhikmo-yo hkyô gi, jé bê nghut ri.

Shí bê bang lé, tará jéyáng rã eq, Náng é dui-nhâng zoshâng myiqhtoí pé lé le,

Náng é sân-yúng bang lé le, Náng é mying lé gyuq hkunggã é tiq ko lé le,

shigyau chyunghuq byi rã eq, myidàm htoq lé lhoq hten bang lé lhoq hten rã, ahkying gi, jé bê nghut ri."

gã akô.

19 Haú hkûn, mauhkûng htoq má, Garai Gasang é noqkuq yhúm hpông to luí, Yhâng é noqkuq yhúm hkaú má, Yhâng é dangshikaq eq séng é saksé sidek lé byu-myang ri. Haú hkûn jang, lhaphyat é, mying hùm é, maugum gûm é, layàng nún é, likwò mó gyó é pé dut htoq lo ri.

12

Myiwe Myhí Eq Manjung É Hkyô

1 Hau htoq agó, mauhkûng má limik kumlhá mó htoq shit é gi: myiwe myhí rayuq gi, bui lé wut chûng mù, lhamó má hkyi ke luí, kyí raxe í cham dap é janmaú lé, yhâng é ulhum má tsúng tô ri.

2 Yhang gi, zogúng dut tô é nghut luí, zo hkû rã matú, zohkû-nò no nyi é yanmai, gyai yhang ngau garú nyi ri.

3 Hau htâng, mauhkûng má gotú kumlhá dum htoq shit é gi: gyai kô é manjung nè mó* radu gi, ulhum nyhit lhum eq hkyuí raxê lhum dap luí, yhâng é ulhum hkangmó má janmaú tsúng tô ri.

4 Yhâng é sho-myi gi, mauhkûng má é kyí sum tú má é ratú lé shúm tsing yù mù, myidàm htoq má he hpyit hkyô kat ri. Manjung haú gi, zoshâng hku htoq kat eq wó myui hâng kat shoq ga, haú myiwe myhí é hí má láng yap tô ri.

5 Myiwe myhí haú gi, mingdán banshoq lé shamtoq dumbáng eq up rã nghut é yuqzo rayuq lé hkû bê nghut ri; yhâng é zoshâng lé gi, Garai Gasang é hí má le, Yhâng é hkóhkâm-tanghkuq hí má le bún toq yú bê nghut ri.

6 Myiwe myhí haú gi, yhâng é matú Garai Gasang lajâng to byí é yoso hkaú má hpang

wang é bê nghut ri; haú jowò má, yhang gi, 1260 nyi tup lhom baú é hui rã nghut lhê.

7 Mauhkûng htoq má majan htoq bê nghut ri. Mihkaelaq eq yhâng é maumang lagyô pé gi, manjung lé majan é zan kôluí, haú manjung eq yhâng é maumáng pé le, tau zân akô.

8 Nghut kôlhang, yhangmoq gi, a ùng kômù, mauhkûng má é yhangmoq nyi jowò lhoq hpyuq pyám bekò nghut ri.

9 Haú mingkan gón lé hkyô shuí nghoq é, natzau eq Tsadán ga é, a-nham lhê é lhang-mui nghut é manjung mó haú gi, yhâng é maumang pé eq rahá myidàm htoq má dú hkyô pyám é hui bê nghut ri.

10 Haú hkûn, mauhkûng htoq má htê mó dông tai é lé, ngò wó gyô é gi,

"Ahkuí gi, nga-nhûng é Garai Gasang é hkyi yù hkyô, hpungwup a-tsam eq mingdán le,

Yhâng é Hkrisduq é ahko ahkáng le, jé bê nghut ri.

Hkâsu mù gã le, nga-nhûng é Garai Gasang é hí má, nga-nhûng é gumang wui lé,

nyí, myín mara hun nyi é sú gi, dú hkyô pyám é hui bê nghut ri.

11 Yhangmoq gi, haú Sauzô é suí é yanmai le, yhangmoq saksé hkâm é mungdâng é yanmai le,

yhang lé ung pyám bekò nghut luí, shi byuq é jé shoq yhumsing asak lé a ha kô nghut ri.

12 Haú mù luí, mauhkûng eq haú má nyi é bang é, gabú nyi keq!

Nghut kôlhang, myidàm htoq eq wuishuq lung-aú gi, dingnyé wó ri;

hkâsu mù gã le, haú natzau gi, yhâng é ahkying yàm-yoq to za ru joq alo nghut é lé sê é yanmai,

nhikmo-yô é eq, nungnhik chyáng gyó lé lô bê nghut ri."

gã ri.

13 Haú manjung gi, myidàm htoq má dú hkyô kat hui é lé myàng luí, haú yuqzo hku é myiwe myhí lé zing-rí ri.

14 Myiwe myhí haú gi, lhangmui chyáng mai wó lut luí, yhang é matú lajâng tô é yoso má wó dang jé mù, ahkying ralhum, ahkying í lhum, ahkying rawuí hkup† lhom baú nyi é hui sháng gaq ga, zùn mó é dùng í lhum byí é hui ri.

15 Haú hkûn, haú lhangmui gi, myiwe myhí haú lé wó lhoq myhú pyám shoq ga, myiwe myhí é nunghtáng má, yhâng é nhut mai wui mó láng í é wui lhoq htoq kat ri.

16 Nghut kôlhang, manjung nhut mai lhoq htoq kat é wui mó láng haú lé, myigùng gi, yhâng é nhut há mú myui pyám byí é dông, myiwe myhí haú lé garum yu ri.

* 12:3 Manjung nè mó gã é gi, Tsadán lé tai nau é nghut lhê.

† 12:14 Ahkying ralhum, ahkying í lhum, ahkying rawuí hkup gã é gi, "razàn, í zân, lhamó hkyuq hkypap" lé gã é nghut lhê; haú gi, 1260 nyi nghut ri.

¹⁷ Haú mù, manjung haú gi, myiwe myhí hau é yanmai, gyai yhang nhikmo-yo lui, Garai Gasâng é jep é tará lé châng é bang eq Yesuq é saksé lé myhik zing nyi é bang nghut é, myit gyô tô é, myiwe myhí é awut ashín pé lé, majan zan rá matú htoq é ri.

¹⁸ Manjung haú gi, wuishuq lung-aú yàm má yap tò ri.

13

Tân Jung Dusak Radu Wuishuq Lung-aú Mai Htoq Lo É Hkyô

¹ Haú hkún, haú wuishuq lung-aú mai tân jung dusak radu htoq lo é lé, ngò myàng ri. Dusak haú má, hkyuí raxê lhum eq ulhum nyhit lhum dap to lui, yhang é hkyuí pé má gi, janmaú raxê lhum tsung to mù, ulhum hkangmó má gi, Garaí aróng lhoq hpoi é mying dap tò bum ri.

² Ngò myang é tân jung dusak haú gi, bauze-lo su dut ri; nghut kôlhang, hkyí gi, wàm hkyí su dut lui, nhut gi, hkanghkyí nhut su dut ri. Haú manjung gi, yhang é a-tsam eq yhang é hkohkâm-tanghkuq lé le, ahko ahkáng mó lé le, tân jung dusak haú lé ap byí ri.

³ Tân jung dusak hau é ulhum ralhumi gi, shí rá í é dàm dap hui é su dut kôlhang, damhkô haú gi, yâ ge pyám bê nghut lui, mingkan gón gi, mauhong byuq kômù, yhang htâng châng bùm bekô nghut ri.

⁴ Manjung gi, tân jung dusak lé ahko ahkáng ap byí é yanmai, byu pé gi, manjung haú lé noqkuq é htoq agó, tân jung dusak haú lé le, noqkuq kômù, "Ó yuq wá, tân jung dusak shí du su dut ri lhu? Ó yuq wá, yhang lé wó zan ùng rá lhu?" ga bum akó.

⁵ Gyáng dang tái rá eq Garaí aróng lhoq hpoi dang tái rá nhut gi, tân jung dusak haú lé ley to bê nghut é htoq agó, lhamó myí xe í hkyap tup, yhang é ahko ahkáng lé chúng rá ahkáng wó bê nghut ri.

⁶ Yhang gi, yhang nhut hpóng mù, Garaí Gasâng aróng lé lhoq hpoi dang tái é htoq agó, Garaí Gasâng é mying eq nyi jowó lé le, mauhkung htoq má nyi é bang lé le, lumù gansang é sù nghut ri.

⁷ Haú sán-yúng bang lé majan zân ung yù rá a-tsam, yhang lé byi bê nghut ri. Hau htoq agó, byuhú hkangmó lé le, byù myú hkangmó lé le, mying hkangmó lé le, mingdán hkangmó lé le, up rá ahkáng, yhang lé byi bê nghut ri.

⁸ Haú sat hui bê Sauzo eq sêng é asak jihpán laiká buk má, mau htoq xâng hkun mai, mying a kâ lhôm é, myidàm htoq má nyi é lhunglhang bang gi, haú tân jung dusak lé noqkuq kó rá nghut lhê.

⁹ Gyo rá nohkyap dap sù gi, gyô yù sháng gaq.

¹⁰ Shúm zung é hui rá sù gi, shúm zung é hui rá za nghut lhê.

Sham eq sat é hui rá sù gi, sham eq sat é hui rá za nghut lhê.*

Haú mù, sán-yúng bang gi, hkam jân é hkyô eq lhumzui hkyô bò kó rá nghut lhê.

Tân Jung Dusak Radu Myigùng Mai Htoq Lo É Hkyô

¹¹ Hau htâng, ngò gi, tân jung dusak gotú radu[†] myigùng mai htoq lo é lé myang ri. Yhang gi, sauzô é hkyuí su dut é hkyuí í lhum yuq ri; nghut kôlhang, yhang gi, manjung su ga dang nyo ri.

¹² Yhang gi, tân jung dusak hí lhê dù é ahko ahkáng lhunglhang lé, haú du é hí má chúng mù, shí rá í é damhkô ge byuq é tân jung dusak haú lé, haú mingkan eq mingkan htoq má nyi é bang lé noqkuq nhang ri.

¹³ Hau htoq agó, yhang gi, byu pé é myoq hí má, mauhkung mai myigùng shut myi lé lhang wó lhoq hkyô é, limik kumlhá mó kut shít ri.

¹⁴ Yhang gi, tân jung dusak hí lhê dù é hí má, kumlhá haú pé kut rá ahkáng wó é yanmai, myidàm htoq má nyi é bang lé mhoq hpyoq yù lui, haú sâm damhkô dap kôlhang, dui nyi é tân jung dusak haú lé, hkunggâ é đông, yhangmoq lé, yhang é alhó sai nhang ri.

¹⁵ Yhang gi, haú tân jung dusak hí lhê dù é alhó lé, soq wó mut kat byí é a-tsam lé wó yù sù nghut ri; haú mù, alhó haú gi, dang wó tái lui, yhang lé a noqkuq é bang lé, sat hui nhang ri.

¹⁶ Hau htoq agó, yhang gi, byù mó byù zo, wó sù myùng sù, luthkyô wó bang eq jùn pé, yuq hkangmó lé, yhumsing é loqyo loq má nghut nghut, ngelang má nghut nghut, masat lhô zik tap yù nhang ri.

¹⁷ Haú hkún, haú tân jung dusak é mying, a nghut jáng, yhang mying é masat nambat dap sù mai lai lui, ùng é, wui é hkyô, ó yuq lé wó kut rá a nghut.

¹⁸ Hpaqchyí byéng-yá gi, shí má bo rá ri. Hpaqchyí bò sù gi, haú tân jung dusak é nambat lé sôn wú sháng gaq; hkásu mù gâ le, haú gi, byù rayuq é nambat nghut lhê. Yhang é nambat gi, 666 nghut ri.

14

Sauzo Eq 144,000 Yuq É Hkyô

¹ Hau htâng, ngò wú kat le, haú Sauzo gi, Zi-un bùm má yap tô é lé myang ri; Yhang mying eq Yhang Wâ é mying lé, yhumsing é

* **13:10** Chyúmding ra-am má gi, *Byù rayuq yuq lé, shúm kut é sù gi, shúm zung é hui rá nghut lhê. Sham eq yuq sat é sù gi, sham eq sat é hui rá nghut lhê, ga bo tò ri.* † **13:11** *Tân jung dusak gotú radu gâ é shí gi, myiqhtoi pyoq lé gá nau é nghut lhê.*

ngelang má kâ tap tô é byù 144,000 yuq le, Yhang eq rahá yap tô bùm ri.

² Háu hkûn, ngò gi, wui pé mying hûm é htê eq maugum mó gûm é htê su gâ é htê, mauhkûng mai htoq lo é lé wó gyô ri. Ngò wó gyô é htê háu gi, tîng bat bang, yhangmoq é tîng lé bat myhîng é htê su gâ ri.

³ Yhangmoq gi, háu hkohkâm-tanghkuq é hí má le, dui é dusak myí du eq suwún wui pé hí má le, mahkôn sik lé hkon akô nghut ri. Háu myidàm htoq mai hkyi yù huí é byù 144,000 yuq mai lai lui, ó yuq le, mahkôn háu lé a wó mhoq sê yù kó nghut ri.

⁴ Háu bang gi, miywe wui eq gungsho a zum é bang nghut lui, yhangmoq gi, zorâm jet pé nghut bum akô. Yhangmoq gi, háu Sauzo hká shut é le hká shut châng é bang nghut akô. Yhangmoq gi, byu pé chyáng mai wui yu é hui lui, sân-hi myhîng é ashí lé su, háu Garai Gasang eq Sauzo lé ap byí é hui akô nghut ri.

⁵ Yhangmoq é nhut má, mhaú é hkyô hái le a tái kó; yhangmoq chyáng mara hûn rá hkyô le a bò kó nghut ri.

Maumang Sum Yuq É Hkyô

⁶ Háu htâng, maumang lagyo gotû rayuq gi, maulat má dang wún é lé ngò myang ri; yhang gi, háu mingkan htoq má nyí é, mingdán hkangmó má é bang, byuhú hkangmó má é bang, myíng hkangmó má é bang, byù myú hkangmó má é bang lé, hko kyô rá ahtum abyuq é gabú danglù wó ri.

⁷ Yhang gi, "Garai Gasang, tará jéyáng rá ahkýing jé bê nghut é yanmai, Yhang lé gyuq hkungga lui, Yhâng é hpungwup a-tsam lé shigyau keq. Háu mauhkûng eq myigûng, wuishuq lung-aú eq wuibúm pé hpan tô é Sù lé, noqkuq keq." ga lui, htê mó èq tái ri.

⁸ Í yuq ngû rá maumang lagyo gi, htâng má châng lé mù, "Háu mingdán pé* lhunglhang lé, yhang kut shut é ashop é đông gungsho zum yap é hkyô, nhik lhoq yô é tsibiyiq wing shuq nhang é, Babelon myuq mó gi, lêng gyop bê! Lêng gyop bê!" ga tái ri.

⁹ Sum yuq ngû rá maumang lagyo gi, yhangnhik é htâng má châng lé mù, "Háu tân jung dusak eq yhâng é alhô lé, noqkuq lui, yhumsing é ngelang má nghut nghut, loq má nghut nghut, yhâng é masat lhô lé tap yu é sù, ó yuq nghut kôle,

¹⁰ Garai Gasâng é nhikmo-yo nghu é góm má hut kat tô é, nhik-yô é tsibiyiq wing jet lé shuq rá nghut lhê. Háu htoq agó, háu chyoiyúng maumang lagyo pé hí má le, Sauzô é hí má le, yhang gi, duq nyi é myi eq hang èq zing-rí é hui zo rá nghut lhê.

¹¹ Yhangmoq zing-ri huí é myihkau gi, pyat dedu ahtum abyuq htoq nyi rá nghut lhê. Háu tân jung dusak eq yhâng é alhô lé, noqkuq é bang eq yhâng mying é masat lhô tap yu sù é matú gi, nyí, myin, no rá ahkýing wó rá a nghut." ga lui, htê mó èq tái ri.

¹² Garai Gasâng é jep é tará châng lui, Yesuq lé lhumzui nyi é bang nghut é, sân-yung bang gi, hkam shirang é hkyô bò rá lhê.

¹³ Háu htâng, "Ahkuí mai gi, háu Yhumsing má shí é sù, hkungso wó nyi ri ngû kâ to aq." gâ é htê, mauhkûng mai htoq lo é lé, ngò wó gyô ri.

Háu hkûn, háu Woi-nyí gi, "Nghut rô, yhangmoq kut é muzó é akyú gi, yhangmoq htâng châng rá nghut é yanmai, yhangmoq gi, yhumsing zui ngú é muzó mai myang hkying bekô rá nghut lhê." ga tái ri.

Myidàm Htoq Mã É Kyôshi Shù É Hkyô

¹⁴ Ngò dum wú kat le, mhut hpyú rahtui ngá hí má joq tô é lé myang ri; mhut hpyú htoq háu má Byu Yhangzo su dut é byù rayuq zung tô ri; Yhâng é ulhum má gi, hîng janmaú tsung to lui, Yhâng é loq má gi, htoq é zaiyik ralhumm chung tô ri.

¹⁵ Háu hkûn, gotû maumang lagyo gi, noqkuq yhûm mai htoq lô mù, "Háu myidàm htoq mã é kyôshi gi, myhîng zan to bê nghut lui, kyôshu yoq jé bê nghut é yanmai, náng é zaiyik chûng mù, yik shù yù aq." ga, háu mhut htoq mã zung tô é Sù lé, htê mó èq tái garú kat ri.

¹⁶ Háu mù, mhut htoq mã zung tô é Sù gi, Yhâng é zaiyik lé, myigûng htoq mã dú hkyô kat lui, myidàm htoq mã é kyôshi lé, ban shù yù bê nghut ri.

¹⁷ Maumang lagyo gotû rayuq gi, mauhkûng htoq mã é noqkuq yhûm mai htoq lo ri; háu yuq le, htoq é zaiyik ralhumm chung tô ri.

¹⁸ Háu, myi lé up é maumang lagyo gotû rayuq gi, hkungga gyap mai htoq lô mù, htoq é zaiyik chûng sù lé, "Myidàm htoq mã é tsibiyiq shi gi, myhîng bê nghut é yanmai, náng é htoq é zaiyik yù mù, tsibiyiq shipaú háu pé lé, yâm tsing yù aq." ga, htê mó èq tái garú kat ri.

¹⁹ Maumang lagyo háu gi, yhâng é zaiyik lé, myidàm htoq mã dú hkyô kat mù, háu mã é tsibiyiq shi pé lé yâm tsing yù lui, Garai Gasang nhikmo-yô é tsibiyiq wing pyik jang mó má hut kat bê nghut ri.

²⁰ Myuq shinggan mã é tsibiyiq wing pyik jang háu má, tsibiyiq shi háu pé lé nâng nyhoq lui, tsibiyiq wing pyik jang háu mai suí yui htoq lô é gi, myang lunghtung myhâng jé shoq jé lô mù, 180 déng† kô we shoq yui lô bê nghut ri.

* 14:8 Mingdán pé gâ é gi, a lumjîng bang lé gâ é nghut lhê.

† 14:20 180 déng gi, Grik pé é stadia 1600 kô bo ri.

15

*Ló Htâng É Wúm Nyhit Lhum Chung É
Maumang Lagyo Nyhit Yuq É Hkyô*

¹Ngò gi, mauhkúng má gotú limik kumlhá joq é lé, dum byu-myang ri; haú gi, wúm nyhit lhum chung é maumang lagyo nyhit yuq nghut ri; wúm haú pé gi, ló htâng é wúm pé nghut ri; hkâsu mù gà le, Garai Gasang nhikmo-yô é hkyô gi, haú gũ mai bàn rà nghut lhê.

²Hau htoq agó, myi eq nyhò tò é myoqjám wui-nhông su dut é lé le, ngò myang ri; haú tân jung dusak eq yhâng é alhò lé le, yhâng mying é nâmbat lé le, wó ung pyám bê bang gi, wui-nhông yàm haú má yap tô bum akô; yhangmoq gi, Garai Gasang byí é tíng pé lé chung to kôluí,

³Garai Gasâng é dui-nhâng zoshâng Mosheq é mahkôn eq haú Sauzô é mahkôn lé hkôn kô é gi,

"Wum-o a-tsam dik shoq bò Sù Yhumsing Garai Gasang ê, Nang kut é muzó gi, hkik é eq mauho yang nghut ri.

Pyat pyat zai zai é Hkohkâm ê, Nang é hkyô gi, dingmán é eq tengmán é nghut ri.

⁴Yhumsing é, Nang lé a gyuq a hkungga rà eq Nang mying lé a lhoq gyaú rà gi, ó yuq wá nyi rá lúh?

Hkâsu mù gà le, Nang za choyiyung é Sù nghut ri.

Nang kut é dingmán hkyô gi, tún shit bê nghut é yanmai, byù myú lhunglhang gi, Nang hí má lé noqkuq kó rà nghut lhê."

⁵Hau htâng, ngò wú kat le, mauhkung má, saksé zúm joq é noqkuq yhúm bóng tò é lé, myang ri.

⁶Hau wúm nyhit jung chung é maumang lagyo nyhit yuq gi, noqkuq yhúm haú mai htoq lo ri; yhangmoq gi, sân-yung duqbó é nú nhám mebu wut luí, yhangmoq é wànggàng má hng hpyihit baíyup tô akô nghut ri.

⁷Hau hkún, hau dui é dusak myí du má é radú gi, pyat dedu ahtum abyuq dui nyi é Garai Gasâng é nhikmo-yo hkyô bying tò é hng góm nyhit lhum, hau maumang lagyo nyhit yuq lé byí ri.

⁸Garai Gasâng é hpungwup shingkang eq hpungwup a-tsâm é yanmai, hau noqkuq yhúm gi, myihkau bying zan to bê nghut luí, hau maumang lagyo nyhit yuq é wúm nyhit jung za a bàn bàn gi, noqkuq yhúm haú má ó yuq le a wó wâng kó nghut ri.

16

*Garai Gasâng É Nhikmo-yo Hkyô Bo É
Góm Nyhit Lhum*

¹Hau htâng, maumang lagyo nyhit yuq lé, "Htoq é mù, hau Garai Gasâng é nhikmo-yo

hkyô bo é góm nyhit lhum lé, myigùng htoq má hut hkyô kat keq." ga, noqkuq yhúm mai htê mó èq tai é lé, ngò wó gyô ri.

²Hau hkún, sân-hí yuq nghú rà maumang lagyo gi, htoq é mù, yhâng é góm lé, myigùng htoq má hut hkyô kat jang, hau tân jung dusak é masat lhò dap é eq yhâng é alhò lé noqkuq é bâng chyáng, achayut é eq hkê-nho dik é, yapjeq ana dap tô bum bê nghut ri.

³Í yuq nghú rà maumang lagyo gi, yhâng é góm lé, wuishuq lung-aú má hut hkyô kat ri; hau gi, shí bê byù rayuq é sui su dut byuq é htoq agó, hau má lúng é dui jung lhunglhang gi, shí byuq bê nghut ri.

⁴Sum yuq nghú rà maumang lagyo gi, yhâng é góm lé, wuilàng pé eq wuibúm pé má hut hkyô kat jang, hau pé gi, sui dut byuq bê nghut ri.

⁵Hau hkún, hau wui lé upzúng é maumang lagyo tai é lé, ngò wó gyô é gi,

"A-nham pyat le, ahkui pyat le, rú nyi nyi é Choyiyung Sù é,

Nang hau su kut jéyang bê nghut é yanmai, Nang gi, tengmán Sù nghut ri;

⁶hkâsu mù gà le, yhangmoq gi, Nang é sân-yung bang eq myiqhtoí pé é sui lé, lhoq htoq pyám bekô nghut luí,

Nang gi, yhangmoq lé sui shuq nhang é nghut ri; hau gi, yhangmoq hui zo gíng é hkyô nghut ri."

gâ ri.

⁷Hau hkún, hau hkungga gyap mai,

"Nghut rô! Wum-o a-tsam dik shoq bò Sù Yhumsing Garai Gasang ê, Nang jéyang é hkyô pé gi, tengmán é eq dingmán é nghut ri."

ga le, tai kat é htê lé, ngò dum wó gyô ri.

⁸Myi yuq nghú rà maumang lagyo gi, yhâng é góm lé, bui é ahtoq má hut hkyô kat é hkún, bui gi, byu pé lé myí èq nyhê kyuq rà ahkáng wó bê nghut ri.

⁹Hau mù, yhangmoq gi, nyé dik é èq nyhê kyuq é hui zo luí, wúm shí pé lé up nyi é Garai Gasâng é mying lé nhing akô; hau-í yang hpuzo kôlhang, yhangmoq gi, myit le a lhing kó, Garai Gasang lé le a shigyaú kó nghut ri.

¹⁰Ngo yuq nghú rà maumang lagyo gi, yhâng é góm lé, tân jung dusak é hkohkâm-tanghkuq htoq má hut hkyô kat jang, yhâng é mingdán gi, mauchut tuq dut byuq bê nghut ri. Mingbyú wui gi, yhumsing é shô lé lhang, ngat tân bum shoq shí-nò jamjau hui zo kôluí,

¹¹yhangmoq no hpú é eq jeq é ana dap é yanmai, mauhkung má é Garai Gasang lé nhing akô; hau-í yang hpuzo kôlhang, yhangmoq gi, yhangmoq kut é hkyô mai myit a lhing shi kó nghut ri.

¹² Hkyuq yuq nghû râ maumang lagyo gi, yhâng é góm lé, Uhprat wui mó làng má hut hkyô kat jáng, wuilàng haú gi, kân byuq lui, haú buihotoq hkyam má é hkohkam pé, lé lô râ hkyô dong bê nghut ri.

¹³ Haú hkûn, po su dut é, agè ashop é byò sum woi-nyí lé, ngò myang ri; haú pé gi, manjung, tân jung dusak, myiqhtoi pyoq pé é nhut mai htoq lô kô é bang nghut akô.

¹⁴ Woi-nyí haú pé gi, nat gâng pé é woi-nyí nghut lui, limik kumlhá pé kut shit kômù, haú wum-o a-tsam dik shoq bò Sû Garai Gasâng é buinyí mó má majan zan râ matú, mingkân gón má é hkohkam pé lé lhoq tsing yù râ ga, htoq é lô akô nghut ri.

¹⁵ "Wú keq, Ngò gi, hkau sù su jé lé é nghut lhê! Su hí má gungchín a so râ eq hoq hpu hkyô a lhoq htoq shit sháng gaq ga, yhumsing é wutbu wutmé lé, zúng nyí lui, gyíng gyíng kut nyí é sù gi, hkungsò wó nyí ri."^{*}

¹⁶ Haú mù, nat haú bang gi, hkohkam pé lé, Hebre myíng dông Armagedon gâ é jowò má, rahá ji tsing tô akô nghut ri.

¹⁷ Nyhit yuq nghû râ maumang lagyo gi, yhâng é góm lé, maulat má hut hkyô kat ri; haú hkûn, haú noqkuq yhùm má é hkohkâm-tangkuq mai, "Bàn bê!" gâ é hté mó htoq lo ri.

¹⁸ Hau htoq agó, lhap hpyat é, myíng hùm é, maugum gùm é eq layàng mó nún é pé dut htoq lo ri. Myidám htoq má, xângzo byù lé nyí é hkûn mai, layàng haú su nún é eq haú-ítan é gi, a joq wú shí é nghut lhê.

¹⁹ Haú mù, haú myuq mó gi, sùm hkyam byak goq byuq lui, mingdán pé má é myuq pé le, gyop byuq bê nghut ri. Garai Gasang gi, Babelon myuq mó lé le myit bun lui, Yhâng é nhikmo-yó é tsibiyiq wing byíng shoq bo é góm lé shuq nhâng bê nghut ri.

²⁰ Zinlóng hkangmó gi, hpanq byuq bê nghut lui, bùm pé le byuq byuq bê nghut ri.

²¹ Haú hkûn, myí xé joí kô lai é likwò mó gi, mauhkung mai byu pé htoq má wo gyó gyùn ri; likwò wúm gi, gyai yhang wuihke jamjaú é wúm nghut é yanmai, byu pé gi, Garai Gasang lé nhing bum akô nghut ri.

17

Shiwa Myhi Mó É Hkyô

¹ Haú góm nyhit lhum chung tô é maumang lagyo nyhit yuq má é rayuq gi, lé lô mù, "Lé aq, haú wui myo myô pé htoq má zung tô é shiwa myhi mó lé dam byi râ hkyô, ngò, nang lé tûn shit bá.

² Myidám htoq má é hkohkam pé gi, yhang eq rahá ashop é dông gungsho zùm yap é hkyô kut shut kôluí, myidám htoq má nyí é bang gi, yhang kut shut é myiwe yuqgè

nyí zô lhúm hkyô é tsibiyiq wing lé shuq wut bùm bekô nghut ri." ga lui, ngo lé tai ri.

³ Haú mù, maumang lagyo haú gi, Woi-nyí má, ngo lé yoso shut shui wang e lô ri. Haú ulhum nyhit lhum eq hkyu raxê lhum dap lui, tai hpoi é myíng kôm dap tô é, zam zam ne é tân jung dusak htoq má zung tô é myiwe myhi rayuq lé, ngò myang ri.

⁴ Myiwe myhi haú gi, me me dut é eq zam zam ne é mebu wut lui, hing, lungsêng, palhé pé eq mhôn chung ri; yhâng é loq má gi, yhâng é myiwe yuqgè nyí zô lhúm hkyô é agot a-ú hkyô eq achaq achyut é zè pé byíng tô é hing góm ralhum chung tô ri.

⁵ NIK DIK É HKYÔ, MYIDÁM HTOQ MÁ É ACHAQ ACHYUT HKYÔ PÉ EQ SHIWA MYHI PÉ É YHÂNGNU, BABELON MYUQ MÓ.

gâ é myíng gi, yhâng é ngelang má kâ tap tô ri.

⁶ Myiwe myhi haú gi, sân-yúng bâng é sui eq Yesuq é saksé hkâm bâng é sui shuq wut tô é lé, ngò myang ri.

Haú mù, ngò gi, gyai yhang maú byuq é nghut lhê.

⁷ Haú hkûn, maumang lagyo haú ngo lé tai é gi, "Nàng, haú mù maú lhê lú? Myiwe myhi haú eq, yhang jí tô é, ulhum nyhit lhum eq hkyu raxê lhum dap é tân jung dusak é záu tô é hkyô lé, ngò, nàng lé tai kyo râ nghut lhê.

⁸ Nàng myàng é tân jung dusak haú gi, hí hkûn nyí wú bê, ahkuí a nyí lo, nghut kôlháng, ník dik htúm é Lasang-dong mai htoq lô mù, htên byoq é lui râ nghut lhê. Mau htoq xâng hkun mai, asak jihpán laiká buk má myíng a kâ tô é, myidám htoq má nyí é bang gi, tân jung dusak haú lé myàng kô é hkûn, maú byuq bùm kó râ nghut lhê. Hkásu mù gâ le, haú gi, nyí wú bê, ahkuí a nyí lo, nghut kôlháng, dum lé râ nghut é yanmai nghut ri.

⁹ Hpaqchyí byéng-yá bo é nyan gi, shí má râ ri. Haú ulhum nyhit lhum gi, myiwe myhi zung é bùm nyhit lhum nghut ri; hau htoq agó, hkohkâm nyhit yuq le nghut ri.

¹⁰ Ngo yuq gi, byit gyó byuq bê; rayuq gi, ahkuí nyí to ashí; myit tô é rayuq gi, a jé lé shí nghut ri; haú yuq jé lé é hkûn, yhang gi, ahkyíng razup zo za wó nyí râ nghut lhê.

¹¹ Hí hkûn nyí wú bê, ahkuí a nyí lo dut é tân jung dusak haú gi, shit yuq nghû râ hkohkâm nghut ri. Yhang gi, haú nyhit yuq eq sêng é yanmai, yhâng é htên byoq hkyô shut e lô râ nghut lhê.

¹² Haú nàng myàng é hkyu raxê lhum gi, mingdán a myang yù shí é hkohkâm raxê yuq nghut ri; nghut kôlháng, yhangmoq gi, haú tân jung dusak eq rahá za, hkyíng hkum rahkum kô hkohkâm ayá lé wó yú kó râ nghut lhê.

* 16:15 Dang shí hkun gi, Yesuq tai é dang nghut lhê.

¹³ Yhangmoq gi, myit myoqbyù hkyô ral-hum zan kó rá ngfut lhê; yhangmoq é a-tsam eq ahko ahkáng lé, haù tân jung dusak lé byi kó rá ngfut lhê.

¹⁴ Yhangmoq gi, haù Sauzo lé majan chòm zan kó rá ngfut lhê; ngfut kôlháng, Sauzo haù gi, yhumsing pé é Yhumsing eq hkohkam pé é Hkohkâm ngfut é yanmai, yhangmoq lé ung pyám rá ngfut lhê. Haù Sauzo eq rahá ngfut é bang gi, ji yù huí é bang, hkyin yù huí é bang eq lhumzuí é bang ngfut akô." gâ ri.

¹⁵ Hau htâng, maumang lagyo haù ngo lé dum tai é gi, "Nàng myang é, shiwa myhí zung tô é wui pé gi, byù myù pé, byù ajùm ayò pé, mingdán pé eq myíng lhumjup ngfut ri.

¹⁶ Haù nàng myang é tân jung dusak eq hkyuì raxê lhum gi, shiwa myhí haù lé a jú kut kó rá ngfut luí, yhâng é sutzè banshoq shang yu pyám byi mù, mebu lháng a dap loshoq achindum kut to kó rá ngfut lhê; hau htoq agó, yhâng é sho lé zo luí, myí eq nyhé hkyô pyám kó rá ngfut lhê.

¹⁷ Hkâsu mù gâ le, Garai Gasang gi, haù bang mai, i-myit rahkat zâ èq, yhumsing é a-tsam, haù tân jung dusak lé byi rá myit, yhangmoq lé kat byi Sù ngfut ri. Haù mù, yhangmoq gi, Garai Gasang é mungdang lhoq dik é hkùn jé shoq, haù su kut kó rá ngfut lhê.

¹⁸ Nàng myang é myiwe myhí haù gi, myidàm htoq mã é hkohkam pé lé up zò é myuq mó ngfut ri." gâ ri.

18

Babelon Lêng Gyop É Hkyô

¹ Hau htâng, maumang lagyo gotù rayuq mauhkúng mai gyó lo é lé, ngò myang ri. Yhang gi, ahko ahkáng mó wó é ngfut luí, haù myidàm htoq lé, yhâng é hpungwup eq duqbó to byi ri.

² Yhang, htê mó o mó èq garù tai kat é gi, "Babelon myuq mó gi, lêng gyop bê, lêng gyop bê!

Myuq haù gi, nat gâng pé é yhùm eq agè ashop é nat hkangmó é hkyúng dut byuq é htoq agó,

a sansêng é eq achaq achyut é nghoq pé nyi é sùt dut byuq bê ngfut ri.

³ Hkâsu mù gâ le, haù byù myù lhunglháng gi, yhang kut shut é ashop é đông gungsho zùm yap é hkyô é nhik lhoq yô é tsibiyiq wing shuq wut bùm bekô ngfut ri.

Haù myidàm htoq mã é hkohkam pé gi, yhang eq myí shut làng shut hkyô kut bekô ngfut é htoq agó,

myidàm htoq mã é hpugá wuiloq gá bang gi, yhâng é ladu lai shoq ngón kún é hkyô

é yanmai, sutzè wó bôm bekô ngfut ri."

gâ ri.

⁴ Hau htâng, mauhkúng mai htoq lo é htê gotù lé ngò dum wó gyó é gi,

"Ngá é byu pé é, myuq hau é mara pé má nungmoq a bo lòm rá matú le,

yhâng é wúm pé lé nungmoq a hui zo kó rá matú le, haù mai hân hpang htoq lò keq;

⁵ hkâsu mù gâ le, yhâng é mara gi, mauhkúng htung shoq bum zang to bê ngfut luí, Garai Gasang gi, Yhâng é a dingmán é hkyô lé myit bun bê ngfut ri.

⁶ Yhang kut byí é eq rajung za, yhang lé tau kut byi keq; Yhang kut bê muzó eq rajung za, yhang lé í tú tau kut keq.

Yhang nyhó byí é góm má, í tú tau nyhó byi keq.

⁷ Yhang gi, yhumsing gùng lé yhumsing lhoq gyaù yù luí, ladu lai shoq ngón kún nhang é í,

wuìhke jamjau hkyô eq iyon hkyô myo myo, yhang lé tau byi keq.

Hkâsu mù gâ le, yhang gi, yhâng é myit má, 'Ngò gi, hkohkâm myhí ngfut lhê; ngò gi, chuimó a ngfut;

hkâ-nhám le iyon hui rá a ngfut.' ga gumrong nyi ri.

⁸ Haù mù luí, yhâng é wúm nghu é shí hkyô, iyon hkyô eq mutmó gyó hkyô gi, ra-nyí bui má za, yhâng chyáng jé rá ngfut lhê.

Hau htoq agó, yhang gi, myí eq nyhé hkyô pyám é lé hui rá ngfut lhê;

hkâsu mù gâ le, yhang lé jéyáng é, haù Yhumsing Garai Gasang gi, wum-o a-tsam bò Sù ngfut ri.

⁹ Haù yhang eq rahá myiwe yuqgè nyi zò lhum hkyô kut shut é eq yhâng é ladu lai shoq ngón kún hkyô má bo lom é, haù myidàm htoq mã é hkohkam pé gi, yhang lé nyhé hkyô é myihkau lé myàng kôjáng, ngaubyi ngau-nhap eq iyon yón é huí bùm kó rá ngfut lhê.

¹⁰ Yhangmoq gi, yhang no jamjaù nyi é lé wú gyuq kôluí, we we mã yap to kômù, 'Hkik é myuq mó, a-tsam bo é Babelon gi, dingnyé wó ri-nhung!

Dingnyé wó ri-nhung! Hkyíng hkum ral-hum mã za, dam byí é hkyô gi, náng chyáng jé bu-nhung!'

ga luí, tai garu kó rá ngfut lhê.

¹¹ Myidàm htoq mã é hpugá byu pé gi, yhang é yanmai, ngaubyi ngau-nhap é eq iyon yón é hui kó rá ngfut lhê; hkâsu mù gâ le, yhangmoq é gai zè lé, ó yuq le a wui byi lo kó é yanmai ngfut ri.

¹² Gai zè haù pé gi, hĩng, ngùn, lungsêng eq pallhê, nú-nhâm é pán, me me dut é pán, lai hkyíng eq zam zam ne é pán; namngón jung sik ajung jung, magui zú lé sai é, guloq hpaù

jung sik lé sai é, gyi lé sai é, shamtoq lé sai é, luq hpyú lé sai é jung ajà jà nghut ri.

¹³ Hau htoq agó, changhpyik gâm, xunmân, namgón jung, mura, loban, tsibiyiq wing, tsanlun xû, mún eq sungso, nojúng eq sau, myang eq myanglhêng pé; byù é gungdu eq asak pé nghut ri.

¹⁴ Yhangmoq gi, 'Nàng myit ô nau nyi é hkyô pé gi, náng chyáng mai gâng ló byuq bê nghut ri. Nàng wó é sùt é hkyô eq hkikhkam é hkyô pé banshoq gi, byuq byuq bê nghut luí, hkâ-nhám le dum wó taú yù rá a nghut.' ga tái kó rá nghut lhê.

¹⁵ Gai zè haú pé lé ung luí, yhâng chyáng mai sutzè wó yu é byù pé gi, yhang hpuzò é jamjau hkyô lé wú gyuq kô é yanmai, we we má yap to kômù, ngaubyi ngau-nhap eq iyon yon uchyang,

¹⁶ 'Nú-nhâm é pán, me me dut é pán eq zam zam ne é mebu wut luí, hîng, lungsêng eq palhé pé lé mhôn tô é myuq mó gi, dingnyé wó ri-nhung! Dingnyé wó ri-nhung!

¹⁷ Hkying hkum rahkum má za, haú-í yhang wó é sutzè pé htên byoq byuq bu-nhung!' ga tái kó rá nghut lhê.

Wui-sanghpo agyl yuq hkangmó eq wui-sanghpo mai jón wún é bang banshoq, wui-sanghpo hkâng bang eq wuishuq lung-aú mai wam baú hkyô wó yu é bang banshoq gi, we we má yap to kômù,

¹⁸ myuq haú nyé gyó nyi é myihkau lé myàng kôjáng, 'Myuq mó shí eq púng é myuq gi, hkámá joq shirâ lhú?' ga tái garu kó rá nghut lhê.

¹⁹ Yhangmoq gi, yhumsing é ulhum má hpuihup kyaq gyun mù, ngaubyi ngau-nhap eq iyon yon uchyang, 'Myuq mó gi, dingnyé wó ri-nhung! Dingnyé wó ri-nhung!

Wuishuq lung-aú má wui-sanghpo pé wó é bang gi, yhâng é sutzè pé é yanmai, sutzè wó bum akò.

Nghut kôlháng, hkying hkum rahkum má za, htên byoq hkyô gi, yhâng chyáng jé bu-nhung!

²⁰ Mauhkûng ê, yhang é yanmai hkye gabú aq! Sân-yúng bang, lagyo pé eq myi-ichtoi pé é, hkye gabú keq!

Hkâsu mù gâ lé, yhang, nungmoq lé kut é eq rájung za, Garai Gasang gi, yhang lé jéyáng bê nghut ri.' ga tái kó rá nghut lhê." gâ ri.

²¹ Hau htâng, wum-o a-tsam mó bo é mau-mang lagyo rayuq gi, luqluí long mó sù é luqgok racham waq toq yù mù, wuishuq lung-aú má dú hkyô kat luí, tái é gi, "Hau Babelon myuq mó gi, haú su kut wum kat dú hkyô pyâm é hui rá nghut luí,

hkâ-nhám le dum myàng rá a nghut lo.

²² Hau tîng bat é bang, dat gó dat ye é bang, sampyi mut é bang eq tut mut é bâng é htê lé, náng chyáng hkâ-nhám le dum wó gyo lo rá a nghut.

Loq hpaqchyi ajung jung kûng é byù lé, náng chyáng hkâ-nhám le dum myàng lo rá a nghut.

Luqluí luí é htê lé, náng chyáng hkâ-nhám le dum wó gyo lo rá a nghut.

²³ Hau myibung duq é myishâm lé, náng chyáng hkâ-nhám le dum wó duq lo rá a nghut.

Myisik lusik é htê lé, náng chyáng hkâ-nhám le dum wó gyo lo rá a nghut.

Náng é hpugá byù pé gi, mingkân é byù mó pé nghut ri.

Náng é myoqheq hpaqchyi eq mingdán ban-shoq mâ é bang lé, hkyô shuí nghoq bê nghut ri.

²⁴ Hau myiichtoi pé é sui, sân-yúng bâng é sui eq myidám htoq má sat hui bang banshoq é sui pé gi, yhâng chyáng chyat byu-myàng bê nghut ri."

gâ ri.

19

Haleluya!

¹ Hau htâng, mauhkûng htoq má, byù ajùm ayò garú é htê mó su gâ é lé, ngò wó gyó é gi, "Haleluya!"*

Hkyi yù hkyô eq hpungwup shìngkang, a-tsam gi, nga-nhûng é Garai Gasang eq sêng é nghut lhê.

² Hkâsu mù gâ lé, Yhang tarâ jéyáng é hkyô gi, tengmân é eq dingmán é yanmai nghut ri.

Yhang gi, myidám htoq mâ é bang lé, haú yhâng é ashop é đông gungsho zùm yap é hkyo eq mara kut shut nhang é shiwa myhi mó lé, mara byi luí,

Yhâng é dui-nhâng zoshâng wui é sui yuichyín dam byi bu-nhung ô!"

gâ ri.

³ Dum radám, yhangmoq tái garu kô é gi, "Haleluya!"

Myuq hau é myihkau gi, pyat dedu ahtum abyuq ru ìng doq nyi sháng gaq ô!" gâ bum akò nghut ri.

⁴ Hau suwún í xe myi yuq eq dui é dusak myí du gi, haú hkohkâm-tanghkuq má zung tô é Garai Gasang lé paí gop luí, noqkuq uchyang,

"Amen, Haleluya!"

ga, tái garú bum akò.

⁵ Hau hkûn,

* 19:1 Haleluya gâ é gi, Hebre mying đông, "Yhumsing Garai Gasang lé hkya-on kungton lhê" gâ é dang nghut ri.

"Garai Gasâng é dui-nhâng zoshâng wui nghut é, yhang lé gyuq hkunggâ é tiq ko banshoq bang è!

Nga-nhùng é Garai Gasang lé, hkya-on kungtôn keq ô."

gâ é htê, haù hkohkâm-tanghkuq mai htoq lo ri.

⁶ Hau htâng, byù ajùm ayo é htê su ga, wui myo myo mying hùm é htê su ga, maugum mó é htê su ga, taì garù é htê lé ngò wó gyô é gi,

"Haleluya!

Hkâsu mù gâ le, wum-o a-tsam dik shoq bò Sù nga-nhùng é Yhumsing Garai Gasang gi, up nyi ri.

⁷ Nga-nhùng gi, ngón gabù luí, Yhâng é hpungwup shing kang lé lhoq gyaù sháng ô!

Hkâsu mù gâ le, haù Sauzo myiháng pôi gi, jé bê nghut luí, Yhâng é myisik gi, rì rì mhôn to bê nghut ri.

⁸ Sân-yúng duq wik nú-nhâm é mebu le, wut rà matù, Yhang lé byì to bê nghut ri." gâ ri. (Nú-nhâm é mebu haù gi, sân-yúng bang kut é dingmán é muzó nghut ri.)

⁹ Hau htâng, maumang lagyo gi, ngo lé, "'Haù Sauzô é myiháng zoshuq pôi má ji yu é hui bang gi, hkungso wó nyi ri.' nghù ká aq." ga taì luí, "Dang shí pé gi, Garai Gasâng é tengmán mungdang yhang nghut lhê." ga xoq taì ri.

¹⁰ Haù hkùn, ngò gi, yhang lé noqkuq rà nghù, yhâng é hkyì wang má paì gop kat é nghut lhê. Nghut kôlháng, yhang gi, "Haù su hkâkut! Ngò gi, nung eq haù Yesuq é saksé lé hkâm é náng gumang wui eq rahá, byinzùm dui-nhâng zoshâng ru nghut lhê. Garai Gasang lé noqkuq aq! Hkâsu mù gâ le, Yesuq é hkyô lé saksé hkâm é gi, myiqhtoi htoi é Woi-nyí é myit đông nghut ri." ga, ngo lé taì hkùm ri.

Myang Hpyù jì To Su É Hkyô

¹¹ Hau htâng, ngò gi, mauhkùng bóng tô é lé lé, ngá é moyoq hi má myang hpyù radu nyi tô é lé le, myang ri. Myang hpyù haù má jì tô é gi, Lhumzui eq Tengmán gâ é Sù nghut ri. Yhang gi, tengmán é đông tará jéyáng luí, majan zan Sù nghut ri.

¹² Yhâng é myoqjì gi, myishâm su dut mù, Yhâng é ulhum má gi, janmaù myo myo tsúng tô ri. Yhang mai lai luí, ó yuq le a bo sé é mying, Yhâng chyáng kâ tap tô ri.

¹³ Yhang gi, sui má jum yù bê nghut é buhíng radung wut to luí, Yhâng é mying gi, Garai Gasâng é mungdang gâ ri.

¹⁴ Haù mauhkùng gyè pé gi, hpyu é eq sanséng nú-nhâm é mebu wut mù, myang hpyù jì kôluí, Yhâng htâng má châng bum akò nghut ri.

¹⁵ Byù myù haù pé lé zan rà matù, htoq é shâm gi, Yhâng é nhut mai htoq lo ri. Yhang

gi, yhangmoq lé, shamtoq dumbáng èq up rà nghut lhê. Yhang gi, wum-o a-tsam dik shoq bò Sù Garai Gasâng é nhikmo-yô é tsibiyiq shi pyikjang má, yhangmoq lé pyik rà nghut lhê.

¹⁶ Hkohkam pé é Hkohkâm eq yhumsing pé é Yhumsing gâ é mying gi, Yhâng é buhíng eq Yhâng é tangbaù má kâ tap tô ri.

¹⁷ Dum, maumang lagyo rayuq gi, buì má yap tô é lé ngò myang ri; yhang gi, maulat má é nghoqzô pé banshoq lé, "Lé keq, Garai Gasâng é zoshuq pôi mó matù, lé zup zing keq;

¹⁸ haù hkùn, nungmoq gi, hkohkam pé é, gyezaù pé é, wum-o a-tsam mó bò bâng é, myang jùm eq ji bâng é gungsho, luthkyô wó bang eq jùn pé é, byù mó byù zo pé lhunglháng é gungsho pé lé, myàng zo kô rà nghut lhê." ga, htê mó èq wut garù taì ri.

¹⁹ Hau htâng, haù tân jung dusak eq myidàm htoq má é hkohkâm eq yhangmoq é gyezô pé gi, haù myang htoq má jì to Sù eq Yhâng é gyezô pé lé, majan zan rà matù chôm zing bùm kô é lé, ngò myang ri.

²⁰ Nghut kôlháng, haù tân jung dusak gi, chyup yu é hui bekò nghut ri; hau htoq agó, haù tân jung dusak é masat lhô lé hkam yù luí, yhâng é alhò lé noqkuq é bang lé, mhaù zo rà matù, tân jung dusak hau é gunglik đông limik kumlhá pé kut shit é myiqhtoi ppyoq lé, chyup yu é hui bê nghut ri. Yhang-nhik gi, hang myi duq nyi é myi nhông má dui gù dù hkyô kat é hui bekò nghut ri.

²¹ Haù myit gyô tô é bang gi, myang gùng má jì to Su é nhut mai htoq lo é sham èq sat pyâm é hui bekò nghut luí, nghoq pé lhunglháng gi, haù bâng é gungsho lé, gyi gyi dau dau myàng zô bùm bekò nghut ri.

20

Rahkying Zàn

¹ Dum, maumang lagyo rayuq gi, nik dik htùm é Lasang-dông é zoqshi eq joqtoq tui mó lé, yhâng é loq má chúng mù, mauhkùng mai gyô lé lo é lé, ngò myang ri.

² Yhang gi, natzau eq Tsadán nghut é, a-nham lhê é lhangmui gâ é manjung lé, zanwut rahkying lhùng to rà matù, chyup tuí yù bê nghut ri.

³ Haù mù, maumang lagyo haù gi, rahkying zàn a bying shí é gyoro má, manjung haù, byù myù pé lé a wó mhaù zo sháng gaq ga, nik dik htùm é Lasang-dong má yhang lé dù hkyô hàng kat luí, zoq myhì to mù, hau é ahtoq má dizik htung tô ri. Haù rahkying zàn lai eq, yhang lé, ra yoq zo hpông htoq kat ra rà nghut lhê.

⁴ Ngò gi, haù tará jéyáng rà ahko ahkáng wó é bang zung tô bum é hkohkâm-tanghkuq pé lé, dum myang ri. Hau htoq agó, haù Yesuq é hkyô lé saksé hkâm é yanmai le,

Garai Gasâng é mungdâng é yanmai le, ul-hum hpyit hui bâng é sobyô pé lé, ngò myang ri. Haù bang gi, haù tân jung dusak eq yhâng é alhò lé a noqkuq é htoq agó, yhumsing é ngelang eq loq má hau é masat lhò lé a htung tap yù bâng é sobyo pé ngut ri. Yhangmoq gi, dum dui toq mù, zanwut rahkying tup Hkrisduq eq rahá up nyi bekò ngut ri.

⁵ Haù gi, sâng-hi dâm dum dui toq é hkyô ngut ri. (Shi byuq bê myit gyó tô bang gi, rahkying zàn haù a bying bying wó dum dui toq kó rá a ngut.)

⁶ Sâng-hi dâm dum dui toq é hkyô má lom é bang gi, hkungsô wó bang eq chyoiyung bang ngut ri. Í dâm nghù rá shi é hkyô gi, haù bang lé up rá ahkáng wó é a ngut; haù bang gi, Garai Gasang eq Hkrisduq é hkyangjông pé dut rá ngut é htoq agó, Hkrisduq eq rahá zanwut rahkying tup up kó rá ngut lhê.

Tsadán Htên Byoq Huí É Hkyô

⁷ Rahkying zàn haù lai jáng, Tsadán gi, htông mai nhang htoq kat é hui lui,

⁸ majan zan rá matú, myidâm htoq myi chyün má nyi é, Goga eq Magoga gá é byù myù pé lé mhaù shui tsing yù rá ga, htoq é rá ngut lhê. Byù haù bang gi, wuìshuq lung-aù yàm má é semui myhó myo kó rá ngut lhê.

⁹ Yhangmoq gi, maumyi htunghtang hkap shoq chòm yán doq lò kómù, haù Garai Gasâng é byu pé nyi é dap ngut é, Garai Gasang chyitdap é myuq lhinghkyuq má, lé lóm tô bùm bekò. Ngut kôlháng, mauhkung mai myi gyó lò lui, yhangmoq lé nyhê hkyô pyám bê ngut ri.

¹⁰ Haù tân jung dusak eq myiqhtoi pyoq pé lé dú hkyô kat jang ngut é, hang myi duq nyi é nhông má, yhangmoq lé mhoq hpyoq yu é natzau haù le dú hkyô pyám é hui bê ngut ri. Yhangmoq gi, nyi, myin, pyat dedu ahtum abyuq wuìhke jamjau hui zò nyi kó rá ngut lhê.

Ló Htâng É Tará Doqdan Hkyô

¹¹ Hau htâng, hkohkâm-tanghkuq hpyü mó ralhum eq haù má zung tô é Sù lé, ngò myang ri. Haù mauhkung eq myigùng gi, Yhâng é hí mai hpang lò bê ngut mù, yhangnhik é matú jowò a joq lo ngut ri.

¹² Hau htoq agó, shi byuq bê ngut é, tiq é kô é bang gi, hkohkâm-tanghkuq hí má yap tô bum é eq laiká buk pé hpông é lé, ngò myang ri. Asak jihpán laiká buk gá é gotú laiká buk le, hpông tô ri. Haù shi byuq bê bang gi, yhumsing kut é eq rajung za, laiká buk pé má ká tô é dông, tará doqdan é hui bùm bekò ngut ri.

¹³ Haù hkùn, wuìshuq lung-aù gi, yhang má lúng tô é, shi byuq bê bang lé ap byi lui, haù shi é hkyô eq Moming le, yhangnhik

chyáng lúng tô é, shi byuq bê bang lé ap byi akò ngut ri; yuq hkangmó gi, yhumsing kut é eq rajung za tará doqdan é hui bekò ngut ri.

¹⁴ Hau htâng, shi é hkyô eq Moming gi, myi nhông má dú hkyô kat é hui bekò ngut ri. Myi nhông haù gi, í dâm nghù rá shi é hkyô ngut lhê.

¹⁵ Asak jihpán laiká buk má, mying a bo é sù ó yuq ngut kôle, myi nhông haù má dú hkyô kat é hui bekò ngut ri.

21

Yerusalem Asik

¹ Hau htâng, mauhkung asik eq myigùng asik lé, ngò myang ri; hkásu mù gá le, hí lhê é mauhkung eq myigùng gi, lai lò byuq bê ngut lui, wuìshuq lung-aù le, dum joq rá a ngut lo.

² Haù hkùn, Chyoiyung Myuq gá é Yerusalem asik gi, lusik é matú mhôn yung tô é myisik su, hen lajáng yù lui, Garai Gasâng chyáng má é ngut mù, mauhkung mai gyó lé lo é lé, ngò myang ri.

³ Hau htoq agó, hkohkâm-tanghkuq mai htoq lo é danghtê mó lé, ngò wó gyó é gi, "Ahkuí, Garai Gasâng é nyi jowò gi, xângzo byu pé eq rahá ngut lui, Yhang gi, yhangmoq eq rahá nyi rá ngut lhê. Yhangmoq gi, Yhâng é byu pé dut rá ngut lui, Garai Gasang yhang, yhangmoq eq rahá nyi mù, yhangmoq é Garai Gasang dut rá ngut lhê.

⁴ Garai Gasang gi, yhangmoq é myoq má é ngaubyi lhunglháng lé, sut pyám byi rá ngut lhê. Htàngnùng má gi, shi-nò hkyô, iyon hkyô, ngaubyi ngau-nhap hkyô eq no hpu hkyô nghù é joq rá a ngut lo; hkásu mù gá le, hí lhê é hkyô pé gi, lai lò byuq bê ngut ri." gá ri.

⁵ Haù hkohkâm-tanghkuq má zung to Sù gi, "Wú aq, jung hkangmó lé, Ngò asik kut nyi bê ngut lhê." ga tai lui, "Shi lé ká to aq, hkásu mù gá le, dang shí pé gi, lumging é dang eq tengmán é dang ngut lhê." ga tai ri.

⁶ Hau htoq agó, Yhang gi, "Haù pé gi, ban kut bê. Ngò gi, Alpha eq Omega ngut lhê; Sâng-hi Awang eq Lô Htâng Sù le ngut lhê. Wuì shit sù lé gi, ahpau a dúng é za, asak wuìbúm má é uchyam lé, Ngò byi huq rá ngut lhê.

⁷ Wó ung é sù ó yuq ngut kôle, Garaí é silí wunlí haù pé banshoq lé sing rá ngut mù, Ngò gi, yhâng é Garai Gasang dut lui, yhang gi, Ngá zo dut rá ngut lhê.

⁸ Ngut kôlháng, gyuq myit bò bang, a lumjing bang, achau achyut dut bang, byù sat bang, ashop é dông gungsho zùm yap é hkyô shut é bang, myoqheq hpaqchyí kut é bang, hparà noq é bang eq mhaù bang

lhunglhang é jowò gi, haù hang myi duq nyi é nhông nghut rà nghut lhê. Haù gi, í dâm nghù rà shí é hkyô nghut ri." ga ngo lé tai ri.

⁹ Ló htâng é wúm nyhit jung byíng tô é góm nyhit lhum chung tô é maumang lagyo nyhit yuq má é rayuq gi, lé mù, "Lé aq, haù Sauzô é yhangmyi gâ é myisik lé, ngò tûn shit rà nghut lhê." ga ngo lé tai ri.

¹⁰ Hau htâng, yhang gi, ngo lé Woi-nyi mai bùm myhâng mó ralhúm má shuí jé luí, Garai Gasâng chyâng má é nghut mù, mauhkûng mai gyó lé lo é, haù Chyoiyúng Myuq gâ é Yerusalem lé tûn shit ri.

¹¹ Myuq haù gi, Garai Gasâng é hpungwup shing kang hù é htoq agó, haù maubó gi, hpaù dik é huhpé lungsenseng su dut luí, myoqjâm su sân-yúng ri.

¹² Myuq xêwâm gi, kô myhang é htoq agó, hkum raxe í lhum hpông tô ri; hkum haù pé má, maumang lagyo raxe í yuq zúng tô ri. Hau htoq agó, Israelaq byù myú raxe í hu é myíng lé, hkum haù pé má kâ tap to bum ri.

¹³ Hkum haù pé gi, buihtoq hkyam shut sùm lhum, buiwàng hkyam shut sùm lhum, maupyí shut sùm lhum, mautsúng shut sùm lhum kut hpông tô ri.

¹⁴ Myuq xêwâm haù gi, awang raxe í lhùm èq hí tô é nghut luí, awang haù pé má, Sauzô é lagyo raxe í yuq é myíng dap tô bum ri.

¹⁵ Haù ngo lé nyo é maumang lagyo gi, myuq lé le, hau é hkum pé lé le, xêwâm pé lé le, ké rà matú, kê é jung hîng jâm-yang ralhúm chung tô ri.

¹⁶ Myuq haù gi, myi chyûn dut má é nghut luí, hîng hpyang làm hpyang rawúi wúi za dut má é nghut ri. Maumang haù gi, myuq lé jâm-yang hau èq kê wú é hkûn, hîng hpyang, làm hpyang, myhâng hpyang banshoq 1400 dêng* kô bo ri;

¹⁷ yhang gi, haù byù kê é jung eq wúi é maumang lagyo é kê jung lé chùng mù, myuq xêwâm lé kê wú é hkûn, rasho myí xé myi dúng bo ri.

¹⁸ Myuq xêwâm haù gi, huhpé lungsenseng èq saí é nghut ri; myuq gi, hîng gyíng èq saí é nghut mù, myoqjâm su yhang sân-yúng ri.

¹⁹ Myuq xêwâm haù é awang pé gi, hpau jung lungsenseng ajung júng èq nhôn tô é nghut ri. Sâng-hí lhum gi, huhpé lungsenseng èq, í lhum nghù rà gi, nila (mauhkûng nyui su dut jung) lungsenseng èq, sùm lhum nghù rà gi, mahuya (noq é isâm myo jung) lungsenseng èq, myí lhum nghù rà gi, myaq (huí nyui nyui é jung) lungsenseng èq,

²⁰ ngo lhum nghù rà gi, nyhaù myoqjí su dut jung lungsenseng èq, hkyuq lhum nghù rà gi, pate-mya (nè é jung) lungsenseng èq, nyhit lhum nghù rà gi, huí muí muí é su dut jung lungsenseng èq, shit lhum nghù rà gi, myek-yoi (wuímau nyui su dut jung) lungsenseng

èq, gaù lhum nghù rà gi, utohpaya (bó huí húi é jung) lungsenseng èq, raxé lhum nghù rà gi, mahuya nyui lungsenseng èq, raxe ralhúm nghù rà gi, wakintu (mhan-haq nyui eq mauhkûng nyui nyhò tô é su dut é jung) lungsenseng èq, raxe í lhum nghù rà gi, (me me dut é jung) htihutu-nila lungsenseng èq mhôn tô ri.

²¹ Haù myuq hkum raxe í lhum gi, palhé raxe í cham nghut ri; hkum ralhúm gi, palhé rachâm èq saí é nghut ri. Haù myuq é hkyô mó gi, hîng jet èq saí é nghut luí, myoqjâm su duq san é hkyô nghut ri.

²² Ngò gi, myuq haù má noqkuq yhùm joq é lé a myàng, hkâsu mù gâ le, haù wum-o a-tsam dik shoq bò Sù Yhumsing Garai Gasang eq Sauzo gi, myuq hau é noqkuq yhùm nghut nyi é yanmai nghut ri.

²³ Haù Garai Gasâng é hpungwup shing kang gi, myuq haù má duqbó byí é htoq agó, Sauzo gi, myuq hau é myibung nghut é yanmai, myuq haù má gi, bui eq lhamó tsò byi a ra nghut ri.

²⁴ Haù byù myú pé gi, myuq haù duqbó é hkaù má hkyô wó so kó rà nghut lhê; haù myidâm htoq má é hkohkam pé gi, yhangmoq é hkikhkâm hkyô lé, myuq haù má yù lé kó rà nghut lhê.

²⁵ Myuq haù má gi, myín nghù é a joq é yanmai, myuq hkum myhí é le joq rà a nghut lo.

²⁶ Haù byù myú pé é hpungwup shing kang eq aróng lé, myuq haù má yù lé kó rà nghut lhê.

²⁷ Myuq haù má, a sanseng é hkyô haí le wó wàng rà a nghut é htoq agó, hoq hpu hkyô eq mhaù zô é hkyô kut é sù ó yuq le wó wàng rà a nghut; haù Sauzô é asakjihpán laiká buk má myíng bo é bang za wó wàng rà nghut lhê.

22

Asak Wúi Mó Làng

¹ Hau htâng, Garai Gasang eq Sauzô é hkohkâm-tanghkuq mai yui htoq ló luí, myuq hkaù má é hkyô mó gûng đông yui ló é, myoqjâm su sân-yúng é asak wúi mó làng lé, maumang lagyo haù, ngo lé tûn shit ri.

² Wuilàng í hpoq é má, ashi raxe í myú zuí é asak shigâm yuq tô é nghut luí, lhohkyap hkangmó ashi zuí ri. Hau htoq agó, shigâm haù pé má é ahaq pé gi, byù myú pé lé yâ gè rà matú nghut ri.

³ Nhîng é haí le a joq lo rà nghut lhê. Garai Gasang eq Sauzô é hkohkâm-tanghkuq gi, myuq hkaù haù má joq nyi rà nghut mù, Yhâng é dui-nhâng zoshâng wúi gi, Yhang lé noqkuq dojaù kó rà nghut lhê.

⁴ Yhangmoq gi, Yhâng é myoqdong lé myàng kó rà nghut é htoq agó, yhangmoq é

* 21:16 1400 dêng gi, Grik pé é stadia 12000 kô nghut ri.

ngelang má, Yhâng é myiêng kê tap é hui kó rá nghut lhê.

⁵ Myín ngû é le joq râ a nghut lo. Myi-bung duqbó byí é le, búi tsó byí é le, yhang-moq ra kó râ a nghut lo, hkâsu mù gâ le, haú Yhumsing Garai Gasang gi, yhangmoq lé duqbó byí nyí râ nghut lhê. Hau htoq agó, yhangmoq gi, pyat dedu ahtum abyuq up nyí kó râ nghut lhê.

⁶ Maumang haú gi, ngo lé, "Dang shí pé gi, lumgíng é dang eq tengmán é dang nghut lhê. Myiqhtoí pé é woi-nyí lé up é Yhumsing Garai Gasang gi, adê myáng má dut lò rá hkyô pé lé, Yhâng é dui-nhâng zoshâng wui lé tún shit rá matú, Yhâng é maumang lagyo lé nhang kat é nghut ri." ga tai ri.

Yesuq Jé Lé Lô Râ Hkyô

⁷ "Wú keq, Ngò gi, a myáng má jé lé lô rá nghut lhê! Laiká shí má bo é myiqhtoí dang pé lé châng kut é sù gi, hkungsô wó nyi ri."* gâ é lé, ngò wó gyô ri.

⁸ Haú hkyô pé lé wó myâng wó gyô é sù gi, ngò Yohan nghut lhê. Ngò gi, haú hkyô pé lé wó myâng wó gyô é hkùn, ngo lé, shí hkyô pé lé é maumang lagyo é hkyí wang má noqkuq râ matú paí gop é nghut lhê.

⁹ Nghut kôlhâng, yhang gi, ngo lé, "Haú su hkákut! Ngò gi, nàng eq le, náng é gumang myiqhtoí pé eq le, laiká shí má é mungdang pé lé châng kut é lhunglhâng bang eq le rahá, byinzùm dui-nhâng zoshâng ru nghut lhê. Garai Gasang lé noqkuq aq!" ga tai ri.

¹⁰ Hau htâng, yhang gi, "Laiká shí má bo é myiqhtoí dang pé lé, hkâzaú to lo, hkâsu mù gâ le, haú ahkyíng gi, chyâng lò bê nghut ri.

¹¹ A dīngmán é sù gi, a dīngmán é dōng xoq kut nyí sháng gaq; a sansēng é sù gi, a sansēng é dōng xoq dut nyí sháng gaq; dīngmán é sù gi, dīngmán é dōng xoq kut nyí sháng gaq; chyoyúng é sù gi, xoq chyoyúng nyí sháng gaq." ga ngo lé tai kyô ri.

¹² "Wú keq, ngò gi, a myáng má jé lé lô rá nghut lhê! Ngò gi, yuq hkanmó lé,

yhumsing kut é eq rajung za byi rá shigyáu chyunghuq chung tô lhê.

¹³ Ngò gi, Alhpa eq Omega nghut lhê, Sâng-hi eq Jihâm nghut lhê, Sâng-hi Awang eq Lô Htáng Sù le nghut lhê.

¹⁴ Asak shigâm má jé rá eq myuq hkaú shut hkúmdong mai wó wang jé rá ahkáng wó yú shoq, yhumsing é buhíng lé chī sán é bang gi, hkungsô wó nyi ri.

¹⁵ Shinggan má gi, hkui dōng nyi é bang, myoqheq hpaqchyí kut é bang, ashop é dōng gungsho zùm yap é hkyô shut é bang, byú sat é bang, hparà noq é bang eq mhaú é hkyô lé ô nau luí châng kut é bang lhunglhâng nyi bum akô nghut ri.

¹⁶ Ngò, Yesuq gi, haú noqkuq hpung pé lé, shí hkyô pé saksé hkâm shit sháng gaq ngû, Ngá é maumang lagyo lé, nungmoq chyáng nhang kat bê nghut lhê. Ngò gi, Dawiq é Amyit eq Awut Ashín le, haú duqbó é Bó-myhû le nghut lhê."† gâ é lé, ngò wó gyô ri.

¹⁷ Haú Woi-nyí eq myisik gi, "Lé aq!" gâ akô. Haú wó gyô é sù gi, "Lé aq!" ga sháng gaq. Wui shit sù ó yuq nghut kôle, lé sháng gaq; shuq nau é sù ó yuq nghut kôle, ahpaú byí a ra é asak wui lé, shuq sháng gaq.

¹⁸ Laiká shí má bo é myiqhtoí dang pé lé wó gyô é bang yuq hkanmó lé, ngò sidiq byí é gi: dang haú pé má, rajung jung kat jat é sù ó yuq chyáng nghut kôle, Garai Gasang gi, laiká shí má kê tô é wúm pé lé jé nhâng rá nghut lhê.

¹⁹ Myiqhtoí laiká shí má bo é dang pé lé, yu pyâm é sù ó yuq lé nghut kôle, Garai Gasang gi, laiká shí má kê tô é asak shigâm eq chyoyúng myuq má é yhang eq sēng é gú lé, yu pyâm byi rá nghut lhê.

²⁰ Shí hkyô pé lé saksé hkâm byí é Sù gi, "Nghut bê, Ngò gi, a myáng má jé lé lô rá nghut lhê." ga tai ri.

Amen. Yhumsing Yesuq é, lé lô aq ô!

²¹ Haú Yhumsing Yesuq é jeju gi, Garai Gasang é byu pé chyáng joq nyí sháng gaq ô! Amen.

* 22:7 Dang shí hkun gi, Yesuq tai é nghut lhê. † 22:16 Dang shí hkun gi, Yesuq tai é nghut lhê.